

本國學基
叢書明

書

九

L

116
3121.6
6/29

書叢本基學國

書

明


(九)

纂鱗維傳



3 1764 2001 0

行發館書印務商



明書卷一百十二

列傳三

儒林傳二

陳獻章傳

陳獻章字公甫。廣東新會人。母林氏。既孕將寢。父先一月卒。始生獻章。有穎質。目光如星。臉具七星如北斗狀。身長八尺。音吐清圓。喜讀書。一夕夢拊石琴。其音泠泠然。見一偉人笑謂曰。八音中惟石音爲難。今諸若是。子異日得道乎。因號石齋。年二十。舉正統丁卯廣東鄉試。明年戊辰。及辛未。赴試禮部。皆不第。一日讀孟子至天民者達。可行於天下。而後行之。歎曰。大丈夫行當如是。時聞江西吳與弼。遂往學焉。事母林氏甚謹。嘗在外。母有念。輒心動亟歸。果然。母頗信浮屠。及病。以佛事禱。獻章聽之。始從與弼。以伊洛成語及經史。百子爲教。獻章服其說而未悟。居半載。以母告歸。乃絕意舉子業。足跡不履城市。閉門讀書。徹夜不寢。小困則以水沃其足。如是者累年而未得。乃歎曰。學貴乎自得也。自得之。然後博之以典籍。則典籍之言。我之言也。否則典籍自典籍。而我自我也。遂築臺名春陽。日靜坐其中。又數年。久之。覺有所悟。然後見吾心常若有物。日用間種種應酬。隨吾所欲。如馬之御銜勒也。體認物理。稽諸聖訓。各有頭緒來。

歷如水木之有源委也。因答趙提學書云。吾始從吳聘君學。其於古聖賢之書。蓋無所不講。然未知入處。比歸白沙。杜門不出。日靠書冊尋之。忘寢忘食。如是者亦累年。而卒未有得焉。於是舍彼之繁。求吾之約。惟其靜坐久之。然後見吾此心之體。常若有物。於是渙然自信曰。作聖之功。其在茲乎。又致書賀給事中。言爲學須從靜坐。養出箇端倪。方有商量處。未可便靠書冊也。南昌張元禎聞其學。遣書問之。答以詩云。古人棄糟粕。糠粕非真傳。涉哉一勺水。積累成大川。亦有非積累。源泉自涓涓。至無有至動。至近至神焉。發用茲不窮。絨藏及源泉。吾能握其機。何必窺成編。學患不用心。用心滋牽纏。本虛形乃實。立本貴自然。戒慎與恐懼。斯言未云偏。後儒不省事。差失毫釐間。寄語了心人。素琴本無弦。蓋向所謂自得者。見乎此矣。成化三年丁亥。復遊太學。祭酒邢讓一日試獻章和楊龜山此日不再得詩。能饑謀藝穢。冒寒思植桑。少年負奇氣。萬丈摩青蒼。夢寢見古人。慨然悲流光。吾道有宗主。千秋朱紫陽。說敬不離口。示我入德方。義利分兩途。析之極毫芒。聖學信匪難。要在用心藏。善端日培養。庶免物欲戕。道德乃膏腴。文章固糝糠。俯仰天地間。此身何昂藏。胡能追逸駕。但能漱餘芳。特此木鑽桑。其如磐石剛。中夜攬衣起。沈吟復徬徨。聖途萬餘里。髮短心苦長。及此歲未暮。驅車適康莊。行遠必自邇。育德時含章。爾來十六載。滅迹聲利場。閉門事探討。蛻俗如驅羊。隱几一室內。兀兀同坐忘。那知顛沛中。此志敬莫強。辟如濟巨川。中道奪我航。顧茲一身小。所繫乃綱常。樞紐在方寸。操舍決存亡。胡爲漫役斷。喪良可傷。願言各努力。大海終回狂。讓得之驚曰。龜山不如也。明日颺言於朝。以爲真儒復出。由是名震京師。一時名士如羅倫。莊景章。懋賀。

欽輩皆樂從之遊。欽時爲給事中。聞獻章論。卽日抗疏辭官。事爲師。旣家。遂肖獻章像懸於別室。有大事必啓焉。獻章自京歸。四方學者聚徒日盛。東西兩藩部使以及藩王島夷宣慰。無不致禮於其廬。獻章日與門生講學。或賓友論天下古今事。每至漏下。麀麀不少倦。時江西布政陳煒修復白鹿洞書院成。以書幣聘爲十三郡士者師。謝不往。進士姜璘以事使貴州。取道如白沙見之。出語人曰。吾聞人多矣。如先生者。耳目口鼻人也。所以視聽言動。殆非人也。至京師。人問之。對曰。活孟子。活孟子。十八年壬寅。廣東布政彭韶薦於朝。謂其潛心聖賢之書。洞達事物之理。心術正大。識見高明。涵養有素。德性堅定。上卽命有司以禮勸駕。未及行。巡撫都御史朱英又交章薦。遂就道。至京師。年已五十六。朝廷敕試吏部。疾不果赴。乃上疏略云。臣母以貧賤早寡。俯仰無聊。殷憂成疾。老而強劇。使臣遠客異鄉。臣母之憂日甚。愈憂愈病。愈病愈憂。憂病相尋。理難長久。又以病軀憂老。年未暮而氣則衰。心欲爲而力不逮。夫內無攻心之疾。則外不見從事之難。上有至仁之君。則下多曲成之士。疏入。除翰林檢討。親終疾愈。來供職。遂歸。弘治庚申卒。年七十三。學者稱爲白沙先生。獻章初從吳與弼。苦支離。比歸。自得主靜工夫。故凡教人。必令靜坐。以養其端。嘗曰。人之所以學。欲聞道也。求之書籍而弗得。則求之吾心可也。惡累於外哉。此事定要覷破。若覷不破。雖曰從事於學。亦僞人耳。斯理識時。爲己者信之。詩文輩未習著述等路頭。一齊塞斷。一齊掃去。毋令半點芥蒂於胸中。然後善端可養。靜可能也。終一意勿忘勿助。氣象將日佳。造詣將日深。所謂至近而神。日用而不知者。自此迸出面目來也。其語門生林光曰。終日乾乾。只是收拾此而已。此理干涉至大。

無有內外。無有先後。無一處不到。無一息不運。得此櫛柄入手。更有何事。往古來今。四方上下。一齊穿紐。一齊收合。隨時隨處。無不是這充塞。舞雩三三兩兩。正在勿忘勿助之間。曾點些活計。被孟子一口打併出來。使都是鳶飛魚躍。若無孟子工夫。驟而語之。以曾點見趨。一似說夢。自此以往。更有分殊處。合要理會。嘗曰。有學無學。有覺無覺。得山莫杖。臨溪莫喝。蓋佛偈矣。獻章晚年。豪於詩興。若大小遠近。喜愛哀樂。山水花木。禽鳥蟲魚。每每發之詞章。及語門生直截上達一節。皆玄虛妙旨。新奇可駭。究竟難爲事業。如云。耳目無交不展書。此身如在太清居。後學高明之士。一入其說。非惟目程。朱爲老生。將置六經芻狗之矣。流而爲猖狂。一得志。恐荀卿之門有李斯。所謂害於其政。害於其事者。不可勝言矣。楊廉曰。朱子謂康節之學。其骨髓在皇極經世。其花草是詩。若夫胸次高明。識見洞徹。則誠所謂振古之豪也。近年陳白沙棲遲衡門。優遊卒歲。於吟詠諷誦之際。每稱堯夫不置。則所以慕其爲人者。已非一日矣。予喜其所爲詩。暇日擇錄若干首。間以數言釋之。用備觀覽而已。若白沙之胸次。識見。骨髓。花草。堯夫不堯夫。必有知之深者。而不踈乎余之言也。其爲贊則曰。有許象山。吾嘗竊識。儒以爲禪。佛謂無事。公學所期。自得爲至。箋經注書。非其所事。平生議論。詩以見意。此即語錄。無所隱秘。堯夫法門。懷卷隨世。何椒邱致羅一峯書云。近得陳公甫二書。及其門人林縉熙寄公甫書。僕尋繹數日。深喜公甫玩心高明。非俗儒所及。斯道之傳有望矣。但書中所言。有不能無可疑者。夫道之難言也。尙矣。中庸曰。天命之謂性。率性之謂道。是則所謂道者。不外乎性命。非窈冥昏默之謂也。又曰。君子尊德性而道問學。是則所以入道者。不外乎存心致知。

非有甚高難行之事也。白濂、洛、關、閩諸大儒繼作。其於道之全體大用。與凡所以入道之方。發明詳且盡矣。儒者世守之。毋庸異說也。今公甫之書云。夫道至近而神。至無而動。又曰。虛其本也。致虛所以立本也。得非老、莊虛無之說與。又曰。不須廣覽前言。徒亂心目。得非子靜不必讀書之說與。又曰。僻處作室。靜處用功。如是則學道者必如仙翁釋子。絕類離倫。乃可以得道歟。至於緝熙之書曰。終日靜坐。杜門面壁。無乃禪家之意歟。又曰。端默踰月。從此得些光景。無乃佛氏頓悟之說歟。凡此數說。參諸濂、洛、關、閩之書。誠爲可駭。不知公甫何爲而然也。近世儒者所學。詞章而已。潛心道學者。惟關下與公甫。廷祥數君子耳。而公甫之說。又如此。豈所謂智者過之耶。羅整菴曰。近世道學之倡。陳白沙不爲無力。而學術之誤。亦恐自白沙始。至無而動。至近而神。此白沙自得之妙也。愚前所謂徒見夫至神者。遂以爲道在是矣。而深之不能極。而幾之不能研。雖不爲白沙而發。而白沙之病。正恐在此。章楓山嘗爲余言。其爲學本末。固以禪學目之。胡敬齋攻之尤力。其言皆有所據。獻章之爲學如此。獻章授檢討歸。一出都門。便張蓋乘傳作勢。人譏之。

吳與弼傳

吳與弼字子傳。江西崇仁人。父溥。爲國子司業。與弼自幼莫異。年十九。見伊洛淵源錄。遂慨然欲爲聖賢之學。及觀明道亦嘗有獵心。益知聖賢之必可學。遂棄舉子業。日玩四書諸經諸儒語錄。尤邃於易。嘗處一小樓。收斂身心。沈潛義理。其詩曰。九仞始一簣。千里方跬步。又曰。誠當通鬼神。志當貫金石。蓋不下樓。

者二年。尤以刻行著稱。嘗省親太學。粗衣敝履。人莫識其爲少司成之子。動履效古。隱不欲仕。獵有時名。陳獻章師事之。正統景泰間。僉事何自學等累薦不出。天順初。石亨有寵。門客謝昭請亨效宋蔡京招楊龜山故事。得致名士自翼。亨信其說。一日。議事內閣。談及山林處士。大學士李賢首薦與弼。亨慨然欲薦之。遂懇賢代草。明日奏入。又數日上問賢曰。吳與弼何如人。對曰。儒者之高蹈。請效古聘入朝。上頷之。是冬十月。遣行人曹隆奉敕書往聘。與弼幡然入京。戴尖頂闊簷棕帽。賢首咨以下學上達。與弼曰。且莫說上達之妙。只說下學事。賢笑曰。老先生亦記注不得。已而上問賢與弼常授何官。賢對曰。今東宮講學。正宜老成儒者輔導之。明日。詔吏部授以左春坊左諭德。辭不拜。尋召入文華殿。從容賜問。對亦無甚奇。時上諭之曰。久聞高誼。特聘爾來。如何不就職。與弼以疾辭。因遣太監牛玉以文綺羊酒柴米送之。館既就。穀仍具疏三辭。一日。賢往叩其所以不就之故。與弼謂敕書重以伊傅之禮聘。卻以此職授之。故不受。賢曰。如此亦固執矣。朝廷待先生當大任。今必欲如傳說伊尹作宰相。勢不能行人。皆失望。不若且就宮僚。若果有建明。則大任以漸而至。與弼竟不願除。遂稱病。邸兩月餘。乃疏六事欲進。過賢第。適尹直。邱濬至。坐良久。二人欲退。與弼揖之曰。大人先出。吾有私語與李先生商量。二人遂別。與弼門人黃順中送之。既出去。直卻步謂順中曰。帽非土服。吳先生何爲乃爾。順中曰。遮日耳。直又曰。公事則公言之。私事則不可言。況處士可語私事於宰相前乎。順中曰。非他私事。只說決去就耳。直曰。去就當自決。豈可求決於宰相。順中曰。吳先生見朝廷授以諭德。不允其辭。意得先生終後把作得住。方可就職。故來問耳。直曰。把作得

住否亦豈李先生所能預料。此當自度才力何如耳。適見所白六事，皆經生之恆談，無大裨於治教。且詞語寂寥，學術可知。不若勸其終隱，免致他日實不副名。貽笑斯文。順中曰：諒不可留。與弼日懇賢爲乞歸。一日，賢於上前從容言之。上曰：果如此，亦難強也。復召入文華殿，賜敕嘉之，資以銀幣，丁甯無忘著述。以繼前賢。遂遣行人王惟善護歸。仍命有司月給米二石以贍之。陛辭，復條陳十事以進。與弼旣家居，益自多。頗有傲世之志。或曰：中貴權要厚遺之，輒造拜。又藉朝紳名刺爲一帙，語人曰：傳諸子孫，見一時之榮。以故士論疑之。陳真晟聞其名，擔負入南昌，見張元禎。因元禎語，遂不見。番禺人張瓚守撫州時，與弼以弟奪其田，乃自襪冠，蓬首襲衣束裙，雜稠人中，跪訟府庭。瓚閱狀，始知其爲與弼。下堂禮之。未幾，又訴布按二司。張元禎爲書切責。首云：拈起此筆，怒氣沖天。末云：當上告素王。正名討罪。豈容先生久竊虛名，爲名教中之罪人。吾且按兵以待。成化五年己丑冬十月十七日卒。年七十有九。學者稱爲康齋先生。說者謂與弼之學，未究其所歸。然好異而不苟，苦心以招譽，亦近世之士也。陳白沙云：東海平日自謂具隻眼，能辨千古是非人物。而近遺夫康齋，又何如。康齋易知耳。予年二十七遊小陂，聞其論學，多舉古人成法。由濂洛關閩以上達洙泗，遵師道，勇擔荷，不屈不撓，如立千仞之壁。蓋一代之人豪也。其出處大致不暇論。然而世之知康齋甚少。如某輩往往譏呵太甚，羣喙交競，是非混淆，亦宜東海之未察也。微吾與蘇君今日之論，則東海之於康齋，其憂嬰之孔子乎。了翁之伯渚也。門人敘述與弼，不過著其胼胝稼穡，遭風危坐，尊嚴師道，不受束修，詩作雅渾，奇古而已。尹魯齋曰：與弼自應聘後，矜肆無復故態。或者陳建曰：與

鶴文集序記諸作。與夫疏陳十事。皆枯淺寂寞。草率粗略。無所發明。至於日錄所記。每多說夢。而錄首卽說夢。見文王。孔子與朱子。中間復言夢孔子來訪。朱子來訪者。再至三。爲攀聖附賢。嗚呼。羅整菴曰。吳康齋之決去。所得亦已多矣。然好學如康齋。節操如康齋。何可多得。當取其大而略其細。袁表云。昔楊時赴蔡京之薦。爲朱子所讖。與齋雖不拜官。然石亨之薦。不可出也。其學無所概見。所著康齋語錄及上言十事。皆常談無過人者。其惡宦官釋氏及病宋末語錄之繁。可謂有見矣。要之力學修行。不失爲儒者。

邱濬傳

邱濬。字仲深。廣東瓊山人。濬性最穎悟。一目數千言。輒成誦。六歲能詩。長博涉羣書。殆極該洽。嘗著論謂許衡仕元。無能改於其俗。又不能行己之道。不仕可也。宿儒見之大稱歎。以爲先儒未有言及此者。舉正統廣東甲子鄉薦第一。登景泰甲戌二甲第一名進士。選庶吉士。授編修。預修寰宇通志。時兩廣經年用兵無成。因條事宜上。內閣李賢爲代奏。上嘉納之。付所司舉行。成化改元時。以九載秩滿陞侍講。修英宗實錄。或曰。于少保死以不軌。盡正其罪。濬曰。己巳之變。可無謙哉。謙功大。過亦不可掩。竟錄其實。實錄成。進侍講學士。五年。轉學士。乙未。主會試事。丁酉。續編宋元通鑑綱目成。以原官管祭酒事。踰十年。尊師道。端士習。時士子爲文。多以奇怪相高。至不可句。嘗考南京鄉試及會試。一切痛裁。怨誹不恤。以是文體復渾厚。論者謂師道尊嚴。無愧李時勉。而綜理微密。則時勉不及。十六年。進禮部右侍郎。仍掌國子事。嘗謂真西山大學衍義有資治道。而治國平天下之事缺焉。乃采經傳子史有及於治平者。分門類輯。附以己

見名曰大學衍義補。丁未。孝宗卽位。首奏是書。孝宗覽之。嘉答曰。卿所纂書。考據清。論述該博。有補政治。朕甚嘉之。賜白金文紵。擢禮部尙書。掌詹事府事。充副總裁官。修憲宗實錄。時年七十餘矣。弘治辛亥。實錄成。加太子少保。冬十月。命兼文淵閣大學士。入內閣典機務。明年壬子春。上疏陳時政之弊。略謂我太祖開國。洪武建元。歲在戊申。我皇上登極。改元之歲。適與相符。天意殆欲陛下紹休太祖也。邇觀漢唐。宋中世。繼體之君。皆生於世道豐亨之際。宮闈逸榮之中。不歷險阻。不經憂患。天示變而不知畏。民失所而不知恤。人有言而不知信。好尙失其正。用度無其節。信任非其人。因循苟且。而無奮發之志。顛倒錯亂。而甘爲敗亡之歸。故也。今成化間。彗星三見。逼掃三垣。地震無慮五六百次。變不虛生。必有其應。天人相與。甚可畏也。臣願體上天仁愛。念祖宗基業。端身以立本。清心以應務。謹好尙。勿流於異端。節財用。勿至於耗國。公任用。勿失於信聽。禁私謁以肅內政。明禮義以絕邪姦。慎儉德以懷永圖。勤政務以弘至治。庶可以回天災。消物異。帝王之治可幾也。因擬二十一條。設爲諭答之詞。奏之。疏入。上悅。卽付諸司議行。七年甲寅。兼少保。加太子太保。改戶部尙書。武英殿大學士。屢以疾乞休。凡十三疏。皆不允。會吏部奏黜在外大小官幾二千人。因言於上。此非唐虞九載三考之法。又非祖宗制。請凡歷官未及二載者。且復任。雖經一考。非貪暴蹤跡顯著者。且勿斥。一時不肖者皆喜。然自是貪殘日肆。吏部尙書王恕執不肯。濬滋不悅。會醫官劉文泰以醫出入濬家。文泰失職。誣訐。恕人疑濬嗾之也。以故臺諫交劾。濬又乞休。不許。乙卯春二月戊午卒。年七十六。贈太傅。特進光祿大夫。左柱國。諡文莊。官其孫榮爲尙寶寺丞。有瓊臺類藁。世史

正綱家禮儀節。朱子學的及大學衍義補行於世。濬爲學。以自得爲本。以循理爲要。平生有三不可及。一好學。至老手不釋卷。一介慎。絕不爲中官作文。一廉靜。京師城東私第。始終不易。歷官四十載。俸祿所入。惟得指揮張淮一園。然立朝與人。多好持己議。以此大不悅於人。王鏊謂濬學於子史。無所不窺。而尤熟於國朝典故。議論高奇。人所共賢。必矯以爲非。人所共非。必矯以爲是。能以辨博濟其說。亦自恃其才。故對人語。滾滾不休。人無敢難者。論秦檜曰。宋家至是。亦不得不與和親。南宋再造。檜之力也。論范文正。則以爲生事端。岳飛則以爲未必能恢復。論郊祭。則以類於上帝。類字強訓。爲同元始。以同宰不爲瀆。不可以莽廢。又謂夏至祭地。則地先天食。蓋褊滯立論。好異類如此。其最得者。黜元不與正統。許衡不當仕於元。亦前人所未發也。又謂公進大學衍義。補得進尙書。李廣幸於孝宗。因之得入內閣。與同僚爭。每事欲有紛更。時王恕重望於天下。濬每憎之。莊景乞休家居。濬嫉之。嘗曰。引天下士夫背朝廷者。景也。吾當國必殺之。甲寅。景被召入京。大學士徐溥以爲言。濬語人曰。我不識所謂定山也。其量如此。獨謂其性剛不苟取。而恬於仕進。年七十以學士終。濬嘗言。明朝相業。三楊踴矣。然當其時。南郊叛逆。軒龍易位。敕使旁午。瀕泛西洋。曾無一語。權歸常侍。遠征麗川。兵連禍結。極於土木之變。誰實啓之。其持正論如此。

羅倫傳

羅倫。字彝正。江西永豐人。性慷慨樂善。自幼厲志聖賢之學。遊邑庠。爲舉子業。嘗歎曰。舉業非能壞人。人自壞之耳。處空而志愈奮。吉安知府張瑄嘉其志。憐其貧。因遺之金。謝弗受。成化丙戌。年三十六。舉會試。

第三名及對策。禮慶數千餘言。引程正公語。人主一日之間。接賢士大夫之時多。親宦官宮妾之時少。宰執見之曰。宜截下句。倫不從。時讀卷官吏尙書王一夔。以程敏政卷字精楷。力贊宜居首。大學士李賢曰。論文不論書。遂奏名第一。授翰林修撰。會賢報憂。詔奪情起復。諫者不敢言。倫詣賢私第。告以不可。賢始以其言爲然。上疏乞終制。不允。倫復上疏。略以爲臣聞朝廷援楊溥故事起復李賢者。臣竊謂李賢大臣起復大事。綱常風化之所繫。天下後世之所監。伏讀聖策有曰。朕夙夜惓惓。欲正大綱。舉萬目。使人倫明於上。風俗厚於下。陛下是言。真可爲國家扶綱常。爲天地立民極。爲萬世開太平者也。然欲正大綱。莫先於明人倫。厚風俗。欲明人倫。厚風俗。莫先於孝。孝者天之經也。地之義也。國而非此。不可以爲國家。而非此。不可以爲家人。而非此。則禽獸矣。中華而非此。則夷屬矣。故先王制禮。子有父母之喪。君命三年。不過其門。所以教人孝也。古者求忠臣於孝子之門。誠以居家孝。故忠可移於君。爲人臣者。未有不孝於親。而能忠於君者也。爲人君者。未有不教其臣以孝。而能得其臣之忠者也。昔子夏問三年之喪。金革之事。無避禮與。孔子曰。魯公伯禽有爲而爲之也。今以三年之喪。從其例者。吾弗知也。陛下於李賢。以金革之事起復之。歟。則賢所未聞也。以國家大臣起復之。歟。則禮未之見也。以故事大臣當起復。歟。則爲君者當以先王之禮教其臣。爲臣者當據先王之禮事其君。臣不暇遠舉。請以宋事言之。仁宗嘗以故事起復富弼矣。弼之辭曰。何必違故事以遂前代之非。但當據禮經以行今日之是。仁宗卒從其請。孝宗嘗以故事起復劉珙矣。珙之辭曰。身在草土之中。國無門庭之寇。難冒金革之名。以私利祿之實。孝宗允其辭。此二君

者。未嘗拘當代之故事。以強起其臣。此二臣者。亦未嘗循當代之故事。以苟從其君。故功澤加於當時。名聲垂於後世。史筆書之。以爲盛事。士夫誦之。以爲美談。此無他。君能教其臣以孝。臣有孝可移。以忠於君也。自是而後。無復禮義。史嵩之欲援例起復爲丞相。王黼起復爲執政。陳宜中起復爲宰相。賈似道起復爲平章。此數君者。未嘗不以當代之故事起其臣。此數臣者。未嘗不以當代之故事從其君。然生靈以之而困。天下以之而亂。社稷以之而傾。貽禍於當時。遺臭於後世。此無他。君不教其臣以孝。臣無孝可移。以忠其君也。詩曰。殷監不遠。在夏后之世。臣願陛下以宋爲鑒。使賢盡孝於君。親爲萬世之大臣。陛下以禮處賢。爲萬世之大君。此臣之願也。亦賢之分也。若以賢身任天下。四方多虞。而起復之與。則仁宗之時。契丹桀驁。未爲無虞也。孝宗之時。金人強盛。未爲無事也。陛下必欲賢任天下之事。不專門內之私。則賢身不可起。口則可言。宜降溫詔。俾如劉琪。不以一身之戚。而亡天下之憂。使賢於天下之事。知之則必言。言之則必盡。陛下於賢之言。聞之則必行。行之則必力。則賢雖不起復。猶起復也。使賢於天下之事。知之而不言。言之而有隱。陛下於賢之言。聞之而不行。行之而不力。則賢雖起復。猶不起復也。陛下無謂廟堂無賢臣。衆庶無賢士。君孟也。臣水也。孟圓則水圓。孟方則水方。君好諫則臣直。好諛則臣佞。陛下誠能於退朝之暇。清閑之燕。略崇高貴重之勢。親直諫博洽之士。開懷延納。降禮尊賢。講聖學之大要。明君道之急務。詢政事之得失。察生民之利病。訪人才之賢否。考古今之治亂。諷風俗之盛衰。咨邊方之緩急。舍一己之見。而以衆人之見爲見。舍一己之知。而以衆人之知爲知。順旨之言。則察而逐之。使貢諛保寵者。無以

自容忤旨之言。則容而受之。使輸忠爲國者。得以自盡。羣策畢陳。衆賢並用。則賢所欲言者。人亦能言之。又何必違先王之禮經。拘先朝之故事。損大臣之名節。虧聖明之清化。而後天下可治哉。朝廷舉措。大臣出處。天下觀之。史筆書之。清議雖不行於朝廷。天下以爲何如。公論雖不行於今日。後世以爲何如。誠不可不懼也。夫賢之起復。猶誘之曰。負天下之重任。應先朝之故事。比年以來。朝廷以奪情爲常典。縉紳以起復爲美名。食稻衣錦之徒。接踵廟堂。據禮守經之士。寂寥無聞。不知此人於天下之重何關耶。此事於先朝之故事何所據耶。先朝自楊溥之外。未聞起復某人爲某官也。今起復之官。何如此之多耶。以其高謀遠慮。足以建天下之大義耶。何未見其發也。以其折衝禦侮。足以定天下之難爲耶。何未見其能也。以其直節勁氣。足以勵天下之士習耶。何未見其有也。以其深仁厚澤。足以浹天下之民心耶。何未見其行也。以其忠言讜論。足以裨朝政之闕失耶。何未見其敢也。陛下何取於斯人而起復之哉。意其平昔之計。不過阿媚權勢。豫爲己地。及遭通喪之時。則必曲爲諛說。上蒙天聽。不曰。此人辦事。理可奪情。則曰。此有故事。例當起復。既遂姦計。略爲虛辭。一見俞允。歡然就位。未有堅請如富弼。懇辭如劉珙者也。且婦於舅姑。喪亦三年。孫於祖父母。禮有期服。奪情於夫。初無干其妻。起復於父。初無干其子。今或舍館如故。妻孥不動。乃號於天下曰。本欲終喪。朝廷不容。雖三尺童子。臣恐其不信也。爲人父者。所以望其子之報。豈擬至於此哉。爲人子者。所以報其親之心。豈忍至於此哉。枉己者。未能直人。忘親者。豈能忠君。望其直人而先枉己。望其忠君而先忘親。陛下何取於斯人而起復之哉。何不使之全孝於家。而後移忠於國哉。昔富

闕有母喪。韓琦言起復非盛世事。而富公竟不可奪。史嵩之遭父喪。太學生留之至數百人。嵩之竟乞終制。今大臣起復。羣臣不以爲議。且從而爲之辭。所以豫爲己地也。羣臣起復。大臣不以爲非。且從而成其事。亦所以豫爲己地也。大臣旣無忌。羣臣復何慚。羣臣旣有例。大臣復何辭。今之大臣。固韓琦、富弼之罪人。今之羣臣。又太學生之罪人也。上下成風。混然同流。致有公無起復之例。私爲匿服之計。例在薄恩。則匿服以受封。例在得官。則匿服以聽選。例在撥科。則匿服以應舉。例在遷官。則匿服以候選。例在求賄。則匿服以之任。率天下之人。爲無父之歸。臣不忍聖明之世。風俗之敝。綱常之壞。一至於此也。夫愛親之心。孩提有之。短喪之說。下愚恥言。況在冠裳之列。聞聖賢之道。肯於其親無三年之愛乎。特以貪利。遂至忘親。孔子曰。是可忍也。孰不可忍也。又曰。上有好者。下必有甚焉者。陛下誠能守先王之遺禮。遵祖宗之成憲。待之以禮義。而不糜之以爵祿。激之以廉恥。而不誘之以名位。使積習之弊。脫然以除。則忠孝之心。油然而生。向雖忘其親。今則爲孝子。向雖後其君。今則爲忠臣。亦理之所必有。勢之所必至也。特在乎陛下轉移之間。何如耳。天子者。以孝治天下者也。大臣者。佐天子以治天下者也。欲孝行於天下。必先行於大臣。臣願陛下不惑羣議。斷自聖衷。取回內臣。許令李賢、依富弼、劉珙故事守制。其餘已起復者。悉令終喪。未起復者。悉許守制。脫有金革之事。亦從裏衰衣制。任國事於外。盡心喪於內。將見朝廷旣正。則天下自正。大臣旣行。則羣臣自效。人心天理。不可泯滅。誰肯甘心爲不孝之子。靦顏爲不忠之臣乎。綱常由是而正。人倫由是而明。風俗由是而厚。士心由是而純。紀綱由是而張。國勢由是而一矣。忤旨謫泉州市舶司。

提舉士論榮之。直聲大震。三年丁亥春。召還。會有奏事者。辭連倫。下錦衣獄。一鎮撫見之。驚曰。羅先生其可至此乎。即日趨成讖之。倫得免。仍爲南京翰林院修撰。居兩月。以疾乞歸。不允。六年庚寅。辭益切。許之。旣歸。卽金牛山結茅茨數間以居。取給田畝。往來共樵牧。若無意於世者。日注經。與諸生講習不倦。用度空乏。恬不介意。其所自得充然。不爲勢利汨汨也。倫之學。專宗朱子。陳獻章嘗遺之書曰。先生欲理會著述及諸外事。莫若且打疊令我潔潔淨淨。先生平昔所篤信者。非朱紫陽乎。非全放下。終難湊泊。非紫陽語乎。倫亦不以爲然。成化十四年九月二十四日。以疾卒。年四十八。學者稱爲一峯先生。正德中。追諡文毅。倫不視惡色。不聽惡聲。不恥惡衣惡食。與爲子者言。依於孝。與爲臣者言。依於忠。言居官必及民所疾苦。大率義之所在。毅然必爲。人之毀譽歡戚。事之成敗利鈍。己之生死禍福。皆所不顧也。胡敬齋稱所志不凡。任道甚力。章楓山曰。羅一峯氣魄大。感動得人。嘗謂其可正君善俗。我輩只可修政立事。先生剛毅之資。似程伊川。劉元城。至其脫官甘貧。學以考終。充然有箠瓢陋巷之風。足以廉頑立懦。豈非吾道之攸賴耶。陳獻章謂倫才大不及志。考成化間。論德行文章氣節者。嘗以陳、羅並駕。陳克菴身旣貴顯。燕會唯服先人故衣冠。客至瓦器蔬食。相對無愧色。自河南聞喪。還行裝蕭然。惟車一輛而已。及之官廣東。騎驢出都門而去。其儉約有寒士不及者。羅一峯常欲做古置義田以贍族。而力不逮。或助之堂食之錢。則謝而弗受。遇乞人死於塗。輒解衣以覆之。家居時。有客晨至。留具飯。其妻語其子曰。瓶粟罄矣。之旁舍干之。比舉火。日已近午。亦曠然不以爲意。蓋二人所得同。故其趨向同。而於世味亦同。或問王廷相以陳克菴。

曰。節行處世。問羅一峯曰。學術術道。請折諸聖。曰。由士賢充之。仁以爲己任。死而後已者乎。由彙正充之。行一不義。殺一不辜。而得天下。不爲者乎。蓋躬行君子也焉耳。昔楊士奇作相時。以百官祿薄。議得折柴薪銀。後遂爲例。及倫獨不受。

周瑛傳

周瑛。字梁石。莆田人。爲學先以敬收斂此心。然後博物以窮理。而反約以施博。造詣篤至。瑛發科最遲。登成化五年己丑進士。授廣德州知州。首軫民惑於鬼神。著祠山雜辨。又民不知葬祭法。溺殺女子。著教民雜錄。臨政有聲。擢禮部郎中。遷撫州知府。調鎮遠府。累官至四川右布政使致仕。瑛嘗自撰墓志銘曰。年過四十始仕。庶幾觀斯道之大全。而求見夫子所謂一者。及領鄉薦。遂沒仕路。而初志爲始奪云。又謂其居官行己。頗知畏天命。凡事每自檢於心。求合於天。而人有不及知者。惟不及知而暗合於天。則恆自喜曰。此吾學之得也。先是與陳獻章友。時獻章首倡習靜之說。一時樂其說之新奇。士翕然聽之。嘉魚李承箕。字世卿。往從之遊。得其說歸。遂居大崖山以老。謂靜則其心虛。心虛則理見。故視六經若土苴。視形骸若仇敵。視聖人所以立禮義之防。若纏束網縛。欲撤去之。瑛亦知承箕致書云。白沙予友也。二十年前。日相往返。瑛見其神清氣完。心地定壘。往往以其心觀天下之動竊。以爲古閉關人也。今世卿從白沙遊。不知其說果出於白沙否。果出白沙。吾欲盡己之說。不當祖述其說而申告之也。瑛聞人心無外。以爲有外者非也。聖人靜有以立天下之大本。動有以行天下之達道。由體及用。以一貫之。自餘爲學。皆由博以反。

約博者萬殊也。約者一本也。求諸萬殊而後一本可得。一本既得則所謂萬殊者亦可推此以貫之矣。瑛請得以言其功程次第。蓋始學之要以收放心爲先務。收放心居敬是也。居敬則心存。聰明睿智皆由此出。然後可以窮理。所謂窮理者非謂靜守此心而理自見也。蓋亦推之以極其至焉耳。孟子曰。萬物皆備於我矣。此言人心無外也。不卽物以窮理。其能盡此心之體乎。故由情性之微以及形體之粗。自食息之末以及綱常之大。自六經之奧以及天地萬物之廣。皆不可不求其理。求其理謂其自然。與其當然。又於自然當然求所以然。積累既多。自然融會貫通。而於一體者亦自得之矣。一本固非學者所敢言。然聞之中庸有曰。喜怒哀樂之未發謂之中。又曰。上天之載。無聲無臭。至矣。此譬如穀種。雖自塊然。而根苗花實皆聚於此。又如雞卵。雖自渾然。而羽毛嘴角皆具於此。及其發見於行事。在聖人體用一貫。在學者未免差互。蓋在己者有所拘蔽。故所發不無偏重之殊。在外者有所搖奪。故所施不無遷就之異。然而既復本源。則於處善亦安。循理亦樂。至於患難事變。雖以死易生。亦甘心爲之。此聖學之大略。今不務此。乃塊然靜坐。求畢體用之學。吾見其難矣。瑛自契於中。而見乎辭者如此。瑛嘗講邵氏蔡氏注經世管鑰。律呂管鑰。又苦字學無師承。乃博采諸說。爲字書管鑰。其他詩文。有水雲薰金臺薰金陵薰桐川薰臨川薰若干卷。

明書卷一百十三

列傳三

儒林傳三

賀欽傳

賀欽字克恭。世居定海。其先戍廣甯。遂爲遼西人。少穎敏。沈厚好學。喜讀近思錄。成化二年。舉進士。爲戶部給事中。見陳獻章與論學。歎曰。至性不顯。寶藏猶蠶。世卽用我。而我奚以爲用。卽日上疏解官去。執弟子禮事獻章。旣別。肖其像懸室中。事之甚謹。宏治初。薦授陝西叅議。撫治商洛。以老病母憂。上疏懇辭。且陳四事。一曰。資眞儒以講聖學。二曰。薦賢才以輔治道。謂新會縣歷事監生陳獻章。天性高明。學術純正。誠當世之大賢。爲士大夫之矜式。宜以非常之禮起之。或任內閣。俾參大政。或任經筵。使養君德。三曰。遵祖訓以處內官。謂內府監司局庫衙門。載之祖訓。內官條其職掌。不過洒掃供養。關防出入等事而已。近年如王振。喜甯。舒良。王誠。曹吉祥。牛玉。汪直。尙銘。梁芳。陳喜輩。或陷主虜庭。身叛賊境。或主易儲君。禁固南內。或謀爲不軌。賄易后妃。或邀功啟釁。流毒邊徼。或恃寵招權。納賂不貲。或引用左道。蠱惑上心。或導進淫巧。盜虛府庫。此其陷君誤國。蠹政殃民。昭昭在人耳目。宜深鑒已往之弊。內不可使職掌奏牘。得預

大政外不可使鎮守地方。掌握兵權。則非惟國家無疆之福。亦宦官無疆之福也。四曰。興禮樂以化天下。謂陛下紹基之初。舉行朱子喪葬之禮。但初政之施。方發其端。而頽敗之俗。尙仍其舊。禮讓之化。未行。淫穢之風日盛。乞申明正禮之當行。革去教坊之俗樂。疏入。報聞。允其辭。正德四年。劉瑾括田遼東。人驚疑思亂。義州以守臣貪。故遂先發。聚衆縱火劫財。大擾。然相戒曰。毋入東街。驚賀黃門。欽聞往諭之曰。渠輩既知悔。卽不殺人。可解鎮城。當有人至。爾輩直拜跪求生。慎無殺人。已而撫鎮人果至。須臾有言軍至且勦者。衆復呼譟曰。賀黃門無謾語。又趨跪欽里門。欽曰。城中擾亂至此。鎮城焉得不發兵。雖至。爾等第不殺人。必有爾無恐。衆遂定。城中不傷一人。欽不勝博覽。專心經書小學。靜思默識。反身寔踐。冠婚喪祭。遵用家禮。其與聖賢之道。多所申暢。鄉人皆興於行義。老更好易。究心精粹。手不釋卷。著易說。卒。鄉人祠之。凌溪釣臺。稱爲醫閩先生。子士諮。鄉貢士。博學篤行。嘗陳十二事論王政。不報。辭疾歸。終身不仕。

丁璣傳

丁璣。字玉夫。丹徒人。父元吉。學行高古。隱居教受。學者稱爲易洞先生。璣幼服庭訓。嶷然早悟。弱冠舉進士。授中書舍人。同官長逾倍者。皆尊事之。吳寬與爲忘年交。成化末。以星變。應詔上疏。言治道本末。時政得失。反覆數千言。而根極於正心術。教東宮。振綱紀。正風俗。慎用人。重名器。蘇民困。理財節兵。皆切時政。未言方士釋老。近之則害治。宜斥遠。疏入。爲羣奸側目。出爲普安州判官。普安遠夷。去中州萬里。非人所居。璣獨從一僕。怡然行。秦如也。宏治初。三原王恕爲吏尙書。雅重璣。延見。坐語者竟日。明日復召。不赴。奏

記言。今日無急於正君。然非一人一日之力。宜早堅主上嚮道之志。開進賢之路。庶本正源清。制治保邦之務。可次第而舉。恕隨其言。欲引爲吏部郎。竟爲忌者所沮。轉廣西通判。猾伍以怨誣鄰民爲盜。斷其舌斃之獄。汚霽其妻女。逮伏法。同官坐事者。處之曲有恩。至丐印易牒。執不可。曰。某平生惟辨此一片心事。君敢爲欺邪。內艱服闋。倪岳掌銓。卽家起儀制郎。尋以副使提學廣東。入賀道清遠。山水暴發而沒。翌日。得其屍。衣冠端整如生存。璣克養深粹。居圓運方。身不踰中人。而任道好古。崇正闢邪。有萬夫直前之勇。羣吠衆譟。不震不悚。有百煉之剛。以儀禮周公之典。久廢不行。家居冠婚喪葬。一取衷之。其教人。正容端坐。澄心定氣。使躁釋慮消。方與開講。其析疑義入毫芒。而文主純雅。其爲政。先風化。而一以誠意將之。有去後思。室廬不庇。風雨子女。踰期無力爲嫁娶。而愛君憂國。一出天性。蓋儒學不傳。得其門者。或寡。璣窮探力索。渾融冲粹。志之所向。不息不歧。一以考亭朱子自期待。魯齋臨川而下。不屑也。所著大學疑義。中庸語孟說及儀禮注。大學士靳貴從受學。尊事終身。稱其中行獨復。於衆醉羣污之中。任道甚力。制行甚方。涵養甚粹。德性甚良。如金剛玉潤云。

蔡清傳

蔡清。字介夫。晉江人。氣質粹然。筋躬厲行。動準古人。學以六經爲正宗。四書爲嫡傳。四儒爲真派。造益深而養之純。發爲文章。澤於仁義道德。粹如也。舉成化丁酉鄉薦第一。登成化二十年甲辰進士。授禮部主事。時王恕爲吏部尙書。舉以爲屬。祭酒邱濬。時稱海內儒宗。不屑一世。每對人言。介夫學醇而行潔。可以

進之於古人。嘖嘖加歎賞不釋口。尋以母憂去任。服闋。仍補禮部。乞改南。又補吏部主事。未幾。以父老乞終養。居父憂。既除。擢江西按察副使。提督學校。以理學淑士類。因出其作易四書蒙引授學者。傳及四方。咸宗師之。曰虛齋說。時仕江西者。朝甯王皆朝服。清獨去朝服中蔽膝一件。先是每朔望朝王。俱次日始謁孔廟。清力言不可徇舊例。遂以初一十五先謁廟。乃行禮。時甯王欲奏討護衛。清阻之。以是拂其意。會都御史林俊有憾於王。讒人因言清與俊頗厚。王遂併怒清。專謀孽清。使人騰謗京師。欲以併壞之。清歎曰。如此誠慮。一旦死於非命。則非惟有孤朝廷。任使其斯文。責望之意。而吾於身上下關係。俱未有一毫成立。亦可虞也。亟引疾乞休。家居二十年。始終一貧。責負轉展。數口之計。乃常不辦。歎曰。此士之常也。正德初。起爲國子祭酒。命及門而卒。寔正德三年戊辰十二月二十三日也。年六十六。學者稱爲虛齋先生。林俊云。先生平日精力。盡用之易。溫陵造就。可謂易學一時矣。又云。先生督學江右。甯藩讐予。因讐介夫。介夫引而去。逆瑾亂政。起祭酒。以鎮壓人望。而介夫先沒矣。嗚呼。介夫之不爲龜山。非幸耶。清嘗言。分陰不惜。學力不充。常事臨疑。口耳無所歸。手足無所措。故楊月湖稱之曰。學識操履如介夫者。纔不多見。羅整庵曰。蔡介夫中庸蒙引鬼神數段極精。其一生做窮理工夫。且能力行所學。蓋儒林中之傑出者。王恕一日與清論今學者滿天下。何異才難得。清曰。是由上之人所以養之者未盡其道。下之人又幸時之昇平而售之急耳。儒生少知章句訓詁。人便而舉進之學宮矣。未幾作經義甫成篇。便得補廩。以爲當然矣。又未幾作三塲文字。纔可讀。便迫迫期中舉中進士矣。一中進士。則官已到手。或無暇於學。又自以爲無

用學矣。其仕而能學者無幾。又且或有過時扞格之患。蓋識見既淺。踐履必薄。規爲必粗。非所謂俟其熟而食之者矣。況自幼入小學。而其所學多非學做人之實事。人才之不如古者以此。故雖有異質者。亦不能成異才。又曰。異才之難得。果舉業累之耶。舉業不謂累人。而人自累之。異才之稱。非必其聰明歷班。馬而凌韓。柳也。賜之悟不若曾之魯。存乎其學耳。有其學則有其才。今世學者。其始也依所業以干進。循文子套。子熟時其體式。如販者然。多招奇貨。以祈鬻於人。而遑恤其貨之非己有也。一旦登科入仕。惟以是爲事。脫六經四書如敝屣然。故夫親民事。職簿書。旣以不暇於學。若被選讀書。職任絲綸者。亦不過勤閱秦漢文而竊其似。以號古作。酷想韓柳文而掇其糠。以淹文法。視六經四書爲諠語。目濂洛關閩之言爲不足以藝於文。而驚世駭俗也。

張吉傳

張吉字克修。餘干人。生有美質。四五歲。聞父母之命。卽不敢違。或口授之故事。輒記不忘。長從鄉先生學。見諸生各治一經爲學子業。歎曰。士常兼治五經。今業一經。而所遺如此。豈聖人之言。亦有當去取者。乃力購諸經。及宋儒諸書讀之。久而有得。喟然曰。道在是矣。日務窮理致知。卽聖賢言語。體之於身。驗之於心。朝夕不解。尤以名節自砥礪。故同類多忌。揆之。惟教諭鄭重先爲之延譽。成化丁酉。魁鄉薦。登成化辛丑進士高等。除工部主事。時左道李孜省。妖僧繼曉。皆以術得寵。乙巳元旦。星隕有聲。詔求直言。吉上疏。請上親賢圖治。修德遠邪。以謝天變。因指斥二人之罪。疏入。邪黨切齒。因搆撫其過不可得。躑月。乃嗾吏

部尙書尹旻貶爲景東府通判。時追逮甚急，故舊皆畏避。吉獨攜圖書數卷，僮僕數輩，出都門，迢然詣任。先是景東僻處西南極邊，民風鄙梟，士宦陶氏世握郡章，不能易其俗。吉至，首布令，以孝悌忠信禮義廉恥反覆開諭，間有不法者，亦薄示以罰，約無再犯。又夷人不知書，吉手錄諸經，葺齋舍，討論其中。久之，夷人訓服，漸聞中國之化。寓官舍，政暇即取古聖賢教人修身之要，分爲四門，作慎獨窮理改過求仁四箴。書之座右，日以自勵。時居景東，未攜家室行。陶土官謀爲置妾，拒之，尋以銀器數事爲餽，一無所受。已而陶亦遣子榮來學，榮亦遂能善事父母，以孝著。宏治元年，轉肇慶府同知。陳獻章講學，吉往還與之論，深究義理。辛亥，都御史秦紘爲總兵柳升所誣，奏逮赴京詔獄。吉上疏代辯，秦遂得白。壬子，進表入京，庭謁吏部堂。時尙書王恕雅知其名，甚禮待之，曰：「以之淑士有餘矣。」欲擢以提學，不果。癸丑，轉梧州府知府。日躬課諸生，爲講說聖賢大學之道。士類賴之。庚申，陞廣西按察司副使。正德改元，轉按察使。明年，轉山西右布政使，尋轉廣西左布政使。以忤權奸降兩浙鹽運使。轉河南參政，調廣西，轉湖廣按察使。癸酉，陞貴州右布政使，以疾乞休。家居數年。十三年戊寅九月甲寅卒。年六十八。吉嘗謂禮之大者有四，其冠婚喪三者可守行之。惟祭祀煞用斟酌，其行於家最爲精當。鄉里化之，居常無可喜可怒之事，及變故之來，利害之際，則惟義是從，無所忌憚。居家嘗訓子弟以節儉讀書先小學，四書而後諸經。嘗曰：「學者不讀五經，遇事便覺窒礙。」吉早歲微偏於剛，中年充養宏裕，病且革，必正衣冠端坐，倦則隱几假寐。楊廉贊云：「五經四書，深契奧妙，呂陸是攻，各鍼其竅，及觀所著，有闢佛學論古城集貞觀小斷陸學訂疑。」

楊廉傳

楊廉字方震豐城人成化二十二年進士爲南京給事中建議多國家大體邊防要務宏治十三年陞南光祿少卿轉南太僕少卿晉南通政使正德七年轉順天府尹平徭減役裁諸冗費愛人節用有聲京輔稱清十年進南禮部侍郎尋進尙書大禮議起同南九卿具疏請考孝宗母昭聖以崇正統一本之義疏出其手廉好學能文負時名吏事精敏性耿介恥回互論事多據經義通達古今淵源自六經權衡程朱低昂百氏故其發之詩文鑿鑿乎先儒之矩度尤篤好程朱之書自修身施政以至文詞書札冠禮衣裳之細必取法焉或羣言淆雜人莫適從廉輒舉二夫子言曰程朱云云吾不知其他可謂言程朱之言行程朱之行服程朱之服者矣嘗復余子積論理氣曰論一則不徒理一而氣亦一論萬則不徒氣萬而理亦萬此言尤有獨見他理義多所發明卒諡文恪所著有文集奏議家規及皇明名臣言行錄理學名臣錄等書

邵寶傳

邵寶字國賢無錫人性度端雅有古風而氣節尤厲接人未嘗有疾顏遽色遇事人或數百語不能終寶以數語竟之自當於理登成化甲辰進士授許州知州作新廟學諭諸生以義利公私之辨及忠孝大節急民事躬課農桑做朱文公社倉立積散法行計口澆田法爲備荒計釐正糧籍士民稱便宏治癸丑夏六月許州小趙鎮有謬言龍骨出土中縱口道禍福以誑愚俗寶恐其久而惑民也取而毀之於廷杖巫

而遣之。舉動風化。煥然改觀。陞戶部員外郎。時尙書周經、劉大夏皆器重之。章奏多出其手。擢江西提學副使。敦尙道義。以身爲教。一時士風丕變。遷浙江按察使。出疑囚。振法紀。正德二年丁卯。陟右布政使。轉湖廣左布政使。振恤災傷。奏蠲逋負。民賴以全活者衆。己巳。擢右副都御史。總督漕運。會劉瑾擅權。仕者皆爲往來。寶獨一無所通。瑾銜之。數遣人撼以危言。寶不爲動。瑾遂矯旨勒致仕。遂歸。寶於聲色貨利嬉戲。絕口不言。惟潛心諸書。開拓古今。粹然自出。機軸嘗曰。願爲眞士夫。不願爲假道學。檢身誠切。操履端飭。自登第至侍養。一切餽遺。例不苟受。篋無長物。惟圖書金石遺文。蓄之甚富。嘗取程伊川今日格一物。明日格一物之意。乃博綜羣籍。研窮有得。著日格子十二卷。庚午。瑾誅。起巡撫貴州。尋陞戶部侍郎。辭不就。乞終母養。許之。寶事母甚謹。年踰六十。朝夕不離左右。如少壯時。嘉靖初。大臣言官交薦。起爲禮部尙書。時母尙無恙。寶懇辭如初。世宗不忍奪其志。溫旨答之。仍敕有司存問其母。人以孝榮之。尋卒。諡文莊。寶會作章楓山祠堂記云。天下之道德。烏乎定。定於一而已矣。大哉孔子。萬世之師也。孟子去孔子未遠也。關邪放淫。勤一生以爲任。大開立矣。后數百年而有董子。欲出百家於漢。又數百年而有韓子。欲去二氏於唐。然其識與力。皆不逮乎其志。故泛然莫之能定也。周子。程子。斷趕於宋。其識與力。超然獨詣。繼往闡微。爲世先覺。而朱子繼之。著書言行於天下久矣。先生以盛德重望。弗惑弗貳。而扶衛之意。惓惓其間。蓋先生之信朱子。猶朱子之信周。程。程之信孔。孟也。觀寶此記。可謂後學指南者矣。所著有定性說。漕政舉要。容春堂。勿藥諸書集。其他簡端。學史二錄。都御史吳獻臣爲奏於朝。謂寶耿耿迴瀾。老益惇篤。其

毅然任道之心乎。秦金稱之曰：寶於家稱孝子，於國稱名臣，於世稱純儒，傑然爲天地間完德君子。

章懋傳

章懋，字德懋，蘭谿人。自幼識卓志遠，不以科舉學累，潛心大業，慨然慕范文正之爲人，尤持氣節而恬雅古樸。造理淵邃，以易舉天順壬午鄉試，登成化丙戌會試第一，廷試高等，選庶吉士，授翰林編修。再四十年，會朝廷有事，元宵燈懋及莊景、黃仲昭疏諫，言直切忤旨，黜知臨武縣。時稱三君子，尋起爲南京大理寺評事。陞福建僉事，毅然以振風紀爲己任，嘗因歲序卻桃符，題其門曰：要使鬼神司屋漏，不須鸞壘衛門庭。時事多掣肘，不獲盡行所志，乃議處番貨，公通貿易，聽民採礦等事，嘗因行部積勞，觸瘴成疾，恐貽親憂，歸志甚堅。比考績入京，遂乞解官。時吏尙書尹旻慰留之，懋辭益切。尹詰之曰：不罷軟，不貪酷，不老疾，如何可退？懋對曰：古人正色立朝，懋之罷軟多矣。古人一介不取，某之貪多矣。古之視民如傷，某之酷多矣。年雖未艾，鬚髮早白，亦可謂老疾矣。尹爲之動，知其志不可奪，遂爲具奏得歸。時年四十一，比歸杜門事親，暇日卽讀書講學，甘貧守道，其學一以關、閩、濂、洛爲宗，要在精究而力行之，不襲口耳，不涉支離。故雖眞見獨到，洞貫道妙，其發之議論，寔切當，多有前賢所未發者。嘗曰：人形天地之氣，性天地之理，須與天地之體同其廣大，天地之用同其周流，方可謂之人。又曰：學者須大其心胷，蓋心大則百物皆通，必有窮理工夫，心纔會大，又須小，必有涵養工夫，心纔會小，不至狂妄矣。家居幾二十年，薦者無虛日。宏治辛酉，起爲南京國子監祭酒，遭父喪，時北學亦缺祭酒，吏部尙書倪岳起謝鐸於北，懋於南有旨聽終。

制。遂虛位以待。癸亥。服闋。起視事。首開示諸生以近裏功夫。謹榘度。厲廉恥。諸生翕然向風。天下莫不賀。得師焉。尋上修舉學政條陳時弊。正德改元。又疏治要五事。曰。勤聖學。隆繼述。謹大婚。重詔令。敬天戒。再疏乞休。不允。是年。任滿三載。年踰七十。以老病不能赴京。給由懇辭。遂緘公移。繳吏部。不待報歸。復三疏始得請。已而闕瑾擅政。公卿多遭斥辱。而懋已先幾去矣。正德五年庚午。起爲南京太常卿。再辭。進南京禮部右侍郎。致仕。嘉靖初。陞南京禮部尙書。又致仕。方璽書存問使及門。而懋卒。年八十六。賜祭葬。贈太子少保。謚文懿。學者稱爲楓山先生。自入翰林。以至八座。立朝僅四十日。官不過三考。乞休凡十餘疏。難進易退。當於古人中求之。嘗懋論學術。則云。程。朱。久又大壞矣。必須真聖賢出。方能救得。論政體。則云。第一是格君心。收人才。固民心。爲本。然后政事可舉而行。論風俗。則云。須做橫渠復古之志。行藍田呂氏鄉約。庶可變而厚。論居常處困。誦伯夷。叔齊。餓於首陽之下。民到于今稱之。之語。便覺自警拔。論居敬。自謂於專一上見功。覺心中無甚放僻邪侈之私。論窮理。自專於精義處得力。見得進退辭受之節。頗分明。不敢放過。大約懋之學。粹然一出於正大。人皆以其不盡究於時措之。蔡清與董遵道書云。今聽先生一人堅臥林下。保全令德。斯亦足壯士風。淑士類。而爲國家添一人物。雖然。託老。釋以亂正學。假易簡以壞聖功。天下且羣然而信之。余喬喬謂程朱之後。純無一語出於己。固難稱爲自得之學。謂程朱論多非是。則其狂悖僭妄。不自量度。可勝歎哉。先生學術宗依。遠惟程。朱。是敬是信。不敢少有違戾。其視近時敢爲異論之人。匪徒獲罪程朱。而亦先生之罪人也。楊廉曰。儒雅如黃未軒。豪邁如莊定山。先生則斂華就實。風

節如羅一峯。習靜如陳白沙。公則既博復約。嗚呼。在漢東都。爲危言之叔度。在宋鵝湖。不立異說之伯恭。湛若水傳

湛若水。字元明。廣東增城人。性穎敏。自少知學。宏治五年壬子。以書魁其鄉。尋從陳獻章遊。卽以隨處體認天理爲宗。獻章曰。此子參前倚衡之學也。自是潛心默會。日有所得。遂焚去路引。誓不復仕。後以母命出。僉事徐紘爲勸。駕赴南雍。祭酒章懋試。醉而盡背論。甚奇之。十八年乙丑。會試第二名。賜進士高等。選爲翰林庶吉士。擢編修。時王守仁在吏部。相與倡道京師。塲屋所取士。修撰呂柟。主事王崇輩和之。道價日著。學者稱甘泉先生。久之。使安南。冊封國王黎暉。卻其餽不受。正德丁亥。奉母喪歸葬。荷塘廬墓三年。墓產瑞瓜。人以爲孝感所致。卜築西樵。多士來學。支與日給錢米。開禮舍於僧寺。至齋戒三日。習禮成而後聽講。講必端坐觀心。不遽與言。嘉靖初。趨朝。考九年滿。陞侍讀。尋進南國子祭酒。開講院。與諸生論學。刻心性圖說。尋陞禮部侍郎。先後有勤聖學等疏。凡數十上。彙爲獻納編。又倣大學衍義補。作格物通以進。累遷南禮吏兵三部尙書。置新泉三山二莊。講學於新泉三山二書院。年逾七十。乞致仕。許之。所著有遵道錄。樵語。古文小學。四書測。二禮經傳測。春秋正傳。古易經傳測。學庸訓測。前後詩文集。不啻千百卷。平生足迹所至。必建書院祀獻章。雖田莊亦然。嘗於所居天關精舍。參贊尙書府立祀聖所。置倉廩。館穀多士。又至衡山。建白沙書院。置田五頃。歸復取白雲山爲白沙祠。平生志篤而力勤。無處不授徒。無日不講學。從遊者殆徧天下。所論以自然爲本體。以勿忘勿助爲工夫。大抵得之師門爲多。獻章嘗謂曰。人與

天地同體。四時行。百物生。若滯在一處。安能爲造化之主。善學者常令此心在無物處。便連轉耳。學以自然爲宗。不可不理會。又曰。學以自然爲宗。承喻日來。頗有湊泊處。譬之適千里者。起腳不差。必有所到。自然之樂。乃真樂也。宇宙間復有何事。又示以詩曰。有學無學。有覺無覺。千金一瓠。萬金一諾。天命流行。自然之樂。乃真樂也。宇宙間復有何事。又示以詩曰。有學無學。有覺無覺。千金一瓠。萬金一諾。天命流行。真機活潑。水到渠成。鳶飛魚躍。德山莫杖。臨濟莫喝。萬化自然。太虛何說。繡羅一方。金針誰掇。其得於指授者如此。卒年九十五。若水在南都久。春時勸農。躬詣田畝。閱俗侈汰。定喪禮之制。頒行之。費省而禮舉。都人無不樂從。有劉公廟。聚衆燒香。爲沈其像於江。絕衆惑。貧者或以火葬。爲買地城四郊。爲漏澤園。以處之。且置田供時祀費。盡毀私創庵院。僧尼勒令歸俗。後生子多以湛名者。

羅僑

羅僑。不知何許人。孝宗時。嘗爲台州府知府。平生潛心理學。所養甚正。著有潛心錄。所論性理之懿。極有旨趣。有云。每見青天白日。便看吾心。光明何如。每見雲影蔽日。便看吾心。昏蔽何如。每見草木生意。便看吾心。生意何如。每見禽魚自適。便看吾心。自適何如。又云。人於一日。自朝至夕。由興至寢。不可有一毫惡念。念惡一萌。卽斬絕之。使根株悉拔。不可一息無善念。善念一萌。卽充廣之。使若泉達火然。其體驗於心身者如此。可以爲儒矣。

陳茂烈傳

陳茂烈。字時周。莆田人。宏治九年進士。先瑞安人。戍籍興化。遂居梅峯。髫年喪父。繼戎役。勵志邁俗。不與

羣兒伍。晝入公署。夜歸讀書。祖母憐其孱弱。亟止之。乃韜燈默誦不輟。年十八。慨然歎曰。善學聖人者。莫如顏。曾。顏之克己。曾之日省。豈非學之法與。作省克錄自考。進士時。奉使廣東。師事陳獻章。語累日。甚喜。獻章曰。學須靜一。退作靜思錄。爲吉安推官。持大體。開至誠。通以民彝之懿。豪家利寡婦財。誣許婚。斷從守志。夫制悍妻。嫁有娠妾。既生子。歸承其業。族人爭之。驗與姉類。爭者愧服。時郡守嚴擊強豪。徐輔以寬。當道尙深刻。徐開解得寬露。選授監察御史。袍服樸素。騎牝馬。身若無官者。有尙書子受賂。崔志端以道士起。皆根植自固。言者屢劾不動。茂烈劾尙書去。崔竟留。遂以母老乞終養。力供甘旨。短牀敝席。不辨一蚊帳。身治畦。一蒼頭給薪水。出則自執小油蓋。妻子服食蠶繭。一女適彭惠安孫輔。嫁具涼薄。皆人甚不堪者。茂烈泰然自足。日坐斗室。究極五經四書之旨。體驗身心。隨得隨錄。常曰。儒有向上工夫。詩文特土直耳。正德中。吏部以公養母清苦。奏改爲晉江縣學教諭。資其祿。疏辭不拜。既又授侍郎潘禮例。奏給月米。上嘉茂烈清苦。令有司月給米三石。以資孝養。又辭曰。陛下隆孝理之化。長清白之風。下逮微臣。亦荷收恤。豈獨臣一家之幸而已。第念臣家素貧寒。食本儉薄。故臣母自安於臣之家。而臣亦得以自遣其貧。非誠有及人之廉。盡己之孝也。古人行備負米。皆以爲親。臣之貧尙未至是。而臣母鞠臣。守貧居寡。艱苦獨至。臣雖勉盡心力之義。竟未酬涓滴之恩。且母年已八十有六。來日無多。返哺之情。固欲自盡。資養月米。心竊不安。奏上。不允辭。茂烈以母年九十。未有嗣息。日夜爲憂。方抱疾而母卒。強起號哭寢地。疾轉亟。卒。林見素爲治殮具。立其族子遠揚爲後。都御史王應鵬薦公廉約如石守道。而所養獨純。孝行如徐仲

車而所處尤困。詔表宅里曰孝廉。恤其家。見素曰。陳公領悟既深。而充養亦熟。隱衷粹行。對天地質鬼神。鄉國敬服。殆黃憲管甯之流也。

羅欽順傳

羅欽順字允升。江西泰和人。性恬雅粹愨。登宏治癸丑進士。及第第三人。授翰林編修。先是不知所謂禪。居京師。偶遇一老僧。因向叩佛。由僧漫舉禪語爲答。云。佛在庭前柏子樹。欽順意其必有所謂。遂爲之搆思。徹夜不寐。達旦攪衣將起。則恍然而覺。流汗通體。若有所得。旣而取禪家證道歌讀之。如合符節。自以爲至奇至妙。天下之理。莫或加焉。凡幾年。已而漸歸於聖賢之道。多有覺處。至宏治十三年。遷南京。國子監司業。尤篤志問學。凡五經四書及濂洛關閩諸大儒語錄。未嘗一日去手。久之喟然嘆曰。昔兩程張朱。早歲皆嘗學禪。亦皆究其底蘊。及於吾道。有得。始大悟禪學之非。而盡棄之。非徒棄之而已。力排痛闢。又曰。朱子目象山爲禪學。蓋見之審矣。自後欽順始悔前所見者。乃此心虛靈之妙。而非性之理者。遂研磨體認。於道心人心之說。盡心知性之說。理氣性命。神化陰陽。皆極其旨。與正德三年戊辰。以忤閹瑾落職爲民。庚午。還職。辛未。轉南京太常寺少卿。晉南京吏部右侍郎。十六年辛巳春。召爲吏部左侍郎。條奏久任良法。併及超遷之說。與久任之法。相爲流通。超於前。自可責其後之久。超於後。固無負其前之淹。時不能。用嘉靖元年。陞南京吏部尙書。以父年踰八十。乞休歸養。尋以父憂服闋。起爲禮部尙書。改吏部尙書。皆力辭致仕。許之。欽順嘗追悔早年受學。不過爲利祿謀。年幾四十。始慨然有志於道。雖已脫然。自謂苟

能粗見大意。亦庶幾無負此生。而官守拘牽。加之多病。工夫難得專一。及是家宰命下。人多榮之。欽順力不肯拜命。家居謝客。不涉城市。又潛心二十餘年。每日道之在是。乃爲有以自信者何。蓋此理之在心目。由本而之末。萬象紛紜而不亂。自末而歸本。一真湛寂而無餘。惟其無餘。是以至約。乃知聖經所謂道心惟微者。其本體誠如是。故人心道心之辨明。然後大本可得而立。大本誠立。酬酢固當沛然。是之謂易簡而天下之理得。尋卒祭葬如例。諡文莊。欽順信道最篤。一於尊朱子。以上遡孔孟之傳。遂得其正宗。又於諸佛書尤多博覽。欽順以其似欲亂我之真。常辭而闢之曰。釋氏明心見性。與吾儒之盡心知性。相似而實不同。蓋虛靈知覺。心之妙也。精微純一。性之真也。釋氏之學。大抵有見於心。無見於性。故其爲教。始則欲人盡離諸相。而求其所謂空。空卽虛也。旣則欲其卽相卽空。而契其所謂覺。卽知覺也。覺性旣得。則空相洞徹。神用無方。神卽靈也。凡釋氏之言性。窮其本末。要不出此三者。皆心之妙。而豈性之謂哉。又云。張子韶以佛語釋儒書。改頭換面。將以愚天下之耳目。其得罪聖門實甚。而近世之談道者。或猶陰祖其意。往往假儒書以彌縫禪學。律以春秋誅心之法。吾知其不能免。先是陳獻章好隱談學。人疑其禪。獻章之言曰。夫道至無而動。至近而神。又曰。致虛所以立本。欽順深誣其說之禪。獻章之門人。若水嘗致書欽順曰。公指白沙先師爲禪。水謂白沙先師非禪也。先師教人。初以孟子必有事焉而勿正。心勿忘。勿助長爲標的。又以明道學者先識仁一段。未亦以孟子此段爲存之之法。及水自思得。因稟問天理二字。最爲切要。明道云。吾學雖有所授。然天理二字。卻是自家體貼出來。李延平教人默坐。激心體認天理。水以

爲天理須切體認。日用間隨處體認天理。便合得。先師喜曰。日用間隨處體認天理者。此鞭何患不到聖賢佳處。夫禪者以理爲障。先師以天理之學爲是。其不爲禪也明矣。欽順復書曰。隨處體認天理一言。孰云非是。顧其所認以爲天理者。未見其真切也。僕安得而不疑乎。未幾王守仁又倡致良知之說。天下高明士多從之者。守仁之言曰。吾心之良知。卽所謂天理也。致吾心良知之天理於事物。物則是。事物物皆得其理也。致吾心之良知者。致知也。事事物物各得其理。格物也。欽順以爲此非學。欲致書辨之。而守仁卒。因嘆曰。王、湛二子。皆與余相知。於王蓋嘗相與論文而未細。忽焉長逝。可惜也。湛則會晤絕少。吾問亦稀。然而兩家之書。余皆得而覽之。區區之見。終未相合。蓋憂彼說長。而正學愈漸滅矣。世之士有喜禪者。聚徒談禪。而程、朱蒙詬。於是欽順又著論曰。近時以道學名者。泰然自處於程、朱之上。然究其所得。乃程、朱早嘗學焉。而竟棄之者也。夫勤一生以求道。乃捨先賢所棄以自珍。又從而議其後。不亦可嘆耶。先生著有困知記。多辨近時學術之非。

● 胡鐸傳

胡鐸。字時振。餘姚人。性質直謹。厚言。如不出諸口。晚造詣正大。力排異說。先是以易領浙江鄉薦第一。登宏治乙丑進士。選庶吉士。改刑科給事中。正德初。以忤閹瑾出。爲河東運副。勵清節。變頽風。轉福建僉事。去之日。民咸焚香注水禱之。爲立生祠。入閩。守建甯。獎儒雅。雪冤獄。政迹卓然。巡按御史疏其事二十條。聞於朝。下爲政式。不報。三年滿。進副使。督福建學。設科條。正風俗。士子翕然丕變。人稱胡道學。又謂小夫

子在閩時。同列有以術試鐸者。鐸不疑其詐。久之。且曰。胡公篤實。真古君子也。嘉靖二年癸未。以母憂去。徒跣奔喪。哀毀踰制。坐臥一小樓三年。足跡不至城市。官府服闋。除順天府尹。改南京太僕寺卿。居潞陽。地僻事簡。閉門著述。作典學說的。異學辨。及天文地理律呂醫卜兵陣諸書。各有辨正。十二年丙申秋七月。寢疾。忽舍後星殞。紅光燭天。翼日。鐸從容衣冠卒於官舍。年六十六。朝廷遣官諭祭葬。大學士顧鼎臣稱之曰。闢邪崇正。如吾時振聖賢之道。有不明者乎。信言篤行。如吾時振聖賢之地。有不到者乎。孫燧每曰。闕公撰書。皆立正心崇正道。講正學。而關禪佛者也。我朝自薛文清公後。僅見公一人而已。黃子彙曰。文學肖曾子固。篤實如司馬光。房無侍妾。宅無樓臺。信謂趙清獻一人。鐸痛時多宗陸子靜者。倡知行合一之說。作異學辨。爲錄其略。首曰。象山異其所學。好靜厭動。是內非外。心不盡而欲其存。性不知而覬其養。此學之所以爲異也。是以老太極。墨西銘。蔽錮伊川。而支離其學。又云。昔列禦寇託爲孔子。告顏淵之言曰。用志不分。乃凝于神。欲其不分。所以不用也。不用則不知。而自爲無不知也。象山亦曰。人須要用。不肯不用。人須要爲。不肯不爲。而又繼之曰。人皆可以爲堯舜。是以爲堯舜。可以不用不爲爲也。孟子曰。奚有於是。亦爲之而已矣。夫不用而不知。以用近於二。故不用也。不知而不爲。以爲近於用。故不爲也。其功惟在於不用而已。謂之知行同功可也。謂之知行合一可也。然非吾儒之學也。堯性之者也。名其德者。但曰克明而已。舜於禹。始以惟精惟一告之。大學之格致知也。卽惟精也。誠正修身行也。卽惟一也。昔傳說之告高宗。又以非艱惟艱別之。孔子之告哀公。又以三知三行別之。是又其顯然而明較者。烏得而混之。

嗚呼。古之人惟恐人之不知。而今之人惟恐人之有知。其示老氏非以明民。將以愚之之意歟。或舉象山晚年悔悟。書張魏公能致廣大而不能盡精微。能極高明而不能道中庸。分爲兩截。始悟夫知行之爲一而不可分。鐸曰。程子云。涵養須用敬。進學則在致知。又曰。力行先須知。夫致廣大極高明者。所以存其心。涵養也。盡精微者。致知也。道中庸者。力行也。誠如象山之言。則存養無施於靜居之時。必待致知力行而復爲之。然則君子戒懼於不聞。敬信於不言不動者。將屬之盡精微耶。屬之道中庸耶。象山非特欲廢乎知。又將并存養者而廢之。惟欲歸於不用而已。哀哉。或曰。然則不待存養之定。而後致知。知之盡。而後力行。歟。鐸曰。非也。朱子嘗推程子之意矣。三者以涵養爲主。致知次之。力行又次之。然亦須一時並行。非謂今日涵養。明日致知。後日力行也。或又舉中庸天命以至位育。未嘗言知。蓋以存省之中。自有知。象山略乎知。而惟從事於存省。蓋有得於中庸者。鐸曰。象山止求於一心之念慮。而欲廢其他。於此而偶有見焉。遂謂知行之功。一舉而可以兼得。其爲惑也深矣。或又舉象山之言。有曰。踐道則精神。又曰。惟精惟一。須要如此涵養。此皆其近理者。鐸曰。彼以精明生於踐道。一卽爲涵養。此皆混合之意。但讀者不知耳。彼雖不廢知。而其所知者。不由致知而得。皆其意見之偏。不若不知之爲愈也。朱子嘗告張南軒曰。子壽兄弟欲盡廢講學。而專務踐履。卻於踐履之中。提撕省察。悟得本心。此其爲病之大者。要其操持謹質。表裏不二。實有以過人者。惜其自信太過。規模窄狹。不復取人之善。將流於異學而不自知耳。王守仁翻刻古本大學。獨宗陸氏格物之說。而警程朱。鐸辨曰。萬物一源者也。象山之學異。異於惡物者也。惡物不已。遂以

格物爲玩物。又以絕物爲格物。以物爲外而欲絕之。則萬物皆非我矣。象山以程子格物之說。徒使人玩物以喪志。嗚呼。自鄒孟氏沒。而大學之道不明。學者茫然。不知所謂格物者爲何事。往往雖有求道之心。而昧所從入。程夫子出。始發其旨以教人。夫然後學者乃知格物所以窮理。如繳而射者。必先明乎的。如跌而行者。必先視乎地。象山反厭窮理之煩。而欲誣其說。何耶。或又引明道嘗以玩物喪志爲上蔡爲言。鐸曰。明道正以其徒務博而不窮天理也。苟博學而篤志切問近思。仁在其中矣。奚其喪。或又曰。象山嘗令徐仲誠思萬物皆備於我。是亦以物爲我有也。何謂外而絕之。鐸曰。孟子云。物備於我。非爲有外也。必心體乎物。而後能誠。象山言我有物。非假乎外也。必心不累物。而復能誠。故其告徐仲誠曰。此事不在他求。只在仲誠身語。則似是而實非也。毫釐之差。已判於此矣。象山以讀書之累心。無異於外物之累心。故欲內絕乎想。外絕乎書。曰。只此是格物。非絕之而何。象山之言曰。汝耳自聽。汝目自明。又曰。此心之存。則此理自明。蓋言吾心與耳。本自有知。豈非釋氏以聞見緣覺爲外。必如亢倉子七竅自覺。五臟所知。方謂之在內耶。程子曰。物我一理。纔明彼。卽曉此也。苟專求之心。而果易簡也。孔子當先爲之矣。何以曰思。不如學也。嘗聞讀書窮理之要也。張子曰。書可以維持此心。象山願以爲累心。何也。孔子施教。先之以詩書。子路曰。何必讀書。則佞以絕之。象山乃欲廢書。嗚呼。學之晦也。豈不以多說之亂之也。而誰歟。或人又述朱子與劉子澄書。亦云。始知言語文字之外。別有用心處。是其所見。亦以讀書之能亡羊而去之也。何獨非乎象山哉。鐸曰。朱子答子澄之書。正以其專事編綴異學以爲業。而無日用切己之功。乃託爲自貶之

詞以箴之。觀其前後諸書。豈真欲廢其言語文字耶。或又謂象山之欲廢者。諸儒之傳註也。非古訓也。故常言秦不廢乎道脈。至漢而大壞。故以讀伊川易傳。胡氏春秋傳。范氏唐鑑爲陋說。蓋曰六經皆我註脚。固已贅矣。又復讀註脚之傳註。不亦糜弊精神矣乎。鐸曰。遺經之難知矣。傳註之翼經也。尙矣。馬遷述古史之言曰。孔子傳禮記。否則儀禮之喪服。非子夏之傳乎。否則大學誠意以下之傳。非曾子之意乎。否則十翼非夫子之傳易者乎。程子易傳序曰。前儒失意以傳言。後學誦言而忘味。予憐斯文之湮晦。將俾後人沿流以求源。此傳之所以作也。若夫漢儒雖非伊洛之比。其於傳經。明制度。辨名物。功亦博矣。使當時而無此。則後世亦將何所取以證而折衷之。且老莊之教。尙虛無。滅禮法。爲我之過。而不擇義利。惟適意者取之。楊氏申韓。皆其流也。秦以其教而遂至焚書。晉以其教而基亂華之禍。象山不此之追議。而反罪吾儒。且曰。漢禍甚於秦。亦見其自比於僭王猾夏。說淫亂而助邪以攻也。象山之欲廢書。我知矣。蓋其於書。初不甚解。虛乎有問之不能答。而見詘於門人也。乃豫爲是言以禁止之。學者欲其易簡之說。而靡然趨之。卒至塗其耳目。而不知其賊夫人之子也。象山常教人曰。格物者研究其理。但不究於物。而物究於心。去其人欲。而存其天理。噫。研而究之者。擇善之功。去而存之者。克復之事。象山不知天理人欲者。焉能去而存之。何也。象山以天人而分理欲。非也。象山謂樂記論語分別天人理欲之言。皆根於老氏。則其於理欲之介。混淪而不欲區別者矣。平居飽食終日。無所用心。不豫究其孰爲天理。孰爲人欲。至於酬酢之間。須臾之頃。方欲去之存之。其爲義外而襲也甚矣。烏得以是而反譏訕夫精義者哉。自象山之倡爲是

說也。而近世之解夫格物者，遂恣竊橫議，而莫可禁止。惟訓格爲正，取向書格正。孟子格其非心爲義，以爲有證而實非。聽者是之，而不知其悖理甚矣。或又曰：格物者非正心也。所以誠其意也。象山有言曰：誠意者毋自欺也。總脩身齊家治國平天下之要也。夫物有所蔽，斯意有不誠。惟格而去其蔽，則誠而明矣。是得其用功之要者。何子不憚煩，而必瑣瑣之窮理之務耶。鐸曰：此正象山之學之蔽也。非大學之道也。今如其言，以誠意代乎格物，而移於致知之前，以致知不爲擇善，而移於固執之後，非其序矣。且自誠而明者，非性之而聖者乎。聖人無欲者也。旣曰猶有欲之可去，則未至於聖矣。欲其自誠而明，有是理乎。而其異學辨下篇，力辨陸學之雜於佛老。鐸曰：禪家之言曰：見性是佛。作用是性。夫天命者太極之流形也。其在於人爲性，卽所受於天之太極也。而禪以作用者當之。象山於禪學中，認取其昭昭靈靈能作用者爲太極，是以氣爲性矣。是以形而下者爲道矣。至其論學，惟曰端坐拱手，完聚精神，是之所以爲學者。惟欲見於己而已矣。又曰：余觀象山自鵝湖辨論之後，亦兩致書於朱子，自認前日偏見之說，而朱子戲謂其自葱嶺帶來，故其再會之間，辭多斬屈。余竊意欲有逃焉而未能者也。或有問人於子靜，不謂之禪，而謂之異學者，何。鐸曰：禪者靜也。佛老之通學也。象山之學之駁正，韓子所謂雜佛老而言之。張子所謂使儒佛老莊混然一途者。禪亦不足以盡之。二氏之教，虛無寂滅，體若相近，而用則大異。老氏絕念去知，而以微明爲用，是猶役其情於權謀詐術者。釋氏則并其情而滅之。象山凝神爲學，老釋其心，獨儒其言。若良心若仁義，若四端，必以爲口實，聽之似是而非也。虛而不受，寂而不感，於二氏之體，則同之矣。而又以

擒擲乎人爲用。是又純用老子之術。而非吾儒道德齊禮之意矣。或又問象山乃終身不合以流於異者。其故何在。鐸曰。象山嘗自言其性好與人異也。而其所以爲學者。其誤又非一端。昔朱子謂子靜之學。只在不知性有氣稟之雜。余謂此特其一也。又其一乃讀書入門之誤。又其一乃自廣狹人。而不知取善於人之誤。又其一以養知卽爲致知之誤。又曰。於其問仁。象山獨謂顏子用力甚難。夫子答之。猶下克己二字。仲弓沈靜寡思。日用之間。自然合道。夫子但告以出門如見大賓數語。嗟夫。同己者則進之。而異己者則退之。象山之見。其異乎人之見歟。

明書卷一百十四

列傳三

儒林傳四

呂柟傳

呂柟字仲木。陝西高陵人。性穎敏。誠確。未總角時。輒有志聖賢之學。雅不喜辭章。嘗居一矮屋。衣冠危坐。日誦六經。性理諸書。雖盛暑不廢。嚴寒則履藉麥草。夜以繼日。潛心通奧。與馬理。康海偕聲價。舉陝西鄉試十名。就禮部不第。入太學。以親喪歸。正德戊辰。舉南宮第六人。賜進士第一。除翰林脩撰。時年三十有四。賜冠服帶履。服若固有。明日有中官來賀。卻之。卽劉瑾也。柟學慕古。是時瑾秉國事。意柟爲鄉人。欲引附己。每啗以卿佐可力致。且授先朝故事。得入內閣典機務。柟屢遜謝之。遂避不與往來。瑾深憾。欲中傷之。會瑾敗得免。九年。在告歸。嘉靖元年。復任修撰。三年。議大禮忤旨。出判解州。六年。陞南京吏部考功司郎中。九年。轉南尚寶司卿。十三年。陞南京太常寺少卿。十四年。轉南國子監祭酒。爲四子抄釋。以示諸生。蓋彙周程張朱粹言也。篤行率人。勤於訓迪。每有條約。勸遵古誼。經書子史。博讀詳玩。並有發揮論者。謂其不愧成均重任云。十五年。陞禮部侍郎。十八年。致仕居家。凡四年卒。年六十四。所著有四書因問。五經

說、史館獻納奏稿、涇野文集十四種。梴之學。大約從克己。務實行。至於闢異學之非。則見道甚卓。梴曰。所謂格物。在隨時隨事處格。念之所起。身之所動。事之所接。皆是要窮。然鳥獸草木。元初與我。也是一氣生的。怎麼不要格。如伏羲亦嘗觀鳥獸之文。但遠取諸物。必須近取諸身。纔是。若離卻己身。馳鳥獸草木格。做甚。又曰。聖賢之道。雖千言萬語。不能盡。切於今日之急務者。惟有二焉。一曰改過。二曰甘貧。又曰。今之學。以甘貧爲本。改過爲急。故能行焉。講知行之不合。無損也。苟不能焉。雖講知行之合。無益也。或問陳白沙之樂。似與孔顏之樂。微有不同否。梴曰。孔顏之樂。只憂處解不來。便是樂。故曰。發憤忘食。樂以忘憂。又曰。樂以天下。憂以天下。如今人言樂。只在推開了事去樂。其流之弊。便是晉人竹林之風矣。時陸伯載宏齋。鄒謙之東郭。皆蚤從守仁遊者。二人數以守仁之學難梴。梴曰。子敢以陽明之學爲是乎。子敢以陽明之學爲不是乎。二人曰。如子之言。不幾於持兩端乎。梴曰。不然。昔者先正以一言一字發人。而況陽明之學。痛世俗誦章之煩。病世途勢利之爭。乃窮本究源。因近及遠。而曰。行卽知也。知本良也。亦何嘗不是乎。但人品不同。受病亦異。好內者不可與言禁酒也。好奕者不可與言禁財也。故夫子劬牛之躁言。色商之直義。達師之務外。懼由之好勇。故德無不成。材無不達。如今病瘡。有在手者。有在足者。有在肩背者。有在面目者。皆足以滯一身之氣。而壅百骸之腫。所病去。則全體無不安矣。故受藥亦異。而起其病亦不難。故有知而後能行者也。猶目見而後足亦走。未有不見而能走者也。若曰。見守齊舉。知行並進。此惟聖人能。故陽明之學。中人以上。雖或可及。中人以下。皆茫無所歸。故論語不道也。亦何嘗盡是乎。雖然。自夫俗儒

而言。忘其良知。而又不知以行之爲急也。其弊至於戕民而病國。則陽明之學。又豈可少乎哉。又曰。古之異端。猶可闢。猶異類也。今之異端。不可闢。則同類也。挾術數者。世稱才儒。閑詩賦者。世稱雅儒。記雜醜者。世稱博儒。趨時競勢者。世稱通儒。談元者。世稱高儒。臨事含糊淹滯者。世稱老儒。蹈襲性命之言者。世稱理儒。斯非皆誦孔子之書之徒者乎。然誤天下蒼生者。皆此異端也。老佛其細諸。又曰。達麼面壁之事。學亦良苦。是蓋入定之功。然使其心有所定。雖終日入市朝。猶寂寂爾。使其心無所定。雖終年面壁。猶擾擾爾。王學謨云。薛文清公有言。汨溺於聲利之中而不覺。何道之敢言。言之適足以爲口耳之末耳。而涇野呂公亦云。只不恥惡衣惡食。做將去。便是實學。由是觀之。在彼不在此。余觀兩公爲人。潛心聖學。不求人知。嘗迹其行事。一不屈金英。一不附劉瑾。至於解經訂傳。安貧守道。幾微不爽。所謂儒宗也。

王艮傳

王艮。字汝止。泰州安豐場人。場俗故業鹽。無宿學者。而汝止孝出天性。寒日見親。以急務盥冷水。乃痛哭曰。某爲子。而令親天寒盥冷水乎。何用人子爲。出代親役。入掃舍奉席。晨省夜定。如古禮。唯謹。久之。行益純。忽心量洞明。悟性無礙。而天地萬物爲一體。自此行住語默。皆在覺體中。題其坐曰。正德六年。閒居。仁。三月半。卽悟入時。已能如此。於是謝役。秉禮爲儒者。而人未之識也。益有年。王守仁以副都御史撫江西。江西人有客安豐者。聞艮說論語。詫曰。此絕類王。巡撫公之談學。艮乃大喜。卽日造江西。服古冠服。執木簡。賦二詩爲贄。以賓禮見。守仁異之。下階迎入。長揖上坐論學。居數日。有省。曰。吾人之學。飾情抗節。矯

諸外先生之學精深極微得諸心者也。反服執弟子禮已守仁居越時時造越中請質乃太息曰是某之罪也夫何風之未遠也辭還家駕小車從二僕北行所至以師說化導所至人聚觀聽者無慮千百抵京同志相顧愕眙共匿車勸止留一月竟諧衆心而反而良意終遠矣良骨剛氣和性靈朗徹見人眉宇即知其所存學者意慮稍疎漏見之不敢正而視也接引人無閒僕隸雖顯貴悍戾不說學者聞其言皆愧悔謝不及有蓄疑不解者旁及他事使本疑頓解機應響疾諸聲應氣求者望庭爲歸與剖析精審莫不虛往實還而喜溢色眉也良之學以悟性爲宗以反己爲要以孝弟爲實以樂學爲門以太虛爲宅以古今爲旦暮以明學啓後爲重任以九二見龍爲正位以孔氏爲家法其言曰只心有所向便是欲有所見便是妄既無所向又無所見便是無極而太極又曰知愚夫愚婦與知與能與鳶飛魚躍同一活潑潑地則知性矣語持切大嚴者曰君子不以養心者害心有問放心難收者呼之輒應而起曰汝心見在更何求乎曰卽事是心更無心矣卽心是事更無事矣其郡守召辭以疾謂門人曰致師而學學不誠矣往教教不立矣不往是不仁也必往是不智也此道也或問良何不仕曰吾無往而不與二三子者是某之仕也或勸之著述不應御史洪垣構舍居其徒御史吳悌抗疏薦不報卒大學士趙貞吉謂良爲契聖歸真生知之亞晚作格物要旨勉仁方諸篇學者稱爲心齋先生生五子衣襪裋補雍皆有立而襪最知名襪字宗順學者稱東崖先生生九齡隨父之守仁所士大夫會者千人守仁命童子歌多囁嚅不能應宗順意氣恬如聲若金石守仁召視之知爲良子詔曰吾固知越中無此兒也輒奇而授之學是時守仁左

右多名宿。宗順以守仁命。悉師事之。踰十年歸。娶已之越。復留者八年。師友相陶汰。氣竦神涌。耳新目明。由枝葉而達其根。派流而溯其源。沛如也。久之。守仁卒。良始授徒淮南。宗順相之。覃思悠然。講論鏘然。良沒。宗順望日隆。四方聘以主教者沓至。歸則隨村落小大。扁舟往來。歌聲與林樾相激發。聞者以爲舞雩詠歸之風。復出。歌天臺嘗晤宗順。迎謂曰。衆多君解了。於道宜得。君自謂若何。曰。道者六通四關之塗也。藉謂我有之。將採取焉。而又曰。我能得之。則已離矣。聞者大賞其言。至金陵。與多士講習。連榻累旬。博問精討。靡不愜其欲。以去。或問學何以曰樂。又問曰。樂者心體也。有不樂。非其體也。吾求以復之而已。然則如之何而後樂。曰。吾體自樂。曰。如之何而後樂。是加於體之外也。然則學可廢乎。曰。否。莫非學也。而皆以習此樂也。樂者樂此學。學者學此樂。吾先子蓋言之矣。樂有辨乎。曰。有所倚而樂者。樂以人也。喪其所倚。則不樂。無所倚而樂者。樂以天也。舒慘失得。欣戚榮悴。無之而不可。曰。無倚而樂。非樂道邪。曰。樂卽道也。而曰樂道。是牀上之牀也。學顧止此乎。曰。孔顏曰不改其樂。曰樂在其中。於此蓋終身焉。而何以加諸。然則何以曰憂道。曰。君子非以外物爲戚戚也。所憂者道也。憂道者。憂其不得乎樂也。云爾。居恆不煩。繩削而動。應矩矱。非其義。千金至前。不一盼也。喪祭必遵古禮。建先祠。置祭田。月朔。率子弟肅衣冠致奠。隨考一月中所爲。竟日乃罷。蓋良以修身格物爲歸。宗順嚴取子。敦孝弟。聯宗族。關於行誼者。毛髮必謹。以薦召用。宗順堅臥自如。臨終。屏婦女毋使近。諭門人子弟親賢講學。語不及私。良之與從遊者甚衆。推馴謹者。以林春爲第一。

林春傳

林春字子仁。泰州人。春生平束脩之問。畏之若苞苴。行必愜人情之所安。故不爲嵬崖斬絕之行。言必衡乎力。故不爲要眇浮闊之言。於世紛華盛麗。環巧慧辯。未嘗一有濡賦也。正德中。登進士第。累官文選郎中。吏部稱文選至要重。故峻其門第。雖親故不往拜。春獨門無留賓。同志中雖名位絕不。擢者。悛悛下之惟謹。出部。則徧走刺諸賓客。夜則挾衾。被往宿觀寺中。講學竟夕。以爲常。其論學。輒曰。吾師心齋。說如是。惟恐人之不入。意烝烝如也。而同志日臻。是時搢紳士以學萃京師者數十人。其聰明解悟。能發揮師說者。推山陰王畿。志行悃悃。則推春與吉水羅洪先。洪先於朋友中最沈密。子仁猶而疵之。以其露才也。然春本以長厚清苦。謹繩墨自立。日以朱墨筆點記其意向。臧否醇雜自程度。而時學徵本體益精。頗以春爲未至。卽春亦自歎曰。此治病於標者也。然其後蕩者失所歸。而春終以質行名。春官吏曹久。以母病。謝歸養。掌選事。慎擇監司守令。而賢同志者薦進之。恐後。其論選曹之職。上欲以其心通於君。相與冢宰之心。下欲以其心通於選人。與天下人之心。相冢宰之心。未必皆選人與天下人之心。選人之心。未必相冢宰之心。誠令相冢宰之與天下人之心合。則吾職舉。吾志行矣。其自任如此。

董灃傳

董灃字蘿石。海鹽人。家約好學。年六十有八。以能詩聞江湖間。與其鄉之業詩者十數輩爲詩社。旦夕吟詠。至廢寢食。遺生業。時俗共非笑之。不顧。以爲是天下之至樂也。已遊會稽。聞王守仁講學山中。以杖肩

其瓢笠詩卷訪之。入門長揖踞上坐。守仁異其氣貌。且年老矣。禮敬之。詢其名。曰董蘿石。守仁故聞之。與之語連日夜。灑退。謂何秦曰。吾見世之儒者。支離瑣屑。修飾邊幅。爲偶人之狀。其下者。貪饜爭奪於富貴利欲之場。而常不屑其所爲。以爲世豈真有所謂聖賢之學乎。直假道於是以求濟其私耳。故遂篤志於詩。而放浪於山水。今吾聞王子良知之說。而忽若大寐之得醒。然後知吾向之所爲。日夜敝精勞力者。其與世之營營利祿之徒。特清濁之分。而其間不能以寸也。幸哉。吾非至於王子之門。則幾於虛此生矣。吾將北面王子而終身焉。得無以旣老而有所不可乎。秦起拜賀曰。先生之年則老矣。先生之志何壯哉。入以請於守仁。守仁喟然嘆曰。有是哉。吾未或見此翁也。雖然。齒長於我矣。師友一也。苟吾言之見信。奚必北面而後爲禮乎。灑聞之曰。王子殆以予誠之未積歟。辭歸兩月。棄其瓢笠。持一縑而至。謂秦曰。此吾老妻之所積也。吾之誠積若茲縑矣。王子其許我乎。秦入以請。守仁曰。有是哉。吾未見此翁也。今之後生晚進。苟知執事爲文辭。稍記習訓話。則已侈然自大。不復知有從師學問之事。間有或從師問學者。則闕然共非笑指斥。若怪物。翁以能詩訓後進。從之遊者。遍江湖。蓋居然先輩矣。一旦聞予言。而棄去。其數十年之成業。如敝屣。遂求北面而屈禮焉。非天下大勇。其孰能與於此。則如蘿石固吾之師也。而吾豈足以師蘿石乎。灑曰。甚哉。王子之拒我也。吾不能以俟請矣。入而強納拜焉。守仁固辭不獲。則許之以師友之間。與之探禹穴。登廬峯。陟秦望。尋蘭亭之遺跡。徜徉於雲門若耶。鑑湖剡曲。灑日有聞。益充然有得。欣然樂而忘歸也。其鄉黨之子弟親友。與其平日之爲社者。或笑而非之。或爲詩而招之返。且曰。翁老矣。何自苦。

若是邪。溪笑曰。吾方幸逃於苦海。方知憫若之自苦也。願以吾爲苦邪。吾方揚馨於渤海。而振羽於雲霄之上。安能復投網罟而樊籠乎。去矣。吾將從吾之所好。自號曰從吾道人。後歸家。以講學老子穀。仕至漢陽知府。亦精於名理。著有四存稿。

王畿傳

王畿字汝中。浙江山陰人。學者稱龍谿先生。正德嘉靖間。王守仁講學。以致良知爲宗。郡人駭而不信。畿首往授業焉。畿弱冠。以高才領鄉薦。士望之爲去就。及是以所聞出爲諸士言。願從者日衆。嘉靖癸未。試禮部不第。立取京兆所給路券焚而歸。卒業於師門。師爲治靜室居之。踰年。乃曰。致良知三字。誰不聞。信得及者。惟我也。丙戌。復當會試。守仁命往不答。守仁曰。吾非欲以一第榮子。願吾之學。疑信者半。而吾及門士。樸厚者未通解。穎慧者乏沈毅。能闡明之者無踰子。今宦學者咸入都門。子曷往焉。畿曰。諾。在途。自良知外。口無別談。自六經四書傳習錄外。手無別檢。間有及時藝者。曰。業已忘之矣。抵都門。歐陽南野。魏水洲。王瑤。湖泊郡縣。入覲。諸同志爭迎畿。與相辯證。大爲推服。入場屋。所爲文直寫己見。不數數於時格。識者謂此非可以文士伎倆較也。拔置高等。而同門錢緒山亦在選。時閣部大臣多不喜學。公語緒山曰。此非吾輩仕時也。不就廷試而還。時師門來學者衆。守仁不能徧指授。則屬畿與緒山分教之。而畿所與起爲多。守仁論學。每提四句爲教法。無善無惡心之體。有善有惡意之動。知善知惡是良知。爲善去惡是格物。緒山謂此是師門定本。不可更易。畿謂夫子隨時立教。謂之權法。未可執定。體用顯微。只是一機心。

意知物。只是一事。若悟心是無善無惡之心。意卽是無善無惡之意。知卽是無善無惡之知。物卽是無善無惡之物。蓋無心之心則藏密。無意之意則應圓。無知之知則體寂。無物之物則用神。天命之性。神感神應。惡固本無。善亦不得而有也。是謂無善無惡。若有善有惡。則意動於物。非自然之流行。著於有矣。自性流行者。動而無動。著於有者。動而動也。意是心之所發。若是有善有惡之意。則知與物一齊。皆有。心亦不可謂之無矣。緒山曰。若是。是壞師門教法。非善學也。畿曰。學須自證自悟。若執權法以爲定本。未免滯於言詮。亦非善學也。時守仁將有兩廣之行。緒山謂曰。吾二人所見不同。盍相與就正焉。晚坐天泉橋上。因各以所見請質。守仁曰。正要二子有此一問。吾教法原有此兩種。四無之說。爲上根人立教。四有之說。爲中根以下人立教。上根之人。悟得無善無惡之體。便從無處立根基。意與知物皆從無生。一了百當。卽本體便是工夫。頓悟之學也。中根以下之人。未悟本體。未免在有善有惡上立根基。心與知物皆從有生。須用爲善去惡工夫。隨處對治。使之漸漸入悟。從有歸無。復還本體。及其成功一也。汝中所見。是接上根人教法。德洪所見。是接中根以下人教法。汝中所見。我久欲發。恐人信不及。徒爲躐等。今旣說破。亦是天機該發泄時。但吾人凡心未了。雖已得悟。不妨隨時用漸修工夫。不如此。不足以超凡入聖。所謂上乘兼修中下也。德洪資性沈毅。汝中資性明朗。故其學亦因其所近。若互相取益。使吾教法上下皆通。始爲善學耳。守仁發舟。畿與緒山追送嚴灘。復扣元旨。守仁舉佛家實相幻相之說詔之。畿獨旁語曰。心非有非無。相非實非幻。纔著有無實幻。便落斷辟之弄丸。不著一處不離一處。是謂元同。守仁亟可之。守仁至洪都。

鄭東郭暨水洲、南野率同門三百餘人請益。守仁曰：吾雖出山，汝中與同志居里，究竟此事。諸君只裹糧往浙，相與質之，當有證也。明年守仁平思田歸，卒於南安。畿方偕緒山赴廷試，聞變渡江，復迎至嚴灘。與緒山議服制，緒山以爲父母在，麻衣布經，弗敢加焉。畿請服斬衰以從，於是共奔至廣信成喪，扶櫬歸越。經紀喪事，廬於墓，定服心喪三年。建天真書院於省，肖守仁像其中，且以館四方來學者。歲舉春秋仲丁之祭，無間及門私淑，胥以期集。祭畢，分席講堂，呈所見，有畿取正焉。心喪畢，壬辰始赴廷對，授南職方主事。尋以病乞歸，病已待補，時相夏言議選宮僚，其掎儀制郎吳春，畿門生也，首以畿薦。言曰：吾亦聞之，但恐爲文選所阻，一往投刺，乃可。畿曰：補宮僚而求之，非所願也。言怒曰：人投汝懷，乃敢卻耶？若負道學名，視我爲何如人？遂大恨。補南武選，會三殿災，詔求直言。六科疏薦王畿，學有淵源，宜列清班。備顧問，言詆爲僞學而罷。薦首吏科都給事戚賢官，乃再疏乞休。後以考察罷歸。孳孳以講學爲務，所至接引無倦色。自兩都吳楚閩粵皆有講舍。江浙尤盛，會常數百人。年八十餘，猶不廢出游。有止之者，輒對曰：不肖豈真好勞，但念時常處家，以習心對習事，因循隱約，有密制其命而不自覺者。纔離家出遊，精神意思，便覺不同。與士大夫交承，非此學不究，與朋儕酬答，非此學不談。晨夕聚處，幹辦此一事，閑思妄念，與世情俗態，無從而入。蓋欲究極自己性命，自然不得不與同志相切劘。若同志中因此有所興起，欲與共了性命，則是衆中自能取益，非吾有法可以授之也。又曰：不肖百念已灰，而耿耿於心，不容自己者有二：師門宗說，幸有所聞，常年所遊，思得一二法器，相與證明，衍此一脈。天壤悠悠，誰當負荷。六經四書之文，厄於後

儒之億測附會。道晦學荒。蓋千百年於茲矣。先師首倡良知之旨。千聖學脈。賴以復續。不肖晨夕參侍。謬承受記。時舉六經疑義。面相指授。欣然有契。稽諸遺編。所可徵者。十纒一二。衰年日力有限。若復秘而不傳。後將復悔。師門之罪人也。思得偕同志數輩。相與辯析折衷。問舉所聞。編摩纂輯。勒爲成典。藏之名山。以俟後聖於無窮。豈惟道脈足徵。亦將以圖報師門於萬一也。萬曆癸未卒。年八十六。

鄒守益傳

鄒守益。字謙之。安福人。父賢。進士。仕至福建按察司僉事。守益年十七。舉江西鄉試。正德六年辛未。會試。王守仁爲同考官。賞識之。拔第一。廷試及第。第三人。授翰林編修。踰年告歸。一意問學。嘗讀中庸。嘆曰。程朱補格致傳。而中庸首言慎獨。不及格物者。何也。積疑於懷。會守仁開府虔臺。守益往謁。論辯反覆。間夙疑冰釋。曰。道在是矣。會宸濠反。周旋兵間者久之。嘉靖初。起官。復謁守仁於越。留月餘。守仁戀戀不能舍。去。門人問之。曰。會子所謂有若無。實若虛。犯而不校。謙之近之矣。會大禮議起。上書忤旨。下詔獄。謫判廣德州。其蒞官臨民。務以誠心相感。發奸摘伏。人稱神明。顧常自訟曰。如保赤子。愧未能也。撤淫祠。建復初書院。延同門友王艮暨諸賢講學。興禮風。動隣郡。徽甯池。太閭皆向風志學。六年丁亥。陞南禮部主客郎中。在部日與洪若水。呂柟相聚講論。辛卯。請告趨會稽。會守仁卒。存撫其孤。聚同門講學於天真書院。戊戌。起南吏部考功郎中。己亥。奉旨簡宮僚。召入爲司經局洗馬。充經筵講官。應詔上薛瑄從祀議。時與徐階。羅洪先。唐順之相資切。士類興起甚衆。居頃之。陞太常寺少卿。兼侍讀學士。掌南院。尋改南監祭酒。於

是明成憲申章程立號冊俾出入相友淑慝相勸歌詩習禮六館士相慶得師居無何九廟災大臣當自陳守益於疏中寓交傲意譏者因中傷之竟解官歸四十一年壬戌年七十二寢疾召家人訓飭之諸子扶坐正衣冠而卒隆慶初贈南京禮部右侍郎諡文莊有文集若干卷嘗語學者曰人心之靈萬古一日目分黑白口辨甘苦鼻別香臭今之人有異三代乎是非在人猶黑白甘苦謂人無是非之心誣其心者也夫孩提而知愛敬入井而知惻隱噉齷而知羞惡豈待教而後能哉心之靈明知是非若黑白甘苦井然不爽自慊自欺在己而已又曰良知一也自其無昏昧謂之覺自其無放逸謂之戒懼自其無加損謂之平等工夫一也所從言之異耳若以覺與平等爲簡易以戒懼爲起非惟誤認戒懼亦誤認覺與平等矣其持論類如此平居與學者接不言而使人意消說者謂溫良恭儉讓之風感人動物有出於言語作爲外者子善太僕卿孫德涵按察僉事德溥太子洗馬皆知學能世其家

羅洪先傳

羅洪先字達夫吉水人自幼端重不爲嬉弄年五歲夢至通衢市人肩摩自知爲夢呼曰汝往來者皆在吾夢中尙自攘攘何耶拍手大笑遂覺以告母李宜人識者知其非埃壘人也十一歲讀古文慨然慕羅一峯之爲人年十五聞王守仁講學虔臺心卽向往遂卑視舉子業常斂目端坐同舍生謂之曰是羅道學先生耶比傳習錄出手抄玩讀至忘寢食年二十二舉於鄉嘉靖八年廷試世宗親閱所對策御批云學正有見言讜而意忠宜擢之首者賜進士及第第一人授翰林修撰明年告歸已而丁外艱哀慟深至

苦塊疏食。不入室者三年。一日讀楞嚴經。得反聞之旨。遂覺此身在太虛。視聽若寄世外。友人覩其顏貌。驚服。忽自省曰。得無誤入禪耶。乃反求諸孔孟。與同郡鄒守益及諸同志。切劘無虛日。改左春坊贊善。疏請豫定東宮朝儀。忤旨罷爲民家居。削跡城市。應酬禮文。辭受取與。一裁以義。親賢問道。攜謙求益。未嘗以言詞先人。然瞻其容止者。非僻爲之潛消。遊衡嶽。僧楚石密授以外丹。拒而不受。里中得石洞。故爲虎穴。荆莽翳鬱。闢之可容百餘人。命曰石蓮。自是多洞居。時出聚友於雪浪閣。四方搢紳士人請益者日衆。贛江水漲。洪先宅舍漂沒。假宿田家。巡撫都御史馬森以其家故窳。而嘗卻臺省餽坊數千金貯縣帑。檄縣取爲構室助。辭不受。唐順之以兵事起官。約借出。洪先曰。天下事爲之非甲則乙。某欲爲未能者。得兄任之。卽比自效可也。奚必我出。時相亦貽書致意。因答書。願畢志林壑。年踰五十。謝客屏居。止止所製半榻。默坐榻間。不出戶者三年。事能前知。人或訝之。答曰。是偶然。不足道。比順之計。始下榻。哭邑。當造賦冊。念詭瀧重爲民病。戒里中按畝收賦。督冊。憲使卽以邑冊請任之。於是宿弊頓革。貧者歡若更生。比疾作。子世先適赴省試。家人問何言。答曰。兒歸。但語以莫厭窮。窮固自好。諸生環侍。以意示令扶起。危坐正中。斂手端默而卒。年六十有一。公學始致力於踐履。中歸攝於寂靜。晚徹悟於仁體。丁巳。提學副使王宗沐訪石蓮洞中。問靜曰。君可聞者。吾之言也。所從出此言者。君不得聞也。豈惟君不得聞。吾亦不得而聞之。茲非至靜爲之主乎。故曰。君子思不出其位。至靜無私之位也。又曰。戒慎不睹。恐懼不聞。不睹不聞。靜也。戒懼者。不欲馳而離也。又曰。知止而後有定。定而後能靜。知止所以歸靜也。馳而離焉。不可謂之止。故歸

靜言乎其功也。而謂任心之流行以爲功者。吾嘗用其言而未有得。是以守吾陋而不知變。非敢倡說以眩人也。王戍。王畿以專靜不達。順應爲疑。訪於松原。問近日行持何似。曰。近覺一切無有雜念。卽感應處。便自順適。王畿曰。工夫有先後否。答曰。卽如均賦一事。終日紛應。吾未嘗憎厭執著。放縱張皇。裝侮偏黨。自朝至暮。惟恐一人不得其所。一切雜念不入。亦不見動靜二境。自謂卽定靜工夫。非專以默坐時爲靜。而動應時無靜也。又曰。世間豈有見成良知。良知非萬死工夫。斷不能得也。人今誤將良知作現成看。不知下致良知工夫。奔放馳逐。茫蕩一生。有何成就。又曰。吾輩所以必須學者。皆緣習氣作梗。要得消磨。蓋自有知以來。積染成習。如油入麪。未易脫離。誠不可以平日虛見爲得乎。須是終日應酬。終日收斂。不使習氣乘機潛發。始不負一生耳。明年。錢德洪以王守仁年譜成請序。乃爲序曰。善學者。竭才爲上。解悟次之。聽言爲下。蓋有特妙契而不知反躬。至不副夙期者多矣。甲子。郡節推周宏祖問學。洪先手書冊曰。落思想者。不思卽無。落存守者。不存卽無。欲得此理。炯然隨用具足。不由思得。不由存來。此中必有一竅。生。竅然不類。又曰。此非可以倖至也。卻從尋求中得。由人識取。洪先始歸田。攻苦淡鍊。寒暑躍馬彎弓。考圖觀史。其大若天文地志。儀禮典章。漕餉邊防。戰陣車介之事。下達陰陽卜筮。靡不精數。至人才吏事。國是民隱。彌加諏詢。曰。苟當其職。皆吾事也。年垂五十。視時事日非。乃絕意仕進。然饑渴由己。撻市引辜之衷。未嘗一日忘。天下士想望其出。以卜治平。而竟不果。隆慶元年。詔贈光祿寺少卿。諡文恭。

唐順之傳

唐順之字應德。武進人。文行爲學者所宗。稱爲荆川先生。嘉靖八年己丑。中會試第一。及廷試。時相使人索試策。欲首擢之。而順之以年少筮仕。守己當嚴。竟不與。居二甲首。第一則江西羅洪先。一見洪先。知其人品高。因定爲石交。授武選主事。以幼時常竭精神於舉業。幾成瘵疾。而學問文章未成。恐碌碌仕途。無以爲終身自立之地。庚寅。以得歸。值母艱。服闋。起改吏部稽勳主事。調考功。居恆留心有司。稔知某某賢。後至京。以不通關節。留滯不時用。順之卽密白其賢。多擢科道。不使其人知之。時張璠議改部屬官爲翰林。六部首推拜編修。校對累朝實錄。於時王遵岩。陳后崗。高蘇門。皆以詩文名當世。一見順之作。心服之。而自未敢以爲然也。至其戒行雖苦。終少自得之趣。順之尤自歎。時則王畿居京師。順之見之。叩守仁之說。因留心聖賢之學。校對完。例當陞賞。順之不欲受。又以聽愛己。將遠其嫌。堅告歸。璠緣是怒。以吏部原職致仕。居家貧甚。而於文章之潤筆。弟子之贊儀。未嘗妄取。林下三十年。不役官府一人。不受坊價一緡。會皇太子立。選宮僚。上面諭宰臣。起爲春坊司諫。又以請朝東宮落職歸。自是御一布袍。嘗居宜興山中。與諸生講學。宦於其地者。欲一見之。無從也。四方之行。過是邑者。必先禮於其廬。以得見爲榮。剡薦無虛日。御史舒雲川奏曰。學以聖賢爲法道。以經濟自期。立朝著。蹇諤正直之風。居鄉有廉靖無求之節。乾坤不可無此正氣。朝廷不可無此正人。可謂得其真矣。順之喜靜坐。樂與外方之士遊。曰。方外之學。雖與吾儒不同。而其苦行堅守。洗淨必緣。知自求之身者。固賢於今之儒也。居恆於書無所不讀。無不精究其妙。而於歷算尤精。文章詩賦極於粹精。然嘗曰。此不過應酬之作。更看山中靜坐十年後文字。更何如耳。與

人無間於貴賤貧富。惟投其機。則言笑無厭。有所拂。則喞然見於顏面。遇之途。亦爲之趨避。曰。匿怨而友。吾弗爲也。其與人言。罄竭底蘊。若無所不盡。事關機要。則深沈隱默。際不可窺。於瑣屑之事。若不甚通曉。至於籌畫世故。則辨悉毫芒。性恬淡不樂仕進。而見人之瘡痍困頓。又若痾瘵切身。思救援之如不及。貌不踰中人。而視天下勢之所至。若萬鈞之壓卵。處之晏然。舉天下之所不敢爲者。獨毅然當之。嘗自謂當今少一甯武子之愚。蓋自況也。三十三年甲寅。倭奴起釁。流血東南。順之目擊其變。至不能寢食。適居外艱。而趙文華者。以上命視師海上。來訪。與陳機略。且言非專任時。胡宗憲不能平此寇。文華歸朝。首薦順之。以南部軍駕主事起之。進北部職方員外。堅臥不起。上敕巡按官促行。乃赴京。進郎中。陛見後。卽奉命查勘邊務。繼而視師浙直。順之奮然曰。一月賊不平。請擢將官。三月賊不平。請擢郎中。十二月將至浙。賊聞而遁去。順之計平賊上策。當禦之海外。海道不可不熟。乃自江陰與嘉興兩次下海。泛大洋。至蛟門而還。未幾。春汛急。自登海船。督諸將泊崇明沙。沈賊船十三隻。斬賊首百二十級。餘賊敗走匿三沙。陞太僕少卿。宗憲奏留同事。尋進右通政。於時江北告急。宗憲檄總兵盧鏜往援。順之以江北陵寢重地。乃以三沙賊檄鏜堅守。身赴江北。與巡撫李遂首尾擊賊。敗之於姚家蕩。又敗之於廟灣場。賊遁。復往攻三沙。居海中二月。竟以鹽滷之故。腹疾增劇。方回太倉。調遣狼兵。而賊乘風雨夜登江北岸矣。順之每以此自愧。其斬馘功。皆遜不居。而宗憲竟上之。三有白金文綺之賜。順之每與宗憲論國家事。未嘗不泣下沾襟。誓以身許國。曰。胡公計事先我。一著。至忠義一念。則甚相符合。未幾。陞僉都御史。巡撫淮揚。因積勞。

病不能行。然以淮揚重地。朝方倚任。乃勉赴官。值歲歉。請於朝。得餘鹽銀二萬兩以賑。又自捐俸。倡有司易米。散各地方爲粥。以食饑民。順之素仁愛。又以淮揚爲天下要道。恐有變。倭乘之。貽患不細。故於賑濟獨勞心焉。時病甚。治軍旅不少休。三十八年己未三月二十一日。登焦山。望三江。嘆曰。吾第一梟將。使吾病而不能展其能。奈何。然使一病都堂居海中。則諸將無敢不下海。諸將能下海。則敵人自奪氣也。欲從太倉取道常熟居海中。行至通州而病革。猶以爲人與學問未成。未了十年工夫。自恨。時天皎皎。聞天鼓鳴於舟上者三。而順之卒。

羅汝芳傳

羅汝芳。字惟德。江西南城人。正德乙亥生。五歲。從母授孝經。小學諸書。十五。從新城張洵水學。洵水每謂人須力追古人。於是一意以聖賢自任。一日。誦薛氏語錄云。萬起萬滅之私。亂吾心久矣。當一切決去。以全吾澄然湛然之體。遂焚香叩首。矢心力行。數月而體未復。嘉靖十一年壬辰。閉關臨田寺。几上置鏡。與孟水對之。令心與水鏡無二。久之成疾。父憂之。授以傳習錄一編。循其言求之。病漸愈。十九年庚子。入省。赴文會。見顏山農。自述避危病。生死得失。能不動心。山農不許。曰。是制欲。非體仁也。汝芳曰。非制欲。安能體仁。山農曰。子不觀孟子之論四端乎。知皆擴而充之。如火之始然。泉之始達。如此體仁。何等直截。子患當下日用而不知。勿妄疑天性之息也。汝芳悟。遂於稠人中稽首師事焉。癸卯。舉於鄉。甲辰。舉會試。曰。吾學未信。未可以仕。不就廷試。歸而尋師問友。周流四方。十年。建從姑山房。以待四方講學之士。楚人胡宗

正奮以文學受業。至是聞其易有傳也。迎致之。執弟子禮。宗正喜。使息心而深思之。謂曰。若知伏羲當日從平地著此一畫耶。汝芳略爲解說。宗正不應。徐曰。障緣益增。本真益昧。如是三月。然後以易授焉。嘗苦格物義難曉。乃錯綜前聞。互相參訂。每有所見。則以請正其父。父不爲釋然。三年之後。一夕忽悟。心甚痛快。直趨父榻前陳之。父亦躍然起舞曰。得之矣。得之矣。因回憶往年從師論道。徒成書餅。饑飽了無干涉。癸丑。北上。過臨清。忽遘重病。倚榻而坐。夢一翁來言曰。君身病康矣。心病則未也。不應。翁曰。君自有生以來。遇觸而氣不動。當勸而目不瞑。擾攘而氣不分。夢寐而境不昏。此君心痛也。汝芳愕然曰。是則予之心得。豈病乎。翁曰。隨物感通。原無定執。君以宿生操持太甚。遂成結習。君今漫喜無病。不悟天體漸失。豈惟怵病而身亦隨之矣。汝芳大驚。伏地叩謝。汗下如雨。遂寤。從是執念漸消。隨入京。赴廷試。初仕爲令。入爲工部郎。出知甯國府。所至不事刑扑。惟以化育人才爲功課。每至彬彬有絃歌風。歲大計。以守入覲。見大學士徐階。階喜曰。吾初不欲煩子以郡事。由今觀之。更有實用也。汝芳起謝。且請曰。先生加意於某。不過爲世道計。如推此意以及同志。天下斯文尤幸。階默然良久曰。古今事亦有不由己者。卽如狄梁公反周之志固堅。而所託則張柬之。柬之時已向老。儻沒在武后之先。志且奈何。汝芳毅然曰。先生此言。知柬之不知梁公。階曰。我何以不知梁公。汝芳曰。梁公以人事君。則所舉柬之。亦必以人事君者也。武后先沒。成事固在柬之。卽不然。柬之雖去。而柬之所舉。亦自有在。夫復何憂。階首肯。汝芳復曰。宗社以人心爲本。今來朝兩司郡縣。多極一時之選。所患學脈不端。則心事難一。先生趁此合併一番。令其向往不差。則終身

得業。豈不益光明俊偉也哉。階躍然喜。翌日。大會靈濟宮。汝芳娓娓發明。音吐洪響。興起者不可勝數。返郡未幾。丁父艱奔歸。士民悲號。不忍釋。有步隨至盱江者。家居四方來學者日衆。萬厯改元癸酉。起復入京。見張居正。問山中功課。對曰。論語。大學。視昔差有味耳。居正默然。補東昌守。治東昌如甯國。未幾。遷雲南副使。爲開水利。塹城濠。省徭役。政暇。召同志講學。信從益衆。轉藩參。齋捧入京。禮成。遂請告出城。同志留集廣慧寺論學。居正惡之。嗾言官疏劾致仕歸。復與諸門人走安成。下劍江。趨兩浙。金陵。往來閩。廣。益。張皇此學。十五年戊子八月。偶疾。與門弟子講學不倦。一日。肅具冠服。禮天地祖考。端坐中堂。弟子環侍。讀教曰。徒言也不是道。滿前洋溢。俱是發育峻極。左史萬賓蘭問疾。命具紙筆。手書曰。此道炳然宇宙。不隔分毫。故人己相通。形神相入。不待言說。古今自直達也。後來見之不到。往往執滯言銓。善求者一切放下。放下時更有何物。自是絕筆。明日爲九月朔。盥櫛出端坐。命諸孫次第進酒。各徵飲。隨拱手別諸生曰。行矣。諸生戀留盤桓一日。許之。次日。命諸孫掖至正寢。整衣冠端坐而逝。年七十有四。門人私諡曰明德。稱曰近谿先生。

殷邁傳

殷邁。字時訓。南京留守衛人。生而氣貌純靖。有雅志。居恆自奮曰。學不究本原。徒取世資。非夫也。嘉靖十年辛卯。舉於鄉。及入太學游。益自砥礪。辛丑。成進士。授戶部主事。乞南。改驗封。滿考。晉文選郎中。出爲江西參議。擢貴州督學副使。疏請致仕。丁卯。穆宗改元。用薦者言。起原官。視學兩浙。歷江西。參政。按察使。四

川右布政。晉南太僕卿。請告還。萬厯元年癸酉。復起家起南京太常卿。尋陞禮部右侍郎。卿子管祭酒。事。居數月。復稱疾乞致仕。許之。邁自筮仕至卿貳。更四十年。計其在官之日僅十三。始邁以南驗封考滿。如京。士論擬留北銓。力辭不就。每進輒引遠若不屑事。至所居職。恆辦於浙。掄士一先德行。諸生中有以出妻抵誣者。獄久滯。邁暴其枉釋之。夫亡而婦從死。議者欲旌其節。邁曰。婦節以守死不二爲貴。從死非中制也。議者躓之。在太僕。值問政寢弛。吏因緣爲奸。隨事振刷。不辭煩細。至典國學。則申嚴功令。開示名理。六館士喁喁嚮風。其得大體類若此。性尚元泊。恬默寡交。縉紳大夫或造請邁不得。至海內士與邁氣類者。貽書不遠千里。以學術相辯證。少求格致之義。不得其說。至哽咽終日。究心中庸證諸內典。已而澄思靜照。久之。忽有省。自言一日於幽寂中恍惚見其良心。始知此心虛融周徧。而身內有形之心。非吾心也。其所得亦可窺其崖略矣。陸樹聲稱邁坐鎮雅俗似房次律。急流勇退似錢宣靖。洞明宗要則楊次公。晁太傅。至其信道之篤。不言而默成。視理學諸儒。不知何如也。所著有懲忿窒欲編。逍遙訣。測言。閒雲館野語。大約皆理學之言。

明書卷一百十五

列傳三

儒林傳五

張元忬傳

張元忬字子蓋別號陽和。其先縣竹人。徙山陰。父天復。進士。官至行太僕寺卿。生元忬。元忬生而古貌魁然。稍長。好讀書。母憐之。戒無溺苦於學。元忬每暮燈。俟母寢。夜誦。不令母知。總角時。嶽嶽負意。氣數矢口。談時政得失。人物臧否。父時抑之。會楊繼盛諫死。元忬遙爲誄詞。慷慨泣下沾襟。天復大奇之。元忬嘗讀書。至朱子格致篇。輒乙其處。而沈思久之。聞王守仁良知之說。遂潛心理學。嘉靖三十七年戊午。舉於鄉。數上公車。不第。下帷龍山之陽。喟然嘆曰。聖賢學自有真。曲士抱蟲蛙之見。不務卽心印。聖而猥踵其下。風豈何陋也。隆慶二年戊辰。歸自京師。而父天復有滇難。蓋天復故嘗副滇泉擊武定叛夷有功。忌者中以蜚語。卒從吏訊。元忬身掖父萬里赴逮。已復馳如京。白狀當事者。比有詔。免天復官歸越。復馳如越。履及門。血縷縷滅跡。天下聞而哀之。四年庚午。遊太學。明年舉南宮。射策賜第一甲第一人。授翰林脩撰。自以遭逢聖明。釋躋取上第。廩廩期有以自樹。日橐筆守官下。蒐羅金匱憲典。而研究之。詞林故清署。第雍

容以文墨相高。稍涉事。輒引代庖爲解。元忭獨聚徒講求世務。人才相與籍記之。戶外屢常滿。每抵掌論天下事。不爲首尾兩端。萬厯元年。元忭疏請進講。列女傳於兩宮。以修二南之化。不報。六年戊寅。外艱。服闋。起家奉旨教習內書堂。元忭曰。若曹日近皇上。可使習爲善。勃貂管蘇非人乎。乃取忠鑿錄。自爲條解。又作訓忠諸吟。令歌之。尋管理誥敕。直起居館。會皇子生。奉書告楚藩。因上匡廬。浮沅湘。還取道武彜。所至多題咏。著有槎間漫筆。家居久之。歲丁亥。超爲左春坊左諭德。兼侍讀。清理武黃。尋充經筵講官。旣入侍金華。退而嘆曰。明主方孳孳向學。嘔喻受講。臣風勸。而講臣不竭忠畢知。以迪宸聽。非夫也。每喟喟然盟心待對。冀有所感孚焉。初上御麻覃恩。乃卽疏白其父冤狀。請以恩及己者移父。至是復申前情。忭旨格不行。元忭仰天泣曰。吾不可以下見吾父矣。武定之役。吾父射擐甲冑。斬首獲千級。口碑具在。乃今幸事明。主而不能爲父洗洗冤。長負君親。吾死後已。蓋居常深念兩世登朝。父建功不售。志以歿。願以身代父報國。而卒且徼國恩報父。故終其身有緹繫之恨。竟以此鬱鬱致疾。疾革。顧弟子呼陛下者。再。又曰。朝廷亦多有人。乃隕。元忭平生雅志聖賢之學。宗王守仁。然不空事口耳。顯務以實踐爲基。嘗曰。知善知惡是良知。爲善去惡是格物。近世學者徒剽文成之外郭耳。又謂朱陸同源。而未流乃歧之。非是。手摘考亭所論著。與守仁意符者彙集之。題曰朱子摘編。以祛世儒之惑。持操端介。絕不喜媵娣事人。然坦焉矚中庸之庭。亦不欲以奇行自見。蓋元忭之進也。出張居正之門。常其炎炎時。卑者蟻附。高者鷲鳴。而元忭不隨不激。有以自守。嘗語同門曰。某門人也。卓囊白簡之事。當以待他人。乃若喪請留。病請禱。某卽死弗爲。

矣。里居數年。私刺不及公門。然事關公義。則侃侃無少避。如議賦法。議不毀兩賢祠。議祀四先生於學。人皆誦爲美談。天性孝友。待父母。疾湯藥。非口所嘗。弗進。比卒。樂築柴瘠。喪葬。悉遵古禮。盡革燕賓崇佛諸敝俗。越人化之。有異母弟二人。父病。以屬元忤。元忤拊之。恩義隆備。居常飯脫粟。衣澆補。而賑施宗黨。若弗及。行誼力追古人。其文章。春容爾雅。粹然一出於正。初。父作山陰縣志未成。乃續成之。已又著紹興府志。會稽縣志。義嚴斧鉞。足稱一方信史。他所著有雲門志略。山游漫稿。不二齋稿。志學錄。讀尙書考。讀詩考。讀史膚評。皇明大政記。

史官曰闕

趙貞吉傳

趙貞吉。字孟靜。號大洲。蜀之內江人。生而神穎。六歲。誦書。日盡數卷。年十五。白二親欲往從王守仁於越。不許。遂遍誦六經。自求之。嘉靖戊子。甫鄉薦。走謁故相楊廷和。里第。廷和稱曰。是社稷器也。明年。下第。歸。值母喪。泣曰。人世飄忽。若是。遂兼修出世業。習靜古刹。不櫛沐解衣者數年。父強令赴試。舉禮部廷對。都御史王廷相撫其卷。曰。雖治安策。弗能絕也。薦第一。上嫌其語戇直。置二甲。尋悔之。乃首列庶吉士。特旨留館。授編修。貞吉感上初年銳意聖學。後稍惑方術。遂上求真儒贊大業疏。執政不懌。貞吉日與同志徐樾輩。切劘踰歲。告歸。爲多士發明大學致知本旨。蜀士翕然知學。起教習內書堂。同修會典。尋遷右春坊右中允。管國子司業事。當此時。天下士高者固守物理。紛若射覆。一聞知本之學。反加詆訾。於聖門性道。

之旨莽如也。貞吉慨然曰：學之不明，未知性也。進諭六館士，首揭中庸性道教爲訓。諸士聞之，懔然。舊習若濯而新。二十九年庚戌，敵大舉。八月入古北口，由通州薄都城。貞吉上破敵疏。是時敵方有求貢，嬖書入朝，上召禮部尙書徐階、集百官議。日中莫有發一語者。貞吉獨出大言曰：城下之盟，春秋恥之。且既許貢，則敵必入城，要索不已。旣內外夾攻，胡以禦之？階曰：足下必有奇畫。貞吉曰：爲今計，請壯出御正殿，下詔引咎，錄周尙文之功，以勵邊帥，釋洗束之獄，以開言路，輕損軍之令，重賞功之格，飭文武百司，共爲城守。遣官宣諭諸將，監督力戰。其他無可爲者。上已偵知其言，手詔嘉其壯烈。陞左春坊左諭德，兼監察御史。領敕宣諭，并給銀惟所措。然敕未有督戰語。可統攝諸將以行也。貞吉以請於相嚴嵩。嵩故有郤，又其黨趙文華素銜之，冀相齟齬而甘心焉。故不與事。權卽兵曹一護卒不可得。時敵騎充斥，乃單騎出城，先指總兵仇鸞營，次過諸將。宣上旨，激勵付賞功銀。一時將卒感奮，惟趙國忠一營駐沙河隔敵，則屬鸞傳諭。而以詰朝入城復命。方貞吉之入也，仍欲上請督戰，已撰有疏草矣。而鸞陰畏其至，遂令人請備膳疏，故爲遲之。貞吉入朝，趣疏不來，獨以宣諭事畢奏上。上怒，謂貞吉領銀未覩措置，第爲尙文束遊說。詔錦衣逮杖落職，補廣西荔波縣典史。三十二年癸丑，量移徽州府判。稍遷南吏部文選司主事。未至，進郎中。乙卯，陞南光祿寺少卿。遷南通政司參議。先是嵩已曠吏部，推以藩參。因上問趙貞吉何在，故有是遷。丙辰，陞南右政通。明年，陞南光祿寺卿。聞三殿災，移書執政言：大工復作，不宜提編加賦，重困民。嵩見大怒。庚申，乃得陞南戶部右侍郎。時貞吉已聞訃歸，服闋，改禮部右侍郎，抵任。上屢遣代祭，示憂眷。嵩滋不

樂亡何。有建議薊州增設戶侍郎督糧練兵者。嵩以屬貞吉。且召貞吉酒。詭曰：是行非公不可。貞吉曰：人臣之義，死生以之。復何諉哉。酒半，貞吉徐曰：今欲戶侍督糧，督京運乎？抑民運乎？若二運已有職掌，卽部中與出薊州何異？添官徒增擾耳。況兵之不練，其過宜不在是。縱十戶侍出，無益練兵也。嵩作色怒且罷。適嵩在告，上手詔次相徐階問薊州事。階對以查理常用習邊糧者。吏部因得易管理爲查理，而以林侍郎行。嵩出愈忿。貞吉而詬林侍郎，嗾其黨給事中張益劾林，不數日，并劾貞吉。竟奪官去。貞吉平日持論，以二氏學通吾儒，謂必出世乃可經世。道汙遊嵩高，抱犢伏牛諸山，巡撫蔡汝南逆而問學。貞吉遂列爲圖明三教之所由起。曰：儒者見之曰儒，仙者見之曰仙，佛者見之曰佛。其實一也。蔡梓以傳及家食，多居玉溪莊，嘗爲諸生申致知之旨，又爲講說人心道心，精一執中，大要以中卽性命，卽天則也。後儒不識中爲何物，至以爲物物有之，是有同於刻舟之愚，雕形之苦，殊失其旨。丙寅，肅宗崩，臨哭最哀。曰：先皇帝知我。隆慶改元，詔起爲吏部侍郎，兼翰林院學士，掌詹事府事。實錄副總裁。會有言幸學祭酒坐講，當豫擇耆德攝之，遂奉旨以原官暫掌國子事。八月朔，駕幸學，賜坐講。禹謨后克艱，厥后章上見其闈，發精明音吐洪鬯，大爲感動。問之，知爲新起用臣，益喜。尋命解監事。充日講官。先是北口陷石州，貞吉與執政數議邊事不合，乃求補南禮尙書。旣行，御史李惟觀、南戶科給事岑用中交章言：趙某居啓沃之任，可以格心贊治，不宜置遠地。適上顧講筵無貞吉，不悅。諭曰：前年高往南京者，仍令日講。遂復以禮部尙書兼翰學。協管詹事府事。戊辰三月，還京。會文武邊臣建議欲招練南兵十萬於張家灣，貞吉執不可。曰：曩南京建

振武營致大變。今乃欲建十振武營於都城側哉。況燕薊乃戎馬場。豈藉南兵。當事者悟。遂移練兵於薊鎮。惟揀南兵三千教鳥銃。識者謂其得算。頃之奉命教庶吉士。仍充講讀纂修。又命代祭先師孔子。爲皇太子千秋。講唐太宗諭太子章。賜賚無虛日。時薊鎮奏修敵臺幾千座。貞吉以爲徒費無裨戰守。因講語中力言之。語具爲執政格不得上。遂邑邑懷去志。而上之眷用意益切。尋詔以原官兼文淵閣大學士。同諸臣入輔大政。一日於講筵謝。上面諭盡心輔佐。貞吉稽首對。臣敢不竭股肱之力。効忠貞之節。第近日朝綱邊防多廢壞。臣欲捐身任事。惟陛下主之。上色喜。於時上多恭穆。而面諭者再。羣臣謂自臨御以來所未有。翌日御便殿。手詔閣臣。謂貞吉已有年。當同任閣事。又撰敕令中貴捧詣閣下。皆特典也。先是大同邊臣棄城走。爲巡按暨科道所參。而閣臣未有言治罪者。貞吉謂宜照元年山西失事例治之。執政不得已。乃行巡按覆勘。貞吉爲是遂註籍不出。上聞。溫諭遣醫賜羊酒瓜果。貞吉感上。乃上疏乞解贊輔重任。退供講職。且言大同之罪。惟祖法國是。公論清議八字。勸之足矣。今兵部與閣臣俱仍姑息。臣欲爭論而力不能。故懷慚思退。上亟慰留之。是日上以原票還閣中。改擬有不襲昔年虛套之諭。而閣中猶以將才難得題覆。上姑兩解之。然信貞吉益篤。明年庚午。上言遵古制收兵權。以飭戎務。略云。我朝內外兵分隸五府。乃高皇帝定萬世太平計。俾免前代權臣握兵之害。永樂末。因聚府兵北伐。旋師後。遂結營圍操。乃以三千神機二營附之。因號三大營。其實皆五府兵也。正統末年。嘗變爲十團營。宏治間。又加爲十二團營。正德間。又添置東西官廳。然五營之號未泯。而五府意猶存也。至嘉靖庚戌。嚴嵩欲爲賊將仇鸞

地。遂請特設戎政廳。括內外兵籍。鑄總督戎政印授鸞。夫以五府外而別立一廳。則盡變太祖分府之意。以十餘萬衆而統於一人。則盡變成祖分營之意。向使鸞誅晚。則時事之危。未可測也。合無將見操官軍九萬人。分爲左右中前後五營。各擇一將統之。責令開營教習。仍以文臣巡覈之。每歲春秋校閱。凡將官能否。軍士勇怯。技藝生熟。皆得奏聞。而賞罰得焉。要令五營齊成精銳。有事則領敕將兵於闕外。事畢則納印歸卒於營中。如是則太阿之柄。獨持於上。而輦轂下有數萬精兵。隨所用而可矣。上曰。分營練兵。乃祖宗舊制。遂下廷臣議行。時本兵科挾前大同事。議遂蜂起。反失貞吉建白本意。上以貞吉兼掌都察院。加太子太保。時閣大學士高拱兼吏部。方欲挾權籠制諸臣。意假貞吉公爲分謗地。故推以兼院事。已而兵尙書霍冀被科臣論劾。賊私疑貞吉前議大同及已。乃於求退疏中。誣其主使。貞吉疏辯。欲付法司究問。以糾官邪。且兩上疏乞休。上不允。乃請給假回籍遷葬。不允。拱尤銜。故相徐階。欲中以危法。疏言當時議事臣。假託遺詔。凡先帝所斥。如大獄及建言得罪諸臣。悉加超擢。死者贈官廕。子是。譬先帝。近於無君。又引宏治間彭程事。欲有以治之。貞吉拂衣起曰。若是則將如宋奸黨碑矣。拱色變。強留之。乃共改票。止於吏部通行曉諭而已。又因貞吉言去大獄字。拱以是迄不得逞於徐階。後又以故錦衣陸炳爲徐姻家。已嫉張御史追劾炳。而刑部以炳一品爵。例在應議列。當請敕三法司集議定之。奏曰。閣中擬票。是日拱遲貞吉久不至。既至。欲從容商之。拱遂徑擬削爵沒產。自是拱與貞吉勢不兩立矣。亡何。宣大督撫王崇古等奏俺答孫把漢阿吉等入降。貞吉語李春芳曰。此邊疆幸事。已而本兵奏上。春芳擬旨。僅曰。貞

吉曰。大約浮言謂恐開邊釁。然自俺答橫行五十餘年。每年邊餉數百萬。何年無釁。豈不在納降也。惟當請覲與降人官職。慰來者心。其制口機宜。一付之督撫。乃改如貞吉言。與那阿吉指揮使。阿力哥正千戶。時口求封貢。朝議紛然。獨貞吉力主其議。丞令督撫姑置封貢事。徐議之。第令俺答速獻投口叛人趙全等九人。易其孫去。且當慎交質。防口劫盟。又貽崇古書曰。吾外憐悉怛謀之附人。內恐李文饒之失助。其爲邊計。篤切類如此。先是給事中張齊者。爲拱瞻劾徐階。而都御史王好問因訐齊賊事。抵戍。後齊倚拱辨。復力擊好問與刑尙書毛愷。欲因以傾階。乃奏行法司。而刑科給事中舒化參寢不得行。拱懷怒。思一逞。於是考察科道官。從內出。貞吉曰。是將倚法爲報復計也。疏請止之。拱聞。卽上揭。謂有成命不當中止。貞吉遂同赴吏部。有給事中吳時來者。故嘗劾嵩父子。譎戍起用。守伉直。不附拱者也。拱銳欲去之。貞吉獨不可。爭至日中。拱知不可奪。竟從之。以故臺省名士得全者衆。然拱益恨之。刺骨。瞻給事中韓楫劾貞吉。乃疏懇乞歸。且曰。願上放臣歸田里。令拱復還內閣。毋久專大權。樹衆黨。別選老成掌部院。庶上不悖祖訓。下不紊職掌。上允暫還。時論惜焉。貞吉行後。口果還叛人武全等。獻俘禮成。上以貞吉與議。廕一子中書舍人。明年春。貞吉抵家。諸門人請設教聖水寺。會穆宗崩。貞吉哭臨。至哀。毀成疾。乙亥。遂杜門不復會講。第擬作二通遺諸門人。內篇曰。經世通。外篇曰。出世通。二通各分二門。內篇門曰。史通。曰。業通。外篇門曰。說通。曰。宗通。內通之門。八部。史通部曰。統。曰。傳。曰。制。曰。誌。業通部曰。典。曰。行。曰。藝。曰。術。八部具而百代九流之緒備矣。外通之門。四部。說通部曰。經。曰。律。曰。論。宗通部曰。單傳。直指。四部具而頓漸半圓之旨。

悉矣。所貴俾三千年未經折衷之籍，聚爲一書，以俟來哲。是歲十月，卽開局編述，乃爲文祭諸聖賢，告始事。其略曰：身居臣子之地，每懷經世之憂，心慕道德之門，時發出世之願，邇來垂白謝事，忽生勇猛，乃取舊書，以類臚列，隨文點布，各就部曲，約要而言。經世者不礙出世之體，出世者不忘經世之用。然後千聖一心，萬古一道。聖人愛世之念，可少慰矣。至冬，未疾作，輟編。萬曆四年丙子三月卒，年六十有九。訃聞，上輟朝，諭祭，贈少保，諡文肅。貞吉孝友，天至。從總髮與弟蒙吉，自相師友。剛忠英偉，稱其氣貌。解褐卽身任天下，憂先一世。雖百挫不回。至其學問淵源，上探堯孔之微，而并包逮於伯陽、子羽、爰達泥洹。雅自命曰經世出世。其古博如此。其文章博辨雄深，要歸於道。所著詩文集若干卷，及進講錄。

史官曰：闕

鄧以讚傳

鄧以讚，字汝德，學者尊爲定宇先生。新建青岡里人。青岡卜居自成和始。和生瓊，瓊習靜庵中，夜半忽生蓮花，紅光燭天，四鄰驚爲火，走撲之，則紅蓮也。始異之。卜者曰：茲地其有至人挺生乎？瓊其五世祖也。累世有隱德，以讚自幼簡默，常聞其父儼與人論學，輒牽衣尾其後，間出語類夙儒，而復勤學，父憐其劬，肩之斗室，以讚遂習靜斗室，神情益瑩，出而曰：心之精神謂聖，千古聖賢，只此一事一貫。吾夫子宗旨，多聞多見，引人法耳，間以所得者發之，制藝少年未之奇也。袁洪溪見之，驚而語曰：是兒終當以學鳴天下。王敬所謂以聖賢心發經傳旨，吾道主盟，其在斯乎。大奇之。隆慶元年丁卯，舉於鄉。辛未，舉進士，初張居正

爲主考。閱諸首卷。不擇而置之。晚得以讚卷。曰。刊落鉛華。獨存元雅。大奇其文。置第一。及相接。居正以爲冷冷抑抑。如玉如金。神爲之悚。歸而其兄衡州知府伯子問相國狀。以讚曰。相國心大有爲。但恐緩急弛張。弦韋不佩。未知所終。伯子怪其語。後果驗。廷試賜一甲第三人。官翰林編修。未嘗妄有交遊。取子茹荼忍窘。寒甚。僮僕方啾啾敗絮中。以讚起。以殘楮當火。燃指哦曰。不是一番寒徹骨。爭得梅花撲鼻香。初服官時如此。亡何。視神宗卽位。高拱去國。將眷眷多事。以讚過居正。時有匡拂。居正弗善也。遂移禪刹。以病請居正持不下。遣子就學。已聞其父病。始從之還里。值外艱。有終焉之志。五年丁丑。強起至武林。念母老未遂歸。時王畿寓西湖羅洪先。張元忭約以讚對龍溪精舍。畿曰。何功。以讚曰。此體無止。卽以無止爲功。又問曰。信得良知不。曰。新建云。萬死一生得來。豈敢置疑。惟是以知是非爲良知。竊恐學者妄認耳。畿業心服。已而備語試之。以讚曰。天也不做。地也不做。聖賢也不做。畿曰。秀才家何得如此大言。海內人皆以以讚必能光明絕學。而居正奪情後。橫政愈甚。羣望其出山。言庶幾有入。己卯一就列。竟不入。遂還里。朝夕依母側。諸縉紳罕覩其面。惟昆弟友朋。互相切究。友以用世進者。曰。學不到舍我其誰。終非天民。書屏几曰。天則不言。而信神則不怒。而威用世一番。須令天地變化。草木蕃育。始爲不負。然其功實基於潛。如龍不在。能見能飛。而在能潛。儻乘雲霧上青天。人窺一爪。何以霖雨天下。易之密書之微。詩之綱。皆是義也。客坐偶有齟齬者。卽省曰。我未誠耶。澄心半刻。客竟易顏。常曰。我常虛而人不礙。我不留而人自化。又曰。從氣上起。終是乖戾。從性上發。自爾中和。其虛明若此。居家。臺省薦無虛日。萬厯十六年戊子。

特起纂修不赴辛卯詔起中允管司業事。疏辭已拜南國子祭酒。上疏云：文廟之祭以元長舉其酒，謂之祭酒，多士之業以師氏考其成，謂之司成。夫孔訓莫先禮義，以冒進之心其禮必不享，士習莫尚恬退，以躡等之身其言必不從，以進之心爲退之跡，既前史所重，憎居爭之實，蒙讓之名，亦造物所深忌。將使不肖以臣爲趨，滋仕路機變之巧，抑俾賢者以臣爲戒，掩家庭真切之心，此豈修曠典、開賢路初指乎？上不允，既至，有謂之者曰：南國士佻弗馴，宜嚴以譴至。多士洗心聽約束，常示諸生曰：懼我所有也，願以神情與生相交勉。諸生瞿然顧化曰：勳戚內臣，且有聞先生名過而謝罪者，我輩遠先生約，不得爲人以譴自是益信。曰：嚴必律身始，律身弗嚴，誰能悅之。晉南京禮部右侍郎轉吏部右侍郎方大計，以譴指天自誓，卽故人親知不一顧。時吏尙書溫純、都御史陳瓚皆海內名德，同心共濟，計籍出人共稱服。亡何署禮部事，疏請建儲者至再，忽有三王並封之旨，乃奏以爲天不言而信，繇今日明日今年來年是也，故信也。自請册立以來，蓋數奉聖諭舉行矣，然皆指皇長子耳，未嘗言待嫡也。今驟而傳之人，創而聽之，故不勝其異。至以凡人之見，上窺聖衷，而以爲非情也。皇上以天自處，身度聲律，萬萬非以虛辭示天下，但臣等竊詳聖主立嫡之條，爲有嫡立庶，斯爲瀆倫，非必有待也。若大典一行，主器有託，皇祖在天，實所欣鑒。臣等又竊聞中宮鍾愛元子，朝夕保護，不啻已出，願早正春宮，猶切於億兆臣民萬萬。皇上以厚中宮而緩册立，或者未諒中宮之心乎？臣又聞古之帝王將舉大事，旣內決於心矣，必謀及卿士，謀及庶人，無所不從而後行之。蓋有見於人心不可拂也，今日並封之旨至，至使人心不能釋然，安在其爲順天下也。且信者

國之大寶。帝王所以使天下精神相通。指臂相使。恃有此也。皇上卽位以來。何令不信。獨建儲一事。屢示屢易。人將謂詔令可更。法守可玩。自是令一出而疑隨之。指臂不屬。從此始矣。時疏不知其幾。獨膾炙此奏。語語血誠。轉吏部右侍郎。兼翰林院侍讀學士。亡何。以母喪過哀感疾。扶柩將歸。病宿郊寺。僅存殘息。知友皆道路。是虞。僅抵家。正衣冠坐。曰。奇事奇事。諸籍紳問此處見學。曰。不敢不勉。遂端坐逝。詔贈禮部尚書。謚文潔。賜祭葬。廕一子入監讀書。以讚自少卽悟心之精神。謂聖至終身。日化月融。精密廣大。高明篤實。所與諸生語。及筆之成書。皆發前人未發。八十猶慕。一生傍母。人以爲至仁純孝。平生強半林坳。退然陋巷。人以爲廉靖孤介。且衾影無愧。一門藹藹。內行純備。人以爲其妙明性中流行。時而發之。然不得大行。所學人多惜之。

史官曰。闕

楊起元傳

楊起元。字貞復。別號復所。廣東歸善人。弱冠時。賊躡東平。焚民舍。爲亂兵所掠。從容賦詩自若。賊異而釋之。明歲舉鄉試第一人。年二十一。三試南宮不售。乃遊金陵。下帷績學。邂逅盱江黎允儒。歡然相得也。黎爲羅汝芳之甥。爲述汝芳言行甚具。起元大契於中。駢駢向往之。萬厯五年丁丑。舉進士。改庶吉士。己卯。授翰林院編修。冊封崇藩。取道盱江。執贄羅汝芳之門。而稟學焉。往復參證。因會悟性命之宗。曰。乃今如客得歸矣。因次汝芳會語爲答問集。又摘其論仁者爲識仁編。日諷誦之。并示學者。十五年丁亥。進修撰。

戊子校士八閩試策大發所學人爭傳誦己丑遷國子司業辛卯晉司經局洗馬纂修玉牒充經筵講官勸上崇聖志勤聖學疏千百言壬辰前及丙戌己丑三分校禮闈先後所得多吉士外艱歸起國子監祭酒丙申晉南京禮部右侍郎修皇陵功成上命祭告起元至中都士大夫暨師生來問學起元卽中庸首章反覆開諭中多興起者丁酉秋因災異復上恭勸勤學疏踰月輯高皇帝御製集刻行之於其中稍爲詮註取洪範語名曰訓行錄上之遷南吏部戊戌召爲吏部右侍郎兼侍讀學士未行而有內艱還躬營葬事日荷舂鍤哀毀之餘感寒疾卒年五十有三平生事親孝與弟友厚宗族閭黨人有過耳不欲聞而惟就其所善獎成之僮僕有違亦不加鞭扑微以意諭戒之而已一聞羅汝芳講學銘心刻骨無須臾忘雕一小像出必告反必面歲時約同志祭奠於所居以爲常四方之士受學者屢常滿戶外每隨機指授人人躍然意滿去持論以明德親民止至善爲宗而要歸於孝弟慈謂孩提不學不慮之良心卽聖人之不思不勉耳目手足之生生卽心愚夫愚婦之知能卽聖氣稟物欲皆明德之寄寓共觀共聞卽不覩不聞之本體聞者始而疑中而譁以辨久之羣然服所著有證學編楊子學解論學存簡稿楊子格言楊子政序輯白沙語錄證道書義

史官曰闕

顧憲成傳

顧憲成字叔時涇陽人自幼沈毅異常兒讀韓文諱辨每至學字以犯父諱嘔喘不忍吐師以告其父

召而語之曰。昔韓公教子不諱忠。兒奈何諱學。嘗私書壁曰。讀得孔書方是樂。縱居顏巷不爲貧。以自傲。一日師講禘之說。章憲成請曰。夫子既不知。何知知其說者之於天下如斯也。惜。或人未能再發。夫子之蘊耳。又一日講養心章。又請曰。愚以爲寡慾莫善於養心。心爲主。欲爲役。主強則百物退聽。師驚而謝曰。子俱如是觀。五經註脚。豈虛語哉。萬厯四年丙子。舉應天鄉試第一。以外艱未計偕。庚辰。登會試。高等。授戶部主事。朝夕與南樂魏允中。漳浦劉廷蘭切砥。求不愧科名。親時政。紕繆。忠佞倒置。輒憤不能平。共擬書上大學士申時行。冀有所匡。紕後覩魏。劉書詞婉而意切。遂焚已書。附名進。不省。張居正病。傾國走羣望。禱業署名。憲成走馬立削去。後居正卒。得轉吏部。孜孜人才。卽幽隱不遺。以母老數請告。許之。閉門註易。春秋丙戌。起驗封司。丁亥。大計。會有紕尙書何起鳴者。起鳴疑都御史辛自修陰嗾諸御史。諸御史遂得降級。憲成上書。詆起鳴。語侵內閣甚力。而屬望大臣臺省與被言者。自當自反。持論公正。通國傾服。爲當路不悅。落職。判桂陽州。先是蘇柳二公及莊景俱以譎至州。人士望其來。如三先生式。臨之。執經受業者甚衆。亡何轉處州府。推官。值內艱歸。起理泉州。壬辰。大計。舉廉正第一。尋擢考功司。甫至。值三王並封。議定。首疏爭。及與大學士王錫爵往覆爭。侃侃無所回互。竟得寢。已。趙南星司計典。盡黜諸要子弟。嬖亞頗太甚。南星奉旨罷。憲成以考功同事。願同罷。不報。已。進文選郎。凡啓事與海內意所欲用者。當路色沮。不欲用。錫爵所欲用者。復尼不行。久欲中之。以其時望攸屬。不果。尋以憲成推內閣起王家屏。遂劾籍歸。歸自甲午。得重病者累年。各有劓記。沈潛粹密。與讀書錄相表裏。學問者日衆。乃與高景逸等關東林。

集同志歲有會月有記其所最研辨者無善無惡心之體一語曰如是則善可不爲而惡亦可橫行蓋有感於世之儒名盜行者卽家三起光祿卿堅臥不起而卒年六十三憲成居家孝友可追古人平居恂恂雍雍居然古儒軌轍不少假借孜孜接引後學不倦故人樂得師承焉所著有藏稿劄記大學通考質言商語還涇錄證性編桑梓編學者稱爲涇陽先生友朋私謚曰端文弟允成字秀時號涇凡允成生有慧質頭角嶄然頗好弄其塾師使其父更傳以激之已幡然改請一切受教乃復之初謂口悅耳卒操縵下帷若老生也久之同兄憲成遊儒舊張原洛門張以詣薛應旂與語大悅輒手考亭淵源錄授之曰洙泗以還源委具是若志之異日無忘老夫也弱冠屬文適贍爲識者所賞萬厯七年己卯舉於鄉癸未舉南宮心戀母過歸至十四年丙戌始廷對時上册鄭貴妃允成憂治危明射策數千言纒纒不少諱其要云皇上以鄭妃勤於侍奉册爲皇貴妃大小臣工遂私憂過計請册立皇太子册封皇恭妃不報罷則峻遣矣夫鄭之勤於奉私也太子天下本忠言國之輔皇上奈何以私掩公示天下偏則皇貴妃或以愛憎弄威福於內其戚屬或以愛憎弄威福於外關人宮妾或乘而弄威福於內外之間又云頃皇上以天下事付張居正居正罔上行私一時臣工莫不風靡以爲不足信而付之二三羣小然懲居正之專而公布之則可若轉而付之羣小臣恐居正之專尙與皇上一二此屬之專遂與皇上一二則易間一則難圖也其辭甚剴切大約懼內寵將盛羣小將逞兩端讀卷者驚怖其言殿置之允成退而自傷此言不得達上卽達上死不恨也尋以彈房仲海歸久之以薦起南康府教授允成以母老又善病力乞致仕亡何丁內艱服

闕再起保定府教授尋陞國子監博士癸巳晉禮部儀制司主事會詔並封三王允成謂此吾職掌宗社安危在此舉矣乃上疏略曰本月二十五日皇上出密札付元輔王錫爵臣等不知札中何語竊計得君如元輔眷元輔如皇上當早定國本必不遲迴册立以負祖宗在天之靈次早乃接聖諭元子與三子五子一並封王臣等不能無疑及聞人言封王之諭乃錫爵以寸晷立就即次輔趙志皋張位不聞而禮臣羅萬化科臣張貞觀部臣于孔兼皆至錫爵邸並不得面乃知今日之事皇上僅以錫爵一人爲政昔人有言天下事非一家私議蓋言公也況册立一事關係何如皇上奈何易視之錫爵奈何嘗試之臣等不敢危言遠引以瀆聖聽卽如世宗肅皇帝於嘉靖十八年册立東宮並無三王並封之事臣固知皇上不安於心也且聖諭惓惓大旨以皇后生子爲言皇上獨不記正位東宮時乎維時仁聖皇太后亦在盛年穆宗莊皇帝曾不設爲未然之事以少遲大計法祖自近此言可思也臣等深惟聖祖寶訓一句一字無非維持宗社極慮後來聖子神孫得其意則國本固而社稷賴以安不然徒借虛詞掩飾過舉此奸臣借以固寵臣等所飲血椎心甯死不忍見此舉動以負祖宗二百年養士之恩於地下疏入不報當路切齒已而內計出判光州時兄憲成溯源性道天下學士多宗師之因從兄參驗身心猶欲然以爲靡當憲成使認自家允成曰問者吾省吾矣思爲天下第一流人情則近狂比按其實尙徑徑也性復近狷竊恐兩無成耳憲成以中行進之曰世之中行夫子之鄉愿也我何跋焉特自審膏肓將在粗耳憲成謂粗最近真由粗覓真則中行不遠且狂是習情狷亦習性若真性情兩者何有從此究極便識自家譬之親承孔

孟卽五百尤雄。當之靡之。彼魔雖厲。見脫消也。允成無然曰。命之矣。夫子之稱中行。以正喚醒狂狷。夢寐半生。遽焉大覺於阿兄當下也。厥後義學既遂。恆謂吾輩一舉事出言。須從太虛起念。若旁出陰陽五行。則猶形與景逐耳。或有疑者。曉之曰。使於本真得定。不妨六虛周流。不然於此模糊。便思融通和會。幾何不墮坑落壑。自失性命。且以誤天下蒼生。又鄉愿之纂理學。直將弒逆萌芽。怖人心髓。使天下滋蔓不覺。下此則天崩地折。無少關係。在縉紳則明哲保身。在布衣則傳食諸侯而已。其持論如此。偶得楊龜山故址於東林。請於其兄。爲築廬結社。四方風趨雲就。訂其會講。皆以顧氏叔季爲素王功臣。允成孝友得之天性。家居色養。曲當父母心。痛父之不逮祿。時時與其兄語及。交相泣也。事諸兄尤恭謹。嚴取予。不少假借。平居布衣蔬食。角巾徒步。又椒儻好施。歲饑。輒分半廩以賑。所交多名碩。與同志處。虛舍平坦。恂恂不言。而令人意消。至於論臧否。策成敗。初以臧人。久之若持左契。故錢起莘曰。允成有眼高。存之曰。允成真除魔手。嫻於書削。卽數語寒儉。或遊戲筆墨。具有關鍵意趣。居恆尤好靜。終日據梧。手一編。竟業而後易之。然讀書不句櫛字比。彷彿意象氤氳而止。獨念天下多故。見諸司章奏。百氏微言。有關廟社者。輒諷誦不置。嘗輯朱紫陽無極王霸諸辨。冀以覺世。又彙其論治者爲編。南粵布衣翟從先欲上書訟都御史李見羅冤於朝。允成力從與之。代爲疏章。病革。語憲成曰。吾第凝神定慮。循循默默。俟吾天機。若撻入他念。便屬暴棄。且我計身則身非我有。計子孫則人一乾坤。非我與也。斯已了然於易簣之頃。去身世如屣脫。卒之前三日。有大星隕於居傍。至期。自謂張睢陽且至。家人都從空中聞鸞嘯聲。年五十有四。所著有

小辨齋集

史官曰闕

高攀龍傳

高攀龍字存之。號景逸。自幼神采奕奕。善讀書。言動如成人。母授果餌。必拱手接。或命自取。一如所授。習舉業。超超章句外。默誦諸儒語錄。性理諸書。萬厯十年壬午。舉於鄉。居嗣母憂。丙戌丁亥。顧憲成方講學。聽之甚喜。卽曰。學將爲聖人也。出口則議論。入手在躬行。豈可泛求。一日看大學。或問見朱子說入道之要。莫如敬。悚然曰。是矣。一以整齊嚴肅爲主。久之。見程子謂心要在腔子裏。解曰。腔子猶言身子耳。渾身是心。大學曰。修身爲本。又曰。知本。更於何處索本。卽身卽心。會歸於一道。不遠人。於斯可見。己丑。成進士。廷試三甲。常爲令。丁嗣父憂。服闋。謁選。授行人。自盟曰。吾道未有所見。但依獨知擔負。庶幾深造。適僉事張世則疏。詆程朱。欲改易傳註。上所著書。求頒行天下。不勝憤。上崇正學。關異說疏。上曰。高攀龍所言。有關世教。尋論大本大機。語極剴切。嘗論河東粹言。約而且精。當字字體貼。又言律爲世用。本因加意律學。作日省編。集崇正編。謂讀書意思不進者。尊德性功夫少也。率以半日靜坐。卽出遊公會。水邊石上僧房。皆其嘿嘿齋心處。五更氣清。尤自提策。忽思閑邪存誠句。覺得當下無邪。渾然是誠。又覺得覓誠卽邪。存之卽是。舊字雲從。因以改焉。奉使金陵還朝。感時事。上君相同心。惜才遠佞。疏語侵閣臣。下部院會議。聞之坦然。降雜職。尋調揭陽典史。舟中嚴立規程。只於靜中著力。當心氣澄寂時。有塞乎天地氣象。所經奇。

岐山川險絕灘頂。一一悅心。當境皆爲學助。過汀州。坐旅舍一小樓。手二程書。至萬變俱在人。其實無一事句。猛省曰。果無事。從來牽纏。俄然斬絕。抵官勤職事。課藝集諸子要語刊示之。三月。覓差歸。至漳。謁李見羅。李謂既知宗。則心意知物。各止其所。格致誠正。不過就缺漏處照管。真有無所事事的光景。答以大學格致。卽中庸明善。要使學者辨志定業。此心光明洞達。無毫髮含糊疑似。爲自欺之本。然後爲善去惡。意誠心正身修。善所以純粹而精。止所以敦厚而固也。不然。萬端紛起。如何用力。且修身爲本人皆知之。然必辨義利是非之極。窮至無穿窬之心。斯爲知止工夫。喫緊沈著。豈可平鋪輕說。都無氣力。并條目次第。籠統做去。李無以難。自謂出門至此。學力已三轉手勢。乙未歸。再取釋老二家參之。謂釋氏與聖人所爭毫釐。其精微處。吾儒具有之。總不出無極二字。病處。吾儒具言之。總不出無理二字。尋連居父母喪。一依文公家禮。讓產諸兄弟。不可得。盡供喪葬。餘置義田。贍族。戊戌。作水居於湖邊。中有一可樓。言無所不可也。閉關趺坐。坐必七日。作復七規程。取大易來復之義。嘗自言。丙午以後。方實信性善知本。中庸之旨。此道絕去名言。程子名曰天理。陽明名曰致良知。總不若中庸二字。中者。停停當當。庸者。平平常常。本體如是工夫。如是一毫造作。走作不得。心矩學矩。從有離合中。造到渾成處。於諸子爲貫通。於孟子爲集義所生。於顏子爲不貳不遷。四十年攻苦。確然可自信者。庚申。光宗卽位。廢臣以次起用。召拜光祿寺丞。天啓改元辛酉。進光祿少卿。署事綜理精密。中官初闕於前。尋卽帖服。嘗云。頭緒雖多。儘做得去。晉太常少卿。作寅直說。并除務學之要。言明理以明心。明心以出治。方從哲。鄭養性。大義不容不討。不然。孝非孝。反。

以不孝爲大孝。忠非忠。反以不忠爲大忠。黑白倒分。人禽反易。何所不至。上怒。使重處。大學士葉向高爭曰。斯人有重望。處則滿朝必爭。吾亦與之同去。得奪俸。時魏忠賢尙未大肆。轉大理少卿。進大僕卿。再移疾。有邪氣所干。元氣大伐等語。以身謂喻。冀有感動。向高留之甚力。明年差歸。給事中王志道疏論兩朝事。淆雜不倫。致書駁之。大要言。人臣爲國。當杜漸防微。懲前毖後。不宜爲亂賊脫罪。爲君父種禍。夫皇祖威福在手。妙於調停。是皇祖身上事。皇考仁孝根心。妙於隱忍。是皇考身上事。今上祖考在念。妙於處分。是今上身上事。若夫嚴萬古綱常。守三尺法紀。君讐必報。君賊必討。是臣子身上事。而奈何諱之。加以誣謗。使天下更不敢開口說亂賊一字。可乎。見者無不膽落。吏尙書張問達曰。高公坐此。人皆畏憚。又自指其心曰。渠心明說出。人自知畏。尋奉差舟行。卒業易註。抵家。講東林如故。曰。宦情秋露。學境春風。是可決擇矣。亡何。晉刑部侍郎。趨還朝。時趙南星爲吏尙書。給事中魏大中首吏垣。相約一以培非其類。內外懷棟。顧忠賢已用事。魏廣徵結爲族。入閣初。對衆猶諱之。忠賢曰。我家人殊不濟事。然密已輸款。導之爲非。一日講筵後。忠賢刺刺品評。且曰。莫用一邊人。則其源可知。所礙手惟閣臣未幾。忠賢爲副都御史。楊漣所糾。列二十四大罪。頗內懼。謀於廣徵。謂必去向高乃可。因求其歸。陽慰諭。迫以不堪。乃行。始無所憚。總憲缺。衆議楊漣署事。忠賢不允。議馮從吾爲代。久之。卒用攀龍。既入臺。首糾御史崔呈秀之貪。奪官勸賊。尋具疏申嚴憲約。責成都邑。列五十餘款。期於拔才除賊。示畫一之畔。其大端在調和閣部。謂閣當借用外廷。不可以外正直而疑其激。外當責成內閣。不可以內和緩而疑其媚。向高深得此意。未幾。攀龍告歸。

旋革職爲民。呈秀復用。明年乙丑。毀書院。屢起大獄。殺楊漣。魏大中等十餘人。趙南星謫戍。欲并坐攀龍。會有力解者。得免。六年丙寅三月。竟逮。報至。爲十六日。謁道南祠。有別聖文。歸看花後園。呼諸子。舉原無生死四字以示。且曰。急料理。爲出門計。獨身就理。可免他累。作字二紙示兩孫。曰。無先發。明日以此付官旂。時已三更。命暫退。移時聲。諸子推戶入。見燈火熒然。發所封。乃遺表也。諸子急從旁屏奔池畔。則赴水死矣。年六十五。鄰人皆聞車馬聲。瓦裂聲。衣履整齊。淤泥不沾身。滴水不入腹。頰日成殮。面色如生。其遺表云。臣雖削奪。舊係大臣。大臣受辱。則辱國。故北面叩頭。從屈平之遺則。君恩未報。結願來生。臣高攀龍垂絕書。乞使者執此報皇上。復爲別友人書云。僕得從李元禮。范孟博遊矣。一生學問。到此亦得少力。心如太虛。本無生死。何幻質之足戀乎。聞者無不哀痛。崇禎改元。忠賢伏誅。餘以次滿掃。得贈太子少保。兵部尙書。賜祭葬。諡忠憲。廕一子讀書國子監。

明書卷一百十六

列傳四

名臣傳

史官論曰。余讀書至君明臣良。庶事以康。未嘗不慨慕帝世之盛也。天惟純佑。福主福臣。賢才輩出其大者。昌明渾厚。稷繇迓衡。入則周公。召公。出則方叔。召虎。其小者亦靖共持重。愷悌敦敏。效一官一方。以自見。智名勇功。史不勝書。於乎盛矣。明自高文之世。武功最辯。制科薦辟。文學聿興。沿至仁宣。卷阿翮羽。相得益章。凡薪樵於先朝者。蔚爲名臣。憲孝之際。號稱治平。賢相企踵。六官之長。罔非民譽。明之得人。於斯爲盛。世穆以後。進舍日煩。人才漸駁。而議禮考文之臣多出焉。詩云。有馮有翼。有孝有德。皆紀元首股肱。相得成功之著者也。君子覽茲。而明之人才。思過半矣。

章溢附子存道傳

章溢。字三益。龍泉人。始生。音如鐘。父遇孫。疑爲不祥。幾棄不舉。成童。嶷然莊重。諸兄應繇。頗爲儕類。侵苦。溢忿然曰。彼弱我耳。我不自勵。豈男子耶。乃往受事。衆皆憚服。弱冠。從鄉先生王剛叔游學。嘗曰。吾聞古

人主躬行章句之習。非其所屑。故器宇夷曠。而於是非。皆毅然折衷於理。以身從之。聞金華爲文獻邦。出諮訪浙東憲使禿堅。不花與語悅之。不花改官陝西。要與俱。至虎林。溢忽心動。力辭歸。則父病革。越八日逝矣。壬辰。蘄黃寇起。犯龍泉。從子存仁爲寇所執。溢奮曰。吾兄止此子。不可使無後。冒刃出謂賊曰。兒幼無所知。卽殺兒。吾願代之。賊素聞其名。及得大喜。縱存仁歸。乃坐溢上坐。問計。溢曰。吾有良策。使諸公首領俱全。父母妻子晏相保。賊曰。何如。溢曰。莫若釋兵戎而歸農。賊怒繫之柱。以刀礪其頸曰。不降且死。溢正色不爲屈。賊愈怒。愈大叱曰。死卽死。何恐。賊爲縮。竟不殺。夜給守者脫歸。集里兵往擊卻之。府判官乘是以兵來。欲盡誅誑誤者。溢走說石抹宜孫曰。貧民迫凍餒。故相挺從盜。誠得一循吏招輯。皆爲良民。今若翦屠。失民望。且資賊非計。石抹宜孫善之。卽檄無擅殺。因留議軍事。盡平屬縣。上功授龍泉主簿。辭不受。海寇起。石抹宜孫移台州。甯海民亦爲變。應之。犯台急。檄溢爲援。溢方退居。得檄卽起。集趨勇數百人。趨夾擊。賊潰。海寇亦遁去。甯海饑。豪民積穀閉糴。溢言於石抹宜孫。行縣賑之。抵豪罪。發其粟充用。龍泉饑。亦閉糴。溢私以己田易粟貸里人。婉行勸分。民受惠爲多。青田潘惟賢爲盜。而龍泉監縣寶忽丁貪虐。民因遵惟賢來攻。以甘心寶忽丁走。溢與王剛叔召豪傑戰賊。敗走之。縣治遂復。寶忽丁懼。棄職獲罪。而愧溢等有功。乃使人刺剛叔。且及溢。溢痛剛叔死。言於府帥。檄兵擊襲之。寶忽丁遁去。時處州盜起。行省移石抹宜孫分治處州。溢謂之曰。松陽小醜。不速平。將成大患。宜孫曰。惟君處之。乃授千戶曹勝安方略。一戰降之。以功授松陽尹。復辭不受。尋討麗水賊。敗之。賊首就縛。復平土豪周天覺。散其衆。薦授

武德將軍僉浙東都元帥府事。至是凡三授官。太息曰：吾所將皆鄉里子弟。今子弟肝腦塗地。吾因以爲功名不祥。又力辭不受。歸結廬匡山。自號匡山居士。己亥冬。明兵克處州。盜避入閩。太祖東帛迎之。與劉基、葉琛、宋濂同至建業。入見。上問勞曰：我爲天下屈四先生。然四海紛紛。何時定乎？對曰：天地無常。惟德是輔。惟不嗜殺人者能一之。上悅。擢僉營田司事。課江淮田稅籍有等。嘗有疾在告。上數視。小愈入謁。上望見喜甚。恆問左右章盜康彊否。左右對曰：盜念母邑邑未愈。卽日命歸省。賜金綺。浙東始設按察司。以爲僉事。尋命還處州。代總制胡深入朝。及深出師溫州。復命還守處州。給餉無缺。漢平。設湖廣按察司。調溢往。入見。上曰：紀綱之事。今屬卿矣。荆襄多廢地。建議分屯田。上善之。鎮撫回。估勢作威。輕重人罪。廉得狀。坐以法。河南按察使宋思顏等有罪。辭連溢。上遣劉基諭曰：予素知溢守法令。毋疑也。旣而胡深入閩。陷沒處州。震動。改溢浙東副使。鎮之。比至。山寨多叛。乃宣布詔旨。勒兵誅首叛者。餘皆帖然。尋處兵悉發。戍浦城。而慶元寇亂。乃召故所部義兵禦走之。上以長子存道提兵爲游擊。溢謂父子相統。非制。請罷。上不許。曰：吾方藉爾父子鎮靜疆場。顧效他人嫌疑耶？浦城軍乏食。上命李文忠至。與溢計之。文忠欲運糧處州。溢曰：不便。今軍中所掠糧甚多。請俱入官。均結債以直。食乃足。時建甯守將院德柔來歸。或疑其詐。溢曰：陳友定據全閩。勢必不能容。故圖自全。非詐也。時請以原官守之。擒斬茗陽盜周瑞卿。通平陽瑞安之路。處州僉水軍隸軍府。役煩而事擾。奏設千戶專統之。又奏免山田之稅。時海賊入寇。千戶任惟賢退縮。斬之。自拒戰。破擒略盡。會朱亮祖取溫州。軍中多掠子女。溢曰：此非將軍所宜。悉搜出還其家。海隅

甯請朝京師。上報曰：吾知卿在邊方良苦。俟平吳有後命，吳平入朝，令分兵征閩，而存道守處州。上諭羣臣曰：章溢雖儒臣，父子宣力於邊，其功不後諸將軍。廷議征閩，以御史大夫湯和由海道進，平章胡廷瑞自江西入，溢密進曰：二將二討，固必勝，而李文忠威信素馳閩，若令從浦城取建甯，此萬全計也。上立詔從之。時處州餉闕，師歲加徵十倍，皆以溢言從。舊額溫州朱君達既叛，又請降，奏戮之。方造海舟，徵巨材，檄處州與諸郡均辦。溢曰：處限以峻嶺，卽有木何從出？力奏止之。上卽皇帝位，與劉基并拜御史中丞。尋兼太子贊善大夫。時廷臣多逢上意尙嚴，溢務存大體，不屑屑細故，或以爲言。溢曰：憲臺百司之儀表，居其職者當先養人以廉恥，使人避而不犯，豈直恃搏擊爲能哉？上親祀社稷，會大風雨，還坐朝，怒儀曹議禮不合，以致天變。溢奏曰：風雨已連朝，無足怪者。縱禮官議有未善，陛下精誠自足，仰格神明，願賜寬貸。上爲霽威。上禮重溢，嘗語溢曰：先生年向耄，恐感霜露致疾，不宜早趨朝也。先是上旣從溢議，令文忠入閩，溢子存道部鄉兵萬五千以從。及閩平，詔存道以兵從海道北征。溢持不可，曰：鄉兵農人也，初詔許事平歸農，今復調之，是爽信也。上不懌。溢請故常爲叛者籍爲軍，使北征，而甯其勿叛者以示信。一舉而恩威著矣。上喜曰：孰謂儒者腐哉？存道部浮海北行，走京師聽進止。上諭曰：汝父宣勞爲多，汝又北上，勉立事功，以無忝爾父。因授處州衛指揮同知。戊上黨，尋移平陽。洪武二年，溢喪母，悲感過度，居常忽忽，營兆宅，親負土石，感疾益深。卒年五十六。上憫悼，親爲文祭之。溢孝友，父未葬而盜焚其閭，溢哭抱父柩，火遽滅。事母備極孝養，二兄別居已久，旣創第龍淵，請二兄同居奉母，定先世祭享之禮，益田以供祀，創義塾。

立義阡，諸可以登善扶義者，無不爲也。器局曠曠，撫世酬物，誠確宏偉。外若和緩，至臨大事，爭是非，不避權勢，必折衷於理。宋濂曰：生我者父母，知我者章公。其相信如此。三年存道，從征秦隴，取興元，留守明昇將吳友仁來侵，擊敗之。改平陽衛。五年，從將軍湯和出塞，至斷頭山，戰不利，死之。史官曰：章濂未遇高皇時，屢平劇賊，衛鄉里，威望已行於江東矣。及帝以儒術召，而父子戮力，出入括蒼、閩海間，招攜伐叛，以武功顯。儒者固不可測如是哉。迹其始終，部署俱江東子弟，溢孝友過人，孚於鄉曲，不忍以子弟肝腦身富貴，此一念可儒可將，宜其得人心而成大業也。

陶安傳

陶安，字主敬，當塗人。外樸而內穎，有大志，博涉經史，湛心濂、洛之學，尤邃於易，爲文純雅疏曠。舉元甲申鄉試，戊子試禮部，不第。授明道高節書院長。元末四方兵起，郡當其衝，屢以策干守將，不見聽。乙未，太祖取太平，與耆儒李習出郭迎，見上狀貌，喜謂父老子弟曰：龍姿鳳質，非常人也。生民今有主矣。上召語時事，安首言：四海鼎沸，豪傑爭雄，志在子玉帛，非有撥亂救民安天下之心。明公率衆渡江，神武不殺人，心悅服，以此順天人，行弔伐，天下不足平也。上曰：善。吾欲取金陵，何如？對曰：金陵蟠踞，限以長江，據其形勝，出臨四方，何向不克。上又曰：善。留參幕府爲都事。丙申，從克金陵。陞左司郎中。旣而聘基、濂、溢、琛至，上問四人者何如。對曰：皆天下才也。臣與之語，謀略不如基，學問不如濂，治民之才不如溢、琛。敢爲得人賀。辛丑，克黃州，難其守者，上曰：無逾於安。命爲守。兵荒之後，政務一新。甲辰，改知饒州，寬賦省徭，招徠

流亡民皆悅服。乙巳，信州賊蕭明攻城急，與千戶宋炳協拒守。登城反復諭賊，賊曰：「使皆如太守，豈有今日？」會援兵至，賊大敗去。諸將怒，請屠從賊者。安曰：「民爲賊脅，非本心，奈何殺之？」明年入朝，民爲立祠祀。吳元年，置翰林院爲學士，知制誥，修國史，時開禮樂二局，徵宿儒集議禮制，公總裁，定修律爲議律官。洪武元年，上與儒臣論學術，安對曰：「道之不明，邪說害之也。」上曰：「試如卿言，夫邪說害道，猶美色眩目，自非豪傑不能決去，因賜門聯旌之。」時御史有言安隱過者，上曰：「汝何知之？」對曰：「聞之道路。」上曰：「御史取道路言毀譽人，以此爲盡職乎？」立黜御史，尋出爲江西參政。安寬仁達吏事，政績益著。居四年，疾劇，草上時務十二事，卒年五十七。贈姑熟郡公。國初諸禮多經裁定，安有二子，昱、晟，晟爲浙江按察使，貪信用輕薄，小吏上并昱戮之，其家四十餘人皆發戍。州司逼索，安繼妻陳裹帛入見，上問媪爲誰，具以對。上曰：「陶先生嫂乎？」有幾子，復叩頭曰：「臣前二子皆不肖，伏法。」家人四十餘坐罪發戍，州司督責甚急，惟陛下念先臣安一日勞，上曰：「晟死其罪，言及陶先生，令我惻然。」立召兵部曰：「朕渡江之初，安首陳幾務，先後蒙涉諸艱，功在彝鼎，家人所犯，卽盡赦之。」安前妻喻，名德常賢著聞，王師克金陵，安移家金陵，喻要母同行，母不可，喻曰：「四海兵爭，惟高城深池都會之地，可以託身，母從之。」及陳友諒陷姑熟，得以移居，免難人服，其先見云。史官曰：「陶安杖馬箠，立軍門，渡江數言，開招形勢，何以妻敬輓輅之說，鄧禹初見蕭王數語也，可謂壯士。」屢守江州，修扞著績，天下旣定，稽古禮文之事，皆取給焉，無雙之譽不虛耳。

唐鐸、嚴震直、韓宜可、羅復仁傳

唐鐸，鳳陽人。自庚子從攻江州。洪武二年，授西安縣丞。召還中書省管旬，出知延平府。三載，召爲殿中侍御史。復出知紹興。陞刑部尙書。改太常卿。內艱，賜半俸。服闋，除兵部尙書。改諫議大夫。坐事左遷監察御史。尋陞右副都御史。復爲兵刑二部尙書。初立詹事院，兼詹事。食尙書祿。未幾，致仕。已而改院爲府。復超爲詹事。食尙書祿。尋致仕。再起爲太子賓客。尋加太子少保。二十八年，使龍州諭趙宗壽還。復出參謀總兵楊文軍事。經畫守衛，撫輯蠻獠。鐸重厚慎密，靖廉不妄取。太祖初起兵時，卽侍左右。每以故舊遇之。僚屬罪數連錄，上念鐸篤行，皆不問。時諸卿中詹徵以才勝，鐸以德勝。然不動聲色，而政務修理，人咸愛之。上嘗曰：都御史詹徵，刑部掌部事。唐鐸，二人性行不同。下人事之亦異。徵剛斷嫉惡，不容奸僞。役吏髮蓬面垢，容愁肌瘦，不異羈囚。以不得肆其貪，故若是。鐸始友及臣，至今三十四載，交不知變色。口不出惡聲，德有餘而才稍不足。屢被小人誣誤，極刑者數矣。朕深知其德，典宥弗罪。奸人忌徵剛，則謗訕滿朝。鐸厚重無疵，又謂懦而無爲。一切文移計稟，皆舞文弄法。愚鐸賄賂公行，鐸無可奈何。嗚呼！聰明決斷者以爲非，淵德海涵者以爲愚。人之心不古有此耶？三十年卒。年六十九。卹賻最優。

嚴震直，字子敏，烏程人。有器量，貌魁岸，性誠實，不善讀書。長於算數。太祖起民間，知輸糧苦，有司奸吏多索詐。洪武四年，令東南歲入田賦額萬石，一家主之，不入於官而集於鄉，自爲徵督，給勘合運入京。及江北諸郡，謂之糧長。旣久，法壞多生事。郡縣官往往獲罪，乃議舉名家有行誼者主其事。於湖州得震直。清潔自厲，二十年無纖芥可指。名譽爲列郡最。以布衣授布政司參議，留中署通政司事。奏對詳明，改戶部

郎中。考實江西賦稅。二十四年。賜第於崇禮街。復其家。明年。陞工部右侍郎。六月。拜尚書。時營建方殷。綜理周密。以夫六十萬開騰脂河。事辦繼奉。命集天下工伎二十三萬有奇。請戶役一人。父兄子弟不相緣。計煩簡更定班次。人皆便之。里人有訐其弟姪不法事。命震直自按理。無所徇。上并宥之。二十七年。以事降御史。凡囚有誣枉。力辯之。多獲寬貸。它御史劾其傲。且私留鄉人在署飲。上曰。此舊尚書也。小事何足論。不聽。廣西龍州趙宗壽恃險恣橫。潛通安南。奉使往諭。入其王城。開示利害甚悉。皆悚息聽命。凡所餽獻。皆卻不受。并奏減廣東西行鹽之半。立接運法。以通鹽販。商民便之。桂林河渠廢塞者。因故道浚五十里。導南江曰漓。自蒼梧入海。北江曰湘。自洞庭達長江。築隄治陡閘三十六。旁通靈川。千秋峻。鑿象鼻口。峯鑿灘磯。以通舟車之路。西人紀謂秦史祿。漢馬援及震。直古今爲三人云。上聞喜曰。老嚴成此巨功。朕任得人矣。又均徭賦。振風俗。懲貪殘。慎刑獄。征南之兵。需牛數千頭。皆取諸民。請給鈔償其價。大師兵不戰。及靖江王府人爲民害。奏劾之。僚民嘯集。移檄撫安。邊徼以甯。廣惡少父子冒法。子匿而父出。誣其子宗仁及壻莫瀾。將自脫。事未白。守仁瘐死。奏爲特誅。惡少父子而釋其壻。三十年。還起遷右都御史。兩淮民食鹽通稅。罪至數百人。奏釋之。上嘗召其三子宗禮等入見。曰。都御史有進兒。福未艾也。以救御史李斌降御史。八月。陞工部尚書。奏工役贖還家者四萬五千人。十一月。重建太學。指揮李忠奏。役徒死者當戶丁以代。凡四萬餘人。與詰難緩其事。後悉遇赦免。念起自庇庶。自拜官及超轉。控辭糜敝。不敢升斗。被詔。蠲其家徭役。力辭。降御史。不敢居賜第。遷家隘巷。致仕。居西塞山中。太宗卽位。召入宣諭。山西九月。

至澤州卒孫杰文梁並成進士杰御史文梁主事

韓宜可字伯時山陰人元末御史辟爲掾不應洪武初以歲貢薦授本縣教諭轉楚府錄事十年拜御史持風紀甚振十一年左右都御史陳甯胡惟庸中丞涂節侍坐方宴語直前長跪出彈文劾三人險佞怙寵反側請斬首謝天下上怒曰快口御史排陷大臣下獄尋出之三人釋不問然上心善其言疑三人且防之矣時重外臺之選擢江西按察僉事方中都役作凡官吏有罪笞以上悉諭發上言刑以禁淫虐一民軌合論情之輕重事之公私罪之大小而施舍之今罪不問如何悉服賤役小人之幸君子殆矣乞分論合律從之十三年甯等皆坐死歸朝上以沒官男女散入諸司爲奴獨不受且以爲非聖人舊典尙書言罪人不孥古之制也有事隨坐法之濫也官吏有罪厥辟勿宥國之經也經不可廢制不可違濫不可則罰及妻子何居豈以夫榮享其樂旣坐當坐罰陛下一怒而羣臣家屬不問罪之大小皆不能保恐非聖明所宜有上是之著爲令後坐事將刑正天朗忽震雷遶殿上驚曰非枉此人乎雷卽息趣免又上封事二十餘上皆嘉納之未幾罷歸復召還京命撰鍾山大江文諭日本烏蠻詔堯舜禹湯傳賢論皆稱旨除山西布政二十一年坐事謫安南二十三年薦起雲南參政尋陞左副都御史以劾奸顯忠爲己任百僚震肅未幾卒官時大星墜地樞馬皆驚以爲其應云生平峭厲可畏而緣情酌法要歸平恕上爲霽威者屢矣

羅復仁吉水人博覽經史尤通天文書初陳漢辟爲翰林編修遁迹去壬寅明兵取九江復仁杖策來歸

上喜置左右。從破友諒於鄱陽。齋蠟書招袁臨、吉、贛諸郡。諭降武昌。擢國子助教。以老賜小車出入。每宴見。賜坐飲食。丙午。使山西曉譬擴廓。洪武元年。遷翰林編修。諭安南歸所侵地。安南遺金貝土物甚多。卻之上。聞益義之。隨拜宏文館學士。復仁性簡樸。古草野倨侮。而胸中了了。每率意陳得失。無所顧避。至操南音以對。上顧呼爲老實羅而不名。一日。幸其第。復仁方操塗具完壁。急呼妻抱兀坐上。上曰。賢士豈宜居此。命賜第城內。遇天壽節。制水龍吟一闕以獻。上悅。厚賜之。尋乞致仕。陛辭。賜大布衣。題其笱曰。性雖粗率。忠直可喜。賜汝布衣。放歸田里。久之。復召乘傳至京師。奏滅江西秋糧軍籍諸不便民事。上憐其老。留三月。賜玉帶。鑲杖。裘馬食具遣還。未幾卒。有玉堂唱和集。子養蒙。孫簡。有傳。

史官曰。事英主者。威福叵測。惟正直忠厚爲可久。明祖深知唐鐸之厚德。心許宜可之快口。而震直復仁時以老實呼之。故數人久膺殊眷。雖罹文法而獲免。若才既不及。而挾詐以御主心。鮮不殆矣。震直綜理周密。多所建樹。宜可風采嚴毅。歷內外臺。不吐剛茹柔。又豈如鐸之才不逮德哉。

王濂傳

王濂。字習古。定遠人。少好讀書。知大義。習聲詩。音節韻趣皆有法。推擇爲定遠吏。有謀策。令長以賓禮遇之。元季政亂。豪傑並起。嘆曰。保宗族救民可也。走穎毫。說其軍帥。使反虐政。無害民。軍帥喜。留爲萬夫長。歷官至工部尙書。以其必無所成。聞太祖克金陵。乘間挈家南渡。時李善長其婦兄也。在上左右。亟言之。召見。遂詔爲執法官。悉心詳讞。務協於中。全活者多。丹陽令白齊。應天知府王子謙其著也。上深簡注。進

中書員外郎。出爲浙江僉事。巡行郡縣。貪墨誣民者。擊去。惟恐後。餘則務存大體。觀風宣化而已。一日。大風晝晦。詔求直言。濂疏奏。歷述災傷病民。上爲罷征戍。尋嬰疾休於家。洪武三年卒。年五十七。上痛惜之。每謂善長曰。王濂識力。眞王佐材。今舍朕去。朕失一臂。卿肺腹亦安所託。後善長坐事。上嘆曰。王濂在。必不至此。濂恂儒者。與宋濂善。或共論議。或張目吐氣。指畫方圓。滾滾數千言不休。臨大事。神采精緊。毅然不可奪。好而折人過性。和在戎行。多慈惠。每以不殺進勸。事親盡心力。人咸曰。孝如王習古。庶幾無愧。子二。伯驥。先卒。仲佐。篤學好古。凡法書名畫。多所鑒定。善虞書。以才爲鎮撫。史官曰。闕。

王嘉會傳

王嘉會。字原禮。嘉興人。少博洽。負俊聲。元末。累舉不第。客松江。爲人溫澹和緩。後進樂就講論。上海令康伯迂見其所作。敬禮爲上賓。時咨文章曰。非欲飾吏治。然非公不能洗發我心也。以明經聘至京師。太祖命賦詩作文。稱旨。除翰林檢討。洪武十五年。口國子右司業。時宋訥爲祭酒。太學生常數千人。嘉會與訥及左司業龔敷。嚴立楷範。三人者。春秋已高。鬚鬢鬻如正衣冠。旦夕端坐。諸生雲集階下。肅然望而畏之。以是士類率教。多所造就。吏部取擢。輒能其官。上憫其勞。眷待殊厚。十六年冬。以老疾乞歸。不許。明年。許之。未行。卒於官舍。上聞嗟悼。命給舟車還。仍命所在官司祭之。同時松江孫作先亦爲司業。稱曰海濱二老。

史官曰。爾

陳修傳

陳修字伯昂。上饒人。甲辰來歸。擢理官。講書律令。崇寬厚。省煩苛。復倫要。黜姑息。簡明正大。四方翕然。如有一統之制作。上留心兵刑。數數講求。謂唐世府兵之制。稍爲近古而未精密。乃進兵部郎中。選任將帥。條列兵制。令內外相維。兵農相資。遂爲定法。太祖卽大位。山東新下。念濟南重經王氏之亂。民塗炭甚。大將多練兵屯田其間。非修莫可治。出爲濟南知府。疏勸墾墾荒有成效。居二年。詔書褒美。超拜吏部尙書。修引據古典。參酌時宜。審地劇易。制事煩簡。與凡貴賤疎數。遠近寬嚴。課功覈實。賞賜黜陟之類。皆籌畫妥確。未幾卒於官。繼之者莫能易。宣宗采其事載於五倫書。

史官曰。爾

杜敷傳

杜敷字致道。壺關人。質稟純明。學問融貫。通五經。尤深於易。心貌俱古。舉河東鄉試第一。除高平教諭。陞臺州學正。西安儒學提舉。省院辟之皆不就。歸授徒。學者爭從之。多感慨。形於歌詠。自號太行樵者。學者稱爲南坡先生。洪武十三年。特徵命爲四輔官。兼太子賓客。司夏季。御書官。爵制諭。以賜。每進見。講明治政。必以古先哲王爲範。一日。上曰。朕治天下。其於前代帝王何倣。李祐對曰。當倣唐太宗。上默然。敷對曰。治天下之道。莫過於堯舜。上曰。我非敢當堯舜。卿等願效稷契皋陶。時國學成。上咨敷誰可爲祭酒者。敷

舉滑縣宋訥，卽徵訥，訥爲祭酒，甚當上心。上每曰：非老杜舉訥，其何能教如此。再幸其第，累加賞賜。親與廣和，尋以老疾懇辭，給驛歸。卒年七十二，所著有曠時集。
史官曰：闕

吳伯宗傳

吳伯宗，本名祐，以字行。金谿人。父儀，字明善，元季鄉薦。世稱東吳先生，講學授徒，多所成就，尤深於春秋。著稗傳、類編、五倫辨義三書，辭深密，嘗言世有楊子雲其將好之矣。壬辰寇起，集鄉黨自保，入明。其太守聘起之，力辭。卒。伯宗十歲能文，先達見者歎曰：此兒玉光劍氣，終不可掩。舉洪武庚戌鄉試第一，府判官王黻夢城中迎狀元，告人曰：必吳子也。明年辛亥，中會試，及廷對，太祖親製策問，詢以古帝王敬天勤民之道。伯宗條答稱旨，果擢第一人。時初開科取士，伯宗儀觀儼恪，應對明辨，上甚喜，賜袍笏冠帶，授承直郎、禮部員外郎，與學士宋訥同修日歷。時胡惟庸方用事，羅致庭臣入其黨，伯宗亢直，不爲屈。惟庸中以事謫居鳳陽，上書論時政，并言惟庸專恣，不可獨任，上得奏，卽召還，使安南，得方物以獻，爲國子助教。十二年，進講東宮，首陳正心誠意之說，皇太子嘉納。明年，改翰林典籍，御製十題命賦之，立就，詞語峻潔。上常稱曰：才子也。賜織錦衣，陞太常寺丞，轉國子司業，皆辭不拜。忤旨，貶金縣教諭。至淮安，復召還，爲檢討。壬戌，拜武英殿大學士。十六年，以弟仲寔爲三河知縣，薦舉不實，坐累，復降檢討。十七年，坐文字進不以時，謫雲南卒。伯宗博學能文，詳雅不苟合，屢獲譴，無所悔。著有南宮使交成均、玉堂諸集。

史官曰。明以制科取士。士亦以此自重。故得人於斯爲盛。凌彘至於季世。而采春華。忘秋實。爲王、楊、盧、駱者。多不稱其行。制科遂爲天下詬。吳伯宗制科初開第一人。也。驚才絕學。不呈身權相。首陳正心誠意之說。其樹立何如哉。予故表而出之。爲取士權輿云。

明書卷一百十七

列傳四

名臣傳二

樂韶鳳、張智、崔亮、朱善、吳沈、劉仲質、翟善、滕毅、錢唐、任亨泰傳

樂韶鳳字舜儀，全椒人。乙未，謁太祖於軍門，與語奇之。是秋，扈渡江，參軍事。從下金陵，丁酉，授江西行省管勾。累任起居注，給事中。中書左司員外郎、兵部侍郎。六年，拜本部尙書。正月戊午，上念天下既定，恐中外將卒習於安逸，弛武藝，命同省臺督府定議教練軍士法，并定賞罰各有差。改侍講學士，與承旨詹同、定祀孔子樂章。編集大明日歷，爲催纂官。又命擇唐宋名儒表箋，可爲式者，頒行天下。七年九月，上以祭祀還，用樂舞前導，命翰林儒臣撰樂章。韶鳳上所撰降祥、祝惠、酣酒、色荒、禽荒諸曲，凡三十九章。曰：回鑾樂辭存規切。八年，與諸廷臣正中原雅音，書成，名曰洪武正韻。攷陵寢朔望節序祭祀禮，定以每歲元旦、清明、七月、望、十月、朔、冬、夏二至、日用、太牢，其伏臘社，每月朔望日，則用特羊祠祭。署官行禮，如節與朔望、伏臘社同日，則用節禮。復定登壇脫烏禮，上之。上命著爲令。未幾，以病免。起國子司業。十二年，陞國子祭酒。定皇太子與諸王往復書劄禮。韶鳳考據精詳，上賜諭曰：文廟之設，以尊先師，因之爲國學焉。歷代以

之訓君嗣甚重。故哲王必選名儒以爲表率。朕命爾端是師範。闡揭博通。使幼者記。壯者解。其毋怠忽。以補於朕政欽哉。十三年。雷震奉天殿。上以羣臣多不職。罷斥者甚多。韶鳳因致仕。以壽終。兄弟皆知名於時。曰暉。以人材知開封府。曰禮。太常卿。曰毅。諸暨同知。并知名。韶鳳有友五人。曰趙奎。陳旭。陳友。王才。魯文質。並起畝澮。奎體貌魁岸。有才略。立功授總管。守宜興。洪武四年。從征甘肅。猝遇敵。衆畏怖。奎獨奮殊死。戰敗之上。喜加賞。旭英毅多智識。友有膽氣。常居前鋒。才尤壯武。文質攻醫。授太醫院判。奎才歷官都指揮使。旭以從燕封雲陽伯。友以平蠻封武平伯。

張智。字玄略。延平人。父昇。元以神童薦。補太學。授祕書郎。五遷至江西儒學提舉。智生而聰穎。讀書過目成誦。不爲嬉戲。正色端謹。如老成人。嘗侍父慨然曰。采玉必於崑山。探珠必於滄海。爲學豈可不出戶庭哉。卽挾策入元都。交當世名士。用薦入國學。四方兵興。以才出參閩省機務。授智同知新喻州。辭居建陽。洪武戊午。以明經薦爲夷陵州學正。凡九載。艱歸。起以尙書趙勉薦。超拜禮部試左侍郎。疏請宜以書籍頒布北方學校。議者以費財不便。正色曰。使賢才彙征。利益生民。何惜此費。未幾實授。是時諸儒多不稱任。使至。嬰顯謬。上謂智等曰。古人務學。明體實用。窮則忠信篤敬。以淑諸人。達則忠君愛國。澤被天下。朕擢用儒士。布列百司。而卒少見效。良由師道不立。故成材罕聞爾。宜以朕言諭天下。俾凡爲儒者。必以聖賢之道自律。修己教人。毋徒尙文藝。智請首行於太學。從之。尋奏定歲貢生員制。語詳學校志。壬申懿文太子薨。智上議曰。喪禮。父爲長子。服齊衰期年。皇帝當以日易月。服齊衰十二日。祭畢釋之。在內文武百

官。卽日於公署齋宿素服。入臨文華殿。給衰麻。越三日成服。詣春和門會哭。明日素服行奉慰禮。其當祭祀及送葬者。仍衰經以行。在京停大小祀事。及樂。至服闋日而止。停嫁娶六十日。在外文武百官聞喪。易服於公署舉哀。次日成服行禮。停大小祀事及樂十三日。停嫁娶三十日。尋以時享在邇。令智與翰林院參考古制。智等奏曰。王制三年不祭。惟祭天地社稷。不敢以卑廢尊也。今定議天地社稷先師歷代帝王用樂外。惟太廟乃祖先神靈所在。國既有喪。而時享仍用樂。恐神不樂聽。宜備而不作。詔從之。尋以事左遷爲國子學錄。尋陞博士。建文中進司業。智儀容嚴肅。多識典故。教人以規矩。開導獎勸。老而弗倦。卒於官。

崔亮。字義夫。藁城人。元末爲省掾。明兵來。謁舊館。授中書禮曹主事。遷知濟南。有善政。洪武元年。歷至禮部尙書。詔定官員親屬冠服。及隸卒軍士等制。各有差。三年朔旦以來。日有黑子。占者疑祭天不順。禮所致。詔亮議。亮引用漢唐宋及元損益不同。復以國朝前議圖丘從祀之禮。以漢唐爲煩。故正祀日月星辰太歲爲簡當。上然之。後上問郊祀天地拜位皆正中。而百官朝參則列東西避正中。何也。亮對曰。天子祭天。陞自午陞。祭社。陞自子陞。蓋社主陰。北方也。故君南向。答陰之義也。郊主陽。南方也。故君北向。以答陽也。若羣臣朝參。無答神之義。俱當避君上之尊。故升降則皆由卯陞。朝班則分東西立。以避馳道。其義不同。上是之。復命議百官及內史監官於皇太子親王前稱殿下。自稱名。若本宮內史本府官及承奉司於皇太子親王前俱稱殿下。自稱臣。百官在上前稱皇太子親王稱曰皇太子某王。又定大朝會常朝及內

外官員辭謝奏事侍班諸禮。并定皇太子及羣臣賜坐殿上坐。釐制酌宋典爲損益。其他請旗纛止祭於當祭之月。與夫宗廟四時之祭。皆用四孟及歲除。凡五。定祭於清明等節。各備時物薦享。俱允行。又定大射禮儀。定仁祖廟號。請下太常祭告。時國制草創。亮引證多據經典。七年卒於□。

朱善。字備萬。豐城人。善少聰穎。十歲能文。既壯。以經學授徒。兵變隱居。以道學爲己任。所著有詩經解。頤輯釋。史輯等書。太祖開設學校。初以薦舉爲訓導。尋授教授。洪武八年。召赴京。廷試諸儒。善居首。授翰林修撰。署院事。知制誥。明年。以奏對失旨。謫戍遼東。無愠色。日賦詩寫懷。有遼海集。未幾賜還鄉。語子逢掖曰。汝力耕以供賦役。我取祖洞雲先生所著皇極經世等書考證以傳。庶不墜先業。十七年。召爲翰林待詔。時方革元俗。嚴中表婚禁。民習舊多犯法。上疏論婚姻律曰。國重世臣。家重世婚。今民間婚姻之訟甚多。非姑舅之子若女。則兩姨之子若女。蓋法不得爲婚。以故讎家誣訟。或以聘見絕。或既婚復離。甚或兒女行立有司。逼拆使夫婦分離。子母永隔。冤憤抑鬱。無所控訴。悲號道路。感慟人心。讖律不精。禍乃至此。按舊律。尊長卑幼相與爲婚者有禁。若謂母之姊妹與己之身。是謂姑舅兩姨。不可以卑幼上匹尊屬。若己爲姑舅兩姨子。彼爲姑舅兩姨女。無尊卑之嫌。爲子擇婦。爲女擇婿。古人不以爲非。成周之時。王朝所與婚者。不過齊。宋。陳。杞四國而已。故當時稱異姓大國曰伯舅。小國曰叔舅。其世爲婚姻可知。至於列國。齊。宋。魯。秦。晉亦各自爲甥舅之國。後世如晉之王。謝。唐之崔。盧。潘。楊之睦。朱。陳之好。皆世爲婚媾。又如溫。嶠娶姑之女。呂榮公娶姨之女。今此事甚多。以致訟獄繁興。風俗凋弊。願以臣章下羣臣議。弛禁以通人。

情。上是其言。遂弛其禁。十八年。校禮闈。進文淵閣大學士。嘗進講心箴於文華殿。奏言。致治在任人。今天下太平。惟選用賢才。以敷文治。惟留意焉。上曰。善。尋選疾賜告。卒年七十二。正德中。諡文恪。是時有金思誠爲上海令。博雅宏粹。少負文名。鮑恂。字有孚。崇德人。博學篤行。所著有《大易傳義》、《西漢集》、《全詮》、《安吉人》、《張長年》、《高郵人》、《張紳》、《登州人》。俱年七十餘。廷薦。思誠、恂等。明經達治體。遣使徵之。入見。上甚喜。賜坐。顧問。俱命爲文華殿大學士。恂等固辭。上曰。朕以卿等年高。不煩以政。故授此職。以輔導太子爾。免卿蚤朝。待日晏入。不久當從其志。庶不負卿等平生所學。恂等復固辭。聽還鄉。惟紳後至。以爲鄆縣教諭。

吳沈。字濬仲。蘭谿人。父師道。字正傳。元禮部郎中。有文學。沈累辟爲學訓導。不就。太祖取婺州。改甯越府。王宗顯知府事。辟沈及朱廉。徐原。主教事。洪武十二年。以儒士舉。誤上名曰信仲。既除翰林待制。謂修撰王釐曰。名既誤。冒昧不更。是欺罔也。告改正。上曰。是誠恪人。遂蒙眷遇。參謀議。尋以奏對錯誤。降編修。未幾。復待制。十四年。給事中鄭相同奏言。尊無二上。稱臣於東宮。非禮。沈駮之曰。國之大本。尊安得異。上是之。十五年。降渭源教諭。未行。留爲翰林典籍。尋晉東閣大學士。上將享太廟。致齋武英殿。謂沈等曰。古聖賢垂訓立教。大要有三。君敬天。臣忠君。子孝親。人道立矣。其摘古經傳類編三事爲書。書成。賜名精誠錄。沈爲撰序。十六年八月。進講後期。降待書。改國子博士。時方與文事。沈獨謂兵不可廢。每云。聖人之兵。昭文德而威不軌。所以生人。非殺人。禦亂。非爲亂。尙義。非尙詐。武經則云。兵詭道也。非其本意。遂纂易詩書論孟詞義涉戎事者。立爲五篇。一曰兵象。二曰兵用。三曰兵禮。四曰兵詩。五曰兵訓。總題曰六經師律。崑

山秦約見而歎曰。文武一貫。有功世道之書也。十九年。致仕卒。沈富蓄遠覽。志負經濟。三進三黜。而無愠色。嘗著辨言。孔子封王爲非禮。自是布政夏實。祭酒邱濬皆主其說。并欲去諡。至嘉靖中。乃行之。而用王禮如故。

劉仲質。字文質。分宜人。博通經史。洪武初。爲宜春訓導。薦入京。奏對稱旨。擢翰林典籍。校正春秋本末。十五年。驟拜禮部尙書。太祖諭之曰。孔子明帝王之道。使君君臣臣。父子子。綱常以正。彝倫攸斂。其功參乎天地。其令天下郡縣學。以每歲春秋。仲月通祀孔子。丁巳。上謂仲質曰。國學新成。將釋菜。令諸儒議禮。議者曰。孔子雖聖。人臣也。禮宜一奠而再拜。上曰。朕以爲孔子明道德。以教後世。豈可以職位論哉。昔周太祖祀孔子。入祠將拜。左右曰。孔子陪臣。不宜拜。周太祖曰。孔子百世帝王之師。敢不拜。遂拜。朕深服其明斷。不惑左右之言。朕敬禮百神。於先師禮宜加尊。仲質乃與定議。上服皮弁執圭。詣先師再拜。獻爵。後又再拜退。易服詣彝倫堂。祭酒司業博士助教進講。賜坐。侍臣以次列東西。講畢。宣諭學官諸生而還。明日。祭酒率學官上表謝。上從之。尋命條學規梓行。頒賜師生。進華蓋殿大學士。未幾。坐事降御史。後以年老致仕。仲質爲人篤厚。文多質實。如其爲人云。

翟善。字敬夫。秦興人。洪武中。貢入國學。有聲。授吏部文選主事。歷員外郎。二十六年。吏尙書詹徽伏誅。以善署部事。勤慎稱旨。特陞本部侍郎。仍署事。會上以諸司職有崇卑。政有大小。無方冊以著成法。恐後之蒞官者。罔知職任政事施設之詳。命善同翰林儒臣。做唐六典之制。舉凡設官分職之類。編爲書名。諸司

職掌二十八年實授一日上諭羣臣曰善雖年少。字量宏闊。他莫能倖也。善明於經濟。凡所奏議。多合上心。上每曰善朕良佐哉。命工部爲善營築於泰輿。善辭曰。江鄉地隘。宗親且衆。不忍奪人以自益。況未有所報稱。何敢當上喜曰。有官居鼎鼐。無地起樓臺。善與寇準同風矣。善故成籍。上欲免之。善頓首曰。戊卒宜增。豈可以臣破例。上曰。善可謂社稷臣矣。二十九年免歸。

滕毅不知何許人。元末兵亂。流寓江南。乙巳太祖征吳。以儒士入見。言事稱旨。留徐達幕下。尋拜起居注。命毅同楊訓文集古無道之君。若桀。紂。秦皇。隋煬。所行事以進。上曰。古人君所爲。善惡皆可以爲龜鑑。而惡尤以儆惕。吾所以觀此者。正欲知喪亂之由以爲戒耳。又命毅與宋濂等日侍左右。講說經史。甚見眷遇。吳元年。出爲湖廣按察使。尋命毅與李善長。劉基。陶安。周禎等定律令。毅於湖廣。務存寬大。於休養爲急。民多宜之。洪武元年。起拜吏部尙書。六卿初設。一切選除考課。皆毅與省臺官裁定。不激不隨。人稱得體。二年。出爲江西參政。卒於官。

錢唐字惟明。象山人。博學敦古。行洪武元年。舉明經。陳王道稱旨。授刑部尙書。二年。詔春秋孔子釋奠於國學。遣使降香於曲阜。每仲月上丁。致祭京師。而令天下府州縣不通祀。唐上言。孔子百王師。先儒謂仲尼以萬世爲事。天下祀孔子。天下祀聖壽。報本之禮。不可廢也。從之。祀如故。上以孟子有視君寇讎語。嫌之。欲節略其書。并議廢配饗。懸法曰。有諫者死。且命金吾射之。唐極言。孟子言仁義得聖道。不可廢祀。袒胸受射。曰。臣得爲孟子死。足矣。上見其誠懇。幸射不洞胸。命太醫療之。時已撤主。復之。得不廢。一日。召講。

虞書。陞立而對。或糾唐草野不知君臣禮。正色曰。以古聖王之道。陳於陛下。不跪不爲踞。又常諫宮中。不宜揭武后圖。上怒。待罪午門外。終日。上悟。賜飯。卽命撤圖。以老乞致仕。不許。尋坐贓忤。謫判壽州。亨於官。任亨泰。襄陽人。貢入太學。洪武十八年。殿試第一。授翰林修撰。陞少詹事。二十七年。擢禮部尙書。時日照民江伯兒。以母病割股食之。不愈。乃殺三歲子以禱祭。有司以聞。上怒曰。絕滅倫理。宜亟捕治之。遂逮杖一百。戍海南。命亨泰等定旌表例。亨泰議。凡人子遇父母有疾。醫治弗愈。割肝臥冰者。聽不在旌表之例。從之。詔定蔡氏書傳。學士劉三吾等總其事。亨泰與焉。時酒樓成。人賜鈔。冥其上。各獻詩謝。上大悅。二十八年。秦王棧薨。詔定喪禮。亨泰奏。喪制宜輟朝五日。今遇時享。暫輟朝一日。因議世子襲爵禮。爾其集議。以聞。亨泰議。凡漢諸王薨。遣使者立嗣。爲王。則玄冠衰絰。喪服以承詔。事畢。反喪服。諸侯受天子之命。亦宜服其命服。使者出。反喪服。卽位而哭。又議大臣犯重罪。雖蒙恩宥。不得列本班。必少加降抑。示勸懲。上命列九品班。後請罷朝。參賜食。先是。每旦視朝。御門殿公侯一品。官於門內。二品至四品。及翰林院等。官於門外。五品以下。官於丹墀。叩頭皆坐。光祿以次設饌。叩頭而退。率以爲常。亨泰以事煩請罷。從之。十一月。將征龍州。以其地界安南。命亨泰同御史嚴震直往諭之。國王日焜。以壯貌磊落。議論英發。敬禮之。明年。使還。上聞市蠻人爲僕。降御史尋免。

史官曰。明祖投戈講藝。延見儒士。惟恐不及。士之一技鳴者。皆得論難侃侃於天子之廷。樂詔鳳。崔亮諸臣。皆議禮制度考文之選也。雖庶事草創。比於叔孫之繇叢。與張蒼之章程。規摹弘遠矣。

周禎傳

周禎字文典江甯人元末兵起流寓江湖間庚子平漢以薦擢授江西僉事吳元年入爲大理寺丞尋進卿詔禎同李善長劉基陶安等定律令洪武元年設六部拜刑部尙書尋改治書侍御史及建廣東行省出爲參政開省之初經理曲盡奏旌香山縣丞冲敬能集流移寇至敬率民捍禦以勞死雷州同知余驥孫開設府治增築海隄揭陽縣丞許德關公署核田畝廉州知府脫因招徠流民農多復業惠州知府萬迪興廢舉墜不受私謁乳原知縣張安仁創城池立學校撫綏流徙清遠知縣李鐸勤政興學歸善知縣木寅勗立廨宇長於撫恤由是有司競勸嶺表以安而廣東大治會下詔開科舉禎奏應聘名儒司考事從之二年刑部尙書世家寶坐黜復召禎代多行寬政三年致仕去

史官曰

端復初傳

端復初字以善先賢子貢之後以亂遷溧水爲溧水人生有遠志不肯寂寂落人後兵亂袖策言時政無能用者欲歸溧水道絕僑居金華日以書史自娛明兵取金華常遇春聘爲幕官辭去薦於朝召爲徽州經歷均田賦定科徭關官舍政績大著遷吉州府通判俗尙譁訐教誡殷勤民不忍梗尋擢磨勘司丞凡泉粟刑法物貨旬稽精密陞爲令俄僚屬皆以貪敗礙東市惟復初以清白稱超拜刑部尙書按律持以平恕以杭州馬甲飛糧事逮繫者百餘人詔往勘分囚別所人各鞠之合其辭參驗同多者情真否則僞

郡守以下皆服罪。洪武壬子，出爲湖廣參政。亂後土廣民稀，多方體綏，民復業者，獨其賦。事皆豫計，時設官多闕，復初擇在職賢良吏攝其政，稱得人。事舉，民得以安，召還疾卒。嘗著座右銘曰：爲官實難，貧然後安。事有不可急中存寬，又曰：心契上天，腳踏實地。人謂其能自警。云：學士朱升謂復初爲人，其謙退似懦夫，其專謹似腐儒，瞻視精悍似俠客，掀髯談笑，世事似辯士，而精神超越，又似逸民。隱者世稱實錄子仁，字孝父，義字孝思，皆以儒士起家。仁翰林待詔，義翰林待書，先後使朝鮮，以清節爲人所服。朝鮮名其所居館曰雙清。

史官曰：闕

劉敏傳

劉敏，肅甯人。洪武三年，舉孝廉，爲中書吏。暮以小車出龍江市，蘆葦，旦載於家，而後入蒞事。妻織蘆席，歸以奉母。人或瞰亡以青磁瓦器遺其家者，懸於梁，候其人復來，竟還之。進楚相府錄事，值中書給沒官女歸於文臣家，咸勸其請納以事母，固辭曰：事母子之事，何預他人？及奸雄事敗，獨無所與，人稱其識。時與茹連皆爲上所知，十二年，擢工部侍郎，勤於其職。十三年，改刑部，詳獄明允，賜以誥，有善治國者，必擇仁人。刑期於無刑之語，十四年，出爲徽州府同知，尋卒於官。

史官曰：闕

彭通傳

彭通字萬里南海人少孤勵志讀書工爲詩隱居教授從游者常數百人洪武四年由儒士舉上親試之拜給事中參劾封駁嚴明有威同列皆遜爲勿如時上方嚮文學多擢近侍真左右俾應制公詩思敏給上稱之賞賜預宋濂醉學士廣和之列九年於力徵等十六人偕轉御史巡京郡薦達賢能掎擊貪暴有能聲用事者以金帛賂力辭不可遂欲上聞乃已陞山西參政廉出河東運司官匿羨寘於法賜寶鏹旌之吳印本僧也官方伯以材辯受上知嘗譖殺僉事張丁其家人橫肆諸藩臬事之唯謹偶以事干直數其罪且斥辱之以聞上不之罪也尋引年致仕卒爲人恭謹外柔而內剛直爲政不事繳察然所舉刺動無遺失故能以功名終

史官曰闕

范常傳

范常字子權潞州人宋青山先生孟申孫也嗜學淹貫古今彙粹無競篤於行義太祖克潞召見問曰天下惡乎定常曰常聞之好生惡殺人之本心今四海擾亂民鯁鯁懼不保主公能以除亂救民爲心不妄擄戮燔燒俾令安堵內揀精銳半從軍半乘城擇寬厚長者牧字之使得耕守不爲他盜攻劫則四方之人雲合霧集天下不足定也上悅禮遇之從克和州常見諸將暴橫擾民言於上曰使人捐棄骨肉肝腦塗地何以成大事主公當有以處之上即召諸將切責凡軍被驅婦女悉遣還民大悅上聞與論兵常曰古者寓兵於農今兵與宜有制所下郡縣雖田野之人豈無材勇宜精加簡閱爲伍各設長貳典司之耕

作隙。則習肄毋懈。事平之日。聽其爲農。如此則兵無坐食。而不誦於用。一日。上以羣雄未一。命常爲辭禱於天。稱上意。尋命典兵牘。克太平。授元帥府都事。丙申三月。定建康。預謀議。命爲太平知府。募民種藝。時兵亂後。乏穀種。官廩貯穀數千石。請悉發貸民。孰則收之。秋大稔。公私充物。興學校。民甚安之。召入爲侍議。訪以時政及古今事宜。直對無隱。又嘗紀滁和事蹟。上之。洪武元年。擢爲翰林直學士。尋兼太常卿。禮樂之事。多委之。嘗賜坐賦詩。上覽笑曰。老范詩質樸而無華。類其爲人。遷起居注。足疾累在告。賜安車出入。尋允致仕。御製詩四章。褒獎之。賜宅於太平門。遂家焉。常自號瑯琊山人。或曰。山人隱者之稱。今君朝夕天子左右。奈何用此。飄然曰。士各有志。吾今雖忝列侍從。抑鄉土之念。誰能忘之。犬馬之齒。且益衰暮。天子倘賜矜憐。首邱之願。可以終遂。山人之稱。固其志也。未幾卒。子組。行修潔。官至雲南參政。從子震。材武立戰功。累官都督僉事。

史官曰。闕

汪叡傳

汪叡。字仲魯。婺源人。能詩文。元末。應鄉舉。不售。會兵亂。與其弟同集義旅。協官兵復饒州。元以同爲餘干州同知。叡爲浮梁州同知。叡辭歸。其帥固留之。對曰。叡本儒生。不通軍旅。遭寇荼毒。忠憤激切。以至於此。饒旣平定。則婺源山中。可以少安。養親教子。其素心也。弟同爲國。吾當爲家耳。遂得歸。事親至孝。連內外艱。廬墓。明兵下婺源。同方率兵爭鄱陽。不克。亡走西澗。朝疑之。錄叡及妻程。子淵。存爲質。會同爲周所殺。

釋之授安慶稅使。壬寅，奏事還京。安慶城陷於漢，妻子竄入山谷，復安慶，令舊任尋與詹同隨軍參贊，以肺疾辭歸。尋從王克恭由新安移鎮會稽，調入閩，越浹歲，又以疾辭歸。臥病，教授鄉里子弟，有白讞者，濠梁人壬寅來爲宰，廉公有威，疆暴者畏而疾之。甲辰冬，鄰境寇來犯，城陷，白遇害，叡爲擇地葬之。洪武甲子，召入京，命釋西伯勸黎篇，發明詳盡稱旨，敕備顧問。侍東宮，授左春坊左司直郎，與朱善、劉三吾稱三老，開陳善道，從容獻納。太祖憫其年老，賜朝房以居，續製薰風南來諸詩，皆見褒賞。當春夏時，有罪至死者，輒涕泣俯伏進諫，請決以時，無傷天地生物之仁。上輒允奏曰：「此發於真懇，非他微名市恩者比。」恆稱曰：「善人善人，再踰年丙寅，力請歸，允之。」將行，上御奉天門，敕中使宣召至，賜坐，顧曰：「若知所以召見，意乎？」起對曰：「未知，曰：昨有不須辭別之旨，已乃思若光陰有限，今旣言歸，若雖嬰喘病，恆見負此病者，往往壽考，矧若龐眉有壽之徵，若之心事，朕所深知。孔子不云：鄉人之善者好之，不善者惡之。但若心素善於人，之善者固好之，不善者亦不惡之。斯爲未能全好善之心。今若還鄉，郡邑官勢須來見，當閉門筆之於東，俾僮輩示之曰：幸蒙聖恩，予告還鄉，理宜杜門謝客，輸租應役，其敢自速厥戾。如是不亦善乎？」叡頓首謝曰：「聖上愛人以德，適茲聖訓，是欲臣全其晚節，敢不欽佩，毋負上心。明日行，送車數百輛，觀者莫不歎嗟，以爲榮遇。生平和而純，莊而毅，默而智，言而信，窮而不憂，樂而不淫，爲學推孔孟之道，必期中道，所爲文章深厚古雅，賦頌詩歌，要歸醇於正。名潛溪集，卒年七十九。」

史官曰：闕

黃哲傳

黃哲字庸之番禺人幼孤刻苦讀書通五經能詩造晉唐奧域性好山水結廬蒲澗往來羅浮峽山南華諸名勝辭家度庾嶺過吳楚燕齊間一時英豪皆與遊當風雪時泊舟秦淮遇朱文昭涂穎相與握手吟咏沽酒大噱二人暗曰君才如白雪如寡和何名大噪太祖駐金陵建國吳拜哲翰林侍制侍太子讀書尋兼典籤懿文太子甚重之屢應制賦詩稱旨大見嘉賞尋奉使青徐諭諸反側以事出知東阿肯隸初以儒士易之公剖決如流一邑帖服歲大旱哲齋戒徒跣暴烈日中甘澍應祈民驩呼曰此黃公雨也浪溪有怪物恆出沒竊人啗哲爲文禱於神須臾風雷大作一青蛟斃水上人稱其誠感時亂後民多流徙聞哲善政復業者數千人辛亥遷東平通判是歲河決梁山中書省發民疏浚哲董其役經畫有方民不告勞有司欲復堰黃陵岡哲建議謂此乃故元覆轍可永戒毋貪目前事遂寢尋上書陳時務數十事上怒其狂會山東行省奏哲捐俸修先聖廟築河隄有成績上乃釋不問未幾乞歸有司請領郡校事橫經授徒四方至者多名士歲凡數百人乙卯以東平事註誤竟死於法哲始北上舟行倚篷聽雪嘗自詔曰天下奇音雅韻出自自然者莫是過也構軒曰聽雪篷學者稱爲雪篷先生

史官曰 關

程麒傳

程麒字國祥定遠人負英氣多謀略上在臨濠引兵趨定遠之池河初縣大姓陳氏與麒謀拓健兒屯守

挾縣尹爲帥自固。聞大軍且至，皆棄妻孥走。麒獨扶尹來降。上指謂侍臣曰：衆皆潰而麒獨降，非有識者不能留與飲食，籌征討之事，密謀曲算，常上意禮遇甚隆。旣取滁州，擢行軍總管府經歷，司其倉廩，兼掌晨昏歷，以指將帥之失伍者，未幾取和州，軍威益振。上以始事之初，惟兵食最急，仍命護滁州倉旣度江，克太平，開江南行中書省，徵還陞爲郎中。是時上左右唯麒及善長，凡政令軍餉羽檄，皆二人相與協贊之。及建康下，遷參議。戊戌冬，上親征婺州，署中書省事，方寄心脩委任，俄病卒。上親爲文，御鎮淮橋而祭，慟哭良久，直至葬所視其窆，始還。子驥，備宿衛，命就儒師學。上親訓督，尋爲管軍千戶，大兵征漢鄂，定襄河，下吳興，俱從征有功。上卽帝位，擢親軍指揮僉事，從平中原。陞指揮使，世襲滕州段士，驥帥師討平之。倭寇浙江，率浙江太倉諸軍征之，捕斬過當，進僉大都督府事。

史官曰：闕

王溥傳

王溥，字士淵，桂林人。進士。洪武二十六年，爲廣東參議。時匠藝之家，勢要占役，弗克營生。溥禁止之，有持部檄來徵舵木者，立期逼取，又木多不中，民苦之。溥親臨揀閱，十取八九。先是行海運，多漂沒，民不勝困。溥自臨廣嶺，徧觀險易，命有司鑿石填澗，修葺橋道，教民造車運之，民賴焉。時兵起無糧，無籍軍司恣甚。溥曰：國以民爲本，今一概起取，賦稅從何出耶？遂入奏。上是之，停取，餘皆獲免。其弟來廣，適遇承差何秀同舟，知爲溥弟，送以布衣。弟至，告其實。溥曰：一衣雖微，不可不慎。此汙行辱身之漸也。命還之，隨遣弟歸。

及奏績。父老。遮道留。不可得。歷官數年。笥無重衣。庖無食饌。爲胥吏庸誣。逮詔獄。行李蕭然。寮屬餽。皆辭不受。曰。吾豈以患難易其心哉。比至。得白。歸卒。年三十六。廣人惜之。

史官曰。闕

王敏傳

王敏。字進德。浙甯海人。爲諸生。有同舍生能文。往叩之。其人以年少。固靳不以告。憤且奮。兼日夜攻習。不。休。踰年。輒出其上。氣剛有廉隅。不與人爲狎。其所爲事。每欲異恆人。家貧好學。饑渴。歸取杯水飲。休休然。若飫梁肉者。人非其類。雖欲飲食之。不能也。嘗與友讀空舍中。夜半。鄰女叩門求宿甚哀。其友欲納之。獨厲聲罵曰。吾在此。誰敢入。因疾呼。使聞於外。其友愧謝。不敢出聲。女逸去。後學舍諸輕蕩士。目攝相戒。不敢爲非義。或飲酒歡笑。聞其款步。卽皆畏避之。洪武中。貢入京師。試高等。時遣太學生分教北方。賜衣。陛見以行。得太原。外官見諸生秀才從京師來。奔走伺候。若貴戚重臣。其分教者。亦多驕橫。奴視吏民。不爲禮。敏獨以禮自約束。如平時。守令敬愛。退相語以爲儒者。不可媚犯。藩鎮主將苦其清介異己。欲試其所爲。召使飲酒。牀幃婦人偏室。酒酣。內其中。鑰門以去。入見婦人。大呼排門。取廐馬乘之逃還。主將驚謝。後徵分教諸生還京師。郡邑恐其入奏發己罪。多賂以金錢。貪者受至數百千紙。敏一揖辭。父老卽行。無毫髮私受。諸生罪發多誅死。敏獨得免。尋監收嘉興糧。以舟運輸蜀。峽江悍急。行者多舍舟陸行。爲自全計。敏坐舟中不顧。曰。王事君命也。死生天命也。祇君命以事天。何以陸爲。後自全者多以失舟獲罪。敏所部

舟獨無虞。還拜御史。尋免歸。再起爲刑部司獄。坐徵法轅作赦歸。卒於家。年三十一。敏容貌端偉。有威重。慎交與。不挫屈於人。而居家孝友。兄蘊德。爲燕府紀善。師事之。終身不懈。弟琦。能文章。謹操守。有名。金華胡翰嘗與宋濂論獨行事。自言於衢。得一人曰汪瑋。瑋故嘗仕。斥不用。敝衣繩履。卒於窮死。然其議論卓犖不凡。而敏亦每稱瑋爲人。蓋其操持如此。

道同傳

道同。河間人。先韃韃族也。洪武三年。以才舉贊禮郎。十年。出知番禹縣。性剛毅廉潔。番禹素稱繁劇。而軍衛尤強橫。需求百出。佐吏動遭笞辱。前令不能堪。比同至。視民如子。堅執公法。凡事違理者。一切不從。民賴以安。權要惡之。未幾。永嘉侯朱亮祖至。數以威福撼同。同不爲懼。時有土豪數十人。遇閭里珍貨。輒抑價買之。稍不如意。卽誣以鈔法。莫敢誰何。同廉得實。捕之。悉械繫通衢。諸豪詣亮祖求辯。亮祖召同。勞以酒食。徐爲言之。同厲聲曰。公爲大臣。不當爲小人所使。亮祖不能屈。次日。亮祖出通衢。被械者方曝烈日中。哀呼求免。亮祖釋之。又有富民羅氏。於亮祖之兄弟善。怙勢凌人。同按法治之。亮祖又奪去。以他事笞同。同遂歷數其事而奏之。疏未至。亮祖亦誣同抗詆。先聞。上方委亮祖兵事。又深惡梗者。卽命使殺同。適同奏亦至上。始悟。以其職卑而直言。大臣有骨鯁風。特遣使馳宥之。二使同日至。同已死。民悼惜之。上知之。悔亮祖竟用是得罪。至杖死。同性峭直。器宇魁岸。奉母備甘旨。於妻子同粗糲。布政使徐本雅重同。嘗按一醫士罪當笞。本急欲得醫。求同寬釋。同曰。徐公亦欲效永嘉侯耶。笞之乃已。同死後。民多奉其主於

家出入輒告。有事卜之，響驗。人咸以爲神云。

史官曰：闕。

郭資傳

郭資，字存性，武安人。洪武十八年進士，爲戶科庶吉士。試主事，戶部總部。歷改湖廣、陝西司，爲真、曉、練、錢、穀、陞、僉都御史。尙書郁新薦，改北平參議。上言弊政，陞參政。不數月，進布政使。燕兵起，資獻策防禦。已而留待世子居守。李景隆攻北平，晝夜扞備，輯陞兵民，轉給饋餉，盡心瘁力，不畏強禦。太宗卽位，陞戶部尙書。上曰：資，朕蕭何也。未闕月，出掌北平布政司事。卽建北京，置行部，與雜僉並改行部尙書。深見信用。永樂十七年，罷行部，復爲戶部尙書。時巡狩營建，百費並興，皆資調度。仁宗卽位，念其舊勞，游有寵賚。立東宮，兼太子賓客。陞太子太師，以足疾賜敕給半俸致仕。復其家。宣德三年夏，轍部務，明年復召入，以太子太師掌戶部事。免朝參。資矢恭慎，祁寒暑雨，必入署視事，不少休。卒年七十三。贈湯陰伯。諡忠襄。官其子佑戶部主事。資受眷三朝，屢登八座，衣食僅充，幾不能葬。永樂後，文臣贈伯四人：金純、山陽伯、吳中、在平伯、金濂、沐陽伯。

明書卷一百十八

列傳四

名臣傳三

黃淮傳

黃淮字宗豫。永嘉人。洪武三十年丁丑進士。爲中書舍人。建文四年。燕兵渡江。淮同衆官歸順。太宗卽位。坐奉天門左室召見。訪政務。稱旨。每朝解籍及淮立御榻左。備顧問。或至夜分。上寢卽賜坐榻前。論議密務。不數日。令入內閣。專掌制敕。旣又選五人與共事。名直文淵閣。是秋。陞編修。進侍讀。立東宮。陞左庶子。永樂五年。陞右春坊大學士。兼侍讀。進講東宮。太孫立。又兼輔太孫。六年。命蹇義、金忠、楊士奇及淮留守。諭曰。太子仁厚。留汝四人居守。猶唐太宗簡輔弼監國。必付房玄齡也。明年。上北狩。又明年。上征虜。長沙妖人李法良反。皇太子遣豐城侯彬討之。漢王忌沮太子。言彬不可用。淮曰。豐城老將。必能成功。兵貴神速。宜亟遣以掩不備。旣而法良就擒。十一年。上再北征。淮復留守。漢王日夜謀奪嫡。造飛語動搖監國。并中傷淮。十二年。坐淮奉表迎上下敬。逮詔獄。凡十年。獄中有省愆集。自省錄。仁宗卽位。出獄中。陞通政使。兼武英殿大學士。仍入內閣。洪熙元年。加少保。戶部尙書。大學士如故。支三俸。辭尙書俸。仁宗大漸。皇太

子在南京未至。深機卒禍。中外洶洶。淮與楊士奇佐鄭襄二王監國。候皇太子至。淮憂危。嘔血。宣德元年。漢庶人反。上親征。命淮留佐二王監國。班師始還。第二年秋。固請歸。時淮父卒。賜葬襄事。入謝。賜遊西苑。與公侯伯師傅尙書十一人。俱肩輿登萬歲山。宴山麓。比辭。又宴太液池。諭之曰。明年朕生日。卿其復來。至期。淮至上喜。寵錫有加。八年。禮部會試貢士。命淮與少詹事王直爲考試官。十年。宣宗崩。淮奔喪。留逾月。辭歸。正統十四年。卒。年八十三。諡文節。永樂初。黨獄大起。南人避北官者。又有編戍法。淮言不可。九年。時虜酋阿魯台歸款。請并女直。吐蕃東西諸部。聽其約束。欲朝廷出誓詞。鑄金定集。諸酋麀酒中飲爲盟。衆議且從之。淮曰。古言外夷狼子野心。黨勢分則易制。一心力則難圖。後患滋大。此奸謀不可許。上善淮言。願左右曰。黃淮如立高岡。無遠不見。爾輩如處平地。所見惟目前耳。賜大寶法王玉章。示淮璞。淮言。朝廷賜外夷。用敕命廣運二寶。夷人將謂法王尊於朝廷矣。上從其言。

史官曰。黃淮神識洞朗。健力峻拔。有古社稷臣之風。纔脫繚絏。不一二年。遂屏跡丘園。計淮園土十年。家食二十餘年。而同事七人。籍旣雉權。廣亦蠹滅。胡儼早休。惟士奇秉鈞最久。榮謀曠最密。是皆有幸不幸焉。說者謂方孝孺之誅。彘尹昌隆之籍沒。許白雲之極刑。皆出於淮。而祭酒劉益謂淮好嘗毀同列。約之始進。弗端百善莫贖。淮之蒙詬。不亦宜乎。

蹇義夏原吉傳

蹇義。字宜之。初名瑤。巴人。洪武十八年進士。授中書舍人。奏事稱旨。一日。太祖顧義問。汝蹇叔後乎。頓首。

謝不敢。上喜。卽書義字賜之。易名。一嘗當調命滿九載。朕且用義。建文皇帝卽位。知太祖欲用義。超陞吏部右侍郎。太宗卽位。轉左。遼月陞尚書。代張統。當是時。盡改建文諸例。得洪武之舊。義從容爲上言。鑒成憲者。豈無因革。反亂政者。自有經權。聞舉數事。陳說本末。上喜其忠實。從其言。或遂譖義。不忘建文。上不聽。永樂二年。兼詹事。上欲諭太子。率令義往導意。太子尤愛重之。七年。巡北京。佐太子監國。諸王及遠夷奏請詣行在。所餘悉啓太子處分。義熟於典故。達政體。不動聲色。事賴以濟。九年。與夏原吉同滿考。賜宴。敕獎諭。十七年。外艱歸。起復。詣北京謝。遣中官護還京。明年。從太子朝北京。十九年。三殿災。特敕廷臣二十六人。巡行天下。義及給事中馬俊。應天諸郡。問民疾苦。考察黜陟文武吏。義言。國家多事。時盡法繩吏。人將不勝。斥出太甚者數人。還吏部。二十年。上北征還。坐東宮事。與楊士奇訟。繫錦衣衛獄。尋釋。仁宗卽位。預政議者。四五大臣。首進義。少保兼尙書。支二俸。歷進少傅。少師。賜義及楊榮。楊士奇。金幼孜。夏原吉。繩愆糾繆。銀圖書各一。諭曰。朕有過舉。卿卽具疏。用此封識。進內。制呈五臣及黃淮。誥草。上特增二語。曰。勿謂崇高而難入。勿以有所從違而或怠。又面諭曰。此朕實心。未幾。又制塞忠貞印。賜之。義重厚不敢專斷。每承顧問。常持兩端。不能決。然忠實無他腸。楊士奇謂義勿過思。義應曰。事不熟。慮有後患。上嘗笑曰。義士奇言皆是。楊榮或詆義。語聞上。上不直。榮頓首言。榮無他。卽左右有讒榮者。願皇上慎察。上笑曰。吾亦不信。偶言及耳。宣德初。征漢庶人。軍中進止多從義。時議赦交趾。義及夏原吉力言。祖宗疆土不可棄。上不聽。命擇人使交趾。義薦伏伯安。楊士奇語夏原吉。以伯安不可使。義當榻前力爭。當是時。上尤

信任原吉。比召諸大臣入議。義竟薦伯安。上顧原吉云。何對曰。不可。義曰。伯安有口才。羣臣不及。上又顧問士奇云。何對曰。伯安有穢行。無學識。遣使必辱國。上從二人言。不遣伯安使。義亦不以二人爲異。已三年秋。從巡邊還。上顧曰。塞少師老。不欲煩以事。敕曰。卿事祖宗。積效勤誠。朕嗣統。尤資贊輔。夙夜在念。圖善始終。以卿春秋高。尙典劇司。非所以優老待賢。況師保寅亮爲職。不煩庶政。乃副倚毘。可輟吏部務。朝夕在朕左右。相與討論至理。共甯邦家。其專精神。審思慮。益致嘉猷。用稱眷倚老成之意。明年夏。郭璉代爲尙書。又賜義忠厚寬弘銀章一。七年秋。令有司治義第。八年。一品。九年。賜宴禮部。義生日。賜鈔萬馬一。英宗卽位。日。義齋宿得疾。越五日卒。年七十三。贈太師。諡忠定。義孝友質實。和厚簡靜。處人有量。未嘗一語傷人。至議典法。不苟爲包含。必歸於正。歷事六朝。凡五十年。貴而能謙。富而能約。上前所言。未嘗退以語人。在吏部。尤慎擇郡守。考察明恕。不苛不縱。子二。英。荃。皆尙寶司丞。太宗卽位之歲。至成化丁亥。凡六十六年。吏部尙書四人。義及郭璉。王直。王勣。而何文淵協佐者不與焉。自後至正德終五十四年。凡更十八人。而尹旻最久。十四年。

夏原吉。字維喆。湘陰人。洪武中以鄉薦遊太學。選入禁廡書誥。授戶部主事。尙書郁新奇之。與商榷諸司事。劉郎中者忌之。會劾諸司怠事者。上曰。宥之。新請必罪。上怒。新問誰教汝。新免冠謝得已。劉郎中因奏果人教尙書者。意中原吉。上問新爲誰。對曰。堂後書算生教臣。臣愚過聽。萬死。上下書算生獄。劉郎中又奏原吉專尙書柄。言前事實。原吉教尙書。上曰。聞原吉能佐尙書。汝願欲陷原吉耶。劉郎中與書算生皆

棄市。建文皇帝卽位。逾月。陞戶部右侍郎。明年。充採訪使。巡福建。未幾。移鎮蘄州。太宗卽位。轉左。或言原吉爲建文用事人。不宜大用上。曰。原吉忠於太祖。以故忠於建文。又豈不朕忠耶。逾月。進尙書。永樂元年。吳浙大水。命原吉行視水。遣僉都御史俞士吉。賜以水利集。累遣侍郎李文郁。大理寺少卿袁復。陝西參政宋性佐之。原吉言。浙西諸郡。蘇松最居下流。常嘉湖三郡。土田高多下少。環以太湖。縣五百里。納杭湖。宣歙諸山水。注澱山諸湖。入三泖。頃浦港。漚塞。匯流漲溢。傷害苗稼。拯治之法。宜浚吳松諸浦港。泄其壅淤。以入於海。吳松江袤二百餘里。廣百五十餘丈。西接太湖。東通海。前代屢疏。以當潮汐。沙泥淤積。旋疏旋塞。自吳江長橋至下界浦。約百二十餘里。雖稍通流。多有淺窄。又自下界浦抵上海南倉浦口。可百三十餘里。潮汐壅障。菱蘆叢生。已成平陸。欲卽開浚。工費浩大。且灑沙淤泥。浮泛動盪。難以施工。臣等相視得嘉定劉家港。卽古婁江。徑通大海。常熟白茆港。徑入大江。皆廣川浚流。宜疏吳松江南北兩岸。安定等浦。港引太湖諸水。入劉家白茆二港。使直注海。松江大黃浦。乃通吳松要道。下流壅塞。難卽疏浚。傍有范家浜。至南倉浦口。可徑達海。宜浚令深闊。上接大黃浦。以達泖湖之水。此卽禹貢三江入海之跡矣。旣開通。相度地勢。各置石閘。以時啓閉。每歲水涸時。修圩岸。以禦暴流。上從之。役夫凡十餘萬。原吉布衣徒步。日夜經畫。盛暑揮蓋去。曰。衆赤體暴日中。吾何忍。歲饑。奏發粟三十萬石賑濟。二年。還朝。復出治水。水洩。農田大利。召還部。時賞功。封建征夷下番營北京。費億萬計。皆取辦於原吉。從上北巡。兼掌行在吏禮兵部都察院事。八年。上北征。輔太孫留守北京。總理行在九卿事。諭曰。朕以房玄齡視卿。原吉且入朝。獨近

展前參決機務。朝退。郎官御史環請事。原吉口應手判。不動聲色。駕還。扈還京。尋命侍太孫周行鄉落。取齏黍進太孫曰。願殿下味此。知民艱苦。九年。滿考。宴便殿。諭廷臣曰。原吉高皇養成賢德。欲觀古名臣。此其人矣。命與姚廣孝監修國史。十一年。扈北巡。侍太孫居上營。後十四年。侍太孫還南京。十五年。從幸北京。十八年。宮殿成。命召太子太孫於南京。十九年。三殿災。詔求直言。言者輒云。都北京不便。主事蕭儀言尤峻。上怒。殺儀。曰。吾與大臣密議數月。言遷都便。言官遂劾諸大臣。上跪言。官大臣午門。難遷都利害。都御史陳瑛罵言官白面書生。不知大計。上令左右問衆議云。何。原吉曰。臺諫職言路。且應詔陳言。臣等備員大臣。不能協贊大議。臣等萬死罪。再問。對如初。上悅。盡釋言官大臣。上御便殿闕門。每召原吉。語移時。左右莫得聞。退則恟恟若無預者。交趾平。上問陞賞孰便。對曰。賞費於一時有限。陞費於後日無窮。上從之。西番大法王來朝。上欲郊勞。原吉以爲不可。法王見便殿。命原吉拜。又不肯拜。上笑曰。卿欲效韓愈耶。過侍郎楊勉之。遠矣。十九年。上議北征。原吉力諫。上怒。繫內官監籍其家。竟北征阿魯台及兀良哈。明年。又征阿魯台。又明年。北征。還至榆木川。不豫。顧左右曰。原吉愛我。上計至。太子走原吉。繫所呼之。哭曰。楊榮至。父皇賓天矣。原吉伏地。哭不能起。太子召問國事。原吉言。方今民力竭於東南。戎伍疲於漕運。宜幸南京。少蘇民困。仁宗卽位。復原吉戶部尙書。會母喪。乞終制。上曰。卿老臣。宜共濟艱難。卿有母。我無父乎。如卿辭職。朕亦不當在此。不允。立太子。兼太子少傅。尋進少保。兼太子少傅。尙書如故。支三俸。固辭。許辭。太子少傅俸。洪熙元年冬。無雪。上作憂民吟。授原吉和手。敕巒制鞭背。連坐妖言誹謗之刑。原吉與二三

大臣密議聞上從之賜田五頃建第兩京李時勉廷諍激上大怒言時勉當朝辱朕原吉曰時勉小臣豈能損聖德願少霽天威下法司議罪未晚太子去南京上崩昭皇后命原吉急迎太子太子將至羣臣郊迎后留原吉佐襄王居守宣宗卽位時時密咨原吉或袖小帖付之原吉亦時有所白宣德元年漢庶人反指原吉徵赦租爲奸臣首上夜召諸大臣議原吉免冠頓首曰臣罪當死上曰彼借卿爲兵端耳命坐屏左右密議揚榮首勸親征上難之顧原吉對曰往事可鑒臣見所遣將語臣兵事輒泣臨事可知兵貴神速卷甲趨之所謂先人有奪人之心也榮言是上意遂決師臨城庶人猶令人繞城罵原吉三年賜範金銀印曰含弘貞靜曰謙謙齋曰後天下樂從巡邊還上念原吉老敕輟部務俾專論道左右明年夏召郭資代是冬從閱武郊外原吉生日上繪壽星圖爲詩賜之五年春卒贈太師諡忠靖復其家朝議以宜贈伯楊士奇不可後三年郭資卒得贈湯陰伯原吉天性寬平靡德不報靡怨不釋其畫財賦以愛人節用爲先酌大體略煩苛以故雖數與大役供餉贍給而民不繹騷雖愴愴無矯節不務悅人人無識不識皆謂爲君子長者呂震嘗於上前短其柔奸震爲子求官上問原吉原吉稱震有守成功陳瑄於太宗初欲殺之後原吉力薦瑄才總漕運周忱爲長史或薦爲郡守原吉言郡守不足展其才忱得陞侍郎巡撫當是時蹇夏齊名蹇義簡重善謀原吉弘裕善斷太宗時外兼臺省內參館閣吁俞可否期於濟國三十年間民安吏治有古大臣之風焉屢監修太祖太宗仁宗三朝實錄太祖實錄凡三修建文中徐輝祖監修永樂初李景隆監修再原吉監修學士解縉表永樂初修者元年六月凡一百八十三卷原吉再修

者十六年五月上凡二百五十七卷。然於建文事多曲護失實。又寶訓十五卷。原吉治水東南有功。吳人尸祝之。正統間。豪勢家奪水利。溝防盡壞。周忱治之。纔十餘年。又壞。景泰中。侍郎李敏治之。弘治中。又壞。侍郎徐貫又治之。正德末。又壞。尙書李充嗣又治之。

史官曰。蹇夏逮事六朝。爲高皇養成人才。所謂敷求輔後者也。義質實簡厚。無智名勇功。而左右監國。濬多啓沃。每事推讓。有慮懷慎之風焉。原吉外總六曹。內參機務。文帝方之玄齡。東南水利。至今賴之。才巨而濟以含弘。誠大受之君子也。天佑人國。壽者充廷。斯仁。宣所以致治歟。

張統傳

張統字昭季。富平人。父月川。文行著名。統洪武中舉通經。爲東宮侍書。才識通敏。皇太子器重之。十二年。陞通政司左參議。試左通政。十五年。雲南平。擇守臣。改右參政。陞辭。上製詩二章以賜。歷進左布政使。凡土地貢賦。法令條格。祠祀公廡。上下典儀。經費程度。悉統裁定。夷民孚說。遠邇奠安。是時雲南寓賢董倫。王景。韓宜可輩。不問識不識。皆厚恤之。以故遷謫至者如歸。二十年。秩滿入覲。治行爲天下第一。賜敕曰。唐虞之制。外樹州牧侯伯。奠輯民居。人樂雍熙。載諸方冊。雖不備述。略見焉。當時才良並出。所命皆賢。是以君有易位。法令不更。諸侯列上。千載亡異。吁。今不然。道善勿從。縱欲如流。朕起寒微。出望外。統天下竭氣語。疲精神。諭人爲善。從者罕焉。何其艱哉。西平旣平。爾統撫守實先。今五年矣。言出則蠻方耳入。今布則人信心孚。功出九州十二牧上。朕不待考而知。茲復命仍治。汝往欽哉。賜宴及道里費。統治雲南。旣有

次第乃設廟學立功廡錄上敕諭三侯及諸武臣所以經理蠻方者藏之廟學而序其端曰書具六體雖兼著臣言皆君道也故一代謨訓功烈必言命言天而臣奉承之洪武辛酉歲大兵西下雲南自興發之始既奠定之後神機妙算出自上裁有詔有敕或諭大將或諭守臣幕下明見萬里綜理微密所謂通天下之志成天下之務虞書以典命篇釋者謂册在几上象尊閣之意臣統謹按故事再拜錄藏於文廟之尊經閣上嗚呼西南之地方數千里皆山林幽昧種類龐雜性如飛走易惑難化仰惟創業之君輔運之臣風雲際會於一時而威德周匝於四表故能投之斯中取之斯獲豐功偉績如是神也於以見聖人經營之勤睠焉西顧者屢矣詩曰肅肅王命仲山甫將之逸不忘勞安不忘危敢告後之君子二十六年再朝褒賜如前三十一年召爲吏部尙書滇人如失父母時建文新立旁求遺逸日集闕下率命統試鑑識精絕各當其才會修太祖實錄被旨試翰林編纂官考第高下得楊士奇策喜曰此用世才也奏第一授吳府審理副太宗旣立仍其官因錄中朝奸臣二十八人統與其數旣迎附赦爲尙書如故與戶部尙書王鈍並召曰卿等皆老矣可解職務月給半俸居京師統出遂自經吏部後堂死

史官曰 闕

董倫傳

董倫字安常宛平人遊遊山林間布褐藜藿已懷憂世之志學者多從之遊其先爲恩縣人恩古貝州也因稱貝州先生元末徵辟不出太祖初擢用單縣儒士張甯甯薦倫徵爲贊善大夫事懿文太子陳說多

長厚語。太祖聞而善之。洪武十八年。陞左春坊大學士。東宮薨。二十五年。出爲河南右參政。盡心民事。名其退食之堂曰後樂。方孝孺爲之記。嘗上封事數千言。多當上意。又上書薦肇州吏目葛伯衡。太祖立召伯衡爲陝西參議。三十年。誥誤免官。典教滇南。太孫憐其老。賜道里費。行過成都。蜀獻王深重之。賦詩八章。至滇。作養成就。雖蠻童夷豎。皆知向方。建文皇帝卽位。以東宮舊臣召還。拜禮部侍郎。兼學士。與方孝孺同入內閣。侍經筵。御書怡老堂扁。及髭几玉鳩杖各一。賜之。倫上表謝。略曰。桓榮設几杖於太常。不聞宸翰之賜。晏殊題舊學於神道。未見几杖之頒。自今將杖以戒。噫。則當思四海或有饑餒之民。憑几以安身。則當念一物或有顛連之歎。初御史解縉嘗代夏長文作劾都御史袁泰疏。泰恨縉。中傷縉。上令縉十年讀書。來京擢用。未及期。上崩。縉赴臨。有司嫉之。謂非詔旨。誦縉河州衛吏。倫於縉善。左右之。得詔還爲翰林待詔。倫質直敦厚。富文學。爲時所重。建文間。屢懇言宜親睦宗人。不聽。燕兵至。倫年八十餘。致仕出京。悒悒多疾。數日卒。

史官曰。闕

解縉傳

解縉。字大紳。吉水人。洪武二十一年進士。選中書庶吉士。大庖西。上封事論時政。剴切萬言。其略曰。陛下挺生南服。一統華夷。功高萬古。旣無偏寵外戚。寺人藩鎮之患。又無貨利聲色。遊畋玩好之欲。旣皆遠過於漢。宋。又何遜讓於唐。虞。惟願陛下以天地爲一體。以天下爲一人。令出惟行也。不宜於數改。刑期於無

刑也。甯失於不經。故令數改則民疑。疑則不信。刑太繁則民玩。玩則不清。立國至今。將二十載。無幾時無變之法。無一日無過之人。良由誠信有間。用刑太繁也。臣見陛下好觀說苑。韻府雜書。與所謂道德心經者。臣切謂甚非所宜也。說苑出於劉向。向學不純。溺於妄誕。所取不經。且多戰國縱橫之論。壞人心術。莫此爲甚。韻府出元之陰氏。鄙猥細儒。學孤識陋。蠅集一時。兔園寒士。鈔緝穢蕪。略無可采。陛下若喜其便於檢閱。則願集一二志士儒英。臣請得執筆而隨其後。上泝唐虞。下及殷周。根實精明。隨事類別。刪其無益。勒成一經。豈非太平制作之一端歟。禮記出於漢儒。蕪雜尤甚。宜及時刪改。日御經筵。訪求審樂之儒。大備百王一典。作樂書一經。以惠萬世。若夫配天宜復掃地之規。尊祖宜備七廟之制。奉天不宜爲筵宴之所。文淵未備。夫館閣之隆。太常非俗樂之可肄。官妓非人道之所爲。禁絕娼優。俾於變之民。不遷於淫巧。易制闕寺。尊天子之貴。不近於刑人。執戟陞墀。皆爲吉士。虎賁趨馬。悉用俊良。雖門戶掃除之役。命公卿子弟之賢。任諸侯王於衆職。定久任法而加封。木輅朴居。而土木之工勿起。佈墾荒田。而四夷之地勿貪。釋老之壯者驅之。俾復於人倫。經呪之妄者火之。俾絕其欺誑。斷所謂瑜珈之教。禁所謂符式之科。絕鬼巫。破淫祀。省冗官。減細縣。痛懲法外之威刑。永革京城之工役。流十年而聽復。杖八十以無加。婦女非帷薄不修。毋令逮係。大臣有過惡當誅。不宜加辱。治歷明時。授時作事。但伸播植之宜。何用建除之謬。伏見陛下拳拳於畏天畏鬼神。而所謂畏民者。則未至也。拳拳於治民治強暴。而所以治心者。猶未至也。袞盛之潔。衣服之齊。修舉之時。儀文之備。此畏天畏鬼神之末事也。簿書之期。獄訟之斷。詔誥之勤。鉤距之

巧。此治民治強暴之支流也。近年以來。臺綱不肅。以刑名輕重爲能事。以問囚多寡爲勳勞。甚非所以厲清要。長風采也。夫人自救過之不給。何暇刻人之過。人自以言爲諱。何能有諫諍之言。御史糾彈。皆承密旨。未聞舉善。但曰除奸。蓋入人之罪。或謂無私。而出人之罪。必疑受賄。逢迎甚易。而或蒙駭。營救甚難。而多得禍也。陛下進人不擇於賢否。授職不量於輕重。建不爲君用之法。所謂取之盡錙銖。置奸朋倚法之條。所謂用之如泥沙。監生進士。經明行修。而多困於州縣。屈於下僚。孝廉人材。冥蹈警趨。而咸布於朝省。驟歷清華。椎埋鬻悍。闖蕘下愚者。朝捐刀鏹。暮擁冠裳。左棄筐篋。右綰組符。剔履之賤。衰繡巍峩。負販之傭。輿馬赫奕。雖曰立賢無方。亦豈忱詢有德。古者鄉鄰善惡必記。今雖有申明旌善之舉。而無黨庠鄉學之規。互知之法。雖嚴訓告之方。未備紀綱不立。節目無張。臣欲取古人治家之禮。睦鄰之法。若古藍田呂氏之鄉約。今義門鄭氏之家範。布之天下。世臣大族。率先以勸。旌之復之。爲民表率。此不可視爲迂闊。而不切當今之急務也。陛下天資至高。合於道微。百家神怪。誕妄恍惚。無不洞矚其謬。然猶不免欲以愚弄天下。若所謂以神道設教者。臣謂不必然也。所謂傳國寶者。臣考按前史。焚燬久矣。屢求屢得。眞僞莫明。卽真有之。區區李斯之書。秦政之制。何足爲寶哉。地有盛衰。物有盈歉。而商稅之徵。率皆定額。盈也。好黠得以侵欺。歉也。良善困於補納。夏稅一也。而茶椒有糧。果絲有稅。旣稅於所產之地。又稅於所過之津。何其奪民之利如此之密也。又多貧下之家。不免拋荒之咎。或疾病死喪。逃亡棄失。今日之土地。無前日之生植。而今日之徵聚。有前日之稅糧。里胥不爲呈州縣不爲理。或賣產以供稅。產去而稅存。或禱辦以當

役重而民困。又土田之高下不均。而起科之輕重無別。或膏腴而稅反輕。瘠薄而稅反重。欲拯其困而革其弊。莫若行授田均田。常平義倉之法。積之以漸。至有九年之食無難者。王公設險以守其國。近世狃於晏安。墜名城。銷鋒鏑。禁兵諱武。以爲太平。一旦有不測之虞。連郡至望風而靡。武備墜之過也。及今修治。不宜動衆。但敕有司。以時整葺。開武舉以收天下之英雄。廣鄉校以延天下之俊乂。古時多有書院。遺基學田。舊業。貢士有莊。義田有族。皆宜興復而廣益之。夫罪人不孥。罰弗及嗣。連坐起於秦法。孥戮本於僞書。今之爲善者。妻子未必蒙榮。有過者。里胥必蹈其罪。況律以人倫爲重。而有給配婦女之條。聽之於不義。則有何取。夫節義哉。尙書侍郎。內侍也。而以加於六卿。郎中員外郎。內職也。而以名爲六屬。御史詞臣。所以居寵臺閣。郡守縣令。不應回避鄉邦。同寅協恭。相倡以禮。而今內外百司。捶楚屬官。甚於奴隸。是致柔懦之徒。蕩無廉恥之節。一爲下官。肌膚不保。甚非所以長孝行厲節義也。臣但知罄竭愚衷。欲言固不止此。急於陳獻。略無次序。亦不暇組織成文。冀以將來取譽。惟陛下幸垂鑒焉。上覽之。喜。縉少年有才志。封事留中。諸大臣皆忌之。上顧數稱奇才。兵部尙書沈縉忌。縉年少得上意。乞改御史使遠上。縉在臺常爲王國用。草諫書。雪韓國善長冤。爲詹徽所嫉。又爲夏長文作劾都御史袁泰疏。泰切齒恨之。縉又時時敢直言。竟作深文得罪。且不測。上憐之。召對便殿。慰諭賜錕曰。汝歸益讀書。益盡心古人。後十年來未晚也。又召縉。父謂曰。大器晚成。若以爾子歸。益進所學。然猶命修元史。誤及踵成宋書。刪定禮經。凡例皆留中。歸家八年。太祖崩。來奔喪。有司劾縉母喪未葬。父年九十。違詔奔喪。謫河州衛吏。建文元年。詔入翰

林爲待詔。燕王渡江。縉與胡廣等迎出金川門。燕王大喜。及卽位。召縉及黃淮立御榻左。備顧問。遂命入內閣。未幾。又召胡廣。楊士奇。金幼孜。胡儼。楊榮。陞縉侍讀。不數日。進侍讀學士。七人並直文淵閣。內閣預機務自此始。承運庫官張興恃寵而驕。嘗笞人左順門下。縉過之。叱曰。御座在此。敢爾違犯禮法乎。興退。永樂初。重修高廟實錄。充總裁官。又修永樂大典。古今列女傳諸書。上寵甚信用。賞賚輒與六卿等。當是時。儲位未定。上密詢縉。縉言。世子仁孝。天下歸心。以尊奪宗。自古致亂。上不應。又頓首曰。好聖孫。上曰。已。遂册仁宗爲皇太子。進縉翰林學士。兼左春坊大學士。初議頗泄。邱福等謗縉洩禁中語。高煦大恨。欲殺縉。未幾。用兵交阯。縉力言。交阯古羈縻國。通正朔。時賓貢而已。得其地不足郡縣。上遂疎縉。出爲廣西參議。李至剛奏其怨望。改交阯。永樂八年。入奏事南京。會上北征。見東宮辭去。高煦密疏言。縉瞰上出塞。輒遠覲儲君徑歸。無人臣禮。上怒。逮縉。并至剛下詔獄。十三年正月。死獄中。籍其家。妻子徙遼東。至剛不死。仁宗時。以宮臣得爲通政。尋亦謫遠郡。初太宗寵信之手書大臣十人。蹇義等名授之曰。汝疏其人品。縉實封對。以爲蹇義天資厚重。中無定見。夏原吉有德有量。不遠小人。劉雋雖有才幹。不知顧義。鄭賜可謂君子。頗短於才。李至剛誕而附勢。雖才不端。黃福秉心易直。確有執守。陳瑛刻於用法。好惡頗端。宋禮。蹇直而苛。人怨不恤。陳洽疏通警敏。亦不失正。方賓簿書之才。馴僧之心。奏上。太宗以示東宮曰。至剛除已洞燭。餘徐驗。東宮因問縉。建文君所用人何如。對曰。此皆洪武中人材。事往已不足論。又問尹昌隆。王汝玉對曰。昌隆君子而量不宏。汝玉文翰不易得。惜有市心耳。仁宗卽位。出縉奏示楊士奇曰。人率謂縉

狂士觀所論評皆有定見。非狂士。因赦妻子。還鄉官。其子禎。期爲中書舍人。正統元年。又盡還其沒產。縉結髮讀書。留心經濟。任事直前。風生電發。早遇聖明。名動天下。晚罹讒毒。中道天闕。不盡其用。其重義輕利。遇人憂患。疾苦輒隱於心。苟可用力。盡意爲之。篤於故舊。及名賢世家之後。喜引拔士類。或謂其汎愛者。終不爲變。襟宇闊略。不屑意細故。而表裏洞達。絕崖岸。雖野夫穉子。皆樂親之。求文翰者。日輻輳。率與之無倦。或言有不當與者。笑曰。雨露豈擇地而施哉。文雄勁奇古。新意疊出。長於敘事。詩豪宕豐贍。其教學者。恆曰。甯爲有瑕玉。勿作無瑕石。書小楷精絕。行草皆佳。先是燕兵逼都城。縉與胡廣。金幼孜。黃淮。胡儼。楊士奇。周是修。約死難。是修死。縉與衆迎太宗入。後縉爲是修作傳。乃謂其子曰。當時若同死。誰與爾父作傳耶。當是時。胡廣頗有聲望。金川將啓。縉使人覘廣。見廣如廁。回問家人。餒豬否。縉知之。笑曰。一豬不捨。肯捨性命耶。遂決策迎太宗。

史官曰。太祖網羅英俊。智屈羣策。當時元臣。親如善長。貴如惟庸。廣洋。近侍如安。如濂。如觀。如素。雷霆所震。罔不懽懽。縉以一少年。上庖西萬言。批逆鱗。無顧忌。而大度優容。令其進學。才難之嘆。猶可想見。規模真弘遠矣。召旋河隴。踐歷清華。密贊建儲。有故老舊臣所不及者。卒罹讒口。莫之與白。悲夫。跡其聞。竊易盟。作傳戲謔。縉之狂奚其解諸。

胡儼傳

胡儼。字若思。南昌人。洪武二十年。舉於鄉。明年。會試乙科。授華亭教諭。時年尙少。抗師道。訓勵諸生。敦行

檢爲講說經史。寒暑不廢。內服服闋。改長垣。乞便養親。改餘干。著爲令。建文元年。陞桐城知縣。心存撫字。政尙寬平。獨遭賑乏。除虎驅蝗。表祀循良。歷有惠績。四年。兵事棘。御史大夫練安薦儼學。足以達天人之際。智足以資帷幄之籌。下吏部召儼。比至京。燕兵已渡江矣。太宗卽位。擇翰林官。吏部更薦儼。上曰。儼曉天文。宜令欽天監試送翰林供事。欽天監官言。儼果通象緯及風雲氣候。解繹又薦之。遂授翰林檢討。與縉等七人同直內閣。尋陞侍讀。儼每承顧問。應對從容。至論成敗得失之故。必反復明切。上爲傾聽。永樂二年。陞左諭德。兼侍讀。外艱去。詔奪情。道過南京。入見東宮。詢及民情。所對皆救時急務。儼持論少翹。諸同事人頗不能容。乃薦儼學。行堪爲師表。陞國子祭酒。出內閣。儼率以身教。士心翕然嚮慕。上幸太學。御彝倫堂。賜坐講經。上俯聽甚說。賜賚優厚。六年。薦修撰吳溥爲司業。八年。上北征。以祭酒兼侍講。掌翰林院事。輔導皇太孫監國。續密謹敕。上下無間言。洪熙元年。以疾乞休。賜璽書。加太子賓客致仕。復其子孫儼在國學二十餘年。敦尙思義。時諸生託故告歸者。法坐戍邊。儼申論得免。儼旣出內閣。雖不復預機務。諸大臣不自安。凡朝廷制作。修太祖實錄。永樂大典。天下圖志。皆推儼列總裁。歸田後。乞修白鹿書院。及春秋祀許遜。章丹。家食二十餘年。八十三卒。儼自處淡薄。衣食僅足。閒居。日與學者講求問學。方岳重臣。待以師禮。然終日言不及私。其處是非利害可否之間。審度情理。務求相安。羣倫中有不如意。卽引退不與辯。以故所至敬愛之。其資急朴諒。問學該博。凡天文地理。歷律醫卜。皆通其說。文章簡質。不事辭藻。晚年沈潛性理。充養益粹。言行慥慥。稱耆俊焉。

史官曰。胡儼端諒持正。頗好直言。嗟夫。三代之遺。莫行於叔季也。跡其平生。絕少奇策異能。而樸重無佻。習師道。臣道。兩盡之矣。噫。儼蓋急流中勇退人也。舊稱儼爲祭酒。太宗亦寵之。公卿莫不加嚴憚。士由太學出。卽至巍顯。無不執弟子禮。惟謹。可以知儼矣。

況鍾傳

況鍾。字伯律。靖安人。初以吏員事禮部尙書呂震。震薦其才。永樂十三年。授禮部主事。二十一年。陞郎中。初令五品以上京官得薦士。鍾薦右中允張宗連。上召問楊士奇曰。人皆薦下僚。鍾乃薦朕宮臣耶。對曰。臣與王直擬薦宗連。不意爲鍾所先。上喜曰。鍾能知宗連乎。卽日陞宗連大理寺丞。宣德五年。擇郡守九人。鍾知蘇州府。賜敕乘傳之任。初至郡。佯不解事。諸吏抱案環立判請。鍾顧左右問史吏所欲行止。輒聽吏。吏大喜。謂太守愚。越三日。召諸吏詰曰。某事宜行。若顧止我。某事宜止。若顧欲我行。縛諸吏拷掠投庭下。輒死者數人。諸吏又皆大懼。謂太守神明。鍾乃盡覈屬吏。斥貪墨者五人。庸懦者十餘人。八年夏。旱。旣發預備糧賑農。俾得盡力於田畝。復與周忱請究收糧法。由永樂間轉輸北京。餉道遼遠。糧長以一徵三。府二百七十萬石加徵至八百一十萬。除正供及餽軍船費。盡爲糧長乾沒。議別立頭同收受互覺察。除免舊徵三之一。以其二之一爲轉輸費。餘皆入濟農倉。爲來年經費。本是年馬草米數十萬石。及九年夏。稅折布絲數十萬斤。絹數十萬匹。小麥數十萬石。及雜出供費。並代以餘米。上無逋事。下無橫科。民大悅。每旱。又輒發此餘米賑活。輒數萬人。二十餘年積弊。不戮一人而盡除。民接遞。終歲在官。不得負販。鍾敝

丁差歲不過三日。盡罷其在官者。置綱運簿。防運夫侵盜。又置館夫簿。防非禮需索。綜理周密。簡約易行。大抵鍾爲官。專屬豪狡。拊善良。勢家恣犯法。立死杖下。吏民大驚。奉約束。寒門下士有行藝者。時時賑贍。諸儒生喜。爲流聲譽。爭獻詩頌美。有鄒亮者。獻詩。鍾稱賞。欲薦於朝。會有以匿名書數亮過失。揭府門者。鍾得書笑曰。彼欲沮吾薦。正速成亮名耳。遂奏亮才學可用。召試授吏刑二部司務。轉監察御史。正統元年。劾御史王連罪狀。法司論逮連罪。歲滿去。民叩闕乞留者八萬餘人。進鍾正三品。仍知蘇州。七年卒。罷市巷哭送其喪。競立祠祀之。鍾剛正奇偉。潔廉之操。一塵不滓。操履之固。千夫莫回。令行秋霜。靡暴弗馴。惠流時雨。靡悴弗煦。國初蘇州知府有王興宗者。與葉春及魏觀事。詳循良傳。

明書卷一百十九

列傳四

名臣傳四

金善、王英、儀智、鄒濟傳

金善，字幼孜，以字行，新淦人。建文元年，進士乙科，授戶科給事中。燕兵渡江，迎順。太宗卽位，入內閣，改檢討。數月，陞侍講。時翰林坊局官日講經史，東宮凡經義皆內閣閱，正呈上覽，已進講，繕閱書，士奇閱易，廣閱詩，幼孜闕春秋。上太子春秋，直指三卷。五年，陞右諭德，兼侍講。七年，扈巡北京。八年，從上征虜，上歷指所過山川，諭幼孜記之。登野狐嶺，曰：「至此看山盡在下矣。」至輿和，曰：「汝觀地勢，遠望似高，近卽漸平。」此陰山脊也。若因山爲塹，因壑爲池，守茲巖陰，雖鐵騎千羣，安能飛渡耶？次鳴鑾戍，曰：「此大伯顏山，其西北小伯顏山，東北卽開平，次環瓊圃，指塞北山川。」古交河在哈刺火州，兩河相交，水嚙沙出，唐碑尙在。次小甘泉，曰：「女直有山，其巔有水，色白，草木虎豹色皆如之，所謂長白山也。」至長清塞，曰：「此南望北斗矣。」經闊灤海，曰：「此周千餘里，幹難，臚胸凡七河注之，賜名玄冥池。」次通川甸，遙指海上石山，曰：「此卽三石山。」十一年，扈巡北京，從征虜。十二年，復從北征，陞翰林學士，兼諭德。十四年，還南京。明年，扈巡北京。十八年，進文

淵閣大學士兼翰林學士二十年。扈從北征。二十二年。復從征北。次開平。上曰。朕夢神人語朕。上帝好生者三。是何祥也。幼孜時聞軍中有詭言。因力請班師。上曰。善。立命草詔。還次清平鎮。宴羣臣。命內使歌高皇詞五章。曰。此先帝垂諭。敍創業守成之難。戒荒淫酣酗之失。朕嗣鴻業。惟恐失墜。尙相與勉之。遂廣五章。言奉天法祖。勤政恤民事。命內使歌之。榆木川之變。楊榮南討。幼孜留軍中譏喪。仁宗卽位。進戶部右侍郎。兼大學士。踰月。加太子少保。兼武英殿大學士。賜緇絇糾繆銀圖書。洪熙元年。陞禮部尙書。支三俸。當是時。法司論死罪多寃。上命臨決。必三大學士會讞奏。幼孜知律例。多平反。未幾。還省。母卒。宣宗卽位。起服中爲總裁官。修兩朝實錄。明年。持節出寧夏。冊慶府兩郡王妃。還。上封事。從上巡邊。度雞鳴山。上曰。唐太宗恃其英武。征遼常度此山。對曰。太宗尋悔是役。以故建閱忠閣。至宣府還。宣德六年。卒。贈少保。諡文靖。幼孜簡易沈默。溫裕有容。不肯伐善爭名。爲文和平寬綽。類其人。子昭伯。宣德二年進士。王英。字時彥。金谿人。永樂二年。進士。庶吉士。入翰林。未幾。召英及王直入內閣。書機宜奏疏。五年。授修撰。扈上北巡。十四年。進侍講。二十年。從征虜。至闊梁兒海。旋師至威虜。命碎李陵臺。驛令碑沈河中。絕虜爭。上顧英喜曰。秀才二十八人中。讀書者。朕需爾爲用。宜宣力勿憚勞。英因言虜遁。幸勿入險窮追。上笑曰。朕爲天下國家計。秀才直不欲黷武耳。又曰。凡軍中一切動靜。或謠言。有聞卽密奏朕。又顧內臣曰。秀才有事見朕。勿闌。駐安平鎮。軍中有怨言。上怒。英言。此皆壯士。幸宥其過。稍與恩澤。異日得其死力。上喜。立命兵部尙書李慶給餉及輜畜。二十二年。上崩榆林川。太子命英與諸大臣定喪禮。議國事。宿內閣。凡七

日。仁宗卽位。陞侍講學士。又陞右春坊大學士。兼故官。支兼俸。明年。乞省。歸朝。宣宗召入便殿。謂曰。洪武中。學士有宋濂。吳沈。朱善。劉三吾。永樂初。解縉。胡廣皆有名。汝英慎自勉。五年。陞少詹事。兼侍讀學士。七年。內艱。起復。英宗卽位。充史館總裁。講官。陞禮部右侍郎。兼侍講學士。正統八年。出理部事。領日講。十一年。引年。不允。十三年。陞南京禮部尙書。景泰元年。卒。諡文安。英與修文。仁宣三朝實錄。文章典贍。尤善草書。寬弘樂易。豪俊豁達。不屑曲檢。顧直諒好規人過。以故三楊皆不喜。卒不得大用。人多惜之。

儀智。高密人。洪武中。薦爲教官。知高郵州。高郵人皆愛之。曰。知州長者。陞知寶慶府。寶慶人健悍。又畏敬之。曰。太守不可犯。永樂二年。選東宮官。陞通政。兼右中允。未幾。陞湖廣布政使。三年。入爲禮部侍郎。十一年。元旦日食。禮尙書請賀如常。智獨爭議不可。未幾。上令吏部翰林院擇一老儒侍太孫。明日。太子召問得人未。蹇義。楊士奇薦智。又曰。人鮮知智者。以故議未決。太子曰。吾常舉李繼鼎大誤。悔無及。如智誠端士。然老矣。楊士奇稱智起家學官。明理守正。精神未衰。廷臣中老成正大。無踰智者。是日午朝。上顧太子。問曰。侍太孫講。讀得人未。太子應曰。舉禮部侍郎儀智。議上未決。上喜曰。得人得人。智雖老。能直言。元旦日食。智執議免賀。智可用。智寬平嚴正。務持大體。尙忠厚。遇事是非。又輒別白。爲太孫陳說。不屑附會。年八十致仕。卒。贈太子少師。諡文簡。子銘。字子新。學於吳訥。天性易直。孝友。舉經明行修。洪熙時。爲行在禮科給事中。內府校書。改編修。陞侍講。正統中。爲邸王長史。景帝初。陞南京禮部侍郎。以立懷獻太子故。加太子太保。未幾。爲兵部尙書。尋掌詹事府事。卒。贈太師。諡忠襄。

鄒濟字汝舟其先嘉興人徙餘杭洪武十五年舉通經儒士授餘杭訓導累官平度知州濟博學修行能文章樂易無崖岸兼通老釋太宗卽位大臣薦修太祖實錄成永樂元年陞禮部郎中已而修永樂大典諸儒臣推濟總裁征安南濟參贊大將軍軍事草獻俘露布八年陞廣東參政十年坐事改考功郎中仁宗留守南京擇宮寮改右庶子進少詹事當是時宮寮多得罪徐善述王如玉馬京梁潛周冕相繼下獄死濟幾陷死地者數矣竟積憂懼成疾東宮憐之書問曰卿善自攝卽不諱卿苗裔余爲提攜不使墜入蓬蒿濟尋卒後仁宗悼念舊學贈太子少保諡文敏建祠令有司春秋祀子幹仁宗監國時遣入應天學給米月二石正統四年進士歷官太子少保禮部尙書致仕年八十四卒贈太子太保諡康靖善述天台人爲左司直郎陞右贊善耿介恬靖汝玉長洲人仕贊善兼檢討坐戍邊東宮特宥之以累下獄死汝玉聰敏過人文章精粹洪熙初贈太子賓客諡文靖善述太子少保諡文肅京武功人洪武十八年進士靖厚端方累官北京刑部侍郎兼宮寮謫戍廣西已而有薦京者竟坐前事下詔獄死洪熙初贈少傅諡文簡潛太和人洪武二十九年鄉舉歷訓導知縣太宗卽位召修實錄成陞修撰尋兼贊善永樂十五年以廷臣薦副楊士奇輔太子監國坐事被讒與周冕并逮詔獄卒妻楊氏隨潛北京潛卒慟毀不食亦卒潛闡爽弘毅通諸經尤長於詩易爲文章務去陳言出新意冕寧波人爲右司諫

史官曰文帝雄武蓋世願喜與文士周旋雖行間左右無學士則不樂金幼孜王英皆以縫掖負羈勒以從者也天子幸邊儒臣載筆登陰山春碎李陵碑南望北斗與銘燕然封狼居胥者同雄心矣儀智鄒濟

皆以宿儒爲宮寮。智老而傳太孫。故獲免。濟傳太子幾得罪。竟以憂死。一時宮臣周冕、梁潛輩皆不免焉。豈博望神策實啓嫌疑。抑社稷牧圉。居者不如行者之無罪歟。

宋禮附金純周長蘭芳傳

宋禮字大本。永寧人。洪武中太學生。爲山西按察僉事。坐事左遷戶部主事。謫戍寧夏。建文初。薦授陝西僉事。辛巳。又坐事除刑部員外郎。太宗卽位。命署禮部事。俄陞禮部右侍郎。逾月。轉左。永樂二年。進工部尙書。時營北京宮殿。命取財川蜀。七年。奪憂。伐山通道。深入險阻。時下勅嘉勞之。九年。治漕河。已。又入蜀。十二年。九載考績。十六年。來朝。又入蜀。是歲。理獄江西。十七年。又入蜀。是年病。召還京。理部事。造番舟。十九年。造黃舟。是年。又入蜀。禮初治漕河於濟寧。與侍郎金純。都督周長。修復會通河。置十五閘。用濟寧同知潘叔正策。役夫三十萬。工十旬。蠲租一百十萬石。浚黃河故道。用侍郎張信圖策。與興安伯徐享侍郎。蔣廷瓚。自祥符魚王口。至中灤。下二十餘里。殺水勢。河成。賞功。禮居第一。長以徇私虐人。不得賞。又於寧陽築隄成壩。遏汶水。盡入漕河。用御史許堪策。疏洩衛河。至海豐。大古河入。凡四百五十七里。役夫三千。工一旬。自是挽漕京師。能海運。禮功最大。卒之日。家無餘資。洪熙元年。賜葬祭。正德七年。賜祠。祀會通河上。禮剛果直下。有經濟才。馭下稍嚴。以故事亦易集。金純。泗州人。洪武中太學生。爲文選郎中。出爲江西參政。召爲刑部侍郎。扈駕北征。歷禮工刑三部尙書。太子賓客。所至有政績。淮泗間治水功最著。卒贈山

陽伯純寬和有容。吏事幹敏。宣德三年夏。暑初。法司疏獄。純數會客宴飲。言官論純淹囚。領繫錦衣獄。上念純老臣。與致仕去。純在刑部。仁宗常諭純及臺寺劉觀。虞謙曰。法司尙羅織。言及國事。輒論誹謗。甚無謂。自今諸告誹謗者。悉勿治。又常曰。朕或嫉惡過甚。處法失中。卿等須執正。周長。天長人。有膂力。善騎射。從燕兵白溝。東昌。藁城戰有功。歷官督府。治漕河。卒贈萊陽伯。諡忠毅。又有蘭芳者。夏縣人。讀書通古今。洪武中。舉孝廉。爲刑部郎官。知吉安府。有惠政。民思之。坐事謫。爲辦事吏。從治河濟寧。復爲工部主事。永樂十年。以禮薦陞工部右侍郎。清潔無私。

史官曰。大廈之成。非一木之任也。天下之大。非一士之智也。宋禮修復會通。浚黃河故道。遏汶入河。爲漕輓百世利。歲運四百萬石。無航海之勞。厥功懋矣。然皆任用羣策。而已受其成。智豈可專耶。故知繇績勿成。敗由圯族。禹功告錫。益在昌言。禮之用智大矣。

郁新傳

郁新。臨淮人。洪武二十二年進士。除戶部度支主事。賜名新。明年陞北平戶部郎中。又明年。超授戶部右侍郎。考滿。上廷中對羣臣稱新才。陞尙書。在戶部者凡十三年。綜理甚密。而取民有節。上嘗問天下戶口田賦。地里險易計數。新應機嚮答。無遺謬。時親王歲祿米五萬石。他賜物又萬石。新議定歲一萬石。并定郡王將軍中尉主君祿。建文中。調兵食各有勞績。太宗即位。復戶部尙書。永樂元年。言淮河間漕多淺灘。跌坡阻運舟。請自淮安用船可載三百石以上者。運入淮河。沙河至陳州潁溪口。跌坡下。復以淺船可載

二百石以上者。運至跌坡上。別以大船載入河。至八柳樹諸處。令河南車夫陸運至衛輝。入衛河。輸北京。二年。上屯田賞罰例。三年。卒。上顧解縉等歎息。稱新才。新理邦賦。能會計量出。今誰可代新者。嗟不已。新篤實有禮。家素餘財。慷慨豪舉。喜賓客。樂賑施。

史官曰。闕

段民傳

段民。字時舉。武進人。永樂二年。進士。選庶吉士。與修永樂大典。除刑部主事。又與修五經四書性理大全。累進郎中。永樂十八年。妖賊唐養兒反山東。十九年冬。陞山東左參政。討平之。廷議擇守臣。當是時。素養兒急。盡逮山東直隸尼。既又盡逮天下出家婦女。先後幾萬人。民撫定綏緝。曲爲解釋。人情始安。太宗再駕征北虜。勅民轉餉舟自濟寧至通州。俄又令陞轉居庸關出塞。民節約曲算。省財力。民不擾事業。道中忽降勅。令民與巡按御史。考所過郡縣吏。宣德二年。召考會試禮部。三年。召入爲戶部右侍郎。滿剌姦垢。出納清允。尋改刑部。特賜救民廉介端謹。令考察在京百司。先是榜例。越訴者杖百。謫戍邊。民請罪如律。九年。卒。官貧不能喪。吳訥爲經紀。始克殮。成化間。葉盛請褒。不果。民好古力學。精練吏事。廉平勁直。人莫敢干以私。

史官曰。闕

錢幹附羅傳

錢幹初字習禮。名幹。以字行。吉水人。才敏力學。永樂六年。鄉貢上禮部。七年。會試中甲科。時上北征。又明年。辛卯。始舉進士。入翰林爲庶吉士。除檢討。上喜幹之鄉人惡幹者。持幹短長。幹行潔修。無可摘。乃指爲練子甯姻。宜坐姦黨。劫幹。幹懼。告楊榮。楊榮間聞上曰。習禮有文學史才。願陛下憐察。上欣然曰。使練子甯尚在朕且用之。況習禮乎。幹感泣自奮勵。仁宗卽位。陞翰林侍讀。知制誥。宣德初。與修兩朝實錄。四年十二月朔。霜寒。上顧光祿卿文官早朝寒。盍賜羊酒。又顧幹曰。皇祖考臨朝。每旦常賜食。朕偶忘。習禮謹識之。五年。陞侍讀學士。七年。上過史館。示近臣招隱歌。幹頓首曰。皇上聖性聰明。文章清麗。懷賢覽古。天趣悠然。上喜。正統初。與修宣宗實錄。三年。陞學士。七年。以故鴻臚寺爲翰林院。落成諸殿。大學士皆至。幹不設楊士奇。楊榮座。問之。應曰。此非三公府也。二楊聞上。上命工部具座。禮部敍位次。二楊始自內閣。出坐諸學士上。九年。乞致仕。不許。十年。上特用爲禮部右侍郎。或賀幹者。答曰。吾今且爲有司。又奚賀爲。未幾。陳循高穀等皆得陞侍郎。入內閣。公尋兼署吏部。稱疾辭。致仕。幹孝友。忠信。篤於倫誼。厚生送死。推財賑贍。好古秉禮。動有矩則。文章議論。士類宗仰。歸山十五年。年八十九。卒。諡文肅。南城有羅坵。成化二十三年。進士。爲翰林編修。時武崗知州劉遜忤岷王被逮。給事中龐泮等以救遜下詔獄。坵上疏救。主事李夢陽論外戚收拷。又疏救太監李廣死。言官劾文武大臣附廣者。請按廣籍斥逐。坵言不可。暴其名。羞朝廷。宜令諸大臣自陳。或坐他事黜便。正德中。歷陞南京吏部侍郎。上大本急務。疏言逆瑾逐榮王。虛朝廷。上未有子。諸大臣依違不肯爲國家遠慮。忤時宰。致仕去。潛心學問。文益奇偉宏暢。甯庶人致百金壽。

紀走避深山中。李東陽處瑾、永間。曰調護善類。犯引大義責之。願削門人之籍。卒贈禮部尚書。諡文肅。史官曰。闕。

胡廣、胡濙傳

胡廣字光大廬陵人。父子珙。洪武三年爲御史。疏請遷都關中。已而出爲按察僉事。調知彭州。陞延平知府。率建文二年。燕兵起。廣對制。有曰親藩陸梁。人心不搖。建文君喜。擢進士第一。更名靖。爲翰林修撰。太宗即位。召入內閣。陞侍講。復名廣。改侍讀。陞右庶子。永樂五年。進翰林學士。兼左春坊大學士。勅吏部廣等侍朕日久。繼今考滿。勿改外任。十二年十一月。命廣及楊榮、金幼孜纂修五經四書性理大全。明年九月。書成。進文淵閣大學士。兼坊學。再從上出塞征虜。上時召帳殿語移時。或夜漏數刻遣出。道中相失。必急遣兵騎四出尋諸學士。時時顧左右問諸學士來未。廣不知兵。以文墨論議侍上。備顧問。上不得諸學士相與語。不悅也。廣敦質簡重。持大體。存心愛人。上諒其樸厚。信任亞於楊榮。禁廷應對。慎密不洩。操履清謹。廣退輒杜門讀書賦詩。寡交遊。崇儉素。爲文下筆滔滔。制命典冊。多出其手。禮部胡中周訥請封禪。廣力言封禪非禮。上斥訥言。廣因上卻封禪頌。奔母喪。還朝。上問民間疾苦。頓首對曰。百姓頗安給。惟有司窮治建文時姦黨。枝附拔連坐。誣善良甚苦。上立命罷追詰者。人或毀廣。上不信。或遽斥去毀者。廣善書。行草尤善。十六年卒。贈禮部尚書。諡文穆。已而上念廣官其子翰林檢討。仁宗加贈少師。楊士奇曰。我朝文臣有諡。自姚廣孝及公始。然建文時常諡王禕文節。

胡濙字源潔武進人。建文二年進士。爲兵科給事中。永樂元年。陞戶科都給事中。時或傳建文皇帝崩。或云。遞去。諸舊臣多從建文去者。上益疑。大戮建文諸臣。遣濙巡天下。名訪張儼。儼又頒書名徧行郡縣。察人心。及建文安在。時又傳建文在滇南。濙以故在楚湖南最久。十四年。內艱起。復爲禮部右侍郎。明年。巡浙江。二十一年。巡均襄還朝。會上駐宣府。濙馳夜上謁。上已就寢。聞濙至。被衣急起。召入勞濙。賜坐與語。濙言不足慮也。先濙未至。傳言建文蹈海去。上分遣內臣鄭和數輩浮海下西洋。至是。上疑始釋。太子監國。藩王謀奪適。造飛語。上命濙往察。密疏聞。具述監國七事。言太子誠敬孝謹。無他。仁宗即位。轉太子賓客。兼祭酒。南京未幾。閱宮中密疏。見所述七事。大喜。謂濙忠憤。朕不及知也。俄崩。宣宗即位。復召爲禮部侍郎。兼太子賓客。會濙來朝。留在禮部。宣德元年。進尙書。二年。賜第給閫使。三年。賜文恭世家。清和恭靖二銀章。是秋。扈駕出會州。明年夏。再扈巡邊。沒常州豪人田宅。盡賜濙。尋兼詹事。六年。兼領行在戶部事。濙有才猷。深厚不洩。禮典財賦。經畫有章。國家大議。與諸執政相可否。必執正論。上嘗曲宴濙。及楊士奇。蹇夏曰。濙內無虞。四卿力也。英宗卽位。益禮敬之。元年。失行在禮部印。自劾。上不問。改給行禮部印。九年。疏引年不允。十四年。北征。留守京師。廷議迎上皇。時王文厲色曰。執謂敵可和。彼不索金帛。且索土地。憂方大耳。衆相顧不敢言。于謙徐曰。防變方略。我與總戎責也。俄旅退。賴濙有定執。竟上奉迎儀注。景泰元年。楊善使虜。濙言上皇蒙塵已久。宜卽附善等進上服食。不報。又請明年正旦朝上皇於延安門。不許。二年。災異。乞歸不允。三年。以太子太傅加少傅。懷獻太子立。進兼太子太師。是年十一月己巳。上皇萬壽。

澗乞令百官拜賀於延安門，不許。六月，疾作。又明年，上皇卽位，力疾入，一見，請老去。遣子長甯來謝，上念澗疏屢請，令百官朝廷安門，忠悃授長甯官錦衣世鎮撫。卒年八十九，諡忠安。澗平易寬和，廉靖寡慾，自奉薄簡，與居有常。立朝幾六十年，十知禮部貢舉，未嘗疾言遽色，人皆知爲君子長者。

史官曰：文皇雄猜驚忍，大臣小失意卽頽繫，雖蹇楊不免焉。而胡廣以謹身慎密，出入侍從數十年，持文墨，備顧問，卒鮮過舉。胡澗尤荷心膂之寄，周奚諮詢於父子君臣間，調護甚厚，歷事四朝，典禮文章較然可述。此豈不對省樹，執策數馬之流歟？詩云：小心翼翼，天子是若。二臣有焉。

楊信民傳

楊信民，新昌人。永樂中舉人。宣德間，擢工科給事中。正統間，陞廣東左參議，嘗劾罷按察使，被逮至京。廣中數千人走萬里詣闕，疏伸信民公勤廉能，乞留以安百姓，得復職。適南海盜起，陞僉都御史，守其地。信民宣布恩威，獎勵士卒，屢戰屢捷，撫歸數萬人。景泰元年卒於官。廣人手香燈弔哭者幾萬人。錄其子琬爲太學生。廣耆民又相率走京乞立祠祀，著祀典。成化中，諡恭惠。

史官曰：闕

顧佐、軒輓、魯穆、熊繡、邵清

附師蓬、向瑤、周新、潘禮、胡拱辰、王琦、李椅、朱裳、孫需、陶瑛、薛遠

顧佐，太康人。建文二年進士，爲莊浪知縣，拜御史，巡廣西，採木四川，防守邊隘。陞陝西按察副使，再陞應

天府尹尋以營建冗棘。改順天。佐歷兩京尹。剛稜不撓。貴戚斂戢。永樂十九年。貴州有夷警。改貴州按察使。蓋以勦戚家不利。佐以故相排擿去。仁宗素知佐廉健。召爲通政使。宣德二年。臣寮奢縱。御史多淫貪。不法。都御史劉觀被斥。上問楊士奇。楊榮。廷臣孰可掌憲者。二人未卽對。上曰。未必乏人至此。楊士奇言。通政使顧佐歷內外臺。有風采。楊榮亦言。佐尹京。威廉。上喜曰。佐乃能如此。擢右副都御史。與壘書曰。都察院朝廷耳目。國家綱紀。用得其人。則庶政清平。羣僚警肅。否則百職怠弛。小人橫恣。近年在京諸司。姦弊紛出。司風憲者不能糾舉。且與下同。國何賴焉。爾佐剛直廉正。簡在朕心。特畀斯佐。其竭誠盡力。恪恭夙夜。毋憚勤勞。彈劾愆謬。毋避權要。毋枉良善。毋縱姦宄。各道御史。卽宜審擇。凡廉勤公正。老成醇厚者。留用。不達政體。貪淫無恥。及曾犯贓罪者。送吏部降黜。公差給假。丁憂者亦如之。御史缺。行吏部慎選。不得濫授。欽哉。遂考核御史貪淫不律。嚴暉等二十人。謫吏遼東。不達政體。李孟宣等九人。降典史。老疾馮斌等三人爲民。五年。暉潛入京。造詞脅人。佐又劾暉蹤跡詭秘。且欲殺臣。上誅暉西市。陞右都御史。姦吏犯科者。摺奏。佐受隸金私遣歸。上以佐臺端。不欲發其過。密示楊士奇。且曰。爾不舉佐廉乎。士奇閱奏。謝曰。事有之。顧中朝官祿薄。僕馬薪芻。或資之隸。遣隸。隸得歸耕。官得資費。中朝官皆然。臣亦然。蓋自永樂至於今。先帝固知之。以故增中朝官俸。上怒曰。朕方擇佐用。小人輒誣佐。必下法司法。對曰。未事不足干上怒。請付佐治。恩法並行矣。上召佐授吏狀。且諭曰。此不足爲卿累。小人不樂卿檢制。敢誣正人。汝自治之。佐頓首謝。佐呼吏至。言上命我治汝。汝宜改行。吾且貸汝。上聞之益喜。數月。又有囚告佐。佐淹不理。上

又怒召士奇論曰。此必死囚教之欲中佐立命三法司會鞠。實出千戶臧清。清殺無罪家三人。妻當死。繫獄。上曰。不誅清。佐安能行法。立命磔清西市。正統二年。佐請老家居十餘年卒。佐性嚴重。守正嫉邪。人知敬憚。以故竟擠之去。先是有師達者。東阿人。太宗北巡。常問太子。南京羣臣孰廉。太子對曰。皆廉。上曰。從朕北來者。率好貨。惟吏部侍郎師達一人廉耳。達起太學生。歷御史按察使。堅貞有風裁。永樂元年。陞兵部右侍郎。改吏部。領行在兵部事。征敵總軍餉。陞南京戶部尚書。兼領吏部。達孝行絕。至操履端潔。又有進賢向瑤。洪武十八年進士。歷職方員外郎。九年滿。陞通政使。不能言對。自陳。改應天尹。建文中。坐累謫廣西。永樂元年。復府尹。坐繫獄數年。左遷運司判官。仁宗知其廉直。召爲副都御史。兼詹事。宣德初。蒞南臺致仕。瑤有文學。履經窮阨。介節不渝。蔬食水飲。布衣泊如也。

軒輓。字惟行。鹿邑人。永樂二十二年進士。督漕淮上。嚴冬忽墮水。援出裹被。有司急進衣。卻去。竟俟舊衣。乾。除行人司副。陞監察御史。正統元年。與御史十六人出清理軍政。清修苦節。嚴明不苛。人畏服之。陞浙江按察使。四時一布袍。蔬食不厭。約諸僚。三日出俸易肉一斤。故舊經過。輒留飯。惟一肉。或致傷雞。見者皆驚異。軒廉使殺雞爲客。大破費。遭喪卽行。僚屬尙未及知。時守浙監丞阮隨。亦清謹安靖。與輓善。輓旣去。陳璇代。亦清嚴。浙臬稱治。景泰四年。起爲副都御史。巡撫浙江。改入南臺。內艱。天順初。首用輓爲刑部尚書。耿九疇爲右都御史。二人廉介有名。海內信向未幾。九疇欲去石亨。不果。反爲亨逐。輓亦病請致仕。上召輓至文華殿。面諭留視。輓疾不可強。與致仕。及陸辭。上復問之曰。昔浙江廉使考滿歸家。僅二籠。是

汝乎。輒頓首謝。又問卿年未老。病愈。再可用乎。輒又頓首辭疾。上賜金爲道路費。輒去。上復思之。召爲左都御史。督南京糧儲。輒嚴毅。歲時詣禮部拜表慶賀。屏居一室。撤燭朝服端坐。寂無一言。鼓嚴出行。禮畢。竟御肩輿歸。僚儕聞其來。輒避去。不樂與之處。南武庫郎沈琛常言。留都大臣。惟輒及魏驥。廉平峻偉。不務文飾。間令吏寫公牘數十冊。卒後。修史有司。從其家取行實。無有也。輒前有南海周新者。永樂中爲浙江按察司。廉梗有威。爲錦衣紀綱。中傷死。仁宗每悼惜之。人稱新爲冷面寒鐵公。

魯穆。字希文。天台人。永樂元年進士。爲監察御史。仁宗監國時。列上漢庶人不法罪狀。留中。陞福建按察僉事。雪冤濫懲貪墨。擢豪強泉州人。有李姓者。妻吳美。舊與富姻。林私李調官廣西。林令二僕從李。行殺李道中。並殺其姪。吳竟適林。李宗人訴之。郡得賂。反坐李宗人誣。又訴按察司。司得賂如郡。十餘年未決。穆故廉得蹤跡甚詳。一訊林卽服。漳富人周允文初無子。後兄子已過嗣。而妾有子。與兄子費三之一。託以己子。周死。兄子言妾子非周子。逐去。盡奪其貲。穆大召縣中父老及周宗人詢之。皆曰。妾子本周種也。兄子始服罪。其斷讞多類此。超陞僉都御史。召入臺。正統七年。巡視應天。穆幼舉動異常兒。稍長。攻苦食淡。力學博經史。常大書座右。咬得菜根。百事可做。比入官。請寄不行。問遺並絕。歷官中外三十餘年。家無餘資。歿不能殮。公卿贈賻。僅足棺衾。

熊繡。字汝明。道州人。成化二年進士。爲御史。坐事謫清溪知縣。累官都御史。巡撫延綏。操勵潔廉。饋廩有羨。不入私室。在鎮西。寇三年不窺邊。人以爲韓。范復出。憂去。起拜兵部侍郎。陞兩廣右都御史。逾年。召入

南臺。正德三年。中官李榮忽傳旨熊繡致仕。繡屏居山中。斷絕書問。生事蕭條。俯仰益困。卒。長子已天。繼子又夭。巡撫秦金爲請於朝。贈南刑部尙書。明年。太僕少卿何孟春上疏曰。竊見故都御史熊繡。事母能孝。事兄能友。居貴能貧。居常能儉。別歷中外四十餘年。守法徇公。推賢嫉惡。不邀時譽。不狃近功。言無爽於屬垣。行無虧於顧影。往年都御史戴珊。張敷華。卒其門生屬吏子孫。咸請易名。主事張鳳翔。孔琦。卒。鄉人請卹其家。聖朝表勸清賢。不吝恩濡。繡才節操履。無讓珊等。賜諡卹寡。惟宸衷軫允。幸甚。詔繡繼給子。子端。米月一石。諡莊簡。時有工部侍郎潘禮。歸德人。清廉恬退。未老乞休。弘治間。八十一。巡撫韓邦問疏言。禮歷官居鄉。益堅晚節。草廬蔬食。不求安飽。詔給月米三石。南工部尙書胡拱辰。淳安人。著勞績。晚益清謹。弘治間。御史上其貧薄。特給與廩。正德初。遣行人存問。年九十二卒。贈太子少傅。諡莊懿。邦問亦仕。至尙書致仕。年九十卒。仁和有王琦。字文進。舉人乙榜。授汝州學正。陞御史。山西僉事。提學。改四川。乞致仕歸。清介自持。不治生產。冬大雪。僵臥不能出門戶。或唁之曰。吾求無愧於心耳。雖饑寒無不樂也。天順間。竟以饑寒卒。臨潼李崱。字世瞻。篤實莊重。雖祁寒暑雨。手不釋卷。成化六年。進士。歷知廬州府。陞河南參政。清慎絕俗。吏事克修。卒之日。貧不能葬。妻郝不免饑寒。守臣爲奏上。得給米終其身。沙河朱裳。字公垂。正德九年進士。少勵清節。貧困裕如也。提學御史顧潛知裳。檄府資裳學京師。裳不受。躬自炊爨。爲御史。寒約如故。巡按山西。山東。有風采。人稱裳爲長齋御史。出爲鞏昌知府。歷浙江副使。福建按察使。浙江布政使。副都御史。治河乞歸。再起裳治河。卒。清堅自信。士頌其廉。民懷其惠。饒州孫需。字宇吉。成化八年

進士。歷官南京吏部尙書。守法畏公議。白首清風。嶢然不滓。雖不能發揚功名。有赫赫之譽。顧正德間大臣多掎克回過。需獨以廉約稱。卒贈太子太保。諡清簡。絳人陶琰。字廷信。成化十七年進士。歷仕至都御史。三理漕事。嘉靖初。爲工部尙書。授南軍兵部尙書。參贊機務。乞致仕。加太子太保歸。琰宏才偉度。累試繁劇。恤國勤民。動著聲績。中忤權倖。屢進屢退。方毅直亮。喜慍不形。自奉儉節。每飯一蔬。徵行罷歸。蕭然行李。三竹筒相隨者數十年。卒年八十四。贈少保。諡恭介。子滋。正德九年進士。爲武選郎中。論大禮。謫戍薛遠。原籍無爲州人。祖祥。佐太祖有開國功。歷陞工部尙書。以怨言閒下獄死。家徙瓊。遠遂爲瓊州人。以進士授戶部主事。天順初。使交南還。陞右侍郎。母憂去。起復爲工部侍郎。治河河南。尋鑿揚州河四十里。成化初。兵討兩廣叛獠。改戶部。調兵食。諭衆能破賊者。卽有其輜重。人人奮勇。師至大藤峽。賊平。陞左侍郎。三年。進尙書。總督京儲。六年。行視漕河。十三年。致仕。又明年。起爲兵部尙書。參贊軍務。十六年。致仕。弘治八年。卒。年八十三。遠於禮樂兵刑。天官律歷。無不涉獵。尤熟國朝典故。在戶部最久。文移奏劄。悉出其手。改定戶部事例。芟繁正訛。均積委節。內外遠近。多寡輕重。咸有品式。會校出納。吏胥拱手。時中外競陳利害。始一人以爲可行而行。又一人以爲可罷而罷。公一切弗聽。居官四十年。家無長物。食無兼味。室無媵妾。曰。吾少事親恆不足。今安忍有餘。

邵清。字士廉。江甯人。甫三歲。母疾革。置之別室。哭不已。謂家人曰。死者吾母也。曷俾我一視。聞者哀之。爲弟子員。卽以文行爲當路所推許。屬頒制諸郡。應天尹冀綺欲以此贍之。擇維揚運司委焉。辭不往。弘治

壬子領鄉薦。明年授江西德化學諭。正己率人流俗。問遺無敢及門者。乙卯秋。主山東試。去取咸自主。事竣。就道。有謁贊者。拒不受。滿九載。留於家。督學邵寶。巡撫林俊。累疏薦之。吏部移文趣行。十月。詣部試。第一。吏尙書馬文升。都御史戴珊。廉其賢。授監察御史。委督蘆溝抽分。痛革宿弊。姦無所容。近侍蕭敬。陳寬。託院堂相囑。不少貸。正德改元。以清督息禁諸役。原額百名。外院長及年深御史用之。清悉核以應役。戚畹張延齡。奏人負券若干緡。得旨追給。清曰。御史執法之官。豈爲人索私負者耶。駮馬崔元。都御史張敷。華威以爲囑。清不從。隨進二疏。一崇大信以全國體。二停織造。以清鹽法。所論劾皆中。貴人下戶部議行之。七月。按鹽長蘆。兼理河道。清核餘鹽。革買補。恤竈丁。禁應捕。勢豪鹽商。虞廩重足立。貪吏多棄印綬去。自天津抵濟寧。一路夫力。清壹意節縮。逮諸姦豪。倚威宦爲窟者。論如律。權倖及中人多不利。於是闔馬永成家。僮及諸賈人。合謀妄奏。闕瑾因遣官校逮清。榜於午門外。家人泣。清慰之曰。我非自敗名節。以辱先人至此。況得失在我。何哭爲。抵家杜門屏居。灌蔬課子而已。瑾怒未釋。撫清所陳。停布匹。疏罰米一百石。及保舉都御史雍太。罰米二百石。瑾伏誅。都御史李克嗣。巡按王完交薦。嘉靖二年癸未。起陞雲南僉事。至任。適巡撫王啓惡。臨安推官江魚。嗾千戶龔勝。鰓魚欲坐以貪淫黷之。清知其誣。擬以公罪還職。啓大不悅。後巡歷新建諸寨。繕兵旅。修城垣。來商賈。疏溝洫。爲久遠計。滇南多珍奇。所入廩祿柴薪而已。比齋賀詣京。行李圖書之外。無一長物。事竣。回滇。分巡洱海。會參議趙淵。往勘武定土官。約敕甚嚴。下至胥吏輿臺。一無所染。夷人悅服。後以觀察當調。聞報卽南。家居逾時。桂萼重其名。檄取赴京。以疾辭。八年己

丑。又徵補廣西。至巡桂林。後改左江。兵備忠州。龍州土官罪惡日甚。清不動一兵而坐擒之。疆圉晏然。巡撫以其清苦之節。明敏之才。方倚重之。而清倦游。上書兩乞休。得請歸。無室廬。係外氏以居。日中或未舉火。意豁如也。督學御史林有孚往訪之。笑語移時。貧無著具。可設。林歎息而去。禮尙書霍韜以沒官田餽之力。卻不受。二十五年丙午秋。卒。年八十。陳鳳贊曰。嗟嗟介士。邦之司直。可賤可貴。篋篋必飭。萬里來歸。葆茲固窮。蕭然素業。邈矣高風。

史官曰。傳曰。無欲實難。故既富方毅。明主下以苦節概天下。幸而有其人。則褒異寵卹之者無不至。凡以磨鈍而去貪也。如賜顧佐之蠶書。識軒輓之竹籠。周熊繡之孤。給潘禮。胡拱辰之與廩。使人皆豔其名而愛其鼎。若夫介性天植。嚼然不滓。如王琦之僵臥冬雪。曰。吾求無愧於心。雖饑寒無不樂。薛遠之言曰。吾少事親恆不足。今安忍有餘。斯其人豈以名實毀譽動其心哉。蕭然素業。邈矣高風。雖爲之執鞭。所欣慕焉。

劉實傳

劉實。字嘉秀。安福人。宣德五年進士。改庶吉士。未常投足權門。自陳才薄。親老。乞教職。會有詔汰庶官累千人。實意且得教職。竟爲同知金華。在金華三年。不以妻子隨。不與流輩伍。廉操直節。綽有聲稱。金華早賦。通叢積。催科急。民或鬻子女。實疏得免。又贖還其子女。公餘輒探閱經史。卽視事掩卷已。則復然。羣僚或竊笑。不爲改。郡有孝子顏宗。忠簡呂東萊祠墓。爲之修葺。鄭義門合爨久不能給。又買馬出力給傳山。

西爲疏乞免役。擢順天府治中。景泰中。召修元史。筆削任心。無所吝。屈遜見他人書不合。己竟輒大笑。聲徹閣陛間。聞者驚愕。相戒勿以藁示實。尋擢南雄知府。南雄當嶺南孔道。商稅鉅萬。知南雄者輒盈壓。推其餘餽。過客得其歡心。且爲游聲譽。實至存稅十一。繕郡學。補張九齡大庾嶺松。不肯私一錢。未數月。中官使嶺外。至南雄。意得重賄。不得。苛辱之。郡人擁之竟出。中官去。至韶。韶人爲言南雄守廉。且驛言中官橫索賄辱太守事。中官懼。急傳馬馳奏實。抗敕使毀敕。大不敬。詔逮至京下獄。獄中上書言。臣蒙恩仕官三十年。不以妻子自隨。餐粗衣敝。欲爲國家養愛小民。不忍勞費。以是觸忤天使。無所逃罪。上不復更窮治。不數日。竟卒獄中。實喜著書。尤長於春秋。中夜有得。蹴童子燃燈起書。如獲至寶。生平清強。甘心貧窶。與古廉吏范丹。李及無異。彭時稱其躬過人之操履。立絕俗之儀矩。利誘不回。勢惕不沮。

史官曰。闕

明書卷一百二十

列傳四

名臣傳五

高穀王直林聰傳

高穀字世用。興化人。永樂十三年進士。改翰林庶吉士。授中書舍人。二十二年改春坊司直郎。洪熙初爲翰林侍講。正統元年。楊士奇薦穀學術醇正。充講官。修實錄。五年陞侍講學士。十年入內閣。陞工部右侍郎。兼前職。十四年。上北征。曹鼐從行。穀居守。景泰初。進工部尙書。兼翰林學士。是年敵數請使迎上。皇侵我上谷雲中急。廷議相顧忌不能決。中書舍人趙榮毅然獨請往。穀壯榮。解金帶贈榮曰。子忠義人也。上皇將至京。穀言奉迎禮宜厚。會有千戶龔遂榮投匿名書。穀所。穀袖入朝。傳示羣公卿。羣公卿不敢出一言。言官疏聞。上不喜。詰匿名書從何所得。穀曰。得自臣所。遂榮恐累穀。自縛闕下。下詔獄。上亦不深罪。遂榮也。二年。進少保。東閣大學士。明年廢東宮爲沂王。而立懷獻爲太子。穀悲憤不爭。加太子太傅。穀亦不辭。是時內閣不相能。穀上疏言內外諸司。惟賢是用。況經筵日講。關係聖德。尤在得人。遂薦大理少卿陳詢。侍講楊鼎。充日講官。左都御史王文。大理寺卿蕭維禎。庶子王詢。入內閣。上令詢鼎侍經筵。文遂得入

內閣。文旣入內閣。又輒與穀相擠。五年。救穀視南畿災。尋還朝。力救都給事中林聰不死。七年。少保爲謹身殿大學士。是年首輔陳循及王文。皆以子不得舉。訐順天考試官劉儼。上令穀覆試。穀曰。貴冑與寒峻爭進。已不可。況從而爲之辭。奏斥林廷一人。事遂已。英宗復辟。內閣諸臣皆流放竄殛。惟穀以忠謹故。英宗曰。穀在內閣。每議迎駕及南內事。輒左右朕。穀無他腸。可致仕。旣歸田。杜門不接賓客。人有問及正統景泰天順間事。輒不應。穀官至台鼎。而家業蕭然。敝廬瘠田。僅足衣食。身沒未幾。子孫貧窶。其方穀端靖。廉潔無私。卓然有古大臣之風。一時內閣七人議論。每相齟齬。穀獨持正。常曰。清議可畏。以是見忌於同列。亦以是受知於英宗。成化初。吏尙書姚夔。及王佐。鄺埜。前後上言。穀鯁直不回。端亮有守。始以翰林學士侍英宗經筵。入內閣輔政。孜孜爲國。恪持公論。景泰間。方主遣使迎鑾之議。及其還駕。獨建備禮郊迎策。天順初。以老疾乞歸。進退有道。始終不渝。加之贈諡。庶表臣節。得贈太保諡文義。

王直。字行儉。泰和人。永樂二年進士。爲翰林庶吉士。召入內閣。書機密文字。尋授修撰。上巡北京。留黃淮。楊士奇及直輔導監國。再巡扈駕。憂闕。陞侍讀。洪熙初。進侍讀學士。立太子。陞右庶子兼故官。記注聖政。聖訓。宣德初。進少詹事。兼職如故。英宗初。總裁實錄成。陞禮部左侍郎。兼學士。尋典制誥。正統六年。出部。佐胡濙。八年。爲吏部尙書代郭璉。十四年。上北狩。學士周敏自南京貽直書曰。永樂宣德間。常仰望少師。東里先生。然迹其舉措。究其底裏。士大夫公論不容掩也。易曰。知幾其神乎。書曰。慎終於始。又曰。惟克果斷。乃罔後艱。竊思三楊輔政之初。一幾也。不深思熟慮。身任其責。惟陽斂陰施。掩人耳目。雖曰自保。其實

誤國。故致今歲七月之禍。此時先生與諸君子輔政之初。又一幾也。宜鑒覆轍。爲宗社生靈永遠之謀。失今不圖。噬臍莫及。豈得卽能效子房之從赤松。晉公之營綠野乎。敍官至學士。又冒膺宋史之修儻。卽死。成此一事。竊名穹壤間。他富貴皆無所望。所念者國家安則民皆安。敍輩亦可偷生。畢其素志。今歲以來。因朝廷屢有更張事。不敢避禍。屢有所陳。未審朝議以爲可採否。自是以往。亦不敢瀆告一語矣。尋被勅得白。初上欲親征敵。直率廷臣疏止。不獲命。留守加太子太保。景帝初。進少傅。屢乞遣使奉迎上皇。不允。景泰元年。禮部議奏復迎。上御文華殿門諭大臣。言宜絕虜。直言報使便。勿使有後悔。上不悅。曰。朕無意大位。若曹過爲朕宜。今奈何異。于謙曰。天位已定。孰敢他議。祇答使舒邊急耳。上意始釋。曰。從汝從汝。羣臣退。纔出文華門。內臣與安芻芻而呼曰。疇堪使者。有文天祥富弼其人乎。衆未答。直而亦厲聲曰。是何言。臣皆王臣。惟上是使。敢弗行乎。言至再。詞色愈厲。安語塞。遂遣李實羅綺使虜。三年立東宮。加少師兼太子太師。何文淵以左侍郎加太子太保爲尙書。佐直。中書舍人何觀劾直上不聽。未幾文淵去。王翺代。文淵爲御史練綱等論劾。直累請老不許。英宗復位。請老去。直方面修髯。氣宇宏偉。性嚴重。寡言笑。居家儼然。及接人和氣。可掬。學富才敏。詩文精緻。在翰林三十餘年。恭勤不怠。旣秉銓軸。益廉慎。時方面官罷。廷臣薦舉。專屬吏部。直留意人才。于請斷絕。奔競稍息。居第隘陋。曾不屑意。臨川聶大年常謂直。直不爲憾。大年卒。泣銘其墓。恨未能薦大年也。時江西有二王名。東王謂直。西王謂英。卒年八十四。贈太保。諡文端。直歸田康樂。常言西楊不欲予同事內閣。出予理部事。當是時。不能無憾於西陽。若使不出部丁。

丑正月當坐首禍。能免遼陽之行乎。

林聰字季聰甯德人。正統四年進士。爲刑科給事中。劾石亨楊洪孫鏜諸大將。及內臣善增金英。著風裁。景泰元年遷都給事中。上皇將還。會有投匿名書者。王直得之高穀所。直與胡濙欲聞上曰。此所謂禮失而求諸野。已而或出危言。事且止。聰疏言直濙皆股肱大臣。不得私言齟齬大政。詔按之。穀曰。得之小隸。小隸曰。得之道路。上怒急捕。千戶龔遂榮挺身自白曰。迎上皇禮本當厚。遂榮投此帖。冀感動。無他腸。甘死無悔。已乃下廷議。或言也。先遣使行成。虜不可信。卽迎駕。一車二馬足矣。聰言上皇北狩。與陛下迎鑾。皆社稷綱常大計。宜厚。無他日悔。竟從其議。三年抗議易儲。改右司直郎。四年商輅薦。復爲吏科都給事中。劾吏部尙書何文淵。刑部尙書俞士悅。通政司李錫。工部侍郎張敏。諸大臣益多忌之。嗾御史屢劾其挾持吏部。擢選教官。得善近。地下廷議。按致聰賂不得。坐比擅選法死。胡濙不肯署。稱病。臥數日。上遣中官問對曰。老臣本無病。聞欲殺林聰。殊驚悸耳。上聞意立解。乃左遷國子學正。英宗復辟。超陞右僉都御史。賑山東饑。進副都捕江淮鹽賊。天順三年內艱。明年起復。又明年曹欽反。起大獄。牽連冤濫。冒功者至。割乞兒頭上功。都人不敢夜出。聰時署院事。力請禁戢。平雪讎嫌。成化二年。江淮旱。人相食。聰往賑。奏裁漕粟數十萬。明年九載滿秩。陞右都御史。七年。出撫大同。將吏用命邊事稍甯。逾年致仕。越二年起掌南院。又三年召入爲刑部尙書。加太子少保。十五年。與定西侯蔣琬按事遼東。馬文升及御史強珍。竟坐譴戍。明年乞致仕。不許。十八年。乞。贈少保。諡莊敏。聰徇徇和易。身若不勝衣。遇事可否。大義毅不可挽。抗議

易儲直聲大振

史官曰。景帝時迎鑾之議。廷臣窺上意指。環顧不敢發。惟一二小臣。毅然請往。請從厚。俱主高穀。穀之忠義可倚也。王直而斥與安。林聰抗議。易儲皆義激於心。惻隱故主。皇計復辟之後。身名獲全乎。咸躋上壽。爲四朝耆老。厚德之報也。

楊士奇楊榮楊溥傳

楊士奇。初名遇。以字行。江西泰和人。早孤。從母。敦敏力學。手不釋卷。年十三。通舉業。爲鄉里師。有隙生攜書數冊。過館下。色悽甚。士奇問故。云有母不能養也。士奇曰。嗟乎。人孰無母。亟分徒十五。與生弱冠游章貢。章貢守儒者。重士奇。令攝琴江教事。琴江令亦儒者。重士奇。士奇道令平。怨邑有冤囚。士奇爲言。令得解。囚懷金爲謝。士奇曰。吾以教爲職。縣官事吾安所預聞。辭不受。已而游楚中。楚中人皆慕士奇。諸楚中吏欲薦之。輒辭。建文初。廷臣薦士奇名儒。徵授教職。時年三十六。未任。會修高帝實錄。留翰林。充編纂官。尋命吏部考第史館諸儒。尙書張統見士奇策。驚曰。時務有用之才也。奉第一。除吳府審理副。明日。復召入翰林。燕兵至江上。與衆迎順。導侍入金川。太宗卽位。遂擢翰林編修。尋陞侍讀。時方開內閣於東角門內。命士奇等七人處其中。因論士奇曰。朕知爾文學。親擢至此。爾但盡心。勿自疑畏。二年。立皇太子。兼知春坊左中允。一日講大學。士奇呈講義。上覽畢。曰。先儒謂堯典。克明峻德。章一部大學。皆具矣。侍講學士王逵講乾九四。舉儲貳以說。皇太子疑其言。問士奇。對曰。此宋儒胡瑗之說。曰。與常人言。亦舉此說乎。對

曰。程子嘗曰。卦中六爻。人人有用。聖賢有聖賢用。衆人有衆人用。君有君用。臣有臣用。無所不通。王昭素嘗爲宋太祖言之矣。講臣非有據。豈敢妄出意見。五年。廣東布政徐奇來朝。載領南土筆諸物。或得其目以進。上閱之。無士奇名。獨召問士奇。對曰。徐奇自科臣受命赴廣東。衆皆作詩文贈行。故有此餽。臣不與名者。以當時臣病。未往贈也。今衆名雖具。而受否未可知。且其爲物微甚。當無他意。上遽命燬其目。是年陞諭德。六年冬。以巡狩北京。詔告天下。命士奇視草。既稱善。卽命與諸尙書皆觀。兵部尙書劉儁私謂士奇曰。請以有字易自字。衆謂二義不相遠。且上旣稱善。可勿易。士奇奏曰。國家大體。當用儁言。上喜曰。士奇能服善。則何有敗事。七年。車駕巡北京。命蹇義金忠黃淮與士奇專職輔導皇太子。春坊贊善王汝玉每以詩法進皇太子。士奇曰。詩以言志。明良喜起之歌。南薰之詩。皆言志也。殿下明經講道之暇。若娛意文字。兩漢詔令皆可觀。非但文辭高古。亦可裨益治道。九年。上還南京。一日召士奇問曰。爾輔導東宮日久。果何如。士奇對曰。殿下聰敏無比。上使言其實曰。凡有事宗廟。祭器皆親閱。去年時享。頭風作。醫言當漢殿下。漢卽不敢蒞祭。左右請遣代。曰。上以命我。可遣代乎。遂親祭。祭畢。漢徧體。疾遂愈。每進御用物。皆躬閱封識。而後遣行。不敢輕任下人。上曰。此子道當然。士奇曰。從古聖賢。亦皆盡其當然者耳。且存心以愛人爲本。將來必不負陛下付託。上悅。十二年。正旦日食。上問諸臣。正旦日食。百官行賀與否。禮尙書呂震曰。日食與朝賀不同時。當賀。侍郎儀智曰。同日宜免賀。士奇曰。日食天變之大者。宋仁宗元旦日食。富弼請罷宴徹樂。呂夷簡不從。弼曰。萬一契丹行之。恐爲中國羞。後有自契丹還者。言虜是日罷宴。仁宗深

悔之上曰。君子愛人以德。士奇與智言是也。遂免智及寔。十四年。上在北京。聞高煦有異志。遣京欲發其事。獨召士奇問曰。昨問蹇義漢府事。義對曰。不知。若朕未知。爾輩疑有離間。不敢言。今既知矣。言之何害。耶。士奇對曰。臣與義俱事東宮。故外人無敢與臣言者。但漢王始封國雲南。不肯行。改青州。又不肯行。今知將徙都北京。惟欲留守南京。天下皆疑其心。惟陛下善處父子兄弟間。全天恩爲永世利。上默然起還宮。後數日。悉待其反狀。及所爲戰具。大怒。褫其冠帶。繫之西華門內。以東宮力救得免。削其兩護衛。處之樂安州。曰。此去北京甚邇。卽其作禍。可朝發而夕擒也。是冬。周王楚王來朝。謁孝陵。上命皇太子太孫及諸皇孫陪謁。問翰林諸臣拜位。士奇對曰。二王尊屬。當分別在前。東宮稍後。居中。皇太孫又後。亦居中。諸皇孫與太孫同班。分別兩傍。上出所書位次。與士奇合。卽遣鴻臚官持赴陵。少頃復命。以宸翰上。上遂以與士奇寶藏之。皇太孫勤學好問。上命吏部翰林舉老成侍講讀。士奇蹇義同舉。儀智衆以爲老。士奇曰。儀智道理明。執守正。富今廷臣。未見其比。上曰。智雖老。能直言不阿。向言元正日。食宜免賀。朕識之。二十二年八月。上北征。崩。學士楊榮歸自行。在。以聞。仁宗卽遣皇太孫往迎梓宮。時京兵皆隨征。城中空虛。慮趙府爲變。因秘不發喪。顧急未有所與。士奇言上所用東宮圖書。請暫假以行。上卽取付太孫。曰。有啓事。以此封識。此卽當歸汝。汝就留之。旣而謂士奇曰。卿言誠是。昔大行臨御。儲位久未定。浮議喧騰。吾今就以付之。浮議何由而興。且曰。朝廷事。卿與蹇義當悉究心。吾當重用卿。士奇曰。此收人心之一機也。恩之所及。必先扈從征行之臣。臣兩人不應先及。仁宗卽位。九月癸未。尙書呂震言於上曰。今喪服已踰二十

七日請如太祖倣漢制易吉服。上未答。震退。徧語羣臣。易從吉。士奇謂震曰。今未可比此例。蓋洪武中有遺詔。且仁孝皇后崩。太宗皇帝仍素衣冠經帶者數月。今上於皇考。可遽卽吉乎。震厲聲曰。朝廷事爾每執異。尙書蹇義兼取二說。羣臣皆素衣冠黑角帶。遂以聞。上亦未答。明朝上素冠麻衣。絰出視朝。文臣惟學士。武臣惟英公。如上所服。罷朝。上諭左右曰。梓宮在殯。吾豈忍易。士奇言是。自左春坊大學士進禮部侍郎。兼華蓋殿大學士。尋進少保。是時大理寺卿虞謙上封事。過激。上怒。降謙爲少卿。而以屬吏楊時習爲卿。士奇執不可。上從之。復其官。本年十二月。加少傅。進階榮祿大夫。時天下官皆來朝。兵尙書李慶言於上曰。民間馬畜已散。軍伍尙餘數千。請令朝覲官領之。少蘇民力。正官領牡馬。佐貳官領牝馬。太僕寺苑馬寺歲課其息。有虧。罰與民同。士奇執不可。慶忿不納。士奇奏曰。朝廷選賢授官。今乃使養馬。而課責與民同。豈貴賢賤畜之意乎。明日復奏曰。必行此令於天下。賢者誰復肯仕。蓋虧損一馬。則必賠償。破家產。累子孫。朝廷可負此名於天下後世乎。上許罷其事。已而不報。明日。士奇又奏曰。兵部已督朝覲官領馬。所領多駒。南人脆弱。不能控制。立視其奔逸。而號泣於道。臣恐將來遠慮者。非但不願仕。亦恐無志於學問矣。此令所失非小。上曰。吾偶忘之。當卽批出。午刻。上御思善門。召士奇論曰。內批豈真忘之耶。聞李慶呂震輩皆忿卿。朕念爾孤立。恐爲衆所傷。不欲以卿言而罷耳。出一章。乃陝西按察使陳智言畜馬不便者。曰。卿等今可草敕止散馬也。士奇頓首曰。陛下知臣不孤矣。但已領者如何。上曰。已領者准洪武中官員乘例。不責生駒。虧損不責償。未給者止勿給。復謂士奇曰。繼今令有不便。惟密與朕言。李慶輩不

識大體不足語也。時上以梓宮在殯，新正朝儀不用樂，及鴻臚習儀，仍用之士奇，乞敕禮部設而不作。上是之。洪熙元年正月，兼禮部尚書，尋改兼兵部。士奇辭曰：「臣爲少傅，大學士已躡分，尚書一職，更不敢當。」上厲色曰：「黃淮金幼孜皆三職，卿獨二職，人將謂何？」士奇請辭。俸曰：「尚書月俸六十石，可養壯士六十人。」臣受二俸已過分，安敢復加。尚書蹇義言宜聽辭。學士俸，士奇言辭祿當辭厚，何用取虛名。上曰：「朕成卿志，乃聽辭。」於是黃淮亦辭戶部尚書俸，上監國時，御史舒仲成嘗以事迂旨，後已陞爲湖廣按察副使矣。及卽位，尚書蹇義因以他事奏，仲成命都察院逮治。士奇疏曰：「向來小人得罪者多，陛下卽位，皆悉寬宥，令追理仲成，卽詔書不信。漢景帝爲太子，召衛綰不赴，卽位用綰，前史韙之上喜，卽罷治仲成，賜士奇米及鈔幣，且降敕獎諭。」二月，賜士奇田二頃。士奇懇辭，上曰：「卿事朕表裏一誠，資益良多，卿前辭祿，今又辭田，何也？」士奇曰：「臣起自寒微，今受恩躡分，幸少延殘喘，得更事陛下二三年，獲全歸山林，受賜多矣。大理少卿弋謙數言事，廷臣交奏其賣直，士奇進曰：「古人有言，主聖則臣直，惟陛下容之，上猶不憚，因免謙朝。」士奇又進曰：「陛下有詔求言，言不當者不加罪，四方朝覲之臣咸在，豈能盡知謙過，第謂朝廷不能容直言耳。」上惕然曰：「朕非怒謙，乃其言自有過者，卿可以朕心諭之。」士奇曰：「臣言安足信，當以璽書開諭。」上遂命士奇書敕引過，而待謙如初。令百官言事，毋以謙爲戒。四月，蹇義夏原吉及奇侍，上問昨夜星變見否，對曰：「未見，上慘然曰：「天命也。」歎息而起。又明召士奇及蹇義，諭曰：「朕監國二十年，讒慝交構，心之艱危，吾三人共之，賴皇考仁明，得保全，言已泣。」二臣亦流涕慰上。上曰：「卽不幸，後誰復知吾三人同心一誠也。」特

賜士奇璽書。其略曰：朕膺監國之命，而卿侍左右，屢歷艱虞，會不易志。及朕嗣位，嘉謨嘉猷，入告於內，明予于治。茲以己意，創製楊貞一印一枚，用藏於家，傳之後世。惟卿子孫，由是知卿克致顯榮，不易惟艱。其思保守，惟朕子孫，亦由是知卿膺朕之功，以保全爾子孫，與國咸休。永世無斁。上嘗論科舉須兼取南北士，但北人學問不逮南人。士奇曰：長材大器，多出北方。豈但南人有文可用。今試卷例，絨姓名，請外書南北二字。南十六，北十四，則南北人材皆就用矣。宣德元年，漢庶人高煦反，上親征擒庶人，尙書陳山迎見，請移師彰德，襲趙王。上問楊榮，榮亦力贊。上又問蹇義、夏原吉二人依違而已。榮隨傳旨令士奇草敕。士奇曰：事當有實，今以何爲辭。榮曰：今逆黨已言實，與趙謀，何謂無辭。士奇曰：如此能服人乎。乃往見義，原吉言不可狀。義原吉曰：上特信榮言，不係吾輩可否。乃往見榮曰：太宗皇帝惟三子，今上惟二叔，其有罪者不可恕，無罪者當加厚。庶幾仰慰皇祖之靈。榮曰：汝不草敕，吾當以聞。俄復召義、原吉二人，乃以士奇言白上。上不懌而止。而言者不止，乃特召士奇曰：論趙事者日益衆，如何。對曰：今日宗室，惟趙與陛下最親。上曰：吾固念之。欲封羣言以示令自處。士奇曰：善。須更得一璽書。於是趙王得書，喜曰：吾生矣。卽獻護衛上表謝恩。而言者頓息。上召士奇曰：吾與趙不失親親者，爾之力。賜白金文綺楮幣。二年十月，黎利反。矯陳氏有嫡孫暲，爲表乞立。上密示張輔。輔曰：此黎利譎詞，當發兵誅討。示蹇義等，皆曰：利不可信。與之無名，徒示弱。明日召士奇與榮。榮曰：永樂中費數十萬人命得此，至今勞者未息，困者未蘇。因其請而與之便。士奇曰：榮言是也。太宗初心，本欲求立陳氏。後求之未得，乃郡縣其地。數年來兵民困於交趾極矣。

此皆祖宗之赤子。體祖宗之初心。保祖宗之赤子。正陛下盛德。何謂無名。漢棄珠崖。前史以爲美。何爲示弱。臣侍仁廟久。聖心每憾此事。恐有意外虞。願陛下勿疑。上意遂決。六年秋。上頗微行。夜半從四騎。至士奇家。比出迎。上已入門。立庭中。士奇悚懼伏地。言陛下奈何以宗廟社稷之身自輕。擾擾塵埃。昏昧中上。笑曰。思一見卿談。夜闌乃還。明且遣太監弘問曷不謝。對曰。至尊夜出。愚臣追今。中心惴慄未已。豈敢言謝。又數日。遣弘問堯不微行乎。對曰。陛下恩澤。豈能徧洽幽隱。萬一有冤夫怨卒。窺伺竊發。誠不可無慮。後旬餘。錦衣獲二盜。嘗殺人。捕急。遂私約候駕之玉泉寺。挾弓矢伏道傍。林莽中作亂。捕盜校尉變服如盜。入盜羣。盜不疑。以謀告。遂爲所獲。上歎曰。士奇言不虛。遣弘賜金綺。七年二月。士奇言方面及郡守。請令京官三品以上。及布政按察使。用犯賊連坐。凡因保舉授官。而有指告其罪者。先逮問餘人有驗。然後及之。庶不爲小人所誣。英宗卽位。加少師。特進光祿大夫柱國。時有言方面官及府州縣正官。專用保舉爲恩出於下。欲如洪武永樂故事。第令吏部選除。士奇奏曰。宣德七年以前。藩憲二司及府州縣正官。多不得人。百姓受害。是以宣宗敕令大臣舉保。自茲以後。多稱得人。間有一二菲才。蓋緣舉主一時審察不至。亦或實是徇私。所司不行糾舉故耳。且宣宗臨御之時。體祖宗之心。以行仁民之政者尚多。保官乃第一事。當時不聞人有異議。多以得人爲喜。今乃以爲不美。耶。唐太宗命在京三品以上官舉郡守縣令。後來至天下斗米三錢。今謂保官恩出於下。夫衆臣舉保。吏部審實。具名奏請。聖意允俞。然後授官。不允卽不得除授。恩豈出下。近年有等京官。無人舉保。造爲謗語。專欲躓壞先帝良法。使小人皆得進用。伏望聖

斷只依先帝敕旨施行。但所舉之人。後有犯賊。必須明正舉主之罪。則人知警畏。不敢濫舉。官必得人。臣受四朝大恩。慚無寸補。惟念用人賢否。國家治亂所關。是以竭誠盡言。詔如士奇議。六年。麓川反。太監王振主征討。命王驥爲總督。而以刑部郎中楊甯參軍事。士奇以爲不可。贈詩有征夷勿遠圖之句。其後師雖有功。實爲南方大病。八年。士奇子稷坐事逮繫。給事中廖莊等御史陳員韜等劾士奇不能教于齊家。何以服人事上。士奇疏乞致仕。上優旨留之。九年。服賜璽書曰。卿歷事祖宗。實惟簡在。暨朕繼統。啓沃瀝贊。厥勞尤多。卿子旣乖家訓。干國紀。朕不敢私。卿其以禮自處。以副倚毘。士奇感泣積憂。遂不起。卒年八十。贈太師。諡文貞。仁宗嘗幸文淵閣。問今之山林有知名士否。對曰。東吳有陳繼。善爲文。仁宗召至。吏部擬授國子監博士。上曰。此當在禁庭。乃改翰林五經博士。繼字嗣初。公初未相識。因夏原吉治水蘇州。得繼文以歸。偶見之。故薦焉。又士奇偶見屈昉詩。一日崑山知縣羅永年以事入京。士奇問崑山有屈昉。永年茫然。慚赧而退。未幾有詔舉明經修行之士。士奇以防應詔。除南海縣丞。其留心人才如此。又國初諸司皂隸主騶從。宣德間始有納銀免役者。因士奇言京官祿薄。改名曰柴薪銀。天順以來。始以官品隆卑。定立名數。每歲銀解部以巨萬計。京諸司。則皆出畿內。并山東。山西。河南州縣。南京諸司。則皆出南畿州縣。宣宗嘗奉太皇太后謁陵。士奇蹇義。楊榮等皆從。士奇等進見。勞問慰勉。加以厚賜。旣數日。上諭士奇曰。太皇太后爲朕言。皇考往在宮中。談卿等姓名及行事甚熟。其間才學優劣。孰肯任事。不任事。皆有評議。言蹇重厚小心。但多思少斷。卿能持正言。不避注意。方議事時。先帝本不從卿。然卒從卿。始不敗事。士

奇對曰。此太皇太后之盛德。仁宗皇帝之盛德。願陛下常奉聖訓。太皇太后大漸召士奇等至榻前問朝。廷尙有何事未辦者。士奇首對三事。其一建庶人曾臨御四年。當命史官修其實錄。仍用建文年號。太后曰。歷日已革除。豈可復用。對曰。歷行一時。史信於萬世。豈可蒙洪武之年。以亂實。后領之。其二。后亦首肯。其三。方孝孺已誅。太宗詔收其片言一字者論死。乞弛其禁。凡文辭不係國事者。聽令存而傳之。嘗疏乞極刑之家。有賢子弟勿棄。宣宗曰。劉翀亦極刑家。今不在近侍乎。遂弛其禁。又宣德中。上謂朝臣貪濁。奈何。士奇對曰。貪風始自永樂末年。上問何故。對曰。永樂中。太宗數疾不視朝。扈從之臣請託賄賂。公行無忌耳。問今日誰最貪。對曰。莫甚劉觀。上撫掌歎曰。除惡務本。觀去誰可代。於是乃以顧佐代觀。又英宗嘗立文華殿。召士奇。屏左右。言張瑛嘗謂榮畜馬甚富。今察之。皆邊將饋榮者。士奇對曰。榮屢從太宗北征。典兵馬。以故得接諸將。今內閣臣知邊將才否。阨塞險易遠近。及虜情順逆。惟榮耳。臣等皆遠不及。上笑曰。朕初卽位。榮數短卿。而非義原吉。卿願爲榮地耶。上奇頓首曰。願陛下以曲容臣者容榮。又云。裕陵卽位冲年。高皇后臨朝。獨委任士奇。嘗乞屯田以省漕運。獨逋慎獄。作養士民。嚴覈百姓。推薦才傑。公卿藩臬。頗稱得人。上又高拱九重。不事巡幸。南北供億十減三四。閣瑾上畏母后。下憚士奇。猶自斂戢。七年昭皇后崩。又明年士奇卒。振乃大肆。士奇預修四朝實錄。太祖實錄凡三修。初建文時。王景總裁。永樂初。藩縉總裁。再修則士奇總裁。人謂寢失其真。言壬午事多謬。所著有沙羨蘘石臺藁。文籍志。法書志。東里集。三朝聖諭錄。人稱爲西楊。又曰東里先生。

楊榮字勉仁。初名子榮。建安人。領福建鄉薦。解額。建文二年庚辰進士。高等。授翰林編修。太祖卽位上爲更名榮。簡入內閣。初入閣之臣七人。惟榮最少。最警敏。一日晚甯夏報被圍。上急召解縉等。六人皆已出。惟榮在上。示以奏報曰。爾後進甯解此。今當何處兵往救遣。榮曰。不須救。臣嘗奉使至彼。彼城堅。人皆習戰。今其已發十餘日。敵必退矣。但敕守臣固守。及鄰近諸堡隄備。夜半報至。敵圍解。詰旦上以報示榮曰。何料之審也。進修撰。陞侍講。永樂二年。七人侍。上勞曰。天下事朕與若等相商確。非若六卿分理。並賜三品服。皇太子立。陞右諭德。仍兼侍講。四年疾。上命御醫守視。時時報瘳。乃已。五年丁亥夏。奉甘肅規畫軍務歸。奏對盛暑。上取瓜親割賜榮。六年外艱起復。明年內艱。會上北巡。又起復。留扈從。賜錦衣狐裘鞍馬。甘肅總兵官何福言虜脫脫不花王來歸。榮復至甘肅受降。還復命。又持節詣亦集乃軍。中封何福爲甯遠侯。又往甯夏。與甯陽伯陳懋規畫邊務。還復命。陳邊境便宜十事。上皆嘉納。八年庚寅二月。從征北敵。壬戌。上度野狐嶺。召胡廣及榮指示山川形勢。各於馬上賦詩。榮有聖主尊居四海安天教。戎敵自相殘。之句。未幾。諜知敵情。本雅失理。與其下阿魯台讎殺。東西奔遁。亟召榮諭曰。敵自相殘。前詩果讖矣。三月。駕發凌霄峯。榮與胡廣金幼孜金純四人失道。太宗命中官率兵士追尋得之。時已夜。中官馳去。榮等復迷入窮谷。幼孜墜馬。胡廣金純不顧去。榮下馬爲幼孜整鞍轡。不數武復墜鞍裂。榮以所乘馬讓之。而自乘驪馬。從夜至旦。登高涉險。至午方詣軍中。太宗見之大喜。笑語幼孜曰。此中狼多。汝非楊榮。殆將不免。五月。駕至驢駒河。賜名飲馬河。上親選勇士三百護衛。以榮領之。班師。軍士食乏。榮言宜召乏食者。卽日

赴中軍。以御前所儲散給。并下令。凡軍士糧多者許假貸。回京官倍償。軍得飽食。秋七月。至開平。召榮還南京。計事。事竣還京。冬十月。扈駕南旋。上賜鞍馬。錦衣路費。九年辛卯。乞奔母喪。賜金幣。六月。還。詔復其家。命侍諸皇孫讀書。文華後殿。十年壬辰。冬十一月。甘肅守臣宋琥言。老的罕等叛。數入赤斤蒙古爲邊患。上以榮曉暢軍旅。命至陝西會豐城侯李彬議進兵方略。還具言出嘉峪關。千里險阨。乏水草。餉道弗能通。又沍寒。士馬疲瘠。不足以動大軍。罷中國。彼小醜當自來歸。上從之。未幾。叛者皆附。十一年。從幸北京。明年甲午三月。扈征瓦剌。時皇太孫侍行。上謂榮曰。朕長孫聰明英勇。今令從行。俾知用兵之法。且使躬歷行陣。知將士勞苦。命榮兼掌號令宣傳之事。敕旨旗牌。不得榮奏。允不發。乙卯。師次大石鎮。上坐御幄。召問足食足兵之策。榮對宜擇將帥。力屯田。將得人則軍士弗擾。軍士安則耕不違時。不患兵食不足。秋八月。還北京。賜鈔幣。十三年乙未。命榮督修性理大全成。宴禮部。賞賚有加。十四年。陞學士。庶子。冬。扈駕南還。十五年三月。復從幸北京。屢召問民情。賜鈔幣文綺。十六年。掌翰林院。上眷注益隆。諸臣多忌之。屬北京缺祭酒。衆薦榮。上曰。榮可。但求可代榮者。於是衆意銷阻。十七年。進言十事。皆指斥五府三法司積弊。上覽而喜曰。實切時病。但汝爲心腹臣。言之則羣臣益猜疑忌。當使御史言之。御史鄧眞。上之。上飭諸司峻改。十八年。陞文淵閣大學士。兼學士。十九年四月庚子夜。三殿災。火勢烈。切近密閣。榮奮身直入。麾衛士三百人。將御書圖籍文書。畀之東華門河次。上嘉之。賜銀盃酒。古銅器各一。鈔千錠。時侍讀李時勉等爲飛語所中。上大怒。榮力救得免。是冬。兵尙書方賓得罪死。逮夏原吉等皆下獄。呂震侍左右。言夏

原吉檢邪誣罔。上益怒。榮極言其無他。上釋不問。二十年三月。從征沙漠。秋還京。九月。宴隨征者。榮坐前列。賜鈔幣及二品金織襲衣。冬。又將西征。或以建文中江西聚集民兵。與餽運丁夫十餘萬可徵發。榮曰。此兵夫昔有詔令復業。且二十年。復徵非信。動衆非仁。料兵非勇。上笑曰。善。二十一年秋。從西征。八月。駐宣府。軍務一切悉付榮。晝夜或三五接。或宣詔。但稱楊學士而不名。冬十月。次天威。甯陽侯陳懋奏。番王也。先士干納款。衆疑懼。莫敢定議。榮親往受降。二十二年甲辰三月。復從北征。五月。榮言軍士疲甚。宜遣使諭敵。釋其不順之罪。請班師。時巡按浙江御史王復奏處州山寇反。請發兵誅捕。上問榮。榮對曰。愚民爲有司所苦。艱衣食。不得已嘯聚。勦則毒民。宜遣使撫諭。當遂散。旣而撫之。皆順服。七月丁亥。上坐翠微岡帳殿。諭榮以傳位太子之意。榮曰。太子仁孝。天下歸心。必不負上託。辛卯。次榆木川。上不豫。召榮等受遺命。遂崩。時皇太子在南京。衆倉卒莫知所措。榮謂太監馬雲等曰。六師去京尚遠。不宜發喪。所至宜上食如常儀。時議有假他事作敕用寶。馳報者。榮曰。先帝在稱敕。今稱敕。是詐也。罪孰當之。榮乃先馳計皇太子。八月。至北京。致遺命。仁宗卽位。陞大常卿。仍兼前二職。九月。加太子少傅。兼謹身鎮大學士。錫銀印一。其文曰。繩愆糾繆。且諭榮曰。卿國家舊臣。祇事先帝二十餘年。又輔朕東宮。今嗣位。須協心匡輔。或政務缺失。朕弗聽言。則用此印密疏以聞。至於再三。慎毋憚煩。加工部尚書。仍兼二職。洪熙元年五月。詔修太宗實錄。榮爲總裁。辛巳。仁宗崩。升遐。時皇太子守南京。中外洵洵。榮急迎太子入卽位。是爲宣宗。益推心委任。修仁宗實錄。榮復爲總裁。宣德九年八月。漢庶人反。皇太后召榮計。榮力贊親征。曰。彼謂陛下新

立，必不自行，故敢爾。若出其不意，以天威臨之，事無不濟。臣請先行。皇太后壯之，與上從其計。榮即起行，晝夜疾馳，至卽合圍。督軍士築土山，山成而大駕至。庶人出降，事平。賜鞍馬白金鈔幣，交趾黎利以立陳氏爲名。據地反，大臣皆言發兵滅此賊。榮及楊士奇請棄交趾畀陳氏。是年秋，從上出喜峯塞，召榮問曰：人君馭世之權孰重？對曰：命德討罪。上曰：然。二者天下公器，舜舉十六相，誅四凶，而天下服。以天下之好惡爲好惡也。齊威王烹阿，封卽墨大夫，不以左右之好惡爲好惡也。人君賞罪，至公無私。然後能服天下。榮頓首稱善。曰：願陛下勿忘今日之言。還進少傅，賜鉞銀圖書五。其文曰：方直剛正，忠孝流芳。關西後裔，建安楊榮。楊氏勉仁。十一月己未，皇太子生。上親酌酒賜榮，并賜白金鈔幣及金酒器。十二月，召至東苑，詢訪政務。三年元霄節，賜文武大臣觀燈於萬壽山。榮進元霄賦。二月，命榮同蹇義等十八人至入內苑，登山泛舟，上乘馬至。召士奇與榮，詢問民情甚悉。賜酒。八月，扈駕巡邊，給內廐良馬。班師，榮進平胡頌十篇。五年，兩朝實錄成，賜白金綵幣羅衣鞍馬。宴於中府。二月，上奉皇太后謁陵，召見榮等五人於行殿。諭之曰：皇帝數言卿等忠勤，今天下清寧，民生無事，皆卿等贊翼之功。丙申，上親賜宴於文華殿。八年，少傅滿三載，賜宴禮部。九年，扈駕巡邊，給天閑名馬。英宗卽位，命榮視山陵。秋九月，修宣宗實錄，充總裁。正統元年，少傅滿六載，進光祿大夫柱國。宣宗實錄成，加少師。五年，從耕籍田，禮成，請告展墓，詔許之。命內侍伴行。力疾就道。次杭州，卒於武林驛。年七十。訃聞，上慟悼輟朝，贈特進光祿大夫左國太師，諡文敏。遣禮部尚書胡深等諭祭。仍命中官護喪歸里。工部營葬。予世指揮使。先是都御史盧睿在邊，以敵使入境，節

捐供給爲中官所毀。下獄。或謂盧本爲公家。榮曰。事固有輕重。使吝其小費。而遠患或生。則所費益不資矣。此不可不知。太宗英武。羣臣奏對。少能稱旨。惟愛榮。自編修入閣。未嘗一日離左右。或值上不樂。至怒。榮至輒霽威。事亦隨決。有濟人利物之仁。榮從不卻人之餽。凡人有餽。必先詢訪其人之貧富。若貧則酬以別物。如所餽焉。榮總裁四朝實錄。經理三帝山陵。累從出塞。屢受遺音。撫順討逆。羈勒萬里。運籌設險。折獄理財。隨機應變。靖重不撓。濟險解紛。調停有術。果而能容。謀而善斷。內行修謹。胸度圓融。祿厚財豐。瞻賑窮阨。貴賤賢愚。皆歸心焉。所著有北征記。默庵退思二集。靜軒雲山二藁。訓子編。兩京類藁。史官曰。宋儒有言。德勝才謂之君子。才勝德謂之小人。信斯言也。豈得謂之才哉。夫國家多難。羽檄旁午。匪才弗達。上下多危。蕭牆交構。匪才弗定。強敵窺伺。內猜外疑。匪才弗靖。姦雄僭竊。彼甲乙。匪才弗協。是故陳平燕居深念。張良借箸前籌。才矣。而謂之小人可乎。或謂士奇正而不譎。榮譎而不正。烏乎可。楊溥。字弘濟。石首人。建文二年進士。爲翰林編修。太宗卽位。侍東宮。爲洗馬。兼編修。皇太子觀漢書。稱張釋之。對曰。釋之誠賢。非文帝寬仁。亦未得行其志。思采文帝事。編類以獻。皇太子大悅。時漢王巧中東宮。宮寮多得罪。永樂十二年。東宮遣使迎上。遲。上怒。黃淮先至。下獄。楊士奇金間繼至。上曰。且宥士奇。問何人乃得侍太子。下法司訊。詞連溥及芮善。王豈遂與工部侍郎陳壽俱下詔獄。溥在獄中。勵志讀書。不輟。獄中人止之曰。命且叵測。無徒勞苦爲。應曰。朝聞道。夕可死。奈何輒自棄。經史諸子。讀數周。太宗崩。仁宗立。釋夏原吉。並釋溥。溥出獄。哭太宗。伏地不能起。上亦哭。陞翰林學士。宣德元年。陞太常卿。兼學士。入內

閣。是年仁宗崩。先是仁宗欲近寵之。建弘文閣。思善門左。命溥掌閣事。又選侍講王龜侍直。改博士陳繼學錄。楊敬爲編修。訓導何澄爲給事中。輪對。上手弘文閣印授之。曰。朕用卿左右。非止助益學問。亦欲廣知民事。爲理道助。卽有建白。封識以進。溥嘗密疏言事。上褒答。至是上還弘文閣印。宣德元年。上召與語。次及治兵。溥曰。兵貴訓練。有方撫養得宜。上曰。養之厚。則得其心。練之精。則得其用。若素不訓練。一旦驅之矢石間。進退失措。安望有濟。三年。扈上出喜峯口征敵。四年。上坐齋宮。召諭曰。朕每念創業難。守成不易。夙夜惓惓。今幸百姓稍安。顧禍亂生於不虞。嘗爲憂惕。邇來羣臣好進諛詞。令人厭聞。卿宜勉輔朕。溥頓首謝。臣不敢忘報稱。上曰。直箴朕過。報朕多矣。溥又頓首謝曰。直言求之非難。受之爲難。上曰。然是年秋內艱。遣中官護行。賜葬母一品夫人禮。遂召復入弘文閣。是冬從巡塞上。度雞鳴山。六年冬。上坐文華殿。三楊並侍。上諭曰。朕念祖宗積德累善。篤生太祖。繼天立極。創業垂統。太宗迅掃姦回。再安宗社。皇考恢弘治化。增高累厚。以固鴻業。朕承天位。夙夜不忘。記曰。先祖有美而不知不明。知而不傳不仁。是用撰述成詩。揭之座上。朝夕覽觀。勉圖繼述。庶幾永保天命。今以刻本賜卿等。當亦思祖宗開創之難。守成不易。盡心輔朕。國家安。卿等亦與有榮焉。尋陞禮部尙書兼學士。英宗卽位。昭皇后宮內助理。溥復入內閣。首言聖帝明王莫不務學。先帝在時。屢諭臣等勸學東宮。遺音尙在。靈鑒如臨。皇上肇登寶位。必明堯舜之道。以圖唐虞之治。乞早開經筵。預擇講官。必得學識方正。言行端謹。老成重厚。達大體者數人。以共其職。及選宮中左右朝夕侍從之人。涵養本源。輔成德性。昭皇后喜。一日后坐便殿。上西面立。后傍召三楊

及英國公輔尙書溥。諭曰：卿等老臣，嗣君冲年，幸并力同心，共安社稷。又召溥前，諭曰：先帝每念卿忠，屢形愁歎，不謂今日復得見卿。溥伏地泣。昭皇后亦泣。左右皆悲愴。先是永樂中，太宗時巡北京，太子居守，以讒故，宮寮大臣輒下詔獄。陳壽解縉、馬京、徐善述、王汝玉、梁潛、周冕相繼死獄中。溥及黃淮一繫十年，瀕死者數矣。仁宗每與后言及東宮時事，慘然泣下。以故昭皇后爲言。后又顧上曰：此五臣三朝簡任，俾輔後人。皇帝萬機，宜與五臣共計。正統四年，宣宗實錄成，進少保，兼武英殿大學士。溥夙稟淳實，操性直剛，不尙機警，每崇忠厚。至議政決疑，與諸大臣爭可否，或有躁心浮氣，能舍己從人，略無係吝時候。三楊學士、文貞爲西楊，文敏、東楊，溥、南楊。正統五年，楊榮卒。又明年，昭皇后崩。又明年，楊士奇卒。十一年，溥卒。而王振肆，十四年，遂有土木之禍。卒年七十五，贈太師，諡文定。

史官曰：楊士奇、玉質、金相，通達國體，隨事納約，不詭於正，而意嘗近厚。轉導監國，保身濟主，有大雅之明哲焉。楊榮揮斤游刃，遇事立斷，蚤遇英主，相得益章，累從出塞，羈勒萬里，文經武緯，俱展其長者也。楊溥安貞履節，中更險難，遲二楊者二十餘年，更入弘文，昭后臨朝，與民休息，調羹釀醴，參合成名，故天下俱稱其美矣。

范理傳

范理，天台人。性安義，自守。登宣德庚戌進士，授知江陵縣。時楊溥在內閣，其子自石首入京，因述所過州縣，迎送餽遺之勤，獨理不爲禮，以告父。溥因而奇之。後廉其能，卽薦知德安州。其爲縣才八月而已。後尋

薦陞貴州布政使。所至多惠政。或勸宜致書謝。理曰。爲朝廷用人。非私於理。及溥卒。理乃祭而哭之。以謝知已。後仕至吏部郎。

史官曰。宰相以得士爲功。士以守己爲正。溥之待理。與理之自處。可謂兩盡之矣。世道下衰。好進之徒。且無因而登宰相之門者。又有朝薦一人。夕不登禮。卽以爲薄。而後中傷之。吁。讀此。其可愧感乎。

明書卷一百二十一

列傳四

名臣傳六

呂原傳

呂原字逢原秀水人。正統七年進士。性質樸渾厚。容貌端偉。未冠已讀書博洽。能出入經史。父景州學官。歿不能歸喪。或勸之火葬。原痛哭不肯從。權厝景州。時至慕痛哭。景人及道旁行聞者皆酸慙。已而躬掖母南歸。家甚貧。攻苦力學。知府黃懋閱秀水學官文。奇。學官對曰。此邑里中呂生文也。呂生貧不能補。弟子員。學官致家塾教諸子。懋輒歎郡中乃有文士。如呂生遺草萊中者。急召之見。原入見。衣藍縷。甚試以舉業文。詞理皆勝。問以經書。輒能默誦。懋益驚異。與之新衣。謝不受。會理葺曩舍。與之諸徐材木。又謝不受。懋曰。生家貧。粥此且得善價。又謝不受。懋益大奇原。當是時。太守得輒補學諸生。懋即補原入學。是秋舉浙江鄉試第一。明年進士及第。第二人授編修。時選翰林講讀官。裴綸杜甯謝璉。王玉。江淵。陳文。李紹。商輅。劉俊。及原十人。習制誥於東閣。十四年罷。景泰中。倪謙及原。初教小豎黃賜等書於文華東廡。上一日至廡中。命謙講詩國風。原講書堯典。上悅。問二人官。謙對臣左中允兼侍講。原對臣右中允兼侍講。

上又問中允講讀官品。二人對曰：皆正六品。上曰：品同安得相兼？令左右取官制再三覽。顧二人曰：進汝二人講讀學士，兼中允。二人頓首謝。他日上再至，二人遷坐旁壁下。上曰：何跼蹐乃爾？二人頓首對。君父當臨坐，臣子避不敢當。上喜。二人敬慎，後至館，輒立語，或東西行不復坐。天順中，改通政司右參議，兼侍講如故。入內閣，預機務，尋陞翰林學士。曹石寵用，事知敬原。原朝會青衣袍，亨笑曰：行爲先生易緋，原不答。未幾，岳正暨原列上曹石罪狀。上留中不發。曹石微覺上意，大恐，遂共謀摘承天門災詔中語，謂內閣臣訕上。上大怒，坐便殿，召對近臣，厲聲正大膽，固敢爾。原素謹厚，左右正何也？正去，原得留。原與李賢同在內閣，賢通達，見事立斷，原守正謹恪，稍濟之持重。修大明一統志，充總裁。母憂去。道景州，啓父窆歸合葬。或以陰陽五行家說沮之，不聽。奉載舟中，寢苦枕塊，極哀毀。如初喪，竟病。抵家尋卒。贈禮部左侍郎。諡文懿。原任內閣六年，端潔不苟，取予性儉約，身無執紼，篋中惟賜衣，輒分祿贍宗姻貧匱者。清心寡慾，褫第無隱過。至老勤學，晨夕不少輟。子黨廕，試中書舍人，舉順天鄉試。歷官南太常卿，有學行。

史官曰：闕

劉儼傳

劉儼，字宣化，吉水人。正統七年進士第一人。除翰林修撰。憲宗在東宮，儼爲左春坊大學士，充國史副總裁。陞太常少卿，兼侍讀學士。景泰七年，考順天鄉試。內閣陳循王文有子試，屬儼。儼不爲地，皆不得舉。二人令其子錄試文，訟其闕文不明。取士徇私，會謂官劉涇卷。注翰林考中，送入貢院。比書榜，竟落涇名。二

人因劾違制并摘命題雖欲自絕語請如洪武中劉三吾等例坐罪重開科試士上命高穀覆試穀力言二臣之子文亦可觀故鮮有定額儼等無罪上重違二人意令順天府准其子會試王文復疏辯上不喜曰敢再言者以大臣壇法口乃已先是廬陵羅崇獄舉順天第一以詭籍斥還縣學時人爲之語曰榜有姓名還是學生榜無名氏京闈貢士明年英宗復位二人得罪其子竟不得試禮部儼尋卒贈禮部左侍郎諡文介儼學有沈潛文無險塞取予明潔而剛直之氣百折不回人稱爲鐵漢

史官曰

李時勉、陳敬宗、孫鼎、魏驥、陳選、謝鐸

附夏寅、張悅、魯鐸傳

李時勉名懋以字行號古廉先金陵人徙居安福永樂二年進士公少有大志甫成童每自勵曰顏曾希聖四勿三省選入翰林爲庶吉士預修太祖實錄憂去服闋授刑部主事召入修書書成進翰林侍讀十九年三殿災求直言條上十五事未幾讒搆下獄二十一年出獄復其官仁宗即位時勉有疏諫疏留中不知所指云何上怒縛至便殿命力士捶十八瓜折其筋幾死明日改監察御史又明日下詔獄宣德九年十月上恨時勉言懋觸仁考怒令縛時勉來朕面鞠必殺時勉已又令王指揮縛時勉斬西市王指揮出端西旁門時勉已爲先輩使者縛入端東旁門中相左王指揮至獄知其入亟走還縛送西寺然已得見上願憐時勉忠臣能直言立脫其桎梏復其官預修兩朝實錄陞侍讀學士正統三年進學士尋陞國子祭酒是時祭酒缺楊士奇歎祭酒難其人時勉曰豈遂乏人耶程信在旁言無過公者時勉不悅竟

以爲祭酒。初時勉與陳敬宗在翰林。袁忠徹、曳二人並列。曰：二公他日功名相埒。陳儀觀魁梧。時勉貌少寢。聞者未信。後二人皆至祭酒。陳方嚴肅。下時勉平恕得士。並著聲太學。時勉每崇廉恥。抑奔競。別賢否。示勸懲。變士習。諸生貧不能婚。病不能醫。死不能喪者。節縮餐錢。力爲贍給。督諸生讀書。寢興有常。燈光達旦。書聲不絕。恩義浹洽。不啻父子。王振惡其守正不阿。事構之。荷校國學門。諸生石大用上章。願以身代。號哭奔走闕下。請赦時勉者數千人。以故得解。尋乞致仕去。諸生走涕泣送觀者塞途。商賈爲罷市。又明年。聞北狩信。北面頓首號慟。上疏言選將練兵。迎還車駕數事。景泰元年卒。年七十七。諡文毅。成化中。贈禮部侍郎。改諡忠文。

陳敬宗。字光世。慈溪人。永樂二年進士。時選庶吉士七十餘人。再選。留曾榮及敬宗等二十八人。讀書文淵閣。上時臨試。勗其文行。預修永樂大典。成。授刑部主事。永樂十二年。預修五經四書性理大全。入史館。預重修太祖實錄。成。改翰林侍講。獻北京賦。平胡頌。及爲善陰騭頌。十七年春。卿雲見。甘露降。獻聖德瑞應頌。是冬。甘露再降於孝陵松栢。復獻頌。又獻龍馬麒麟獅子騶虞賦。內艱去。宣德改元起復。修兩朝實錄。未及成。轉南京國子司業。秩滿陸祭酒。敬宗美鬚髯。容儀端整。步履有定。則久居太學。力以師道自任。嚴立教條。痛革舊習。日勵諸生進學成德。是時警宗之政。肅於朝廷。因以是得名。亦以是致怨。僚屬生徒懷忿。訟之法司。語逮理。周忱曰：盍疏申雪。卽爲屬草。不果。上事亦白。時關中楊鼎發解。試禮部下第。疏乞入南監。從敬宗學。上從。鼎至監。清苦力學。後舉禮部亦第一。廷試第二。仕至戶部尙書。敬宗善飲。飲襄城。

伯李隆所。隆知重敬宗。賓罷。輒留再飲。飲酩酊。言貌儼然。若未嘗飲者。一夕飲過劇兀。坐喧。頽中人伺敬宗。見其拳握最謹。其矜嚴如此。敬宗剛正介潔。不見喜愠。官太學二十餘年。諸生多位至卿貳。敬宗獨久不調。時北監祭酒李時勉。約束諸生。身教亦嚴。世稱南陳北李。景泰元年。引年與魏驥同致仕。敬宗德望文章。名聞朝野。既退家居。不輕出入。別號澹庵居士。至是又號休樂老人云。有詩文十八卷。曰澹庵居士集。天順三年卒。年八十三。

孫鼎。字宜鉉。廬陵人。永樂間。以鄉舉。歷江浦松江學博士。甚得士心。彬彬多興起者。楊溥薦爲監察御史。督南畿學政。鼎教一以德行為先。而文義次之。學置本源錄。錄諸生善行。以身爲率。不事譏防。行部令勿先之。從單輿。猝至。諸生集。輒閉門面試一文。隨閱隨定。畢。便開門呼名而出。案牘隨之。先後允愜。私矚者無所措手。常見庭橋方熟。命左右摘。嘗因公畀諸生同啗之。一生獨取其二。鼎問之。以奉親對。鼎大賞。倍遺之。時應天苦旱。饑甚。奏免其租什七。賑濟萬三千餘石。賴以全活者甚衆。景泰元年庚午秋試。時英宗北狩。鼎小試罷。謂諸生曰。諸君從有司試。當簪花燕饒。今日爲臣子枕戈之秋。老夫不敢陷諸君於不義。乃與飲茶。今從中道行。自步送出門。旣而詣闕上疏。請隨所用。以效死。不報。乃自矢於文信公祠。去蒞所部。道遇尙書金濂。慷慨對泣。有萬里丹衷扶日月。兩人清淚對山河之句。其忠憤如此。庚午敕封其父母。得告歸省。父聞恩命至。擁騎郊迎。鼎塗行控御甚虔。觀者榮之。明年還朝。念親老。請致仕歸。後祭酒司業缺。常道屢薦不起。郡守金陵張宣疏鼎。孝追會。閔學踵程朱。宜起居論思之職。名卿大夫。過其鄉者。必禮。

於其廬。鄉人子弟考德問業無虛日。守若令以下。時從乞言焉。居六年。爲天順元年十月朔卒。年六十六。魏驥字仲房。蕭山人。永樂三年鄉舉。明年爲松江府學訓導。諸生讀書學宮。或夜攜茶粥勞問。諸生益感激。自奮滿九載。諸生楊珙等詣闕乞留。景帝監國。令還任。復教三年。十七年。師達薦陞太常博士。宣德初。陞行在考功員外郎。轉南京太常少卿。三年。召試行在吏部侍郎。踰年爲真。八年。老辭。調禮部。又辭。調南京吏部。正統十三年。陞尙書。景泰元年。年七十七。致仕。公嘗至京師。大學士陳循驥所取士。謁驥曰。先生雖位冢宰。未嘗得立朝。願少待。驥曰。君爲輔臣。宜爲天下進賢才。不得私一座主。英宗復位。進榮祿大夫。居家二十年。布袍糲食。簡約廉勤。性好吟咏。矢口適情。自有雋味。耄年事其兄教諭。愈恭謹。成化間。監察御史梁昉疏。有德有壽。請如漢故事。優禮。時遣行人存問。賜羊酒。有司加粢月三石。驥病。遺書子完。勿擾鄉里。營墳墓。已有司得請。如例葬祭。完以遺言力辭。驥身不勝衣。言不出口。清德雅望。海內達尊。卒年九十八。諡文靖。

陳選字士賢。浙江臨海人。父員韜。景泰間爲福建右布政使。選自幼端慤寡言。潛心理義。銳然以聖賢可學而至。悟克己求仁爲進修之要。因號克庵。凡古格言。多手錄不倦。舉順天鄉試。庚辰會試第一人。登進士高第。授監察御史。貌古而粹。接應人言。若不出諸口。其執法也。正色直言。不忌權貴。憲宗即位。首疏論君子小人進退治道所係。不可不慎。言甚剴切。時學士倪謙錢溥嘗教中官書。時欲授幸閹柄。用選力擊之。遂得不進。修撰羅倫以論大學士李賢奪情起復。謫官。選抗疏直之。不報。出按江西。貪殘吏望風解綬。

人稱名御史。風紀大振。布按長貳謁。每易素服入。選曰。此非憲綱體也。人臣覲君。服必視其品。願獨殺於御史前乎。未幾。督學南畿。時念學者不修實行。而競爲浮詞。取科第。力欲變其故習。校士一以德性爲本。試卷。明列諸生姓名。不彌封。曰。吾且不信。何以信於人。修古禮儀。令諸生以時肄之。每按部。就止學宮。徐行密觀。周旋罄折。絃歌籩豆。古風郁然。前後三載。變色之言。不施於衿珮。而成就興起。至不可縷數。人稱謂南督學第一人。遷河南副使。仍視學河南。如南畿。會閩汪直被命巡郡國。都御史以下咸匍匐趨拜。選獨長揖。直怒。白爾何官。敢爾耶。選曰。提學。直愈怒。曰。即提學。甯大於都御史耶。選曰。提學非都御史比。但宗主斯文爲世表。率雖死不可屈節。直見其詞嚴義正。而諸生皆集門外。不可犯逆。改容曰。先生無公務相關。自是不必來。選徐步而出。尋轉按察使。卓有善政。雪冤獄。除苛細。凡諸宿弊。一切罷去。獨於賊吏不貸。服闋。起爲廣東布政使。任廣數年。首除徭役。罷和買。備賑濟。以蕪疲困。先是有閩人賴克哥等三十人。漁於海。爲風漂至潮州。守者獲之。官司以通番論。又邑民黃福等十九人。被誣爲盜。選皆廉其情。悉處分。有闖弟冒武職。逼娶孀婦。選爲奪還之。時市舶太監韋眷。倚進貢爲姦利。招集無賴。鬪僧數百人。分布郡縣。專魚鹽之利。役戶苦於供需。選奉減其數。番人馬力麻與海商通私販。詭稱蘇門答刺國使臣。眷利其貨。不問。選因發其僞。擊之。奉遣歸。眷深銜之。時又有撒馬兒罕使臣泊六灣。以獅子入貢。得厚賞。比還國。又欲航海滿刺加國。市獅子邀賞。選言此西域賈胡爲圖利耳。使墮其謀。必貽諸番之笑。且珍禽奇獸之好。不可以示外夷。罷中國事。竟止。眷每縱黨通番。番禺知縣高瑤發其賊。鉅萬。都御史宋旻不敢詰。選獨

移文獎瑤。眷以每事爲所沮抑，亦不勝悲憤。於成化二十二年，遂奏誣選以他事。朝廷遣員外郎李行，會巡按御史徐同愛鞠之。時兵民數萬人填益衢巷，向詔使號訴，眷復以賂啖選，所黜吏張襲者證誣，襲死不敢枉。時勘者鞠實不得，必欲文致以罪，竟逮赴京。行時民數萬擁留之，不可挽。日夜從行者數百里，入見選，鈐赭囊頭坐舟中，夾道哭不休，已而疾作。至南昌卒，年五十八。友人張元禎歿，以疏綸，或咎其薄。元禎曰：公平生清苦，殮以時服，公志也。而張襲走京師，上言：臣聞周公元聖，而四國之謗，乃致上疑於其君，曾參大賢，而三至之言，不免搖惑於其母，豈成王之不明，參母之不親哉！凡以口能鑠金，而毀可消骨也。陛下明並日月，恩同父母，詎圖怙冒之中，尙罹屈抑，覆盆之下，復有沈寃。竊見廣東布政使陳選，少崇正學，夙抱孤忠，子處羣邪之間，獨立衆憎之地。太監韋眷通番敗露，而知縣高瑤按法持之，移文嘉獎，以儆貪懦，固監司之體也。奈何宋晏徐同愛，怙勢保姦，首尾兩覷，以致眷橫行胸臆，汗蠟清節，營惑聖明。勘官李行承眷風旨，鍛鍊成獄，竟無左驗。臣本小吏，以註誤觸法，爲選罷黜，實臣自取。眷妄意臣必憾選，以厚賂陷臣，令扶同陷選。臣雖胥徒，安敢欺昧心術，顛倒是非。眷旣知臣不可利誘，乃嗾行等逮臣於理。彌日拷掠，身無完膚。臣甘死籲天，終無異口。行等乃依傍眷語，文致其辭，劾選勘災不實，擅便發倉，曲庇屬官，意圖報謝。是毀共姜爲夏姬，詬夷齊爲盜跖也。頃年嶺外地震水溢，漂民廬舍，屬郡交牒報災，老弱引領待哺，而撫按藩臬，若罔聞知。選獨抱隱憂，食不下咽，謂展轉行勘，則民命垂絕，所以便宜議賑，志在救民，非有它也。選素剛正，不堪屈辱，乃爲勘官凌侮，頽瀆成疾，旬日而殂。李行幸其就死，不爲醫療，又潛遣養

子密報選死於眷。以快其忿。宵人佞毒。一至於斯。司寇之屬。要在詰姦刑暴。安取此輩爲也。夫選砥節奉公。橫罹讒搆。君門萬里。孰諒其冤。臣以罪人。擯斥田野。乘耒自給。百無取圖。敢冒死披陳。甘心鼎鑊者。誠痛忠廉之士。銜屈抑之冤。長讒按之姦。爲聖明之累也。奏入不報。第以它事罷眷鎮守。選雅尚澹泊。無異韋布。每食飯一盂。韭數根。或雞子半枚而已。凡事涉風教。必捐俸爲之。日使替者振木鐸。以徇道路。置深衣幅巾。擇耆民有德者。子之。以教子弟。聽訟不事刑。扑隸人。惟令業網巾於左右。以閑其心。與訟者約。自持一票。詣被告家。使自詣官。罔不如期者。民感其德。皆不敢欺。其學識粹然。一出於正。其操行確然。一出於誠。爲文理緻精密。讀之有味。選正直忠厚。立朝不究所施。人多惜之。正德中。追贈光祿卿。諡恭愷。初選做范文正。置田百四十畝。祀先周族。名思遠莊。迨卒。族人以選甚貧。舉田還其子戴。戴不可。曰。先人行義。戴取而私之。獨不愧乎。人讚其有子云。

謝鐸。字鳴治。浙江太平人。天順甲戌進士。資性澄朗。膺懷儒素。以古人自期。選庶吉士。成化元年授編修。預修英宗實錄。校勘通鑑綱目。上疏言宋神宗好通鑑。理宗好綱目。而不能推之政治。因勸上親賢講學。以史書質經傳。窮理義。則大本立而萬目自隨。皆嘉納之。進侍講。以艱去。孝宗卽位。起修憲宗實錄。李東陽貽書。勉以乘運拯世之義。乃勉力入朝。供事史局。於汪直王越開邊事。書之不諱。正氣屹屹。嗜義如渴。見不善若將浼然。清修勇退。恥絕功利。不爲時局所惑。弘治中。爲兩京祭酒。以道義廉節爲教。復嚴約束。明出納。廣建置。上疏正文廟祀典。及申明補敝舉墜。凡所建白。皆師古義。不徇俗。以希世。正德初。閣瑾用。

事。矯旨致仕。五年卒。年七十六。贈尙書。諡文肅。所著有真西山諸書記。伊洛淵源續錄。四子釋言。赤城志。方石文集。鄉人方孝孺。隕身滅族。沈鬱百年。鐸不避忌諱。收綴遺文。梓之以傳於世。嘗著說曰。我太祖有度。越歷代者五事。攘克夷狄。收復諸夏。一肇基南服。統一天下。二威加口國。鋒刃不交。三躬自臨業。臨御最久。四申明祖訓。家法最嚴。五聞者以爲格論。

夏寅。字正夫。華亭人。正統十三年進士。幼岐嶷。有巨人志。日記數百言。稍長。益肆力問學。初爲南京吏部主事。歷郎中。杜門誦經史百家言。久之。發爲文章。澗宏奧密。脫去流俗。自成機杼。陞江西按察副使。提學。專崇實行。黜浮華。閱卷一目數行下。又善鑒別。復文山祠。葺白鹿書院。修陶侃讀書臺。陞浙江參政。處州民苦虐政。走山谷。招不聽。曰。須夏參政來。寅檄至。卽散。成化二十二年。進山東右布政使。敬簡有容。愛民節用。寅誠心直道。無黨無援。自筮仕爲郎。二十年。爲副使。十六年。未嘗以淹屈降志。常曰。君子有三惜。此生不學一可惜。此日閑過二可惜。此身一敗三可惜。

張悅。字時敏。華亭人。天順四年進士。少凝靜。篤學力行。鄉里推重。及居官。奉職守法。自刑部郎出爲浙江提學副使。初糊名鄉士。尋曰。我且自疑。人誰信我。請託覲覲。屹不爲動。成化二年。陞湖廣按察使。朝覲時。東廠尙銘忌悅。伺察無所得。不得陞者久。人未及銘敗。歷陞工部侍郎。孝宗卽位。改禮部。再改吏部。六年。大旱。陳六事。又上修德圖治二疏。時王恕在吏部倚信之。王恕致仕。衆望屬焉。徐溥邱濬皆不喜悅。建議用翰林入吏爲侍郎。出爲南吏尙書。尋改兵部。參贊機務。嘗謂人曰。古之聖賢。凡所猷爲。至公無私。故其

事業光明俊偉。今之人去古遠矣。竭公忠猶恐不至。況復濟以私乎。或言有善讀書不善作官者。悅笑此正不善讀書耳。四年六疏乞歸。上爲賜璽書。加太子少保致仕。歸處舊廬。杜門不出。見風俗奢靡日甚。益崇節儉。常有言揭屏間曰。客至留饌。儉約適情。殺隨有而設。酒隨量而傾。雖新親不臺飯。雖大賓不宰牲。匪直可久。亦以安生。卒贈太子太保。諡莊簡。楊守陳嘗曰。吾友三人。時勉。廷秀。鳳儀。皆始仕刑。爲名卿。魯鐸字振之。景陵人。弘治十五年進士。庶吉士。入翰林。閉門斂跡。不事交游。爲編修。益沈潛學問。不專爲文詞。歷司業祭酒。端飭自勵。日危坐焚香。讀五經四書。不肯言人短長。及時政得失。虛心約己。清慎不渝。屢請告。屢起。屢歸。羣情鄉慕。益競持名節。嘉靖初交薦不起。卒年六十七歲。諡文恪。史官曰。儒林之官。四海淵源。內之司成。外之學使者是也。非其道德可師。坊表可樹。節概可風。如昔賢廉頑立懦者。而徒取儒雅章句之末。糊名易書之文。以示公程藝。欲得人而釀化也。下已細乎。南陳北李。著聲太學。而李尤苦勁。頻死者數矣。陳選爲提學。不屈節權奄。石亭之死。何異夕陽。魏驥不受座主之私。孫鼎請淚山河之憤。謝鐸表章正學之文。皆不避死。壁立千仞。高風偉節。百世可師。以之化民成俗。何多讓焉。

劉翊傳

劉翊字叔溫。壽光人。少溫篤事親孝。母沒廬墓。時父曷在。翊昧爽入家問安畢。復詣墓所。人稱所居曰仁孝里。正統十三年進士。改庶吉士。授編修。陞修撰。天順二年陞右中允。七年陞侍講學士。侍東宮講讀。憲

宗卽位。陞太常少卿兼侍講學士。英宗實錄成。進卿。仍兼職。外艱服除。還任。成化十年。陞吏部左侍郎。兼官如故。明年兼翰林學士。入內閣。與機務。珣在經筵久。上甚重之。呼爲東劉先生。特賜圖書。十三年。進戶部尚書。明年加太子少保。兼文淵閣大學士。十八年。修續資治通鑑綱目。纂文華大訓成。進太子太保。謹身殿大學士。珣鄙薄萬安。時對客罵安負國無恥。安積聞深恨之。百計中傷。二十一年九月。乞致仕。允之。歸家卒。贈太保。諡文和。珣美姿容。善談論。遇人無矯飾。景泰初。議迎鑾。成化初。議睿皇后喪禮。末年論李汝省左道亂政。動搖國本。密疏昌言。卒定儲位。有大臣之節。當是時。珣與劉吉同在內閣。人因上呼珣東劉。因謂吉爲北劉。林俊常曰。余以妖僧孽寺。售術貢邪。肆興土木。不揆狂躁。上千宸怒。萬頸俱縮。縛下詔獄。鬼籙爲伍。惟公立爲上解。乃得薄譴。崔銑曰。公秉心不疑。諒直無顧。而讒嫉肆作。搆惡於羣。小假威於遷卒。竟去位。嘉靖二年。言官疏。珣孝友。孚化於鄉閭。爲立昭賢祠祀之。

史官曰。闕

陳音傳

陳音。字師召。莆田人。執古有烈士風。登天順八年甲申進士。成化元年。授翰林編修。常上疏陳時政數事。如起用李秉。張元禎。復羅倫。章懋。用陳獻章。革法王佛子名號。語多剴切。當道者或銜之。不爲動。時中官最貴。有母喪。或議往弔。音奮然曰。堂堂翰林。而拜內侍之庭。奈天下笑何。議遂寢。丙申侍讀。加從五品祿。侍經筵。會憲宗首闕西廠。坐以中官緝事。勢饒不可當。其黨韋瑛者。夜帥邏校入兵部主事楊士偉家。并

掠其妻。音居比舍。亟乘墉呼曰。爾何人。乃擅辱朝臣。其人曰。爾何人。乃不畏西廠。音曰。我翰林侍讀陳音也。聲氣愈厲。其人爲之少戢。放其妻縛。成化庚子。大學士劉吉有父喪。詔起復視事。吉已疏辭。陰託外戚萬喜言於上。固留之。音貽書勸其力辭。吉不報。音業詩經。學者多從之。若太常卿濟章。遲政。吳裕。少詹事王鏊。皆其所授經弟子也。歷官至南京太常寺卿。致仕。

史官曰。闕。

商輅傳

商輅。字弘載。號素庵。溧安人。舉宣德乙卯鄉試第一。正統九年會試。明年廷試。皆第一。爲翰林修撰。十四年。景帝監國。入內閣。備顧問。預機密。陞侍讀。時北敵入寇。人心洶洶。輅力主羣議。請郕王卽眞。以安反側。時有議南遷者。輅唾面斥之。敵逼都城。輅與文武元僚。經略戰守。遣官撫輯。旬居之敵。征各邊塞。選兵入援。揭榜敵營。購敵人首。僞爲善甯報誘也。先書。敵得榜與書。自相疑。遁去。景泰紀元。陞翰林院學士。本年八月。迎上皇於居庸關。景泰三年。陞兵部左侍郎。歷兼左春坊大學士。翰林學士。太常少卿。賜居第。議易儲。輅獨曰。此國大事。有皇太后在上。臣下誰敢議此。時錦衣指揮盧忠。妄言南內事。中官阮浪死之。猶窮治不已。輅極言。儉言不可聽。以壞大倫。傷骨肉之情。由是忠始坐罪。衆得釋。五年。章綸請復儲。上怒。下獄。輅力救得免。景帝不豫。太監與安。餽廷臣云。何。輅於公疏。援筆增二語曰。陛下宣宗皇帝之子。當復立。宣宗皇帝之孫。他非所當立者。疏未及進。石亨輩奪門。英宗復辟。卽日以迎立事。置于謙。王文等極刑。

召輅與高穀入便殿。慰曰：朕在南宮，知爾二人無偏向心，今正欲用爾，其安心辦事，勿憂惶也。因議改元年號，草詔頒敕，石亨密語輅曰：今歲敕文，須一抹光，不須別具條款。輅曰：祖制孰敢擅改？亨等不悅，騰誣謗輅，欲附致于謙刑案。與安爲輅解，而上亦怒。與安奏曰：當時北輩附和南遷，不省將置朝廷何地？今有奪門功，卽復爾耶？上怒乃解，但削輅爲民，輅去。上每念商學士，朕所取三元也。旁有擠者，久之竟不復召。憲宗卽位，明年追念舊學，遣使驛召至京，以野服見，復官。入內閣，首疏八事，勤政，納諫，儲將材，飭邊備，革冗員，設社倉，崇先聖之號，以配天，開入德之基，以造士。又言文廟從祀諸賢，洪武中增董仲舒，正統中增胡安國、蔡沈、真德秀，但仲舒止稱舊官，安國等贈諡，未稱乞如伏勝等封伯爵。四年，議慈懿皇太后喪禮，得祔葬祔廟，是年慧星見，言官勅輅力求退，上怒，詰言官曰：唐太宗用王魏，朕用輅，何不可？輅又力請宥言官，上喜曰：輅稱大臣，言官得不問，尋陞兵部尙書兼學士。五年冬，燠，七年慧星再見，天田入太微垣，八年天下大水，輅上弭災七事，崇正道，謹命令，親賢臣，慎賞罰，納諫諍，勵官守，恤軍民。十年，改戶部尙書，十一年兼文淵閣大學士，上常召見，從容議及郕王監國時事，輅言景泰有社稷功，當復帝號，左右聞者皆泣，上亦泣，遂下詔，上尊諡，輅因對請立皇子東宮，先是悼恭太子薨，上憂念已，而知西宮有子六歲矣，但畏忌無敢言，輅上疏略曰：皇太子聰明岐嶷，國本攸繫，天下歸心，重以昭德宮貴妃撫育保護，恩讎已出，百官萬民，皆謂貴妃賢哲，近代無比，但外議皆謂皇子之母，因病別居，久不得見，揆之人情事體，誠爲未順，伏望敕令就近居住，皇上仍頒貴妃撫育，俾朝夕之間，便於接見，庶得遂母子之至情，愜朝夕之公論。

上召輅擬皇子名。逾月，皇子母紀氏薨於永壽宮。輅舉宋李宸妃故事，言得贈淑妃殮，悉如禮。是年十一月，立皇子爲太子。十二月，加太子少保、吏部尚書。十三年，建玉皇閣宮北。輅疏言：「皇上爲此，上爲母后祝釐，下爲生民祈福，聖心誠敬，人所共知。但稽之於古，未爲合禮。昔傳說告高宗曰：『黷於祭祀，時謂弗飲。禮煩則亂，事神則難。』乞停罷神祠，像送宮觀，祭服祭器樂舞之具，盡送太常收停。一應齋醮之事，悉皆停止。勿爲褻瀆，庶幾天心昭鑒，可以變災爲祥。」上從之。是歲，進謹身殿大學士。會黑背見，條上八事曰：「番僧國師不得重給符券，四方常貢外，勿受玩好。諸色人許直言，自達公府，遣部使者慮囚理冤，抑停不急營造。實三邊軍儲，守沿邊關隘，增置雲南巡撫。時汪直開西廠羅織，數起大獄，臣民恐悚。輅疏言：「近日伺察太煩，政令太急，刑網太急，人情疑畏，洵洵不安。蓋緣委聽斷於汪直一人，而直又寄耳目於羣小，如韋瑛、王英輩，并條直十罪。又云：「直不去，天下必危。」上怒曰：「用一內臣，輒能危天下乎？」命太監懷恩傳旨詰責。輅正色曰：「朝臣無大小，有罪應請旨逮問。渠敢擅抄扎三品以上京官，大同宣府京師北門守備，一日不可缺。渠一日擒械數人，南京祖宗根本重地，留守大臣，渠敢擅自收捕。諸近侍，渠敢擅易置。直不黜，國家安得不危？恩昨舌而退，奏上，乃即日撤西廠。由是諸內臣大忌輅。會楊榮、孫繼及董璠以罪逮至京，詞連及輅。直從中主之，誣輅不自安。同列又輒從旁切擠。輅遂請老，加少保致仕。輅去，萬安得爲首輔。遂復西廠直掌之。諸大臣皆諂事直矣。輅家居十年卒。年七十三。贈太傅，諡文毅。輅丰儀，岳峙方果，好直言。與王文陳循、高穀、彭時、萬安、劉吉先後共事。每遇大議，能持正。劉吉常曰：「吉與商公處數年，未嘗見其筆下妄殺。」

一人馬文昇曰。我朝賢佐。商公第一。楊文貞李文達不及也。子良臣爲翰林侍講。史官曰。商輅方正端亮。見事透朗。處永壽昭德間。順以濟險。斯實難矣。說者謂其慮高峯四合。千巖撐豁。殆間氣所鍾也。及讀國史。見諸疏侃侃有大節。嗚呼。宋之王且王曾宋庠。俱以三魁致位宰相。若輅者。視古先哲何愧耶。

周忱傳

周忱。字恂如。吉水人。永樂二年進士。時簡進士二十八人。進學文淵閣。公乞預。上喜。公有志。改翰林庶吉士。十年授刑部主事。陞員外郎。盡心簡牘。二十二年爲越府右長史。宣德五年。東南財賦煩敝。廷薦陞工部右侍郎。巡撫南直隸。忱辭越靖王。至江南。召父老問利病。輿革之。人悅服。滿九年。轉左。正統六年兼巡撫湖二府。十四年八月陞戶部尙書。改工部。仍巡撫。景泰元年引年不允。明年請老。召還京致仕。又明年卒。凡在江南巡撫二十二年。先是。胡概巡撫江南。用法嚴刻。忱濟之以寬。凡告訐輒不省。或面詰忱。不及。胡卿使我下情不能上達。忱笑應曰。胡卿敕有祛除民害語。我敕但云撫安軍民。朝廷委任自異耳。當是時。蘇州府逋稅七百九十萬石。常松亦然。忱閱牒大駭異。詢父老皆伏地哭。言蘇吳豪富有力者不出耗。并賦之貧民。貧民不能支。多流徙。忱創爲平米法。官田民田并加耗。蘇稅額二百九十餘萬石。忱與知府況鍾曲算。疏減八十餘萬。舊例不得團局收糧。忱令縣立便民倉。水次每鄉圖里。推富有力一人。名糧長。收鄉圖里人夏秋兩稅。加耗不得過十一。又於糧長中差力產厚薄爲押運。視遠近勞逸爲上下。酌量支

撥京通正米一石支三臨清淮安南京等倉以次定支爲舟檣剝轉諸費填出銷入支撥羨餘各存積縣倉號餘米有餘減耗次年十六徵又次年十五徵更有羨縣爲倉名預備倉水旱不時賑貸及農之食網運風漂盜奪者國復轉假至秋抵斗還官其修圩築岸開河濬湖人支口糧以爲農事故不責償時插蒔農借貸必驗中下事力及田多寡給之秋與糧并賦凶歲再賑秋熟不償者來歲不復給時裏河漕軍與民半軍船出官廠民率僱舟又經年往復失農業忱與平江伯瑄議奏軍舟民至淮安或瓜洲水次交兌江北衛所漕者出通關還繳淮安一石兌加五斗瓜洲五升如裏河舟未渡江南京諸衛抵倉兌者加與過江米及襯墊蘆蓆與折米民間馬草歲運兩京勞費不資忱請通州草場立官庫每束折銀三分千束銀止三十兩南京輕齋赴買上北京文武職官俸糧皆支南京米賤時銀一兩得米七八石忱請江南重額官田極貧下戶兩稅准折納金花銀銀一兩准米四石解京折支京官俸蘇有官布匹准糧一石舊例匹重三觔比解又以紗纈十退八九忱言農間布匹觔重紗纈價願賤紗細布輕價益高不拘觔重務在長闊如式耳傳中馬衣被諸應客者舊皆領於馬頭馬頭豪者橫科弱者鬻產忱令田畝收米升九合與糧俱征驗馬上中下價直給米正統初淮揚災鹽課虧忱巡視奏令蘇州等府撥剩餘米縣撥一二萬石運貯揚州鹽場准爲縣明年田租聽竈戶上私鹽給米時米貴鹽賤官得積鹽民得食米公私大濟時采繪宮殿計用牛膠萬餘觔朝廷遣官敕忱上供甚急會忱議事赴京遇諸塗敕使速忱且還治忱不應至京言京庫貯牛皮歲久朽腐請出煎膠歸出餘米市皮還庫上從之十四年邊事急工部索兵杖數百

萬計。忱出餘米造上。明盜者須水磨。非違歲月不可。忱令且沃錫。旬日畢辦。正統六年至海鹽。築捍海塘。令郡七縣。合役萬夫。自七年正月。至十一年。費萬計。皆出忱度支。海竟不能不患。每遇凶荒。輒便宜從事。補以餘米。賦外更無科率。凡百上供。及廨舍學校賢祠古墓橋梁道路溝渠修葺。一切取給餘米。歲不下萬計。施給僧道。問報饋遺。往往不吝。各得其歡心。江南之人。愛戴如父母。沒而尸祝。永思周尚書不去懷。忱宇量恢宏。才識通敏。蒞事精勤。臨民和易。有善謀者。雖卑官賤吏。破去崖岸。開心訪納。性尤機警。籌畫諸郡錢穀鉅萬。一屈指無遺算。嘗爲冊歷。記日所行事。及陰晴風雨。有告報。輒按據詰訊。人莫能欺。每出會計。視地豐凶。事緩急爲弛張。調劑變通。民無逋負。官有餘積。前後理財者。皆不能及。卒年七十三。諡文襄。先是蹇義秉銓。夏原吉。握利權。皆二十七年。劉大夏。尙書兩京三十九年。而在交南者。十有九年。胡濙。爲禮尙書三十二年。忱巡撫江南二十二年。皆久任責成。以故用人理財。禮樂征伐。諸大政事。文經武緯。各盡所長。後鮮能及焉。

史官曰。善理財者。權萬貨輕重。操奇贏轉輸。以利其餘。名不加賦。而用足。其敝或與商爭息。雖劉晏趙開。不免焉。若周忱。止爲江南貧民平賦。減耗耳。而疏剔之餘。不可勝用。至於備凶札。給上供。興利補壞。百廢具舉。而民不告病。誰謂理財無大道乎。然忱善用人。其鈞算蘇賦。以況鍾。條畫漕輓。以平江伯迪。知忱所以不勞而成功也。

明書卷一百二十二

列傳四

名臣傳七

鄭埜王佐傳

鄭埜字孟質宜章人永樂辛卯鄉貢士理刑都察院以廉平名十一年爲監察御史時駕在北京有言南京鈔法滯衆謂將起大獄埜往擒市豪一二歸奏曰市人聞令懼鈔法通矣事遂已十六年石州人告變擢陝西按察副使敕埜事卽實會官軍勦埜察其誣乃反獄亡命妄言冀脫死聞上止弗問誅誣者宣德四年陝西饑移粟煮粥全活衆生埜最清謹父又賢常市褐寄父父貽書罵何處得此褐者以不義汚我父教官埜欲見父聘陝西考鄉試父又大怒罵辭不至歸憂服除陞應天尹與利去害市征田稅皆酌其平豪滑不得爲輕重正統元年進兵部左侍郎時尙書王驥西征埜獨任部事有勞上與除戎籍四年京師淫雨壞廬舍埜言此陰陽爲沴兵陰也臣等不職所致乞罷歸不許久之進尙書時欲變易軍伍使南北人各適土性下羣議埜曰此舊制不可紊稍有變易將不勝其弊咎將誰歸卒不動十四年上北征敵力止不允比出關又請回鑾王振惡之矯旨令與戶部尙書王佐隨老營至淮安驟馬幾殆從者請留就

醫藥曰。天子在前。可託疾求自便。力病至雲南。還至宣府。敵大至。莖再上章請疾。驅入關。而嚴兵爲殿。皆不報。最後詣行殿。力請振怒曰。腐儒安敢談兵事。再妄言必死。莖曰。我爲社稷生靈言。何得以死懼我。振愈怒。叱左右扶出。明日。次土木。師覆遇害。贈少保。諡忠肅。佐海豐人。永樂中貢士。爲給事中。正統初陞戶部侍郎。六年陞尙書。十二年兼吏部事。佐狀貌魁梧。器宇深厚。政有體要。心無苛隘。恥不若人。晚事學問。贈少保。諡忠簡。

史官曰。土木之變。自英國張輔學士曹鼐而下。死事者數百人。或諫或否。史不勝錄。然未有如鄺莖王佐之數。請回鑾。力折逆閹。幾以死諍。而回天無術。竟以身膏草野也。莖父子俱獄。屢平大獄。賑饑民。活人無算。而遭家不造。罹此鞠凶。天下尤痛之。

樊瑩傳

樊瑩。字廷璧。常山人。天順八年進士。爲御史。巡兩淮。豪有力者。憚其清介。莫敢撓阻。條上清軍事宜行之。著爲令。又巡雲南。交人誘邊氓掠盜。殺吏民。有議用兵。瑩移諭禍福。交人畏其清梗。皆納款。出知松江府。府故富贍。瑩布衣蔬食。卒於士民。有議折徵米穀。減布縷征。通幹漕法。數事行之。後人遵守。再知平陽。以黃孔昭薦陞河南按察使。未幾爲應天府尹。三年陞南工部侍郎。改都御史。巡撫湖廣。計擒錦田賊酋。散解其黨。奏省諸藩王營造費金兩百萬計。尋以疾致仕。薦起撫治鄖陽。鄖襄流冗安輯。馬文升又薦召爲南刑部侍郎。雲南晝晦五日。敕瑩考察雲貴諸吏。罷遣千餘人。召還部。爲尙書。十八年致仕。正德三年。闕

瑾誣瑩安理隆平侯事。及擅減上供布收贖奪其官。瑾誅瑩卒已三年。詔復其官。十四年贈太子少保。諡清簡。瑩明習律令。潔己好修。侃侃自樹。交遊稀寡。人皆敬而畏之。

史官曰 闕

王概傳

王概字同節。廬陵人。正統七年進士。達敏有才。暢習吏事。初授刑部主事。歷郎中。屢遷河南按察使。所至案無留牘。獄無冤訟。天順初被誣下獄。會襄憲王入朝。上問所過官吏賢否。王對曰。臣過河南。百姓遮道訴王廉使冤。且言王廉使清勁。鋤豪拊善。有恩有威。殿下幸爲百姓奏皇帝。還我王廉使。上喜。立命法司雪概。還任尋陞右副都御史。巡撫陝西。設法救荒。全活數萬人。流徙歸業。天順七年入爲大理卿。出入十年。凡兩法司及畿藩讞奏。參錯情法。多所平反。時吏諳律比者。類多深刻。概獨持明允。濟以長厚。諸所審駁。會文切理。倫要簡暢。轉相傳錄。類成卷籍。成化八年遷刑部尙書。疏陳時政十事。上嘉納。商輅深知之。薦代姚夔爲吏部主議者。不喜。竟用尹旻。十年卒。諡恭毅。子臣。成化五年進士。翰林侍講。出爲廣西參政。託病歸。

史官曰 闕

崔恭傳

崔恭字克讓。廣宗人。正統元年進士。爲戶部主事。有能譽。出督延綏邊儲。大學士李賢薦知萊州府。府庫

故歲入漕海市數萬。輒涸爛。破庫人家。恭請量留漕海市餘。並出爲軍餉。不踰年。布盡歸守庫者八百家。十三年。萊旱蝗。捕蝗發賑。乞免下邑逋租。又善辨疑獄。人稱神明。明年。敵犯京師。集兵數千。遣官部署勦王。在萊六年。吏畏民懷。景泰三年。陞湖廣右布政使。盡革諸冗費。及和市。苗賊侵武岡。督餉訓民兵。勦賊。賊皆聽撫。公安監利流民相殺。恭曰。勿急。急且大變。下令流民願附籍者。聽否。且俟秋成遣歸。衆遂定。調左江西。囊中惟律比圖書。衣數襲。江西省有黃濟庫者。庫官吏乾沒至五十萬。恭發其姦。都御史韓雍竟法連坐。布政使失職。郡邑肅然。制爲役法。調輕重任。一歲之勞。得九年之逸。天順二年。陞右副都御史。巡撫蘇松。所至進耆老。詢利害。爲興革。會都督徐恭請浚儀真漕河。恭役夫六萬人。程工贍廩。民不告勞。又浚常鎮河。避江險。四年。王翱薦爲吏部左侍郎。成化五年。代李秉爲尙書。不久罷歸。九年。起爲南吏部尙書。卒贈太子少保。諡莊敏。恭寬平坦易。中無芥蒂。好善惡惡。出於天性。臨事剛而不亢。柔而不褻。其在吏部。慎惜人材。獎拔後進。廉靖自居。人知嚴憚。

史官曰闕

王翱郭瑾李秉年富傳

王翱。字九皋。鹽山人。永樂十三年進士。先是北士入南京者甚少。舉進士者往往弗獲前列。是年初會試。北京。翱兩試皆高等。上喜。召見。賜食。改翰林庶吉士。授大理左寺正。以寺事註誤。邊行人。宣德元年。楊士奇薦陞行在御史。謹重。遂大體。十年。陞僉都御史。正統元年。鎮守江西。未幾。巡浙江。拊善推姦。吏民畏愛。

四年松番用兵不效。翱出贊理。六年鎮陝西。七年敵入塞殺掠吏民。我師敗績。遼東西震動。且撼漁陽。翱提督軍務。敵退。明年陞副都御史。留撫遼東。十二年出塞破敵有功。陞右都御史。十四年改左。是年秋敵分犯廣甯。清野困之。敵退去。景泰三年召還臺。尋加太子太保。四年建州長李滿住上番書。乞留翱遼東。不許。會南蠻寇兩廣。兩廣副總兵董興武毅。觀望不肯戰。巡撫侍郎揭稽李棠不相統。賊益熾。于謙請用安遠侯柳溥總督兩廣軍務。如溥未可出。臣謙及戶部尙書金濂。左都御史王翱。乞用一人。上曰。翱練兵。務可督兩廣。明年蠻平。召還臺。是年夏。吏尙書何文淵下獄致仕。翱轉吏部尙書。官銜如故。初翱入四川。專布恩信。招懷降附。出賜金市牛酒。慰犒番酋。商巴等十八寨來歸。不煩兵力。松番遂定。遼東法令久弛。不復知有朝廷賞罰。以故敵至不戰。戰亦不力。翱至。會諸將責之曰。某某玩寇。喪師失律。當斬。軍中股慄。頭搶地。言自今效死用命。得釋。翱卽出巡邊。起山海。抵開原。繕濬塘溝。五里爲堡。十里爲屯。烽燧斥堠。千里相望。敵見嚙指走。翱益簡練卒伍。賑調窮乏。偶配繆寡。人情大悅。邊塞孤遠。宣輒置。緣俗立法。細大收贖。十數年間。得金穀馬牛羊數十萬。邊用充饒。器械明利。士馬飽騰。人皆願戰。報王公。逾年。督諸軍出塞。大破敵。斬首千餘級。比至嶺南。亦用收贖法。時翱威望素著。諸蠻聞其來。大懼。翱略兵威。推誠撫諭。盜寇止息。酋長信向。翱常言蠻戎撫捕。各有機宜。以故四川兩廣得免騷擾之患。翱初入吏部。佐王直。天順初。落太子太保。直致仕。專任翱。翱嚴考察。公銓注。抑奔競。杜請謁。一時任使並稱得人。時李賢爲石亨逐去。英宗召見翱。問賢何如人。翱力言賢才行。得復留內閣。益見倚任。賢在內閣。亦左右翱。上進退大臣。時

時召翺面可否。稱先生而不名。翺屢乞休。不允。以故得行其志。五年加太子少保。上常諭李賢曰。今六部尙書庶皆得人。但慮吏部尙書王翺老爾。時翺年七十八。賢對曰。臣聞祿命之說。翺壽最高。尙有十年。上喜曰。如此無慮。又曰。如戶部年富不易得。賢對曰。若繼翺吏部。非富不可。上曰。然。憲宗卽位。免其雨雪朝。成化元年復太子太保。三年致仕。卒年八十四。贈太保。諡忠肅。翺善知人。文武大吏。施聚。焦禮。范信。耿九疇。軒。輓。年富。李秉。程信。皆其薦用。翺本北人。常召對。英宗每曰。北人質直雄偉。雖文章藻飾。似不及南人。願緩急得力。非北人不可。以故翺推轂北人爲多。至姚夔爲吏尙書。皆反翺。往往右南人。清譽稍不及翺。功名損於禮部時。翺端方強毅。清白儉約。立心制行。循守禮法。惕厲憂勤。仰思待旦。居第三十餘年。不改於舊。上特命有司起第縣西。公餘退宿朝房。惟朔望時令歸謁先祠。曹欽反。亦知重翺。不忍加害。李賢常曰。臬陶言九德。王公有其五。亂而敬。擾而毅。簡而廉。剛而塞。強而義。彰韶曰。王翺淡然無欲。不識姜姬。而況苞苴乎。古三不惑於翺見之矣。人皆以爲確論。子虵世錦衣副千戶。

郭璉。北直隸新安人。初名進。以太學生於永樂中爲戶部郎官。質直寬簡。臨事從容。不見喜怒。精練吏事。簡約有條。宣德初爲行在吏部左侍郎。兼少詹事。上爲改名璉。四年代蹇義爲行在吏部尙書。罷兼職。五年冬。上諭曰。以朕用人之柄付卿。卿宜爲朕擇才。昨郡守多缺。命廷臣薦舉。古人當斯任者。必勤於咨訪。有得卽錄。故官不乏才。呂蒙正夾袋。虞允文材館錄是也。慎留意。正統元年。進士李賢入選。璉試賢嘉禾詩。卽目賢爲輔相材。特奏授驗封主事。未幾旱蝗。侍臣言大臣尸位妨賢。內批令自陳。諸大臣遂皆乞去。

謝天譴。雖獨不可。曰。主上冲年。吾輩皆先朝簡任。受付託。一時請去。誰與其理。宜引罪乞改過。雖老矣。官至冢宰。豈敢貪位。願君臣恩義如此。衆服其言。疏上。盡留諸大臣。雖乘銓十四年。名不及蹇。然潔廉。務採實行。不用浮薄游聲譽之士。雖爲內閣所侵。能堅忍持正。自行其志。正統七年請老歸。

李秉。字執中。曹州人。正統元年進士。爲監察御史。才識宏博。議論持正。已負公輔之望。景泰二年。以僉都御史。總督宣府邊儲。參贊軍務。卽劾竄緣內附都督董斌去之。又盡更置諸不才將校。三年秋。瓦剌入貢。上言。迺北使臣納哈赤等三千人。馬駝畜四萬餘匹。除進貢外。存養宣府日支草料。宣府草不過二十萬束。料二萬石。我兵尙不給。何以供敵使。且永樂宣德間。敵使進馬。官驗不堪者。令塞草地牧放。不許入境。駐劄窺伺。正統間。許往牧大同。以故深知地利。數犯邊。今敵使畜多。譎詐之計。不可不防。是年冬。兼巡撫。尋改提督軍務。秉遂薦葉盛參贊獨石諸城軍務。劾總兵紀廣副總兵楊能。上曰。塞圍方棘。不得以細故。摺大將。下巡按御史。劾報。廣亦訴秉專權。召秉還京。以右通政蔣琳爲僉都御史代之。言官交章請留秉。上爲且留琳。遣言官卽勘。改琳貴州鎮守督軍務。巡撫兼留宣府四年。掩土木鶴兒嶺戰沒遺骸萬五千。請下大同紫荆諸鎮。并掩凡十數萬。是秋病。乞代不許。許一子視疾。後起復。起巡撫遼東。其在遼東。能用愛人。恩威兼濟。吏民畏服。又能識拔將校。斥遠烽火。塞上無大寇深入。卽小入。輒先覺。驅出塞卽已。以故邊民得休息。軍無冗費。敵亦知秉名。輒徙帳避去。成化二年。董山誘海西寇遼東。秉及武靖伯趙輔討降山。遼山至廣甯。誅之。徙其黨廣西。加太子少保。尋入掌都察院。爲左都御史。四年。轉吏部。代王翱爲尙

書請寄不得行。五年春致仕。先是乘與王竑並以剛方負時望。坐廢再起巡撫。乘遼東。竑陝西。未行。改淮揚。尋都給事中。張甯薦乘爲兵部尚書。竑左都御史。葉盛入內閣。時盛自廣東入議事。御史呂洪言。乘尤可薦。葉聲名損於嶺南。不可薦。乘及王竑上用。竑兵部。乘都察院。葉亦改宣府。未幾乘入吏部。其在吏部時。崔尹爲侍郎。不相能。適巡檢事爲考功郎中張寰所持。御史康定又以星變。合諸言官乞汰京。京且劾禮部兵部尚書馬昂。姚夔。程信。學士商輅。定向與乘善。諸大臣益忌之。請會臺官考察京官。大臣被劾。聽自陳。上留姚程商而馬罷去。又有御史戴壽者。請方面官復如正統間例。聽在京三品以上。大臣薦舉。語侵吏部。御史劉濤。又言薦舉開競門不可。是年朝覲。斥退者衆。又多大臣嬖黨。兩侍郎時短乘。科臣遂劾乘下廷議。兩侍郎唯唯曰。吾二人常言之。奈不肯聽何。乘遂致仕。與來朝被斥官同辭。竟快諸議忌者。諸言官又疏言。王概欲入吏部。彭時爲之內主。以故逐乘時。不自安。稱病。商輅欲彌羣口。請用崔侍郎。吏部尹轉左。葉聲右。侍郎代尹。康劉二御史並譎官。薦家居。朝臣屢薦。大臣忌其方鯁。竟不起。卒謚襄敏。年富。字大有。懷遠人。本姓嚴。籍訛爲年。永樂中鄉貢。爲山東德平訓導。疏乞修定先師廟配享從祀。封爵禮儀。召爲吏科給事中。糾正違失。務存大體。陞陝西參政。巡歷郡邑。察民隱。革姦弊。興學勸農。尤嫉賊吏。正統九年陞河南布政使。饑民流聚十數萬。剽掠鄉邑。撫輯散解。力行節儉。卻侈靡。風俗爲之一變。時敵也。先數侵邊。陞左副都御史。提督大同軍務。舉廢政。革科徵。抑豪橫。廣屯田。民始有更生之望。軍功爵賞必覈無濫。襄垣王遜燁誣富。富請老。戶部言富廉威爲姦豪所忌。不可許。景帝爲敕王守法度。勿得汚富。

憲大臣黠卒吳淮誣富不法。謂侵郭總兵。坐總兵上。于謙上議曰。穰苴布衣監莊賈軍。以軍法誅賈。卒破秦晉齊。以一穰苴故。稱強列國。裴度御史中丞。督諸大帥平蔡。我朝近日左都御史王翱。右僉都御史鄒來學。皆坐總兵上。以軍令出翱等。淮妄言沮軍法。宜究主者。事遂寢。富又嘗按山西參政林厚。坐厚法。厚亦誣富。臺置獄訊。景帝曰。厚怨富。富執法。公廉。誣富得自便。朕以邊事付富。終不以一人辱富。厚竟削籍。富又按分守內臣韋力。轉貪虐。力轉又誣富。巡按御史爲雪。富誣狀事得已。天順初。石彪倚亨。中富危法。逮詔獄。上素知富。大學士李賢又力爲解。得致仕。未幾。賢薦賈銓爲戶部尙書。召銓至。又薦富。左右不悅富者。輒巧譖沮之。上諭賢曰。戶部非年富不可。對曰。人多不喜富。上曰。富執法。宜司國計。竟召爲戶部尙書。時王翱年七十八。上又諭賢曰。繼翱吏部。非富不可。富經理財賦。蒞以勤廉。不動聲色。出納節適。八年春。陝西用兵。督餉非人。屢乏軍興。富薦楊璿。余子俊。吏部疏論富侵官。富上言。薦賢爲國同心共濟。若事輒任已。動率尤人。恐乖推讓之風。自失寅恭之義。且乞致仕。不許。富剛正樸忠。簡言寡慾。遇事直前。不顧利害。氣節才識。世不易得。卒年七十。諡恭定。

史官曰。郭璠秉銓十四年。潔廉能自行其志。賦嘉禾而識宰相。未易才也。王翱李秉年富。皆以封疆之臣。入參密勿。功名著於邊徼。及統均司計。皆剛方有執。衆正連茹。使人主計其祿命。以爲昆任。於都哉。王明並受其福。君子論世而有餘慕焉。

何喬新傳

何喬新字廷秀廣昌人景泰五年進士父文淵進士常知溫州府廉靖平恕郡中稱治召入刑部爲侍郎請告歸正統中薦起吏部侍郎景泰中進太子太保佐王直同爲尙書被劾乞致仕去喬新幼敏穎有奇質讀書發難出人意表初爲南京禮部主事歸葬父卜地不得吉會宋疏密陳文定葬父廣昌子孫貧欲鬻其葬地衆謂比吉壤喬新曰暴人父而葬吾父吾不忍爲轉刑部郎中孤介嚴冷持法平卽執是莫可撓奪爲按察副使福建擒豪強捕海盜減礦課罷牛租控險設縣表儒賢政績高偉不瑣屑簿書陞河南按察使諸貪殘吏倚強援莫敢詰喬新盜鑄暴坐法去撫輯南陽山谷流冗六萬戶陞湖廣布政使會荆襄大水漂千家民饑喬新均賑平徭列九等授役成化十七年進副都御史巡撫山西督三關兵事會山西又旱饑出倉粟賑糶三十萬石敵自河曲入塞急遣伏兵灰溝旁斬敵大敗去召入爲刑部左侍郎敵人擁衆犯大同殺邊將紫荆居庸告急敕喬新巡邊遣諜覲敵營聲言遣兵搗其巢敵懼不戰遁去山西又饑人相食卽命喬新賑贍得便宜行事因請內帑准鹽銀及粥祠部僧道牒得粟數十萬石分部賑恤又僦饑人疏溝渠出粟償直凡活人三十餘萬播州宣慰司楊輝嬖妾仍寵其子友欲奪嫡子愛諸小虜不肯從輝矯奪大壩鎮筆夷寨立懷遠宣化二長官司又割播州凱離五十二寨安甯宣撫司立友爲使張都御史輒爲輝畫請得旨會愛母死友母益橫專其家結凶黨愛反交通唐王朝廷疑愛遣喬新卽訊友母子又輦金寶賂諸權貴人欲喬新囚愛待命衆藉藉爲友遊說必欲去愛喬新至盡得友子母姦惡罪狀條上白愛無反謀革友宣撫削官銷印遷保章與產業自給播州遂定陞南刑部尙書疏奪內臣守

備蘆洲還民。孝宗初，召爲刑部尙書。喬新執法嚴毅，凡中外貴有力請寄一切不得行。上疏乞禁京師邊服邊語。鄒御史者凶橫，欲躡大理丞。喬新薦郎中魏紳。鄒御史恨之，會喬新外氏與鄉人訟，卽誣喬新得金錢與行賂，輒下上其手。要地人又從中主之。喬新杜門引咎辭位。下諸根連人詔獄窮治，無蹤跡。事雖灑白，竟不安其職。請老去。公卿臺諫交薦起，竟不得起。卒。久之得謚文肅。喬新守官清慎，律己方整，博學精法律，敏於吏事，事無難易夷險不避，嫌怨必行其志。

史官曰闕

陳俊傳

陳俊，字時英，莆田人。正統十三年進士。歷官戶部郎中。徵秋青草天津諸衛。俊言舊負未蠲，新額薦積，人不能堪。詔減三十五萬束。天順五年，兩廣合兵討叛蠻，假俊便宜，敕督軍興。內艱奪情。明年蠻平，解兵始奔喪。成化元年起陞南京太常少卿。四年召爲戶部右侍郎。俊練習銀穀，凡四方災傷，邊鎮請芻粟爲裁盈縮，條析利害曲折，佐尙書楊鼎鼎亦能聽其言。七年京師大饑，敕俊出太倉米百萬斛賑糶。俊禁絕射利者，請石以上閉不與。八年敵入河套，兵出，俊督餉。上便宜，乞內帑助邊，除徑道，發丁飛輓，軍輿不乏。榆林大捷，進俸一等。明年改吏部。十三年侍郎。九載陞南京戶部尙書。歷兵吏二部。又九載請老。俊孝友廉慎，沈毅簡質。南曹務閑，惟戶部金錢布穀出納，與內外諸司相關，多撓阻不可盡如法。俊一按典則制國用，省財不啻數十萬。卒謚康懿。

史官曰

林鶚傳

林鶚字一鶚。浙太平人。景泰二年進士。初爲御史。時言官得志輒妄言。捃摭中傷人。益交結橫甚。鶚獨持大體。略細故。常監試禮部。內閣陳循王文子不得舉。誣考官劉儼。又以鶚邑子林挺得舉。誣其私挺。逮挺考訊。且并逐鶚。及校挺文。文固有辭理。事得白。英宗復位。盡左遷諸言事。瑣狠挾勢。鴟張者。簡諸守正持大體者。爲大郡知府。鶚知鎮江。比辭。召見。賜食及楮幣。諭擢用意。鶚至郡。汲汲興利除害。不出一言。暴前人短。一江漕河孔道。往經孟瀆險。議鑿河。自七里港引金山上流。通丹陽。避孟瀆。鶚言道遠多石。又壞民廬墓。請按京口閘甘露壩故迹。稍深浚通川。春夏啓閘。秋冬渡壩。道里近。功力省。又不損居民。地利甚便。竟停役。從其言。未幾更劇。治蘇州。鶚一切簡靖。卽有建革。必審核再三。吳人重其名。旦夕責效。頗笑守迂緩。已而見其深思曲算。圖久遠利。卽又稱林太守康濟才也。超拜江西按察使。平反冤獄。必據律。不肯輒重輕。徇上下意。廣信有妖賊。妄稱天神。夏尙書等旁近邑。盡驚鶚。榜縛其魁。事遂解。否且用兵。或起大獄。歷兩布政使。歲饑。奏減民田租十五萬石。嶺南有獠寇急。調兵食捍境上。寇不得入境。成化六年陞南刑部侍郎。審訊刑獄。必從容調劑。僚屬間務適情法。內艱服闋。召刑部侍郎。時年未五十。舉望出諸卿右。衆冀鶚大用。未幾卒。官貧。無以爲殮。黃九昭謝鐸二人爲經紀歸其喪。鶚秉禮直義。造次必恭慎。公餘輒危坐。閱書史。臨古帖。作楷書。寢必夜半。漏盡卽起。馭下稍嚴。交遊不苟。事母程極敬愛。母不說。跪請移時。必

母說乃起。歷仕中外二十六年。家無益產。篤行孝廉。君子也。嘉靖二十二年。贈刑部尙書。諡恭肅。

史官曰

周洪謨傳

周洪謨。字堯弼。長甯人。正統十年進士。少有奇質。歷官翰林春坊。專心問學。爲文詞簡直有理致。不爲奇澀語。而言意宛轉可愛。尤熟國家典故。議論建白。緣飭吏事。應對賓客。出入經史。初在翰林。卽勸英宗勤經筵。以明聖學。謹內治。以敦政本。未幾。上時政十二事。條蜀寇防禦便宜。成化初。爲祭酒。兩任國子。表率生徒。規閑整。又上言。祀禮儲蓄省刑。減役薄稅。禦敵撫夷等十事。明朝尊崇孔子。冕服循前代。用天子制。而禮樂不稱。封號不加。洪謨以爲闕典。宜更議。下禮部尙書鄒幹不可。憲宗用洪謨議。增籩豆十二。舞八佾。十四年。陞禮部右侍郎。尋轉左。十六年。陞尙書。二十三年。加太子少保。洪謨又言。書蔡氏傳。璿璣玉衡。非是。以故占步不合。乞更定。有西番烏思藏者。合諸族來貢。徵賞賚舊額。歲益至三四千人。河西諸番。又詭烏思藏。益不可詰。洪謨請視海中倭夷。給與符二十道。每貢書。貢使名及貢物符上。識以舊賜金印。至關驗。是納否。斥去。成化末。月當食不食。衆議宜賀。洪謨言。月能抗食。陰盛故也。不可賀。竟不賀。弘治元年。致仕歸。聞有敵驚。力疾上安中國御四夷十事。又三年卒。諡文安。

史官曰

夏時正傳

夏時正字季爵。其先慈谿人。徙仁和。正統十年進士。歷刑部郎中。讞獄福建。會上杭大饑。盜且起。輒發倉賑贍。不待報。上聞之喜。不問。天順初。進大理丞。以母老乞致仕。不許。乞移近地。便養。改南京。進少卿。成化初。改太常。已。又進南京大理卿。七年歲大祲。巡視江西。斥貪墨吏二百二十八人。革冗徭。理庾賦。放無名之稅十餘萬。勸民粟七十萬石。賑饑民三十三萬。修南昌城隍。城不得壞。長河洞人叛。單車撫定。疏時弊三十事。常路者不悅。謂其好名。遂致仕歸。僦居民舍。布政使張瓚爲西湖書院於孤山處焉。久之書院火。歸慈谿。已。又還杭。凡家食三十年。卒。年八十八。時正博學高才。工詩文。善書。多著述。尤詳禮文之事。葉盛稱其文如春空層雲。動含雨意。又如簇蠶抽絲。秋鶴引吭云。

史官曰 闕

明書卷一百二十三

列傳四

名臣傳八

姚夔傳

姚夔字大章桐廬人。正統七年進士。爲吏科給事中。條上政務八事。內艱闕。復入科。會寇變。累疏言禦寇方略。景帝盛國議。卽眞夔預議有力。景泰元年。超陞南京刑部侍郎。三年。改南禮部。敕考察雲南諸吏。四年。還朝。留禮部。上不豫。羣情洵洵。英宗復辟。調南刑部。未幾。召還禮部。天順二年。楊溥薦改吏部。代孫弘。佐王翱。七年。代石瑄爲禮戶尙書。上願夔儀度豐碩。奏對都雅。喜甚。憲宗卽位。率羣臣上思艱難。戒逸欲。重名節。數事。成化四年。疏請謹小星。葛藟之分。以召百男之慶。睿皇后崩。議合葬禮。又議祔廟禮。上以孝肅太后故。輒報聞。夔疏言。先帝治命。錢后與我合葬。書內閣。無忘朕言。此綱常大事。臣不忍誤朝廷。又率文武百官。伏文華殿門哭諫。頓首再三。請太后竟從百官議。孝宗嘗見夔。及彭時疏。謂劉健曰。先朝大臣。忠厚爲國如此。五年。李秉去。商輅欲薦夔。彭時欲薦王概。而尹旻又欲得尙書。相持久之。乃以崔恭爲尙書。是年六月。夔代恭。七年。滿九載。加太子少保。是時屢有災變。夔力陳薦遭寢異。禍亂將起。疚心危論。冀

上感悟。因乞歸不許。未幾卒。贈少保。諡文敏。夔姿儀山立。論議河懸。雄才偉度。遇事立斷。獎誘後進。振拔淹流。意所交識。不避親故。成化初。夔言少保黃福得諛忠宣。土木死事大臣。尙書王佐。鄺瑩。雖贈少保。未得易名。佐操存正大。經略弘遠。莖心術端介。處事嚴恪。沒於王事。乞諡如福例。制曰可。諡佐忠簡。莖忠肅。史官曰闕。

于謙傳

于謙字廷益。其先河南人。七世祖基仕於金。爲汾州節度使。子孫世世爲大官。至高祖夔。仕元。爲河南江北行中書省參知政事。封河南郡公。會祖九思。仕湖廣宣慰使。都元帥。最後遷杭州路總管。卒。老於杭。遂爲杭人。祖文始仕明。爲兵部主事。改工部。父彥昭。有隱德。謙生而頎皙。美容止。七歲。僧蘭古春善相。見而大奇之。曰。異日救時宰相也。爲諸生時。按察僉事督學。諸生過峻。爭噪而擣之。方誣攘間。僉事墮泮宮池。諸生皆驚走。謙獨前掖之起。僉事督乃欲以罪歸謙。謙徐曰。噪公者走。不噪公者留。此易曉事也。今不罪噪公者。而罪不噪公者。猶可。而因以罪援公者。其謂何。僉事悟乃止。謙由此顯名。宣德中。舉進士。年二十三歲。拜監察御史。謙風骨秀峻。音吐鴻暢。每奏對宣宗前。上必爲傾聽。是時顧佐爲總憲。御寮屬嚴。獨才謙。以爲已弗如也。按江西。辯明誣獄。出數百人之冤死者。藩國挾和買爲市廛害。謙復按懲之。一方若滌。歸復偕錦衣官校搜捕官河之匿私釺者。所按覈。於權幸不少避。扈蹕下樂安州。漢庶人降。上卒命謙數其罪。謙肆口而成。其言皆正大。剴切。高煦俯首服。上大悅。還師。賞鈔幣與大臣同。久之。議增補各部右

侍郎治諸鎮糧稅兼練卒撫民上手書謙授吏部遂超拜兵部右侍郎兼治河南山西奉璽書以往時年僅三十三謙感上知遇夙夜拊循郡邑延訪父老以便益病苦歲饒則多出官糴糶民粟歸庾儉則吐庾粟減值以糶公私得相贍而於下尤利齊秦民饑徙入河南者謙令邑各給田初與之牛種而以次責其稅毋令與土著淆河勢將潰謙厚築隄障之多植榆柳其上五里有亭亭有長暨卒責以修補乃至所過經由官道俱責種樹間鑿井以利行者其在山西則以大同在塞外巡按御史稀至地往往玩狎請別設御史併上谷治之而又盡奪大同鎮將之役卒墾私田者爲官屯邊用充溢謙於吏術民事亡所不精劃而尤以足兵食明舉措振綱紀爲急當是時居政本者三楊皆重謙所奏請朝上夕報可以是得行其志滿九載遷左侍郎食二品俸謙旣在官久威惠流聞嘗輕騎自河內歷太行遇盜有伏窺者謙厲聲叱之皆大驚走曰不知爲我公死罪幸赦我謙異數當入朝議事人謂卽不橐金往甯無一二土物如合薊乾菌裹頭充交際耶謙笑而兩舉其袖曰吾惟有清風而已因賦詩見志入朝舉參政孫原貞王來自代是時三楊前後卒閣振持秉勢強甚以謙無私謁賺之勒給事中廷劾謙以久不遷怨擅舉人自代亡人臣禮下法司論斬繫三月暑讞上振怒適解乃謂大臣吾嘗見一故御史名若于謙者恣甚欲治之今乃非此于謙耶赦之以爲大理寺左少卿而所薦孫原貞王來俱顯名景泰中至尙書與謙略相埒謙甫出獄而山西河南吏民伏闕上書請借留謙者以千數周晉諸王亦言之乃以少卿復撫二省又明年復兵部右侍郎召距其初至鎮十九年矣是時南北屢用兵大盜時起尙書鄺瑩以清幹著而謙佐以弘斷部

事雖稍飭。然尙扼於王振。不能大展。亡何爲正統己巳。外國也。先旣破略獨石馬營諸鎮。至秋益猖獗。振遂挾上下詔親征。謙與鄒瑩上言也。先醜豎子耳。諸邊將士足制之。陛下爲宗廟社稷主。奈何不自重。奉以與遠人角乎。請毋煩六師。上不聽。瑩乃從治兵。留謙治部事。駕至土木蒙塵。報至京師大震。皇太子幼不能監國。太后乃命郕王攝政以輔之。王御左順門。時王振雖已殺敵。中外恨欲食其肉。於是九卿臺諫廷劾振罪。請用反法於其家。奏未竟。而錦衣指揮馬順者振黨也。妄傳王旨叱衆退。給事中王竑起直前。撿順曰。此正所謂翼虎者。今日猶敢爾。衆爭捶之立死。又捶二閹之嘗私振者死。時衛卒聲洶洶。王懼欲退。諸大臣皆披靡。有趨匿者。謙獨直前掖王。且啓王下令曰。捶順與二閹死者。義激無罪。少選俟得請皇太后。卽族振。且籍順等家。衆始退。於是王乃起。謙徐徐步出掖門。吏尙書王直者最爲篤老臣。執謙手歎曰。朝廷正藉公耳。今日雖百王直何能爲。尋進兵部尙書。謙辭弗允。乃上言。屬駕文武臣。有預軍事進止。當以失機論。卽死亦不宜濫卹報許。郕王旣卽大位。益賢謙。虛己委焉。入對慷慨泣奏曰。敵得志挾我大駕。勢必長驅而南。今軍實武庫兵盡矣。司馬宜急分道募兵。及留漕卒自益。司空宜併日而蒐乘繕械。九門要地。宜令都督孫鏗衛穎雷通張軌等分守之。都御史楊善給事中王竑等參焉。凡兵皆出營郭外。毋令避而示弱。郭外之民皆徙入內安插。毋令失所。鬻通州倉欲守之。或不能。委以與敵則可惜。宜令官軍皆給一歲祿奉。聽其自運。仍以贏米爲之直。敵所急者草。諸廠宜亦聽軍稱力取之。不盡則焚之。毋以飽敵馬。而是時石亨方坐繫。楊洪亦以逗遛當譴。謙惜其才勇。請赦之。與安遠侯柳溥爲大帥。而身總其

機宜進止。不效則治臣之罪。以謝天下。景帝皆嘉納之。敵報益急。而侍講徐璉者。以曉暢軍事聞。且好言天象。上使中官召詢之。則力謂紫微中宮皆有變。必反故都。而後吉。諸中官之鼠竄者。戀土者。相軋未定。而縉紳士人多遣其私重歸。謙乃慟哭廷諍曰。京師天下本宗。廟社稷山陵甯此。百官萬姓。帑藏康廩。萃此。此而不守。去欲安之。今日足一動。明日大事去矣。且敵乘勝驕。實不足畏也。上聞之曰善。其一聽謙處分。十月也。先挾太上皇帝。破紫荆。直窺京師。石亨議毋出兵。第堅壁以老之。謙曰不可。賊張甚矣。而我又先示弱。是佐彼張也。亟擐甲統大營。營於德勝門外。諸門皆有兵。總二十二萬。敵見我兵盛而嚴。不可輕犯。以數騎來嘗我。謙乃設伏於空屋。使數騎誘敵。敵遂以萬騎來薄我。伏發。敗之。孫鏗毛福壽復敗之。西直門謙使諜。諜上皇車駕遠。夜令人以火炮擊其營。死者千計。賊遂退。詔褒嘉加少保。總督軍務。謙固辭不許。口退語人曰。四郊多壘。卿大夫恥之。今謙不能死。而以微功賞。能無重恥哉。復上疏固辭。又不許。大同參將許貴。奏請遣使。腆其幣以款敵。而徐爲討伐計。謙謂前者非不遣使。都指揮李鐸指揮岳謙遣。而敵隨入犯。通政王復少卿王榮遣。而不獲徵太上一信。其狡焉侮我。而齷我。何似而可言。和。況敵不共戴天。譬也。理固不可和。萬一和而敵遂肆無厭之求。從之則坐敵。不從則生變。勢亦不可和。因劾貴以介冑臣。委靡退怯。法當誅。於是邊將人人言戰守。敵不能挾重相恫喝。抱空名不義之贊。始欲歸太上。而謙之伏禍肇矣。謙以涿易真保諸州郡。爲京師拱衛。力單甚。乃皆宿兵。使都指揮陳旺等分將之。以右都督楊俊帥焉。皆屹然成重鎮。俄諜報敵逼總兵朱謙於關子口。明日復報追石亨於鴈門關。烽火連屬。衆皆恐。

請大發兵援之。謙策大敵尙遠塞，必張疑兵以脅我。乃上方略授亨等，使皆堅壁，而令各營秣馬厲士。使若將大舉者，已而賊果不至。中官喜甯者，故倖賊也。下蠶室得近，而後復沒敵爲敵用。諸所要挾皆甯謀。謙密授計楊俊，捕而磔之。復授計侍郎王偉，誘誅爲敵間者小田兒。敵自是計益屈。時復議遣使與也。先和且迎太上。羣臣王直等請之力。上意不擇，曰：我非貪此位，而鄉等強樹焉。而今復作紛紜，何衆不知所對。謙從容曰：天位已定，甯復有佗言。和者說以解目前，而得爲備耳。上顧而改容曰：從汝從汝。於是左都御史楊善以奉使往。而上皇返駕，先朝處降敵近畿也。先入犯，多從之。而北會西南方用兵。謙與上謀，每征行輒挾其精騎以往，厚與之資，有功則官之。已而更遣其妻子，自是肘腋少它患。楊洪既自獨石入衛，而所留老弱，凡八城悉歸也。先，然彼亦不之守。謙謂此宣府垣屏也，不可棄。乃復授都督孫安計，使以精兵由龍門關出據之，而募民屯田。且戰且守，八城遂復。貴州苗寇久未平，侍郎何文淵請罷二司。專設都司，而以大將鎮之。謙曰：不設二司，是棄之也。棄之何以通滇、夔道，且無故而棄祖宗所設地，不祥。遂寢。當是時，浙閩則有鄧茂七、葉宗留，廣則有黃蕭養，又有獐、獐，而三楚之貴竹、苗獠處處蜂起。前後命將將兵，皆出謙獨運。號令明審，動合機宜。雖宿舊勳臣，小不中程律，卽請旨切責，究治不貸。片紙行萬里外，電耀霆擊，靡不惴惴效力。毋敢飭虛辭以抵者。以故天下咸服謙，而歸景帝能用人。太上旣歸，上奉之南城。又欲易皇太子，謙以非所職不敢爭。而皇太子立，內閣九卿俱加師傳等官。謙得太子太傅，且命兼支二俸。羣公皆一辭謙獨再辭。其文婉約以示風。上弗許。時已已城下之後，石亨功不如謙，而得世侯爵，心愧之。

乃推謙功。詔予一子副口戶。謙辭至再三。有云：縱臣欲爲子求官，自當乞恩於君父，何必假轉於石亨？聞益愧且恨。上復賜謙闕西甲第。謙辭曰：敵人未滅，何以家爲？去病暨子尙知此意。臣獨何人而敢褻此？又不許。乃置上前後所賜璽書袍鎧冠帶弓劍之屬於堂，而加封識。歲時一謹視而已。謙多寓直房，以便朝謁。一日病痰壅，上使中官與安撫醫視之，云：治痰必需竹瀝。上爲親幸萬歲山伐竹賜，且命計謙日用所需，悉出自尙方。謙惶恐謝，且乞歸。詔免朝謁，尋賜璽書，褒予備至。太宗以北伐故，宿兵燕中甚盛，而會承平久，不能無老弱。公侯中官往往役占土木之難，半以委敵。其額雖有五軍神機三千諸營，將不相屬，相支調爲恆。謙議選精兵十五萬，分十營，營以一都督令之，五千人爲一小營，營以一都指揮領之。餘兵散歸五軍等營，以備次調。雖有楊洪、石亨、柳溥爲大帥，而進止賞罰一由謙。洪、亨皆老將宿猾，而亨尤貪縱，侈自快，謙每事裁之。洪死而子俊恃勇，驚桀不可馴，嘗疏請悉發京營與諸鎮兵，大舉逐敵，而犁其王庭，可以得志。謙持不可，曰：大舉未必能值敵，值敵未必勝，而彼率其別部異道而擣我虛，甯萬全策也。俊語塞，後竟以不法爲謙紕論，削亨有從子彪，以驍勇著，亨恃而強，謙出之爲大同遊擊將軍，以是益恨謙切骨。而中官曹吉祥、劉永誠者，與謙共兵事，亦銜謙氣凌之。景帝不豫，石亨謀與吉祥等發南城鎗，迎太上復辟。甫御殿，而執謙與大學士王文下獄，謂謙文與中官舒良、王承、張永等謀迎襄王爲帝，坐以謀反。律凌遲處死。然實無顯跡可據，而廷鞫日，亨等加鉅鑕鍛煉，文不勝憤，辯之苦。謙笑曰：亨等意欲死我，辯何益？旣奏上，上猶豫曰：于謙實有功，若何時徐有貞與亨比？前曰：不僂謙，此舉爲無名。謙遂論斬棄市。籍

其家自上賜外無長物。謙死之日，陰霾翳天，行路嗟歎。吉祥麾下有達官指揮采耳者，以一觴酌其地而慟。吉祥恚扑之。明日復酌，慟如故。先是杭之西湖涸龜底，孫原貞時填其地，語人曰：「哲人其萎乎？吾甚虞于公謙死，而陳汝言者亦亨黨，代爲尙書，不一載而敗，籍其資列內廡，上召大臣入視，已愀然曰：『于謙終始景泰朝，被遇若一身而死，無餘資。』」汝言抑何多耶？俄西北邊報甚急，上憂之，時恭順侯吳瑾侍，進曰：「于謙在不令敵至此，上爲默然。是歲有貞以內閣首輔與亨吉祥爭權下獄，流金齒，又三年亨下獄，庾死，家籍，彪棄市。又二年吉祥與其從子欽反族，謙有子冕赦歸，憲宗初上疏白冤狀，上憐而復其官，賜祭，有云：『當國家之多難，保社稷以無虞，惟公道而自持，爲權姦之所害。』」在先帝已知其枉，而朕心實憐其忠，天下誦而稱之。孝宗初加贈特進光祿大夫柱國太傅，謚肅愍，賜特祠於其墓，曰旌功，冕改文，累遷，遷至應天尹，有幹用聲無子，其族繼者數世而至嵩，嵩爲都督僉事，鎮福建，謙爲文肆筆立就，詩亦爽儻，然少裁割，獨其於奏疏明切，嘗口授兩吏傳寫，指腕爲痛，所存奏牘若干卷，文集若干卷，萬曆中改謚忠肅。史官曰：李夢陽爲謙記曰：「謙死一時痛之爲語曰：『驚鷲冰上走，何處尋魚鱗。』」當敵之擁太上而南至宣府，宣人登陴曰：「賴天地祖宗之靈，國有君矣。至大同復如之，而謙又獨颺言曰：『社稷爲重，君爲輕。』斯言也，功以之成，福以之生，然歟否耶？謙以本兵，分不言和，而言戰守，當太上之迎復，謙不爲梗，小梗者王文楊俊耳。景帝之信謙，謂其能固圉，非有布衣腹心之素，一不合則睽，再不合則去，夫人主以私愛欲易太子，雖留侯不能得之漢高，而謙能得之景帝乎？故天命所歸，大寶中奪，小人貪功，伏機發，元勳甫就，膺此禍。」

烈智不及避，勇不決，悲哉。

劉定之傳

劉定之，字主靜，永新人。正統元年進士，授翰林編修。四年京城大水，詔求直言，定之上十事留中。進侍講，景帝登極，又言十事，乞奪德勝門戰功陞職，以崇廉恥，作敵愾，陞洗馬，尋進右庶子。北敵邀使，廷議未決，定之言宜遣使糜敵，我得益修內治。天順元年改通政司參議，兼侍讀，成化二年大學士李賢卒，上欲得人入內閣，敕王翱慎簡，擬上柯潛、萬安、定之、葉盛、吳節，上特用定之。陞太常少卿，兼侍讀學士。三年進工部侍郎，兼翰林學士。明年改禮部，定之在內閣，再進密疏，皆國家大計。定之博學能文，性尤孝友，微時苦家貧，授徒資束脩爲養，既仕分祿，自甘菲惡，色溫氣和，與物無忤。至居官論議，據理直言，略無沮忌。卒贈禮部尙書，諡文安。

史官曰：闕

楊繼宗傳

楊繼宗，字承芳，山西陽城人。天順元年進士，性鯁直，言動磊落。初爲刑部主事，獄中重囚數百，久桎梏，多臭腐死。繼宗巡獄曰：此曹罪皆死，卽未死，亦宜善視。時與食飲，櫛沐，蘇人無算。會廷議擇郡守，王翱薦知嘉興府。繼宗攜一蒼頭書一篋，署中蕭然如旅舍。與學勸士，憫農賑災，夙夜不懈。民有事至郡，和顏曲問，盡得郡中諸豪姦及良馴狀，與民所疾苦，爲調劑與革。有孔御史者，挾威凌有司，杖殺人。繼宗榜通衢，孔

御史酷撻人至死者言。府孔御史見之。卽之旁郡去。嘉興當江南孔道。內臣往來。百方索賂。繼宗直與菱藕。歷日。內臣曰。我無用此。太守幸與我金。或好布絹。繼宗曰。諾。卽出牒取庫金。云與太監市布絹。金錢在也。幸與印券附案。他日磨勘。內臣咋舌。不敢受。繼宗有大節。持風裁。藩臬御史。皆憚敬之。在郡。誅鋤姦豪。盡束手斂跡。但得改過卽止。不深究。滿九載。民遮道扶攜。不忍舍去。爲立生祠。祀陞浙江按察使。繼宗在嘉興。廉聲正氣。滿天下。比至浙臬。威信益著。貪墨吏望風走避。盡革諸司和市。鎮守內臣橫日。索供萬錢。繼宗一符下。杭盡革。未幾內艱歸。一篋自隨。惟衣數襲。制律書數冊而已。制闕。起爲僉都御史。巡撫順天。永平。戚宦莊田占民者。盡奪還民。成化二十一年。上疏忤旨。左遷雲南按察副使。弘治元年。陞湖廣按察使。再陞僉都御史。巡撫雲南。卒於官。繼宗好善惡惡。出於天性。與人不苟合。人亦憚其方嚴。居官三十餘年。所至民懷父母。吏畏神明。忠孝諒直。光明俊偉。雖庸人孺子。皆知其名。或言其別白太明。節目太疏。言論太激。非知繼宗者也。孫新民。熹宗朝爲御史。有聲清節。大著有祖風。

史官曰 闕

張甯傳

張甯。字靖之。海鹽人。景泰五年進士。授禮科給事中。七年大學士陳循王文。以其子不得鄉舉。順天考官劉儼。幾中傷得罪。甯疏言。元宰私其子。陷考官。失大臣體。天順中。數數裁曹石。請乞事。上以是知甯。朝鮮毛憐仇殺內降。遣甯與都指揮武忠偕往。旣行。遼東奏至。敕臣取便進止。甯時至遼陽。拜敕。言君仁臣忠。

敢自便乎。竟至朝鮮致命。憲宗卽位，乞經筵進講。大學衍義，又薦起王竑。李秉爲兵部尙書，都御史諸大臣不說。皇太后壽誕，設齋醮禮官，斂大臣金錢祈福。甯言人臣當和衷敬德，仰贊聖孝。上綏懿祉，釋老不當崇奉。瓣香非可祝釐，行之祇壞風俗，傷名教。南京給事中王徽等劾李賢，獲罪謫邊。甯又合六科申救，以故諸大臣益忌之。適廷薦甯及岳正，可任。清黃侍郎都御史者，卽其疏竟陞爲汀州知府。及至汀，先教化，後刑罰，盡除厲民弊政。勵學生造祭器八百事，表節義，恤孤獨，禁遊惰。郡事一新，諸上官故忌甯才，甯爲給事中時，才高不屑下人，人以故輒推挫之。甯亦抗志，求致仕歸。家居三十年卒。甯貌偉修度，雄文直道，御命萬里，專對不辱。出守南郡，勤恤民隱，早見遯歸。養高林壑，閑家有則，孤蹤無玷。

史官曰闕

徐有貞傳

徐有貞，初名璠，字元玉，後改今名。吳縣人，生而短小精悍，目光炯炯，注射穎敏絕世。十二三卽能爲古文辭，以其業贊都御史吳訥太子賓客胡儼，皆賞異之。宣德中舉進士高第，是歲以三月選進士尹昌等爲庶吉士，僅六人，至十月而復選庶吉士，得十三人，而有貞居首，上甚屬意焉。居二載，上爲御文華殿試，有貞仍居首，授翰林編修，預修實錄玉牒，進侍講，有貞博洽而好習兵法，及刑名水利諸家言，於天文風角占驗尤精究不倦，人或謂有貞此豈公職耶，有貞笑曰：待職而後習，則已晚矣。英宗卽位，天下承平久，執秉者新方從事西南夷，而不虞敵，有貞憂之，上封事千餘言，皆關係國家大計，而於備敵事尤切，下所

司議行久之也。先犯宣府大同諸陵。闖王振挾上北伐。且啓行。而有貞指天象。謂所親曰。茲行也。必敗。上不歸矣。已而敗。問至。大駕果蒙塵。中外籍籍。謂有貞知兵。邨王監國。召有貞入。使大璫與安等問計。有貞爲言。紫微垣俱已動。急乘敵未深入。還故都爲便。與安等面叱之。尙書于謙廷請斬倡南遷者。刑部侍郎江淵亦自稱知兵。次入對。以固守之說進。得直文淵閣。而有貞屈景帝卽位。有貞以才舉。行監蔡御史。俾鎮河南。以備緩急。援有貞請於執政者。必便宜行事。易璽書而後發。時所治彰德郡。民驟聞變。爭亡匿山谷間。有貞擇倖丞之屬。素見信者。使拊之。皆歸業。有貞乃建牙幕。兵入衛。且萬人。然多太行羣盜。有貞厚其餼。教以坐作進退擊刺之法。使自相團結。而不籍其實址。以故其人雖難制。皆踴躍願爲官用。會敵退。有貞罷鎮。徵還京師。充經筵講官。進右春坊右諭德。仍兼侍講。有貞既負材譔。急欲大顯用。邑邑不自得。乃以玉帶獻大學士陳循。而進日者之術。曰。先生帶且玉矣。居無何。循加少保。心喜有貞。數爲上言之。上不答。國子祭酒缺。循以言上。曰。是徐理耶。南遷之謬也。而可長成均也。有貞久之不遷。不能無望。循循見之。第云君無仍舊名而已。有貞悟。始改今名。是冬河決張秋。石璞治之久無功。集議文淵閣。推有貞擢僉都御史。治河。有貞自北東沮南。西踰濟汶。沿衛及沁。循河道。漢范究源流。度地行水。上疏曰。臣聞平水土。要在知天時地利人事而已。蓋河自雍而豫。出險之夷。水勢旣肆。又由豫而兗。土益疏。水益肆。沙灣之東。所謂大洪口者。適當其衝。於是決而奪。濟汶入海之路。以去。諸水從之。而洩隄潰渠。淤澇則溢。旱則涸。此漕途所由阻。然欲驟壅。則潰者益潰。淤者益淤。今請先疏其水。水勢平乃治決。決止乃濬淤。多爲之方。以

時節宜俾無溢涸。必如是而後有成。制曰可。有貞往來經營。作治水閘。疏水渠。渠起張秋金隄。西南行九里至濮陽濼。又九里至博陵陂。又六里至壽張沙河。又八里至東西影塘。又十有五里至於白嶺灣。又三里至李輦。由李輦而上。又二十里至蓮花池。又三十里至大澗潭。乃踰范既澗。又上而西。凡數百里。經澗以接河沁。有貞曰。河沁之水。過則害。微則利。乃節其過而導其微。平其水勢。既成。渠名廣濟。閘名通源。渠有分合。而閘有上下。凡河流之旁出不順者。則堰之。堰之九。長袤皆至萬丈。九堰既設。其水遂不東衝沙灣。乃更北出濟漕渠河。西鄆。東曹。南鄆。北出沮洳。而資灌溉者。爲田百數十萬頃。又參綜古法。就長擇善。加神用焉。爰作大堰。其上槌以水門。下捍以長隄。堰崇三十有六尺。厚什之。長百之。門廣三十有六丈。厚倍之。隄之厚如門。崇如堰。長倍之。架濤截流。柵木絡竹。實之石而鍵以鐵。蓋合土木火金以平水性。又導汶泗之源。出諸水。匯澶濮之流。納諸澤。又濬漕渠。由沙灣北至臨清。凡二百四十里。南至濟甯。凡二百一十里。復作放水閘於東昌龍灣。魏灣。凡八。爲水之度。其盈過丈則洩。皆通古河以入於海。上制其源。下放其流。既節且宣。用平水道。初議者欲棄渠。渠弗治。而由河沁及海。以漕。又欲出京軍。疏河有貞因奏。蠲瀕河民馬牧庸役。專力河防。以省軍費。紓民力。工部請如有貞言。不中制。以是得成功。是役也。聚而問役者。四萬五千人。分而常役者。萬三千人。用木大小十萬。竹倍之。鐵斤十有二萬。錠三千。短八百。釜二千八百。麻百萬斤。荆倍之。藁結又培之。而用石若土。不可算。然用糧於官。僅五萬石。爲日五百五十有九。先是有貞嘗欲築一決口。下木石。則若無者。而恠之一僧居山中。有道術。有貞往叩焉。僧無所答。第云。聖人無欲。

有貞沈思。竟日而始悟。曰：僧蓋言龍有欲也。此其下有龍穴。吾聞之龍惜珠。吾有以制之矣。鐵能融珠。乃溶鐵數萬斤。沸而下之。龍一夕徙而決口塞。夫有貞知制龍欲。而不知龍之以欲見制人也。功成。景帝大悅。召對。褒勉之。進左副都御史。駸駸用事。不能稍自制。而比於石亨。從迎太上皇於南宮。始亨與許彬善。以謀語之。彬曰：善。應天順人。功莫大焉。雖然。彬老矣。無能爲也。必徐元玉而後可。亨乃謀之。有貞指天象曰：豈其復爽耶。遂與其決南宮錮。而英宗復辟。捕于謙等下之獄。有貞之銜治河命。則大學士商輅與有力焉。至是併陳循等皆弗能救。從之下石。卽日進兵部尙書。兼翰林院學士。直文淵閣。于謙等之禍。中外咸側目有貞。而有貞意殊自得。請於石亨曰：願得冠側注而從。兄後。石亨爲言之。上曰：爲我語有貞。但戮力。不患不封也。居旬日。亨復言。上乃下詔。封有貞奉天翊衛推誠宣力守正文臣。特進光祿大夫。柱國武功伯。歲祿一千一百石。子孫世爲錦衣衛指揮使。進兼華蓋殿大學士。領文淵閣。賜貂蟬冠。玉帶公服。旬月之間。恩賜赫奕。與石亨張軌等埒。時上旣以虛己委有貞。而石亨與閹吉祥。數干預大政。有貞積不能平。而私暱上於亨吉祥。不能無厭色。乃稍稍裁抑之。且爲上微言其貪橫狀。上亦爲之動。會御史楊瑄。糾亨吉祥。侵占民田。諸不法事。上復以問有貞及李賢。有貞等對與瑄合。乃獎瑄敢言。俾覆覈所侵田。於是御史張鵬等。遂具革悉。糾亨它罪狀。將上之。而兵科都給事中王鉉密以告亨。亨馳訴於上。謂鵬乃已僂兇豎。永猶子。結御史爲永報讐。上遂御文華殿。悉收諸御史面詰之。諸御史具亨事。俱有驗。上怒曰：亨卽實。汝曹何不早言之。下錦衣獄。究主使。詞連有都御史耿九疇。副都御史羅綺。皆下獄。亨復訊。

於上。謂有貞賢實便之。於是併下獄。獄具有貞謫。廣東右參政李賢謫福建右參政。諸御史獨楊瑄張鵬成。而九疇綺等從輕比謫官。尋以李賢素謹重。不預情。留之。有貞旣行。而有以飛章謗國是者。其語復多侵亨吉祥。於是復訴之上。謂有貞實又使之速歸。置獄拷窮極。鍛鍊無所得。而摘其誥詞。續禹神功語。謂爲所自草。坐大逆不道當死。以雷震奉天門。宥爲民。發雲南金齒安置。有貞謫金齒之四年。而復指天象語。人曰。曹石禍作矣。是慘於我。我且歸。而石亨死獄中。籍家。其冬上御文華殿。諭李賢王翺曰。徐有貞才學亦難得。當時有何大罪。爲石亨張軌所陷。如後世議何。可釋歸田。乃赦還里。又二年吉祥族誅。有貞時尙壯。負其材。謂上思我必且召。上竟弗召。天下亦頗惜有貞才。而惜于謙才甚於有貞。其冤有貞又不如冤于謙。以故里居者十餘年。無推轂者。晚乃放浪山水間。頗以詞翰著聲。文雄奇。詩亦遒勁。竟鬱鬱不得志而卒。

史官曰。徐璠狡猾傾險。怙恃才技。幸天下有事。沾沾自喜。當駕出而私語所親。驅妻子去國。不聞叩馬之忠。及北狩而倡議南遷。傾搖人心。幾蹈靖康之禍。賴廟堂君非宣和。臣有宗李。屹然不惑。再奠鍾虡。而璠自愧其言之不酬。包藏禍心。嘗欲動危天下。而已有大功。奪門之役。所自來也。玉帶賂陳循。貂冠此亨軌。志驕意得。潛伏殺機。遂至蔽鵬舉之誅。碧藁弘之血。貽人主藏弓之悔。傷天下忠臣義士百身莫贖之心。理之肉豈足食哉。跡其守國之智。曾不如金英。而媚嫉之才。乃甚於林甫。千秋萬世。當比於盧之殺顏。張之殺岳。並汚青史。區區河功。何足道哉。

莊昶傳

莊昶字孔暘江浦人成化二年進士選庶吉士授翰林檢討與羅倫陳獻章友未幾與編修章懋黃仲昭上培養君德疏曰成化三年十一月二十九日內閣遣郎中韓定持小揭帖到東閣及史館分與太常卿兼侍讀學士吳節等令各賦詩臣等各授一帖內開花果煙火等項而帖詩讚題目仍令依舊格擬進及觀舊格俱是玩好之物鄙褻之詞臣謂陛下即位之初下溫詔放田租絕貢獻停不急之務與民息肩天下欣然承望太平久矣及觀去年以來如遣人造楮國家舊制也一聞大臣之言而遂寢節令宴樂每歲常例也一聞大臣之疏而遂罷且因災異敕諭羣臣同加修省凡此數事臣未嘗不願陛下從善如流今日之舉或兩宮在上陛下欲極孝養以奉其權耳然大孝養志不在玩好母后恭儉德著天下不在煙火況兩廣弗靖四川未甯遼東離亂北敵毛里孩包藏禍心江西湖廣大旱數千里正宵旰焦勞不遑暇食兩宮母后同憂之日臣知陛下決不暇爲此也且翰林以論思代言爲職雖供奉文字而鄙俚不經之詞豈宜撰進嘗伏讀宣宗翰林箴曰啓沃之言惟義與仁堯舜之道鄒孟之陳煙火之舉恐非堯舜之道煙火之詩恐非仁義之言臣是以不敢妄陳疏入謫桂陽州判官給事中毛弘御史陳莊論救改南京行人司副久之以家艱去不復起居定山垂三十年因薦召至京徐溥言當復景官翰林止復行人司副遷南監封郎中得風疾居野寺明年乞休不允輒歸先是廷臣薦邱濬惡之曰我則不識莊定山卒不獲入翰林及補行人司副張居正語人曰景復能作大字拜帖耶人謂景不如不出景家居潛心理學從講者常

數十人海內望如羽儀人稱定山先生。

史官曰

陶魯傳

陶魯字自強鬱林人父成爲按察副使從擊賊兵敗死之上旌死事者贈官錄一子魯得一胃盛年二十授廣東新會丞魯機明內蘊而神觀不足或從令尉列見上官獨昏睡雖督榜不恤也大藤峽諸作亂兩廣都御史韓雍總師討之檄魯隸麾下雍威擬王者二司長吏見長跪白事懼悚若不自勝一日顧峒賊最強險難下者方設策魯時直飲食侍左右謾謂曰丞揣我何意魯曰得非某賊耶雍曰然丞詎往否曰匪直能且易耳雍怒曰賊銳甚又楹阻自衛非大兵不可入部下文武數百千人熟視無可當吾寄者吾方欲身往安得易且使若食粟能之耳叢爾邑不能理乃言擊賊若妄當笞魯不拜抗言曰夫賊難攻者非賊難也我難其攻賊者也謂魯解食粟不解擊賊者明公未悉魯也蔣琬龐統廢邑事後乃爲蜀名臣公幸無棄魯使得畢技當悉縛諸醜以獻雍異之改容曰若所將幾何而辨曰三百人足矣曰何少也曰魯猶以爲多兵貴精請仕選擇雍曰任爲之魯乃標式約曰有能力舉百鈞矢射異二百步者來二軍之士十五萬人其比於式者得二百五十人曰未也請復下令幕幕數日足魯乃爲別將日操練陣法推牛酒犒甘苦共之士爭願爲死率先登大破賊斬首無算賊穴所得士女金帛悉以分於三百人已無與者衆益奮韓雍大稱賞言於朝擢爲令累功進同知肇慶府按察僉事副使左右布政使錄其子爲錦

衣千戶。魯前後任廣東。所殺及降者二萬七千餘。賊聞陶家軍。駭悚遁避不及。遇卽叩首。乞爲良民得無死幸甚。所由終此三百人。魯有以服其心。累用不躓。語有之一夫決萬夫避。況茲三百。

史官曰 闕

明書卷一百二十四

列傳四

名臣傳九

儲瑾傳

儲瑾，字靜夫，秦州人。成化二十年進士。歷南京考功主事、文選郎中。弘治七年調考功。十年陞太僕少卿。瑾與物無競，而自守介然。在考功出入三年，臧否不淆，交遊稀寡。嘗薦張吉等五人可任諫官，論救科道。龐泮等不宜以言事下獄。武宗初陞太僕卿，明年僉都御史。總糧南京，閒局無事，專心經史。訪輯國朝故事。又明年入爲戶部侍郎，闡瑾專權。公卿奔走瑾前，瑾愧憤引疾求去。李東陽與瑾善，得允致仕。上以瑾有才望，行且起之。去數月，瑾誅乃起。時瑾雖誅，諸侍佞繼用，瑾亦不樂。明年又乞休去。七年起南京戶部侍郎。是年冬改南京吏部。辭益力，起益數。其瀆易恬靖，人皆慕之。卒諡文懿。

史官曰 闕

李東陽傳

李東陽，字賓之，茶陵人。祖以戍籍隸金吾。居京師，東陽四歲能作大書。景帝召見，命書龍鳳龜麟十餘字。

奏上。上大喜。抱諸膝。賜寶鑲及上林珍果。六歲八歲復兩召試。講尙書益稷篇大義。命肄業京序。年十六。舉順天鄉試。天順八年甲申進士。二甲第一。選翰林庶吉士。成化元年授編修。十年陞侍講。十九年進侍講學士。明年充東宮講讀官。憂去。弘治二年己酉遷左庶子兼侍講學士。四年預修憲宗實錄成。陞太常少卿。仍兼前職。掌翰林院事。充日講官。七年擢禮部右侍郎兼侍讀學士。典誥敕。八年乙卯命兼文淵閣大學士。入內閣預機務。時占城爲安南侵擾。請賜詔。上命宦官往問東陽曰。春秋王者不治夷狄。安南雖奉正朔。修職貢。然特險負固。積歲已久。今遣官至其國。徒掉寸舌。小必掩過飾非。大或執迷抗命。若置而不問。損威已多。卽問罪與師。貽患尤大。宜勿聽。十年中官李廣以燒煉齋醮被寵。東陽與同官上疏曰。我祖宗自洪武至天順間。面召儒臣。咨議政事。今朝參外不得一覩天顏。且經筵日講。成就君德。裨益治道。今每歲進講不過數日。夫人君之心。必有所繫。不繫於此。必繫於彼。正士旣疏。則邪說乘間而入。近有以齋醮燒煉進者。此乃異端惑世之術。聖王之所必禁。宋徽宗崇信道流。及金兵圍城。方士郭京誑稱作法。卒使乘輿播遷。社稷顛覆。求福不得。反以致禍。至若燒煉。其禍尤慘。金石之藥。性多酷烈。一入腸腑。爲禍百端。唐憲宗藥發致疾。雖杖殺方士柳泌。竟亦何益。今上清龍虎宮神藥祖師殿。及番經廠。皆焚燬無遺。神如有靈。何不自保。天厭其穢。亦已明甚。矧熒惑失度。太陽無光。天鳴地震。草怪木異。四方奏報。殆無虛日。伏望嚴早朝之節。復奏事之期。勤講學之功。優接下之禮。遠邪佞之人。斥誣罔之說。太平之業。可保矣。適武岡知州劉滙以侮闕逮繫。科道公口奏救。上震怒。俱下獄。東陽復上疏申救。得釋。尋召至平臺。奏事。

云。十一年戊午。皇太子出閣。加太子少保禮部尚書。復召見面議團營總兵官去留。是年清甯宮災。東陽復與同官上疏曰。近年以來。災異頻仍。內府火災尤甚。或以爲天道茫昧。變不足畏。此乃慢天之說。或以爲天下太平。患不足慮。此乃誤國之言。或以齋醮祈禱爲彌災。此乃邪妄之術。或以縱囚釋罪爲修德。此乃姑息之計。癡惑聖聽。莫此爲甚。且賄賂公行。賞罰失當。紀綱廢弛。賢否混淆。工役繁興。軍民困憊。下情不達。上澤不宜。愁歎之聲。上干和氣。災異之積。止此之由。其時又有爲李廣乞祠額者。東陽執不可。及清甯宮成。召能仁寺僧入大內慶讚。東陽又執不可。上皆從之。十二年己未。給事中華昶劾程敏政考會試通私。命東陽覆試。十五年會典成。賜玉帶。十六年加太子太保。戶部尚書謹身殿大學士。十七年命祀闕里。還上時政疏。十八年上召問東陽極言奏討鹽法之弊。語具食貨志。上不豫。召入御几前受顧命。武宗卽位。加光祿大夫柱國少傅。餘如故。正德元年丙寅。上不親政。又與同官上疏曰。近日視朝太遲。免朝太多。奏事漸晚。嬉游漸廣。夫奢靡玩戲。非所以崇儉。彈射釣獵。非所以養仁。鷹犬狐兔田野之物。不可育於朝廷。弓矢甲冑戰鬪之象。不可施於宮禁。正人不親。直言不聞。而此數者交雜於前。臣竊憂之。近六月中。風雨飄蕩。雷霆震怒。正殿鴟吻。太廟脊獸。天壇樹木。禁門房柱。摧折燒燬。災異尤甚。惕然省悟。側身勵精。庶可回天。慰人不聽。又與同官上疏。語在健傳。又陳政令十失。是多加少師兼太子太師。吏部尚書華蓋殿大學士。二年。闕瑾擅權。益恣暴。尚寶卿崔濬。御史姚祥。主事張偉。爲邏卒誣執。荷校長安門外。東陽力救得戍邊。大治內苑御船。爲獵獸之戲。上疏曰。今歲自端陽後。金鼓炮火。聲徹郡邑。廐牧廝役。紛充禁廷。

大臣畏忌不敢言。小臣震懼不敢諫。不知祖宗分職設官。朝廷糜祿養士。將焉用之。伏望鑒古道以端好尚。視朝加早。則炎暑不侵。進膳有時。則元氣日盛。三年給事中安奎。御史張彧。忤瑾荷校。東陽又疏救。釋之。都御史楊一清逮繫至。東陽又力救。是夏早朝。有投匿名文書數瑾罪者。瑾怒。留上坐東角門。凡五品以下。羣臣班相近者三百餘人。悉逮詔獄。即日仆地死者數人。東陽又力救出之。五年夏旱。上疏條四事。有山東梁姓者。自陳常捕盜七十八。乞陞土官巡檢。都察院覆奏。請查七十家窩主鄰佑。俱發遣籍沒。東陽執不可。曰。七十家尚未必真。況若干無辜耶。皆得免。瑾又巧取橫斂。因窘迫文臣。凡公移錯誣。以姑免。提究爲名。各罰粟。初一二百石。漸至千五六百石。俾輸邊。東陽委曲開導。瑾不從。乃奏移邊倉爲關倉。地稍近。猶不堪。後因瑾欲天下府州縣預積倉粟。東陽言各官罪納。在邊關多勞少益。不若使納之原籍。其隨事應變類如此。四川鎮守太監羅籥。請便宜行事。瑾主之。東陽力言不可。因上疏。以爲太祖設官定制。在外都布按三司。都司管兵。而不管錢穀。布政司管民。而不管軍馬。按察管糾劾刑名。而餘則不預。其權蓋分而不專。此祖宗防微杜漸之深意也。永樂以後。漸差。都御史在外巡撫。其有番漢去處。則置鎮守總兵官。後差內臣一同鎮守。撫安軍民。防禦賊寇。其權雖同而不專。故敕諭之詞曰。會同計議。停當而行。毋得偏執違拗。未有一人專制之方者。且如四川所奏。王府宣慰。皆其綜理。夫以親藩之隆重。土官之強悍。彼心不服。則釁隙必生。又如舊有草寇生發。則調兵征勦。土官必須奏請。所有關係。尤非細故。今既革其巡撫。若并付鎮守。任其進止。非惟事體不便。恐鎮守一人亦自擔當不起也。百五十年所未有。豈敢一

且增添。若天下鎮守比例而行。則其所係又不止一方而已。上從之。遂止便宜。陳俊之得罪也。瑾因及漕運總兵官平江伯陳熊。以溼潤米等銀爲贓。致大獄。必欲置之死。東陽力爭。瑾謂熊所犯罪重。不宜姑息。東陽曰。某誠姑息。但非姑息陳熊。乃姑息陳瑄耳。瑄在太宗朝。開河通漕。有大功。金書劄劄。子孫免死。豈可盡革以傷世臣之心。瑾曰。國初功臣如常鄧。皆百戰功。今子孫且革。陳瑄不從。斫殺。有功豈足深惜。東陽曰。漢高親定十八功臣位。以蕭何不曾斫殺。但因供餉不足。遂以爲萬世之功。位居第一。蓋足食然後足兵。使當時餉不繼。雖百張良。十韓信。豈能成功。蕭何餉猶是一時爭戰之日。陳瑄通漕。每歲四百萬石至京師。誠國家萬世之利也。瑾不答。止革熊爵。會寘鑄之變。朝廷命將出師。詔誥天下。內一款取回各處差出官校。瑾不然。曰。是要革行事衙門。此係累朝舊例。如何可革。東陽曰。舊例行事官校。止在京城。今差四外。聲勢煊赫。驚疑天下。姦詐之徒。因而矯託。真僞莫辨。今已累犯煩朝廷處分。若真者取回。則僞者無所容矣。因以天順元年舊募示之。瑾語塞。會張永發瑾姦伏誅。上以東陽有反正功。加特進。左柱國。廢其從子兆蕃爲尙寶丞。是時籍瑾文書。得秦府永壽王爲瑾慶壽文。中間稱謂過於卑諂。上見大怒。欲降敕切責。東陽諫曰。自古定亂賊者。正名定罪誅其身。昔漢光武平王郎。得交通文書。會諸將焚之。曰。令反側子自安。歷代相傳。以爲故事。況劉瑾亂政。假上威福。以劫天下。天下誰不屈意奉之。書信往來。雖於法有礙。但因畏罪避惡。多不獲已。況王府懿親。若指此論罪。則遠近傳聞。各不自安。事有不可測者。今瑾既誅。惟聖明置一切不問。悉燒燬以滅其跡。使人心安帖。上以爲然。悉取文書焚之。無延及者。東陽見上。

多乖政。乃上疏曰：天下者，祖宗之天下，上天所付託，生民所仰賴。高皇帝櫛風沐雨，十餘年而後定，何其勞也。文皇帝南征北伐，定鼎貽謀，二十餘年而後成，何其難也。列聖相承，兢兢業業，罔有怠荒。先帝顧命，惟欲陛下早嗣大位，早成大婚，光前裕後，衍無疆之澤，聖慮所及，何其深且遠也。臣願念上天付託者重，思祖宗授受者隆，體生民仰賴者切，每於朝奏講讀之暇，安處宮闈，薄施恩澤，起居以節，游豫以時，保養天和，培植國本，則六氣莫能侵，百邪不敢近矣。不報，七年流賊數十萬，殘破半天下，王師屯德州，惠安伯張偉不能出，馬中錫以祖墓恐爲脅制，倡爲撫議，東陽憤然主勦，賊就平，上以爲有功，加廕一子錦，衣指揮辭。上以京軍不習戰陣，使至邊練習，調邊軍衛京師，東陽疏陳不便者十，曰：京邊官軍各有分地，無事而動，一京軍不習戰陣，恐傷國威；二京軍出則駭人耳目，致驚疑；三京軍在外特勢，擢奪淫汗，將官護短，不肯禁，小民受害不敢言；四邊軍在內狎恩市愛，傲睨軍民，蔑視官府，治之則或不能堪，縱則愈爲恣肆；五遠鄉井背骨肉，或風氣寒煖不相宜，或日費不繼而嗟怨；六正糧之外有行糧，布花之外有賞賚，非緊急不得已之時，爲糜費無極之計；七往來交錯無寧日，或變起道途，或患生肘腋；八示京營之空虛，見中國之單弱；九西北諸邊見報聲息，唇齒之地，正須策應，脫有疏失，咎將誰歸；十不聽遂乞休，卒年七十，贈太師，諡文正。有謂東陽撰劉瑾造立真觀碑，極其稱頌，人始以其泄捕瑾等事，故得全，而鄭曉謂東陽慧悟夙成，文章流麗，代言敷奏，明暢爾雅，又能獎進才雋，推挽聲譽，風韻所漸，人皆嚮附，事孝宗稱忠勤，武宗時周旋曲濟，保護善類，清謹弗渝，休休不專，政歸卿寺，人顧思之。

史官曰。李東陽高才絕學。掩映一世。而休休容物。使慕之者傾。忌之者服。故能譽謬於治朝。委蛇於亂世。弘濟時艱。保護善類。天下陰被其澤。而人不知也。夫陳實不去。以全鉤黨。呂好問不去。以圖反正。彼以潔身之義。見繩。惡知龍蛇之用乎。

馬文升余子俊葉盛傳

馬文升。字負圖。鈞州人。生有異質。貌瓌奇。多膂力。童時常與羣兒戲。每仆羣兒百十地下。識者知爲異人。年二十六。登景泰二年進士。爲御史。時王文王翺領院。皆嚴重鮮可。而獨以文升爲國器。出巡晉楚。有神君之名。天順七年。陞福建按察使。憤鎮守中官擾民。輒繩以法。民戴其德。謠謠載道。成化元年。進南大理寺卿。未幾憂去。四年。固原土胡滿四反。據石城。我兵屢敗。卽家起右副都御史。爲巡撫。佐總督項忠。率京邊諸軍五萬討賊。文升馳急傳。十日至陝。時兵已發。則簡練其留後者。申約束。通餉道。五日而嚴馳至軍。偕項忠屯中路。文升言於忠。使盡焚城傍草。斷汲路。賊始稍稍困。石城潰。先後俘斬七千六百有奇。獲其男女老弱二千六百。捷聞。轉左副都御史。賜金帛。時流賊起。漢中李鬚子。潼關火蝸兒。滿城王彪。聚衆劫殺敵官軍。文升悉計翦除。又被敵阿樂。出卽加思蘭。八年。敵入寇平涼。臨鞏。追至黑水口。擒其平章鐵烈孫。斬首多。遂上時政十五事。又禦邊三策。尋命節制三邊九嶺。敵至。遇伏驚遁。盡棄輜重。獲之不可勝記。擒斬二百。勒石以紀。又勦平岷州叛番。擒其首。文升每奏捷。不爲誇張。中亦無主之者。至十二年。始召入兵部。爲右侍郎。出總遼東軍務。制五花營八陣圖。訓士皆成精兵。上禦邊十五事。敵退。轉左。加俸一等。十

四年巡撫陳鉞誘屠殺夷虜。由是羣夷譁懼爲亂。命文升偕大通事往撫。時汪直恃寵倖功。陰主鉞議。邀文升偕行。文升弗聽。竟疾馳至鎮撫。乃盡赦其被屠家黑嶺忒等數百餘人。撫以好語。給以布粟。而海西三衛皆嚴兵來聽。文升察其詐。乃具言狀而行。諸路伏兵以待。俄果入寇。伏兵發。斬首二百餘級。生擒數十人。敵駝馬稱是。因以兵威諭都督產察懼。悉請歸命。比汪直至。敵已解散。直無所獲。忌文升。鉞行事乖方。文升多更置約束。不得動。亦大憾。文升會直巡遼。鉞具戎裝遠逐。除道。飭廚供張鮮備。賄託僚從。文升獨與直抗禮。又無所遺。奴視其左右。左右多譽鉞。詆文升。鉞乘間譏毀。直還奏文升妄起邊釁。謂三衛諸敵皆以文升禁不與易農器。故屢寇塞。上遣直及刑部尚書林聰卽訊遼東。直稍禮聰。上報盡如直言。遂下文升詔獄。文升上言實禁鐵器。非農器。竟譎戍重慶。已而直敗。鉞亦敗。下詔獄。文升得雪。復官致仕。十九年起爲左副都御史。巡撫遼東。禁輯科害。人無敢犯。文升三至遼東。皆樹奇績。明年進右都御史。督漕兼江北巡撫。旋入爲兵部尚書。念天下方困於兵。會貴州都勻苗叛。守臣請合三鎮兵討。文升不可。惟遣官勸處。卒無它。人服其識。尋方士李孜省寵倖。欲有所薦引。取中旨。改南京。參贊機務。弘治元年入臺。爲左都御史。是春上耕籍田。旣宴。教坊以雜劇進。出狎語。文升厲色曰。爾曹第陳農家作苦。使新天子知稼穡艱難。豈宜以此瀆亂宸聰。卽斥去。二御史以糾彈下獄。文升言卽位之初。不宜輒罪言官。遂得釋。又上時政十五事。上特命提督十二團營。掌院事如故。時子總以鄉貢士待選。文升使請外。曰。必大臣子而京秩。誰當外者。明年改爲兵部尚書。京城大雨。上時政十事。於貴幸多所侵。又嚴覈六軍諸校。斥其貪。

黷選揆者二十餘人。以是有怨家。夜持弓矢驚文升門。又飛書射入東長安門內。事聞。上嚴令錦衣官校緝訪。而給金吾騎士十二出入爲文升衛。文升因乞休。優詔不許。屬文升有小疾。而敵小王子以數萬騎駐大同邊外。勢洶洶。上使內臣挾醫視文升疾。文升謂此敵方敗於它部。勢已絀。無能爲也。請密爲備。而揚聲逼之。敵果徙去。南安侵奪占城五州地。詔勒還之。數支吾不服。會二國各入貢。乃請面折諸廷。安南詞服。因諭以恩威利害。厚賜之歸。還其侵地。廣西土守岑欽。與其姪薄相讎殺。巡撫欲討之。文升不許。第令騰書戒飭。已皆悔悟和解。時天下多水旱。文升力請救撫。臣發庾以賑。方馬政弊甚。民苦孳生寄養。請覆覈減定其額。著爲令。加太子少保。又加太子太保。時傳陞畫工張玘等爲錦衣千戶二十七人。文升力辭。謂此先朝弊孔。賴上初窒之。今復啓之。無功而冒武職。徒使邊將解體也。江南歲祲。有司請募民入粟。授以指揮等官。文升復諍。以爲予指揮。亦能使邊將解體。宜第予散官。上皆爲停之。四年內艱起。復敵伏。當加叛。繫至京。不服。文升折數語。伏地請罪。竄南海。先是哈密忠順王者。故元遺孽。太宗寵其王。子金印居哈密。忠順王死。王母當國。爲土魯番鎖檀阿力所擒。奪金印去。弘治四年。鎖檀阿力久故。子阿黑麻以金印城袖來歸。文升言哈密國回回畏兀兒。喇灰三種共居一城。種類不貴。又有小列禿也。力克數種強敵。時肆侵凌。至難守。必得元遺孽襲封。理國事。可傷服諸番。與服哈密。不然禍變未已。且搖甘肅。動關隴。因訪得陝巴襲封忠順王。主哈密。未幾阿黑麻復虜陝巴及金印去。邊臣檄聞。適阿黑麻遣寫亦滿速兒等四十餘人入貢。邱濬曰。哈密事重。煩公一行。衆言文升不可去。甘涼委四方邊事。始以兵部侍郎張

海都督僉事縱謙往經略。修嘉峪關。捕通阿黑麻。黠詐回回二十餘人戍廣西。文升言此虜既遣使入貢。復虜陝巴金印。迨敕使往。輒久不報。其心輕中國。不大創不戢。請以寫亦滿速兒等安置兩廣福建。閉關示絕西域諸番入貢。孤其勢。且使歸怨阿黑麻。無何阿黑麻復令頭目牙蘭率番虜二百餘據哈密城。文升曰。事急用兵不可以已。願方略何如。召肅州撫夷指揮楊叢至京。問襲牙蘭策。文升遂薦許進爲河西巡撫。與總兵劉甯彭清統番漢兵入哈密城。襲牙蘭。牙蘭遁去。阿黑麻以故悔過。遂遣使入貢。并以陝巴金印來歸。於是文升奏還其貢使。賞賚誠諭而哈密復。時皇清甯宮災。太皇太后皇太后同居仁壽宮。上命文升與工部議修建。文升言團營軍餽於役。不可復苦。楚蜀災不勝採伐。三廠有儲木尙可材。太僕馬惜薪。薪其價。可以資工匠木石費。儻不足。則幸發內帑數萬金足之。故落成而民不覺。皇太后徙居大權。賚予有加。十一年皇太子出閣。文升上疏略曰。太子國之儲貳。天下根本。宜擇老成純謹之士。以資啓沃。不宜雜以浮薄之流。恐虧損盛德。上嘉納。十三年虜酋火篩擁衆寇大同。京師戒嚴。上賜宸翰。又召入便殿。咨戰守方略。文升薦保國公朱暉等整兵爲備。敕各邊謹斥堠。修戰具。又遣文武大臣許進陳。銳率師出宣大。分遣諸大臣守天壽山。潮河。川居庸諸關。尋虜遁去。十四年拜吏部尙書。十五年加太子太傅。十七年早朝畢。上坐煖閣。召文升面諭。明年天下覲吏畢。至。卿用心採訪。大彰黜陟。對曰。聖心圖治如此。宗社之福也。臣敢不盡心。命中官掖下階。明年考察來朝官。汰不職。無異議。加少師兼太子太師。孝宗崩。梓宮出德勝門。文升徒步號哭二十里。武宗立。吉凶之費。計黃金白金約百八十萬兩。戶部計無所之。欲裁

諸王賜并借公侯助親莊田租課。文升言人主卽位例推恩。恩未下而先奪之。非禮也。命與戶部搜括那借。而大禮具舉。內臣王瑞以大婚禮。欲用儒士七人。篆刻西天番字。已得請。文升力言。方杜塞倖門。堅執不肯從。不聽。給事中安奎疏乞聽文升言。不可墮姦計。大臣垂首喪氣。直道何由得伸。非國家之利端。漸誣文升拒命。賴諸大臣力辨。事始白。文升累上二十一疏。求致仕去。會閣瑾用事。恨文升持正。三年。焦芳構中官。坐薦許進。雍泰爲朋黨。削籍。調文升子錦衣百戶琇。鈞州所。瑾誅復官。琇錦衣。五年卒。年八十五。贈太傅。諡端肅。文升立朝五十餘年。以身殉國。不避艱險。凡有大議。衆莫敢決。文升至一言而定。性介特。寡言笑。不尙華侈。舉止嚴重。修髯偉貌。望之知爲異人。居官重名節。厲廉隅。雖位極人臣。名聞夷夏。退然不敢自居。至於值事變。臨利害。屹然如山。不可搖奪。無幾。大盜趙繼亂河南。行剽至鈞。戒其賊黨。此中有馬大人家。不可動。捨弗攻。去攻泌陽。獲焦芳家。剔其先塚。時焦芳先跳匿。繼取芳衣冠。縛草爲人而戮之。曰。恨不爲天下殺此賊。

余子俊。字士英。青神人。景泰二年進士。幼孤。有大志。迥異常兒。爲戶部主事。陞員外郎。開霽精敏。有吏才。兩勢家爭田久未決。子俊一言立斷。出爲西安知府。西安關中都會府也。民事戎務。諸節鎮大臣使車往來。極冗繁難治。子俊酬酢從容。上下孚悅。西安民苦城中水艱。飲輒病。子俊爲開新渠。引山泉。市徧城市。人人得戶汲。至今便利。號余公渠。涇陽山高水下。溉田病。不得畜。子俊出府金。責清強吏鑿水。開山道。瀉斥澗。灌田千餘頃。歷左布政。轉副都御史。巡撫延綏。延綏自正統中。命都督王禎鎮守榆林。未城也。禎

始城榆林及十八寨移鎮榆林尙未衛也。成化七年始置衛。八年子俊請廣榆林城。增三十六營堡。乃請盡釐陝中伍籍之詭落者。及罪譴南戍子孫不能南風土者。皆聽還伍。實榆林衛。又擇俊子弟教之讀書。請建學立官師。爲弟子員。俗多棄地不圃藝。子俊又教之樹蔬果。開界石外地。與屯田。歲得糧數十萬石。自是榆林始爲重鎮。東渡河連大同。西接寧夏。虜不敢復肆出入。子俊又上疏言陝西有三邊。延慶寧夏甘肅三邊之中。延慶爲內地。國初逐北出虜。遠遁黃河外。至正統初渡河犯近邊。始於沿邊立界石。創營堡。築墩臺。天順以來。虜知東西諸邊各據險以守。難窺伺。惟延慶一帶地無險阻。可以馳突。屢來犯邊。掠我邊人爲嚮導。遂知河套所在。入屯其中。自是虜願居內。而我列屯守禦。反在其外。臣以爲莫若於沿邊一帶墩臺空處。築爲邊牆。立砦堡。況舊界石一帶多高山陡崖。依山形。隨地勢。或剷削。或累築。或挑塹。隄引相接。爲邊牆。便報可。於是東起清水營紫城巖。西至寧夏花馬池。東西二千里。每二三里爲對角虜臺。巖連比不絕。空處築牆。如新月狀。以偵虜避射。凡爲堡十有二。崖砦八百一十九。小墩七十有八。大墩一十五。兩月成。自是虜犯益稀矣。十二年移鎮陝西。會詔議彌盜安民之策。選將厲兵之方。條上七疏。皆行之。著令。十三年陞兵部尙書。子俊在邊久。熟知虜情。及將校勇怯。地里險易遠近。虜所出入。故凡邊臣奏請從中調度。輒中機宜。未幾致仕。復召加太子太保。改戶部。子俊又能知錢穀經費。曲算盈縮。諸吏少年敏悟者。自謂不及也。十八年出總督宣府大同山西三關軍務。言禦虜利用戰車。條式奏上。二十二年再出宣大。還京。以左都御史致仕。復召爲兵部尙書。乞致仕不出。子俊凝重簡默。外和內嚴。正不詭俗。廉不

近名。每奏對符檄。揮筆立就。會文切理。不事文飾。平生仕宦多在西北。故榆林修邊之功爲最。已而入兵部。出邊鎮。欲推榆林法盡修大同宣府兩鎮邊牆。沮於讒忌。功方有緒。竟不能就。常曰。人臣事君。當隨事盡力。凡有建樹。卽近且小。亦必爲百年之計。又曰。大臣謀國。遇有大利害。當身任其責。豈得養交市恩。爲遠怨自全之地。以故鎮榆林時。怨謗紛起。堅執不撓。卒能成功。垂利百世。卒年六十一。贈太保。諡肅敏。子俊巡撫榆林時。羅山徐廷璋以選舉巡撫寧夏。亦浚濠築墉。繕亭障。有功。馬文升巡撫陝西。稱關中三巡撫。

葉盛。字與中。崑山人。正統十年進士。授兵科給事中。己巳之變。率同列請誅將臣。扈從失律者。謝天下。後練兵。選將。討虜。復讎。如此。則大綱旣正。大義自伸。一日三疏。悉中機宜。虜退。請明賞罰。言效勞如孫鏗。死事如謝澤。韓清。宜賞以示勸。守關不嚴。赴難不力。不可不罰。以示懲。陞都給事中。監守城兵。劾于謙。德勝之捷。時北虜方張。大臣有奏留邊兵守京師者。盛言今日之事。邊關爲急。往者獨石馬營不棄。則六師何以陷土木。紫荆白羊不破。則虜騎何以薄都城。邊關不固。縱守京師。不過九門耳。如陵寢郊壇田里。生靈何急。宜固守宣府居庸。便會河南陳州。流民聚爲變。敕盛往視。除貪虐。賑饑寒。稍解散得安輯。景泰元年春。還朝。疏進沒名書。請迎駕者。留中。三年。遷山西右參政。督宣府軍餉。尋以李秉薦。協贊獨石諸城守備。都督孫安軍務。獨石馬營入城。被虜殘毀未復。列上利害。可興革八條。得次第罷行。又設暖鋪。便行旅。均蔬園。給將士。贍死扶傷。興學練士。制度品式。纖悉備具。又請官銀買牛千頭。摘戍卒不任戰者屯田。給

事中諸費七年外艱去。天順二年召爲右僉都御史。巡撫兩廣。起復。盛至廣。請令鹽商入米餉邊。與都督楊彪破賊砦八百所。斬首萬級。八年移鎮宣府。代李秉修。建屯堡。虜至烽墩輒發。不得掠人畜。養老幼與賢才。留意風教。盛在兩廣時。邱濬不喜。以故李賢亦惡盛。遂有誘盛殺降。至斥盈勞擾嶺南者。成化二年賢卒。上欲得人入內閣。敕王翱慎簡之。翱薦柯潛。萬安劉定之及盛。吳節五人。上用定之。四年陞禮部侍郎。五年改吏部。六年奉命賑圻內。八年北虜入河套。議增兵設險。或請大舉搜套。驅虜出河外。沿河築城堡。抵東勝。徙民耕守其中。敕盛往議方略。上言搜河套。復東勝。未可輕議。惟增兵守險。可爲遠圖。宜令守臣剗削邊牆。增築城堡。收新軍以實邊。選土兵以助奇便。上從之。九年轉左。盛在吏部。留意人才。務求實行。議論恆守經義。未幾卒。年五十五。諡文莊。盛博學宏才。清修苦節。言行相孚。文武兼濟。每稱慕范希文之爲人。尹旻常問張甯。宣德以來制科中人物誰第一。甯曰。季聰。旻曰。季聰何敢望與中。史官曰。好水川之捷。馬文升武功爲最。至其安海西。款黔粵。率坐制勝算。不以武力。可謂伐獯豸而威蠻荆者矣。項忠坐困滿四。處置荊襄流民。余子俊增築墩牆。使榆林屹然重鎮。葉盛修復獨石。破兩廣賊砦。皆功在巖疆。聲聲彪炳。而不免於讒。故知衡禹作相。甘陳沮封。充國功成。主由魏相。自古爲然矣。

黃孔昭傳

黃孔昭。初名曜。以字行。改字世顯。浙太平人。天順四年進士。年十四。遭父母喪。哀毀骨立。既長。執友建甯守賀沈知其賢。薦松溪訓導。不果。歎曰。士有志用世。乃藉人薦舉耶。棲居讀書。刻苦特甚。志忘寢食。清介。

有守。自舉進士。卽著廉名。爲工部屯田主事。寮友忌之。嗾姦吏誣奏。事竟白。同寮坐傾險去官。孔昭以故譽益起。陞都水員外郎。調吏部。歷陞文選郎中。持銓清慎。汲汲以人才爲慮。常曰。國家之用才。猶農家之積粟。粟積於豐年。乃可濟饑。才儲於平時。乃可以濟事。自頃矯激沽名。以閉門謝客爲高。天下人才何由知之。凡出署客至。輒見詢訪。有得必書於冊。量其才。隨其地望。參之輿論。薦用各當其才。或因勢家干請。欲私用其人。輒力言不可。卽不能盡阻。後其人多自敗。孔昭不妄交遊。陳瀛謝鐸。獨以道義相好。奉詔薦應天府尹樊瑩。福建按察僉事章懋。孔昭體貌嚴重。不躁語戲笑。沈靜自守。厚儉睦族。讀書尙理致。尤精詩格。謝鐸言其在文選。每見色喜。則知賢者之得進。如見色憂。則知小人之不得退。如是蓋有十五年。始終一節不少變。陞右通政通政使。五年陞南京工部右侍郎。王恕屢薦之。竟未及柄用而卒。張悅稱其學純志潔。公正剛直。重如山。不依勢以動。介如石。不逐物以移。嘉靖中贈禮部尙書諡文毅。子備亦爲文選郎中。備子綰官生。從張瓊桂萼後論大禮。歷官禮部侍郎。遣使交南。陞尙書未行。落尙書。以侍郎致仕。

史官曰 闕

王鴻儒傳

王鴻儒。字懋學。南陽人。成化二十三年進士。鴻儒自少聰悟天成。書過目成誦。作字端勁有古法。里人有爲府史者。常致鴻儒佐書府中。知府段堅見其書。顧奇。史對曰。史里人王生書也。堅卽召見。曰。子風神清徹。豈塵埃中人。卽留讀書府中。續食授衣。入郡學爲諸生。提學副使陳選異其文。曰。此生文章經世非

直舉賢。未幾發解河南第一。筮仕南京戶部主事。進郎。弘治九年陞僉事。山西提學。十五年進副使。仍提學。在晉九載。孝宗勵治思賢。常召見。劉大夏論人材曰。潘臬中如王鴻儒。他日可大用。正德改元。乞致仕。賜誥。四年卽家。拜國子祭酒。不數月。憂去。七年。又拜南戶部侍郎。十年。召入吏部。歷左右侍郎。常曰。惟誠與直。能濟國事。趨名者亦趨利。於社稷生民無益也。時吏部尙書陸完有才名。與宸濠通。鴻儒極稱。夏原吉。王翱二人賢。可師法。完意不悅。十四年二月。陞南戶部尙書。是歲六月。宸濠反。完敗。鴻儒出督餉。留都。至九江。聞變。遡流欲入武昌。約守臣起兵討賊。又聞武宗南巡。益憤懣。疽發背卒。諡文莊。鴻儒博聞多識。凡祖宗設政任人。及先輩立朝行己。歷歷能言。至論時務。要決成敗。可否通窒。如探囊指掌。待物開誠。不問人私。人亦不敢以私問也。南陽知府段堅。蘭州人。治南陽。脫略簿書。宣導化理。官至山東右布政使。致仕。廉清有吏才。

史官曰闕

劉鉉傳

劉鉉。字宗器。長洲人。樸不離俗。介不附權。有上世君子之風。以楷書選翰林秀才。舉順天鄉試。授中書舍人。宣德初。預修兩朝實錄成。遷兵部主事。正統初。再預修宣德實錄。進侍講。常因內閣曹鼎薦。命教庶吉士。十四年。己巳。進侍講學士。景泰改元。充經筵官。遣祭濟瀆。先是。鉉有同鄉人楊藹。侍上於王邸。至是。常被召入內殿。藹因主於鉉家。雅識其爲人。手疏鉉可大用以上。授太監宋某曰。俟有缺言之。久之莫聞也。

會宋病。召醫盛叔大治之愈。問醫何許人。曰長洲人。曰長洲有劉先生者識乎。今爲何官。盛以劉草窗曰爲吏目。宋曰非也。翰林學士爾。盛曰劉學士古板人。宋曰上亦察之。且將召之矣。盛退以告鉉。且欲與同見。鉉謝曰見之何爲。旣而怒曰上奚從知我哉。必肅之言也。主於我而言我何貴哉。時易儲之議漸萌。會部缺兩正卿。廷議可任者。宋卽出手疏於上。上令送關曰可用學士爲之。大學士陳循等遂擬鉉以進。時江淵不喜鉉。乃退語內侍曰鉉素不能幹事。不可用。乃用編修辭琦。鉉聞喜曰江公知我者。三年陸國子祭酒。壬申嚴條規以淑諸士。未幾報易儲。諸司無大小俱勸進。同官司業言於鉉曰百官俱勸進。國子獨無可乎。鉉答國子監課士則可。勸進則不可也。遂止。後英宗復辟。閱諸疏見勸進無國子監名。問徐有貞曰祭酒何人。官幾年矣。有貞以鉉對。上曰吾欲一識之。乃召對文華殿。上曰卿可還傳東宮。遂命爲少詹事。尋卒。贈禮部左侍郎。諡文恭。錄其子啓爲尙寶少卿。

史官曰昔人謂鉉介特自持。言行不苟。楊士奇楊溥常過其所居名假菴。甚湫隘。亟稱爲古人。歎賞久之。觀其不謝中貴。則與薛瑄之不枉見王振。同一貞操。不表易儲。則當時於商高陳諸人且輸一籌多矣。如鉉者豈非可大用而不究其所用歟。

明書卷一百二十五

列傳四

名臣傳十

陳鎬附弟
欽傳

陳鎬字宗之。系出會稽。以祖嵩通天官學。徵赴南京。占籍欽天監。父瓌由鄉舉爲豐城教諭。鎬賦質卓穎。少受庭訓。以文行聞。成化二十二年丙午鄉試第一。明年成進士。授禮部主事。乞便養。改南吏部郎中。晉山東提學副使。爲人明敏。有吏幹。董學時。校閱精核。公廉詳慎。始終如一。諸生登降之序。皆自書之。不假手吏人。輯洙泗誌。振發士習。諸生感其風誼。輿起成就者甚多。齊魯間稱名督學。必首推之。晉江西參政。正德五年庚午。晉湖廣布政使。會漢沔盜起。流劫郡縣。民之貧無賴者。蟻附其間。徒黨日衆。鎬設方略。督官兵以次討平之。餘賊未盡。朝廷卽晉鎬都察院副都御史。巡撫其地。鎬曰。良民可驅而爲賊。顧不能還。賊爲良民乎。於是移檄諸郡。脅從者不治。湖湘素服其威信。見檄卽盡散歸農。蓋負固阻深者。成喁喁有更生之樂。七年壬申。以疾乞歸。命未下而卒。所著有矩菴漫藁金陵人物志。弟欽。字諒之。早負文譽。兄弟齊名。成化丙午丁未同登科甲。授南武選主事。署選軍事。秉持清格。峻拒請託。豪貴者側目。咸思中之。會

武庫郎中婁性被誣。下獄取勘。同部人皆搖手避。莫敢暴白。欽獨奮身。疏其冤狀。詔并逮欽。同繫者二年。性病日寢。賴欽周旋。得不死。久之。性乃獲免。而欽亦以此名聞天下。出知廣平。廣平爲畿輔要郡。簿書填委。欽洞達民隱。臨事果決。至則踔厲風發。百發具與。以時巡行屬縣。問民所疾苦。廉有司賢不肖。而勸懲之。有望風解印去者。郡人號爲陳母。弘治乙丑。入覲。吏部舉天下卓異者十人。請加宴賚。以欽爲首。晉廣東提學副使。條教甄別。士方嚮風。以疾卒。時論惜之。欽嚴毅方正。所與游必當世名人。於物非其義不取。服官二十年。樸素一如寒士。爲文典則閑遠。知其於忠愛孝友甚隆也。所著有自菴集四卷。海山聯句集。史官曰闕。

王竑羅通傳

王竑字公度。其先江夏人。祖戍河州。遂爲河州人。正統四年進士。竑正直剛毅。有經濟才。初爲戶科給事中。郕王監國。初在午門。南面視朝。百官劾王振誤國。讀彈文未起。錦衣指揮馬順振黨也。從旁叱言官去。竑獨前掉順首曰。此正姦臣。當亟誅。百官批殺順。又索毛王二長隨。監國爲擊死。血漬丹陛。內臣滌血。長史儀銘曰。勿滌。爲若曹鑿。復彈籍振家。并其黨。是冬虜犯京師。命竑監守北城軍。當是時。北城諸將獨戰勝。退虜。京師解嚴。竑上言。虜去不大挫。必再至。宜急爲戰守計。勿遂謂無事。陞僉都御史。守居庸關。訓練士卒。繕塞險隘。軍政一新。又能諭以大義。感動羣心。北門屹然。尋病還京。以蕭啓代。景泰二年。漕漕淮上。兼巡撫。清理鹽法。賑濟有方。民多賴之。劾巡河御史王氓貪淫。謫民。戍開平。四年。會災傷。上疏言山東河

南東昌開封。抵江北徐淮。去年正月大雪異常。夏秋雨水。人民廬舍漂蕩。麥稻淹沒。老穉顛連流徙。邇者新春風雨連月。寒沍倍冬。不識天意何在。常觀易泰卦象曰。內陽外陰。君子道長。小人道消。否卦象曰。內陰外陽。小人道長。其候類秋冬。是陰盛陽微。殆食祿者君子少而小人多故也。然小人之行。豈懦而不用。鈍而不敏。訥而無言。愚戇而冒犯。天怒者乎。必其欺詐若誠敬。便佞若忠鯁。大貪若廉。大姦若愚。卽書所謂靜言庸違。孔子所謂色厲內荏者。是也。伏望皇上念祖宗社稷之重。上天咎徵之戒。責有位之臣。痛自修省。改圖進君子。退小人。裨忠良者任政。姦邪者屏處。又必省刑罰而止聚斂。節財用而抑貢獻。罷無益之工。嚴無功之賞。散財以收民心。愛民以植邦本。庶幾人事修而天變可回。然欲知君子小人邪正。又必本於聖德之明睿。伏望皇上日親講臣。俾陳二帝三王與祖宗列聖養心修德之要。以清出治之源。則庶幾君子小人莫逃天鑑矣。臣濫處臺憲。致茲災異。無所逃罪。伏乞罷歸田里。上覽曰。賢哉都御史。勿自劾。乃自引咎。敕諸大臣修省下。災郡邑賑濟。竑又上疏言。饑民流徙就食。臣分遣屬吏沿河贍賑。每遇過舟。董令出米爲粥。分給。賴存活者一百八十五萬八千五百人。勸諭富有力家出米麥穀粟二十五萬七千三百石。銀三千六百七十兩。錢縣布半之。量給被災者五十五萬七千四百七十九家。缺農具種子七萬四千三百九十七家。亦以官物賑給。民流去撫來。復業者五千五百九十三家。他境流冗安輯者萬六千餘家。幸賴聖明。盜賊稀少。願鴻鴈之哀鳴。方思鷓鴣之棲戢。未寧更藉休養。庶民康寧。四年陳循金濂皆薦竑。心純政平。委曲調劑。弘濟民艱。沉總督漕運。姦貪畏憚。兼理巡撫。民兵慕戴。陞副都御史。仍治淮安。

上皇復辟。謫浙江參政。英宗百喑。曰。竑者是請我弟籍振者也。尋除名。編管江夏。居半歲。放歸田。天順五年。李來犯陝西。我兵再敗。薦起竑視師。虜退。再蒞淮上。威行惠戢。聲望益重。憲宗卽位。收用名賢。陞兵部尙書。時兩廣蠻反。竑薦前侍郎韓雍有文武才。宜令帥師討蠻。而雍新得罪。衆難之。竑曰。天子方棄瑕錄瑜。疑雍罪不當用。乃竑非罪廢者耶。議乃定。竑守法嫉邪。人多嚴憚。不能盡行其志。三閱月。請老去。歸。二十年。乃卒。正德中。謚莊毅。竑與李秉皆一時名臣。比居鄉。竑抗志寡交。秉出入里閭。博奕諧謔。竑聞之。曰。執中八座大臣。胡逐細民戲狎。不自愛。秉亦語竑曰。所謂大臣者。豈立異鄉曲矯激爲哉。

羅通。吉水人。弱冠舉永樂十年壬辰進士。授監察御史。巡四川。有風節。十九年。通偕諸御史上疏諫。忤旨。未發。亡何。交趾通。上詔諸御史爲其地知州。通得清化。已而黎利叛。來攻清化。通累擊卻之。時成山侯王通擅與利媾。棄交趾。拔吏士歸。檄至。通怒。髮上指。謂衆將曰。王通不奉上命。喪地辱國。此城乃羅通生死所耳。衆將曰。如教。於是獨不與利清化。利大發兵八萬。晝夜攻圍。通以少擊多。殊死戰。大敗之。踰年。而詔使至。如王通議。乃羣吏士歸。上怒。收成山侯下獄。關死。贖爲庶人。餘皆罷謫。有差。而獨召見通。改戶部員外郎。久之。坐法免。徙邊。赦歸。正統初。起兵部職方郎中。從尙書王驥甘肅征阿台。朵兒只伯有功。十四年冬。英宗北狩。報至。以通守居庸關。給事中孫祥守紫荆關。廷議並授僉都御史。時景帝初卽位。面諭吏部。誤云副都御史。二人竟得副都御史。歲十月。也先脫脫不花以三萬騎逼居庸。通飭將士冒矢石固守。虜去。而宣府參將楊俊者。以精騎入衛京師。道關。夜遣人告通。通伏劍厲聲曰。若欲保京師耶。保京師。保居

庸足矣。下令有一人一馬南渡者斬以徇。乃止。會天大寒，令老弱汲水灌城，冰堅滑不可破。虜乃趨紫荆，選兵追敗之。未幾虜酋那言帖木兒五千乘南襲至拘羊山，通率兵斬捕虜有功，召入參贊軍務，理院事。景泰元年，通疏乞救石亨、楊洪各率精銳，享自紫荆出大同。洪自居庸出宣府，巡哨提督官軍堵塞關口，修理牆樁，勦除賊寇，防護耕種。又疏言邊軍妄報首功，虛張虜勢，德勝之戰近在都門，斬虜幾何。陞六萬六千有餘。又疏言腰玉珥貂者皆苟全性命，忌能憎言，與于謙不協。謙上言德勝當先一萬九千八百八十八人陞一級，陣亡三千一百一十八人陞二級，餘皆給賞。何至六萬，因乞罷兵柄放歸。府部院翰林科道疏乞留于謙，亦言通志在滅賊，爲國計無他，謙等宜同心協力，勿互猜嫌。是年通乞下令擒斬也。先伯顏帖木兒喜甯者賞萬金，封公侯。于謙上言口外軍民連歲被兵，不能種藝，恐虜犯野無所掠，擁衆以送，爲名突至太原，則山西搖動，而河南淮甸之間亦可憂矣。宜選有謀略文職大臣住鎮山西，上以命通。時昌平侯洪乞差文大臣率兵出鴈門，用鹿角擡營護山西餽運大同。兵部請命通，通意不欲行。疏言于謙楊洪建此策，乞令與臣同行。奏下。謙復疏曰：當國家多事之秋，非臣子辭勞之日。臣謙諳熟山西事情，謙宜去，上仍令通往。三年冬，通言虜恃馬力出入塞下，今也先使臣有馬四萬，宜增價酬之，價重則馬益至，不數年塞馬自空。此坐弱強虜之策也。是年督兵逐虜懷來，至長安嶺，又斬首有功。加太子少保，龍門驛，鷲諸城殘破，守將撤兵內徙，遺芻糧數萬。通言上虜來有鄉導，欲奪芻糧，守則軍力不足，運則民財不足，焚則國用不足。乞廷議。戶部尚書金濂奏：下通及總餉侍郎劉璉總兵朱謙共計上，已而虜退，通請班師。

遷京協贊軍務。四年上將傳要略。命以訓練將士。是秋進右都御史。天順二年致仕。弘治十八年。隆興父老。奏己巳之變。通守關有保障功。敕祠居庸關。史官曰。任天下事者必有蓋天下之氣。方睿皇北狩。中外岌岌。莫敢誰何。手捽姦臣之首。血漬殿陛者。王竑也。邊帥入衛。伏劍厲聲。不令隻馬南渡者。羅通也。可謂有蓋天下之氣矣。卒之守居庸。遏虜騎。北門屹然。皆得兩臣之力。豈徒以抗厲自雄者乎。

顧璘傳

顧璘。字華玉。上元人。弘治丙辰進士。授廣平知縣。陞南吏部驗封司主事。進稽勳郎中。正德五年庚午。知開封府。癸酉。謫知廣西全州。丙子。起知台州府。陞浙江左參政。嘉靖改元。陞山西按察使。以病免。庚寅。起爲江西按察使。未行。陞浙江布政使。壬辰。進右副都御史。巡撫山西。疏乞終養。忤旨。落都御史。以布政使致仕。丁酉。再起爲右副都御史。巡撫湖廣。己亥。陞刑部右侍郎。改吏部。會顯陵肇工。改工部。領山陵事。進工部尙書。事竣。還朝。改南京刑部尙書。璘融朗闊達。精於吏理。能激昂任事。初蒞廣平。甫弱冠。判決敏利。摘伏若神。至爲開封。盜起燕薊。流劫中原。所在騷擾。彭澤領兵壓境。上簡璘自輔。璘練兵轉餉。取其呼吸。折衝勘亂。謀畫居多。鎮守中官廖堂恃瑾黨。圍奪自恣。璘每折其萌芽。瑾誅。堂罷去。而王宏者尤諱謾。繼堂出鎮。璘故不爲禮。有所徵需。一不答。歲時展謁。長揖而已。用是積忤宏。宏方恃錢甯爲援。矯詔逮赴詔獄。璘抗言條對。一無所承。甯無已。遣邏卒陰探郡中。無所得。乃文致他比。以上鑄三階徙全。全僻荒遠陋。

璘不鄙夷其民而拊教之。久之民用乂安。士與於學。甫三年移台州。台武衛錯居。俗獷而喜訐。胥吏並緣爲姦。璘爬剔抉求。得其利弊所在。次第興除之。故事武衛諸城郡爲修築費。率爲主者乾沒。恆歲一築。築輒壞。璘鉤得所侵漁。悉沒入爲城費。擇人經理。故所隸三城特完。郡瀕海。貧民業鹽自食。苦邏卒窘之。相賊殺不止。璘爲弛禁。俾得負販出郡下。而薄其稅入。往軍餉不時給。貧軍多稱貸。璘得肆侵牟。璘支放有期。軍皆給足。而姦民無所牟利矣。郡南瀕江。多水患。有中津橋。且壞。公修復之。因築石隄。而樓其上。凡數十楹。人莫喻其旨。已而潦水猝至。民居得依樓以避。所活以千計。乃服其先見云。璘久於台。悉浙中事宜。繼起爲參政。與左布政日益練達。展采措事。惟志所欲爲。若賦發科譎。調補吏胥。皆吏蠹蟠結。前政所不敢問者。璘排根絕。蔓振剔不少縱。文牒糾紛。隨事剴裁。司無留政。御史按浙者。皆斂手無所事事。迨撫湖南。提封數千里。撫臣尊重。受計坐理而已。璘輶車徧歷州郡。跋涉險阻。不爲厭。故事行部。以藩臬守臣自隨。悉謝去。供頓次舍。才足周用。民不知勞。念荆湖沃衍。而流庸情弛。科輸煩擾。故所至勸農業。平徭稅。民用安集。而歲亦登。比在鎮逾年。多爲建白。首言地瘠民貧。兵食不足。藩祿無節。後繼爲難。又以湖湘控扼邊徼。地大事繁。御史按部歲一代。勢不得徧。欲添差御史。分蒞湖南北。以廣詢謀。又言外臣多茂異。比限以藩府戚屬。不得內徙。非舊制。乞越例推選。以收滯才。時雖不盡行。聞者以爲篤論。顯陵之作。經費不資。璘長於料簡。程省弗懈。視他所營。率損費十五。而功實倍之。且規制宏偉。民不告病。爲刑尙書。不肯就黻。徇人。苟權於辜。必以法繩之。而怨譏是興。蓋璘負天下重望。高視闊步。遇權貴或傲然不爲意。而與

山林文學行誼士。乃講均敵禮。孳孳獎進之。惟恐不給。坐視忌者側目。雖晚躋尚書。卒困於讒。以沒。人多惜之。平居事親孝。父病疽。時已五十餘。與同臥起。吮濯扶掖。肉血淋漓。十指皆潰。曾不肯委勞於人。處羣從兄弟。尤極友愛。少學於李璠。璠死。妻萬困饑寒。日爲資給。又爲其子置產。旋置旋廢。而其子卒困以死。乃迎萬養於家。死爲殮葬。而給其孫如子。終其身不衰。至於里黨族屬婚喪緩急。多倚成之。爲文不事險刻。雄深爾雅。詩尤雋永。時出奇峭。樂府歌詞。不失漢魏風格。自少已有名世志。舉進士。卽自免歸。與侍講陳魯南。太僕王欽佩。及從弟副使璫。相友。聲望奕然。出入所雅遊。若李獻吉。何仲默。朱升之。徐昌穀。皆海內名流。而璠。頴。頤。其間。所歷。沅。湘。天台。衡。岳。皆山水勝處。雖簿書鞅掌。不忘觚翰。所至領客讌遊。感時懷古。臨觀賦詩。風流文雅。炤曠林壑。有古高賢特達之風。所著有國寶新編。近言。顧氏七記。浮湘。蘆山中集。息園集。憑几集。登衡小記。總若干卷。弟璫。有奇節。著寒松齋集。並行於世。

史官曰

耿九疇黃紱高明傳

耿九疇。字禹範。廬氏人。永樂二十二年進士。宣德六年爲禮科給事。議論持大體。有清譽。正統二年。兩淮鹽法大弊。擢運司同知。九疇性節儉嚴肅。尤慎交接。無毫髮私。吏胥豪商勢家。凜凜不敢肆。常條奏鹽法便宜事。著爲令。內艱。鹽場數千人走闕下。乞留奪情。陞都轉鹽運使。常坐水旁。童子曰。水清不若使君清。已而被誣。逮下獄。得釋。進都御史。仍清理兩淮鹽法。景帝初。陞刑部右侍郎。屢辯疑獄。勢利不能休。有婦

訟其夫坐離異。九疇不可杖其婦歸夫。尋又出理兩淮鹽法。已而兼江北巡撫。歲凶盜起。九疇善循拊。流民復業者七萬家。敕錄諸郡大辟囚寃。得釋者甚衆。有婦人來何苟家者。去而死。婦家訟苟與弟殺婦。苟誣服。九疇疑之。釋苟兄弟。已設法。竟得殺婦者。代還京。景泰三年。王文當出陝西鎮守。代陳鎰。文不欲行。諷諸御史留己。九疇以侍郎出陝西鎮守。除弊屏貪。威望益著。先是巡撫多部寺司堂。上官文移。不得輒下。按察司下。亦不肯受約束。九疇奏得徑下。邊將請增臨洮諸衛戍兵。下九疇議。言邊城士卒不爲少。將官能嚴紀律。精練習。勤撫恤。絕侵漁。養銳氣。何不可一以當百。加之賞罰明信。則人人自奮。不然徒冗食耳。竟不增戍。是秋。敕九疇考察陝西方面官。四年冬。陝西左布政使許資言。侍郎鎮守與御史不相攝。文移輒廢。改九疇右副都御史鎮守。會有旨。市羊角爲上供燈。九疇疏論曰。昔宋神宗買浙燈。蘇軾諫止。今買羊角製燈。無乃類是。書曰。不矜細行。終累大德。上遂止。天順元年。公來自陝西。留爲右都御史。掌院。考察諸御史。是年。諸御史劾曹石達詔獄。并逮九疇。降江西右布政使。尋調四川。上知九疇清正。一日對輔臣論人才。言九疇去非其罪。李賢對曰。九疇操行誠不易得。未幾。以禮部右侍郎召。至京。陸見。上憐其老。改南京刑部尙書。曰。遂卿優閑耳。四年卒。上聞之。歎曰。可惜此老。九疇孝友純至。居喪秉禮。平生無他嗜好。退食焚香。讀書而已。交遊不泛。請寄不至其門。雖權貴亦敬憚不敢犯。論事是非。確然不肯詭隨。好善嫉邪。別白太過。以與故衆寡合。累遭譴困。諡清惠。子裕。裕字好問。景泰五年進士。入翰林爲庶吉士。七年除工科給事中。天順元年。九疇在西臺。改翰林檢討。是年。石享被御史劾。恨九疇斥去。謫裕爲泗州判。

官改定州。成化元年召還翰林。歷國子司業祭酒。誨教有恩義。時異姓諸侯年幼者。令學於國學。裕類古諸侯。勸戚言行可法者爲書授之。十二年陞吏部右侍郎。尋轉左。二十二年進尙書。代尹昇。清慎簡平。鈐法疏理。諸請寄者不便。忽改南京禮部。而以工部尙書李裕代。孝宗卽位。改南京兵部。參贊機務。弘治元年召爲禮部尙書。婚喪諸大禮。傳經律酌古今行之。崇王請朝。下廷議。裕請遵祖訓。遣書王勿朝。西夷由南海貢獅。裕曰。賈胡嗜利。輒開海道。宜卻去。六年復改吏部尙書。代王恕。加太子太保。天順初。德秀諸王出閣。李賢言四王講讀官八人。翰林官少。擇新進士授翰林檢討。充王講讀官。至是諸王將出閣。亦按故事選十進士侍王。十進士詣吏部請。九年滿考得陞。改出王府。裕以爲例不可。十進士語不遜。裕劾十進士首爲除名。餘調外。裕在吏部。薦進賢才。務協輿論。愛憎毀譽。莫能淆奪。守正立身。干謁斷絕。卽內降斜封。封章抗議。杜塞倖門。父子清修。不營產業。不治居宅第。約儉蕭然。無異寒素。裕偉幹修髯。儼然神明。學問該洽。文章雅正。弘治八年卒。贈太保。諡文恪。

黃紱。字用章。封邱人。曾祖思豫。事太祖。掌太常事。以罪編氓沅州。又徙戍平越。紱以故爲平越諸生。舉雲南鄉試。正統十三年進士。爲行人。歷南刑部郎中。爲人廉直。遇事颺發。卽重忤時貴。不恤。必欲行己意。人或笑黃郎中呆。紱正色抗言不移沮。亦竟以是得名。人皆稱曰黃呆。譚千戶者。大猾任俠。結權貴顯人。常奪民廬場萬畝。貴顯人業與譚千戶酒飲食往來。卽知民枉。不能直。紱竟盡法。直廬場歸民。歷四川參議。參政。右布政使。數年。初督松茂軍餉。劾治將領侵冒。擒諸倚勢豪肆邊上者。參政時過崇慶。忽旋風起。輿

前。紱曰。卽有寃且散。吾爲若理。遂止抵州。沐而禱於城隍。夢中若有神言。州西寺云。紱密訪州西去四十里。有寺當孔道。倚山爲巢。紱旦起。率吏兵急抵寺。盡繫諸僧。諸僧中一人少而壯。甚悍惡。詰之無詞。牒卽塗醋。聖額上曬洗之。隱有巾痕。紱曰。是盜也。卽訊諸僧。諸僧不能隱。盡得其姦狀。蓋寺西有巨塘。夜殺投宿人沈塘中。衆共分其囊資。有妻女。則又分其妻女。匿妻女隱窖中。恣淫毒久矣。紱盡按律殺僧。毀其寺。搜出人妻女。給資還。倉吏倚王親。侵沒官糧萬計。王曲庇倉吏。紱竟按如法。紱爲錢穀吏。精律比。輒能發摘姦伏。威行川中。青神令聞風解綬去。爲右使時。奏閉建昌礦。爲左使湖廣。妖僧繼曉至。勢薰人。紱曰。繼曉以妖術故。不離上左右。今且得罪。雖名掃墓。實逸賊。檄武昌府館之後堂。好飲食。無令得出入。俄事敗。檻送京師。伏誅。陞副都御史。巡撫延綬。劾庸弁。擒豪奸。紱行道望見川中飲馬婦。片布遮下體。大慚。俯首歎曰。我爲巡撫。令健兒家貧至此。何面目坐臨其上。亟令豫出餉三月。邊健兒素貧苦。延綬特甚。往往巡撫者。輒厚自奉。健兒雖凍餓不問。延綬人素忠樸。至死無怨言。聞其慚歎。人人感泣。願出死力爲黃都堂一戰。虜亦不至。俄有詔毀菴寺。紱令汰尼。盡傳軍門。給配軍中。壯無妻者。至紱去。延綬多有攜子女拜道傍送者。進戶部尙書。威稜絕然。盡革財賦內外諸積弊。改左都御史入臺。天下仰望其風采。紱躋直崖異忤人。自恐伏禍不可測。請老去。未幾卒。

高明。字上達。貴溪人。景泰二年進士。爲御史。巡河南。糾斥不職吏六十餘人。會黃河南徙。民耕淤地。畝收歲數斛。議者欲履畝坐稅。明不可。曰。河徙無常。稅額不改。平陸忽復巨浸。常稅猶按舊籍。民何以堪。天順

四年御史趙明等疏劾來朝吏語觸上怒詰疏出誰手明任實草疏都御史寇深言累年奏牘皆屬高明乞貸明過上怒亦解顧喜曰高明能御史先是明劾兵部尚書陳汝言怙勢納賂下獄死汝言謹關人代于謙爲尚書不數月竊賊萬計誅石亨明及門達籍亨家明言亨無反謀蒼頭得免死者百人王翺薦陞山東按察使上嘗謂李賢曰高明宜內用又謂寇深曰高明可都御史南京南京久弛縱明振綱紀劾罷諸貪殘吏會淫雨極言內自宮禁外至夷狄皆陰盛陽微急宜修省以回災異揚州鹽寇起守兵失利敕明勦捕明造巨艦榜籌亭往來江南北督戰又授方略御史戴琥願以山擒賊九百餘人並江置選堡高山望候賊出沒露蹤跡不得逞江海間稍靖中官粥私鹽縛儀真指揮羣卒大闖明盡籍其鹽劾中官又條劾戶部及諸巡撫縱法狀及陳利害十餘事衆始忌明明亦三疏請終養成化二年上杭賊起卽家賜明敕便宜討賊明力疾赴閩先諭撫賊降賊恃險不應進兵搗其巢大破賊俘四百人誅其渠魁十一餘並輕坐析上杭溪南里爲永定縣控賊海口民矯令募亡初謀不軌明不欲再起大獄或至用兵坐誅妖言衆遂定卽上疏乞休納符敕去常曰孔戣三宜去司空圖三宜休吾無才一宜退有病二宜退親老無兄弟三宜退及治盜徵宜再起賊平疾作宜再退自稱五宜居士明天性孝直俊暢有通才難進易退出處傲然

史官曰明制設都御史出撫軍民入總臺憲任至重也樹威以德倡法以廉故理輪攬轡而天下安之若耿使君之清逾止水黃都堂之俯恤健兒斯稱其職矣高明能劾陳汝言貪賂必有以自立者宜其有能

御史之目也。

李賢傳

李賢字原德。鄧州人。生而氣宇凝重。宣德七年舉於鄉第一。方宴鹿鳴。有鶴數十旋繞廳事上。布政使李昌祺舉酒酬曰。將必有名世之士乎。明年成進士。才藝有名。以核荒使山西。時僻瑄以御史家居。賢往學。益好學沈潛。英宗卽位。上疏言帝王之道。亦子黎庶。羈縻外國。理一分殊。愛有差等。今京師韃官萬餘。以俸言之。指揮月俸三十五石。而實支一石。韃官則實支十七石五斗。是韃官一當華官十七有差。冗食橫賜。其何能繼。況非我族類。其心必異。晉胡迭亂。殷鑒不遠。乞敕兵部漸次徙之於外。不惟省國家萬萬之費。亦可以消未萌之患。雖議者難之。而已已之變。羣起應虜。言始驗矣。正統元年授驗封主事。上言國家都北京以來。頹弛莫甚於太學。繕飾莫多於佛寺。興措如此。可謂大舛。尋詔新太學。又有旨文武諧敕三年不得請。必待九年。賢上言此獎勵臣下之良法。九年得者少矣。無以分貪廉。立勸懲。上從之。十年陞考功郎。轉文選。選法公平。十四年扈駕土木得還。景帝初立。上正本十策曰。勤聖學。顧箴儆。戒嗜欲。絕玩好。慎舉措。崇節儉。畏天變。抑貴近。振士風。結民心。景泰二年詔議禦虜長策。賢請用戰車火劑。行可禦虜守境。止可衛民力耕。然善用長技。存乎將士。善馭將士。存乎賞罰。是年冬陞兵部右侍郎。明年奉命察四川諸有司。又明年癸酉還京。改戶部。上言也先弑君。併吞諸夷。包藏禍心。今聽其講和貢馬。削浚膏血。輦送金帛。醜類日強。民生日困。持此悠悠。實非良策。乞敕邊兵臣練兵觀隙。于謙壯其言。請下賢章。勵邊臣。

五年轉吏部。采君鑑中孝友恭儉事爲鑑古錄獻上。英宗復辟。一時輔臣多竄殛。遂召賢入內閣。兼翰林學士侍郎如故。山東饑請賑金內帑。徐有貞持不可。曰散銀有弊。無益饑者。賢曰天下之事未嘗無弊。願奉行何如耳。散銀有弊而不貸。是視民饑死而不救也。因噎廢食。豈爲人上之理。力請發三萬兩。上特增四萬。當是時曹石表裏姦橫弄威福。上不堪。密諭輔臣稍抑其于請。會御史楊瑄劾吉祥。上壯瑄。令吏部籍瑄名。且大用瑄。曹石意出內閣。哭頓首訴上。奴輩萬死一生。迎復皇上。有貞賢必欲傾奴二人。使無噍類。又伏地哭不已。上不得已。諭言官劾有貞及賢下詔獄。是日忽雷電大風拔木。損殿宇。公署瓦木。上悟釋之。詔調外。亨吉祥亦輒對上言天怒有貞賢。故變意如此。上不應。賢得調福建參政。瀕行適吏尙書王翱得專對。語有間。上曰賢不當與有貞同罰。翱因頓首力言賢醇謹可大用。請改南吏部。翱意賢且遠去避禍。上顧不喜。曰南京遠。仍留賢吏部左侍郎學士。亨吉祥又大恨。顧上意屬賢。不得已。匿怨接慝。勤得同召對。輒喜。獨召賢卽不喜。疑賢或短毀。踰月進尙書。天順二年東宮將出閣。領春坊事。吳與弼聘至上。問授何官。對曰與弼老儒。可授春坊諭德侍東宮。與弼辭再三。賢請從。與弼請勵風節。三年亨坐誅。上因問賢迎復事。對曰當時有要臣者。臣不敢從。上怪之。賢曰天位乃陛下固有。若景泰不起。羣臣表請復位。名正言順。何須以奪爲功也。奪之一字。何以示後。此輩貪富貴。非爲社稷計。萬一景泰先覺。此輩不足惜。不審陛下何以自解。幸而事成。此輩得以貪天之功。然天下人心歸嚮陛下者。以正統十數年間。節用愛人。與民休息。今爲此輩十壞七八矣。上竦然。詔革奪門功陞者凡四千人。中外肅然。是年賜第於京師。

之是時。上視朝左右顧。必呼賢與錦衣門達語。良久乃已。五年虜騎來入雲中塞。至鴈門。明年虜又入河西塞。賢薦將帥顏彪等調兵食。畫上五事籌邊。時江南北大水。賢請下詔寬恤之。遂罷所取花木板枋。及暫免采柴。追馬。清匠。刷卷。諸事。歲省銀三十餘萬兩。曹欽反。擊賢傷首及耳。又劫賢疏申救。賊敗。上急召見賢。請下寬恤詔。解散逆黨。開言路。加太子少保。賢以西師未解。而京師有變。王竑白圭出禦虜。虜引去。賢上言。兵出在外。可暫不可久。暫則爲壯。久則爲老。且虜安能保其不來。若慮其更無休息之期。況人民共輸疲困已極。宜班師。使民得屯種。上從之。章皇后崩。值冬享太廟。上問賢。請俟釋服。七年癸未。上以足疾不視朝。召問賢曰。遣官攝大事可乎。賢請駕出郊壇。卽不能行禮。人心亦安。遣攝不可也。上力疾至齋宮。復召問賢曰。朕拜下不能起。起須人掖。禮可藉人掖否。對曰。疾而□行禮。見敬天之誠。掖何不可。二月。空中有聲。賢言上不恤民。厥有鼓妖。請下寬恤詔。靜慈仙師者。宣帝廢后也。上念之。問賢。更謚恭讓章皇后。錦衣門達寵而橫。許臨川弋陽二王陰事。訊無左驗。賢請戒緝事者。達又誣袁彬下彬獄。有疏雪彬者。達又并誣疏出賢。賢乞罷不允。未幾達坐附中官譎戍嶺表。時禁中有讒言。謂憲宗不宜復位。東宮者。上疑之。一日上不豫。臥便殿。召賢諭曰。今庶事頗甯。而大者反搖。奈何。賢頓首伏地曰。此國本也。上曰。然則必傳太子位乎。賢又頓首賀曰。宗社幸甚。上起立召太子至。賢扶太子曰。謝。太子謝。上抱上足泣。上亦泣。讒竟不得行。八年憲宗卽位。進少保華蓋殿大學士。餘官如故。會災異屢見。表請出宮人。又請簡近侍左右人。大風電。拔郊壇木。飄瓦。賢上疏乞無狎左右。聽其冒誘。吳后廢。飛語欲害賢。上遣衛士宿賢家。出

入呵護。會奪門功冒陞者。又羣囂訴乞復官。賢言曰。白石亨輩。此舉之後。人以得富貴之易。貪利者惟幸有事。宜早治之。且請復于謙官。以雪幽枉。上是其言。有司請造鹵簿。賢急入言。先朝所造未經御者。尚多貯庫。今恩詔方頒。何須以此擾民。上寢其事。成化二年二月外艱。詔起復。賜賻甚厚。遣內臣護行。營葬事畢。促上道。五月入京。上慰勞有加。疏言古大臣若張九齡。寇準。雖常起復。人無非議。以其才足勝任。臣非其人。乞賜矜從。不允。修撰羅倫。極論賢不當起復。謫官。賢上道中所見軍民利病八事。又率廷臣言天下盜賊未息。災傷未止。惟祖宗創業垂統。宮禁甚嚴。內外閉密。內帑充積。無得妄費。遊有常所。無起離宮。賜有常度。無開倖穴。祖訓一書。載此明備。願垂省覽。十二月十四日卒於賜第。年五十九。贈太師。諡文達。賢恭莊端重。練達政務。不屑爲小廉曲謹。先後薦用耿九疇。軒輅。年富。王竑。李秉。程信。姚夔。崔恭。白圭。許貴。顏彪。馮宗。諸文武大吏。皆得其人。天順四年。上諭選庶吉士。必北人。賢曰。立賢無方。何限於地。政務任九卿。議擬不相侵奪。時於上前參酌。可否爲行止。王九臬。馬昂。在吏兵部。皆上信任。賢又能調護。以是兩尚書得行其志。景帝葬時。左右請汪妃殉。賢請存妃。以全其母。子上是之。先是上思建庶人。幽大內六十年。欲赦之。問賢。賢對曰。陛下此念。太祖在天之靈實臨之。堯舜存心。不過如此。上意遂決。亦並赦吳庶人於東內。命中官護送鳳陽自便。

史官曰。漢文自代來。絳侯等欲請間。文帝謝曰。所言公。言之。所言私。王者無私。大哉言乎。杜萬世邀立邀功者之倖門矣。英宗以啓寵北轅。及復辟之日。貪功怙勢。實繁有徒。倒持太阿。使天子不得舉手。徵李

賢忠以犯難勇以斷割。知以當機。奪羣小威福之柄。以還天子。其不蹈土木之轍者。幾希矣。賢之功。以是爲烈。至於止汪后之殉。出建庶人之錮。其言足貫幽明。古稱社稷臣。何以尙諸。

彭時傳

彭時字純道。安福人。時自小端重。寡言。及領鄉薦。入國學。祭酒李時勉以公輔期之。正統十三年戊辰會試。第二。廷試第一人。歷官翰林侍讀。十四年與商輅同日入內閣。景泰元年乞終繼母喪。忤旨去。三年除服。不得入內閣。供職翰林。初入閣。與陳循共事。稍周旋。相可否。天順元年九月。岳正許彬譴罷。上召見文華殿。令近榻前。問曰。汝十三年狀元耶。對臣不才。誤恩拔擢。因頓首。上又問第二陳鑑。第三岳正乎。對曰。唯。又問汝年幾何。對曰。臣犬馬齒四十二。上笑曰。正好用。賜酒飯出。當是時。內閣進退甚經。召見後。命以太常少卿兼翰林侍講。復入內閣。尋典機務。陞翰林學士。上嚮用李賢。每召獨對。或并召吏部兵部王馬兩尙書相商。權賢陽退。每諮時。時持正論。不相徇。或至失色爭議。定不相嫌。賢每語人曰。彭公君子也。天順末。錦衣門達怙寵。中傷賢。上曰。去賢。行專用時。內臣或語之。時矍然曰。李公有經濟才。胡遂至此。因力辯其誣。謝內臣曰。李公去。時不得獨留。語頗聞上。賢事竟雪。戊寅春。上皇列慈聖皇太后徽號。詔天下。時謂李賢曰。此事宜有恩典及人。賢曰。一年兩赦。恐非所宜。時曰。非謂赦也。謂宜因此遂行優老之詔。若朝官父母年七十者。與誥赦。百姓年八十者。與冠帶。是則老吾老以及人之老。如此始與徽號相合。賢擊節曰。是也。卽擬進呈。上大悅。後因著爲例。河南衛官強橫凌人。刺事者誣謀反。煅鍊成獄。時持不可。坐如律。

活其家百口。憲宗卽位。進吏部右侍郎兼學士。尋進兵部尚書。議上兩宮徽號。時力持同尊。及加二字。事詳宮闈紀。成化二年。賜歸省。還朝。三年。四川宣府遼東地震。上疏陳六事。上嘉納之。英宗實錄成。加太子少保兼文淵大學士。時侍講江朝宗楊守陳以實錄成。陞洗馬。久之。以不兼翰林銜。不得與院事。恚。二人疏乞兼舊官。且言祖宗來宮寮。未有不兼翰林者。下內閣。時言諸君考滿時。咸言寧無兼官。得陞二級足矣。願復有此疏。謂余不練朝章乎。永樂中。楊士奇以翰林學士。改左春坊大學士。未嘗兼舊官。竟不許。四年。慈懿皇太后崩。詔大臣議葬所。衆相視莫敢發。時曰。梓宮當合葬裕陵。主當祔廟。具疏言。漢文帝合葬呂后。宋仁宗合葬劉后故事。此國家綱常。宜從典禮。卒從時議。是年秋。彗星見。起三台。時儲位久虛。時乞修省疏。言外庭大政。固所當先。宮中根本尤爲至急。望正名均愛。廣繼嗣。爲宗社大計。又言大臣進退。皆宜斷自聖衷。不可專委旁近。如皇上素知其人。亦宜召吏部面議。或召臣等參詳。庶權歸朝廷。人無希幸。七月。陝西土達滿四反。時請追問激變之故。行間參劾清敗績。兵部請命各鎮兵赴援。聲息益急。復請調京軍往。以都督劉玉總兵副都御史項忠提督軍務。項忠未至。軍多敗衄。玉忠至。分兵圍賊於石城。會毛忠戰死。京師聞益危懼。以撫甯侯朱永領京軍四萬助戰。命已下。永難之。奏定賞格。時見其張大。難於遽止。第令且整軍裝待。十一月。忠知別命將。乃請星馳赴援。儻破賊則一面奏報。上命中官召兵部尚書程信至閣議。信謂事急宜行。時曰。賊若四出攻劫。誠不可緩。今入山自保。我軍圍守甚固。不一二月。賊必窮困。就擒。京軍何用再行。因問信曰。京軍何時可至。曰。來春。時曰。事之成敗在歲終。此益緩不及事。信忿忿。

出危言曰。忠軍若敗。必斬一二人。然後發兵。相知者盛爲時危。時曰。諸公勿爲時危。時觀忠疏曲折。知賊決可平。但彼聞已遣將。不敢自任故也。已而十月執四賊。寨皆平。羣言始息。五年無雪。疏言自古旱災。皆由下民怨苦。感動天變。近日光祿寺買辦各城門抽分。掊剋太甚。而獻珍珠寶石者。倍估增直。規取府庫。以萬民膏血。充姦佞囊橐。伏望懲革。以惠生民。進吏部尙書大學士如故。七年冬彗星復見。疏言德政之要。一罷佛事。二謹命令。三請退朝之暇。延接大臣。面議政事。兼問軍民休戚。訪人材賢否。察治體風俗得失。四重官賞。節刑獄。五聽受直言。六戒勵百司。掊剋之禁。太監劉永誠沒家人。陳有軍功。乞贈伯爵。公力阻得寢。八年水旱。復疏時政闕失。乞放歸田。不許。十一年正月。加少保。卒。贈太傅。諡文憲。時資稟既異。充養學問。敬謹粹溫。休休好善。秉謙抒誠。終歲未常一二宴會。卽會未常有音樂。愛惜天物。片楮寸墨。不輕費。非其義。一毫不取。

史官曰。彭時練達朝典。能斷大事。觀其並尊兩宮。全人主。坐策西師。止京軍之行。皆有定識。定力卽韓琦之調護。魏相之決策。不是過也。與南陽同心輔政。曰賢去不獨留。又古者師師休休之風矣。視崇說之齟齬。何如哉。

明書卷一百二十六

列傳四

名臣傳 十一

徐溥傳

徐溥字時用。宜興人。景泰五年進士。授編修。天順元年兼司經校書。成化元年陞右庶子。兼侍講。十年陞少詹事。兼侍講學士。十六年轉太常卿。兼學士。明年禮部侍郎。二十二年改吏部。孝宗卽位。以吏部侍郎兼學士入內閣。是年十一月陞禮部尙書。兼文淵閣大學士。弘治四年。憲宗實錄成。加太子太傅。改戶部。進武英殿。七年加少傅。兼太子太傅。改吏部。進謹身殿。是年上言機務日繁。誥敕委積。正統中王直王英皆侍郎兼學士。在內閣專誥敕。上從其言。用李東陽謝遷。未幾星隕地震。京師雨土飛蝗。乞罷不允。八年命撰三清樂章。率同官上言天子祭天地。夫天至尊無對。故禮以少爲貴。祭不過南郊。時不過孟春。牲不過特牛。漢祀五帝。儒者非之。況三清乃邪佞之說。謂一天之上有三大帝。乃以李昉居其一。是以人鬼列於天神。非禮也。至於郊祀樂章。皇祖舊制。今所傳樂章。雖在永樂大典。是書博采弗精。不可以黷禮。臣等誦習儒書。若邪說徑曲。尤所不習。且初設文淵閣。命學士居之者。實欲其謀議政事。講論經史。培養本源。弼正闕失。非欲其阿諛順旨以取容悅也。上嘉納。欽天監正李華者不職罷。忽傳旨復職。溥言皇上卽位

來大小陞除皆出題擬。別無內降指揮。以故干請斷絕。華選張巒葬地有勞。宜量與賞賚。傳帖既行。倖門遂啓。臣等不敢阿從。十年三月。韋太監急走內閣。言上坐文華殿。宣四先生。溥及劉李謝倉卒問故。韋對不知。溥等至殿頓首。上曰。近前。溥等前。諸司禮皆環跪御案傍。上曰。看文書。諸司禮取諸司題奏與溥及劉健。以片紙數幅與李東陽謝遷。每一疏。上必曰。與先生輩議。溥等擬批答。上上覽。或更定二三字。或刪去一二句。應手疾書。略無疑滯。溥等懼不能稱上意。頓首請曰。疏中事多者。臣等請將下閣看詳擬上。上稍不說。曰。文書尙多。欲書閱。閣中亦閑。盍就此面議。諸輔臣又頓首曰。惟自英宗召見李賢等後。四十年。憲宗初歲。不過一二見。道二三語。是日溥等得見上。天質明睿。聖心仁厚。大喜。願應對不能副上意。又輒慚懼。自是不復召。十一年溥日告乞休。卒年七十二。贈太傅。諡文靖。溥在相位。數年間。六部多得其人。當其人災異屢見。旋復消滅。虜犯跳梁。亦竟遁去。天下稱平。溥能任人。凡弘治中所上章疏。皆屬李東陽。而溥因事納忠。隨才器使。屢遇大獄。保全善類。從容調劑。弭謗消讒。雖無勇功智名。而培養國家元氣爲多。溥常置義田八百畝。贍族。請下戶部著籍。

史官曰。語云。達視其所舉。況端揆以用人爲職者乎。徐溥在憲孝之世。雖無大建明。然能舉李謝自輔。六官之長。罔非民譽。休休不專。此亦有足多者。太平旣兆。奉身而退。視李謝晚節。則又幸矣。

王恕傳

王恕字宗實。三原人。正統十三年進士。庶吉士。入翰林。翰林業治古文辭。而恕不喜古文辭。務以明體適

用博綜經濟。無意文事。所以不得留。出爲大理評事。遷左寺副。條上刑罰之不中者六事。上俞行之。景泰五年。出知揚州府。屢辨疑獄。歲饑。發廩不俟報。且給醫藥。多少全活。出資政書院。教郡子弟。天順四年。以考最治平第一。超拜江西右布政使。嶺寇犯贛州。恕奉檄率師討平之。安輯流冗有方。轉河南左布政使。成化元年。陞右副都御史。撫治荆襄南陽時。以襄南多山。秦楚之流民萃焉。而豪多爭曠殺人。特開府鄖陽。恕首隸之。會兵搗襄盜。平其巢。餘悉解散。蝗生。乞避位。因勸上去奢崇儉。俄內艱。會荆襄大盜起。起復。會朱永勦之。劉千斤石和尚作亂。佐王師三年。討平之。帥欲縱兵搜山。恕不可。下令曰。擅殺者斬。因榜示流民。各使復業。流民爲建生祠。繪像祀恕。母憂歸。四年。卽家起復。轉左。巡撫河南。賑災均賦。獎廉抑貪。人多稱之。明年陞南京刑部侍郎。外艱。七年。改刑部。總河道。濬隄。刊溝。省河隄。吏有成功。九年。改南戶部。十二年。復爲左副都御史。巡撫雲南。時朝議以雲南在萬里外。西控諸夷。南接交人。鎮守中官橫甚。欲借恕彈壓。恕心知所謂。單車攜二僮往。中官錢能使其麾下指揮郭景等。以玉帶龍衣美裝。玩好馳驛謁安南王黎灝。灝報以異寶。生金犀象諸物。景等復與其國互市。稱載還。恕廉得之。遣騎道執景。景迫投井死。因悉銀鐺其從者下之獄。而沒入其賄。飛章露劾能私通外夷。罪當死。當是時。灝別爲私郵通滇。欲乘間取我。至是其謀始杜。而錢能使之乘驛以黃鸚鵡進。恕復上章極言萬里勞人。進一羽族微物。恐天下有以窺上意。因盡發能貪贖暴肆諸狀。又言昔交趾鎮守非人。致一方陷沒。騰衝啓巒。致麓賊叛逆。今日之事。殆又甚焉。上爲不得已。召能歸。安置南京。黔公諸大帥以及土酋皆懷奉三尺。恕在雲南九閱月。疏二十

上十三年進右都御史。明年召掌南都察院。兼參贊機務。往返衣書一囊而已。條上口操京操事宜。盡攝營將之占役者。一卒不得走私門。禁番使毋得互市。考選軍政。卽同事者無干瀆。又明年改兵部尚書。兼副都御史。巡撫南直隸。兼督糧餉。恕以天下一切納貢賦者。苦收取過重。至破家乞嚴禁革。光祿寺歲供白粲。概及庖人賤工。請爲裁省。皆從之。常州時有羨米。請以六萬石補其夏稅。又以補戶口鹽鈔六百萬貫。官田賦太重。減耗米十餘萬。明年水災。奏免秋糧數十萬。草半之。而周行賑貸其貧者。計二百餘萬口。三吳之人。以爲自設巡撫來。幾一甲子。獨恕與周忱。二十八年。恕二年。以忱仿姚崇。恕仿宋璟。時中官杜福。以中旨下常州。取古玩諸物。擾民。恕上言古之明王。有投珠抵璧。卻千里馬。焚雉頭裘者。非不知珍玩之可愛。恐因而妨政害事。力爲屏絕。以固結人心。爲宗社計也。乞崇恭儉爲天下先。召還織造官。明敕中外。無獻珍玩奇物。生民幸甚。中官王敬乘傳至東南。大索奇玩。所至驚懼。恕上言當此凶歲。謂宜遣使賑濟。而乃橫索玩好。昔唐太宗遣使諷梁州。獻各鷹。明皇令益州織半臂背子。捍撥鏤牙。李光亮蘇頌。不奉詔。臣不敢不效之。又中官王敬堞。千戶王臣。以妖術取中旨。齋御帑金。收市圖籍珍玩。因而張皇聲勢。搜括富人財寶。人情洶洶。怒乃極言。敬堞暴失人心。損國體。傷和氣。而召災沴。盡條其狀罪。三劾奏之。上立詔戒敬。久之。敬等俱收捕下獄。斬王臣。梟其首於江南。并戍其黨十八人。中外稱快。二十年。轉南京兵部尚書。參贊機務。時錢能復。黃緣。守備南京。與恕共事。語人曰。王公天人也。吾有敬事而已。尋加太子少保。會刑部員外郎林俊論妖僧繼曉。建寺下獄。督府經歷張黻救俊。亦下獄。恕上言。二人志在盡忠。而得罪。

恐人自此以言爲諱。設有姦邪誤國。誰復肯爲朝廷言者。疏入不報。會侍郎馬顯乞致仕。內批附恕名。落宮保。與顯並致仕。主事王純言。恕忠亮不可去。下純獄。謫思南推官。嘗是時天下無事。內則官戚。外則閣部。各引私朋置清顯。及汪直李孜省內外交結。得進退大臣。大臣皆頰首甘心依附。惟恕著節不撓。孝宗卽位。召爲吏部尙書。加太子太保。恕薦楊守陳。彭韶。張悅。周經爲左右侍郎。耿裕。何喬新。倪岳皆引置執政。忠諫久廢。如王徵。黃仲昭。賀欽。剛直被抑。如周英。祁順。並皆薦用。裁抑僥倖。寢獎名節。無敢以私干者。劉吉在內閣。每持恕。恕直己不屈。南科道劾吉。薦恕宜入閣。吉惡南科道。會南守備內臣與南科道相訐。南科道多貶斥者。恕力言宮中府中俱爲一體。陟罰臧否。不宜異同。知州劉概。御史李興以忤吉下獄。恕力解得減死。內旨通政司經歷高祿爲本司參議。恕言祿出科目。自能遠到。而越次超陞。非所以愛祿。幸以天下之官待天下之士。勿以親戚妨公議。徐生。諸醫也。傳陞院判。恕執奏。下吏部。會禮部太醫院同御藥房太監選用。恕力爭。祖宗來未有吏部會內官推選官員例。成憲不可更。上曰。徐生善藥。與院判。恕遂乞休。屢疏上。上曰。卿持正輔佐。朕心知之。勿辭。恕遇事輒言。有不合卽引疾求退。上每溫言留之。內閣滋不悅。謂爲好名。滿三載。授柱國。上念恕老。風雨免朝。徵王乞陞鈞州爲府。晉王乞爲世子。別設典膳。恕皆論止。兩廣都御史秦紘。劾安遠侯柳景不法。反爲景所誣。坐致仕。恕極言紘不當罷。卒留紘爲南戶部尙書。恕在吏部時。臺諫劾巡撫又潘郡官。內批下罷斥。恕以爲不得其職。連疏乞休。皆不許。南臺又薦宜入內閣。內閣宜忌之。上曰。朕用饗義王直故事。任恕吏部。若有謀議。亦無不聽也。弘治六年。時邱濬忌恕。爲

御醫劉文秦草疏指斥恕。恕疏辨。上留恕。恕力求去。遂致仕。恕仕四十五年。凡上三千餘疏。皆忠直凱切。蓋憂世之志如范仲淹。濟世之才如司馬光。直諫如汲黯。惠愛如鄭僑。年九十猶考論著述。言動必揆矩度。常言我垂老。方理會學問。卒年九十三。贈太師。諡端毅。子承裕。歷官南戶部尙書。謚康僖。

史官曰。明制文極六曹。天造無倫矣。蹇夏經綸。惴惴太宗北征。全國是屬。三楊熙績臺省。坐臻太平。君佚臣勞。所謂代天之相。英廟之遇李賢。密畫顯斷。萬機精覈。局體一變。成化間。王恕。王竑。秦紘。居則岳屹。動則雷霆。大事斧斷。小細海蓄。帷幄佞幸。請劍必殛。使見之者畏。聞之者懼。斯其人死。生富貴足動之哉。然較之天順以前。則殊矣。時與位不同耶。抑委任權力殊耶。弘治中。劉大夏。韓文。馬文升。許進。周經。耿裕。倪岳。劉宣。咸稱名卿。然志存納約。行在精密。苟濟其事。小枉安焉。局體又一變矣。雖形迹罔暴。義違矯直。亦運數然歟。

劉大夏傳

劉大夏。字時雍。華容人。天順七年舉鄉試第一。明年中會試。又明年成進士高等。改翰林庶吉士。解館爲職方主事。歷郎中。時有獻取交南策者。下部索永樂中調兵食數甚急。大夏匿其籍。徐以利害告尙書余子俊。力阻得寢。朝鮮使貢。苦建州敵遮道。請改道。由鴨綠江。中官有朝鮮人爲地。下部議。大夏曰。朝鮮貢自鴨鶻關。由遼陽經廣甯。過前屯入山海。迂回三四大城戍。此祖宗微意。若自鴨綠江抵前屯。山海路大徑。恐貽他日憂。不可從。塞有虜入。尙書必問劉郎中云何。劉郎中言輒行。行輒效。尋出爲福建參政。巡海。

海道兵又弛。大夏至追哨船。責倉計儲。立收支法。築設一館。往來督察。不半年。海道肅然。陞廣東右布政使。常過崖山弔大忠祠。宋慈元后陵。泣然曰。后與陸張二臣同死國。今大忠有祠。而慈元不祀。義弗稱。謀立廟。人感其義。不日而就。轉左浙江。弘治六年。河決張秋。擢右副都御史。治河不能塞。再遣平江伯陳銳。內臣李興。山東按察副使楊茂元疏。乞召還銳興。專任大夏。及抑損外戚。以回天意。茂元謫長沙。同知大夏集山東河南首臣上議曰。河性湍悍。張秋乃下流喉襟。未可輒治。治於上流。分導南行。復築長隄。禦橫波。且防大名山東之患。候其循軌而後決。可塞也。遂疏孫家渡口三十里。四府營河十里。築長隄。起河南胙城。盡徐州。經滑長垣。東明曹單諸境。長三百六十里。量能任功。五旬而事竣。十年虜入塞。師行乏軍興。進戶部侍郎。經畫饑需。或曰。邊糧草半屬京貴子弟。此行剛且取禍。大夏曰。處天下事。以理不以勢。定天下事。在近不在遠。俟至彼圖之。至邊。召問父老。得其要領。一日榜通衢云。某倉缺糧幾千石。每石給官銀若干。凡境內外官員各商家願輸者。米自十石上。草自百束上。聽卽中貴子弟不禁也。不兩月。積蓄有餘。蓋往時糴買法。糧百千石。草千萬束。方聽。以故貴子弟爭相爲市。轉買邊人糧草。續運。牟利十五。此法立。有糧草家自得告諭。貴子弟卽欲收糧。無所得。邊人言自劉侍郎收市法行。倉場有餘積。私家有餘財。十一年。三章乞致仕。賜歸。杜門修勵。築草堂於東山。天下因稱曰東山先生。十三年。卽家拜右都御史。總督兩廣軍務。卽攜二童行。兩廣人聞大夏來大喜。大夏至。旌賢才。斥貪穢。裁冗費。更役法。上下不便者一切更正。十五年。陞兵部尙書。時邊事急。上以兵事屬內臣苗達。謀出兵掩虜。上召大夏問。力言不可。上曰。太

宗頻出塞破虜。今何不可。對曰：皇上聖武，固同符太宗。奈今兵將庸疲，遠不逮昔。當時淇國公邱福稍邁節制，數萬甲兵一日陷虜。今之將又在福下，不若且令各邊料虜戰守，猶似得策。上曰：善。一日召問天下衛所軍士何如。對曰：貧與民同，安能養其銳氣。上曰：諸軍居有月糧，出有行餉，何以故貧。對曰：江南困於運糧，江北困於京操，此外浪費，猶有不能盡知者。翌日即詔各衙門條上軍民疾苦，有造飛語帖宮門誣大夏者。上曰：宮門外人不能至，必內臣忿不得私役軍士耳。修清甯宮，敕下部軍役萬餘人，大夏請減十五。督工訴上，上令內臣語內閣擬上詰責之。大學士劉健曰：惜軍力，兵部職。近劉尙書輒以老辭，朝廷下溫旨勉留，尙請未已。若詰責彼將，以不職固辭，更於何處得如此人。用內臣以告，上欣然。如大夏議，是年以災求去，不許。因上十事，皆兵食要務。下諸司議興革。上常詔諭曰：事有不可，每欲召卿議。又以非卿部事而止。後有當行罷者，卿揭帖啓朕。大夏對不敢。上問何也。曰：先朝李孜省可戒。上曰：卿與朕論國事，豈致省比。曰：臣下以揭帖進，朝廷以揭帖顯行，何異前代斜封墨敕。陛下宜遠法帝王，近法祖宗。事之可否，外付府部，內咨內閣，如用揭帖，上下俱有弊。且非後世法。臣不敢效順。上曰：善。常召問天下何時太平。朕幾時得如古帝王。對曰：求治不宜太急。凡用人行政，即召執政大臣面議行之。但求順理，即治太平。上曰：劉健常薦劉宇才堪大用。朕觀宇小人，內閣亦豈可盡託。上常召問近日外議云何。曰：近有旨釋李夢陽，中外懽呼聖德如天地。上曰：夢陽指斥成畧，且語言狂妄，朕不得已下詔獄。比奏上，朕試問左右云：何應曰：付錦衣撻而釋之。朕知此輩得旨，即重責致死，以快中宮之怒。使朕受殺直臣名，不忠如此。朕以故釋。

復職。刑部尙書閔珪讞大獄忤旨。批答從不下。大夏獨對。上因語及之。對曰。人臣執法。不過效忠朝廷。珪所奏無足異。上曰。且道自古何君何大臣亦當如此。對曰。臣幼讀孟子。見舜爲天子。皋陶爲士。瞽瞍殺人。皋陶亦執之而已。似未可深責。上頷之。明日允珪議。十七年北邊缺總兵。上諭內臣語大夏。用李傑。本外戚所薦也。內臣言大夏得傳帖尙執奏。安肯聽奴口語。上默然。一日朝罷。召大夏。上手一帖付之。帖書李傑名。大夏退至部。語同列曰。此非將材。豈可爲大帥。明日別推二人。上內批竟用李傑。去鎮無幾。劾章至上。謂大夏曰。悔不用卿所薦。先是大夏應詔陳言。盡罷光祿無名供億。歲百萬計。又議革騰驤四衛軍士。內臣恨之。上召與密議。又或及裁抑內臣事。一日上召大夏入御榻前。上左右顧。近侍內臣退避去。奏事畢復來。對久。欲起不能。上命太監李榮掖大夏出。榮且扶且請曰。吾輩行事多失。老先生幸隱惡揚善。大夏曰。聖上天性聰明。某於政事外未常敢輕易毀譽人。某今日立求退。上曰。李榮每稱卿。某於老太監蹤跡疏遠。何以得此。榮曰。當朝大臣第一。榮何敢蔽賢。時戴珊爲左都御史。上有大政事。每召大夏及珊面議。十八年春。二人對畢。上賜二人白金二錠。諭曰。朕聞朝覲日文官避嫌。有閉戶不與人接者。卿二人雖開門延客。誰復以賂通乎。以故賜卿二人。又曰。勿朝謝。公卿知之。且懷愧懼。上崩。大夏慟哭不能起。正德元年加太子太保致仕。二年閻瑾專政。劉宇恨大夏。孝宗時面對不爲宇地。謂瑾曰。籍劉尙書家可得幾十萬金。瑾因尙書潘藩總兵毛銳獄詞有大夏名。三年夏矯制逮詔獄。且欲殺之。下廷議。屠浦曰。檢律。劉尙書無死罪。謫戍肅州。四年至河西買墓地。五年赦歸田。瑾誅復官。致仕。大夏平生不以勢位自居。

所至愛民如子。民亦愛之如父母。遇事有當行。未嘗先洩。有疑未明者。不以公移顯行。雖屬官亦具手簡直述其事。紙尾書名。以故所委事。無大小無不盡心力。不相欺負。功名富貴。子孫福澤。泊如也。常預作壽藏。東山陽記曰。予常見士大夫家子弟。愛其父兄者。俟其身後。必求名儒大筆。鋪張行業。以誌於其墓。作國史者。或憑而采之。予無似。承祖宗世澤。竊科甲官祿。前後四十年。在家在邦。無一事可述者。萬一後人私所親。謬言以誤名筆。縱可欺人。獨不自愧於地下耶。用是述平生履歷。書而勒諸石。付兒祖生等藏之。以俟他日。其詞雖俚。其事則核。予心安焉。又常曰。居官以正己爲先。所謂正己。不特當戒利。亦當遠名。李東陽曰。東山乃昔人所謂與物無競。臨事有爲者也。卒贈太保。諡忠宣。

史官曰。弘治最多名臣。內閣則劉健、李東陽、謝遷、六曹則耿裕、倪岳、余子俊、周經、張悅、戴珊、閔珪、韓文。侍從則楊守、陳賢、吳寬、王鏊。方鎮則秦紘、王越。要末如恕、文升、大夏之灼灼者也。恕直諫重天下。然不難於孝宗。而難於憲宗。孝宗、仁君也。然而頗以齟齬然。豈非所謂事君數斯辱耶。文升數更中外。歷權寄不屈不挫。蓋以才力勝。大夏仁心爲質。道揆法守。晚際魚水。密勿都俞。庶幾有三代之風。所恨造膝之語。少有傳者。

程信、秦紘、鄧廷瓚 附程敏政
朱英姚頤 傳

程信、字彥實。休甯人。生於河間。正統七年進士。十年選給事中。景帝卽位。疏薦薛瑄。虜犯京師。信監軍守

西城。上五事曰：新號令以振軍威，募勇敢以備警急，召勤王以遏南侵，設武備以防內變，養銳氣以備戰守。都督孫鏜禦虜西城外失利，諸將不相援，鏜急呼城門求入，信不肯，疏言鏜小失利，即開城納鏜，虜益張，人心益危，趣鏜戰，必效死士，上立詔勿納鏜，虜逼城，鏜兵亦附城戰，信與都督王通都御史楊善城上鼓噪，發鎗礮佐鏜，虜退，遂請勒石亭于謙，移營關鄉外禦虜，且號令諸將，景泰元年使蜀還，言道過畿輔，民饑乞賑貸，又言河間因虜患，罷官生徒并府學，乞復舊，廷議奉迎太上皇，時有龔千戶者，投密書高穀家，言禮宜厚，語漸聞，莫敢發，信倡同列會疏入，上取書，留中不報，明年上中興固本十策，曰：敬天求賢，納諫，謹災節用，詳刑，選將，練兵，尙儉，隆師，又明年上修德疏，陞山東參政，備兵遼東，憂去，六年服闋，改四川理餉松番，天順元年入賀，會錄景泰間進言者，陞太僕卿，信案故事，理營衛馬，三營大將石亨、孫鏜、曹欽，並疏言：太僕苛急，請馬隸兵部，信言：高皇帝諭馬數，勿令人知，今隸兵部，馬登耗，太僕不得聞，卽有警，馬不給，請以責兵部，上是其言，歸太僕如故，二年陞僉都御史，巡撫遼東，虜董山通朝鮮，受僞制，爲中樞密使，信廉得僞制，疏請先發伐其謀，上爲遣給事中使朝鮮，錦衣譯官出遼東塞，董山匿不承，出僞制示之，皆愕懼，乞貢馬謝罪，會虜李來欲犯遼東塞，信提兵出境，屯三月，解遼東，總兵海甯伯董興倚吉祥姻，又昵都指揮夏霖，恣不法，分巡僉事胡鼎發霖姦賊罪四十事，信條上，詔錦衣指揮郭英逮霖籍其家，英得霖貸，未滅霖，寇深，遂劾信惑外臺官，瀆聖聽，詔詰信，不肯引咎，徵下詔獄，降南京，太僕少卿，五年召還，陞刑部侍郎，憂去，成化元年起爲兵部侍郎，當是時，兩廣川陝荆襄諸路用兵，獨署部區畫方略，皆中機宜。

先是四川貴州山都掌蠻叛。兩鎮守將不相下。兵久無功。朝議遣憲大臣督戰。科道官在軍中者。或告捷得賞。未幾諸蠻又叛。據大壩山險。破合江上九縣。三年進信。尙書督軍與襄城伯李瑾發川廣雲貴番漢兵討賊。信至永甯。分大軍三道。自督入金鷲池。四川軍由戎縣。貴州軍由芒部。雲南軍由普市。入期會大壩。大軍進至李子關。渡航鋪。賊恃險拒敵。飛棧下壘。石如雨。我軍發神鎗勁弩。賊卻。拔崖上。順風舉火。焚其龍背豹尾二寨。賊退保大壩。貴州軍已躋其後。四川雲南軍角其左右。賊驚散不支。連破諸賊寨。斬首五千。擒二千餘。賊復走入天井水磨二洞。洞窻幽暗不可入。窺洞圍守月餘。賊死幾盡。九姓土獠附賊。乘遠師撲勦。又大捷。請移瀘州衛渡航鋪。控諸蠻。分山都掌故地。隸永甯芒部。更大壩爲太平川。立長官司轄熟夷。論功兼大理卿。言官論信上首寇不實。信四疏請老不允。七年無雨雪。信應詔修闕政。言兵事可更張者四。兵弊可申理者五。其大者延綏兩廣歲遭殺掠。邊以捷聞。朝以捷賀。上下相蒙。戎夷益肆。四方流民盡聚荆襄。不早區畫。變起中土。天子六師。馭輕居重。京營土馬。疲耗器甲。頓朽非大更張。緩急可憂。是歲改南部參贊機務。信曰。參贊謹非常。有司事非所宜預。八年合南都大臣言。興利除害三十餘事。乞召還給事中王徽。劾退南京守臣應城伯孫繼先。明年致仕。又明年卒。贈太子少保。諡襄毅。以功得世錦衣百戶。信才雄氣果。然沈思曲算。顧不輕洩。先是敵久據河套中。議遣大同守備楊信將兵十萬搜套。信執不可。信征南蠻制詞。賞殺皆得專斷。迄班師。不敢輒賞殺一人。曰。刑賞天子大柄。願闕外事不易集。假大臣束攝人。卽幸事集。輒自專。非分有奇禍。少時力耕養父母。及貴。寡慾自檢。花鳥書畫不接耳目。割

田五百畝爲義莊。贍姻族人。子敏政。字克勤。成化二年進士。敏政幼靈異。少時讀書。一目數行下。以奇童薦入翰林。登甲科。益攻學問。淹貫經籍。成化弘治間。翰林稱敏政學最博。瞻李東陽文章俊麗。陳音性行真純。敏政爲諭德。侍講武宗於東宮。弘治十年起復副總裁。修會典。辭不至。明年召至京。以太常卿進禮部侍郎。兼翰林學士。復侍東宮。又明年主考禮部。忌敏政者。謗敏政洩會試題。弼進士得金錢無算。言官輒劾上。逮治午門前。敏政素負時名。不能忍辱下人。朋輩要津人。亦幸敏政政敗污。去不可復起。不復相。左右敏政竟奪職。逾年憤懣卒。敏政讀書著述尙本實。議論孝經。義參法理。惕惕行檢。凡此皆讒忌之口也。敏政少詹時。請正文廟祀典。謂戴聖、劉向、賈逵、馬融、何休、王肅、王弼、杜預八人。宜褫爵罷祀。鄭戩、盧植、鄭玄、服虔、范甯五人。各祀於鄉。后蒼說禮萬言。號曲臺禮。戴聖等皆受業。今禮記非后氏不傳。王通、胡瑗。身立師道。百世如新。宜加封爵。從祀。乞別祠祀啓聖王。以顏無繇、曾點、孔鯉、孟孫氏配享。程珦、朱松從祀。大抵敏政議與宋濂相表裏。疏下禮部報聞。又請錄開國功臣後裔。嘉靖中議禮考文。敏政言多採行。敏政又請楊時從祀文廟。請孝穆太后比周姜姬。別廟享所。輯有道一編。心經附注。新安文獻志。皇明文衡。瀛賢奏對錄。宋逸民錄。進二百卷。

秦紘。字世纓。單人。景泰二年進士。初爲南京御史。有風裁。劾中官。降北黃驛丞。御史陳綱薦知雄縣。禁中官捕獵。誣得禍。幾不測。民數千走擊。登聞鼓訟冤。得宥。調知府谷縣。陞知葭州。調秦州。成化初爲鞏昌知府。清廉自守。禁官府和市。吏民畏愛。十三年陞陝西參政。有軍功。坐事調廣西。十八年陞僉都御史。巡撫

宣府破虜柴溝堡。轉巡撫陝西。時秦府旗校肆橫。苦軍民。悉擒治不少貸。王不能堪。訐紘凌親王。憲宗怒。逮下詔獄。命內臣尙亨籍其家。得黃絹一匹。故衣數事。亨還言紘貧狀。上親閱其資。嘉歎良久。立釋之。且賜鈔萬貫。旌其廉。命巡撫河南。會汪直至。他巡撫率屈禮。紘獨與抗。密疏直多帶旗校擾地方。直還。上問各省撫臣賢否。直獨稱紘廉能。上出紘疏示直。直頓首伏罪。益稱其賢。弘治三年。以右都御史總制兩廣軍務。破岑欽於鷓鴣嶺。走匿四城。遂克田州。又破海南黎及隴水後山賊。四年。劾總兵安遠侯柳景貪不法。逮景下刑部獄。追賊鉅萬。梟其爵。于內降滅賊。因撫他事。誣紘亦被逮。坐免。臺諫交章論救。上報聞。王怒在吏部。極言紘廉直忠信。不可棄。上特旨用爲南戶部尙書。八年。乞致仕。不允。十一年。致仕。十四年。虜報急。以王勳馬文升故事。召紘。戶部尙書兼憲職。巡撫陝西。十五年。總制陝西三邊軍務。整化馬池鹽課。買馬開豫。望成屯田。先後斬首九千。修城堡關塞一萬四千所。剷山崖三十里。十七年。乞致仕。不允。加太子太保。是歲革總制。召還部。辭得致仕。十八年卒。年八十。贈少保。諡襄毅。紘剛毅廉介。歷官四十餘年。提兵南北。列位孤卿。所居僅蔽風雨。妻孥菜羹麥飯。不改其舊。及卒。家無餘資。未幾子孫貧乏。不能自存。闕瑾專政時。紘義兒丁玉與其繼妻弟楊瑾爭訐。瑾因誣紘子。有資萬計。瑾喜。卽籍其家。無所得。鄧廷瓚。字宗器。巴陵人。景泰五年進士。爲淳安知縣。問民疾苦。專施惠政。不求赫赫名。終九載。無知者。兵部尙書張鵬時。以都御史巡撫廣西。知廷瓚薦知梧州府。會母憂去。貴州程番府在萬山中。夷獠雜聚。難治。以廷瓚知程番。廷瓚悉心規畫。凡城郭衙衢廟宇廨舍。以次興建。榜諭諸夷。使受約束。政令公平。莫不

感悅。墾田不踰界。入市不二價。四境晏然。蔚如中州。超陞右僉都御史。巡撫貴州。適黑苗久叛益肆。守臣告急。敕廷瓚往視。兼提督軍務。初撫不從。始合衆謀調兵食。決策征勦。兵至其地。號令嚴明。將校用命。斬首六千。獲二千。械首惡俘京。寇旣平。奏言都勻清平。舊設二衛。所屬九長官司。其人世祿驕縱。稔惡釀患。致夷人侵田奪貨。逞欲無厭。已四十餘年。軍疲於戍守。民困於轉輸。其害不可勝言。今幸黨惡剷除。非大更張。不能爲保境安民之計。條上十一事。下兵部議行。始設都勻府一。獨山麻哈州二。清平縣一。更設流官與土官兼治。以右副都御史召入臺。未幾出鎮梧州。兩廣自成化初。韓雍平寇後。開府梧州。率以憲臣有才望及官高者。總督軍務。兼巡撫。廷瓚性不瑣瑣。益思安靜爲治。屬吏有賢者輒薦舉。或不職。特去一二。太甚者。奏除諸冗吏。曰。祿俸出於民。毋徒費。願羣蠻以劫掠爲常。往往出沒閩楚諸郡。廷瓚言都御史金澤巡撫偏方非宜。宜以江西一省付澤。使二司聽節制。庶軍馬錢糧可以調度。其湖廣衡州。可以設兵備。憲臣遷治所郴州便。又以廣東瀧水爲賊巢。宜卽其地設千戶所。調軍守禦。仍宜給隙地屯種爲久計。廷瓚於羣蠻結以恩信。兵不輕出。出則成功。若鬱林川雲鑑大桂諸種作亂。以次討平。其後四會諸下縣。饑盜竊發。勢尤熾。廷瓚所獲首惡李景光覃傑及其黨二百餘人。餘悉解散歸農。廷瓚歷官。處事求濟。待人無疑。雅寬廓如。莫規其際。所設施動中機宜。其中明炳。人莫能及。卒贈太子少保。謚襄敏。兩廣總鎮。又有桂陽朱英。正統十年進士。初爲御史。禦賊葉宗留處州。劾外戚汪金內臣善增。陞廣東參議。葉盛每事詢英。參政陝西。調兵食。征固原。巡撫甘肅。條邊事。陞兩廣督撫。專意安輯。兵革久困。民得休息。流人復業。

者十五萬家。出八十年。召入臺。加太子少保。卒贈太保。諡恭簡。英性度宏暢。才通敏。剛介而仁恕。所至有惠政。慈谿姚鑣。弘治六年進士。有文學。達吏事。倘儻有負荷。嘉靖中。督撫兩廣。土寇岑猛積凶。數十年。鑣討誅之。遭讒而去。三人齊名。兩廣祀之。稱爲三神公。

史官曰。兩粵多深崖箐險。爲羣蠻窟穴。與黔楚夷獠相表裏。往往有事。朝廷嘗選大臣威武者鎮之。韓雍尙矣。秦紘廉威尤著。西陲南越。驛焉。庶幾馬羊金粟之風矣。至結以恩信。不草艾其民。廷瓚之德甚厚。善矣。程信之言曰。兩廣歲遭殺掠。邊以捷聞。朝以捷賀。上下相蒙。戎夷益肆。然則不貪功。不黷武。如數公者。威愛允濟。庶幾招攜懷遠之略歟。

劉健謝遷傳

劉健字希賢。洛陽人。父任華州教諭。先時大母張氏夢一偉人。致上帝命。持紫玉帶。賜其家。驚而寤。恍然如有見也。時母白己有身。比寤則報生男矣。父大異之。景泰四年。癸酉。舉於鄉。天順四年。庚辰。登進士。改庶吉士。授編修。成化十年。甲午。進修撰。丙申。陞春坊右諭德。丁酉。進左庶子。丙午。陞少詹事。凡三任。皆職輔導皇太子。二十三年。丁未。孝宗卽位。錄輔導功。陞禮部右侍郎。兼翰林院學士。入內閣。參預機務。賜湖騎夷奴。戊申。改元弘治。知經筵事。辛亥。進禮部尙書。文淵閣大學士。甲寅。加太子太保。賜麒麟服。進武英殿。戊午。加光祿大夫。柱國。少傅。兼太子太傅。戶部尙書。謹身殿大學士。癸亥。加少師。兼太子太師。吏部尙書。華蓋殿大學士。是年五月。一品滿九載。賜宴禮部。賚予有加。當是時。國家治平。上顧健喜。諭曰。勞卿久

矣。兼支大學士俸。先是率同官上疏。近有旨令中官往武當山設像。縣廨修醮。命臣等撰敕并祝文者。竊惟茲山宮官像設已極壯麗。復有此舉。實爲無益。矧今災異迭出。民生困苦。苗賊肆亂。軍旅方興。轉餉繕兵。猶恐不及。君門萬里。豈能悉知。宜斥邪妄。以遏無良。十七年又率同官上言。近有旨朝陽門外修建壽塔者。臣等竊惟人主信佛。莫梁武帝爲甚。卒饑死臺城。信老莫如宋徽宗。卒囚斃塞地。本以求福。反以致禍。觀諸往事。可爲鑒戒。我祖宗相傳以治天下者。堯舜周孔之道而已。以此異端蠹財惑衆。何關於治。佛塔之供。非所以訓天下垂後世也。又令撰真人杜永祺等誥命及封號。疏言臣等竊惟異端不可信。誥命封號不當與。夫誥命朝廷所以獎貞勵能。雖卿士大臣。必待秩滿考最。乃得頒給。況祖宗廟號不過十六字。親臣及文武大臣有功德者。號止一二字。此輩何賢何能。封號多至十八。流布朝野。傳聞後世。皆曰此朝廷所賜予。儒臣所擬撰。天下後世其謂之何。十八年進左柱國。支正一品俸。時上憂勞求治。益明習機務。眷念民瘼。而健亦身任天下之事。凡進用大臣。及政事臧否。反覆竭忠。懼上未嘗不嘉納也。健又引李東陽謝遷入同輔政。上數御文華殿及平臺。召健等至。則屏左右。俾不得聞。左右大懼。每從屏隙窺。但聞上數數稱善而已。健確直見事稍遲。東陽才敏達。遷方質。三人同心。時人語曰。李公謀。劉公斷。謝公允。侃侃上性至孝。望治甚切。而謹守成法。不輕易。有時語宮府。欲毅然創議。盡洗刷近侍權。復太祖之舊。健贊成之。不遺餘力。上大漸。召健等入乾清宮。進御榻前。執手款歡。令皇太子侍立。具言軍國重事。命健等悉心匡輔。健等皆泣受命。莫能仰視。語祕不傳。武宗卽位。健以願命大臣。翼新政。舉故事。百度振肅。海內晏

然屬閣劉瑾竊柄。姦黨盤據。國事日非。健率同官自劾上奏。其略曰。陛下卽位之初。詔書一下。天下延頸。想望太平。而朝令夕改。迄無寧日。百官庶府。倣倣成風。非惟廢格不行。抑且變易殆盡。建言者以爲多言。幹事者以爲生事。累章執奏。則謂之再擾。查革舊弊。則謂之紛更。憂在於民生國計。則若罔聞知。事涉於近幸貴戚。則牢不可破。以一二人之私恩。壞百年之定制。而不顧。以一二人之邪說。破滿朝之公論。而不恤。臣等叨居重地。徒擁虛御。或旨從中出。略不預口。或有所擬議。徑行改易。似此之類。不能一一備舉。臣等心知不可。義所當言。累有論列。多不見允。比爲戶兵等部議處。鹽法功次諸事。具本上陳。極言利害。拱候數日。未蒙批答。若以臣等言是。則宜俯賜施行。臣等言非。則亦明加斥責。而乃留中不報。視之若無。使臣等趨向不明。進退無據。深憂極慮。寢食弗寧。亦知內告外順。人臣之常。但政出多門。咎歸臣等。捫心反顧。無以自明。展轉於衷。事非獲已。若諉顧命之名。而不進輔導之實。因循玩愒。竊祿苟容。既負先帝。又負陛下。用是共瀝愚議。上塵天聽。伏乞聖明矜察。特允退休。別選賢能。代茲重任。少追分毫之罪。幸延犬馬之齡。則陛下優待舊臣之心。勵精新政之義。兩盡而無遺矣。不報。健又率同官上奏。政令十失。極其凱切。上付各該衙門查奏革之。未幾。戶部尙書韓文首倡。九卿共劾劉瑾。及太監王岳。范亨。徐智。共爲內應。仁等助之。獨焦芳媚瑾。以健不附己。力攻健。希入內閣。致上震怒。傳旨捕岳等繫獄。令劉瑾入司禮監。瑾等先常奏內閣。納賄行私。欺壓內官軍職。形於劇戲。上已信之。至是遂令健與謝遷自陳致仕歸。李東陽。楊光。饒。欽。歐。泣下。健厲聲曰。何用哭爲。使當日出一語。則與我輩同去矣。瑾尙恨不已。矯詔奪其官。謫罰粟。瑾

欲起大獄。盡殺諸不附己者。矯敕將內官王岳、范亨、徐智及劉健、謝遷、韓文、戴珊、楊守隨、林瀚、郎中李夢陽、主事王守仁、王綸、孫槃、黃昭、檢討劉瑞、給事中湯禮敬、陳霆、徐昂、陶諧、劉蒞、艾、洪、呂、紳、任、惠、李、光、翰、戴、銑、徐、蕃、收、相、徐、暹、張、良、弼、葛、嵩、趙、士、賢、御、史、陳、琳、黃、安、甫、史、良、佐、曹、蘭、王、弘、任、諾、李、熙、王、蕃、陸、崑、張、鳴、鳳、蕭、乾、姚、學、禮、黃、昭、道、蔣、欽、薄、彥、徵、潘、銓、王、良、臣、趙、祐、何、天、衢、徐、珏、楊、瑋、熊、倬、朱、廷、聲、劉、玉、爲、姦、黨、榜、示、朝、堂、健、益、懼、杜、門、謝、客、瑾、誅、得、復、官、致、仕、聞、上、數、巡、幸、輒、泣、不、食、曰、吾、死、無、以、見、先、帝、矣、世、宗、入、繼、詢、求、遺、老、方、欲、召、用、而、健、年、已、九、十、矣、乃、降、詔、存、問、明、年、遣、撫、臣、就、其、第、致、束、帛、餼、羊、上、尊、卒、年、九、十、四、贈、太、師、諡、文、靖、健、有、知、人、之、鑒、先、是、何、景、明、年、少、而、文、人、謂、其、必、宜、在、翰、林、健、曰、此、子、福、薄、能、詩、文、何、用、景、明、自、中、書、舍、人、至、副、使、而、卒、人、服、健、之、議、

謝遷字子喬。餘姚人。成化十一年甲午鄉試第一。明年會試第三。廷試進士及第一。授修撰。滿九年。考陞右諭德。孝宗卽位。推恩宮寮。陞左庶子兼翰林侍讀。弘治四年。以憲宗實錄成。陞少詹事兼侍讀學士。憂去。八年。與李東陽同入內閣典機務。十一年。戊午。春。皇太子出閣。加太子少保。兵部尙書兼東閣大學士。十二年。己未。加一品服。會典成。進太子太保。改禮部尙書。武英殿大學士。十八年。加少傅兼太子太傅尙書。大學士如故。孝宗大漸入受顧命。武宗卽位。閣瑾專政。遷不得其職。正德元年。乞致仕。許之。歸。瑾矯敕榜姦黨。列遷第二。成化弘治間。翰林聲望最重者。吳寬及遷二人。皆以進士第一人。遷儀榦修整。寬溫粹舍弘。遷明暢亮直。優於政事。寬詩文尤有古意。一時並負公輔之望。邱濬卒。寬適憂去。遷入內閣。十餘年。

間號能持正。不失爲賢相。寬意不得入內閣。劉健爲首相。遷數言寬。健曰。吾且去。用之未晚。他日又言。又曰。我且去。用之未晚。遷曰。吾豈私原博耶。顧渠科第先子。年齒先子。望實先子。予越次在此。慚甚。故言之。而公終不聽。耶健笑不答。正德初。天變。輔臣皆上章自劾。遷求去不得。復上疏薦寬及王鏊。自代。遷初入內閣。徐溥。劉健。相繼爲首輔。當是時。東陽位在遷上。凡條答敷奏章疏。皆出東陽手。遷與健並救致仕。而東陽爲首輔矣。鏊以時望所屬。焦芳欲援以爲重。告瑾。內閣宜南北各用一人。以故芳與鏊同入內閣。先是焦芳入閣。憾遷嘗舉王鏊。吳寬而不及己。會鄉人以賢良薦。芳和閣瑾謂遷違詔格。與劉健俱褫職。又矯旨令遷弟武選郎迪致仕。子編修丕除名。庚午。瑾誅。詔復職致仕。世宗入繼。遣行人齎敕存問。迪起參議。不復任。詹其子正爲中書舍人。遷上謝疏曰。臣匪才。誤蒙孝宗知遇。顧託之重。欲圖報稱。不自知其力之不足。旣而格心無術。輔導不效。引身退避。杜門省愆。俯仰懷慚。罪責難追。分與草木同腐。幸溝壑未填。遇皇帝聖明。嗣承天統。一新萬化。疲困更生。如臣衰朽。特軫聖慈。不加負國之誅。重錫優老之典。寵命下及。慚懼交并。願茲垂暮之年。諒無圖報之日。惟有一言獻納。庶幾少效涓埃。臣聞傳說告高宗曰。學于古訓。乃有獲。又曰。監于先生成憲。其永無愆。古訓者。二帝三王之典謨訓誥。及諸經史之所載者是已。成憲者。聖祖神宗之典章法度。凡今諸司之所職者是已。仰惟聖性睿哲。生知而聖德成就。必資問學。經筵儒臣。分直進講。所以薰陶涵養者在是。燕閒之時。尤宜博覽羣籍。以廣見聞。苟有疑議難明。卽召勸講之臣。面賜質問。務求通解。戒一暴十寒之失。積日就月將之功。則聖學緝熙。追蹤古昔帝王之盛。近代不足

言矣。我朝祖宗之法。斟酌古今之宜。諸司而能恪守。萬世可以常行。奈何世遠人亡。政久弊積。漸失其初者有矣。聽覽之際。宜申飭百司。講求成憲。苟有窒礙難行。卽召執政之臣。面加商榷。務合舊制。究詰舛訛之端。振革廢弛之弊。則聖政有恆。而聖治之成。可以紹休祖宗。垂裕無疆矣。夫一日萬幾。固未易縷陳。而一心萬化。惟在於知要。臣故特舉君道之至要。以裨聰明之萬一。其他軍民利病。政治缺失。陛下明詔。許諸人直言無隱。況以言爲職者。林立於廷。必能爲陛下次第陳之。惟望留神省覽。兼聽廣納。不以疏淺而或遺。不以拂逆而見拒。則宗社幸甚。生靈幸甚。嘉靖六年春。復召入內閣。時年已七十九矣。十月抵京。進少傅。戶部尙書大學士如故。明年三月乞歸。十一年辛卯卒。年八十三。贈太傅。諡文正。

史官曰。當孝宗之朝。君明臣良。劉健相而李謝連茹以進。所造膝密陳。皆天下大計。或謀或斷。蓋有房杜之風焉。晚際冲主。姦閹擅朝。機事不密。幾蹈訓注之禍。連翩去國。以明靖獻語及願命。未嘗不隕涕也。嗚呼。忠哉。均躋上壽。以俟河清。斯平格之佑矣。

明書卷一百二十七

列傳四

名臣傳 十二

戴珊張敷華傳

戴珊字廷珍。浮梁人。天順八年進士。成化三年爲監察御史。督學南畿。成化十四年出爲按察副使。督學陝西。窮鄉下邑。無不躬至。約束堅明。風雨不爽。二十年陞浙江按察使。尋陞福建兩布政使。弘治二年進右副都御史。巡撫鄖陽諸府。豪右多窟。流聚爲利。珊刻日令自首。嚴練兵伍。自製爲營陣法。蜀盜野王剛。越境入竹山。平利諸縣。守臣畏罪莫敢發。珊請合湖陝兵誅其首惡。縱脅從千餘人。事遂定。四年陞刑部侍郎。卽訊荆晉兩王府獄。明允。九年陞南京刑部尙書。十三年改左都御史。益自檢飭。務持風紀。雖簿書之細。必極精核。上親鞫大獄。撫司震悚。珊從容應對。時有開折。天威頓霽。上知珊清慎。每廷宣接膝面咨。至移晷刻。引疾求去。必優詔勉留。命醫賜食。間有慰諭。若家人父子。珊不覺泣下。上亦爲動容。一日珊私懇劉大夏曰。珊老病子幼。萬一客死異鄉。不瞑目。公同年好友。受知主上。獨不爲我一言乎。一日上召大夏議事畢。因問珊病。大夏言珊久病累疏乞休。本出情實。乞憐允。上曰。渠倩卿奏乎。對曰。珊在告。臣往視。

珊。珊恐微誠不能動天聽。令臣見陛下。爲彼達情悃。上曰。卿去說與珊。朕以天下事推誠付託。猶家人父子。太平未兆。何忍捨朕而歸。大夏以上語告珊。泣曰。吾不得返家矣。十八年卒於官。贈太子太保諡恭簡。珊德性和粹。顧耿耿不苟合。而洞達無城府。奉職守法。不爲物撓。而意常近厚。祿仕四十餘年。家無餘資。辰入酉出。窮寒暑不變。敷歷中外。所至有聲績。學政尤著。

張敷華。字公實。安禮人。天順八年進士。父洪。進士。爲御史。沒於土木。敷華少有奇氣。里有竹木爲怪。年年歲。卽指麾小兒盡斬去。入翰林爲庶吉士。與劉大夏同出爲兵部主事。歷郎中。大夏醇亮端恪。敷華方毅坦直。並負時名。成化十一年陞浙江參議。景甯有礦盜衆。且議用兵。敷華力請撫。執十二人寘法。餘悉解散。弘治元年陞湖廣左布政使。會歲大饑。敷華給粟散粥。藥病掩骼。高值來商。卑旦告糴。亟修學宮。資其備直。以業餓者得全活甚衆。三年陞右副都御史。巡撫山西。憂去。六年復巡撫山西。奏增解池鹽課。補藩祿餉。大同多折色。民困。敷華請太原北可車行者致米。八年改陝西。會妖僧據山中爲逆。朝議發兵討之。馬文升曰。張都御史能了此。不數日。敷華果授計山中父老。縛妖僧至。明年陞南京刑部侍郎。十二年右都御史總漕。巡撫江北。盡斥武臣諸貪刻者。時例漕司負算。假銀太倉。稍寬其息。明年來償。償前負。又復假。前後相尾。負益積。敷華曰。下剝上攘。漕是以窮國。貸取息。大非政體。奏勿假。築高郵湖隄溝。殺水勢。又築隄寶應。民賴之。十四年改右都御史。總南臺。與林瀚林浚章懋稱南都四君子。十八年遷南刑部尚書。尋召還北都察院。首請嚴禁奔競貪酷者。上知其名。與劉大夏馬文升戴珊同心效職。一時並稱名卿。

正德元年。瑾矯旨逐歸田。又明年卒。病且革。儼衣冠揖家廟。退終正寢。敷華風采。凝重義利。介然學問文章。賞飾吏治。贈太子少保。諡簡肅。

史官曰。孝宗語戴珊曰。朕以天下推誠付託。猶家人父子。太平未兆。何忍捨朕先歸。君臣魚水。情溢乎辭。此與帝歌皋廣何異。讀史至此。未嘗不感慕而三歎也。妖僧事起。朝議發兵。馬文升曰。張都御史必能了此。當此之時。非但君知臣。臣亦知君。於乎盛矣。

倪岳周經童軒傳

倪岳。字舜咨。上元人。父謙。正統四年進士。歷陞左春坊大學士。兼侍講。天順元年。晉學士。侍東宮。上大學諸直解。又明年考順天鄉試。勢家子弟不獲倖進。被誣謫戍。開平八年赦還。外艱去。歷仕至南京禮部尚書。卒。贈太子少保。諡文僖。謙常奉命祀北獄。夫人姚夢緋。袍神入室。生岳。因以爲名。岳環偉秀異。目光炯炯。望之如神。爲文敏捷。若不經意。天順元年進士。入翰林。爲編修。考校纂綴。精詳安雅。進講上前。敷古義。傳時政。言意凱切。晉吐洪亮。上喜。歷陞侍講。至學士。留心世務。經史之餘。凡生民休戚。財計登縮。戎禦利害。無不諳暢。每大廷集議。慷慨持正。論一時儀文古典。軍國重計。多岳裁定。又長於奏議。一寫千言。春容粲達。下至瑣屑案牘。吏人旁候。運筆如飛。成化二十三年。憲宗升祔。詔禮官集議。時耿裕爲尙書。岳侍郎。疏言國朝九廟已備。令憲宗祔廟。議者咸謂德懿僖仁四廟。以次當祔。至太祖爲百世不遷之祖。是知尊太祖而不知太祖之尊其祖也。昔周既追王太王王季。又上祀先公。以天子之禮。國家自德祖以上。莫推

其世。則德祖比周之后稷不可祧明甚。懿儷仁三祖。以次當祧。太祖太宗爲周文武。百世不遷。禮也。憲宗升祧。當祧懿祖一廟。宜於太廟寢殿後。別建藏祧之所。如古夾室之制。每歲暮則奉祧主合享。應古禘祭之制。又有言孝穆太后當祧廟者。下廷議。岳言周姜嫄爲帝嚳次妃。后稷之母。故周禮有享先妣樂舞。蓋指姜嫄。而魯頌闕宮之詩。特見其名。此別廟之證。且唐宋以來。皆有故事可考。如奉先殿儀。奏上詔。可時釐正。京師諸淫詞。剔刮諸允費。議皆出岳手。耿裕方正持大體。禮文事多屬岳。見岳疏稱善。不啻己出。禮科左給事中張九功。少詹事程敏政。又欲改定孔庭從祀諸賢。及七十二子。岳言馬融王弼之徒。其立身不無貶議。然秦漢以來。六經出於煨燼。賴諸儒抱遺經。專門講授。經得復存。自唐之注疏。咸祖其言。而今之經傳引用。尙多其說。何可盡廢。況七十二子名字。自司馬遷以來相沿已久。今生千百年後。安敢臆定。尋進左侍郎。會災異求言。與尙書共疏。寅畏天戒七事。未幾復自陳八事。守嶺南。內臣章眷誘撒馬兒罕。貢獅子。開海道。岳力言南海非西域貢道。禁不許通。斥還貢物。六年代裕爲尙書。內臣章泰傳召。旨國師領占竹於四川。岳抗言領占竹。僧號法王。淫昏矯僞。上初登大寶。首納諫言。削奪斥遣。傳聞四方。其稱聖德。今復召復。殊駭羣聽。馬文升言成化間累度僧道非便。下禮部議。岳言成化二年度十三萬二千有奇。十二年一萬二千有奇。二十二年二十二萬四千有奇。十年一度國板日繁。愚耗民財。坐寢民食。宜立嚴科。痛加條革。如文升議便。九年改南京吏部尙書。加太子少保。未幾改兵部。參贊機務。秉正達變。百廢頓舉。十一年清甯宮災。條上修省疏。勤聖學。開言路。減齋醮。省供應。節親藩。懲欺蔽。恤困窮。核名

實疏淹滯。擇將領。節差遣。慎公賞。停工役。斥姦貪。進忠直。恤刑獄等二十八事。十三年召爲吏部尚書。釐正品類。獎恬抑躁。不恤恩怨。正色正言。干謁消沮。或勸岳母別白賢不肖太過。且召怨。輒撓沮。不得盡行其志。岳曰。冢宰職固如是。岳才學識量。優於經濟。狀貌魁梧。又足稱其志意。於諸卿中。推遜馬文升。至論國事。亦不肯相徇。先是弘治六年。文升言五嶽之名。宜從京師。我朝北嶽。乃在江南。乞改北嶽。下禮部議。岳言北嶽恆山。祀曲陽。歷漢至今二千餘年。不可輒改。上從禮官議。昔金世宗時。議者以都燕。請別議五嶽。太常卿范拱言。軒轅居上谷。在恆山之西。虞舜居蒲坂。在華山之北。未常據都改嶽。岳議良是。文升又常言。今天下財力大耗。計無所出。獨蘇松折糧銀價。今宜稍增。以足國用。下廷議。岳曰。東南民力已竭。又復重之。且生變。請任其咎。因是得止。十四年卒。贈少保。諡文毅。國朝父子爲學士翰林。得並諡文。自岳父子始。文集並傳。自王禕後再見云。岳奏議多不錄。錄其論西北備邊事狀略云。論事者貴審理勢。酌古今。凡肆夸大。恥雷同。皆非爲國忠謀者也。近歲邊寇毛里孩。阿羅出。孛羅忽。亂加思蘭。大爲邊患。蓋緣河套之中。水草甘肥。易於屯剽。腹裏之地。道路曠遠。難於守禦。是以轄於榆林者。若孤山。安塞。安邊。定邊。諸路。轄於寧夏者。若花馬池。興武。高橋。萌城。諸路。皆其入寇之所。迤東則延安。綏德。鄜州。諸路。迤西則環慶。平涼。固原。諸路。皆其騷掠之處。擁衆長驅。遠者逾千里。近者不下數百里。沿邊諸將。或嬰城自守。或擁兵自衛。輕佻者挫衄。怯懦者逃避。旣不能折其前鋒。又不能邀其歸路。虜遂源源而來。洋洋而去。進獲重利。退無後憂。取於我者衣食。自恣。屢起盜心。處於彼者窟穴。旣安。遂無去志。虜勢不輯。邊患不寧。上僅廟虛。

遣將徂征。奈何四年三舉。一無寸功。或高臥而歸。或安行以返。乃析圭擔爵。優游朝行。輦帛與金。充物私室。且其軍旅一動。輒報捷音。賜予濫施。官爵輕授。殺傷我士卒。悉泯弗聞。撥拾彼器械。虛張勝勢。甚至濫殺被寇平民。妄稱逆寇首級。未常至其敗北。輒以奔遁爲言。未常有所斬獲。輒以鈎塔爲解。考其功籍所載。賞格所加者。非私家之子弟。卽權門之厮養。而骨委戰塵。血膏草野者。非什伍之卒。卽轉餉之民。天怒人怨。禍機日深。非細故也。況夫京營之兵。素爲冗怯。臨陣退縮。反贖邊兵之功。望虜奔潰。久爲虜人所侮。此宜留鎮京師。以壯根本。顧乃輕於出禦。以褻天威。且延綏邊也。去京師遠。宣府大同亦邊也。去京師近。彼有門庭之喻。此無陞楯之嚴。可乎。項兵部建議。遂於宣府出兵五千。大同出兵一萬。併力以援延綏。而不計其相去既遠。往返不逮。人心厭於轉移。馬力罷於奔軼。況聲東擊西。虜人姦態。搗虛批吭。兵家奧策。精銳旣盡。而西老弱乃留於北。萬一北或有警。彼未可離。首尾受敵。遠近坐困。謂爲得計乎。臣又聞軍旅之用。糧食爲先。今延綏之地。兵馬屯聚。芻粟之費。日賴資給。乃以山西河南之民。任飛芻輓粟之役。仰關而西。徒步千里。夫運而妻供。父輓而子荷。道路愁怨。并落空虛。幸而至也。東芻百錢。斗米倍直。不幸遇賊。身已去矣。他尙何計。輸將不足。則有輕齎。輕齎不足。則有預徵。嗚呼。水旱不可先知。豐歉未能逆卜。如之何其可預徵也。至甚不得已。則令民輸芻粟以補官。然媚權貴。私親故者。或出空牒而授之。而倉庾無升合之入。又令民輸芻粟而給鹽。然恃豪右。專請託者。率占虛名而鬻之。而商賈費倍蓰之利。官級日濫。鹽法日沮。而邊儲不充如故也。又朝廷出帑藏以給邊者。歲爲銀數十萬。山西河南之民。輸輕齎於邊者。歲

亦不下數十萬。銀日積而多，則銀益賤。粟日散而少，則粟益貴。而不知者遂於養兵之中，寓其養狙之智。或以茶鹽或以銀布，名爲准折糧價，實則侵剋軍儲。故朝廷有糜廩之虞，士卒無飽食之日。至於兵馬所經，例須應付。平居之時，一日之數，人米一升，馬草一束。追逐所過，一日之間，或一二堡，或三四城，豈能俱給哉。而典守者陰懷竊取之計，巧爲影射之謀。凡其經歷之方，悉開支給之數，背公營私，罔上病下。莫此爲甚。由是觀之，賊勢張而無弭之道，兵力敵而無養之之實。徒委西顧之憂於陛下，誰果分憂盡心效力乎。採之建白，察之議論，則又往往紛紛紜紜，據指掌之圖，肆胸臆之見者。率謂復受降之故險，守東勝之舊城，則東西之聲援可通。彼此之犄角易制，是非不善也。第二城之廢棄旣久，地形之險易未知。況欲復城河北以爲之守，必須屯兵塞外以爲之助。出孤遠之軍，涉荒漠之地，輜重爲累，饋餉爲艱。彼或伴爲遁逃，潛肆邀伏。或鈔掠於前，躡襲於後。曠日持久，露行野宿，人心驚駭，軍食乏絕。進不得城，退不得歸。一敗塗地，聲威大損。其有懷敵愾之心，馳伊吾之志者，率謂統十萬之衆，裹半月之糧，奮揚威武，掃蕩不規。使河套一空，邊陲永靖，是亦非不善也。然帝王之兵，以全取勝。孫吳之法，以逸待勞。今欲鼓勇前行，窮搜遠擊，乘危履險，徼倖萬一。運糧遠隨，則重不及事。提兵深入，則孤不可援。況其間地方千里，縣亘無際，旣無城郭之居，亦無委積之守。彼或往來遷徙，罷我馳驅。或掩襲衝突，撓我困憊。邊虜安望於成擒，中國復至於大創。失坐勝之機，蹈覆沒之轍，必矣。至有欲圖大舉以建奇功者，謂必翦□州之衆，除朵顏之徒，乘勝而西，遂平河套。夫祖宗之於□州，朵顏諸衛，不過羈縻保塞，以固吾圉。今若是將使虜人生心，藩籬頃壞，遣

孽難盡。邊釁益多。是果何知。誠爲無策。甚者至謂昔以東勝不可守。既已棄東。損今之延綏不易守。不若棄延綏。則兵民可以息肩。關陝可以安枕。夫一民尺土。皆受之於天。於祖宗不可忽也。向失東勝。故今日之害。萃於延綏。而關陝騷動。今棄延綏。則他日之害。鍾於關陝。而京師震動。賊逾近而莫支。禍逾大而難救。此實寡謀。故爾大謬。嗚呼。一唱百和。牢不可移。甲是乙非。卒莫能合。成功既鮮。高談奚取焉。臣所尤不滿者。徒以書生典兵。謂詢謀爲無益。棄人言而不顧。謂專斷爲無傷。執己意而不回。處置乖方。指揮失義。若向之圖復西戎。旣爲苟且之舉。已損威而失信。近之議制南夷。復倡隄備之說。以啓釁而示怯。違居中制外之權。昧以大字小之體。推是以往。其他可知。徒使下弛兵機。上隳國紀。又皆此輩舞文之過。重貽後時。噬臍之悔者也。故以臣論之。不若卽古人已用而有成。及今日可行而未盡者。舉而措之。其爲力也少。其致功也多。曰重將權。以一統制而責成功。曰增城堡。廣斥堠。以保衆而疑賊。曰募民壯。去客兵。以弭患而省費。曰明賞罰。嚴間諜。以立兵紀而覘賊情。曰實屯田。復漕運。以足兵食而紓民力。其論邊漕略曰。今關陝所需。皆山西河南所給。而三方之地。俱近黃河。其間雖有三門析津龍門之險。然昔漢唐糧餉。由此而通。卽今鹽船木筏。往來無滯。且以今戶部所計。山西米豆。必令運貯潼關。衛及陝州諸倉。其諸州衛地皆瀕河。可通舟楫。踵往古故跡而行。免當今陸運之害。公私之利。奚啻萬萬也。況今河道。當潼關之北數十里。接連渭河。可通陝西及鳳翔鞏昌。渭河西流數十里。接連洛河。可通延安。及北上源。可通邊堡。渭河西流三百餘里。接連涇河。可通慶陽。又龍門之上。舊有小河。

徑通延綏。儻加修濬。必可行舟。此宜簡命水部之臣。示以必行之意。相度地形。按求古跡。某處避險。可以陸運。某處可建倉以備倒運。某處可造船以備裝運。淤塞悉加導滌。漕河務在疏通。毋憚一時之勞。而失永久之利。如是則不但三方之困可紓。雖四方之物無不可致矣。

周經。字伯常。陽曲人。天順四年進士。父瑄。字廷玉。宣德乙卯舉於鄉。初爲刑部主事。歷官南京刑部尙書。致仕。瑄寬大詳雅。修髯長身。善議論。守官廉。故鄉無田宅。可歸。寄家江陵。卒諡莊懿。贈太子少保。經歷官翰林。至春坊中允。侍孝宗東宮。講文華大訓。東宮每起立拱聽。內閣言太子勞。經宜跪請東宮坐聽。經不從。弘治二年進禮部侍郎。條奏傳經議。改吏部。靈壽姦民以其縣山水之間。曰大明川。民田獻太監李廣。戶部執議不得允。經會諸司奏。竟奪田歸民。八年諸大臣以災故上言。屬經草疏。請早視朝。勤聽政。節侈費。省遊幸。止貢獻。斥樂戲。語甚切直。頗傳蹤跡。此疏出。誰。耿裕曰。疏名首吏部。裕實具草。經又曰。疏草本出經。卽有罪。罪經。王卒不問。十年陞戶部尙書。凡諸上請河湖稅錢。執不與。中官出南京織造者。請長蘆鹽八千引。粥兩淮。准給鹽銀二萬兩。又執不與。中官織造浙江者。請諸竹木稅。又執不與。上說經言。併停織造。大同缺戰馬。文升請出太倉銀市馬。經言糧馬各有司。祖訓六部不得相壓。兵部輒侵戶部官。非祖訓。上是其言。更命太僕銀市馬。給事中魯昂言。國用不足。請盡括諸省稅役金錢輸太倉。經曰。國用不足。宜儉於國。不宜殷於民。織造賞賚齋醮土木費益廣。不節。乃欲括天下財盡歸京師。給事中言非是。上從之。中官傳旨。取太倉銀三萬兩爲燈費。經又執不肯發。內靈臺奏增灑掃卒。當給月廩。經再疏。竟不與。修

清甯宮議調役山東七千人。經曰：山東歲歉，民貧不可輒動。請以戶部羨銀催役。壽甯侯家有賜田，河間數百頃，詭賜額，并得旁近民田，又千餘頃，又乞畝加稅二分。經曰：河間地多沮洳，歲無常收，頃因久旱，即耕退灘，一遇淫雨，遂成溝壑，荷指目前輒增畝稅，貽累貧民，轉爲流徙。且王府賜田，畝稅二分，外戚不得獨優。又聞憲宗妃家私田與民田比，一切還民。壽甯侯家不宜獨異。疏三四上，會雄縣有以退灘地獻爲東宮莊者，上念經言，擲其奏抵罪。十三年致仕。武宗卽位，起南戶部。憂去。正德三年，又起禮部，卒。贈太保。諡文端。經初在清散幾三十年，編摩校閱，有文章名。及授政務，守正應變，剴裁不滯，屹然有古大臣風。童軒，字士昂，故鄱陽人，父碧瑄，以精天官學，占籍南京。欽天監。軒幼穎敏，讀書過目成誦，以景泰辛未進士，拜南京吏科給事中。軒思舉職，深居簡出，不妄與物接。常上疏言省冗員，公考察，倡武勇，擇師儒，杜倖進，恤京民。又言南京糴貴，民饑，請命官賑之。俾御史體察，多見採納。時詔南京守備採辦翠毛魚鮓諸物，以萬計，軒極言止之。英宗復辟，覽軒奏，嘉其敢言，尋上疏言弭盜安民數事，尤切時弊。天順己卯，以嫡母艱歸，服闋，改戶科給事中。癸未，同考禮部會試，得倪岳輩十數人，時稱得士。憲宗踐祚，軒首上疏言帝王之治，當知本末，隆聖德，用賢才，納忠諫，愛小民，謹邊備，本也。而簿書刑名，其末也。願時行儒臣，講求祖宗謨訓，及古帝王修身用人之道，推而行之。則聖德隆，命在廷三品大臣，歲舉堪任方面一人，且嚴連坐之法，進用大臣，亦召三品大臣於便殿，各舉一人，不當者科道糾之。則賢才用，臺諫之言，實其直，貸其過，則忠諫納，養民之政在戶部。凡奏報災傷，卽加優邊。則小民安。多方求將，歷試所長，文武有犯，輸粟於邊，則

邊備謹。上優詔。疑美。並下諸司舉行之。軒又言。漕河爲官舟所阻。請命大臣督其事。仍乞省貢舟而嚴禁之。未幾四川盜作。命軒往撫。軒至。徧歷賊巢。宣布恩威。諭以禍福。賊首王應高等聞軒名。羅拜乞生。悉慰遣之。夏六月。進都給事中。會賊首趙鐸悍不聽撫。旅復叛去。軒偕鎮巡三司分兵勦撫。躬冒矢石。斬獲無算。凱還。蜀人繪班師圖紀焉。明年夏。四川巡撫言賊勢猖獗。委咎於軒。且議出師。軒曰。賊已平。奚用出師。不數日捷奏果至。猶坐言者謫。浙江壽昌令。成化五年己丑入覲。上疏自理。廷議以爲寬。於是禮尙書姚夔薦改軒僉事。督雲南學政。軒精於考校。隨才造就。士風爲變。撫按交章薦召拜太常寺少卿。以世業天官。掌欽天監事。軒嚴考天文諸生。公僚屬之薦。省麻紙之費。夙弊一清。己亥夏。進卿。仍掌監事。教諭余正己。奏言麻法之差。上命軒與之考論。不合。軒上言歲差置閏。其來已久。我朝考麻制象。尤爲精密。雖日月薄蝕。不無先後晷刻之殊。分秒多寡之異。則以土有南北高下故耳。正己乃謂天地有自然之冬至。以置朔望置閏。皆非人力可爲。是不知古人以數求天之術。願以小智亂成式。宜下之吏以正其妄。從之。復正天下陰陽官納粟免考非制。十九年癸卯春。予告歸。日蕭然一室。非知舊不輕接納。縉紳重之。弘治元年。會欽天官以不職罷。衆復以軒薦。命軒仍掌監事。夏六月。日有食之。軒言日食紀元之初。當盛夏火旺之候。宜修身窮理。進君子。退小人。以謹天戒。尋辭。掌天文。舉吳吳張紳高鍾自代。是冬。進右副都御史。提督松潘軍務。兼巡撫。時蜀歲祲。軒首舉荒政。設粥以待饑饉。給糧以歸流移。平訟以決久禁。先是久旱。軒至。雨亦隨足。乃爲禁令三十餘條。皆安邊保民之政。復以南路鎮番一帶。若蠻夷出沒。歲減軍糧備犒賞。非

計。奏以四川官帑銀布代之。戎卒乃安。軒復以其地險遠。蠻夷雜居。疏言松茂威疊戍邊甚艱。而疊溪一路尤甚。宜調兵設衛。令一都指揮守之。四處要路。各設一倉。以便轉輸。令一布政司官督之。復言沿邊衛所州縣。皆在萬山中。關堡與蠻夷共。有害而無利。宜捐松茂中羊腸一線之路。則關堡倉廩可減。兵無遠戍之勞。民省轉輸之苦。蠻有坐困之機。凡八害三利。畫一以聞。事下所司議行。常創兵器。給諸關堡。爲禦虜具。薦按察使林浚可大任。時論譴之。辛亥。晉南吏部右侍郎。甲寅。夏。進南禮部尚書。累疏乞骸骨。上再四勉留。軒力陳數千言。謂朝廷大政。闕門一議不足決。是非宜如古公卿大夫各得獻議。以俟采擇。未幾以疾卒。贈太子少保。軒身若不勝衣。強學好問。至老不倦。爲文淵博雄麗。詩有唐人體裁。書學遒勁。見者寶藏之。性孝友。事嫡母備極色養。分祿以贍兄嫂。撫親屬皆有恩。平生喜賑人之急。而自奉疏食水飲。泊如也。刑尙書顧璘作鄉正篇。以訓士云。公擇地而蹈。擇言而出。吐辭濡翰。必軌其方。慎哉。願乎。君子以爲知言。所著有清風亭藁。枕肱集。海岳涓埃諭。蜀藁籌邊錄。夢徵錄。各若干卷。

史官曰。倪岳通達國體。曉暢邊務。指畫時弊。一瀉千言。晁賈之流也。要其大指。如伐病療饑。歸於適用。與表餌請纓者遠矣。周經審諤有執。持正敢言。董軒條奏懸河。能議能任。幸遇明主。得行其志。殆邦之司直乎。

石瑤傳

石瑤。字邦彥。葉城人。少博雅穎悟。通周易。與兄玠齊名。先是皆舉鄉魁。同登成化丁未進士。時稱二鳳云。

瑤選庶吉士。除檢討。弘治初。以纂修憲宗實錄成。進修撰。侍經筵。爲講讀官。賜金帶四品服。正德改元。進侍讀學士。掌南院。時士風漸漓。瑤憤嫉。作媒說以諷。己已。陟國子監祭酒。潔己好修。士類信嚮。會閣瑾用事。以勵精爲名。常令監生查對軍冊。有患病不容給假。瑤力寬之。又令曬晾黃冊。有不至者。輒行典簿廳取供。令其每夕畫酉瑤。以祖宗成憲。不敢擅改。答之。明年。召爲北監祭西。癸酉。晉南吏部右侍郎。尋調禮部右侍郎。又改左侍郎。兼翰林學士。十六年。辛巳。陞禮部尚書。掌詹事府事。嘉靖癸未。代王瓊爲吏部尚書。每銓輒以職名書片楮。爲丸納袖中。探而出之。囑託不行。時柄臣不悅。僅兩月。解去吏部。遂以尚書兼學士。仍掌詹事府事。甲申。夏五月。命兼文淵閣大學士。入內閣。預機務。乙酉。夏六月。加少保兼太子太保。進武英殿。召平臺煖閣。議廟樂。再議廟衢。又議章聖太后皇后謁世廟儀。瑤守己見力爭。上謂其非通儒。遂忤旨。六年二月。致仕。尋卒。加少保諡文隱。瑤清修無玷。毀譽不撓。持論堅確。不避夷險。稱其爲文。初喜法古。後頗嗜莊列。在南監時。取多奇崛。文體爲之一變。癸未。復主會試。所作錄文。乃更醇雅。人固莫能測也。兄玠。累官戶部尚書。

史官曰。鄭曉曰。瑤秉銓清勁。不悅於楊廷和。數議大禮。乃不肯負廷和。自瑤去國。而吁咈之風微矣。
楊廷和毛澄蔣冕毛紀傳

楊廷和。字介夫。四川新都人。父春。進士。爲湖廣提學僉事。廷和成化十四年。戊戌。進士。改庶吉士。授檢討。弘治二年。歷修撰。陞侍讀。九年。進左春坊左允。中十六年。陞左春坊大學士。兼侍講學士。十八年。陞少詹

事兼學士。正德元年進詹事。仍兼學士。二年陞南京吏部右侍郎。初武宗御經筵。講書故事。講書義畢。必獻規諫語。是日廷和同學士劉忠講罷。上謂閣瑾曰。經筵講書何故增若干支語。瑾奏曰。此二人當打發他南京去。乃陞二人南京侍郎。是時南京無缺。皆添注。五月陞南京戶部尚書。十月改戶部尚書。兼文淵閣大學士。入閣辦事。三年八月加少保。兼太子太保。五年二月改吏部尚書。進武英殿學士。尋加少傅。進謹身殿。七年加少師。進華蓋殿。九年正月奏請視朝。御經筵。及罷邊兵。西僧市肆諸事。上以早朝深居。在朕目處。經筵昔有成規。邊兵何必議罷。市肆常理。西僧舊制。俱不必動。十年二月疏請重視朝。嚴宮禁。三月以憂去。十二年服闋。大學士梁儲請遣行人起廷和復入內閣。而已遷居其下。十二月上巡邊。廷和言北虜不時出沒。正統末年。可爲明鑑。不報。十三年六月上復議北征。廷和諫萬乘不宜輕出。上又自稱威武大將軍。令內閣草敕。廷和等又諫。俱不聽。十五年廷和同大學士毛紀上疏。謂大祀之禮。行在正月。社稷之祀。舉在仲春。孝貞皇后大祥在二月二日。禮應卽時祔廟。今俱改卜至再。天下朝覲官員。吏部考察上請。未奉定奪。各官離任既久。政務悉廢。殿試進士亦已踰期。自去秋聖駕南行。至今八月有餘。在京在外各衙門題奏。俱未蒙發。伏望亟賜班師還京。舉行前項大禮。并各衙門題奏文書。不報。十六年三月武宗不豫。廷和等密請太后懿旨。誅江彬。籍其家。會世宗將至京。廷和奏由東安門居文華殿。上箋勸釋日登極。上命從行殿受箋。由大明門入。日中登極。初儀制郎中具儀注途啓。上謂長史袁宗皋曰。遺詔以吾嗣皇帝。非爲太子。此所具儀何謂也。命議興獻王主祀稱號。尚書毛澄請之內閣。廷和檢漢定陶王宋漢

主事授之曰。是足爲據。異論者謂其爲姦邪當斬。七月進士張璠疏論繼嗣不同。力詆朝議之非。上令送。至內閣。廷和曰。秀才焉知國家事體。復持入。頃之召廷和等入諭曰。至親莫如父母。因授以手敕曰。卿等所言俱有理。但朕罔極之恩。無由得報。今尊父爲興獻皇帝。母爲興獻皇后。祖母邵氏爲康壽皇太后。以伸朕爲子之情。廷和等退而上言。禮謂所後者爲父母。而以其所生者爲伯叔父母。蓋不惟降其服。而又異其名。臣等不敢阿諛順旨。仍封還手敕。既而御批復加興獻帝后皇字。廷和等復封還御批曰。若加皇字。是忘所後而重本生。任私恩而棄大義。臣等不得辭其責矣。願罷歸。上曰。卿等所言皆大義。朕奉昊天至情。不必拘於史志。可勉錄皇號。廷和等倡九卿翰林科道連章劾張璠等邪說。乞罷斥。不報。嘉靖元年壬午春。以翊戴功。加伯爵。廕一子爲錦衣衛指揮使。辭免。仍加錄廕。二年二月。加少師。十二年。考滿。奉手敕。楊廷和輔翊朕躬。勤勞懋著。特加太傅。不拜。三年二月。以議大禮忤旨致仕。後創籍爲民。先是劉忠與廷和偕南。忠曰。此行別瑾否。廷和曰。事已如此。再趨見人。必謂我輩交瑾矣。忠不往。廷和以錦幣辭。後瑾乃厚廷和而疏忠。人謂其賣友。隆慶初。詔復其官。賜祭葬。諡文忠。子慎。正德辛未。廷試第一人。以議禮謫戍。自有傳在文學。

毛澄。字憲清。崑山人。弘治六年進士第一人。方正端毅。有濟務才。初授修撰。預修大明會典。陞右諭德。充東宮講讀官。又預修通鑑纂要。進右庶子。兼侍讀。賜金緋。武宗即位。預修孝宗實錄。瑾惡之。矯奪其官。仍侍讀。尋進侍講學士。正德十二年爲禮部尙書。澄在部持正守典禮。不與諸貴倖通存謝。恭默靖慎。諸貴

倅亦不恨澄。武宗崩，奉昭聖皇太后旨，偕大學士梁儲、駙馬都尉崔元壽、甯侯張鶴齡、章太監邵皇親，迎世宗於輿邸，以功敕廢子一人。世錦衣衛指揮同知，辭充副總裁，修武宗實錄，未幾大禮議起，澄守濮議，請以益王子崇仁王子後獻皇帝，上不從。章聖太后至，請由大明左門入，又不從。會議所生不得稱父母，即不得帝后其所生，又不從。上不喜，或又勸其將順者，霍韜再移書，謂今日主濮議非是，澄不從。嘉靖二年三月病，請致仕，加太子太傅，令屬吏護行至興濟卒，贈少保，諡文簡。澄心術平夷，學識淳正，狀貌抑抑謙恭，正是非義利禍福，確乎不可拔也。

蔣冕字升之，廣西全州人。十四應鄉薦，又十年而成進士。改翰林院庶吉士，授編修，遷侍讀，改右中允，進左春坊左諭德，兼侍讀，以母憂歸，還爲侍讀學士，進少詹事，仍兼侍讀學士，遷吏部右侍郎，轉左侍郎，爲禮部尚書，改掌詹事府，入東閣理誥敕，進兼文淵閣大學士，加太子太傅，武英殿大學士，滿三載，授光祿大夫，柱國，尋進加少傅，太子太傅，戶部尚書，謹身殿大學士，冕在翰林久，最有學行，清修自好，而無所見，其入內閣，值上多出巡幸，留連塞外，不肯還京師，冕與楊廷和、梁儲、毛紀疏請，前後以十數，皆不聽。冕乃自爲疏上之，其言尤危切，上不之省，亦弗罪也。旣南征，冕與梁儲扈從，以時請迴鑾，上所從倡樂遊讌，雖不能諫止，亦不肯依阿，而是時中官張永、張忠與都督江彬、許泰，挾上寵勢張甚，然不能親疏冕，以是望實頗歸重，而武宗屬疾崩，冕與廷和合謀捕江彬，與商輅、詔草有社稷功，世宗自輿邸來，論封伯爵，力辭至五，乃改廢錦衣指揮同知及五品京職，皆世襲，復辭，冕故推重，廷和旣相得，權甚，而冕尤耿介，抗顏

執諍。侃侃有大臣體。兵部右侍郎吳廷舉者。其鄉里同年厚友也。有所建白。冕迂之。遽上章謂冕在先朝。不能格君心。不稱輔導。冕恚甚。因盡暴白其所上疏。而謂廷舉爲睚眦詆訶。故舊斥之。南人兩病其隘。然廷舉更累進秩。冕弗問也。其所持追崇與王禮。既雅與廷和合。而朝議因之。廷和罷。上遣中官織造。尙未具草。冕卒不肯具草。上責之。引咎而已。因移病不出。上優詔強起之。再三乃出。時上欲崇獻王及母妃。得張瓏桂萼等疏。益決。雖勉稱本生父母。欲立廟於奉先殿側。禮部議不合。則罷。尙書汪俊以怖冕。既與同官力諍。復獨疏言其不可。因乞休。優詔不允。乃降詔。本生皇考曰恭穆獻皇帝。本生母曰章聖皇太后。冕益不自得。復上疏。乞不與議立廟。而以骸骨歸。上責之。然猶備大臣禮。略如廷和。錄一子錦衣衛指揮同知。給事御史皆請留冕。不報。冕去。毛紀爲首輔。距其代廷和止兩閱月。歸未幾卒。年七十。贈太保。諡文定。毛紀字維之。掖縣人。少惇敏好學。二十四舉山東鄉試第一。明年成進士。改翰林院庶吉士。授檢討。滿九載。進修撰。充經筵講官。俄侍東宮講讀。修大明會典成。遷侍讀。武宗卽位。進左春坊左諭德。丁父憂歸。服除。閣瑾恨之。奪左諭德。復爲侍讀。孝宗實錄成。進侍講學士。尋爲學士。權戶部右侍郎。遷禮部左侍郎。母憂歸。服除。改吏部左侍郎。進禮部尙書。時道中官使西域。齋番僧供。紀力爭之。不報。亡何兼翰林院學士。掌詹事府。入東閣。理誥敕。賜玉帶蟒衣。尋兼東閣大學士。直文淵閣。預機務。加太子太保。進文淵閣。上以宸濠反。欲親征。紀與楊廷和等泣請留。不得。遂同廷和居守。滿三載。進少保。改戶部。進武英殿階光祿大夫。勳柱國。武宗崩。紀與廷和等合策迎與世子。及捕誅江彬等。世宗卽至。與蔣冕俱同知經筵事。武宗

實錄總裁論功賜封伯爵力辭改文武廕襲復辭以一品六載滿改吏部尙書謹身殿大學士時追崇興獻帝敕諭甫下而上復入張璫桂萼等言驟遷其官下禮部議稱孝宗爲皇伯考獻帝爲皇考與聖母俱去本生字禮廷執奏不聽令具儀聞於是詹事府翰林院給事御史部屬百餘人各上疏爭之上大怒逮爲首者下詔獄紀乃與大學士石瑄復伸其說報聞於是紀移疾乞休優詔留之當上聖母冊時大臣多不至者上益怒會紀扶病入朝有旨捕繫言事諸臣他待罪闕門者尙衆人情洵洵紀乃上疏請乞少霽天威急收人心上使中官諭數紀朋姦背君紀乞休益力上責而許之其恩禮猶視蔣冕紀之代蔣冕亦僅三月廷和子翰林修撰楊慎以倡僚窠伏闕慟哭杖之數十幾死謫戍雲南之永昌又三載璫萼益貴用事所撰述明倫大典成下詔罪狀廷和謂自詭門生天子定國策老法當僂市削職爲民蔣冕與紀俱冠帶閒住明年廷和卒又三年冕卒紀歸老無恙爰恩詔得復官年八十命撫按官卽家以幣彩牢醴慰勞又年卒贈太保諡文簡紀無子家貧甚

史官曰世宗大禮之議論忠佞則楊廷和蔣冕毛澄毛紀及伏闕得罪諸臣皆忠也張璫桂萼霍韜等之附和佞矣論則爲人後爲子之說與繼統不繼嗣之辨皆是而皆未是也孔子曰必也正名乎名失則愆父父子子君君臣臣皆名之至大而不可易者也考孝宗而不考與獻非名矣帝與獻而后與國可謂名乎以父子還與獻必當以君臣還孝宗乃稱考不已尊之曰帝稱帝不已益之以皇必欲耦列宗而後已徇私恩而忘大義則璫萼等長君逢君之惡不可蓋也善乎席書之議曰舜繼堯統未聞不以瞽爲父禹

繼舜。未聞不以鯀爲父。然舜禹雖父其父。未嘗尊其父爲帝。此萬世大公案也。稱曰皇帝。與獻王。則君臣父子之名皆正矣。廷和等不知出此。徒執定陶濮王之議。言不順矣。使小人得乘瑕蹈隙。肆其辨博。以遂其阿私。此皆不學無術之過歟。

6

232422

(12)



國學基
本叢書 明

書

十

[

MG
312116
6/40

書叢本基學國

書 明

(十)

纂鱗維傳



3 1764 2004 4

行發館書印務商

明書卷一百二十八

列傳四

名臣傳十三

薛蕙傳

薛蕙，字君采，亳州蕙人。蕙性寬簡質直，不與人校，尤善施與。拯人之急，歲荒，歎捐金活民爲多。自幼穎慧，七歲能屬文。年十二，有詩名。題三教圖曰：斯道有三教，聖心無二天。陰陽動靜機，活潑一圓圈。試問一歸何處？此理玄之又玄，人咸異之。十五，攻文詞，有聲時都御史儀封王廷稱之曰：是李何之流也。登正德九年甲戌進士，授刑部主事。尋陞吏部驗封司員外郎，進考功郎中，尤獵意爲詩。凡樂府歌章，溫雅麗密，蘧乎追躡漢魏矣。嘉靖初，議大禮，廷臣論奏紛然。蕙著爲人後解，大要謂大宗不可絕，而義變則偏子可以爲後。又著爲人後辨，爲繼統固繼嗣，而繼嗣所以繼統，且禮無生而貴者。雖天子諸侯之子，苟不受於君父，亦不敢自成尊也。忤旨罷歸，所居之西曰西原，故有水竹之勝，築室日遊衍其中，著書樂道，逍遙自適。凡一十七年，儉約常如貧士，人亦不敢以非善干之。紛華聲別之言，一不出口。已而當路者屢薦於朝，堅臥不起。卒年五十二。蕙晚隱，沈酣釋老諸書，久之深於其說。其言曰：老子之道，卽仲尼之道也。性一而已，則老

子卽仲尼之道。不得不同。特性與天道之說。孔門所罕言。故老子之書。雖同於仲尼。而後世之不知其同也。遂註道德經。皆飾以儒語。又曰。易曰。寂然不動。感而遂通天地之故。樂記曰。人生而靜。天之性也。感於物而動。性之欲也。子思曰。喜怒哀樂之未發。謂之中。發而皆中節。謂之和。中也者。天下之大本也。和也者。天下之達道也。數言者。雖有精粗詳略之不同。然語老子之言。皆所謂殊途而同歸也。至於論佛氏。則曰。性命且近之。實非荒唐汗漫之論。特於其至近至神。難以覺悟。故謂之玄妙耳。儒者拒以不信。既不足以知此。然世之禪學。猶皆以明心見性爲原。無他說也。至於方士之流。則大背老莊之指。旁門歧徑。不勝其變。西方之書曰。若菩薩通達無我法者。如來說不真是菩薩。又曰。一切聖賢。皆以爲無法。而有差別。此與老子之言。豈非同條共貫乎。卽二端而觀之。可以見方士之道之陋矣。其大指如此。人多翕然從之。唐順之亦以爲曠識云。

史官曰 闕

王鏊傳

王鏊字濟之。吳人。成化十一年會試第一人。殿試第三人。幼穎悟不凡。十六隨父讀書太學。太學諸生爭傳誦其文。侍郎葉盛嘗奇之。目爲天下士。授翰林編修。閉門力學。避遠權勢。弘治初陞侍講。實錄成。陞右諭德。八年薦陞侍講學士。爲日講官。時內官李廣怙寵干政。鏊進講意存諷諫。上退謂左右曰。若等知今王鏊之論乎。蓋謂廣也。上每出遊後苑。鏊進說無盤於遊田辭。嚴意暢。上悚聽。自是不復出遊。其凡事進

規類如此。鑿學問瞻博。有識鑿。爲文春容爾雅。議論快暢。試士南宮。專尙經術。險麗奇袤者。一切屏去。弘治間文體一變。鑿有力焉。東宮將出閣。大臣請選正人。端國本。首薦鑿。陞少詹事。兼侍講學士。尋進吏部右侍郎。時馬文升爲尙書。韓文及鑿爲侍郎。會磨火篩入犯。鑿上籌邊八事。一定算。二重主將。三嚴法令。四恤邊民。五廣召募。六用閒。七分兵。八出奇。遂薦秦紘起陝西總制。又請科貢之外。略倣前代制科。如博學宏詞之類。以收異才。六年一舉。舉不過十餘人。其翹然出類者。儲之翰林。餘補科道。部屬中書。先有官者。量才加秩。數年之後。士類濯磨。必以通經學古爲高。而脫去諛聞之陋矣。其選將才亦然。十六年憂去。武宗卽位。復除侍郎兼學士。會災異。謝遷求退。薦鑿自代。當是時。八閣導上遊狎。中外洵洵。臺諫交論不聽。韓文時爲戶部尙書。與諸大臣伏闕請誅八閣。召諸大臣至左順門。中官傳諭甚厲。衆相視莫敢發言。鑿對曰。八人者不去。亂本不除。上竟不去八閣。反分布要路。瑾入司禮監。韓文劉健謝遷相繼逐。瑾欲引焦芳入內閣。而廷推鑿。瑾恨之。迫公論。不得已。遂與芳同入內閣。進戶部尙書。文淵閣大學士。逾年加少傅。改武英殿。上時政四時。曰講學。曰延下。曰用人。曰節用。時瑾方威鉗士類。按索微瑕。輒枷械死。鑿謂瑾曰。士大夫可殺不可辱。辱而殺之。吾尙何顏於此。瑾恨又不已。必欲置死地。又欲以他事中健遷。鑿前後力救得免。瑾又欲殺黎澹。逮詔獄。坐激變。土官罪死。鑿曰。土官未叛。何名激變。或惡楊一清於瑾。謂築邊大費。瑾又欲罪之。鑿曰。楊總制高才偉略。爲國修邊。豈可以功爲罪。初瑾見鑿開誠與言。亦強聽之。芳專事媮阿。瑾驕倖日甚。鑿無可奈何。居常戚戚。四年夏。力求去。瑾每恚鑿相忤。又輒發怒。欲中傷之。鑿惴惴。

杜門瑾敗得免。嘗自贊曰。噫嘻先生。何如其人。窮年校書。結髮勵行。白首於道。茫然無聞者乎。爵廁公孤。官居臺閣。志懷輸忠。幾昧納約者乎。貴戚赫炎。不能附麗。權璫狂獠。不能嫁阿。一有違言。超然不辱者乎。遇事直前。不知顧忌。見利思義。不知規避。歸臥空山。晏然寤寐者乎。斯人也。其量則隘。其才則庸。無裨於世。自潔其躬。跡其所至。蓋知慕首陽之節。而不知柱下之工。知希止足之疏。而不能爲應變之崇者乎。居閒十餘年。世宗立。遣行人存問。曰。朕行且召卿。整疏謝。乞上講學親政。略以爲國家經筵之設。盛矣。經筵一開。天下欣欣焉。傳之以爲希闕之典。其間寒暑皆輟。春秋之月。日不過三日。三日之期。風雨則免。政事有妨。則免。講之日。夙具講章。至期講訖。繪音賜宴。儼然而退。上下之情。未見其親且密也。至於日講。可謂親矣。然體分過嚴。上有疑焉。未嘗問也。下有見焉。未嘗獻也。昔高宗學於古訓。遜志時敏。成王訪學於羣臣。曰。學有緝熙於光明。商周之君好學如此。夫人主一日萬幾。固不暇如儒生學士日夜孜孜。然而帝王精一之傳。治天下之大經大法。古今治亂之迹。天人精禎之際。自非遜敏緝熙。亦安望其有得。今乃闕略如是。暴之之日少。寒之之日多。傳之之人寡。咻之之人衆。未見其能得也。且不獨高宗成王爲然也。漢光武雖有軍中投戈講藝。息馬論道。至夜分乃罷。唐太宗延四方文學之士。房杜褚薛輩十八人。分番直宿。討論經籍。或至夜分。今貞觀政要。與魏徵所論。亦可見矣。宋世賢主。宮中消日。惟是觀書。居常禁中。亦有日課翰林侍從。日寓直禁中。以備顧問。我太祖甫得天下。開禮賢館。與宋濂劉基章溢輩日相講論。其後聖學高明。詔誥天下。皆出御製。睿翰如飛。羣臣拱視。今御製文集是也。仁宗臨御。建弘文閣於思善門之

右文學之臣數人入直。時至館中講論。孝宗經筵之外。每觀永樂大典。又嘗索太極圖西銘諸書。於宮中玩之。尤嗜故學士沈度之書。日臨數過。夫古帝王之學如此。祖宗之學如此。陛下睿哲自天。春秋鼎盛。講明聖學。正其時也。臣愚特望於便殿之側。復弘文閣故事。妙選天下文學行藝著聞者七八人。更番入直。內閣大臣一人領之。如先朝楊溥故事。陛下萬幾有暇。時造館中。屏去法從。特霽天威。從容訪問。或講經。或讀史傳。或論古今成敗。或論民間疾苦。閒則遊戲翰墨。雖詩文之類。亦惟所好。蓋亦日講之義。而加親焉。大略如家人父子。上有疑則必問。下有見則必陳。日改月化。有不知其然而然者。時御經筵。所以昭國家之盛典。日造弘文。所以崇聖學之實功。如是不已。則聖德日新。又新高宗成王。不得專美於前矣。言親政。則曰易之泰曰。上下交而其志同。否曰。上下不交而天下無邦。交則泰。不交則否。自古皆然。而不交之弊。末有如近世之甚者。君臣相見。止於視朝數刻。上下之間。章奏批答相關接。刑名法度相維持而已。非獨沿襲故事。亦其地勢使然。何也。國家嘗朝於奉天門。未嘗一日廢。可謂勤矣。然堂陛懸絕。威儀赫奕。御史糾儀。鴻臚舉不如法。通政司引奏。上特是之。謝恩見辭。惴惴而退。上何嘗問一事。下何嘗進一言哉。臣愚以爲欲上下之交。莫若復古內朝之法。蓋周之時有三朝。庫門之外爲外朝。詢大事在焉。路門之外爲治朝。日視朝在焉。路門之內曰內朝。亦曰燕朝。玉藻曰。君視朝。退適路寢聽政。蓋視朝而見羣臣。所以正上下之分。聽政而適路寢。所以通遠近之情。漢制大司馬左右前後將軍侍中散騎常侍散騎諸吏爲中朝。丞相以下至六百石爲外朝。唐皇城之北南三門曰承天。元正冬至。受萬國之朝貢。則御焉。蓋古之外

朝也。其北曰太極門。其內曰太極殿。朔望則坐而視朝。蓋古之正朝也。又北曰兩儀門。其內曰兩儀殿。常日聽朝而視事。蓋古之內朝也。宋時常朝則文德殿。五日一起居。則垂拱殿。正旦冬至聖節慶賀。則大慶殿。賜宴則紫宸殿。或集英殿。試進士則崇政殿。侍從以下。五日一人上殿。謂之輪對。則必述時政利害。內殿引見。亦或賜坐。或免穿靴。亦三朝之遺意焉。蓋天有三垣。天子象之。正朝象太微也。外朝象天市也。內朝象紫微也。國朝聖節正旦冬至大朝會。則奉天殿。即古之正朝也。常朝則奉天門。即古之外朝也。而內朝獨缺。然非缺也。華蓋護身武英等殿。豈非內朝之遺制乎。洪武中如宋濂劉基。永樂以來如楊士奇楊榮輩。日侍左右。塞義夏原吉輩。常奏對便殿。於斯時也。豈有壅隔之患哉。今內朝罕復臨御。常朝之後。人臣無復進見。三殿高闊。鮮或窺焉。故上下之情壅而不通。天下之弊由是而積。孝宗晚年深慨於斯。屢召大臣於便殿。議論政事。將大有爲。而民之無祿。不及觀至治之美。天下至今爲恨。惟陛下遠法聖祖。近法孝宗。盡除近世壅隔之弊。常朝之外。即文華武英。傲古內朝之意。大臣三日或五日一起居。侍從臺諫各一人上殿輪對。諸司請事。上據所見決之。有難決者。與大臣面議之。不時引見羣臣。凡謝恩辭見之類。皆得上殿陳奏。虛心而問之。和顏色而道之。如此人人得以自盡。陛下雖深居九重。而天下之事粲然畢陳於前。唐虞之世。明目達聰。嘉言罔伏。野無遺賢。亦不過是而已。大禮議起。連逐輔臣。士類咸願起官。未及起。病卒。年七十五。贈太傅。諡文恪。所著有震澤集。記聞長語。行於世。

史官曰。當劉謝去而焦芳入。斯高之勢成。鑿又與韓文訟言八閩者也。鳳峙鸞林之內。直以全身。復多所

救正。要必有以服其心矣。或去或不去。歸潔其身。況終於去乎。

彭詔傳。珪、陳壽、林瀚、王雲鳳傳。

彭詔字鳳儀。莆田人。天順元年進士。爲刑部郎中。時張岐以壽甯侯兄。從外臺躡僉都御史入院。詔疏岐不可用。乞召故尙書王竑。李秉侍郎葉盛。下詔獄。給事中毛弘等論救得釋。尋晉郎中。其司有輦轂間事。多涉貴近豪戚。脅挾撓沮。詔屹然不吐茹。外戚家冒賜額奪民田。敕詔卽按頃畝。詔至眞定。繞田周視。徑歸上疏。自劾曰。昔田文令馮驩收債於薛。驩故折券。矯賜薛人。今眞定田祖宗以來許民開種。卽爲恆產。不復增科。以勸力農。往年韓太監廣甯侯屢奏虐民。賴先帝明聖。民間稍得安業。乃今周彘又復強詞飾奏。傷民病國。臣誠不忍履畝。奪小民尺寸地。附益貴戚。又逮下詔獄。言官交論得釋。他日又有貴戚請荒田者。上怒。顧左右曰。周彘爲彭詔所持。令朕負朝論。奈何。又以爲請耶。當是時。何喬新與詔同官刑部。純懿貞方並負重望。成化六年陞四川按察副使。尋進按察使。請王府葬祭。停遣內臣及行人。又劾雲南太監錢能冒貢珍奇。擾驛遞。十四年爲廣東布政使。薦陳獻章。劾鎮守太監顧恆。非禮貢獻。又劾市舶太監韋眷。矯稱進奉。私庇富豪。輒亂舊章。妄開新法。民間力役更無曠丁。籍上均徭。豈有餘戶。又劾珠池監丞黃福。採捕禽馬。騷動雷庶。又劾錦衣鎮撫梁海。海者太監芳弟也。芳見疏大怒。會詔應詔陳言。條上漸不克終四事。上不喜。芳從旁言。詔每事輒邀名。命左班相左右。得大官。上直視芳不應。芳懼伏地。調詔貴州。未幾吏尙書尹旻屢薦詔。大臣器上。故知其名。二十年遂陞右副都御史。巡撫江南督糧儲。明年召入爲大

理卿未上。又坐論內外官貢獻。道改副都御史。巡撫順天。孝宗卽位。交薦召入。爲刑部侍郎。會浙江不靖。敕詔巡視。詔劾罷不職守臣。誅其渠魁。事遂定。戶部鹽法沮壞。復敕詔理鹽法。詔繪賚海貧人。囑淋熬負。折閱明償之苦節。爲八圖以獻。上覽之惻然動容。曰。貧丁如是耶。召入吏部爲侍郎。弘治四年。晉刑尙書。安遠侯柳景總兵。兩廣巡撫秦紘發其奸賊鉅萬。景有挾欲破法擠紘。詔竟抵景法。褫其爵。景賊方入。百兩。忽降獨旨。詔言景賊始些須。卽獨他日。遂可營復爵位。爵位旣復。遂可營求征鎮。漸不可長。詔在部二年。請致仕卒。贈太子少保。諡惠安。詔孝友直諒。寡欲清心。儀狀歉然。不啻寒士。所著有國朝名臣錄贊。莆陽文獻志政志文集百餘卷。

傅珪。字邦瑞。清苑人。成化二十三年進士。選庶吉士。授編修。弘治十三年陞左中允。正德四年。閣瑾惡翰。林不附己。矯旨大明會典文訛舛。奪預修者官。珪降修撰。瑾敗。復中允。五年。以學士陞吏部右侍郎。明年轉左。陞禮部尙書。當是時。武宗好佛。自稱大慶法王。外廷雖聞之。而無徵。俄內批禮部。番僧請腴田千頃。爲大慶法王下院。乃書大慶法王與聖旨等。珪佯不知。執奏孰爲大慶法王者。敢並至尊書。襲天子壞祖宗法。大不敬。詔勿問。田亦竟止。罷伶臧。賢請改牙牌。珪曰。優敢亂祖宗法邪。臧又欲改教坊司印。珪曰。優敢亂祖宗法邪。皆格不行。時流賊亂中原。太監陸闇總軍容。征久不捷。諸內臣又立監鎗名。益出後曹內。臣統軍。下廷議。衆莫敢先發。珪奮曰。兵老賊疲。賊日熾。以冒功者宥。債事者漏罰。失將士心。今賊在郊圻。肺腑民間。囂然思亂。禍在宗社。旦夕吾輩死不贖責。諸公尙首鼠耶。疏上。竟遣監鎗諸內臣。俄有旨令致。

仕歸。杜門謝客。及卒。遺命無請葬祭。嘉靖元年。理守正文臣。贈太子少保。諡文毅。珪杵端簡。諒自檢甚嚴。孝友之行。孚於鄉典。

陳壽。字本仁。新淦人。成化八年進士。爲中書。仁人。選給事中。弘治元年。以都給事中。陞大理寺丞。御史爭寺丞劾壽。吏部尙書王恕言壽廉正。稱執法吏。改南光祿少卿。陞南鴻臚卿。十三年。陞僉都御史。巡撫延綏。十六年。陞南京副都御史。正德元年。南京科道劾逆瑾被逮。壽抗疏救諸言官。瑾怒奪職。八年。薦起巡撫陝西。未幾。遷南京兵部侍郎。九上疏乞休。陞南京刑部尙書。乞致仕。許之。初。壽任科。方貴妃寵。族人橫甚。中官梁芳。又結妖僧繼曉。干國是。壽疏論。繫詔獄。得釋。在延綏。會火篩入犯。出奇兵卻之。加俸一等。旣歸田。杜門謝客。陝西鎮守內臣廖鏜暴虐吏民。楊一清言壽忠鯁。輕去就。宜起撫陝西。壽至陝。清勁。鏜畏。斂戢。比去。陝人號哭。擁之不能行。壽卒久之。都督楊宏。陝人也。上疏言壽仁廉。恤下。知兵。能退敵。請卹其後。歷官四十年。大半在散地。食祿任事不久。而廉名最著。尤無所歸。諸子旅寓飄泊。歿不能葬。久之。親舊相周。僅歸其喪。壽爲言官時。直論時政。得失無隱。然不喜彈劾人。曰。吾父戒我。勿作刑官。枉人。若言官。枉人尤甚。吾不敢妄言。楊一清曰。宋王素爲諫官。言人才難得。無事之時。當爲朝廷愛惜。程明道爲御史。告君曰。使臣拾遺補過。則可。若搜索臣下短長。以沽直名。臣不能也。本仁得之矣。

林瀚。字亨大。閩人。成化二年進士。改庶吉士。爲翰林編修。歷陞諭德。弘治三年。爲祭酒。上疏請開科進人。才。大略謂今天下學校。作養日盛。科貢二途。取有定數。歲有常規。不無遺材淹滯之歎。詔開貢。瀚爲祭酒。

垂十年。待諸士嚴而有恩。請託不行。故事祭酒膳役銀歲百數。瀚悉貯官。構祭酒公署及監中諸師儒寓舍。九年進禮部侍郎。仍掌監事。十二年入吏部。爲侍郎。明年爲南吏部尚書。會災異。率羣僚陳十二事。曰。明黜陟。去冗官。清吏弊。定莊田。折鹽鈔。處監生。嚴軍政。省供應。收才望。禁奸貪。停不急。寬民力。時有御史自巡按逮獄。二三儒生。貧緣傳奉。授中書舍人。上疏申救。御史乞寬宥。全風憲之職。收回中書舍人成命。杜倖進之門。則天命天封。自協至公。忤旨。自劾不報。十七年復疏重根本。以回天變四事。曰。保固南京。以重祖宗之根本。佑啓皇儲。以重天下之根本。撫綏百姓。以重邦家之根本。增進賢才。以重政治之根本。明年甲子。適符洪武十七年。聖祖開科取士之期。宜加增鄉試解額。以廣賢路。是年請老。疏云。臣在南京。親見諸尙書翟瑄。董越。謝綬。王繼陳。道乞休不允。三年間相繼物故。言辭懇切。亦不允。正德元年。吏尙書缺。給事中邱俊。御史石玠。薦其學優才曠。剛方貞介。未幾改南京兵部尙書。參贊機務。因災異。會陳十二事。曰。隆大孝。以先天下。言先帝奄忽。上賓。陛下親承付託。惟任大臣。而不改先帝所倚用。立大致。而不易先帝所貽謀。斥遠近習。力體先帝先賢遠佞。不假貴戚。力行先帝割私任公。戒飭邊備。常若先帝不忘夷狄。節省財費。常若先帝不忘生靈。事無巨細。無內外。惟做先帝所已行者。而力行之。則大孝之實。通於天下矣。其次集羣議。以決大政。改州治。以奉陵寢。崇儉德。以裕財用。省虛費。以甦軍民。增貢舉。以進人才。修武備。以禦寇盜。省匠役。以甦民困。節工役。以省財用。清吏役。以革宿弊。清馬政。以防欺蔽。大優容。以廣言路。剴切無忌諱。是時閹瑾側目。方正士。會南京科道官言事被逮。瀚獨往送。且議上章直諸言官。瑾聞之。

恨。勒科道招詞逮瀚爲黨。矯詔降浙江左參政致仕。瑾恨未已。復矯詔指瀚與大學士劉健謝遷尙書韓文等爲奸黨。瑾誅。復尙書致仕。按察司副使陳伯獻嘗稱其賤者。卽之不知其爲貴。卑者。卽之不知其爲尊。愚不肖者。卽之不知其爲賢且智。獨非意相干者。卽之。始知其懷然不可犯也。卒年八十六。贈太子太保。諡文安。子庭楫。嘉靖中爲工部尙書。諡康懿。庭機。官南京禮部尙書。諡文康。庭機子懋。亦爲南京禮部尙書。諡文懿。三世皆爲祭酒。懋弟煒。舉進士爲參政。

王雲鳳。字應韶。和順人。成化二十年進士。弘治十年爲祠祭郎中。疏論中官李廣及異端左道倖進者。是歲十二月朔。駕自郊壇還。坐事謫陝州知州。編修劉瑞上疏言雲鳳守官廉正。持行清介。雖獲罪。宜早賜召用。不報。明年陞僉事。提學陝西。十五年改副使。提學如故。政尙嚴厲。士始不能堪。終感戴。多成就。正德四年入爲國子祭酒。益嚴厲。明年改南通政使。請告。七年起家右僉都御史。巡撫宣府。益發奮才氣。日夜理邊。邊吏憚其威。憂去。十年又起家副都御史。理鹺兩淮。浙遂上疏乞休。又移書吏部尙書楊一清曰。山中屢聞讒言。近留王昂一疏。人尤傳頌。昔唐介貶數月。兩轉未久。復殿中侍御史。王昂旣不獲留。推薦超擢。在公筆端。每恨李文達公。近稱賢相。然羅一峯淪落以死。岳蒙泉坎珂終身。極貪陸布政。願得超拜尙書。今文達貴勢安在哉。切恐奔趨富貴。嚮談利達者。相見則稱功頌德。乞憐求官。直諒之言。無由上達。雲鳳壘辱薦莢。感激慚懼。敢不布其愚。今兩耳並聾。百藥不效。冀得耕田納稅。養親讀書。惟俯垂憐念。使猿鹿魚蝦各得其性。幸甚。疏上。予告。雲鳳樂於從善。勇於聞過。居常言動儼然。終日立朝正色。不避權貴。當

官孤立。直行己意。以故上下多齟齬。家素貧。遭閹瑾誣贖。稱貸鄉曲。終其身不能償。妻女五人幾凍餒。史官曰。衛蔡霍者必猛獸。逐鳥雀者藉鷹鷂。孔父立廟。莫敢致難。拂土之重於國家久矣。彭詔。傅珪。陳壽。王雲鳳之所彈劾執奏者。非奪戚畹之田。卽折中涓之角。使人主屈於朝論。宰相愧其移書。壯矣哉。其有鷹鷂之致乎。陳伯獻稱林翰曰。賤者卽之不知貴。愚者卽之不知賢。獨非意相干者卽之始知其懷然不可犯。諸君子之風規可槩見云。

劉忠、費宏傳

劉忠、字司直。陳留人。成化十四年戊戌進士。選庶吉士。授編修。陞侍講。幾三紀。始拜侍讀學士。忠修勵行檢。時國家無事。翰林程李輩有文學詞藝。好交遊。有聲譽。忠獨恭斂沈默。正德二年丁卯春。與楊廷和充經筵侍書。故事。講書義畢。後必獻規諫之語。旣罷。上問太監劉瑾曰。經筵講書耳。何添出許多說話。瑾對曰。此二人當打發南京去。遂陞南京禮部侍郎。時南京無缺爲添註。及行。忠謂廷和曰。別瑾否。廷和曰。瑾所爲如此。不可更見之人。必以我輩交瑾矣。忠深然之。廷和以錦幣辭瑾。瑾喜曰。劉先生不足我耶。後瑾厚廷和而疎忠。至南京。進尚書。明年改南京吏部。忠性峻。行方寡合。一介不苟得。惡士人競趨。自處常過抗。貴人亦力抑之。以故久在南京。南京名吏隱。多俛仰瓦合。忠獨毅然持風裁。奪越閩點吏竄名籍。詭冒者千人。焦芳顧知忠。薦忠賢。五年正月。瑾傳旨召入翰林學士。掌詹事府事。管誥敕。是年瑾誅。始被推入內閣。是時張永幸用事。大臣事永復如瑾。忠益持重。永遣其黨廖鵬來謁。忠不加禮如僕。又卻其餽。永大

不說。忠在閣不滿三月。乞致仕。不許。累進少傅。兼太子太傅。吏部尙書。謹身殿大學士。忠每進讜言。貴倖茲不悅。正德六年。累疏辭疾。未允。強起。考禮部貢士。出院。即乞省墓。上忽召李東陽至。媛閣。摘錄中語言。欲罪之。東陽爲力解。忠即日陛辭去。歸田杜門。其在內閣未久。以故無大建明。然重厚持正。同事者忌而擁之。嘉靖初。遣使存問。卒贈太保。諡文肅。侍郎崔銑初入翰林。見忠。忠慨然曰。古羈人四士。雖當流離。固絕不取非義財。況祿食者乎。許進常與銑論當世人物。獨推許章懋。雍太且曰。子初仕。慎事大夫。翰林惟司直一人耳。其見重於人如此。太常卿魏校曰。忠留意人才。嚴於考績。臧否精當。人不敢干。風裁整肅。爲一時之重。

費宏。字子充。號鵝湖。鉛山人。祖授五子。長珣。鄉薦。早卒。次瑄。號復菴。進士官參議。瑄宦遊於外。而宏父五峰瑤。暨弟順菴瑛。遂主家政。宏生而秀異。與季叔雪峰瑞相上下。瑄喜曰。允吾宗者。必二子也。攜入京。躬課督之。成化十九年。癸卯。甫冠。遂與叔瑞同領鄉薦。甲辰。試春官不利。卒業北雍。時邱濬爲祭酒。甚重之。二十三年。丁未。舉進士。廷試第一人。授翰林修撰。初。宏之上春官也。瑄方以都水主事出治呂梁。貽書與宏曰。汝脫下第。毋南歸。宜入北監。讀書。丙午。代還。宏訊曰。伯父何以知宏不第。令入北監也。瑄笑曰。此爾遠到之兆也。吾常夢汝入北監。領班籤。籤乃彭文憲公故物。文憲常遊北監。中狀元矣。汝勉之。至是果然。是歲八月。憲宗崩。孝宗即位。預修實錄。弘治九年。丙辰。皇太子出閣。改左春坊左贊善。武宗即位。擢太常寺少卿。兼翰林院侍讀。丁卯。擢禮部右侍郎。尋轉左。時閣瑾竊柄。凌轢公卿。會瑾敗。諸所變更。悉皆釐正。

唯山東、河南、陝西、山西鄉試解額，瑾增其數。宏謂求賢國家大典，且開科期迫，請今科姑聽之。俟後復舊，上可之。十月，陞禮部尚書，鑄印局額，設大使副使各一員，食糧儒士二名，及滿將補投考者不下數千人。請託者半之，當事者每難處分。宏於食糧二名外，預聽缺者四人，習字四人，擬次第補度，可逾十數年。由是投考及請託者皆絕跡。辛未十二月，以文淵閣大學士入閣，預機務。甲戌二月，進戶部尚書，兼秩如故。會錢甯入宸濠賄，規復護衛，宏執不可。有同列嫉宏而覬其位者，陰助甯。一日，忽傳旨詰責，宏因引咎力請退，有旨令致仕。而從弟編修榮亦罷抵家，杜門謝客，不敢履城府，築樓一區，日課諸子。會羣從有與鄉人爲讎者，赴愬。會宸濠知之，招讎家人，令摺撫入奏，欲以聳動上意。奏入，下都察院。時兵尚書彭澤掌院事，洞燭其奸，既駁罷，又欲加罪。濠知計不行，乃嗾羣兇嘯聚，奸細焚掠其室廬，積聚。又侵毀其先墓，宏恐避處縣城。正德十四年己卯六月，濠反，隨遣數十騎趨信圖。宏過進賢，爲縣令劉源清所斬。會王守仁以羽檄徵兵列郡，信州知府周朝佐鉛山知縣杜民表等皆率兵往。宏爲贊畫方略，遣人間道致書於守仁，畫方略。濠平，守仁欲上聞。時御史謝源伍希儒方隨軍紀功，乃奏曰：「大學士費宏編修榮，常護衛之再請也。昌言明沮，已懷先事之憂，及逆謀之既成也，間道獻策，又急勤王之義。逾年世宗入繼，甫旬日，卽降敕起宏，而榮亦召用。時辛巳四月也。」嘉靖三年甲申五月，進吏部尚書，謹身殿大學士。八月，大同卒叛，殺參將賈鑑，巡撫都御史張文錦，議者欲遣將出師以討之。宏曰：「變出於激，不叛者故多也。討之勝則玉石俱焚，不勝則彼拒城抗命，損威傷重甚矣。」乃議先遣兵部右侍郎李昆往撫諭，以觀其變。而以都御史蔡天

祐往巡撫。命都督貴勇鎮守其地。代還舊總兵官江桓。乙酉。武宗實錄成。進少師兼太子太師。賜宴禮部。時弟竊。從子懋。中皆翰林編修。預史事。竊進左贊善。懋中進修撰。丙午六月。獻皇實錄成。加正一品俸。進華蓋殿。是年。累以疾謝。上不允。丁亥二月。疾再作。辭益力。允之。時子懋賢。登進士。選庶吉士。疏乞歸侍養。并允之。令疾瘳。日照舊作養。十四年乙未。上念宏。召起用。遣行人王憲芝捧敕催促。宏遂於六月朔。冒暑行。至七月二十日。至京。召見文華右室。賜銀鬮書一文。曰。輔舊元臣。入閣辦事。郊陪祀歸。一夕卒。年六十八。贈太保。諡文憲。

史官曰。劉忠風裁嚴肅。再忤權閹。斥不獲立朝。難進易退。嚼然磨而不磷者也。費宏拒濠護衛。幾蹈虎尾。濠敗獲免。屬有天幸。父子兄弟。俱踐清華。抑守正之報乎。

楊守陳、吳寬、張元禎傳

楊守陳。字維新。鄞人。景泰二年進士。家居八年。至天順二年。授翰林編修。成化三年。累官司經局。洗馬。充講官。經筵。守陳進講武成。曰。論語稱大舜無爲。周書稱武王垂拱。顧後世人主。深拱禁中。委政內侍。反召閹樂之禍。高居無爲。唯對嬖豔。反啓祿山之亂。何也。蓋舜武能舉相。除凶。惇信明義。後世人主。直安危利災耳。上傾聽稱善。八年。遷侍講學士。內艱去。守官五品。十六年。孝宗爲皇太子。出閣。簡守陳日講。時文華大訓成。篇目倣大學衍義。事涉中官。令不得刪去。尋陞少詹事。兼侍講學士。譽望日起。薦國子祭酒。薦吏部侍郎。又薦入內閣。皆不果用。孝宗卽位。進宮寮官。柄臣忌守陳。擬南吏部侍郎。上覽疏。曰。守陳宜留。

此卽塗去南京字。未幾詔議祧禮。禮官請祧懿祖。以德祖比宋僖祖。百世不遷。守陳疏言。禮天子七廟。祖宗功德。故凡號太祖者。卽始祖。必以配天。若商周契稷皆有功德。非直原本統也。宋僖及我德祖可比。商報乙周亞辛。非契稷比。議者習見宋儒管取王安石說。遂使七廟既有始祖。又有太祖。太祖配天。又不得正位南向。名與實乖。非禮也。時不能從。弘治元年。疏論講學聽政。累數百言。略曰。陛下御極以來。屏棄珍翫。放遠奇袤。聽納忠諫。躬覽題奏。持此不懈。可幾堯舜。臣愚過慮。正始猶易。保終實難。若內養勿深。外資弗博。銳志少懈。愆心漸滋。有初鮮終。古今大戒。上善其言。三月御經筵。禮部并請午朝。得如守陳奏。後數年。上時召輔臣坐論政事。閱章奏。皆自守陳發之。大臣願畏上英明。一見卽頓首伏地請退。上留再三。又謝。容臣等出議。上下每退歎息。守陳在吏部。侃侃持正論。會修憲宗實錄。充副總裁。再請解部事。專史職。不允。未逾年。又辭。且請老。曰。吏部進退百官。衆怨所集。尚書王恕尙不免人言。況臣迂疏。宜亟退。上不許。請老益力。乃以本官兼詹事丞。專職史館。而以張悅代。守陳嘗曰。國可滅。史不可滅。靖難後。不記建文事。遂使當時朝政。與方黃死事諸臣。皆闕落無傳。及今蒐采。猶可補輯。景帝已正位號。英宗實錄。標目猶書。邸戾王附。宜改正。凡疏留中者。多忠言正議。國家大政事。例不得登實錄。宜先付史館。以備遺亡。未幾卒。諡文懿。後二年。實錄成。贈禮部尚書。守陳孝友方正。與人交篤於信誼。居常恂恂。若不出口。至論事辯是非。毅然不可屈。博學多識。文詞澆雅。五經四書。時有獨見。不泥古說。錄爲私鈔。凡數百卷。弟守阡。南吏部尚書。從弟守隨。掌大理寺事。工部尚書。諡康簡。守隅。廣西布政使。二子。茂元。刑部侍郎。茂仁。四川按察

使皆能濟美克世家。

吳寬字原博長洲人。成化八年進士第一人。時年三十八。寬爲諸生時有文行。卽負重望。徐有禎常稱吳生館閣器。歲貢入太學。張汝弼尤奇寬。初授修撰。歷官春坊詹事。侍武宗於東宮。東宮中侍豎不欲太子近儒臣。數移事間講讀。寬率宮僚上疏曰。仰惟東宮講學。寒暑風雨則止。朔望令節則止。一歲不過數月。月不過數日。一日不過數刻。況又間有推移。時或罷歇。古人八歲出就外傅。欲離近習。親正人也。借曰習誦於內。終不若就傅於外。上嘉納。寬於經筵進講。閒雅詳明。意存規諷。至理亂雅正安危之際。尤反復朗誦。上改容聽之。弘治十七年。孝肅太后崩。議祔葬廟禮。先是成化四年。孝莊睿皇后崩。中外藉藉。言周太后萬歲後葬裕陵。祭饗廟禮皆如適。至諡稱睿皇后。與孝莊同。輔臣覺其誤。又未敢顯言。詔禮官議。議未能決。賴上仁聖。張主綱常。再三召輔臣密議。便殿悲愴感悟。必欲如禮。又下廷臣議。寬以掌詹事與議。衆促寬言。寬出揖衆議臣曰。魯頌姜嫄闕宮。春秋考仲子之宮。皆別廟。漢唐來皆然。至宋始有並祔者。其禮已謬。然皆諸帝繼室。作配天子。非後世子孫嗣承帝位。尊崇不生者。惟宋李宸妃歿。仁宗傷痛。始追尊祔祭。非禮不足爲法。衆議臣皆是其言。定議上。上喜曰。大義深恩。並行不悖。改稱孝肅太皇太后。祀之奉慈殿。奉慈殿者。在奉先殿西上。初建奉祀母孝穆太后。令稍展其制。中室奉孝肅。左奉孝穆。嘉靖初。右奉孝安。邵太后。寬忠信宏厚。廉靖方嚴。好古力學。文翰滄美。以禮部尙書掌詹事府。卒贈太子太保。諡文定。王整稱其文不事追琢。而體裁具存。外若簡淡。而意味雋永。明興文士獨推西揚有典則寬。方之無愧焉。

張元禎字廷祥。南昌人。少以奇童知名。七歲。甯獻王召見。命爲詩。大加稱賞。天順四年。進士。選庶吉士。授編修。憲宗卽位。勸行三年喪。及上疏論王道。幾萬言。語連萬安等。萬安等惡之。乃告病歸。家居二十餘年。潛心理學。名益大著。廷臣交薦。弘治初。召修憲宗實錄。進左贊善。陞侍講學士。乞歸養母。家居者又九年。衆交薦修大明會典。爲副總裁。陞學士。日講。孝宗立。熱元禎文名。時特俾講說。每奏輒稱善。內艱歸。久之。卽家進南太常卿。召入修通鑑纂要。改太常卿。侍武宗東宮。尋掌詹事府。疏勸經筵講太極圖及西銘圖。孝宗亟取二書觀之。曰。天生斯人以開朕也。將大用之。竟困於讒口。久之。進吏部左侍郎。未任卒。爲人孤峭奇拔。以是不容於時輩。平生博涉羣書。尤好探經傳。多所獨得。詩文平實。爲人所重。楊廉稱其造詣高。出一時。必儒者之學。果有見焉。始可以讀先生之作。

史官曰。明祖有言。吾取士欲得經明行修。博古通今。文質得中者。如守陳寬。元禎之講學議禮。文章足以華國。問學足以明道。所謂先進於禮樂者。非歟。後世經筵爲具文。議禮如聚訟。如三人者。蓋其鮮哉。

明書卷一百二十九

列傳四

名臣傳十四

梁儲傳

梁儲字叔厚。廣東順德籍南海人。別號鬱洲居士。晚更號厚齋。成化十四年戊戌會試第一。廷試二甲第一。改庶吉士。授編修。二十二年兼司經局校書事。孝宗於東宮日侍講讀。旋丁內外艱。弘治四年辛亥服闋。進侍講。與修憲宗實錄成。進司經局洗馬。壬子主考順天鄉試。復侍武宗於東宮講讀。戊午主試應天。是歲冬册封安南國王。充正使。庚申九年考滿。遷翰林學士。辛酉再主試順天。壬戌奉詔教庶吉士。與修大明會典。書成。進少詹事。仍兼學士。本年遷吏部右侍郎。奉命充正使。册封魯藩。正德改元詔纂修孝宗實錄。及續修會典。俱爲副總裁。轉左侍郎。明年進吏部尚書。兼學士。專典誥敕。掌詹事府事。又明年戊辰主會試。時閣瑾竊權專恣。有不附己者。輒以計去之。乃指摘會典紕繆。貶爲吏部右侍郎。實錄成。復尙書兼職如故。瑾憾儲不置。搆摭媒孽。俄有旨調南京吏部。尋加太子少保。五年瑾敗。召復官。兼文淵閣大學士。典機務。既至進武英殿。加少保。兼太子太保。尋進少傅。兼太子太傅。謹身殿大學士。廕一子錦。衣世千

戶辭改尙寶司丞。又辭改中書舍人。又固辭弗允。甲戌再主會試。凡六司文衡。六年考滿。進少師兼太子太師。華蓋殿大學士。先是楊廷和首秉朝政。以父喪去位。儲言於武宗。敕遣行人慰諭。命有司卽其家督促上道。廷和至。儲遜居其下。士論多之。武宗之將幸宣大也。楊廷和暨蔣冕皆在告。中外洵洵莫敢先發。儲與毛紀泣諫於左順門內。旣而紀亦在告。儲獨廷爭累日。不得命。陝西親藩有請良田爲牧地。錢甯江彬及宦官張忠輩受重賄。請上許之。兵部及科道交章執奏。謂太祖高皇帝有禁。茲田不得畀藩封。上曰。朕念親親與之。勿爲開言。楊廷和蔣冕皆引疾不出。儲曰。公等皆託疾。如國家事何。是時上怒甚。令內臣督促草制。儲承命上制草曰。昔太祖高皇帝著令曰。此地不畀藩封。非吝也。念此土廣且饒。藩封得之。多蓄士馬。饒富而驕。奸人誘爲不軌。不利宗社。今王所請懇篤。朕念親親。其畀地於王。王得地宜益謹。毋收聚奸人。毋多畜士馬。聽王人勸爲不軌。震及邊方。危我社稷。是時雖欲保全親親。不可得已。王其慎之。毋忽。上覽制駭曰。若是可虞。其勿與。事遂寢。會上欲稱威武大將軍。鎮國公朱壽巡邊。令內閣草制。楊廷和同儲力諫不聽。屢使促敕。廷和稱疾不出。至上御左順門。而促儲。儲不敢草。上震怒。手劍立曰。不草敕。齒此劍。儲免冠解衣帶伏地泣曰。臣有罪。今日就死。他日陛下猶憫臣。臣草敕。他日陛下覺而悲曰。儲無禮。以臣名君。臣罪不赦矣。上擲劍起。不促草敕矣。時禮部尙書李遜學等廷議建儲居守。朱甯陰受甯王宸濠賄。謀入甯王世子。江彬亦欲立所厚遠藩。儲大聲曰。皇上春秋鼎盛。建儲未宜輕言。萬一有他。吾輩伏斧鉞矣。王瓊。王鴻儒亦助言之。議欲寢。十四年己卯考一品九年滿。進階特進光祿大夫左柱國。兼給

詔命襄諭。賜燕禮部。會江西兵變。大駕欲親征。儲與蔣冕扈從。至南都。凡七請回鑾不報。時且欲郊。儲與冕疏言南都郊。仁祖配天。北都郊。太祖太宗配天。若遂郊。配位不知所裁。乃不果。又將南幸。北歸尙未有期。儲冕復跪請於行宮西階。自卯至酉。汗浹衣。上遣中使傳諭再四。儲弗起。曰。未得俞旨。不敢起。上乃曰。予不南矣。乃起。庚辰冬至。德州。自劾請罷。不允。抵京。再疏。又不允。儲乃杜門求歸。言妻喪未葬。先壘未修。老病之軀。無所陳力。上固留。遣官爲治葬事。賁先人墓。而賜祭。遂與羣大臣同受遺命策。世宗自興邸入。正大統。儲與冕實奉行勸進。事稍定。復申前請。既而外議謂儲黨逆。濠復護衛。儲墨不辨。攻詆者屢屢。儲乃復固申前請。上始可其奏。賜敕特遣行人送歸。命有司月給廩食。歲致輿轍。蓋十六年辛巳夏五月也。儲歸日。與弟參議億。徜徉山水間。嘉靖四年乙酉秋。上念定策扈迎功。唯儲未錄。詔廢子世錦衣。指揮疏辭。上重違懇誠。報可。而遷子均輔爲尙寶司卿。儲疏陳謝慰勞有加。六年丁亥三月二十五日卒。年七十。七。贈太師。諡文康。諭祭九壇。遣官營葬。儲沈重博雅。接人和易。立朝四十餘年。議論每持忠厚。故羣邪用事。從容其間。若履坦途。所著有鬱洲集。霍韜著論曰。儲立朝四十年。其功多矣。乃自掩蔽。不肯以功自誇。故人不得知之。聞謗不辨。故謗言日積。平生好施德於人人。或賴儲以自庇。反操戈向之。故海內後進之士。未面之者。徒聞謗語云云。亦附和而毀焉。始宸濠未反時。凡所餽皆有記籍。濠誅後。閱籍。唯儲與王鏊無受餽。廣州同知沈尙經曰。南海梁儲田無百畝。所有者香山浮坦。從化賊巢。庾敵不堪之土。其家儉樸如此。御史王濬請典刑儲給事中田賦。儲門人也。請沒儲貲以代天下輸租之半。劉瑾遂矯詔籍其家。儲

在南京初聞報。色不動。及鈔閱。家無長物。世宗御極。言官連疏劾儲。假宸濠衛兵。是爲故縱反者。請召置獄。正罪如尙書陸完。儲曰。余唯致仕去而已。終不肯辨。人曰。是公大罪。何所容辨。儲不辨而劾者不已。久之。乃知與宸濠衛兵者。非儲。實廷和當制。事在正德九年三月十五日。蓋舊例。凡閣下當制擬旨。人親署御著筆迹。故不得而誣。儲唯引罪。連疏乞致仕。無片言自明。人服其渾厚焉。黃佐曰。蔣冕方在庶寮。儲延譽宮府。力拔爲輔。御史西王張連論列。誣毀人不能堪。而儲以連才。引慝往謝。立意薦揚。竟至大用。連終身慚感。後楊一清在內閣。親承世宗面諭。命撰敕召用。而訃晉至。世宗悼惜久之。

史官曰。當武宗時。君有穆滿之荒。羣小在側。強藩外伺。而能蒙難正志。執羈縻以捍牧圉。入左腹以獲明夷。蓋其難哉。惟梁儲晦以全身。誠以悟主。退讓和易。以遠患。回天納牖。不避難險。蓋兼婁之容。甯之愚。以戒其弘濟者。當世一人而已。

許進、李承勛、胡世甯傳

許進。字季升。靈寶人。成化二年進士。除監蔡御史。巡甘肅山東。風裁卓然。道士以黃白術干湖廣李總兵不遂。誣總兵反。汪直欲爲己功。逮李百口至京。燬成獄。下法司讞。進發道士奸。卽日磔道士於市。御史滿三考。陞山東接蔡副使。明敏發奸伏如神。東昌有武官子懷數金。挾一儒生飲酒家。是夜武官子被殺。無主名。有可疑生。逮生酷訊。生誣服。進閱牒疑。託他事徧取商歷入閱。至布商家。乃武官子死之明日。酒家市數十布價厚。進曰。此必武官子金也。一訊遂伏。儒生得釋不死。弘治元年陞廣西按察使。尋陞僉都御

史巡撫大同。數條邊事。戎政修明。小王子瓦剌兩種聞其威名。遣元哈桶察察少保等兩年三貢。僅費帑銀六萬兩。雲中上谷河曲塞境無敵患。當是時。士馬強壯。軍容嚴整。進才智忠毅。又能幹旋應變。以故每貢多至三千人。少亦不下二千。至關皆下馬脫弓矢入館。戢戢聽命。代藩諸郡王或驕。與巡撫通酒食。乾沒芻餉。進一切持法行己意。諸郡王輒惡進。會武邑王璉沐不律。進發其罪。廢爲庶人。警動諸郡王。諸郡王自是不敢譁忤巡撫。四年。上言守內臣石岩刻侵士餉。撓軍政。岩亦誣進。擅用旄幟。降兗州知府。以寬簡宜民。七年冬。陞陝西按察使。明年吐魯番速檀阿力及其黨牙蘭劫忠順王。據哈密。馬文升薦進改巡撫甘肅。至鎮。結赤斤罕東諸夷爲援。又結小列禿截吐魯番後。誓言遠征。不恤浮議。冬月與都督劉甯彭清冒雪夜行。出嘉峪關二千餘里。擣哈密城。牙蘭遁去。得忠順王。陝巴及都督罕慎。復哈密城。斬首百餘級。獲牛馬駝數千。時牙蘭旣走。遁別種八百人登臺自保。將校請曰。斬此八百首功。公且得封侯。進曰。拊脅從。柔遠人。期在安輯。安忍以多誡爲功。逆天道無後。違者斬。八百人竟得不死。疏請懷輯罕東諸夷。相援。離吐魯番黨。與孤其勢。西域遂定。九年。陞右副都御史。巡撫陝西。進爲平役。調餉。興水利。開屯田。去貪殘。獎循善。格強禦。馭下有權。人稱神明。關隴大治。十年。召爲戶部右侍郎。會刑部主事鄭岳言事下獄。疏救岳。彗星見。又條上修省事。外戚奪河間民田。進往核田歸民。與戶部尚書周經上疏曰。此皆小民恆產。國家賦役之地。若奪彼與此。仁者不爲。十三年。敵入大同塞。且犯宣府。京師戒嚴。進兼憲職。提督軍務。與平江伯陳銳出師勦敵。銳失律。總兵王璽違進節制。又敗。銳璽得罪。進致仕。旣歸。廷臣論薦。四十八疏。孝

宗知進時稱許進可大用。又曰：劉大夏若入吏部，進可代大夏，未及召。孝宗崩，武宗即位，首召爲兵部左侍郎，提督團營。正德九年，代大夏爲兵部尙書。當是時，大夏屢求去，俟進至，曰：「吾可去矣。」謂進曰：「勉爲國家負荷報先帝，時上不親政，進疏乞勤聖學，戒遊逸，改吏部尙書，代焦芳。時閣瑾專權，進持正不可干撓。三年，考察外官，瑾得賂，輒欲留諸貪殘吏，進不肯，瑾怒，百方欲中傷之，不可得。以劉吉署員外郎，再署郎中，爲非制。又誣進薦雍太非其人，除籍。瑾怒猶未解，又擢進在大同時，籍士出雇役錢，失句校，爲吏乾沒，且籍進家，會瑾誅得解，復官，致仕。卒贈太子少保。卒後十七年，巡撫上其功，得諡襄毅。進子八人，詩鄉進士，誥進士。歷官吏部侍郎，南戶尙書，博學能文。卒諡莊敬。贈太子太保，讚歷官少保，兼太子太傅，吏部尙書，文淵閣大學士，乞致仕，上不喜，罷。讚小心守法，不敢任喜怒進退。人上常稱讚端慎，爲夏言嚴嵩所持，在吏部不得盡行其志。論歷官太子太保，兵部尙書，有才略，好談兵，進以子讚贈少保，明稱父子科名，官爵極盛，輒推許氏云。

李承勛，字立卿，嘉魚人。弘治六年進士，父田，歷官都御史，承勛幼靖敏，長與諸兄郎中承恩評事承芳貢士承箕承顏相師友，修勵行業，初知太湖縣，力行善政，陞南京主事，刑部歷戶二部郎中，出守南昌，當是時，南昌難治，劇賊驕藩，內外孔棘，承勛深略雄才，撫機輒應。正德六年，贛賊犯新淦，執參政趙士賢，靖安賊據越王嶺，瑯瑤岸，華林賊破瑞州，承勛廣詞謀，繕壁壘，扼溪澗，屢進戰，擒胡雪二，讒遠府，華林賊又叛，殺副使周憲，承勛諭降健賊王奇，約內應，夜引兵舉火爲號，大破賊，斬首三千，境內安輯，卽上疏請獨遣

租八年挑源賊起江浙執兵部吳廷舉總制俞諫請邊兵勦賊承勛曰賊乏食必掠裴源積粟請贛兵自德興南昌自岳源分兩翼伏裴源而令邊兵驅賊果走裴源大敗遁去太監黎安欲奪其功誣承勛竄賊詞命大理卿燕忠卽訊未幾誣白陞浙江按察使歷陝西河南右左布政使十五年陞副都御史巡撫遼東遼東故富饒無敵患自汪直開邊敵輒擣武擾開原懿路汎河三城極殘破承勛修築定遠慶雲古城鎮夷松山柴河六堡墩望一百八十一所屯田千五百頃又修中固鐵嶺蒲河撫順諸城皆濬隍樹木爲阻固東圍少寧進俸一等逾年請告嘉靖初起掌南都察院轉南京刑部侍郎進尙書又召入爲吏部尙書道改刑部加太子少保上疏論時事改兵部尙書兼都御史代胡世甯提督團營惡郭勛驕縱翦其羽翼助勳之欲并中世甯承勛辭營務不允八年爲兵部尙書當是時田州岑猛叛用兵兩廣騷動芒部沙保又叛吐魯番奪我哈密搖河西小王子歲入塞承勛與世甯相繼本兵同心經理戎事頗戢承勛奏裁各省鎮守守備內臣二十七人錦衣官校旗勇內府詭匠數千人此皆破祖宗法依城社坐耗國儲股民膏血大蠹衆束手閉目莫敢向問者承勛恃上聖明一旦翦剔去騰驤四衛者詭冒依附奸欺不可詰上言宮府一體清官軍考選清核並如旗手等衛制曰可內臣言四衛禁軍隸兵部不更往歲彰義門破敵東市勦曹賊皆四衛功以直內故得號召易集下兵部再議承勛執言往歲之事正以兵權歸闈人致亂彰義門之戰由太監王振東市之賊卽太監曹吉祥也上從其議九年大風晝晦上恐懼憂邊詔問方略答曰聖祖有訓謹備外戎去歲冰合北敵盡入河套以故陝西邊患延甯固原爲急甘肅軍餉專仰河東

宜於蘭州及時糴貯。以備河西災窘。曩時河西急苦。吐魯番亦卜刺又深入。兩下夾擾。孤危益甚。海賊套賊出入殺掠。並經莊浪。被其殘害。急宜繕塞設險。斷臂截踵。使賊相隔絕。兀良哈最近京師。不善撫卹。爲門庭之患。雲南安鳳之叛。軍民困敝。臨安蒙自盜賊復起。曠日持久。恐釀成大患。交趾世子流寓老揭。異日歸命請援。或據地求封。皆未可測。惟用人理財。早爲警備。以保社稷。幸甚。十年議耕桑。禮。詔問之。承勛答言。禮有儀文。政有根本。惟上下儉節。墾田興水利。足民衣食。今日急務。議郊禘。又詔問之。承勛以傳經術。順人心爲對。承勛楚人。久有重名。上稔知之。欲用爲吏部尙書。不果。是年春。充正使册九嬪。晨起趨朝。暴疾卒。年五十九。贈少保。諡康惠。承勛學有源委。才無枝柱。提兵南北。曠暢軍事。通達國體。議論英發。潔廉自守。家無餘資。子救。益府長史。

胡世甯。字永清。仁和人。弘治六年進士。世甯骨相奇古。家貧力學。志節清峻。長益韜戩。留心世務。初爲德安推官。陞南刑部主事。歷郎中。與李承勛。魏校。余祐。友善。相切磨問學。時稱南都四君子。十八年春。詔求直言。世甯條上十事。其一言用人宜立賢無方。先朝李賢。薛瑄。入內閣。不由翰林。翰林如胡儼。劉球。不由庶吉士。年富以教官爲給事中。王翱以大理左寺正。復爲御史。今一切斂轉。專泥科條。以故才賢抑塞。朋類引援。乏人佐理。其來有漸。出爲廣西太平知府。太平瘴鄉。多土官苗獠。世甯至。訪接示禮意。不擾一錢。翕然帖順。一檄創壺關。萬夫畢集。工費數千金。皆土官辦。閱數旬成。太平州酋豪李濬。淫刑撻法。莫敢詰。世甯密受方略。龍英。士知州趙元瑄。元瑄擒濬來獻。散其兵四千人歸農。元瑄者。濬外兄也。土官世及。輒

轉展結勘。索賂土夷。土夷以故怨叛。益輕中朝士人。世甯令土官生子。卽開府。子弟應世及者。年且十歲。朔望或有事調集。皆攜之見太守。太守爲識年數狀貌。父兄有故。按籍爲請官於朝。土官大悅服。謂胡太守仁廉。內艱歸。土人走送者數萬。服闋北上。過滄州。會流賊攻州。世甯入城爲州防守。賊攻城不能破去。補寶慶知府。節約公廉有威。藩府人不敢忤。盡平其役賦。當是時。川蜀江浙盜起。陞江西按察副使。兵備東鄉。東鄉盜藪。初縣。世甯鋤強撫順。東鄉安戢。督戰裴源。及廣昌城三邑。時都御史俞諫用兵挑源。久無功。甯庶人有逆謀。世甯上平賊二策。惟勦與撫。今素無定。恩威倒施。事多轉展。賊益無忌憚。惟舊撫者不勦。再叛者不撫。新起者必撲滅於微。持此三端。官有定守。民有定志。戢戰與農。救傷卹困。治安之效可尋。崩解之亂可息。不然。民窮財盡。兵連禍結。後患未涯。殷憂方甚。又恐江西之患不止盜賊。最可憂者。天旱日久。千里赤地。水泉亦竭。田禾無收。麥種難下。來歲民饑。賑救無備。省城被火。延燒萬室。基地所便。盡歸王府。債負所責。閭閻破家。莊田所逼。村落結寨。三司官多被鈴束。錢穀刑名奉行府案。近者買辦漸行於外。府搔擾徧及於窮鄉。臣恐此不善處。則良民不得安生。聚爲大盜。臣下懼有隱禍。多懷二心。禮樂政令。漸不自朝廷出矣。甯王懿親多才。豈有毫髮過議。但內外臣僚輔導非法。自因逆瑾得復護兵以來。威勢日盛。上下官司。承奉太過。伏乞聖明廣集羣臣。及江西鄉土有識士夫。會議推舉。才望服人。公忠體國。不避權勢。不惑浮議。大臣一人。兼任提督巡撫之責。假以陳金彭澤之權。使其統御將帥。調度兵食。激揚清濁。易置官吏。興革利弊。皆得便宜。其新舊盜賊。應撫應勦。或先或後。悉聽計畫。萬全奏聞。區處久困民窮。

妙選循良。曲加撫綏。早期休養。務使安全。更乞濫詔戒諭賢王。益崇謙順。遠避嫌疑。仰遵祖訓。止治國內。官僚。江西藩臬郡縣。應有政務。遵事朝廷。奉持常憲。無得交私。罔上廢法。該府更宜嚴戢官闈。恪守禁例。施舍已責。惠及貧民。莊田基址。悉還原業。再有稔惡不悛。及投充撥置者。法司提問如例。更乞嚴救鎮撫以下官。欽奉太宗聖旨事例。凡遇王府發放事務。必須奏準。方許奉行。庶幾小民有再生之望。地方無意外之虞。宗室有盤石之固。九重舒南顧之憂。疏上。宸濠大懼。徧賂權奸朱甯。蕭敬張銳等。及兵部尙書陸完。都御史石玠。坐世甯誹謗妖言離間罪。必欲殺世甯。世甯先已匿福建按察使。乞休未得。允歸抵家。宸濠徧遣兇徒。挾上旨襲世甯。巡浙江御史潘鵬附宸濠。盡囚其家人。索甚急。會李承勛爲浙按察使。匿世甯。變姓名。間道歸。命京師得不死。下錦衣獄。於獄中三上書。言江藩橫逆。朝野皆聞。微臣贛愚。天日共鑒。兩京言官程啓充徐文華輩。並疏論救。諸奸亦懼。後事未可知。得出獄。謫戍藩陽。居四年。宸濠果反。釋世甯。士伍薦除湖廣按察使。未任。嘉靖初擢僉都御史。巡撫四川。世甯疏勸修德講學。條上四川爲吐番所苦。餉道梗阻。乞用人理財增兵。將明賞罰。未幾召爲吏部右侍郎。未至。外艱去。服闋乞休。時大禮議未決。世甯疏乞早定大禮。赦羣臣小過。簡賢求治。又聞羣臣伏闕爭大禮得罪。復上疏言羣臣心欲效忠。詞乃過激。乞橫然開釋。消除疑沮。圖回治安。召爲兵部左侍郎。上京東邊備二十五事。又上大學生人能好惡。洪範惟辟作威。福臣無得僭易。大傳不出戶庭。無咎講議三章。疏入留中。言官因劾世甯告密。世甯乞下其章宣示。引罪求去。不允。又上知人官人疏。尋以病乞。南京吏部侍郎。未幾擢南京工部尙書。以左都

御史召與李承勛同過沛。疏漕河事宜。改刑部尙書。霍韜言世甯廉直。宜總憲。加太子少保。仍右都御史。提督團營。尋復爲刑部尙書。張璫惡陳九疇。世甯力爭。九疇有功河西。忠勇不可殺。九疇決奸回。輕中國。九疇得不死。風霾詔求直言。上勸學恤民。任官十事。轉兵部尙書。加太子太保。力辭。疏言外敵方強。內憂日甚。天下之人奄然皆無忠義之氣。我朝尙書兵部者。臣鄉里所聞。方竇于謙。耳目所逮。劉大夏。彭澤。忠勤爲國。不得保全。其幸免者。依阿輒媚。坐視養亂者也。援姚崇。李剛故事。上定武略。崇憲職。重將權。增武備。更賞罰。御土夷。定邊儲。絕弊源。正謀謨。惜人才。十事。時桂萼倡言太平。勸上消兵。興禮樂。世甯又特疏申論武略人才二事。上知其忠梗。促上任。議行十事。又議棄哈密。不可勞中國。奔命小夷。閉關絕貢。便。芒部。查沙保。木末。誅矯誣。請賞。力薦陳九疇。馬吳。可任軍旅。唐龍。可爲兵部侍郎。相佐助。在告。又上武備人材邊儲三事。自度不得行其志。決意辭疾去。李承勛代爲尙書。逾年。又召起南京。參贊機務。兵部尙書。辭不起。嘉靖九年九月。端坐而逝。贈少保。謚端敏。世甯樸忠直。諒氣壯才雄。濟以學問。優於經濟。淡薄甯靜。清素不滯。席書嘗稱其論事如結舌。草奏如懸河。邵銑曰。胡公疾惡如讎。善則猶已。余兩爲公屬吏。手畫勉。余忠孝大節。公兵曹不數月。夙弊大奸利事。整刷十五六。議哈密與方獻夫不合。論芒部功。王瓊以爲發其過。大不喜。薦賢才。桂萼以爲侵官。相壓。亂政發怒。訴於朝。哈密吐魯番疏。制置極詳。吐魯番劫曲先衛人。牙木蘭爲將。牙木蘭擁帳內徙。歸我吐魯番。遣使來。而大臣卽欲縛牙木蘭。與之易哈密。乃議曲先衛本中國羈縻。牙木蘭反正歸順。非納叛比。而哈密空城懸遠。無益事實。吐魯番善賈多巧術。往往以珍

奇嗜時貴。自成化至於今。中國爲彼欺負。今欲甘心牙木蘭。以搆貳我屬夷。而以哈密爲餌。釣大利。宜敕王瓊爲國忠謀。先盡復瓜沙羽翼之地。悉收亡失屬夷。封植哈密。永爲不侵不叛之臣。而後請救降印。庶不辱王命。且吐魯番方恫惴中國。懸衡諸夷。但遠越流沙。烏合難久。我大震威略。以離其黨。購賞義務。使相破滅。此伐交之術。正宜厚牙木蘭。以風蠻夷。及薦馬昊施儒楊必進。及九疇爲將。皆報聞河西之義。語侵張璠彭澤陳九疇。得免奇禍。昌化嗣伯下廷議。世甯言吾輩不得以厚賂。故誣朝廷。桂萼變色大沮。以故諸大臣皆忌之。賴上明聖。憐其忠梗。終始眷注焉。集有奏議行於世。其危言正色。遠慮深憂。天性然也。子純。肇慶知府。有材行。幼子繼。幼讀書不大了。父亦棄之。世甯調兵至江西。兵官以世甯出。見繼。繼曰。兵素不習。安能見我父哉。兵官請教。繼乃指示進退離合勢甚詳。凡三日而世甯歸。閱大異之。願兵官非能曉此者。以詰不能諱。其實告。世甯嘆曰。我有子自不識何也。自是擊賊必從繼方略。世甯十不失三。繼策十不失一也。世甯劾宸濠。繼跪曰。疏入必得重禍。奈何。世甯曰。吾業以身許國。疏入下詔獄。繼奔哭病死。世甯母獨不哭曰。此子在。當作賊。胡氏滅矣。

史官曰。許進撫代撫河西關隴。威遠夷。悍強藩。跡其雄略。馬鈞陽之亞也。寧失首功。不戮脅從。宜後世有興者矣。李承勛提兵南北。屢平劇賊。其大勛尤在中樞。使宮府內蠶。一旦廓清。誰之力歟。胡世甯懷柔苗夷。結以恩信。勦撫定策。爲行間寶符。至於直道侃侃。發江藩之奸。與舉朝文武爲難。抑何壯也。史稱其危言正色。遠慮深憂。直匪躬之大臣矣。

楊一清傳

楊一清字應甯。雲南安甯州人。父徙巴陵。又徙丹徒。年八歲以奇童薦入翰林爲秀才。憲宗命內閣選師教之。受業於黎澹。十四歲中順天鄉試。時已抗顏爲人師。有文中子之風矣。成化八年壬辰進士。授中書舍人。交結海內名士。益有文名。從學者日衆。出爲山西提學僉事。丁憂服闋。補陝西提學副使。在陝八年。大作士類。士有博記誦者。修文辭者。專攻舉業者。所學不一。皆誘而進之。三邊學多士。廣歲必一試。其蒞事愈久愈嚴。夏楚之用。殆無虛日。士試懷懷守法。及去任。士追憶往事。凡中才以上可貢可舉者。未常一卞及之。性明知人。方進取日。或許以將來科第。及冠世名世。必卒如其言。嘗語人曰。陝有三奇士。康海呂柟馬理。後皆爲聞人。故其造士五十餘年。猶用不盡。當是時。雖宗室不能奪諸生之席。雖撫按不能撓課士之權。爲明提學第一。十一年召爲提督四夷館太常少卿。十四年進南太常卿。弘治十五年劉大夏言馬政廢壞。陞副都御史。督理茶馬鹽馬。陝西人素喜一清。一清官益高。才益展布。清牧地凡十二萬八千四百餘頃。條上茶鹽牧事宜。及易置馬吏。奏請輒允。收事有成。益開水草善地。起城堡廬舍。河湟涼固間。雲錦成羣。又奏準招商自出資本買茶。裝籠轉運。茶司每一千斤價五十兩。大約計官銀萬兩。舊買馬不過千匹。如此可得馬二千匹。官益而商不損。與開中不同。著以爲制。十七年敵入花馬池塞。十八年敕一清經略邊務。兼巡撫陝西。一清條邊事。劾罷總兵武安侯。及兵備不職者。裁折中官支應。歲省數千金。創城平敵。紅古以援固原。築垣瀕河以捍靖敵。敵入。聞一清至。輒遁去。正德元年改總制三邊。兼理馬政。是

年陞右都御史。疏言陝西各邊延綏城堡據險寧夏甘肅河山阻隔賊雖侵犯爲患猶淺惟花馬池至靈州地里寬漫城堡稀疎兵力單弱一或失守敵衆拆牆而入犯環慶寇固原踞平鳳臨鞏其間漢土雜處倘兵連禍結內變因之而作根本動搖誠非細故此所謂膏肓之疾腹心之害也成化初年北敵在套彼時未有邊牆恣肆出入已而得巡撫寧夏都御史徐廷璋修邊牆二百餘里開濬溝塹延綏地方邊牆壕塹又得巡撫都御史余子俊修濬完固北敵不復入套者二十餘年世平人玩邊備漸疎牆旣日薄溝又日淺弘治十四年大敵由花馬池拆牆而入戕破四郡敵大得志始蔑邊牆爲不足畏連年擁衆拆入我軍動輒失利寧夏鎮巡屢奏築牆濬塹提督軍務都御史史琳又乞於花馬池章州設立營衛兵部奏下總制尙書陳紘紘止添修四五小堡及於靖口至環慶地方挑挖邊塹僅七百餘里自謂可無敵患弘治十七十八年各敵復大舉仍自花馬池清水營拆牆深入紘所修邊塹營堡不能捍禦阻遏攻陷清水營殘破花馬池上廬宸慮敕臣經理臣聞劣歷官陝西有年敵情邊事頗常究心但今頻年旱荒倉廩空虛饋餉不繼敵衆動號數萬倏聚忽散未至而廣徵士馬則徒費芻糧旣至而調兵應援則援不及事縱使大兵旣集務速則彼或不來持久則我師先老恐終無以伐其深入之謀沮其方張之勢常聞防邊之計莫危於戰莫安於守臣恐坐談不如親見自慶陽環縣延綏定邊寧夏花馬池興武清水營直抵靈州一帶邊牆城堡墩臺躬親閱視廣集衆思兼收羣策參酌損益始有定論其大要有四修濬牆塹以固邊防增設衛所以壯邊兵經理靈夏以安內附整救章州以遏外侵當務之急莫先於此但陝西財匱民勞修

邊之役人多異議。然利害有輕重關係。有大小大事。可成則小費不足計。遠效可圖。則近怨不足恤。此臣區區犬馬之忠也。今之河套。卽周之朔方。漢之定襄。赫連勃勃統萬城也。唐張仁愿築三受降城。置烽墩千八百所。自是突厥不敢踰山牧馬。朔方無寇。歲省費億計。減鎮兵數萬。受降遠在河外。古之舉大事者。未嘗不一勞而後永佚。類如此。受降授三面之險。當千里之蔽。正統以來。浸夫其險。舍受降而衛東勝。已失一面之險。又輟東勝以就延綏。則以一面之地。遮千餘里之衝。遂使河套沃壤。爲敵甌脫。巢穴其中。深山大河。勢顧在彼。而寧夏外險。反南備河。此陝西北敵之患。所以相尋而莫之能解也。茲欲復守東勝。因河爲固。東接大同。西接寧夏。使河套方千里之地。歸我耕牧。開屯田數百萬。用省內運。不然。則陝西用兵。殆無虛日。八郡之人。疲於奔命。民窮盜起。禍將何極。及今將延綏寧夏邊防。設法整飭。賊來有以待之。雖非上計。猶愈於無策。敵衆聞知。或數十年未敢輕犯。我得休養生息。東勝之議。未必終不可復也。世之論邊事者。或專主戰伐。臣亦非敢忘戰者。方將蒐選官軍。策勵將士。備車馬。備器械。儲糗糧。明斥堠。今冬北敵若復侵犯。謹當獨率諸將。恭行天討。成功在天。臣不敢必。凡所當爲。臣不敢避。今首以築牆挑塹爲言。宜必增茲多口。但受恩深重。自當爲國遠圖。今年套內無賊。腹裏有秋。人民稍安。正可有爲之日。伏望聖明俯垂省覽。下兵部議。敕一清便宜經理。二年一清。言臣卽兼巡撫。已不能專力馬政。今冒總制。事益廢闕。乞仍遣巡茶御史兼馬政。是年引疾歸。閣瑾惡一清不已。又羅織逮詔獄。李東陽力救得釋。兵部疏言一清修邊方有端緒而去。凡糴餉費銀十餘萬兩。起戶役銀十六萬兩。及諸犒勞藥餌。辦運木石。皆一

清精神運用。計慮周悉。今付之新任撫臣。意有異同。事無統紀。恐徒費財。靡益邊務。乞遣大臣專理。議上。兵部右侍郎文貴。右副都御史張鼎。陝西巡撫副都御史曹元。乞簡用。瑾意不欲脩邊。內批罷役。銀鎔大鑼。解京。事竟止。五年。安化王寘鐸反。寧夏。召一清總制陝西。延綏。寧夏。甘涼軍務。同太監張永討賊。兵纒至陝。仇鉞已擒賊。一清謂永曰。藩室亂。易除。國家內變。不可測。奈何。永曰。何謂。一清曰。公豈一日忘情。顧無能爲公畫策者。遂促席手畫瑾字。永曰。渠日夜在上。傍上一日不見渠。不樂。今其枝附已成。耳目廣矣。奈何。一清曰。公亦天子信幸臣。今討賊不付他人。付公。上意可知。公試班師入京。詭言。清上問語。寧夏事。上必就公問。公於此時。上寘鐸僞檄。并述渠亂。政凶狡謀不軌。海內愁怨。大亂將起。上英武必悟。且大怒。瑾誅。柄用公。益矯瑾行事。呂強。張承業。暨公。千載三人耳。永曰。即不濟。奈何。一清曰。他人言。濟不濟。未可知。言出。公必濟。顧公言時。須有端緒。且委曲。上萬一不信。公頓首請死。願死上前。即退。瑾殺奴。餵狗。又涕哭頓首。得請。即行事。無緩頃刻。漏機事。禍不族。踵。永勃然作曰。老奴何惜餘年報主乎。已而永入京。請見。如一清策。竟誅瑾。永力薦一清才望。上召爲戶部尙書。尋加太子太保。六年。改吏部尙書。中原盜起。上平賊十一策。金山之捷。皆其貽書陸完。指畫機宜。卒如所算。賊平。加少保。一清在吏部時。給事中王昂劾吏部謫官。一清疏救御史孟洋。劾內閣謫官。一清疏救雲南陝西鎮守太監。誣奏巡按御史張璞。劉天和。王天相。逮下獄。一清又疏救。十年。入內閣。加少傅。太子太傅。武英殿大學士。尙書如故。一清不屑曲謹。錢甯惡之。以災異自劾去。歸丹徒。宸濠變起。一清以鎮江爲江南首郡。此地有備。則三吳無虞。乃親閱城設。

險出粟賑軍。貽書調金山軍爲外援。設中軍營爲內應。故地方恃以無恐。武宗南征。幸其第。宴飲廣歌兩晝夜。有導上復南幸者。一清從容婉諫。遂不東。嘉靖初。遣使存問。大禮議起。一清見張璁疏曰。張生此論。聖人復起。不能易也。璁專向用力薦之。嘉靖四年。敵大入塞。擾關隴。起一清兵部尙書兼憲職。提督陝西軍務。未幾。召入內閣。首薦起大學士謝遷。費宏。遂請老。一清亦請老。尋加少師。改華蓋殿。上憐其老。令朝朔望。一清復銳意修邊。及選將練兵。屯田防敵。上亦用其言。竟中止。一清惡郭勛驕橫。諷御史趙鏜劾勛。奪勛後府及團營。八年秋。一清計去璁。璁曰。議大禮者吾輩三四人。張桂去且及我。急上疏列一清二十四罪。上立召璁還內閣。俄朱繼宗獄起。坐一清受張容金錢。名請永誌。又輒與容指揮世錦衣。上又憐一清老。有功不問。言官屢劾。削籍。明年。疽發背卒。繼孫元。授詔請得復官。二十七年。贈太保。諡文襄。一清生而隱宮。貌類寺人。學博才雄。善調停。應變濟務。尤曉暢邊事。羽檄旁午。一夕十疏。口拈指授。悉中機宜。又好汲引人。人或訾己。顧揚薦之。一時俊達喜功名者。亦爭趨其門。先是一清在靈州。日習演營陣。人多笑之。一清知之曰。予誠書生。不諳軍旅。嘗聞古人行必謹哨探。止必修戰備。爲法每諭諸將曰。無事當如有事時。隄防。有事當如無事時。鎮靜。又念武侯李靖未嘗廢營陣。世無岳武穆。豈可恃野戰以爲能耶。笑者服其識。一清明於知人。如拔仇鉞於列校。舉王守仁於庶僚。錄楊宏於編戍。而有功漣運。識伍文定。而首倡義捷。用喬宇。而捍禦留都。拔俞諫。而總制江右。皆儲賢於無事之日。卒靖大變。有幹才人多稱焉。史官曰。韓魏公自謂才周四面。方是經綸好手。如楊一清之有猷有守。好尙旣端。於邊防馬政造士用人。

投之所向。無不卓然。利今而法後。近代才相。鮮能儷之。至於用寺人。肘腋大奸。如距斯脫。劉謝諸賢。不得不讓美矣。

梁材、劉麟、雍太、吳廷舉傳

梁材字大用。南京金吾右衛人。幼岐嶷。儼如成人。甫受學。輒慨然有經濟天下之志。弘治十二年己未登進士。授德清令。刻苦勤敏。一日勘事他邑。重囚越獄去。材還禱於城隍。賊未幾就擒。材詰之曰。汝既遁。何復爲我擒。賊曰。有一緋衣人尾之。欲脫不能耳。人咸以爲異。正德二年。晉刑部廣東司主事。獄大小無遁情。刑尙書洪鍾。每命諸司錄其讞案以爲法。五年。改山東道御史。闕瑾誅。榜諭天下。出材手筆。大學士李東陽見而絕愛之。及爲史記。先是東陽與楊廷和各製一篇。不愜意。乃會刑尙書何鑑。都御史楊綸。令其屬徧爲之。東陽見材作喜曰。以古詞兼律筆。足示天下後世矣。遂錄付史館。六年。出知嘉興。未幾調杭州。杭以繁富名。材至。愈以清約自勵。入覲具一書二帕。贄京貴。囊中無一長物。而其廉幹益著聞。十一年。進右參政。尋進按察使。會宸濠變起。濠去浙邇。倚鎮守中官畢真爲內應。人心洶洶。御史張縉謀於材曰。事急矣。將若何。材卽就案草檄調兵。方略布置。一日悉具。又自往說真令撤兵。衛自是奸謀內沮。兩浙恃以安。嘉靖二年。以服闋。再爲雲南按察使。先是有土酋相讎夷者。六載未定。御史須材爲之。材卽召致。諭以王法。當誅死。今姑貸汝。如例罰牛羊若干以贖。土酋頓顙輸服。御史難其太輕。材言治夷法如是足矣。不爾。是激之變也。後詎知夷果密調兵。聞無他乃止。三年。晉貴州左布政使。調廣東。凡入民課金。令輸者自

權之。而親爲監督。主藏者不得高下其手。往來傳置諸所餽遺。卽果蔬弗受也。材兩典名郡。及爲藩臬長。壹以便民爲務。頌聲載途。所至立專祠祀。六年進右副都御史。巡撫江西。未兩月。召爲刑部左侍郎。七年改戶部。兼右僉都御史。總督雲貴川廣糧餉。偕總制伍文定往平雲南。至澧州聞捷還。辭兼職。多晉尙書。十年丁內艱。十三年召復任。駕謁山陵。材受敕。偕宣城伯衛鎬居守。如是者三十七年。以考滿解職。明年廷臣上議。言司徒乃國計大臣。總領財賦。得人實難。竊見材操心廉直。終始不渝。且綜理旣閑。出納有贊。實清朝人才之望。及今未衰。尙堪任使。乞蚤召用以盡其才。上俞之。起原官。加太子少保。材在位。素令親信。察市價低昂。攬戶不得乾沒。所省官錢不可費算。張璠新貴用事。常以意氣挫折公卿。一日於朝堂厲聲語云。梁大用某處糧草當辦。則應曰諾。某處折銀當發。復應曰諾。璠意其黯黯弗了也。旣而偵之。則無弗夙具者。乃歎曰。渠固若是辦耶。上念吏治龐雜。特命材以戶尙書行考察事。所汰簡者數百人。人心大服。又大獄久不決者。上命兼刑尙書讞勘之。居數日。盡得其情。擬奏。上喜曰。得尙書十二人。如材者。朕可無憂矣。事竣乃還印刑部。皆以特旨從。此前此未有也。平生爲國薦賢。絕不欲人知。是時士大夫頗尙圓通。公卿或阿上取寵。而材獨屹然自守。有古大臣風。然竟以此忤時。翊國公郭勛特寵擅專。損兵冒餉。材疏劾之。上下其章。所司響助威。莫敢詰。復按助不法十事。草成未上。爲僚友泄其語。反爲所中。遂落職歸。歸兩月而卒。嘉靖中工作大興。邊費無藝。加以水旱癘疫。所在告災。材籌之殫竭心力。必不稍以加賦於民。在職力主節財。諸濫請浮費悉斥。初世宗以祠禱故。於額外有所需。材執曰。終不以無益虧國計。世宗

心不善也。頃之材去且死。卒後。邊儲大窘。計無所出。世宗乃歎曰。令梁材在。當不至是。居恆約敝僚屬。壹意奉公。自起家縣令。至尙書處。公廨者什九。私居者什一。終日高拱堂皇。內外肅然。在廣東日。右布政林富市肉數多。召其僕。誡勿過豐。富聞之大怒。短衣露頂。踉蹌而出。詈不已。材頰視簿書。端坐自如。富慙而退。爲戶部尙書。語其屬曰。若輩與人一接。杯酒飲。有干謁。能峻卻之乎。坐部治事。無敢闖出入。以故。姦緣請寄。悉格不行。而歲計益洽。材狷潔正直。出於天性。佐食園蔬。絕無兼味。公服用浙蕉極下者。底裏不厭。瀚綴。唯裾鮮潔而已。爲尙書宅。憂歸。始有居室。崔銑稱之曰。自公召還。司徒塗人丐子相語云。今天眼開。召爲梁公矣。此與司馬光入朝何異。西長安街有屋一區。予嫌其陋。公至卽居之。但掃地塗壁而已。予甚媿不及也。卒之日。家無餘貲。子孫至不能之京。靳卹典。隆慶初。贈太子太保。諡端肅。

劉麟。字元瑞。其先江西安仁人。國初以武功籍南京。廣洋。至麟始登弘治九年丙辰進士。是時外戚張氏驕橫執法。臺諫擊之。逮治甚急。麟與歸安陸崑抗章申救。孝宗爲之霽威。事尋得解。除刑部主事。進員外郎。錄囚畿內。所疏雪冤滯。無慮數百人。轉郎中。擢守紹興。漢劉寵故處也。在郡精核廉敏。甫五日。郡聲不和。閣瑾銜麟。出守不修謁。猶撥郎中時瑣細。廢爲編氓。郡人爭致贖。麟曰。勤苦諸君。吾治不逮前劉。敢蒙一錢惠耶。旣去。越人肖像爲小劉祠。時與龍覓及湖人吳琬施侃陸崑交。因徙居於湖。山人孫太初亦以羈旅入社。湖中風雅。稱中興焉。瑾誅起知西安。遭內艱。去郡服闋。遷陝西參政。屬關內饑。敵數深入。朝遣大臣督兵。將厚賦軍興。諸司莫敢異。麟曰。靖邊本以衛民也。民可先困乎。使者色沮。會有赴闕陳訴者。命

與參政共圖其便。議遂寢。麟亦嚴核侵漁。括逋負。邊儲竟以不乏。踰年擢雲南按察使。謝病歸。嘉靖初起爲太僕寺卿。擢副都御史。巡撫北畿。復引疾。章至三四上始得請。時論方高其才節。再起爲大理寺卿。改刑部右侍郎。尋陞工部尙書。水衡泉貨之府。高潔士頗避之。麟咨白吏部。盡選才廉充曹任。仍請築外祭刷四司之財貯之。特銓主事一人。與臺臣同典出納。上嘉其意。賜庫名曰節慎。實自麟始。凡工部上供。率關內府所徵多淆典式不受核。麟條上最甚者十二事。得旨裁之。中官用此御麟。會上遣近璫督造龍袍於蘇松。麟請罷遣。忤旨。勒令解職。卽歸。益遠世紛。里中不復知有鉅公者。其於文。以冲夷雅澹之詞。發現璋奇。颯之氣。窈眇穠纖。冥與神會。書法宗羲。獻以還。片簡尺牘。人爭寶之。至與人談。往往出微辭。臻妙趣。早參玄理。兼達天命。常請王廷相預作墓銘。好樓居。而力不能作。友人文徵明寫樓圖遺之。常懸之壁。命曰神樓。賓至則陳法書名墨以爲娛。叩以時事不答。公卿交薦不知也。性情約。疏布自喜。事繼母。戈遇異母弟鳳。尤篤恩禮。先人田廬。悉以委之。絕不以豐約累志。吏尙書李默言麟傲居溧陽。常遣門人候之。麟引至臥內。見四壁惟掛書數束。他無長物。又二十年。觴予峴山逸老堂。了無宿具。旋以乳羊博市。酣風雨瀟瀟。欣然達夜。其風尙如此。常以爲麟。談文似公幹。治財似士安。剛介不撓。似器之。至於廉約。省素家無餘貲。位列三事。以功名始終。此與東牟劉祖榮何異。世稱二劉。不其然乎。年八十八卒。贈太子少保。諡清惠。

雍太。字世隆。陝之咸甯人。成化五年進士。授知吳縣。吳濱湖。湖漲淪田千頃。太作隄。民受其利。稱雍公隄。

吳民有妾亡者。妾父訟其夫密殺吾女。兩月。匿尸湖中石下。召訊夫。夫曰。妾逃兩月。蹤跡不可得。妾父脅財。始知死所。太使人視其尸。乃訊父曰。夫密殺汝女。汝安知匿於石下。此又豈兩月尸邪。此必非汝女。汝殺他人女。冀得賂。一拷而服。十年召爲監察御史。舊令行吳人富好饋。太不受一錢。巡鹽兩淮。淮龜丁貧而餓者幾二千人。太巡滿。俱與完室。歷陞浙江右布政使。時勢家鬻販私鹽。鄉人效尤。幾至千輩。盜竊橫行。太先收富人抵罪。羣盜悉平。晉僉都御史。巡撫宣府。參將李稽不法。部下狀其惡。太具草且聞上。稽跪堂下乞受責。圖自新。太曰。此亦軍法也。縛下杖之。三軍股慄。稽乃譖太時相。言官遂劾太以擅辱將官罷。退居韋曲別墅。不涉城市。正德二年。給事中潘鐸薦其有敢死之節。克亂之才。詔起左副都御史。操江。固辭弗允。尋陞南京戶部尚書。時閣瑾用事。以太鄉人。欲親用太。太不應。遂斥太去。而諸所常薦太者。馬文升許。進皆獲罪。太歸從居韋曲。日焚香讀書。與鄉人論穡事。不與上官相見。族黨有犯。必告有司。曰。某是某非。幸無以太故屈法。年八十卒。

吳廷舉。字獻臣。嘉魚人。成化二十三年進士。授廣東順德知縣。潔己字民。時劉大夏爲左布政使。知廷舉。移文輒具尺書。廷舉益盡力效職。都御史屠滸召見廷舉。甚溫。廷舉請事。都御史曰。順德有大璫某者。屬我修其家廟。縣令可理葺之。廷舉謝曰。令非有舊例新恩。一夫不敢役。一錢不敢費也。滸慚已之。市舶太監出銀市葛。廷舉卽以銀市二葛。曰。奉此爲式。如不中。請還金。且葛雷產也。太監怒。取金去。汪御史惡廷舉。曰。彼專抗上官。市已能者。會廷舉壞淫祠。撤其材。作土隄書院。賢館。修學宮。御史按而會其

直。竹木碎屑計斤兩。廷舉因服楛手。日詣訟所。士夫羣泣訴其亡私盜狀。御史大慙。釋之。弘治九年。蕭入爲吏部尙書。時廷舉爲令十年矣。遷成都同知。起復。改松江。上疏請修軍政。十八年。廣東盜起。陞兵備僉事。討平十三村池水盜。正德二年。革兵備。三年。改鹽法。兼屯田。四年。陞廣東右參議。再逾月。陞瓊州兵備副使。時閩瑾專權。廷舉發鎮守內官潘忠二十罪。又奉有旨。取作帑解京。皆非正費。曰。貢進內也。曰。司禮打點錢賂瑾也。又疏便宜事。忠亦許廷舉。五年。瑾矯旨。坐其枉道。荷校不死。戍雁門。再月。赦罪還鄉。是年。瑾誅。改雲南兵備副使。六年。陞江西右參政。討挑源賊。時總制數易。官兵不協力。歷數年。費萬計。賊益熾。廷舉饒智略。勇不避難。及逢盤錯。益喜。與副使胡世甯發憤。欲設奇取捷。平賊。且論解散。反爲賊得。賊劫廷舉。求撫。廷舉詞色不撓。久之。伺得賊中要領。誘勁賊執其酋出。廷舉復入討平之。九年。陞廣東右布政使。立番舶進貢交易之法。平傳役。十年。嶺西獠獠作亂。兼兵備副使。撫治廣肇諸府。十一年。轉左。十二年。湖南饑。陞副都御史。賑濟。十三年。敕勘永順保靖兩江口夷情。廷舉爲堅明約束。條奏上。十四年。還京。復出湖南。定諸夷地界。又疏言六事。備宸濠變。宸濠大恨。惟恐其巡撫江西。嘉靖初。召爲兵部右侍郎。上疏忤輔臣。改南工部。又改南戶部。晉右都御史。理南畿。折豪強。植貧弱。禁私驛。止妄工。南圻肅然。廷舉長身而瘠。面如削瓜。敝衣帶穿。不修藻飾。神采英毅。志識雄偉。言行必自信。人鮮能奪之。視財利如糞土。妻子饑寒。而施予不較。有亡。陞南工部尙書。卽疏歸。歸二年卒。年六十六。所居湫隘。亡郭外田。顧有書至萬卷。卒之日不能殮。都御史姚鏞爲之經理。崔銑稱其貞才潔履。厚行定力。鮮儷也。又曰。廷舉恆衣食人。妻子

乃不能給朝夕。官四十年。百瘁九死。不能一月安於朝。推下賢哲。不憚屈已。卒未聞報德者。史官曰。大臣之負經濟者。類以才掩其節。若梁材之食無兼味。劉麟之四壁束書。風尚可挹也。俱典名郡。俱築國計。磊磊有治辨聲。梁之才至令兼揖六曹。其經濟何如哉。雍太能完竈丁之室。而廷舉不肯修大璫家廟。遺愛遺直。古之人歟。崔銑曰。吳公恆衣食人。妻子乃不能給。百瘁九死。卒未聞報德者。苦節如是。亦可爲世慨已。

明書卷一百三十

列傳四

名臣傳 十五

陳察陳寰傳

陳察字原習常熟人母譚夢斗間氣下傅體寤而視腹有赤文曰鳳已遂娠生察察生嶷然莊甚動止自矩下帷日夜誦不輟舉進士初爲南昌推官選授南京監察御史閣瑾擅權察持議亡所屈坐罰輸米邊百五十石瑾誅甯彬煽起益甚察力爭不得嘆曰死耳而不難老母耶是時母譚老乃移疾歸養又九歲會弟寰免檢討亦歸母譚趣之起曰若毋以吾老爲念而孤天子恩乃起守故官俄當出按滇上疏言天下大計五曰備荒曰治兵曰屏盜曰水利曰民牧俱下所司著爲令甯王宸濠反江彬說上以南方饒樂可游上欣然嚴中外且發察抗言弄兵者陸梁彭蠡間寧能舉大名哉發三千騎渡江可徑縛取奈何屈萬乘尊奪吏士任且上出而京師空然無六尺寄撫監卽北不憂敵不憂蕭牆內耶上不懌切責之奪一歲俸按滇屏騶呵以身周行箠棘而微刺民間得失滇中別產銀幸臣請縣官場而征之歲可佐度支費什一下使者議察持不可曰此兵端也且上以采用事者觀其利余觀其害而從史之不可竟罷議金齒

帥沐崧挾中官越而嚙察。劾治如律。上未有子。察抗疏略曰。臣越在外。微妄干國家大議。死罪死罪。陛下之踵先帝尊者十五年矣。先帝十八年而棄羣臣。亡卒然之患。以有陛下也。陛下多狎游。壯未有子。羣臣心忤然竊慮萬一宜早定大計。擇親賢實禁。邸端良之士。屏翼左右。陛下固萬壽無量。庶有以培本根。消窺伺。臣民不勝大望。不報。亡何武宗崩。世宗入繼。詔求直言。而察還自滇。數上書陳君德。與革利弊。復出按蜀。察奏上以罷蜀鎮守及諸織造中官。具其狀甚悉。中官尾得書。銜之刺骨。謀格不下。然上固已心動。後次第有所裁。具如其奏。其按鎮蜀一罷青驪布袍。導二吏符節而已。方面而下大儒服。惴惴亡以奉下。風墨吏多解印綬去。內艱歸。服除。再入爲御史。王邦奇者。壬人也。例罷所任千戶。不得志。緣上意誣大學士費宏等。給事中楊言因糾邦奇。上恚爲大臣遊說。朝置獄訊備五毒。察大呼曰。臣察願以不肖軀。易楊言地下。衆錯愕引避。而上連日攝之。不爲動。退具草言。亡論邦奇語非是。大臣不自傷。扞文罔亡以消厭人議。惟上體貌終始。其聽自劾。邦奇別下司寇。遂彈治。勿令天下有以窺見風旨。上曰善。因遂寬言獄。郭勛方挾幸。爲奸利巨萬。察時監軍事。發其陰。請賜罷。上謂御史竊吾不愛助。以謝御史。其令助就第。察守御史久。同列屢起大位。幾徧始遷。太僕少卿。垂拜察。復辭薦代人。太僕於故事不得辭。又不當得薦代人。坐調潮州檢校。察怡然卷衣出。倍道趨潮。聚諸儒生。譚經學。諸儒生人相勸。亡倍陳公。葦歲移信州。推官距箴南昌。更可三十歲。治如南昌。晉浙江按察僉事陞副使。踰年遷山西按察使。尋遷山東右布政使。已又遷浙江布政使。入爲光祿卿。旣上皇子牛。贈祖父官。錄一子太學生。改左僉都御史。撫南贛。至鎮。申約。

束定保甲。繕要衝。勸習技射士。密莢授之。捕搜盜魁。盜相戒請明吏毋汚陳公。鏞爲也。而察益頌高皇帝大誥。闢里社。社人給小學彬彬矣。乞骸骨。疏數上許之。故受經羅欽順而友張潤章。拯相與劇切爲君子。歸杜門。益讀習濂洛諸先生書。希聞外事。監司歲時行部間造察。察度其人長者乃已。或其人非長者而修。則徐出所飯麥強飯之。曰余田父甘也。又多吳語。刺刺是非。咸遂巡避去。所寢卽生平不二衾。蔬食。衣冠。穉亡易。第令綴以絲襪。色錯然。久而失其故。少年覩以不堪。或相率摘訾其非情云。旣老病且亟。捐私田三百爲邑助博士弟子貧者。曰吾異乎所以益子孫侈者。卒年八十三。有集及奏草若干卷。弟曰寰。字原大。生而秀鬢眉。孩提慧敏。母譚。宿治佛嚴。晨從樓誦諸品經。而臥寰樓下。竊聽則已。聞記可十餘品。譚母驚曰。豎子安所得之。笑曰。媪晨不樓誦耶。嚮者吾固聞之。弱冠舉鄉試。第三人。明年舉進士。選庶吉士。年授翰林檢討。大內災。寰上書言先帝未辨色而起謁上帝。已復告於寢。出朝羣臣。召對以問。考得失。祭必躬裸獻。終十八年卽亡。以寒暄小故廢罷者。主上所親覩也。今奈何獨厭法服。謝拂士。貂狐之裘。貝帶翹。躡而射馳。大鹿之墟乎。臣愚筮之諸王。仰觀先帝嚴藩屏。備不虞。甚愼悉也。上往奪中貴。瑾。熒。郎。罷。王。口。不。置。瑾。自。以。孤。上。易。發。耳。臣。愚。以。爲。修。故。事。擇。近。屬。賢。者。眞。邸。中。上。一。旦。有。子。令。還。國。亡。害。也。疏。入。發。奸。人。諱。又。他。條。絕。逸。欲。違。願。命。禁。橫。斂。正。法。度。節。濫。用。語。多。戇。上。不。省。奸。人。從。帷。中。下。其。奏。奪。半。歲。俸。寰。鬱。鬱。不。自。得。且。念。母。老。謝。病。歸。與。其。兄。更。出。入。侍。養。母。暑。中。疫。不。解。衣。而。持。侍。者。月。餘。衣。廁。膾。垢。生。蟻。貌。損。髮。盡。白。世。宗。卽。位。修。武。宗。實。錄。召。仍。檢。討。寰。言。邇。者。采。尙。書。故。實。上。六。館。此。不。過。從。牒。囊。中。探。得。之。

何關人主大計。卽翰林臣臚列具員耳。今以爲宜復古。左右史記言動。祕燕之間。備列彤管。亡令他日。鑿爽國事。又太宗下金陵。諸緣故主駢僂。父老一二志焉。臣不佞。首陽之饑。豈紂聖武王非耶。上幸人賜一傳。環瑾不掩。庶有以風示永。永不報。楊廷和器之。謂曰。吾老矣。薦爲經筵講官。其所陳析治忽要致。嘗屢不厭。上恆目屬之。且爲關臣。若講不當如是耶。宮中有妃之戚。或謂且罷講。寰言人主寧以一微戚廢大典。無已。則殺吉而事乎。上曰善。時寰以久當選。會艱。日馳一羸。倉頭從而南。哭不已。抵家。工方爲母譚像。未成。寰尸息有間。驟然啼曰。余庶幾得之。跪命墨黻丹粉。啼未絕。而母譚之像儼然。兄察自蜀來。望大號曰。母而在哉。服闋守故官。會張璠等由議禮驟貴。患所羽翼寡。而宿嚴重寰。欲以風致之。寰謝曰。諸君吾故人。非不知從諸君佳。第吾憂身後耳。乞南。遂爲南司業。亡何兄察坐事謫潮。寰聞棄官偕行。萬里抵嶺。而別。遂歸臥益堅。後以薦起爲國子司業。世宗制禮樂。下有司。毋得仍孔子王稱。其尊爲先師。而言者遂上書言闕里廟器物王者非當。寰持不可。曰。陛下尊孔子先師。以抑之耶。將尊之也。卽尊之。闕里制當益亡所裁。言者不自惟。而謬推測聖意。宜寬罰。上從之。陞南京國子祭酒。已拜。則上所論次太學章。及勸上進德勤政戒土木省齋祀。上覽書善之。謂寰忠愛朕。所進留覽。寰先後蒞太學。其大指寬體輔情而行。最後整條教策。怠惰。時時周訪諸生。貧老病老資給之。以故爭自喜。得出陳公門。幸甚。然寰晚更官薄。助教劉世龍上封事。多所譎忤。下獄。柄臣疑其出寰銜之。遂致仕。寰歸。兄察亦罷歸。日夕相與考問德義。間出而雁行。白鬚眉。簪履甚都。稚子走相邀。指曰。此陳先生也。卒年六十三。所著集二十卷。

史官曰。事親孝。則忠可移於君。陳察。陳寰。至性孝友人也。觀其思成母像。與徒步隨兄萬里。可謂孝子悌弟。故一出而觸闕寺。死諍友。建國儲。皆聲譽大節。風百世。史稱陳元方兄弟。閨門雍睦。有德有行。以今絮古。何愧二方。而宦業殆過之矣。

王以旂。周金傳

王以旂。字士招。江甯人。生而廣額豐頤。音吐如鐘。弱冠游膠庠。才名蔚起。金澤以右都御史掌南院。解圍帶贈之曰。君異日服此不難也。正德六年辛未。舉進士。授江西上高知縣。時華林賊方熾。流賊復入江掠舟。揚旗剽劫庫獄。以旂集鄉兵。要害處徧置鐵蒺藜以防之。賊自是不敢窺上高。已又生擒流賊數十人。闔境帖然。益省刑紓賦。與民休息。縣大治。選監察御史。掌院左都御史彭澤甚見器重。一日指其坐曰。當拂拭待子矣。出河南省試。期至。會宸濠叛。闔瑾者黨濠。倡議罷試。以旂徐言。江西去汴遠。且濠旋撲滅。罷試無名。遂事事如故。瑾又傳武宗親征。道出汴。輒下牒取帑銀四萬備供應。諸司莫能應。以旂執不可。謂天子御六飛。必戒前路。敕至。圖之未晚。今豫發公帑萬一從他道。銀散不可歸。誰執其咎。瑾乃沮。嘉靖壬午。按福建。時泉漳盜起。流劫安溪。勢日張。以旂檄分守及都指揮率兵勦之。月餘平。癸未代還。先是以旂父感風痺。再疏終養。家居十年。壬辰。仍補御史。督北畿學。甫十閱月。擢南太僕寺少卿。甲午。陞大理寺右少卿。戊戌。春。陞光祿寺卿。八月。陞都察院右副都御史。撫治鄖陽。時有議革撫治者。以旂繪四省交會圖。鏡之石。著論言不可革。狀議遂罷。庚子。陞左副都御史。佐院事。辛丑。轉兵部右侍郎。是歲。徐呂洪竭。漕舟

滯不行。臺諫言宜如先朝故事。簡大臣督治。於是受命兼左僉都御史以行。至則先求故道。視泉脈。循經流。塞分殺。自徐洪南抵沽頭。增閘若干。又相地形引水。暫築土壩若干。漕舸得如期達京師。汶上甯陽間。故有四水櫃置湖中。曰安山。曰南旺。曰馬場。曰昭陽。勢豪侵沒。多獻德邸。藉其牽制有司。因循不敢問。以旂謂水櫃復。庶畜洩有地。河溢則懸河以入湖。河涸則懸湖以入河。足備緩急。遂任怨力復之。事竣。上嘉悅。加俸一級。癸卯陞右都御史。掌南院。人皆憶金澤贈帶事。至是驗矣。以旂處父母邦。務持重。屏騶從。簡出入。舊宅在聚寶門外。市人填溢。歲時歸祀。必由他道。謂其子曰。昔張湛入里門必步。可取以爲法也。乙巳考察京官。中外翕然服其當。是年刷卷御史以公錯參武弁。至千餘員。有旨贖罪。以旂念衛官多貧。值熱減詔至。卽承德意悉蠲之。歡聲載道。丙午召入爲工部尙書。至則琉璃河圓明園工興。經營節縮。得不重費。工完賜銀幣者再。九月二品滿考。上遣中官賜寶鑑羊酒。丁未改左都御史。掌院事。以旂思彭澤語。益感奮。尋轉兵部尙書。兼提督團營。先是陝西總督曾銑倡議復套。業奉命集議。俄旨出逮銑。卽命以旂以尙書兼右僉都御史代之。陞辭。馳入關。亟罷郡縣軍需。停造器具。邀功生事之言。一切屏遠。又嚴盜馬之罰。禁劫營之弊。勵諸將慎固封守。雖倉卒建牙。而能推布腹心。畢屈羣策。如延安設遊擊一人。清平高家二堡。與清水營文縣。設守備四人。岷州設判官一人。文縣參將改分守。靈州參將移橫城。平口西甯二守備改參將。疏入皆得允。前此哈密熟番。久留甘肅。以旂患之。同都御史楊博。廉關外鉢和寺傍。可田可廬。召諭諸番。爲繕室廬。分比舍。卽口授田。示之生計。仍約朔望。族首得入關爲市。諸番感喻。稽首聽命。遂

徙帳房七百有六，男婦三千五百有奇，是舉不煩一夫，而數十年種類爲之一清。自二十七年入鎮，至三十二年防秋者五，市馬者二，北口西番無大舉，無深入，戊申敵犯山丹，己酉犯波罷及莊浪，己又犯高家堡，再及鎮羌，皆督師敗之。冬，出塞揚兵，破敵忻都，庚戌敵擾磨石，移軍敗走之，又敗之甯塞，敗之甘涼鎮，敵斬首一百三級，蓋數年所未有者。復敗之寧夏西沙窩，辛亥再戰肅州，斬首五十七級，又敗之寧夏，壬子大破敵於清平堡，斬首九十四級，又連敗之驢馬城、燕麥川，火燒溝、神塘嶺，己酉番賊出沒境上，斬一十五級，庚戌番賊再犯，調兵甘涼，斬五十七級，辛亥斬三十七級，計斬敵六百六十八級，番族二百級，奪獲夷器共萬六千有奇，駝馬牛羊八千四百，降敵及番族三千餘人，邊人自敵中聞而歸者千二百有六人。修完延慶定邊等處城堡窰塞四千六百四墩臺一十二，築完瓦查梁及蘭州邊牆二百餘里，前後上功，蒙恩廕子者二，賜金帛者八，賜敕獎勵者二，壬子八月二品九年滿考，加太子太保，癸丑春病劇，撫按代奏，得旨致仕，不及聞，閏三月三日卒於固原，聞者莫不奔喪失聲，諸鎮軍民爲罷市者數日，蓋以旂平生不務矯激之行，而唯存實心，不取倖得之功，而必圖成事，不期顯效耀目前，而要之久遠，不己意，遠衆論，而協諸公議，有大古臣之風，四十三年間所治，政聲大振，功績可數，訃聞，上震悼，輟朝一日，予祭葬，贈少保，諡襄敏，廕一子爲冑監，以旂性恬和，事父至孝，病十年，食飲起居，不暫離側，溷器亦自澆滌，與鄉人處，皆得其歡心，雖介節懷然，而無幾微見於顏色，於宗族故舊，恩義尤篤，爲工尙書入京，至東光聞鄉友蔣淮三喪，厝蓮兒窩，時舟已躑百里，亟命回舟，留五日，出俸易棺，遣人護歸南都，鄉人謂其長厚，自

金澤後方再見云。所著有漕河奏議、漕河撮稿、督府稿、督府奏議若干卷。

周金，字子庚，武進人。正德戊辰進士，擢給事中。陞太僕少卿，僉都御史，轉副都御史。致仕。家居六年，以原官薦起。陞兵部侍郎，轉都御史。歷撫延綏宣府保定淮鳳，已陞南京刑部尚書。改戶部。金所生也。因得焚黃先人之墓，人以爲榮。金爲人闊達警敏，自在科中，則已諳習世務。章數十餘上，度可施行而後言。武宗數游幸，金上疏請早朝躬覽章奏，總權綱，頗見采納。又言京糧歲入三百五萬，而食者歲乃四百三萬，當痛爲澄汰。中官以迎佛監織濫討引鹽，暴橫道路，當罷。又部督馬昂納女弟後宮，外議云已娠，請誅昂而還其女。昂雖不罪，而女竟黜。是時閹幸擅勢，與言路爲仇，不旦暮死，則竄。金爲給事中九年，老成周慎，卒免於戮辱。而以久次擢爲太僕卿，貌瓌偉，善議論。初在科，每九卿廷議軍機大事，衆輒目屬金。金口對甚辯，聞者心愜。壬申狼山之捷，兵部議有功將士，例陞三級。金笑曰：不然，將士有實職，有虛銜，有正副參遊，實職大而虛銜小，有管哨管隊，實職小而虛銜大。今一例陞級，則管哨以下皆可爲督府，而參副以上或止於都司，首尾倒置，非便。衆是之。癸酉議用兵吐魯番，復哈密，金極言西邊虛憊，而吐魯險遠，且青海之賊窺伺西甯，乃欲遠拯哈密，可乎？衆曰：如吐魯索金幣，何？金曰：彼能效順，國家何愛於賞？不然，勦之未晚也。卒從其議。於是衆以金可屬邊事，以此延綏宣府皆推金往。金既豁達不拘，有帥臣體裁，又善煦嫗，接下。其在兩鎮，人見金色詞，旣已心安，金益務寬簡，以慰帖之。常欲筭一二走卒，時窮多不袴，金惻然曰：邊人窘乃若是，遂不忍筭，而百方爲之招商聚粟，廣屯積芻，以時給其食，使人有重生之心，又爲之葺

墩牆。疏石渠。期於利盡而人不勞。邊人益愛之。嘉靖甲申。大同殺都御史。報至。金愕然。踟躕久之。曰。吾得之矣。乃開門召諸將卒盡入。環列庭下。謂之曰。若輩知大同殺都御史乎。衆曰。知之。金曰。若輩以殺之爲得已耶。衆叩頭曰。狂賊自取族耳。尙何道。金曰。不然。邊人勞苦甚矣。而又虐使之。是趣之殺也。假令上下相愛若父子。彼將倚以爲命。縱授之刃使殺焉。其誰忍乎。衆大歡呼。叩頭退。當是時。以片言立解上下疑阻。及之宣府。總督馮侍郎以苛刻失衆。金數爭之不得。侍郎又以引鹽數萬。與其私人爲市。而商人無能得者。衆固甚怨。會諸軍詣侍郎請糧。不從。且欲鞭之。衆遂憤轟然面罵。因圍帥府。金時以病告。諸屬奔竄。泣告金。金曰。吾在也。毋恐。即便服出坐院門。召諸把總官。陽罵曰。是若輩剝削之過。不然。諸軍豈不自愛而至此。欲痛鞭之。軍士聞金不委罪若也。氣已平。乃擁跪而前。爲諸把總請曰。非若輩者罪也。是總制者罔利。不息我衆耳。金從容懇諭以利害。衆喜曰。公生我。始解散去。而總制自是亦心愧金。延宣皆敵衝。金內撫諸軍。外策強敵。關城晏閉。邊氓緩帶。四五年訖無敗事。人益以爲才。自金去宣府八年。大同復殺總兵。據城亂。金時起巡撫保定矣。遂往拒紫荆。擒大同謀者數人。送京師。會真定巡按李御史有疑疾。入其邑。聞銃聲驚。以邑令謀已欲扶之死。廣平守爭之。又以守亦謀已。至遣吏發卒捕守。一城盡空。金聞變。星馳撫定之。上章露巡按罪狀。而臺長庇其屬。爲之訟寃。金復上章力辯。廷論竟直金。而黜御史。金本通達。不移爲崖異。然大體所在。不肯苟爲婢媵。此蓋金所難者。其以都御史出鎮淮也。章聖梓宮南祔。始奉旨由江。而諸護行大臣至儀真。議從陸。諸官心知不可。而憚於江險。悒潛不敢任。金獨言沿江山險路不可。

通狀。且奉玉體馳峻坂。上下撼頓。上聞之悲惻奈何。議論往返數日。而諸大臣亦密探沿江路果險。如金言。乃決從江之議。以饋維舟行。如期至承天。以葬江干千里。免於伐樹壞屋。役夫數萬人。得無走死山谷。中金之力也。入爲刑部尙書。轉戶部。益能其官。乙巳。致仕歸武進。明年病卒。年七十有四。金喜讀書。雖稗官小史。亦用以資其經略。尤喜爲詩歌。羽檄控僊中。率不廢詩。有上谷漁陽稿。書有晉人風骨。家居好獎進後輩。與人言娓娓不厭。與士人言讀書。與俗人言言勤業。莫不取其有益。平生儉樸。既貴自奉如居約時。獨祀先款客極豐潔。曰。賓祭重事也。年五十。遂獨居。未常畜媵妾。教諸子愛而有法。一飲食必有訓。卒賜葬祭。贈太子太保。諡襄敏。

史官曰。明自中葉。武功不兢。官塞上者。以贈烽堡遠斥候爲務耳。自曾銑以套議見戮。益噤不敢言出塞。而王以旂在甘涼甯肅間。屢奏首功。俘馘過當。前此未有也。周金善撫邊氓。恩及窮袴。卒能止譁定變。坐安反側。威愛兼克。斯封疆之昆乎。

張時徹、喻時、沈啓、陳堯傳

張時徹。字九一。鄞人。少內敏而狀默默。就外傳。日授書數百言。輒誦。益之輒又誦。又強以十日所當授書益之。輒又誦。人多異之。二十舉於鄉。又三年登進士。授南京禮部主事。改進兵部員外郎。還復爲禮部郎中。官南京八年。所日與呂柟、鄒守益、顧應祥輩游。工詞賦。名籍甚。陞按察副使。督江西學。江西爲貴臣藪。諸造請。一切報罷。以是不能無噤意。會九廟災。喉言。官論調之時。徹笑曰。一博士長應天道耶。尋得白。補

山東以故官飭治臨清。至則益持風裁。能使客額外供。重錦文。剗決風發。又時申束約。境上毋得容尺。刃寸鏃入境。絕剽攻警。所部稱治轉福。建右參政。閩徭故無準。乃衡準著徭書。以式來者。遷雲南按察使。多辨冤獄。黔公釀。怒釀者與抗利。囊三木以徇。時徹道問之。曰。禳旱不當釀。時徹曰。釀無預旱。破而縱之。遷山東右布政使。時左使以疾請告。代視篆。夙案如洗。吏自逋復。署者五十餘人。外艱歸。服除。補湖廣。時有楚變。諸司出入陳兵衛。時徹獨否。曰。誰敢干天子法也。諸宄散。當滿不得去。鶉衣而俟命。時徹憫之。謂孰非臣子乎。趣吏治移一月。而得滿去者百餘人。又常脫戾吏。戾并釋。連坐六百人。臺臣無以難也。遷河南爲左布政使。諸內賦者至卽驗入之。曰。毋使居亭。鍛工窟民也。已徵其道里費。而官輸之塞。曰。毋使道。路虞民也。王將軍當頒祿籍。封之人自爲授受。曰。毋使國臣得侵漁民也。有損吾任之。守遷右副都御史。巡撫四川。行未抵川。而白草番攻陷堡寨。殘裨將。人或謂撫之便。時徹奮曰。蜀獮僻。不以此時一伸法。將奈命吏何。乃率擣之。克番寨五十餘處。斬首千餘。俘獲五百五十餘人。與降者約。出賦視內地。捷聞。進兵部右侍郎。治如故。已又平馬獯番。賜金綺。已又平敍瀘蠻。以中蜚語罷歸。尋入爲南京刑部右侍郎。未上。以敵警召入兵部。是時仇鸞挾重肘腋間。藉寵勢張甚。旣已奪侍郎商大節兵。又勒使聽約束。大節疏劾之不勝。下獄論死。淹繫。而時徹每與鸞議左。鸞惡之。當出邊挾時徹從治兵。欲遂中之。而鸞病疽死。於是爲白大節冤。且當大用。會大節部兵上書。請得復以爲帥。時徹署部事。如所請。上大怒。謂帥生死由其部卒耶。且責其無君。鑄二秩。適內艱歸。倭寇起東南。起復爲南兵部尚書。倭有勁者僅百人。轉鬪千里。所抵

皆奔潰。至南京郭外。時徹發兵出禦之。不利。方調兵逐倭。而嚴世蕃夙惡之。搆勒致仕。既歸。益肆力文章。所著述不休。每弋釣山水。張宴樂。與文士爲詩酒之樂者二十四年。少時其族子邦奇長時。徹十六歲。先入翰林爲庶吉士。以經術行誼稱天下。時徹方髫。見其父曰。叔父其代興哉。邦奇爲南兵尙書。時徹尋經繼之人。以爲代興之言大信。

喻時。字中甫。別號吳皋。光州人。成進士。爲吳江令。吳江嚴邑。戶口財賦甲天下。吏緣是得乾沒爲奸。時則嚴句稜。具得其狀。始爲絜法提衡之。秋夏稅以限上。毋事敲撲。力役以則。應以時。毋待號召。鄉小民鬪鬪。毋復之三老。就時片語立決。大者笞遣之。各自得意去。臺郡國下訊謀。及他利害關白。鑄一大櫃中。手自封發。吏亡問不得事也。卽不敢望得一嘔笑。以少見指。而鄉小民亦不復知有吏。治不爲操切。撫按巡郡邑。時有所刺促。皆取大滑吏治警之。竟時任無敗墨吏。卽諸按部抵吳江。亦不問吏及大滑。每日令治之。久矣。以治行第一。徵拜監察御史。屬敵欲求貢。或謂敵統給我。且事體大。弗許便。時疏曰。毋爾也。敵以虛給我。而我遽絕之。是授彼名也。敵以實輸我。而我逆拒之。是創彼心也。我且又代負。夫不爲彼先。不爲彼後。內固吾守。而外探其幾。此在一才邊吏任耳。又條備敵十四事奏之。上皆嘉納。時嚴嵩初得幸。有墨聲。時抗疏論列。謂其人險而獯。久之且亂天下。業已上。卽素服候訊北闕。上心動時言。而難去嵩。勿究。視。河東屬歲旱。時禱雨。早弗利民。而嘗饒得。或強。時母禱曰。國以民爲本。吾不忍以吾職易吾民。竟禱雨立。澍歲大稔。而齏額亦不虧。嵩日益貴用事。乃移疾歸。會內艱。服闋守故官。出按蜀。自嚴厲操守。有風稜。

卽方面大將馘法不徇情。糾彈之。窮治亡所縱舍。汚吏望風解印綬去。蜀以大治。一夕夢數百人焦頭哭請救。次日問所部。則有大火飛渡江。爲災近千家。焚死者不能殮。時調棺槨。爲設薄奠。夕復夢來謝如初。還遷應天丞。轉太僕少卿。俄以右僉都御史撫眞保。日夜拊循具吏民練兵實。選將拒險。敵騎入犯。距浮圖峪十里。覘我師整而和。遂巡引去。亡何改督操江。佐南臺。數上疏陳便宜。計擒大盜汪然。朱良弼等。振武營兵驕。再倡亂。時奪其謀。進左副都御史。督漕運。時故常爲令。屬江南運爲四議。以請。其大指約束長賦者毋私兌。留減存料銀。添給運卒行糧。改徵腳直。詔可。著爲令。時益精勤於職。爬搔垢弊。殆盡。籍羨餘數萬計。皆上之朝。時人爲謠曰。琴琴鼓。下長淮。眞若翁。青天來。偕提督陝西三邊軍務。至則獎率將士出邊。逐捕首□百餘。馬駝牛羊稱是。□吉能竇兔。台吉入犯。時合三鎮兵。徼破之。獲首□五百餘。又以延綏兵擣□獲百餘級。三上捷。賚白金文綺。進食二品俸。入爲兵部右侍郎。協理戎政。上八事。其嚴補替。禁奸詭。定編派。於戎政尤切。敵入犯京城。時佐大帥鎮遠侯營於郭。敵不敢越而南。手詔慰勞。賜玉食法酒。尋改南兵部侍郎。會尙病在告。而時攝武選軍政。進其屬矢天諭之一時。翕然稱明考績。至家有嫉之者。中以浮言。詔候別用。遂歸。里居三年。召爲南戶部侍郎。督留儲。時業已病。強起供職。條上四事。曰。明注選。重部運。省解納。分水兌。詔次第行之。竟以不勝劇卒。年六十五。時好爲古文辭。源出盤庚周禮。追琢詰屈。世謂之喻氏學。

沈啓。字子由。吳江人。啓弱而父歿。爲諸生時。朗儻有聲。常構失產勢家。且訟且讀書。訟勝而書亦就。舉應

天鄉試。更七舉始成進士。授南京工部主事。世宗當幸楚。所從水道。則南京具諸樓船以從。具而上。或改道。耗縣官金錢。不具而上。猝至。且獲罪。尙書周用意疑之。以問啓。啓曰。召商需材於龍江關。急驛偵上所從道。以日計舟可立辦。夫舟而歸直於商。不舟而歸材於商。不難也。已上果從陸。得不匱水衡。用乃大賢。啓。中官請修皇陵。錦衣朱指揮往視之。尙書宋景請啓與偕往。朱指揮謂啓竊有請也。錦衣故當遜部曹。而指揮秩高於曹郎。請以秩坐。啓唯唯。朱指揮大悅。有間。啓曰。竊亦有請於公。太祖制皇陵毋得動寸土。違者死。今修不能無動土。而死可畏也。朱指揮色懼。曰。請如教。見中官人。啓具以前語對。朱指揮復從旁。與之。乃祇飭垣屋以報。所省復巨萬萬。景益賢啓。不以官稱。而恆稱爲先生。當三載考北上。景特餞於郊。曰。主事固不當餞。自爲國士餞耳。考最留爲刑部主事。歷郎中。時尙書聞淵積已賢啓。而啓後先所承詔。獄三十餘事。讞亭情法間。至損上威。以信所守。淵亦時從中調護。得不罪。尋陞紹興知府。紹興轄縣八。獨會稽。新昌。蕭山。田與賦左。累其長。至賄產以償。啓平其類而殺之。里俸輕而易完。人人稱便。郡田於山。多苦旱。室廬櫛北。苦火。又濱海。苦鈔爲虎者。啓禱於神。輒應。至虎復爲鈔。渡海去。其他政績往往類是。而賈舶之議起。蓋舶客許棟王直輩。挾萬衆。雙嶼諸港。郡要縉紳利互市。陰通之。而持上旨恫喝之。且授疏稿曰。公第上。必郡受其利。而公得善遷。啓持不可。薦紳怨之。刺骨。陞湖廣副使。時督撫侍郎張岳屬紀功。啓卽請從軍中往。岳不懌。曰。捷至不若遣。戰危事。一旦叵測。奈吾何。啓起謝曰。故事也。卽不在行。而以級請賞。誰爲辨者。遂與監軍張副使偕之軍所。卒痕跳挾一首至。云此黑苗酋某也。公詘之。黑苗酋某久著

勇。而此僅踰冠。必詐也。監軍不自得引去。俄而黑苗酋某復出抄掠。監軍乃前謝曰。公實得我。時官兵利級賞。多所縱殺。啓令生獲口與級同。自是全活者甚衆。岳亦遂賢啓。且欲薦啓大用。而以守紹興他事罷。前後四爲南北曹屬。守郡監司五。受其長知。而其長皆海內稱名臣碩佑。皆大賢啓。然不能勝其郡之要摺紳。與一二用事者。知者寃之。既歸築室仙人山。結詩社以自娛。快出入倪素。若不爲官者。其教子弟治經術。孝弟力田。斬斬有法。不輕出入公府。而使者干施以時至詢。卽爲露見利病。佐其守攤稅已。佐其令築城度行。而有私損。勿恤也。性孝義。急人之難。甚於己。常與計偕還。道遇其師盧生癘。傳其從者舟人皆舍之。啓與共載。旦夕謹視湯藥。未抵舍而愈。癘竟不染也。卒年七十八。至老視聽不衰。啓博學無所不窺。諸經子史陰陽律歷水利洪範紫微堪輿家言。而尤邃於易。所著有家居稿。南北稿。西臺諍稿。越吟稿。楚吟稿。雞窠嶺稿。南廠志。南船志。收越議。略吳江水利考。杜律七言註。晴窗便覽若干卷。

陳堯。字敬甫。南通州人。幼而穎異。就外塾。日誦千餘言。卽他兒所受書。耳之皆成誦。甫髫。工屬文。知通州。高鵬得其經生業。異之。已偕諸生試。文益奇。爲飯齋中。鵬問謂媪。有甯馨兒可念也。蒼頭出。囊語是且入見夫人。見必一叩首。堯怒叱之曰。唉。吾豈汝曹抑項人耶。鵬問而得其故。愈異之。撫曰。生自愛。必爲國器。弱冠舉於鄉。名聲驟起。然因公車者久之。顧於文益工。尋從呂拊游。反而求之。身心之間。純如也。成進士。隸事工部。時議爲獻皇帝立廟於大內。世世勿遷。部尙書以試堯。堯乃上議。謂禮緣情者也。而制於法。夫所謂勿遷者。德祖也。太祖成祖而三也。獻皇帝之世次。則孝宗也。其廟宜以孝宗祧。則亦祧而藏諸夾室。

俟大給則並出之。尙書弗能用。然心隨其議。授都水主事。當治清江廠。選部郎林春內賢。堯欲引以自近。而不得。堯既之任。有廉勤聲。好讀書。思以著述自見。其所論白。改鑿黃河之上游。避灌口以達清江。而沮於都御史。不果。後都御史檢故牘行之。世受河利。歷營繕郎中。時上方勇於宮室之事。無虛歲。而將作諸僚。且緣以博功賞。堯獨務爲節省。建沙河行宮。堯與一主事監之。主事欲徵商。堯爭之不可。乃曰。事畏相撓。請得分半而任之。堯所任獨不徵商。主事亦不敢征也。迨工畢。所省金錢以數十萬計。已復建大高玄殿。堯入視工籍。曰。何多也。汰其十之三。已又視工直籍。曰。又何多也。汰如之。所汰率多中官之私人。與虛直。度無如堯何。則更目堯曰。陳古人。陳古人云。所省又以數十萬計。工完。當上功籍。堯獨辭。尙書意甚恨之。比奏上。獨不遷。久之。擢知台州府。比至。掃去一切供億。所讞決以情。衷三尺而行。吏抱案堂。皇受成事。伍伯持挺。兩廡。惴惴。至日晏。不得一飽。然率以善滿去。竟堯任無訾。陬者。暇則延見諸儒。生講說經義。遇旱。禱雨。輒澍。歲獲稔。如是者屢。上治狀第一。而鄉貴臣中飛語。調知南安府。郡當嶺南孔道。香藥犀象之類。故守之市之。若讖稅者。堯併不復市。堯所領郡多佳山水。數從其賢士大夫游。以其不好飲。相與稱爲醒翁。作醒翁亭。以配宋歐陽修。堯亦因自號云。踰歲。轉長蘆轉運使。時鹽課歲不登。堯白其御史云。私鹽禁不厲。則亡鬻官鹽者。不爲官鹽利便。則驅而入私鹽。其要莫若嚴私而寬公。所謂嚴者。若而條。寬者若而條。御史是之。課驟增至萬餘。而商不病。居長蘆復五載。人意堯不能無望。堯笑曰。我何望爲。卽薄我。而以中大夫佐人主急哉。遷廣西右參政。二載。遷貴州按察使。時三殿災。所採木倚貴州。兵民不勝力。堯

爲更番之議。以紓其地。布政使用苛法採丹硃貢。都御史議開永甯銀池。堯皆力持之。三載。遷雲右南布政使。未上。移廣西左。其再至廣西也。吏民鼓舞相慶。時靖江宗人無慮千計。率童而祿於官。堯曰。天祿也。非朝命不可。他郡兵歲五百成會成。浸溢而倍者三。堯悉勒令如原數。諸降湖徙粵者世廩。已別子則以報效世半廩。已又其別子則又以報效世半廩。堯第令廩及身而已。所裁省帑賦。復以萬計。陞右副都御史。撫四川。嚴嵩以非其意。謂客曰。彼何人也。而亦蜀帥。堯聞之不爲動。旣而嵩以論罷六番。招討楊氏死。二子爭立。勢且用兵。堯曰。無庸也。移檄授其嫡長符。遂定。妄民相習爲白蓮教。至聚千人。有欲捕以爲功者。堯第致其首抵罪。衆皆解散。滇大會鳳繼祖跳之建昌。滇撫移文。欲堯擒之。堯曰。建昌去滇一水。而兵不渡。將嫁禍蜀也。急之則窮獸且挺。緩之一夫力耳。繼祖覘知堯亡他意。束身歸。其不貪功名。先大體。類如此。遷南京戶部右侍郎。未上。改工部。兼右僉都御史。總理河道。常議修高郵河隄。當用石。堯曰。石所從遠。而湖力薄。不至嚙多樹木。隔以板。而菱土實之。費率省半。又獨淮徐之河負三萬金。召爲刑都右侍郎。未代。而景恭王自楚返葬。輜重千艘。而漕艘復入之。黃河徙道者百二十里。堯憂之甚。選一大校探刁陽湖。得故漕道。舟自潰口入。轉而達湖陵。亡所失。堯旣得代。卽移疾歸。再請不允。轉左侍郎。請益力。許之。母尚在。生事死喪。邁恆常。堯天性孝友。嘗以餘俸置丙舍。負郭數頃。旣而念其仲冠叔完孺。悉畀之。冠有子大壯。成進士。完亦舉鄉貢。皆成立。堯他亡所好。顧獨好書。雖老持一卷不廢。有治河副使梁。巡鹽御史張。皆出堯門。每請所託。謝無有。則爲梁言通夫役苦。第寬之。可活數十百人命。爲張言通有鹽舍。而領真州。

鹽不便。任之可歲減民數千百緡。二人唯唯行之。鄉人皆感焉。堯後先持憲。以嫉惡聞。然嘗奏記大學士徐階曰。天之生大賢。大不肖。僅僅耳。卽中人影。而中人者。有志而未練。則見欺。有才而暴施。則見忌。此兩者。器使之近賢。苛責之近不肖。姑置而觀其後可也。階善之。卒賜祭葬。祀學宮。子大科成進士。爲河南府推官。文學政事有士風。

史官曰。張時徹按滇。能雪冤獄。帥蜀多戰功。所至有聲績。而粗牾不得竟其用。噲時筮仕吳令。卽赫赫裕治。辦聲條列東南財賦。可運諸掌。首劾嵩相。識躡辨姦矣。沈啓踔厲風發。應事明敏。獲上而不能諧。下負介志焉。陳堯著績水衡。通工惠商。其所省將作河隄金錢。以億計。皆優剗割之才。不束於流俗。有爲有守之臣也。詩云。或哲或謀。或肅或乂。諸臣有焉。

明書卷一百三十一

列傳四

名臣傳 十六

霍鑾李時傳

霍鑾字仲鳴。其先諸城人。永樂中籍爲錦衣校尉。遂籍錦衣。至鑾而始讀書。以孤童善屬文。正德中成進士。改翰林院庶吉士。授編修。預纂孝宗實錄成。當增秩。而閣瑾抑之。與其儕俱外遷。鑾得刑部主事。瑾誅。復舊官。滿九載。進侍讀。主應天試。世宗初。以選侍經筵。日講。鑾長身玉立。美音吐。工進止。上固已目屬之。預修武宗實錄成。進官。時侍讀學士董紀超爲詹事府詹事。而鑾得學士。雖以久資故。而大學士費宏欲拔以與張璠。桂萼。甫十日。而推南京吏部右侍郎。鑾以次復得之。上忽心動曰。是安可使之南。因罷弗用。再主順天試。擢禮部右侍郎。仍日講。上所以慰賜。往往同尚書。而會閣臣缺。命廷臣會推。上意欲用新貴人。顧所推皆耆碩。上弗悅也。命再推。始及鑾。上不得已用之。俾以吏部左侍郎兼學士。直內閣。首輔楊一清頗以鑾資淺疑。上報曰。用鑾於顧問。差得益耳。未幾。竟用張璠爲尚書。大學士出鑾。上久之賜鑾銀記。二。其文曰。清謹學士。曰繩愆弼違。侑以教諭。俾家封言事。時一清位高而輩前。璠幸用事。時有所陳啓。

變墨墨而已。上詰之。則曰。聖德無可獻替。上以是心易變。而變獨謹身自守。明倫大典成。進禮部尚書文淵閣大學士。又久之。始進武英殿。後至者。輒居鑾上。游加至保傅。鑾前後六年。故自如也。上建無逸殿於西內。命鑾與輔臣李時坐講。鑾講詩。豳風七月之章。賜宴賚。又賜縱遊苑中。使中官簪紅藥於帽。懸蜀扇於帶。俾賦詩稱謝。賜飛魚服。人以爲榮。尋內艱服除。而鑾家故貧。其在政府。不以苞苴名。既久。不召至。不能自給。上旋思之。而時議南狩。夏言當扈從。願鼎臣居守。上曰。北敵且伺間而動。奈何。鼎臣請廷推重臣。按行九邊。以兵威懾止敵。不應。已而曰。吾得之矣。翟鑾自內閣出。足稱重臣也。卽家起充行邊使。改兵部尚書。兼都察院右都御史。以往。賜璽書金帛。一切得便宜行事。總督鎮巡。皆聽約束。鑾乃齋內帑金二十餘萬。自宣府西巡至大同。益西入偏頭關。保德州。渡黃河。歷清水營。入榆林。仍自花馬池而西。抵甯夏。由莊浪涼州。越甘肅。盡西嘉峪關而止。還歷鄜延。取內道。出潼關。以東。撫保定。轉自遵化。永平。出山海關。至廣甯。還薊門。喜峰。燕河。太平。馬蘭諸鎮。所至。宣上威德。散金錢以資士。練兵保隘。其在宣大。則與總督尙書毛伯溫議築五堡。堡成。加太子少保。賜金幣。在喜峰。則與總督左都御史劉天和議。拓關。闢成。予一子官中書舍人。還復命。仍以禮部尙書武英殿大學士入內閣。上所以褒諭有加。再論邊斬級功。予世襲錦衣衛副千戶。鑾以輔臣出行邊。邊之文武大吏。咸囊鞶出迎。惴惴望顏色。鑾一切以寬和待之。遂至監司而上。皆盛供帳。酣飲。譴浪。至連日夕。蓋始而畏。中而悅。終而狎。且易之。歸橐皆盈。而清素之風衰矣。尋以二品滿六載。進太子太傅。賜玉帶蟒服。以陝西捷。加少保。安南下。賜金幣及俘奴。夏言既以忤旨歸。鑾

代爲首輔。進少傅。謹身殿大學士。滿三載。考授光祿大夫。柱國。鑾頗以溫厚回上意。上嘗怒言官奏事不實。鑾徐對曰。彼豈特許風聞故耶。爲之解。又嘗從容語邊將。鑾曰。邊將驍勇者多。所見無踰於周尙文。小過嚴耳。上曰。卿言之善。嚴固當以寬劑也。尙文果爲名將。常以所厚門生張惟一屬吏部尙書許瓚。欲調之選曹。爲瓚特奏。上兩不問。而爲之斥選部郎。以其誤許瓚也。鑾在內閣。前後垂一紀。居其上者。若楊一清之巧。張孚敬之強。夏言之倨。俱貴重有勢力。鑾皆以柔道承之。故得久自安。而其居首輔。則嚴高次之。其材謂藻飾皆遠出鑾上。又能以勤敏結上知。上所以謀授錫賚嵩者。時時越鑾而致塵。特以鑾用事久。不忍棄也。而鑾猶用故事持嵩。亡所遜避。嵩漸不懌。至鄉會試。而以其子中書舍人汝儉。太學生汝孝。連占高第。物情洶洶。嵩尤忌之。給事中王交等因而劾鑾。奏辨上大怒。會鑾不候處分。肆行擾瀆。屢以直無逸爲辭。嚮同夏言禁苑坐興罪止一人。全不知懼。以朕不早朝。並君行事。二子縱有軾轍才。豈宜分明並用。下部院參議。疏上因盡奪鑾官秩。併二子削籍爲編氓。旋以困厄死。年七十。穆宗初。其子疏請昭雪。詔復其官。諡文懿。予祭葬。而二子卒不得牽復。一子汝儉爲錦衣衛指揮僉事。

李時。字宗易。河間之任邱人。父檠舉進士。累官山東右參政。致仕。時生而端重沈默。有大人度。三十餘成進士。改翰林院庶吉士。授編修。與纂修孝宗實錄。兩同考會試。進侍讀。加俸一級。再進右春坊右諭德。仍兼侍讀。主武舉試。再主順天試。世宗初。侍經筵日講。同纂修武宗實錄。遷禮部右侍郎。修睿宗實錄。充副總裁。俄以母憂歸。服除。爲戶部右侍郎。復改禮部。轉左侍郎。遂拜尙書。時素以寬厚不立異同。得長者譽。

而上自講筵故已目屬之。既擇尙書。則上與少傅張孚敬相推明大禮。後則采用都給事中夏言議。大者如四郊分祀。而配太祖。出太宗。進獻帝。令皇后親蠶。裁定孔子廟祀。時奉行而已。度有所不可。則稍稍持諍。然亦不能堅。而上以其終長者。意安之。賜玉帶。尋以四郊告成。加太子太保。俄進武英殿大學士。入內閣。加少傅。孚敬方得罪歸。時入卽居首。召對文華殿。而見上諭以事天安民。修身講學。一切毋負簡委。裨益聖治。卽命充祀儀成典。大明會典總裁官。上於西苑建無逸殿。成而御之。賜時坐。命講周書無逸篇。大學士翟鑾講幽風之詩。談宴甚淡。且引見章聖皇太后。賜白金文綺。俄而孚敬復用。時居次。改兼吏部尙書。事孚敬甚謹。亦不敢有所抵牾。而孚敬意更不能容。如議孔廟及言宮馮恩獄。密疏譖時出異語。以微結物情。上亦不爲動。彗星見。條陳三事。曰務安靜。曰惜人材。曰慎刑罰。且請宥大禮大獄諸臣。報聞。上與孚敬務以刻核嚴切爲急。而時數用寬大調劑之。所救解不少。始時在禮部。上賜銀記一。其文曰忠敏安慎。至是真之閣中而失之。疏請罪。上弗問。特爲補鑄以賜。久之。加少保。册皇后爲大禮副使。上在位久。益明習政務。當召時與尙書夏言。從容品臚諸大臣材器皆精當。時歎伏以爲非所及。孚敬得請老。起故相費宏代之。甫兩月。宏復卒。於是時始居首。累賜飛魚蟒服麒麟服。上謁陵。命時等扈從。途次供張。一切出尙方。朝夕驟乘以備顧問。禮成回鑾。奉母后汎西湖。時與侯助尙書言鼓楫前導。復命汎舟西苑之太液。皇史巖成。加太子太傅。累朝訓錄成。加少傅。兼謹身殿大學士。九廟成。加太子太師。予一子尙寶司卿。尋進加華蓋殿大學士。昭聖旣以尊重失。上指而其弟延齡復犯大辟。章聖與並列。而恥爲之下。旣各居慈

慶慈甯二宮矣。而章聖病不豫。上忽諭時。以慈甯宮多不祥。欲奉居楚舊邸。歲時朝謁。時皇恐不知所謂。第云聖母違和。甯任遠道。皇上膺社稷重寄。豈宜遠出。凡持之者再三。而上始謂昭聖實爲巫蠱。且欲行大事。時益皇恐。不敢明所以。第云臣萬死不敢聞命。上亦止。常從上幸九龍池。有民婦號而訴其邑者。上震怒。欲逮令抵法。時諍曰。此風不可長也。令付所司核治。而當民婦犯罪。上許之。時爲相。於親故間有所庇徇。然最爲老成詳謹。以體肥不禁勞。得疾卒。年六十八。贈太傅。諡文康。子坦舉進士。爲光祿少卿。先卒。

史官曰。昔姚崇相。而盧懷慎每事推崇。遂有伴食之目。翟鑾李時。清鑒不及懷慎。才又遜之。而偕出偕入。皆一時才相。其不爲伴食者幾希矣。時有守多所救正。力拒昭聖之誣。兩宮宴然。時之隱德也。

景陽傳

景陽字伯時。少產揚之真州。尋徙居金陵。爲人器量宏雅。凝然負公輔之望。數歲時隨父官廣州。劉大夏見其文異之。曰。此國器也。正德戊辰舉進士第二人。授翰林院編修。時闔瑾亂政。挾勢凌轅朝士。見者靡不重足屏氣。其不爲阿者。陽及何瑋崔銑呂柟也。在館職。以不獲裨補時政。居恆深念。作自罰一篇。其詞曰。凡受職於天子。若臺閣省署。藩臬郡邑。以及百執事。咸有常職。晨興而夜畢。終日業業以從事也。尙慮其有遺若謬言者。不若是。曰不職。而有罰。罰且弗測。又不容以緩。而蒞是職者。必自責。自將於勤慎。所以補過也。雖至蹇劣。亦不敢不然。女雖職。天子近侍。在古六太之列。然史局不責以史事。經帷不責以進講。

既不得成啓沃開導之益。與磨研編削之功。而退復不束修自勵。而恬享大官之賜。美服而安坐。於心能自甯乎。古稱竊位。蓋近是也已。夫語弗慎。爲誇爲毀譽。爲誕爲凡近。爲詔爲易。爲詭爲誕。行已弗慎。爲矜爲貪。墨爲放縱。爲淫邪。爲率易。爲苟且。爲側媚。爲薄。居家弗慎。爲兄弟妻子。媵女。凌童僕。輿里。閉昏媾。女欺。而又弗勤於誦覽書史。精研義理。以博所見聞。則人將鄙之。而於自居亦甚卑矣。古人云。一事不知。儒者所恥。能無作乎。凡此皆女之職也。女欲自立於兩間。而不負天子顯用之意。能弗勤乎。莊子曰。適里者宿。春糧。適千里者三月聚糧。言不可不豫也。況女又將有臨事之責也。女能弗豫已乎。百司執事。皆有警罰。女縱不及於是。如百司執事。甯不愧於人。非鬼責乎。且又安能終保其不女及也。其刻意自勵如此。久之爲講官。當進講。必越宿齋沐。覬有所感悟。九年遷國子司業。以資當進侍讀。梁儲曰。成均爲多士範。非君不可。嗚曰。朝廷官人。敢自擇邪。於是六館諸生。人人以爲得師。二年請養而南。改左中允。管南京國子司業事。時南方士競便利。嗚於請託壹切謝不行。士習稍正。與諸生講解。寒暑不輟。典籍餽廩。私益以劑。後知之。歸其益。曰。吾雖貧。何相賊也。辛巳。以母憂去。甲申。服除。北上。行至眞州。病卒。易簣之地。卽其懸弧處也。人咸異之。嗚爲人篤於孝義。母目盲。萬方療之不愈。旦夕禱於神。一日雙瞳爛然。舊疾如失。人謂其孝感云。娣早寡。奉與母居。爲嫁娶其子女。使得所。友人張貢見嗚。女欲與婚。未聘也。貢尋卒。嗚哭曰。曩業心許之。忍負吾亡友乎。卒召其子妻之。居官清約過甚。不異布衣時。每升監乘一牝羸。蹠蹠行。旁觀者率不能堪。嗚自若。工文以意勝。恥事鉤棘。詩蕭散有致。嘗曰。詞貴達意。若以摹擬爲工。按古人之迹。尺尺

寸寸務求肖似。何以達吾意識。識者聽其言。所著有前谿集若干卷。

史官曰。賈生爲傅不得職。至哭泣以死。古人之不苟於其官如此。史秩近世視爲冷局。類以翫愒自放。而曠爲詞以自剋責。何其厚也。乃若處高爵膺任。略不以國安危爲念。而唯身家是營。聞曠之言。可以愧矣。

劉天和歐陽鐸傳

劉天和字養和。麻城人。少穎朗。十歲能屬文。十五從父進士璠。令豐城。命天和從楊廉談理學。因以古人期之。嘗告其父曰。此子資實可與進道。二十舉於鄉。天和爲人。長身玉立。顧盼偉神。三困公車。游太學。人爭友之。成正德三年。戊辰進士。授南京禮部主事。居二歲餘。會武宗誅閹瑾。於臺臣多所更置。天和以茂異徵。拜監察御史。出按陝西。前是鎮陝太監廖堂貪橫甚。而其弟鵬官錦衣。表裏爲奸。及天和當出。鵬候邸中。甚口肩脅。爲堂請一日歡。天和正色不之顧。既抵陝。首榜堂不法事於衢。飭諸司毋曲徇。而又縛其爪翼數人於獄。堂陽爲惴惴。請一切得自新。天和亦冀其貌悔。小寬之。而謗書則陰上矣。會癸酉監鄉試。事而鵬素奴事錢甯。從中道地。堂謗書誣天和。詔逮天和。既就繫。堂使所親信恫喝校卒。且啗之利。以求甘心焉。長安吏民萬餘人。慟哭擁車。車爲軼不得發。籲聲震地。壯者至拮挺求堂。欲捶殺啖其肉。堂恐杜門引避。咸甯民郭鎮等。竟死車下。堂遣親信尾天和行。欲醜以滅誣。而其豪張傑王倫數十人。相與嚙臂爲盟。護天和所過舍。傳必週視。食必先嘗。堂所遣尾者不得近。竟以免。入京下詔獄。幸臣甯入鵬。嗾考撫其罪不得。遂長繫。於是給事御史俱疏救出獄。謫金壇丞。十年乙亥進爲令。有治理聲。擢蘇州府同知。時

孝豐大盜湯毛九等倡亂。撫按檄天和往蕩平之。陞湖州知府。至湖則專禮一隱碩德耆。與謀政所當先。復折徵均耗賦。其民大悅。以擬前代湖守晉謝安石唐顏清臣宋文彥博。凡六載。世宗初。考績天下第一。晉山西按察司副使。督學校。以母老乞歸養。報聞。尋仍故官。督陝西學校。嘉靖六年丁亥。遷南太僕少卿。尋改太常卿。以其年爲都察院右僉都御史。督甘肅屯政。乃條所以當革者五。曰培剋。曰占役。曰湖場。曰派撥。曰侵漁。所以當興者五。曰開墾。曰墩堡。曰牛種。曰治水。曰屯兵。又備夷者四。曰回賊當處。曰海賊當防。曰零賊當勦。曰番賊當撫。疏上。以次報可行之。尋以母老請告。不許。改督諸邊糧餉。尋改撫陝西。天和前後凡三蒞陝。其一切利弊。晰若鏡燭。首疏鎮守中官當汰狀。罷之。因裁損守令不經於費者三十餘事。民又大悅。每出則其相指曰。此吾嚮者擁車公耶。何吾秦之多幸也。出師平洮泯。叛番四十二族。獲甲首三百。敵倍之。已又平湖店大盜。殲其魁。論功。賜白金文綺。已又平漢中妖賊。悉殲之。凡再乞休。侍養。俱不允。進右副都御史。仍撫陝西。十一年壬辰。內艱歸。喪毀踰禮。以祭葬請。許之。服闋。時會黃河驟南。徙歷濟而除。皆旁溢。不可以漕。乃起天和。以原官總理河道。比至。晨夜改舟車爲橈。探求盡得其利便。濬淤以故。導潰以新。疏汴河。自朱仙鎮至沛縣。飛雲橋。殺其下流。又疏山東七十二泉。自臯尼諸山達南旺河。濬其上流。役夫僅二萬。不淹時而河工就。天子嘉之。晉工部右侍郎。兼右僉都御史。仍其職。是多召入理部事。未受代。丙申。春。遷兵部左侍郎。兼右副都御史。總督陝西三邊軍務。至則申軍令。豐儲餼。廣埤塹。選鋒銳。飭甲械。士氣踴躍。思效。是年七破敵。明年丁酉。十一破敵。又明年己亥。又十一破敵。所上級多至二三。

百餘。少亦不下四五十。上以屢有功。推恩加右都御史。再加左都御史。其侍郎俱如故。進兵部尙書。則都御史如故。其金幣歲至三四賜。積幾數百千。己亥春。諜敵吉囊將大入。萃羣帥而誓之。大出賜金爲牛酒。嚮士陳二寶劍堂。指左劍曰。將不用命者。徇此。指右劍曰。卒不用命者。徇此。敵衆果大至。挾詐乘我帥醉。遂埤登焉。天和前已聞警。率所部夜行八十里。抵花馬池。卽故壘營之。敵錯愕不敢犯。引而西。天和召醉帥二。詰其狀。立斬以徇。衆皆股栗。遂奮躡敵。會天大雷雨。敵弓膠皆解。馬蹶蹶泥淖中。天和以所檄延綏兵搏其左。甯夏兵柱其右。固靖兵擊其鋒。親以大兵尾之。強弩火礮四合。敵遂大敗。走梟敵倉及強敵五百餘級。敵人畜器械無算。捷聞。天子行告廟。飲至禮。下書褒予甚篤。卽軍中策拜太子太保。予錦衣正千戶爲世官。賜金幣。踰等。尋加少保。改南京戶部尙書。亡何。入爲兵部尙書。督團營。時中官大將多所私。股膠其廩。以空名予營。天和力欲清之。而諸共事者。爲首鼠。臂螳以尼天和。天和鬱鬱不得志。會報敵將大入。天和日夜治軍不休。因以成瘁疾。敵去。因懇休。上督而許之。賜馳驛歸。歸四十四年乙巳十二月卒。贈少保。諡莊襄。遣官諭祭葬。天和賦性忠孝。歷官三十五載。修潔正。大家無長物。所著有聞水集。關陝奏議。安夏錄。督府奏疏若干卷。詩文多雅淡可觀。

歐陽鐸。字崇道。別號石江。秦和人。少穎卓。四歲能盡識雲臺二十八將名氏。六歲受經。輒成誦。十三工屬文。踰冠登鄉薦。明年成進士。自是力爲古文辭。而尤精治經史。曰。其退可褻身。而進則宰天下者。授行人。上書論時政。語剴切。報聞。尋使蜀。蜀王奇其貌。欲自結。厚遺金帛扇。鐸一無所受。曰。使事有職。不敢以

私拜王賜。歸下峽。舟束於盤渦。欲覆。衆叫號不已。鐸神色自若。徐命取器物投之。渦。殺其勢。而會風怒。泊舟於灘。以免。人自是服其器量。遷行人司副。陞工部員外郎。中時有鎮清江中官。假寇警。請得如江西故事督軍務。疏上。請。大臣皆茅靡。鐸時在郎署。乃獨持衡。大臣間曰。奈何無事而弄兵。以邊鄙我中土。而要節鉞。夫中土無大兵。節鉞不輕假。中官不當妄帥。勿聽便。大臣賴其強。乃已其事。鐸以便養乞南。得兵部武庫。戒藏吏懸隸直以待。至則給之。毋得先顯者。其顯者亦毋予羨。諸曹署甚稱之。時喬宇爲尙書賢。鐸至引以自副。每語輒達丙夜。曰。吾老矣。固當讓歐君也。出爲延平知府。鐸思所以易其俗。首下令禁黷祀。淫祠。故數百十所悉撤。以其材葺學宮。里社。建李侗祠。館諸儒生。文治彬彬矣。禁死者毋久匿弗葬。葬毋張宴。毋得爲佛會。民翕然從之。司禮太監蕭敬其隸民。外謬爲其謹。而羣從子弟多丞郎。緹帥諸舍人。子。里居暴橫。時強買民田而遺其賦。列肆櫛比。侵官道。至不能方軌。民苦賦。爭徙竄。鐸歸賦於蕭黨。曰。奈何重困吾民也。已。又正官道。界。斬其餘椽。曰。復爾。我盡役而肆矣。已。又得蕭氏奴殺人狀。立決。毋所縱。舍人子憤。跳之。敬所讒之。敬大恨。曰。今乃魚肉我。一旦失上意。吾無歸地矣。謀中以危法。將爲緹騎。速。吏尙書陸完微聞。惜其才。舉堦繁劇。改調福州。鐸嘆曰。彼亦有大璫在。將寘我穿也。竟投劾歸。部固檄鐸上。及上而鎮。福太監尙銘。果盛氣以待。曰。蕭公誠貴人。無奈桑梓何。吾而帥也。鐸不顧。裁減其橫需。且半。郡有祭當頒胙。故事益市肉。肉且及其客咸徧。勿爲市肉。肉亦不及客。銘恚。使隸委肉郡庭而去。鐸陽喜。謂諸吏曰。尙公毋以若相禮而勞苦耶。趣分肉。詣謝。銘益不自得。會迎春。鐸又削其宴劇。銘益恚。因謁次庭。詰之。

鐸不爲動。銘至出僭諄語。鐸徐拱手曰。公以臣子忍爲是言。卽上聞。得無不可耶。遂趨出。而城中士大夫爲鐸陰鳴。銘客曰。府君盡得而奸私矣。已則曰。吏民爲府君持若錄而橐矣。客大懼。語銘以解。而鐸益自厲爲苦節。寬省刑役。牧養小民。肺石之鏤。不以自供。皆備庾賑。至絕一切會費。銘廉得治狀。自愧服。舉治行第一。嘉靖二年癸未入覲。賜綵幣羊酒。明年擢廣東副使。督學政。滿三載。陞雲南右參政。未上。召爲太常少卿。是時世宗方有事禮樂。議建南北郊。改太祖之舊。下羣臣議。咸唯唯。而鐸獨以時誦未可報。大爲人望所屬。遷南京光祿寺卿。上六事。皆爲官節省。搜乾沒。稽出入。上嘉納之。著爲令。尋以繼母憂歸。服除。卽家拜南京左副都御史。督操江。兼佐院事。會服以外艱不果上。服除。召補前職。未幾改撫應天十郡。督糧儲。恆謂吾不虞他郡。獨虞蘇蘇。以一郡漕餉天下半。卽不給奈何。厥田雖上下。伯季也。季畝僅五升。而伯至十五倍之。是驅而蕪也。於是議均法。請於上。比其最重與最下者。而稍損益之。重而不能盡損者。爲遞減耗米。派輕齋折除之。以陰見輕。輕不能益者。爲徵本色。遞增耗米加乘之。以陰見重。諸推收田者。從圩不從戶。田爲母。人爲子。奸巧無所容。逃竄漸復。而鐸又令民歲以田出緡錢僱役。毋得仍十年舊。裁省郵置濫費。定收納。凡數十百條。推行之無害。民大悅。時顧鼎臣居政府。以書貽之曰。公行法而吾家增賦千石。然爲百貧家家減十石。鐸惠政於十郡。非一而獨於蘇著。又獨於田賦著。是時章聖皇太后梓宮祔顯陵。道經所治。鐸第嚴飭守令將佐。儲糗糒。除戎器。廣游徼。毋令梓宮有他而已。問所以待山陵使者。鐸曰。使非徹侯中貴人耶。此有司事。非吾任也。旣事竣。所經由撫臣以次受賞。山陵使獨劾其不飭。時旣已。

遷南京兵部左侍郎。猶奪俸。上雖以山陵使言奪俸。而所遣調者。交得其治狀以聞。上心器之。亡何。吏部闕右侍郎。以應補者請。不應。凡再請。再不應。而特用鐸。其入佐吏部。當考察。鐸佐其長。務以精核行之。不阻勢。不修伎。其斥謫以否。不以毀人。皆服之。九廟災。大臣當乞休。鐸引老乞歸。上以其不老而僞老。怒許之。明日。卽束裝辭。就道。人謂公姑緩。上姑怒。行且召矣。謝曰。去弗敢留。召弗敢稽。人臣節也。彼知我者。以我爲恭。不知我者。以我爲黷。及歸。卜武溪之勝。構盱武草堂。讀書杯咏其中。甚樂也。可二年。所有薦者。累二十餘疏。鐸不動。已而寢疾。箕坐瞑目。不語而卒。卒之前十日。有光起盱武。若落星。越禾蜀江而墜。故居年五十八。

史官曰。當世廟時。人主雖端居玄室。而能親裁章奏。烹阿封墨。不予左右以權。故劉天和不死於廖堂之手。而歐陽鐸得伸其志於鎮閩之二豎。良以威福不測。有以懼其心也。天和著功西邊。士畏民懷。咸樂爲之用。如廉頗之用趙人矣。歐陽撫吳。吳至今思之。守其賦法不變。雖田疇之歌。何以尙諸。

徐階傳

徐階。字子升。華亭人。嘉靖元年壬午。舉於鄉。明年。賜進士第三人。授編修。會張璁議撤孔子像。下儒臣問狀。衆莫敢持異。階條具三不必。五不可狀。上以不奉詔罪之。謫延平推官。至則毀淫祠。剔社學。清久繫獄。囚。以文致入者。咸得平反。盜阻尤溪爲亂。監司以屬階。乃設方略。窮其窟穴。旬日而獲。其渠帥。并餘黨百二十人。滿三載。遷黃州府同知。未任。擢浙江僉事。督學政。又三載。陞副使。改督江西學政。會皇太子出閣。

選宮寮入爲司經局洗馬兼侍讀久之進祭酒爲籍籍諸生淑慝月朔廷誦之以吉服受淑籍素服受惡籍然有曖昧失者多務覆蓋之諸生以故人人感激相戒勉擢禮部右侍郎尋轉吏部故事吏部官率鑿門示重階以爲不能盡人才破例延訪無倦署部事所推轂多愿厚長者抑刻深僂捷者之人嘗大計所貶退能以爲定天下翕然賢稱未幾兼學士掌院事尋擢禮部尙書莊敬皇太子薨階議喪禮稱上旨上察其慎勤召直無逸殿階遂累請立皇太子不報二十九年庚戌敵薄都城中外震恐階請出戴綸李珍於獄復其官俾敵懷自效又密言敵間潛入請上還大內備非常上雖難於還而心念其忠會中涓陷敵歸爲敵乞貢上幸便殿問羣臣階曰賊深入不許激怒許則操左券以責我臣請計緩之上曰何指階曰遣辨士風諭以無文故且徵其情實實則令聽命於甌脫爲外臣通貢市往返少日我備完而兵益集敵且退不退從而拒之其勢必得所欲上稱善因請上視朝會廷臣議廷臣皆言貢非敵始意許之愈一小快耳而墮軍威長敵志不可居數日勤王兵集敵亦退時肅豹以副使坐法戍豹會令寧亭階悉其才曰欲威敵非豹不可即日薦起行伍爲都御史階上言延安卒善戰而雲中卒善謀宜各用所長上從之時以朵顏三衛爲敵耳目請顯責之階謂三衛導敵有其情而無其迹罪之不可置之不可不若責以扞圍失職使彼易受而後撫之上以爲然自是言便宜者率密諮之寢益任用吏尙書缺廷推階上曰階素內直奈何中道而棄之外乎亡何孝烈耐廟之議起初孝烈方皇后自九嬪冊立庚子宮闈之變有翊護功上德之旣崩一日上忽諭禮部議祧仁宗而以孝烈主耐廟階言女后不宜先入廟宜祀之奉先

殿別室。上盛怒。趣再議。階不得已。遜言曰。祧廟乃聖子神孫事。臣子之心。何忍煩上親議。無已。宜做古廟數遞加之。益太廟奉先殿各一室。令仁宗緩祧。而后先祔。或可。上不許。竟祧仁宗。祔孝烈。然天下皆隨階議。未幾加少保。兼東閣大學士。上欲罷入衛卒。階言其非計。又請汰營兵老弱者。而取其餉。以充賞。贊倡勇敢。皆見納。一品滿三載。進柱國。太子太傅。癸丑主會試。時倭亂東南。上疏謂將校主戰。而守令主守。今將校北。輒用軍興法。而守令無恙。及城潰矣。復坐將校死。而僅左降守令。是文武異刑。而法不一也。民進止視守令。不視將帥。今兵一而民百。奈何以戰守併責將帥。將校履肝肺以死。而文吏持口舌以制。難以責其振矣。夫守令勤則餉峙。具守令果則哨探嚴。守令警則間不容。守令仁則兵必力。臣以爲重責守令可也。又疏請罷浙江撫臣與更江南督臣。皆報許。階念敵盜邊。士不得田畜。宣大米麥買無所得。而戍卒月餉七銀。僅易粟二斗。時畿甸二麥熟。石止直四銀。可及時收買數十萬石。石費五銀。可出居庸抵宣府。費八銀。可出紫荆抵大同。大約合計之。費中金一兩。而飽士卒一月。其地米麥價且漸平。上如其言。給事中吳時來。刑部主事董傳策。張翀。極論嚴嵩罪狀。嵩念階於吳。張俱座師。而董又鄉人。於上前具道本旨。所以爲者。上下三人於獄。拷掠無所得。三人遠戍。階獲解。尋加太子太師。嚴嵩所以危者百端。無如之何。會上所居西苑永壽宮災。徙居玉熙宮。隘甚。階朝夕旁皇曰。此豈至尊居。乃請掄三殿餘材。營之。數旬而宮成。更名萬壽宮。進少師。時嵩奸益露。上久察階忠。密札諮問。交午階所。辭及嵩矣。居無何。御史鄒應龍疏論嵩父子不法。上勒嵩致仕。下其子世蕃獄。戍之。擢應龍五品京職。上雖退嵩而心憐之。忽忽不樂。手

諭階。欲傳嗣。令擬詔。階謝不敢。部奏陞應龍通政參議。上忽切責部臣。以應龍爲邪。不宜官。階力陳。亦忤弗責。輟嵩直廬。賜階。階旣首揆。盡反嵩政。務收人心。用物望。嚴杜筐篋。天下翕然想望風采。初嵩在事。操權自利。六卿皆束手。階盡謝卻之。或謂非宰相體。階曰。夫操表嚶以希望者。而亦負舂荷錘耶。前是奏功。率賫閣臣。階以爲不稼取禾。無以示勸。自是報捷不復與賞。匠頭徐杲有殊寵。上欲崇以宮保。階力持祖宗無是法。無啓倖端。上默然。十五年滿。加上柱國。固辭。階小疾。上親爲調藥。溫諭諄切。方士熊顯等進長生藥。階力言不可餌。又問階比日。何以不下。階謂此曹持紫姑術。嘗得於衆口。而託之神語。未宜深信。上由此稍怠厭。方士語矣。北敵由牆子嶺入犯通州。報至。兵尙書楊博以上方有行宮祠。釐不敢奏。而使宜令關門戒嚴。敵阻白河水。掠香河。階請亟先備順義。而以奇兵徼之。古北口。敵果走。順義不能入。出古北口。遇伏兵敗。上創恨博不早計。博危懼。階從容言。博悉兵情。盡力於官。上姑解階。以張家灣當天下委輸。請出光祿羨金三萬城之。設一裨將。始爲重鎮。穆宗在裕邸。而景王未之國。愛幸日異。奸人謀欲更樹階。力稱引古今。調護萬端。景王卒就國。異議旋息。上下制建寧壇。及更興都故宮殿。階第以藏匿爲言。工遂已。天下鹽額。淮揚最重。歲賦六十餘萬。嵩當國。令都御史鄒懋卿出經理。搜積羨得百萬。以爲功。遂著額。額不登。商多亡匿。急則雖經。階請仍其舊。流徙登復。而額盡登。海瑞上書斥乘輿。上甚。逮詔獄。欲殺之。階疏言。草野倨侮。然不過仰恃聖明。以死活直名耳。不如置之。則彼計失。而聖德益廣。瑞獲免。上久疾。欲幸興都。階力言不可。至上崩。穆宗卽位。階推先帝意。罷齋醮土木。復諫諍得罪諸臣。舉士有節行。及恬

退久廢者。所草登極詔。率率急民利。天下大悅。階明習典制。中外倚重。上欲幸故邸。力言祖宗時。非郊祀。幸學耕藉。駕不出。今諸大典未一行。而先幸故邸可乎。上雖不輟幸。而以頃刻歸亡何。御史齊康受高拱旨力詆階。乃引咎乞休。於是九卿大臣皆爲之辯雪。而臺諫因劾康及拱。拱竟去位。康以遠謫。而階少安。時有中旨。令館臣撰中秋致語。階爲先帝新棄羣臣。非宴樂時。臣不敢奉詔。上爲罷宴。上謁陵甫至齋宮。使中官以意問曰。祀在明日。欲輕騎一出。觀形勝可乎。階曰。上以祀來乎。以觀形勝來乎。以祀來則先游而後祀。非所以展孝思也。上悅。祀畢始出觀。上欲以大監李用等分監營兵。又命修內教場。勒中官習騎射。階持甚力。乃止。一品九年再滿。力求去。詔留慰。加伯爵俸。固辭。久之乃視事。上數幸南海子。階諫不聽。又與中使李芳忤。遂稱疾不出。御史張齋因劾階奸利六事。階再疏辭。尤之。還里杜門自守。而高拱再起。以舊事銜階。拱知交爲吳監司。郡守者皆伺階。凡與階有睚眦怨者。皆乘是侵之。會拱爲張居正。薦保所逐。階獲免。萬歷二年甲戌。孫元春舉進士。每戒之曰。無兢之地。可以遠忌。無恩之身。可以遠謗。咸謂名言。十年壬午。年八十。神宗使使存問。賜諭優渥。階材而好學。少從菟豹切磋。理道後與歐陽德輩推明王守仁良知之旨。相爲磨淬。獨勵躬行。以抒經濟。生平不置姬媵。不爲臺榭之飾。友弟惇讓。肫肫無僞。田宅錄。輒以推弟姪。十一年癸未。閏二月卒。年八十一。贈太師。諡文貞。所著有世經堂集二十六卷。爲文有根抵。嚴於法度。

史官曰。徐階事逆鱗之君。且與奸相伍。而能謹身近主。納約自厲。不府權。不斂怨。善處大事。克厭衆心。故

前有嵩而不能螫。後有拱而莫之勝也。然拱賢者何以相厄。蓋嵩驕而階慎。拱直而階婉。薰蕕也。方員也。皆不可同器者也。休休有容。自古難之矣。

胡松傳

胡松字汝茂。潞州人。幼卽嗜學。家窳無所得異籍。則傍借抄讀。更輯古名臣奏疏諦觀之。喟然歎曰。經理天下者。不當如是耶。少卽負聲譽。嘉靖七年戊子。領鄉薦第一。己丑成進士。授東平知州。秩滿遷南京兵部員外郎。改禮部。進郎中。陞湖廣參議。山西督學副使。進參政。以言事指斥權貴得罪。家居者十餘年。後用言者薦。再起爲陝西參政。尋轉浙江按察使。進右布政使。轉江西左。擢爲右副都御史。巡撫江西。陞兵部左侍郎。改吏部。陞南京兵部尙書。尋以吏部尙書召入。方其爲州時。州有巨豪劇寇。前守累不能收捕。設法擒殪之。民有訟。必先諭之以理。不得已方置於法。故民莫不愛其惠。而畏其威。至構祠祀松。在留都時。以部員充職。稍有餘暇。卽聚經史。求微詞奧旨。參稽考互。必浹洽曉暢而後已。且曰。爲學如儲積。旣多。水旱盜賊。應用將不竭矣。及在湖藩。職糧餉。值湖北叛。苗鎮寧之變。松紆籌策。親履行陣。遂致蕩平。捷聞。特降璽書慰勞。賜白金綵幣。其督學山西時。松樹風聲。明經術。將以儲實材。爲天下用。而士類亦彬彬然。嚮風。會士會入南地抄掠。民倉卒奔避太原。太原城堅。閉弗納。松憤然曰。是非我赤子耶。若何弗納。弗納其奚要守爲。守將懼。遽納民。民賴以全活甚衆。於是松遂上疏曰。敵之敢於深入者。以邊將暗懦。失於先機故也。賞罰不得當。功罪不時審。奸豪潛入。外地爲嚮道而莫之察。帥臣隱挫。覲冒以捷聞。而弗之究。則

備禦何由嚴而寇安得不深入竊爲國家憂之謹上便宜十二事曰懲苟玩曰堅障塹曰懷搆貳曰蓄孽救曰慎任使曰利器具曰廣間諜曰清耗橐曰嚴備禦曰核屯戍曰預積貯曰撫傷痍聲譽數千言皆切中邊計要害上可其奏擢參政協守鴈關上嘗語侍臣曰胡松可大用松以文臣一旦起言邊事人多忌之而疏中語頗侵當時用事者以故得罪去松家居築娛老堂奉二親別構尙友堂聚天下諸書讀之又曰是文耳曷若偕一二同志遊東南歷覽形勝當有脫悟處時松同年友羅洪先唐順之亦以言事廢二人並有志學古者與俱入宜興山中盤桓究解而松之神情脫然也當是時言者以邊才薦松乃起陝西駐平涼條數十百事若嚴保甲均賦稅選伉健置常平大都可爲經久計者其在浙將吏多散軍食傳峙松案發之賊巨萬人心肅然其撫江西適流賊豕突殺長吏松受命卽率浙兵千餘人倍道出賊不意悉殲之因議曰豫章爲閩廣下流當受其衝莫若其要地增置城濠屯戍守先事而待之復減租稅理冤獄舉賢良黜貪墨民得蘇息始廣西賊帥張連者黠慧獷獮爲諸酋長其巢穴連諸洞寨驅羣蠻時出寇抄諸郡苦之諸路討之數歲不能克至是悉平蓋松之力居多云松勳隆望重不數遷爲吏尙書天下望松大用而竟卒松於書靡所不讀然得其精意大義皆可見之施行故事輒應不假旁求探索如武庫之儲百器畢具唯其所用爲文出入班馬其大旨本之程朱體格嚴峻有奏疏書記傳志詩文若干卷

史官曰 闕

明書卷一百三十二

列傳四

名臣傳 十七

陳其學傳

陳其學少聰慧。博文強記。嘉靖甲辰進士。授行人。沈靜自守。丁未選御史。彈緹帥陸炳擅作威。縱諸校乘傳驛自立錢法。禁切民間。至於罷市。又使私人徐某結京山侯崔元擅鹽利。有詔下徐某獄。責炳元各對狀。事雖得釋。而權奸凜然敬懼之。戊申按兩淮鹽法。增通泰之堰。清過淮之稅。減餘鹽價值。劾總兵及內臣容盜侵擾。疏呂梁洪夫額之濫。及河漕大臣遷轉之非。詔皆允之。庚戌陞陝西僉事。轉榆林參議。五載。悉心兵防邊境。以安備兵肅州。時哈密諸夷爲亂。出嘉峪關三百里。直抵墩煌。防其猖獗。久之陞本省參政。守花馬池。陞山西按察使。晉僉都撫大同。會俺答兀慎入犯左衛。督將軍劉漢等破走之。癸亥進副都撫山西。適大虜入中部洛川等處。率參將孟鸞戰捷。先是韓藩歲祿已六萬。而宗室日繁。漸增至十二萬。歲額不及其半。積逋且六十萬。至是奉國將軍融燻等百四十人至會城大譟。檄藩司借帑金四萬七千分給之。又疏請留贓罰鹽鈔年例課稅諸銀。以賑其急。并列其狀。得旨悉如議。廢融燻爲庶人。燻不受詔。

逐逮者。且執平涼知府祁天錫。毆之。百姓恆擾。兢言諸王子反。徐戡定正法。尋以本官總南京糧儲。請本折兼收。民尤稱便。陞戶部侍郎。改兵部左總陝西軍務。考績。陞右都總督。如故。敵大舉犯花馬池。禦之。斬獲頗多。會別部有所亡。失歸待勘。事白。卽以原官總宣大。逆人邱福等入犯。宏賜堡。趙總兵迎戰。敗之。斬首一百七十八。召理戎政。復陞南刑部尚書。尋致仕。久在邊。習敵情偽。戰守相資。多所斬獲。歸家。壯大忠詞。以祀忠節爲風勵。市田以周學校。屢薦。加賜存問。萬曆甲戌卒。年八十餘。諡恭靖。子琛。官至知府。史官曰。闕。

劉自強傳

劉自強。字體乾。浙人。中嘉靖甲辰進士。授廣平推官。陞吏部主事。歷員外郎。忤嚴世蕃。已遷太僕少卿。猶出爲陝西參議。晉山西副使。營卒王慶乘夜爲變。城中大駭。知慶有嬖妾。選勇士伏旁舍。待詰旦。慶來搆。擊輒斬其首以殉。餘黨瓦解。遷陝西參政。進按察使。大旱。一城亡所得水。相廩舍旁鑿之。泉源涌出。居人神之。名劉公泉。進湖廣右布政。轉左。歲饑。賑饑。全活甚衆。四十三年甲子。遷應天府尹。一尚書以事。囑怒擊其隸人治之。尋進右副都御史。撫四川。寇黃中負險。驚會湖湘兵討之。時妖人蔡伯貫乘間。嘯聚敵掠。自強曰。黃中大鼠耳。封而守之。可立斃。伯貫出押虎也。可急擊勿失。輒移師攻伯貫。一鼓殲之。還兵向中。所據牛欄坪險絕。斬木爲雲梯。陽攻之。而微察山旁側。有少罅。督甲士夜銜枚上。鉦鼓并作。呼聲震巖谷。賊悉降。捷聞。賜金綺。拜戶部侍郎。總督倉場。隆慶二年戊辰。轉右都掌南院。進南戶部尚書。再改南兵部。

參留務庚午入爲刑部尚書奉詔疏薦侍郎趙貞吉布政使曹金荊州知府趙賢郎中呂霍孫應元後皆爲名卿萬歷初累疏乞歸許之自強內行甚備請均田議增城蠲重役定水禍爲德於鄉甚多萬歷十年卒年七十五賜祭葬子懋武以廕爲徵江知府

史官曰闕

夏言傳

夏言字公謹號桂洲貴溪人性警敏能屬文尤長於筆札少奕奕有儔聲舉進士授行人擢給事中奉詔覈斥錦衣冒濫官屬三千二百出按皇莊侵占農地二萬餘頃糾中官趙彬建昌侯張延齡前後七疏皆報可轉右給事中疏請杜內臣傳乞救知府郭九皋等緹逮及請慎出入以嚴政體及論邢福海等不當以傳奉陞皆謬謬爲人所傳誦內艱服除守故官尋轉左遂進兵科都給事中時山西劇盜陳卿糾衆據青羊山爲亂朝廷大發諸鎮兵討平之而所遣將臣以下久爭功不決且有因而爲利者言發其事遂命往覆勘次第功罪皆當時兵部廷擢左都御史王憲出行邊禦敵憲有難色言劾罷之而上實心器言會吏科都缺故事當以左序遷特旨移言長吏科言以是益自負時上方幸張孚敬等相與推明宗祀禮樂之事言謂農桑天下本今人主旣親耕籍田而后不親蠶非所以昭陰教示婦職也因上皇后親蠶疏上大悅報旨稱美而南北郊之議起太祖初卽位爲園丘於南郊以祀天爲方澤於北郊以祀地行之未幾而合之恆以元正之後三日致祭因大享羣臣蓋頗用漢唐故事上與孚敬密議不以爲善孚敬微泄之

言乃上疏。謂當以冬至祭天於南郊之圓丘。以夏至祭地於北郊之方澤。而引周禮及高皇帝初即位詔爲據。而謂漢唐以爲不足法。上益大悅。下禮官會羣臣議。有謂以高帝二百年之定制爲不當輕易者。有謂工鉅而財詘。不當輕舉者。有謂夏至前而冬至後。於天尊地卑不稱者。上乃召言見便殿。賜璽書褒獎。與四品服。欲以風厲羣臣。而卒莫之應。詹事霍韜辨論益切。至貽書切責言。指以爲奸邪。言悲繳其書上之。因遂劾韜五罪。上怒甚。絀韜下臺獄。上不欲太宗與太祖並配天。與孚敬議。以太祖配天。而太宗祀大享殿。如古明堂。以配上帝。孚敬意難之。下羣臣議。亦莫之應。而言復伸上指。攷古禮以請。上又益大悅。以祀典成。特進翰林院侍讀學士。仍兼都給事中。侍經筵日講。賜金飾花犀帶。視尙書。言常薦左僉都御史李如圭。以右副都御史出賑濟陝西。於是僉都缺。廷推言與諭德彭澤。上遲徊久之。而御史熊爵謂言出如圭以爲己地。言亦辭。上乃勉慰言。俾食四品俸。澤以孚敬力復超爲太常卿。言恨孚敬不已。薦而右彭澤。銜之。且覘上意。雅不欲大臣太專。乃露章論孚敬與吏部尙書方獻夫有所好惡。彭澤奸邪。不當驟遷。上雖爲兩解。而孚敬與澤亦遂惡言矣。上以四時祀太廟。奉太祖爲始祖。居中。而太宗下皆東西相鄉。至大裕。則以太祖之四世祖德祖居中。而懿熙仁三世皆合。而太祖屈居五。至是欲舉禘祭。大雩。秋報之禮。下羣臣議。言以爲禘者禘也。謂禘其所自出之帝也。德祖旣爲太祖之始祖。豈可復爲始祖所自出之帝乎。請虛其位。而加隆稱焉。仍以太祖配。中允廖道南則謂朱氏爲顯頊裔。宜禘顯頊。輔臣孚敬會羣僚議。東閣倡言曰。請虛位者失之無尊。顯頊者失之遠。宜仍禘德祖便。言復上書諍之。上雖意未決。而心是言。

旋進詹事府少詹事兼翰林院學士言眉目疎朗美鬚髯大音聲不操楚語上故已才言至進講愈日屬之既顯與孚敬異孚敬恨乃因行人司正薛侃之疏用彭澤計而傾之卒不勝語見孚敬傳言出獄月餘遂進禮部左侍郎學士如故掌院事未幾管禮部尚書與李時並召對所以褻勉獨有加時朝臣多與孚敬仇謂言能抗之而言既以開敏結上知又折節下士時有御史喻希禮上疏謂祈求祀不在祠醮而在行仁政因請宥大禮大獄得罪諸臣御史石金亦言之且謂人才用舍政事張弛一切付之廷論而陛下恭默凝神提挈綱領使其真精內蘊根本固則蠡斯之慶自集上疑其有所譏諷大怒下書數百言苛責之命言叅究毋得黨護言謂希禮金所奏內稱宥罪可逆天休是但常情福利之說養心不貴勤察則啓人君怠逸之漸論事迂疎罪實難追第原其本意似亦無他乞優容上益怒切言位列大臣黨護逮希禮金於詔獄譎荒傲及言謝罪弗罪也以是言益得公卿間聲御史馮恩嘗有疏品第三公九卿長佐多所不滿而獨稱言救時宰相上既以制作禮樂自任多所更易言爲禮尙書所建白多當上意欲驟貴之其委寄與閣臣埒賜銀記曰學博才優俾得密封言事未滿考以督南郊特加太子太保尋加少保督建皇史巖加兼太子太傅重書寶訓實錄成進少傅再以監建宗廟工成加兼太子太師前後錫賚御書繡蟒飛魚麒麟玉帶兼金尊珍饌時鮮之類無虛月爲之釋先成籍有所陳乞亡不立得而是時霍韜起家吏部左侍郎以舊郟中言莫能間也會順天尹劉淑相與言之狎戚費完不相善坐奸人所中下獄疑言庇其客而主之因上書訐言罪上怒不聽言亦疑韜主之謂淑相與韜謁陵歸縱飲九龍池爲不敬而韜時

已轉爲南京禮部尙書矣。乃上書論言。以朦朧爲故少師費宏請諡得文憲。且滅緊關情節。當死。言亦訐。輅大罪十餘條。幾於訟師巷口。上兩不問。鐫輅俸一秩以謝言。輅至南京復攻之。上亦不深責。而言氣乃驕。皇子生。言入對。上喜甚。手簪花於帽。侑以白金文幣甚渥。遂兼武英殿大學士。入內閣。是時李時居首輔。而上所以委寄之。不能如言重。一切禮文之事。皆以屬言。賞亦稱是。言氣益驕。漸褻視八座。嘗從上謁陵。駐沙河。言庖中火。延武定侯及大學士時行帳燬。而上別授言廷臣六疏。亦從燬。言與二臣合辭請罪。上俱弗問。而獨責言當特疏。而今者不特疏。爲屬不敬。言惶恐乞休。上勉留之。時獻皇帝已崇爲皇考別廟矣。通州同知豐坊。小人也。上疏請復古禮。建明堂。加尊獻皇帝廟號。稱宗以配帝。惟下禮部議。尙書嵩議以功則太宗親則獻帝。以配帝惟上裁。而不敢任稱宗。上不悅。令再議。戶部左侍郎唐胥爭之力。褫其官。於是嵩懼如上命。獻帝遂稱睿宗。入太廟。言亦莫能持也。尋以滿六年考。錄一子中書舍人。李時卒。言居首尋。以祗薦皇天上帝奉冊勞。言加特進光祿大夫。上柱國。少師。餘如故。上柱國於人臣未有加者。加之自言始。時顧鼎臣亦加少保。太子太傅。禮部尙書。武英殿大學士。鼎臣於言爲先達。長且十歲。言躋貴至師。傅先大拜。踰二歲。而鼎臣繼之。意不肯相下。事有所可否。言內不能善也。尋上以章聖皇太皇祔葬顯陵。躬行謁視。言與翊國公勛俱扈從。而鼎臣同留守。其委寄特重。因賜言助鼎臣蟒服。玉帶。白金綵幣。郭勛者。故武定侯也。善孚敬。孚敬左右之。得幸上。至貴重。封上公。數上書論劾大臣。無不立應。與言爭寵而妒。上至承天謁陵畢。嵩請率羣臣賀表。上問之言。謂宜俟回鑾至京而後舉。上乃報罷。殊不悅。嵩得其

指。乃固請賀。上答詔以賀非卿等誠言所謂方是。第禮樂自上出。賀亦可。言數與所親厚大臣宴遊竟日。上間有宣諭。獨助在。賞賚稍厚於言。以是益驕恣。數侵言。言亦強應之。言既小失。上指會上。幸大峪山。閱視永陵工。言進居守。敕遲。上怒責言。因勒令上其前後所賜銀記璽書手札。言懼謝罪。固請上所賜不吐。上愈疑其有所毀損。落勳階少師。以少保尚書大學士致仕。言乃檢十年中璽書手札四百餘通。并銀記上之。辭行。上怒解遣中官止之。復少傅太子太傅。仍故官言入朝。具疏謝。上勉益勵初忠。盡心匡輔。秉公持正。不惟副朕簡任。亦免中怨。復疏謝。謂自處不敢後於他人。唯一志孤立。爲衆所忌。上不悅。詰責之。乃一其疏中洗改字。言皇恐引罪。亡何。雷震奉先殿。召言與大學士鼎臣往視震所。不時至。上復不悅。命禮部札之。言等復請罪。上曰。朕所數寬言。非爲言爲左右誼重也。言乃滋情成性。蔑不知警。何以表率百僚。鼎臣亦相效。尤耶。念其知罪。姑宥之。尚書霍韜入掌詹事府。數面詰言。而郭助喜其得助。益橫。時有訓導蕭時芳者。疏言三臣皆中興元佐。同功一體。而外議沸騰。心迹未白。非國家福。宜賜之坐。以杯酒釋其心。御史舒鵬翼亦有言。上俱不聽。而訓導罷爲民。御史坐譴。言又上疏乞骸骨。謂位高則怨。尤易集官。久則過失自多。咎積而不悟。則謗日聞。身危而不避。則過將大。上勉曰。勿負朕心。還言所賜銀印及璽書手札。會陝西三邊大捷。推功言。復助階及少師。太子太師。仍進吏部尚書。華蓋殿大學士。江淮寇平。復推功言。賜白金綵幣。璽書褒獎。明年以北邊謫。再賜璽書褒獎。時九廟災。言方以疾在告。乞休不允。霍韜死。而言與郭助爲仇。益甚。言既數以病請急。然實不病。而以無子故。多擁諸姬妾爲權。慈壽皇太后崩。上傳示太

子服制議言報疏有譎筆上遂切責今陳狀言引罪因乞休上怒盡削其助階散官以尙書大學士致仕言始聞上怒乃上備敵事宜冀以解上曰若旣蘊忠謀何自愛而欲去朕耶姑不問是時上方治齋醮其爲青詞及他文獨言與尙書嵩稱旨而言且陛辭因詣西苑齋宮叩首上聞而憐之特賜酒饌俾還私第調理以俟後命而郭勛轉恣橫其於營工治兵培克盜斂以數十萬計上微覺其事前是春時給事御史請敕助與提督大臣會派役卒助弗便也內閣撰敕且數月而助弗肯領尋與言俱引疾在告京山侯崔元害助寵久上以元薦景神殿新得獨對從容問言助皆吾股肱也而相妒者何也元不敢對上復曰言疾欲歸果否歸當在何時元乃曰俟聖誕後始敢請耳又問助何病元曰助實不病言歸卽出耳上首領久之而給事御史上有留言而惡助意因劾助故不領敕爲作奸植黨以亂國法助奏辯語多不遜上大怒於是削同事者尙書王廷相官奪伯陳鏞俸而給事中高時者言所厚也因盡列助貪縱不法數十條上下詔獄移三法司覆讞論斬奪封爵誥券獄成疏留中尋復言少傅太子少傅餘如故俾疾愈之任言雖以疾在外閣事多所取決而於窮治助指授樞根無所不極上猶心念助疑其中言搆也久之言一品滿九年考上遣中使賜金幣寶鈔肥豕上尊盡復其階勳官職賜敕褒諭錫宴禮部前是言與嚴嵩同鄉稱晚進而言以議禮驟貴不爲下嵩事之甚謹言入內閣嵩遂越顧鼎臣爲禮部尙書言有力焉嵩奉行唯恐不當意言亦以門客畜之會坐失上旨當罷呼嵩與謀而嵩已造上所幸方士第謀倚言而代之位言覺之嵩旣數爲給事御史所攻乃益爲恭謹以媚上是時已心愛嵩甚於言言乃日曠所善給事

御史益攻嵩。上益憐之。上居西苑齋宮。許入直諸貴人得乘馬。言獨製小腰輿以乘。上聞之不善也。人主故所御翼善冠。上不御而御道士冠。因命尙方倣而雕沈水香爲五冠。以賜言及成公希忠。京山侯元大。學士鑾尙書嵩。言獨密疏。謂非人臣法服。不敢常。上大怒。時昭聖章聖太后會前崩。郭勛請改其一宮爲皇太子宮。言與上意合不許。而至上卒問皇太子宮當何建。言偶忘之。念與作工役費重。倉卒對曰。今兩宮皆虛。可改其一以居皇太子。上愈怒。令五臣皆出直。尋召成公等入對。罷言不召。尙書嵩乃放冠香冠。而帽輕紗帽。以至使上見之。上果悅。因令成公等三人出。獨留嵩慰諭甚至。嵩頓首雨泣。訴言陵陷。上使悉言罪。乃得甚口少頓。上遂手敕都察院數言三罪。又謂郭勛旣以不領敕下獄矣。猶復羅織不已。與太監高交關共謀。朕不早朝。言亦不入內閣。軍國重事。私家裁之。王言要密。視等戲具。且言官爲朝廷耳目。一犬不如專一聽受。主使逆君。沽譽。傾人取位。以奉所悅。賤人一家。以代報復。卿等其布此諭。俾中外知之。上蓋欲言官論劾言尙疑言。且復用。相顧莫敢發。亦不敢請罪者。十六日上忽宣言入拜皇考諱忌。仍直西苑。候聖誕禮成。言乃謝恩。因乞骸骨。欲以常上疏上之。八日而始奉御批。令革職閑住。時日食旣上。諭禮部以臣子欺逼君。外陰侵犯內陽之咎。言以臣欺君上。作威作福。不下郭勳。念與卿等累年供事。免死去之爲失刑。於是給事御史乃敢合疏論言。且請罪。上益怒。命部院盡覆核之。謫降十餘人。餘留者亦奪半歲俸。亡何。勳病死刑部獄。上以恚。因他事奪尙書吳山職。餘鑄俸有差。還勳子孫侯爵。言久貴用事家富厚。高嘉雕題廣圃曲池之勝。勝侍使辟及音聲入部皆選。服御膳羞如王公。其始海內縉紳意。

其且復用。問遣踵接。後漸不召。則漸亦希簡。言居恆邑。遇元正聖壽。必上表賀。稱草土臣。上亦報聞而已。久漸憐之。復禮部尙書武英殿大學士。仍致仕。是時嵩最得上意。獨相。上微聞其專。特召言。自家復任。既陞。見盡復其階勳職秩。時嚴嵩已爲少傅兼太子太師。亦加言少師。以示並重。而言仍驕。直隴之出其上。凡有所擬。直行意。不復顧嵩。嵩心恨之。故事。閣臣日給酒饌。當會食。言與嵩對案。不食所給。而自攜庖甚豐。亦不以食嵩。始嵩信其子世蕃贖賄。報復睚眦。海內咸恨之。謂言能奪嵩而制其命。深以爲快。未久。言復忤吏部尙書聞淵。老臣也。不能洩忍事言。會其部左侍郎缺。當以翰林臣補。而禮部左侍郎許成名。崔桐皆應得。吏部初擬成名。而桐有力。遂推桐。給事中彈之。語連少詹事黃佐。王用賓。遂悉勒致仕。奪淵俸半年。下文選郎中於獄。抵罪。淵氣奪。不復敢抗。都給事中厲汝進劾嵩子世蕃。及王錫爵。尙書王瞻皆。有請囑。言欲借以搖嵩。嵩辯疏上。上卽爲杖汝進等幾死。而遠謫之。暉斥爲民。臬坐戍。言不救。御史陳其學以鹽法事論京山侯崔元都。督同知陸炳。言擬旨令陳狀。皆造言請死。有所進藥。炳至長跪而解。以是皆與嵩比。而謀構言。言殊不悟。上左右小璫求謁言者。言奴視之。其詣嵩。嵩必執手延坐。款密持黃金置其袖。以是爭好嵩而惡言。上或使夜瞰言。嵩寓直何狀。言時已酣就枕。嵩知之。故篝燈坐視。青詞草。言初以是得幸。老而倦思。聽客具羹。亦不復檢閱。多舊所進者。上每擲之地而棄之。左右無爲報言。言亦不復顧。嵩聞而益精專其事。以是上益愛之。未幾河套議起。始言由書生。以片言合上意。驟貴。欲建立奇功名。以自顯。岡居恆謂太祖制文臣。非出將入相。不得封公侯。非謂文臣不得封公侯也。文臣不得爲三公。

也以故於議撫大同討安南平潞寇皆自顯露其策不復託之代言而猶未歎其志曾銑者以御史平遼陽叛卒顯累官總督陝西三邊念河套肥饒地久棄之邊與敵共欲策復其地聞於言言見以爲名大悅而言之繼妻蘇有才色言嬖而畏之其父綱頗交通關節恣奸利銑故綱同鄉雅善之亦有所結納綱亟爲言稱銑才言益自信以爲功必可成亟下兵部會廷臣議銑所謂大司農金錢以數十萬計調山東河南良家子亦不下十餘萬皆心知其難不敢決而言意亦小沮會銑疏復請給誓劍得專儻節師以下上心惡之始下諭言等套虜之患久矣今以征遂爲名不知師出果有名否兵果有餘力食果有餘積成功可必否一銑何足言祇恐百姓受無辜之僇耳言懼不敢決請上乃以前諭下司禮監印發兵部及預議諸臣嚴嵩旣以窺上指乃上疏及稱敵之不易勝河套之必不可復師旣無名費復不淺而謂在廷之臣無不知其非者第有所畏耳因引咎乞罷上始報嵩以言私薦會銑任事之忠不顧國安危民生死唯徇銑饒欲耳而不允嵩辭言懼上疏謝罪且謂嵩於計議之際了無異詞而忽先臣等具奏不過諉臣以自解上不悅責言之專徇私情強君脅衆下部院參看嵩遂具疏力詆言之擅權謂機事大小毫髮不復關同言亦力辯上怒甚罷河套之役遂逮捕銑而部院奏言事爲任意迹涉強君上因盡奪言餘官俾以尙書致仕言出國門而難作矣始咸甯侯仇鸞鎮甘肅貪復桀驁數違總督進止銑論究其罪狀言擬旨令逮捕嚴嵩旣得志與崔元陸炳謀欲深言罪乃代鸞具草謂嘗闕銑復套議故銑恨而中之又敵入延安殺掠吏民數萬輕出定邊營損卒復數千懼而遣其子曾瀉以五千金賄蘇綱俾轉以二萬金賄言故

爲之解。而戒使復套以爲功。時曾瀆以胄子在太學。上遂捕瀆與蘇綱下詔獄。陸炳極意煅煉。崔元行金於諸中官。實其事。獄上。論綱邊戍。且追所受金。因逮言。言始覩鸞辯。謂彼方就逮。發疏時。上下論不兩日。何以知上語。而敷演爲文。又何知嵩疏而附麗若此。蓋嵩與崔元輩爲之也。其辭甚明晰。而上方怒甚。弗省也。銑就逮。以小緩期。罪緹騎長。奪其官。法司當銑比守邊將帥守備。不設律斬。上不許。令更擬。於是取嵩指。以交結近侍官員。紊亂朝政。律斬。妻子流二千里。銑性果銳。有機略。其死不當罪。天下冤之。尋言至。時於車中聞銑所坐。驚墮車曰。噫。吾死矣。復具疏辯。其辭甚苦。而刑部尙書喻茂堅等據銑律以請。謂言實當八議。所謂議貴議能者。上怒。切責茂堅等。□□其語猶及言前不戴香冠事。言妻蘇氏發廣西。從子禮部主事克承。從孫尙寶司丞朝慶。皆奪職爲編氓。言至秋。竟坐棄市。年六十七。言雖以驕蹇得上。惡然亦頗能持爭。上嘗諭之欲退處西內。使太子監國。言時年六十。答諭云。臣全數已盡。萬死不敢奉詔。上爲之止。其後所深恨言者。挫郭勛與不肯戴道士冠。時天下方怨勛之橫。與嚴嵩之奸貪。謂言能裁之。以是多惜言者。隆慶初。其家上書白冤狀。復吏部尙書。已再盡復其官。賜諡文愍。予祭葬。言始有妾孕七月。而蘇氏妒之。殤民間生一子。後言死而蘇氏知之。迎置家。其貌甚類言。且得官矣。卒病死。言竟無後。

史官曰。高位疾顛。厚味腊毒。寵利之際。蓋其難哉。夏言以改制變禮。驟結主知。此洛陽少年所致恨於絳灌者也。旣躡躡貴近。志得意疏。抵隙蹈瑕。日在張弧履虎中而不悟。方以爲君恩可恃。而刃已在其頸矣。夫愛憎變於前。禍如發矢。說在彌子之駕車食桃也。使言學道謙讓。見微知止。何至與霍韜郭勛輩同類。

而並譏之耶

鄭曉傳

鄭曉字室甫別號淡泉其先開封人祖徙鹽官爲鹽官人曉少有異質年甫十歲通經傳子史嘉靖元年壬午舉浙江鄉試第一明年中會試高等執政甚愛之曉竟不一謁授兵部職方主事日取故牘閱之由是盡知天下阨塞與其士馬虛實強弱之數兵尙書金獻民屬撰次九邊圖誌三十卷人爭借其草錄之甲申以議大禮杖闕下乙酉大同卒殺巡撫都御史當事者請宥之曉抗疏以爲不可不報內艱服除補武選又外艱去家居八年會朝廷特詔起廢時許讚爲吏尙書調曉考功逾年始至至轉郎中巡按御史有所論劾不常者曉勘得其實反譎御史夏言罷會有詔考察臺諫嚴嵩意在去異己者曉更黜其所厚者若干人癸卯嚴世蕃以治中求爲尙寶丞曉爲非故事不聽嵩益怒密疏曉抗上市恩貶判和州而世蕃遂遷尙寶丞曉至和日夜治民事訪諸所欲惡次第罷行之民大悅未幾遷太僕丞丙午遷南考功郎中尋遷南尙寶卿歷南太僕少卿鴻臚光祿太常卿癸丑遷刑部右侍郎甲寅改兵部兼僉都御史出撫鳳陽會倭奴入寇江之南北運道爲梗上下憂之曉至鎮勵將士選民兵集鹽場之壯勇禦之於通泰襲之於如皋擊之於海門擣之於呂泗圍之於狼山斬首九百餘級賊震恐遁去東南之賦四百萬石歸輸於京師無後期者又築三里閘以通漕渠開湖櫃以興水利准以南迄今無水患嚴嵩故銜曉僅擬加俸曉素以文學聞海內又濯然不勝衣而出撫以武功顯人多以爲不可測三十四年乙卯遷吏部左侍郎

尋遷南京吏部尙書。未行。上以曉知兵。特旨留爲右都御史。協理戎政。奏罷諸軍之役於工作者。衆咸感奮。戊午改刑部尙書。會楊漣總督宣大。曉兼掌兵部事。時議謂宣大重鎮。欲留漣久鎮北門。曉上疏。謂楊漣還本兵。則九邊將帥咸得人。而戰守之事咸飭。所可恃以無恐。甯獨宣大爾邪。上雅重漣。且重曉。詔令漣還本兵。曉仍刑部。奏論錦衣所治獄多失實。而五城御史受民訟非制。旣又謂汪直於法必當誅留都亂卒。漸不可長。劾嚴嵩。張紳董傳策吳時來不可罪。諫立儲郭希賢不可殺。薊鎮固廣提督憲臣王忬阮鶚誤事之失。不必深求。咸與嵩議不合。時御史鄭存仁者。善揣時宰意。妄以職掌奏曉。曉具疏述故事甚悉。嵩不能奪。乃從中搆之。詔曉執法終是自尊。乃奪職還家。角巾布衣。數攜一童子訪故所識。與論桑麻晴雨。或時共飯。山蔬水藻。相對終日。見者不知其爲名卿。性儉樸。尤審於辭受。所居絕去紛華。松窗竹几。蒲茵練帷。蕭然如山僧焉。四十五年丙寅秋卒。子履淳等訟曉受誣事於朝。詔復其官。穆宗卽位。賜祭葬。贈太子少保。諡端簡。廕一子爲冑監。瀆舉嘉靖壬戌進士。歷尙寶丞。準以廕官南京都察院。照廕。曉爲學雖主用世。而於性命之說。義利之辨。咸能剖析精微。直窺堂奧。華亭徐階謂其持論正而不迂。嚴而不刻。剛而不激。高而不亢。與唐馬周陸贄抗衡。所著有吾學編。古言今言奏議文集諸經解。

史官曰。鄭曉練達時務。兼資文武。經術經世。卓然行其所是。絕無阿格。此賈陸以上人也。兼有良史之才。敘事瞻而不夸。質而不野。是非必衷於道。使後世據爲惇史。嗚呼。若曉之直諫多聞。施於有政。誠不愧尙友矣。

呂本傳

呂本字汝立。餘姚人。生而端穎異。凡兒稍長。頤而白。皙眉目秀朗。父嘗攜謁謝遷。遷一見奇之。撫而嘆曰。異日名位差勝我。屬其子學士。丕善誨之。當是時。有鄒絢諸變者。皆名士。本與之下。上。其文遂灼然有聲。丕攝本至京師。俾贊所業於費宏。宏復奇之。如遷。俾與其子游。尋歸就試於浙。不利。而其父客丕。所以疾卒。本千里奔扶柩歸。除服。薦於鄉。明年游北雍。祭酒魏校慎許可。獨稱爲賢。登進士高等。改翰林庶吉士。時大學士李時器重本。以爲公輔器。世宗猝問時諸吉士誰可大用者。時獨以本對。授檢討。充經筵。展書官。校對列聖文集。南京司業缺。時翰林以南國子爲外僚。多不欲行。而皆謂本欲得之。時怪問本。謝曰。非敢欲之。唯上命耳。遂南。時南祭酒歷馬汝翼。鄒守益。黃佐。程文德。四五人。天下所稱賢者。然緩急異用。本劑而衷之。皆得其平。至本所自立條教。皆鑿鑿中窳。大得士心。守南司業可七載。澹然安之。始遷右春坊右中允。掌南翰林院。已遷左中允。領左春坊事。上心不欲權下移。而本試題用禮樂征伐自天子出。其文又最精剴。大得上意。手以丹鉛標之。中外藉藉傳本。且大用。明年遷南祭酒。甫至。召領國子祭酒。本素以寬平得士心。其任兩都國子。士爭稱頌之。時嚴嵩獨相久。上謀置貳。令廷臣羣推。吏尙書聞淵。南吏尙書張治。吏侍郎徐階。南兵尙書韓邦奇。禮侍郎歐陽德。未及本。上得本名。意若曰。是故能尊君者耶。持之十日。因密探國子諸生。稱本若一口。於是特簡本與張治。而本爲少詹事兼翰林學士。疏辭不允。當本少時。謝遷引自擬。而遷之大拜。其廷推與李東陽同日。亦以少詹事入。而年亦相埒。人始歸知人於遷。時上居

西苑齋宮。獨嵩直侍。機政咸越之。本日入文淵閣。默默無所爲。則手錄國史之有關於館閣者。凡十餘帙。居久之。上始召本與治入直。賜金帛酒饌甚備。於是稍與機政。尋續修明倫大典。充總裁。明年進吏部左侍郎。兼東閣大學士。嘉靖庚戌。大敵闌入都門。內外戒嚴。時徐階爲禮尙書。而本與之階嵩召對於永壽宮。上顧本與階曰。二卿久失相見。禮階頓首謝。因頗陳戰守之策。而嵩請視朝。本皆推言之。上稱善。敵退。本上章請收瘞三輔暴骨。而賑其生者。嚴飭營兵以圖善後。悉下所司行之。上頗急邊事。問本。本言日風。霾不以此。兵象不可不預防。而威甯侯鸞方握兵柄。挾上寵橫甚。欲併都御史商大節。兵大節疑其不軌。不可。上怒。逮下獄。欲坐以領兵官已承調遣。不依期策。應失誤。軍機律斬。本謂大節事方在議。非有所調遣也。且無失誤。不當坐之。不納。鸞又言敵入犯。請發糲餉從軍。又不給。則民禾固寇食也。聽卒自食之。便。本言業設督餉大臣。所至有伏食而復載糲。於軍過費。且古之善將者。卒納取人一物。卽斬。而故縱之。食田禾。非所敢聞也。鸞又議開市與虜和。本又持不可。鸞以是銜之切骨。數上密疏。詆謀本上不爲動。而鸞竟敗。本前後所草疏。或自上。或階其僚長。咸伉直無所依徇。而其於裕邸事尤切。始上以己酉春立莊敬皇太子。旣冠出閣。亡何薨。上疑之。而二王生同歲。次長在裕王。禮臣請册東宮。上以問本。對曰。自古帝王莫不早建元良。以正國本。申令皇太子年十五則選婚。東宮與諸王禮異。今二王皆長。選婚讀書其期也。宜亟正名。如禮臣請。上謂不難。己酉春事耶。本又對己酉春事何足慮。天所授之。必不以册累也。亡何。禮臣復上請。婚期迫矣。以東宮未定。不敢議出府。乞暫於宮中舉之。上謂諸王婚於其府例也。何宮中爲本。

又言先年五王婚於府。故名位等。又當各之國。今册立禮特未行耳。於婚府未使。且禮不可不別。上竟不肯別禮。聽以明年三月冠。六月出閣講讀。九月議選婚。本又言婚必當在大內。先朝有太后。有中宮。有東宮。故天子尊而羽翼壯。上骨肉唯二王耳。而驩遠之。願上寔然處空宮。臣等不勝寒心。上又不聽。二王卽邸隔一垣而居。歲時不復召見。宿衛單薄。人心洶洶。謂上有所適莫。各欲自爲地者。中允郭希顏上奏。請景王之國。以安裕王。而它辭謬有建帝立儲語。上怒甚。促置之大辟。本從容爲上言。希顏狂悖。死固當。第所云出景王以安儲。意大是。果爾則東宮可無册。而物情自定。覬覦亦息。上大感悟。卒如其言。時創敵議築外城。而燕之士庶財賄。南關獨當其大半。上欲盡城其四垂。本請併力以城南關。俟竣事有餘力。而更三之。報可。光祿歲費至三十萬金。上疑其有乾沒。以問本等。具陳光祿歲額二十四萬。先年費省。可十三四萬餘。以資匪頌好用之需。而今倍之而更不足者。豈盡上所用也。乃條上四弊。曰傳取錢糧之費。曰關支酒食之費。曰門禁之費。曰磁器之費。上乃責寺臣陳狀。而令給事御史歲籍以聞。本又與同官疏。謂入直諸臣有常祿。有大官餐錢。而又日三飯於費尤甚。上爲停二飯。時嚴嵩久貴。爲上所親禮。雖視其僚。而子世蕃挾之橫甚。所頤指諸司亡不披靡。巨璫勸臣。緹騎大帥。靡不託姻婭相結納。願以徐階地逼。百方批根之。階惴惴不自保。本起東海孤生。亡絲毫爪葛其間。不親不疎。坦坦行意自若。嵩亦無以難也。上多祠盞甘泉應制之作。咸以稱旨自喜。本獨不爲意。聽客裁上而已。有所奏對。因心而發。卽不能盡合。亦不至忤。人以爲本遵每得天。盛德所假。蓋亦有之。自爲東閣大學士兼禮部尙書。再加太子太保。進文淵閣。

上特命本於吏部俾差次六卿以下堂上官有所登斥事竣稱旨進少保兼武英殿大學士加太子太傅再加少傅階光祿大夫勳柱國廕一子入胄監兩子拜中書舍人累賜麒麟飛魚鱗衣它金銀錢帛不可勝數賜俘奴如功臣而它若遣永明殿釋奠先師皆儒臣所希覩者本以爲恆本丰采如時玉旣以盛年居大位出入朝行咸目屬之謂軒朝霞舉如會稽王撫按士大夫有情禮而性又至孝其居官母未嘗一日不在養母卒本已踰五十哀毀不勝上欲慰留不得遣行人護行給馳傳歸上書謝旣服除念受上恩遇深不以自同於去國者遇大慶則賀大工則助而上亦時時念之謂舊人惟本在輔職缺輒意屬之而誤聞其病乃寢本家餘姚餘姚之故城小在姚江北而江南多逼江而居者十倍於北本念烏寇方訖請之督臣胡宗憲謀城江南本聚材以倡而其民憚興作且逼江慮有侵室也譁而夜焚其材本嘆曰吾出資以衛彼而彼乃仇我復令其子元與邑之士大夫疏請於朝下宗憲所官爲給直城之其偉亦數倍於北寇後至無所掠徒啤睨去民始大德本爲生祠祀之本歸以牢醴上壽與祀祠者踵相半本自惟姚故饒邑也以賦役兩困其賦額輕於三吳而苦奸胥黜豪之飛詭田與賦恆相失田去而賦留不得不取償於里甲白於邑丈而清之伏田出矣又力主均其賦則吏不得以下上其手而役之困則重於十年兩徭雖名爲逸四而勞一然當其勞則加派蠲出力而不可支吾又邑多貴客科第優免過當於中產益束溼白於邑盡徭其民民歲出錢以予縣官官爲召傭又請以身先之不得名一畝徭士大夫信本亡敢違者賦不徭俱不困民益德之而御史遂推行之全浙及它省皆稱便本家頗有池亭花竹之勝客至則

留。留必盡興。本頽然其間。竟夕不倦。人以爲裴晉公白香山之在洛。不是過也。本居相位。仍李姓。自號南渠。人皆稱爲李南渠先生。至是始疏復姓呂。更其號曰期齋。謂吾雖耄。敢忘以聖賢自期。天下乃亦更稱曰呂期齋先生。年八十。上命彩幣餼酒。卽家存問。命有司月給米四石。歲給夫六人。本頓首曰。上不忘老臣。老臣乃以邱壑之腹。累縣官帑。因上書謝辭。不允。錄一子中書舍人。又四年卒。上聞之爲咨嗟。賜祭葬。贈太傅。謚文安。仍予一子中書舍人。所著有期齋集奏稿。爲文典暢平直如其人。

史官曰。呂本立朝。與嚴嵩俱。幾類挾兔之鷗。才弱位逼。鮮或免者。卒能安坐政事堂。躡躡公孤。以功名終。豈傳所謂得天者乎。抑道凶委蛇。不來入宮之妒也。他日太常議謚。郭正域毅然欲起而奪之。斯其人可概睹已。

明書卷一百三十三

列傳四

名臣傳 十八

宋儀望傳

宋儀望字望之。永豐人。成嘉靖二十六年丁未進士。爲吳縣令。未幾。卽擢監察御史。移疾歸。復爲御史。未幾陞大理寺右丞。緣事落職。出知彝陵州。未任。拜霸州兵備僉事。尋陞大名兵備副使。卽移監福建軍。尋削二秩需次。久之始補四川按察僉事。卽進副使。移視福建學政。以婦卒自免歸。道遷其省參政。卽入爲太僕少卿。甫上。遷大理左少卿。遂進都察院右僉都御史。巡撫南直隸。提督軍務糧儲。久之以功遷右副都御史。改南京太僕寺卿。已轉大理卿。有所齟齬。乞歸。始令吳其邑人猶少之。儀望不動聲色。發摘奸弊。如神。胥吏洗手而治。念諸區所苦者長賦。而長賦所苦者長運。往往破家。儀望倡諸區各出公田以贖之。所出田畝。計本受田爲差次。卽貴勢無得免者。民以不困。敵大入犯。餉不給。戶部計專官併責吳。舊人洶洶且竄。儀望白郡榜慰之。而條處其緩急。竄者皆復。乃與比邑合而置義塚於六門之郭。禁毋得水火葬。吳俗大變。孔門賢言子。故吳人爲創文學書院以祠之。與諸生講道肄業其中。後皆出爲名公卿。儀望旣

精於法比時時麗情兩造數百人。不踰時解去。爲御史時。上書論大將軍仇鸞擁勁兵。居肘腋間。挾敵自重。無人臣禮。時鸞恃寵驕甚。聞者爲縮舌。上雖內私鸞。而無以易其言。寢不下。未幾鸞敗。復陳時務十二策。上皆允行之。按河東。嚴持法。亡所徇許。嚴事簡。乃創河東書院。與諸生講習。多興起者。移疾歸。銓復爲御史。因論邊事。語及嵩。子世蕃及胡宗憲。淫侈。撫臣阮某之焚荒。請攝治之。嵩等不說。會儀望督視三殿工。中官議工直日一鑽。儀望不可。又欲悉易殿趾石。又不可。第易其燬而弗堪者。世蕃私賈人金。屬工尙書。陽必進者。辟與工事。又不可。於是衆怨叢積。工成。敍遷大理丞。世蕃自以爲功。而儀望無所報謝。急請歸。適風霾變。嵩欲有所廢樹。乃考察諸司。時必進爲吏尙書。與世蕃比。遂謫犇陵。其兵備霸州。日前是有西甯侯宋道。其地盜夜迫之。倉皇溺死。盡剽其貲財。詔捕之。格甚峻。儀望鈎得其巨魁。悉置於理。霸人憎其威神。竟任無竊發者。涿爲都之南輔。力請城之。最爲堅完。又疏豁洪武以來養馬逋稅。民大悅。其自大名移閩監軍。於大帥戚繼光合筴破倭寇。斬無算。會福建鄉試。程式文出其手。冠絕一時。咸稱其有文武材。而計吏之譎復下矣。乃從容遊武夷。賦詩歸。而灌園意甚適也。屬邊事棘。廷薦前後十八疏。於是起。止補四川僉事。五遷。歷撫南直隸九郡。以其故令吳深。曉民間疾苦。與吏弊風俗。至則一切務爲寬大。而於松江金壇溧陽豪貴人之匿賦。而以重累單赤者。亡所縱貸。會郡邑水災。乃上書減歲租。發儲粟以賑。是時海警稍解。吏士諱言兵。而儀望獨與兵備。王叔果計。修餘皇。練卒伍。飭戎器。申嚴賞罰。忽倭狎。至乃遣舟師三覆之於外洋。浮斬敵口。奪杖器甚衆。會有詔。雪建文死事諸臣。儀望謂金陵其死所也。建表忠。

祠聚而祀之。宋楊邦義以不屈敵死江甯。有祠與墓。而墓且湮。儀望求得之。爲置封樹。因爲祀而屬有司。歲饗之。其敦勵節義如此。太常卿袁洪愈。國子祭酒姜寶皆里居。向爲張居正所擯。儀望力薦之。意與居正左。噉給事中劾之。儀望不動。坐與御史論鹽盜事相異。雖入爲大理卿。猶用前隙。嘗毀解任去。遂決意不復出。萬歷六年戊寅卒。年六十有五。海內惜之。儀望少磊落感慨。有大人志。一日讀宋史岳飛事。掩卷而嘆。父怪問之。曰。令兒生其時。不飲血而碎檜首者。有如日。又讀唐史裴度傳。所謂賊滅則朝天有期。賊在則歸闕無日。大嗟泣。曰。壯哉。男子當如此耳。嘗從鄉先生聶豹游。已又游歐陽德鄰守益門。最後印證於羅洪先。其詣益齋深。服膺王守仁。致良知之說。時方議以守仁從祀孔廟。人多難之。著或問一篇。見者無不爽然。後十餘年卒。以守仁從祀。儀望於學能識其大。其爲人氣豪。不帖帖細瑣。而內行特純篤。所著有陽山稿華陽館集。

史官曰。關

趙孔昭傳

趙孔昭。字子潛。別號玉泉。邢臺人。生數歲。動止卓犖不凡。十九舉鄉薦。二十六成進士。授鄆陵令。孔昭素精習法比。便案牘。大事斧斷。小事理斷。其興利去奸。腕字單赤。凡吏胥素舞文。皆若負霜雪。而大指寬。間詣學宮。憫其傾圮。日非。鼎新學宮。誨惠生儒。增修邑城百雉。必取穹堅。諸所厝置。不以煩民。蓋前六十年爲故少保王憲。爲令有善政。鄆人思之。至是爲之語曰。前王後趙。擢監察御史。始按遼左。風稜肅然。大帥

李錡者。故與戚甯侯仇鸞比。而貴。貪虐任情。抗疏按核之。褫其職。他債帥以次論奪。毋得免者。再按福建。所操持如遼左。於吏治加密。時閩已中倭。孔昭筭戰守。核功罪。每奏牘上。尙書無不嘖嘖賞服。再按浙江。是時島夷訶。朝廷命工尙書趙文華視師。文華貪鄙無恥。恃時寵。挾嚴嵩卵翼。則又最橫。文華以浙人持監軍節。會都御史曹邦輔有戰功。文華惡其不相推遜。反欲劾其調度失策。孔昭業爲救邦輔疏。以示文華。而語之曰。年來遘賊至。唯有鳥獸竄耳。所見唯一曹中丞強人意。而公摧折之。何以厲天下。文華語塞。第曰。任公救之。上於吾兩人者孰重。孔昭曰。惡。是何言也。俱爲臣子。何能逆探人主意。且公雖重。安能越理而重於我。文華度不可已。又終以桑梓故。懼孔昭難之。追寢其疏。以解孔昭。會監臨浙闈。試文華有一子。應試。乃謬瞞而要之曰。老特舐犢。奈何。孔昭陽爲不悟。入棘。約束諸寮。榮曰。司空謂我矣。毋得與寒士爭進。罷其卷不錄。文華恚甚。然莫能報也。文華具報績。因盡籠諸人功。而歸諸己。孔昭當會藁草。盡削其張大誣罔語。奏疏大有異同。文華雖蒙賞賚。卒以此敗。陞南大理寺丞。進南右僉都御史。督操江防。外艱歸。服闋。召撫宣府。宣府故敵衝。頻年土黻。塚且盡。孔昭撫循其瘡。瘡。尋敵入犯。精騎突至。紅山京師大震。孔昭與總督江東。騎而尾之。走。論功。賜金幣。以不能事言者。見苛摘。解任。需次於家。將發。而吏以故事。進贖錢數千金。洒卻之不顧。尋內艱。除而誣盡白。人皆交口譽。以其所在著績。而浙爲最。遂以故官。巡撫浙江。提督軍務。浙人謹呼曰。是能折貴臣角者。及至而島警。屬已緩。則爲汰冗兵。節縮不切。橫賜溢廩。尙方織作。歲日益。民不勝機杼。疏請寬減之。得報可。又條奏地方便宜數十款。其要者如定屬郡之

兼轄禁島土之開墾。搜礦盜之窩蓄。裁三司之繁禮。又若議賑免停句戍。補蠲貸。上皆行之。著爲令。奏復新建伯王守仁世爵。召爲戶部右侍郎。尋轉左。兼僉都御史。總督漕運。兼撫江北。時淮徐屢中水。飄溢廬舍。民採芡苳。網鮭蝦。供朝夕。猶不給。孔昭於常請蠲賑外。復移帑金。招鹽商平糶。值所全活不可勝計。以糧運阻。免歸。穆宗卽位。言官薦起。改兵部左侍郎。兼官若故。撫山西。兼督雁門諸塞兵事。孔昭行相邊。微要害。乘高爲峻。因卑就深。皆屹然天險。敵騎至不敢入。賜白金彩幣。無何大臣閱邊者。以其績上。賜如初。孔昭於屬吏賢者加膝。而至破侵餉。收伏贖若神。一切以三尺繩之。不敢用其術支吾。入協理京營。尋病卒。年六十五。孔昭爲人。皙而秀眉。目朗洞彙坦。不爲崖谷。孝友天性。習爲儉。衣澆不至三。緝不至三。不易也。出入倪素。徒從稀簡。所買產多廢。好吟咏。尤邃經術。所著有文集若干卷。七巡疏稿若干卷。

史官曰。闕。

李世達傳

李世達。字子成。號漸菴。晚更號廓菴。涇陽人。少穎異。日誦千言。自髫年卽具博大之器。卓犖之識。一時薦紳先生咸器之。年十二。名噪甚。爲布政使楊守謙所知。諸所崇禮備至。西安知府胡敬見而奇之。與爲忘年之交。常是時。已瑩精大道。旁練經世業。常夢謁太祖。授明珠一命。曰善自珍之。異日當爲國寶也。年十九。登嘉靖壬子鄉試。丙辰成進士。授戶部主事。癸亥調吏部考功司主事。已調文選。以養病歸。隆慶元年。起陞稽勳員外郎。未幾調考功。陞郎中。調文選。丁祖艱。三年起。陞右通政。進南太僕卿。神宗卽位。陞右僉

都御史巡撫山東。進副都總理河道。六年戊寅。以原官巡撫浙江。旋告病。居八年。復以原官起。總督漕運。兼巡撫鳳陽。甲申。陞南京兵部右侍郎。改戶部。是歲。陞吏部左侍郎。丙戌。陞南吏部尚書。改南兵部尚書。參贊機務。召爲刑部尚書。改都察院左都御史。掌院事。壬辰。以六年滿。加太子少保。癸巳。乞歸。許之。二十七年己亥。卒。年六十有七。賜祭葬。諡敏肅。始世達在戶部。監兌湖湘。旦暮竭心計。佐度支之急。前後入銓司。佐黜陟。品藻人羣。百不失一。會大計。當事拱手聽裁。卽見斥者。無不心服以去。時徐階在柄。地而秉銓者。爲嚴訥。世達與陸光祖同爲司屬。得以搜揚側陋。薦進之。往往從田間躋華廡。列卿貳。銓局之公。流聞宇內。前後所未有也。其開封山東。議班操。蠲積逋。減馬價。著爲絜令。時蔣大爵。范儒以明經舉。安廷璞。李遐齡。以知印擢。楊果。趙蛟。以都吏進。膠河議起。世達身履其地。相土宜。權經費。所爲條析利害甚具。東土不至勞民傷財。爲大役累。撫浙不數月。辭疾引退。起督漕河。念寶應湖險惡。歲漂舳艫無算。爲請開越河。殺水勢。列五款以上。綱領節目。犖然畢具。葦年而竣。比原估料價省一萬有奇。在南吏部。與海瑞意氣相期。擔荷國事。所甄敍羣品。如鬪眉睫。大察汰遺數百人。下逮與臺。無不悅服。爲刑尙書。章數十上。平允詳慎。務廣上好生之德。時上惡邊臣僞增首功。怒至不可解。世達劑於輕重之間。以定厥罪。而比附重辟。執不奉詔。卒出其人於必死之地。人稱爲回天力。會密遣廠校偵部事。世達慮弊竇不可長。屢疏明其非體。乞亟罷去。上改容謝。乃已。權璫憑藉威靈。勢張甚。在事諸臣莫敢誰何。世達具疏革其禁。近供事。正罪。以杜禍源。每發宮闈所未發之奸。開廷臣所不敢開之口。御史職雄峻。所抨擊無與抗者。往臺長不甚有。

所甄別世達謂吏治日衰民生寡遂皆此之由乃舉行四道考察例斥韓介劉瑜黃正色輩數人臺中悚然且申明憲典傳布天下俾撫巡無得以問餽相加遺所薦下吏亦無得執贄及門違者論如法於時道路風清苞苴弊絕世達正以褻躬忠以徇國不難以一人排羣議觸忌諱侃侃然貞而不激通而不隨宏而不疏細而不挑獨斷於是非雜選之中抗色於傾側危疑之際國事既濟身名亦全其經濟之業如此有奏議八卷

史官曰孔孟論學莫急於知人蘇子瞻乃謂蕭何知韓信非有術而可學何其謬也世達胸懷洞達無所不茹納卽窮鄉下吏片長寸善或舉以試之無不知者此豈得之性哉呂夷簡爲相於四方替罷謁見者必問地方人才客去隨疏於籍故朝廷索才如取之橐然譬之良工構室棟梁榱桷小大畢獲誠儲之素也相傳世達有數巨冊人才臧否良楛種種皆具惜未大用而去然其及於世者不可沒也

陸光祖傳

陸光祖字與繩別號五臺平湖人性岐嶷不凡四歲讀毛詩成誦八歲從其父遊道遇客語安南事從旁曰是必克夫以聖天子聲罪討小夷如振槁然何煩兵甲客奇其言嘉靖十六年丁酉年十七與其父同舉於鄉又十年丁未成進士授知濬縣濬故額五十里邑疲耗不能役請裁其十里以寬民力常路不可光祖持益力卒如所請秋潦傷稼光祖涕泣呈兩臺皆以非時卻其牘乃自爲疏上之辭甚懇上爲惻然下部減稅之十三邑多輕俠爲盜臺光祖把其宿負編之伍而討以軍令咸請盡力爲耳目盜發輒得獨

鉅盜李以平蓄異志不悛。乘入覲。嘯雀符爲變。覲歸。立擒之。邑文士盧梈富而才。先後令皆與相昵。以得罪令。令恚中梈。羅大辟。坐繫十三年。有司以時高貲。莫敢釋。光祖立出之。御史故難之曰。若不知梈富耶。光祖正色曰。獄果當。陳仲子無生理。否則否。尉何避焉。竟出之。梈爲謝。光祖曰。我伸三尺爾。竟不與見。陶仲文以方技得奇寵。勢張甚。邑有李榮爲其私人。橫行里中。光祖捕置諸法。仲文奉命祠郡。故出魏。效爲榮地。光祖不爲移獄。內卿王占長。垣民田爲業。民頌諸臺長。諸令皆嘆。暗不能制。臺以屬光祖。勸果民產。立歸長垣民。庚戌。胡闌入塞。尙書趙錦議役三輔民築塞。光祖持不可。錦劾其撓軍興。上置不問。及復。請出錢踐更。三輔民賴以免役。陞南禮部主事。內艱服闋。起禮部主事。歷議制郎中。侃侃持正論。守陵宦官張方進甘露請恩。光祖卻之。知縣吳府上方藥。欲邀寵。光祖召至邸責曰。若儒者而欲技幸耶。官之以爲榮也。進以技。何榮之有。府悔稱疾去。景甯王入京。自陳設醮祝釐。有司邊維垣等毀牌位不道。上大怒。光祖言王擅離國。違祖禁。宜有所懲艾。他妻菲語不足聽。上從之。神宗生裕邸。光祖請告廟。受百官賀。疏入留中。有頃。賜聖母寶鑑。中外翕然謂其有卓識。癸亥。調驗封郎。已轉文選。光祖雅有人倫鑑。知天下士高下甚悉。至是。佐尙書。語對如流。黑白分明。乙丑。佐計。汰黜惟允。不爲權勢假。而又憐才持大體。如蒲坂王崇古。仁和張濟。嘉魚方逢時。曲周一鶚。肥鄉張學顏。皆掛人齒頰。光祖力爭之。謂此皆天下士。可濟緩急。奈何以蜚語挫抑。留諸人。後皆躋九卿。以邊疆績著。瀋安知縣海瑞爲上官所排。光祖力明志節。奏授戶部主事。侍郎朱衡以智囊附擢。幸士論薄之。畏其與援不敢動。光祖推爲南工尙書。衡不勝憤。嗾御

史論光祖恣橫。時已遷太常少卿。而內璫位本仁申宿憾。從中搆。得旨罷免。居數年。神宗卽位。起太僕卿。進南大理卿。入爲工部侍郎。居正方柄政。橫。光祖其同年生也。以故事候朝房。大僚皆屏息立語。光祖素坐。坐故久。居正目攝之。前後調護給事余懋學。御史傅應禎。劉臺。比部郎王用汲。語剴切。居正蓄怒久。及爭改折漕糧。大恚曰。浙人難事如此。光祖曰。某忝九列。顧不得使論列天下之事哉。公奈何以訕訕聲音。拒人千里外。移疾歸。居正敗。起南兵部侍郎。改吏部。時改居正氣銳。又力爲居正解。御史李植江東之。丁此呂輩。爭壽宮發科場諸不法事。語侵執政。上心動。光祖佐尙書楊巍上疏。劾諸言事者。左遷各有差。言益譁。尋遷南工尙書。謝病歸。又二年起南刑尙書。亡何入爲刑尙書。改吏尙書。攻者斷斷未已矣。光祖不顧。銳然以清議爲己任。十年壬辰。大計破情面。拔孤寒。又嘗謂人才國之元氣。尤當注意老成。一時名碩。在考槃者皆推起。或問曰。公之啓事洵善矣。多要津所不予之人。何也。光祖徐應曰。操世柄者不宜予天下。以好惡之隙。抑情而平之。勢不得不矯情。一切從某始。先是富平孫丕揚代爲刑尙書。長安老隸詔曰。是故御史以專擅編氓去者耶。光祖聞而笑曰。鄉吾被放。謝恩歸。而揖御史於朝。片語相知。今三十年矣。趙用賢。沈思孝。蹇諤。自喜。廷議數面辱光祖。光祖故折節。頽而柔之。且力爲推輓。用賢。時語所親曰。吾乃爲平湖所容。思孝巖居久。每扼腕時政。曰。持公議而不以愛憎奪者。平湖一人而已。識者以此窺其權略。而政獨恨次骨。曰。不自意爲老秃翁所賣。光祖謝曰。祖昔爲郎。文貞知我。我不敢稍貶。以徇文貞常薦士。祖不可。文貞顰蹙曰。業已聞上矣。奈何。祖避席曰。相公不以祖不肖。備員銓司。誓不敢以所未信。阿相公。

意以誤天下。請從此辭。文貞始不堪。卒相信。今老矣。誓以文貞報相公。不意相公望之深也。文貞者。徐階也。光祖在銓。一行其意者。大指以抑僥倖。振淹滯爲急。京師爲語曰。近世之姚崇也。尋以枚卜拂臺諫議。彈去之。大學士王家屏亦已封還去敕。同出國門。光祖歸杜門。後進有知人叩者。光祖曰。凡人初以負氣執拗迂闊見排。卒多樹立。或稱善處事。識時務。此其人非君子者流。卽使任事。亦無用人以爲知言。史官曰。余雅聞薦紳間。論近世有道之士。必嘖嘖當湖。云及光祖生平行事。多矯矯孤立一意。以別白黑。辨流品。爲己任意。所獨是。毀譽紛於前。愛憎炎於中。當之訖如也。傳所稱仁者必勇歟。夫蘇之稜稜。廣之中庸。其不得列於有道也久矣。

嚴清傳

嚴清字直甫。號寅所。其先祖子敬。自浙嘉興徙居滇。父鏐生四子。清最幼。而咄咄奇悟。鄉先達光祿施昱。擇婿得之。以女歸焉。嘉靖癸卯。舉於鄉。明年成進士。除富順尹。富順故劇邑。或以調清。此未淬之劍。而輕斬蛟斷犀耶。清謹謝曰。小子何敢抑余劍也。乃方在治中。惟公之所鑄。而擇利可乎。至則能聲大騰。以救荒課爲天下最。內艱。再除郾鄩。治如富順。尋入爲工部主事。歷郎中。督修外城及九陵。皆斤斤謹出納。侵牟吏膠手。所省費以巨萬。已工成。當敘陞。辭不受。受加俸。外艱。復除兵部郎中。出知保定府。居保定三年。課復最。歷陞易州兵備副使。陝西參政。四川按察使。轉右布政使。所至自撫按特舉。及兩京臺諫會舉。不下數十疏。隆慶二年。戊辰。擢都察院右僉都御史。巡撫貴州。尋改四川。清故川吏知其民所疾苦。乃具籍川

課之當輸京者。議割二十萬金。就近改給陝西軍餉。罷郡縣卒之團操。成都擾民者。賈番入邊。則爲定限額數。額外不得浮一人。他約束一切。以惠利爲本。而痛持蒙家悍吏以法。以是士大夫譽諱常參半。而趙貞吉獨深知之。會有以流盜註清。當落職。貞吉力爭。得予告候調。居五年。起督鴈門。關不果。改貴州。入爲南大理寺卿。尋改北。歷刑部吏部右侍郎。陞刑部尙書。上之知清。自其在刑部能執法。不執權勢始。旣柄用典銓。則日夜討故事。論官材。丞椽以下。皆親爲標署。楊遵彥之默識。黃次公之至精。不能絕也。上華孳以太平屬清。年未艾。以病歸。歸之日。遣使慰老。仍賜馳傳。萬歷庚寅卒於家。清性檢厲。勤於事。其操行嚴於趨舍。辭受尤廩廩。所居官。身自與僮僕食粗衣。敝然也。橐中裝。雖圖書與琴。不敢取諸人。蜀王慕之。使致扇餌微餉。不受。初拜尙書。貧不能具衣色。束素犀帶以朝。其輩或指戲之。清釋褐時。玳瑁七品帶。故在耶。清笑曰。不然。夫犀帶不裝金。安知非玉。吾願恐難爲上耳。清薰然長者。色溫氣和。人無賢不肖貴賤。皆禮接之。其立法處議。本人情。計久遠。無崖岸峻物之行。謹昨抵掌之談。以故主眷優渥。而海內稱大人之能安國家。鎮雅俗者。必推清云。

史官曰。闕

程文德傳

程文德。字舜敷。永康人。嘉靖乙丑進士。方上臨軒策士。覽文德對。嘉之。御批擢第一甲第二人。官翰林編修。已坐同官楊實卿封事。下詔獄。謫信宜典史。前後翰林三年餘。所獻郊祀議。選庶吉士疏。靈雪頌。靈鶴

詩親蠶行。再進內訓講章及四詩。上常開無逸殿宴近臣。文德與上無逸講章。乙未量移安福知縣。丙申召爲南京兵部主事。轉員外郎。丁外艱。辛丑起復。補兵部。晉郎中。屢上禦口疏。甲辰擢廣東按察副使。提督學校。未上。擢南京國子監祭酒。庚戌擢禮部右侍郎。以外警奉旨提調監督宣武門。并相陸妃墳。壬子轉吏部左侍郎。癸丑兼翰林院學士。掌詹事府事。教習庶吉士。乙卯將擢南京吏部尙書。忤旨。改南京工部左侍郎。辭謝有言。褫職罷歸。文德爲人博厚坦曠。不設町畦。聞甘泉吏部尙書湛若水明道術。走其門。未有得。其後激於人言。卓立檢飭。斷斷必爲君子。不忍以世俗終其身。幡然變故態。視舊所爲如兩人。嘗祭長陵。中道偶談孝宗事。爲淚下。悲不自勝。見實卿封事調停。削名甚衆。拷掠無一語。在廣中舉何王金許之學。誨諸生。遷信官學。建麗澤書院。至安福行鄉約。處里役。摧強。節用。下士愛民。建復古書院。在兵曹。嘗言軍戰法多見采行。臨南雍。以體諸身者爲言。用情尙質。而謹服習。詹事故事。養尊望而遠外嫌。文德聞兩直隸河南山東大饑。朝議開納。而澤不速下。爲計粟麥黍菽可助食者。稱其數。請早入以期有濟。上從之。至以得罪歸。囊無餘金。

史官曰。闕

李遷傳

李遷。字子升。豫章人。生而端重。不妄言笑。成進士。肄業禮部。奉昭聖皇太后遺詔使蜀。蜀王與其撫按藩臬守令。餽遺珍貨甚厚。悉卻之。又使演黔公而下餽之。卻之。俱入蜀。授南兵部車駕主事。司故積造舟資。

巨萬計前是司出納者不能無染指僅半與役卒尙書張邦奇一見器遷遽以委之遷請邦奇會部官曹郎而下坐堂皇上集役卒授之卒皆懼服邦奇勸其法爲絜令尋進員外郎後宋景爲尙書事事倚任之其最巨者諸衛貢船責之衛卒之饒有力者官給其直而中官監之直盡入中官橐而受責者挫其產以償猶不給遷請毋令中官監亦不以責衛卒而官董之景如其議人大稱便景入爲左都御史公卿出祖龍江景曰所與周旋士人多矣耿介者處其才恢廓者處其守於李郎吾復何虞已獨留遷促膝論天下事久之乃別去尋進武選郎中繼兵尙書爲韓邦奇引遷與吏部郎楊繼盛輯定樂志擢山東濟南知府山東諸藩臬祿俸皆資之泰山進香珍貝錦帛織作之類藩臬郡邑之長多私其重者遷獨會諸寮儕等之使次第持去不以毫髮益守帑使者聞之曰胡威之清不加於此諸長亦媿如其指德王請惠民藥局撫按業許之遷執弗可已復請織染局復持不可於是改建祠祀先儒使諸生讀書其中計吏爲天下循良第一進湖廣按察副使進右參政遷廣西按察使時靖江王與諸宗閥而各上章相訐下臺臺下藩泉以藩使之懷不任也使遷先遷以謁王王謝病不見乃奏記王曰大王以某之來爲宗人耶某非爲宗人也爲大王也某之來內之必欲拒遷者何也王乃許以翌日見見而蓄怒待之坐定王盛氣言曰不殺之先王奉高皇帝恩以有茲國當攝諸宗人諸宗人不受攝而子大夫乃右之何也遷對曰大王宜自責毋責諸宗人也王益怒曰何謂也遷曰大王能念高皇帝恩甚善先王者高皇帝從孫也以罪廢嗣子惇僖王賢而高皇帝復王之名雖一郡其禮秩威命實大國也今嶺以南毋貴於大王者諸宗人之衆亦無如

大王者。乃大王挾貴以凌諸宗人。諸宗人亦挾貴以抗大王。夫有司者。故出諸宗人下者也。諸宗人甘心有司之約束。而褻足不入端禮門。大王能忍之乎。忍之是大王徒擁虛器耳。不忍之。則王與諸宗人之訐無已也。且宗人之去賤無幾。罪易勝也。其指逾萬數。不易盡罪人。有如天子一旦赫怒。咫尺之詔下。大王能偃然而已乎。某等所以見者。願大王之爲悼僖王。不願如先王。故曰非爲諸宗人也。爲大王也。王色動。迺前席曰。先生何以幸教不穀。遷遂說王曰。大王急下教。自責令諸宗人一切聽臺議。某等請分諸宗人爲十餘房。房擇一篤行長者長之。其長得以懲訓不率。重則付柱後。惠王耳。大王無與也。月朔必朝見。祭必從。請名請昏。必以屬大王。則大王之貴長在。而諸宗人亦服。王曰。善。具如遷指。臺爲疏上。上從之。靖江遂甯進湖廣左布政使。當入覲。宿郵中。盜以左使當巍臺。夜窺之。亡所得。得一稍重者。踰垣而出之。則古石研也。棄而去之。課績復爲天下藩臬第一。進右副都御史。巡撫真定。至卽疏請固關隘。考軍實。計儲餉。分保甲。定審編。嚴窩禁。設險分墩。以時哨警。權闔馮保深州人。有侄當嫁。有盜可五十人。道剽其資。莊其兄疑仇家爲之。白州知州審其誣。縱之。遂白遷。謂下納盜賊。遷曰。守不受賕。吾悉之。復白之監司。爲捕仇家。鍛鍊五毒。強誣服。引同盜者至百人。獄上。遷曰。馮氏始訟牒五十人。胡百耶。悉得其誣服狀。破械縱去。保聞怒甚。具疏草以語公卿。欲論守受賕。而遷故庇之。兵尙書楊博曰。吾不知守。知中丞。毋太草草。當以質中丞。遂貽書問之。遷報曰。不佞以民命若泰山。此官敝屣耳。所能者爲貴人責捕盜。不能爲貴人理私仇。亡何真盜發。守得白。敵大入犯。自牆子嶺闖京師。東北遷聞警。使其將勒騎入勤王。自以兵踵其後。

兵至都門。敵漸斂。已而諸鎮兵悉合。蹙之境外破之。所部斬敵甚多。論功。賜白金文綺。尋入爲工部右侍郎。丁艱。服除。召補南京兵部右侍郎。尋進兵部左侍郎。都察院右僉都御史。總督兩廣諸軍。兼理糧餉。倭方大入。侵掠廣東。疾馳至端州。督諸軍大破倭。斬寇以千計。俄詔兼巡撫廣東。餘如故。其時古田苗亂。遷請平之。上便宜報可。乃調狼土兵十三萬七千人。分七哨進攻。以大帥俞大猷統之。而參政梁淦副使邵惟中等監其軍。檄湖廣將士固守東安黎平隘。防奔逸。身自移鎮梧州節制之。申飭軍令。嚴賞罰。仍戒毋妄殺。毋擄掠。兵進蕩其寨棚六十五。擒大會韋銀豹。酋黃朝猛戰死。餘酋二十二以次就縛。斬首萬餘。降餘衆二萬。進古田爲州。使監司鎮之。他增將卒。置學宮。選良吏。奏上從之。以功進右都御史。賜白金文綺。廣東蘇繼相世蟠據揭陽之黃寨。僭稱王。而其黨曾魁據石磴。杜高山據大節。相犄角爲聲援。流劫遠近。郭成故以總督劉燾討破之。且下矣。而繼相通成之私人戈耜入賄於成。以免。遷刺得其狀。召成切責之。曰。左廣費大司農金錢。歲可二十萬。今三盜如故。而汝若不聞也者。日幸酒被色。歌舞自媮。快安乎。且汝之入三盜賄而縱之也。吾非不知。姑貸汝死。責後效。汝能自勉勵否。成惶恐叩頭曰。蒙貸成死。苟不擒三盜者。必不敢復戴首而謁。乃調兵二萬人。使成與諸將分將之。成強自力戰。戈耜以師遂破繼相。衆窮追之。獲於五房後。破擒曹魁。兵少倦。杜高山乘間襲奪資餉以去。遷切責諸將躡之。破其大節寨。窮追獲於古銅鼓障石岩。前後得柵三十六。俘斬千餘人。賊屬四百人。自拔歸者二百餘人。投崖阱死焚雉經死者不可勝計。復進破海豐賊會朝元。下村柵十一。鹵斬五百餘。朝元砒死。復破繼相之黨楊仁寶於九重。

坑追之至鵝毛山而獲。俱磔於市。得賊田二十萬頃。予民。捷聞。上賜白金文綺。時舶主許瑞者。擁萬衆出沒近島。諸帥私其賂而陰蔽之。時取羈縻而已。會倭三百犯廣之大金門。而許瑞相引恫喝爲重。諸將入問策。遷笑曰。吾已付倭許瑞矣。以武往。卽千人不必勝也。第令裨將將卒二百人往。俾攝市人立睥睨間。而使監司檄喻瑞。若名事中國而不純。今急取倭自救。不者大將軍悉二廣兵殲爾。非可賂免也。瑞惶怖。掩倭艘。悉獲以獻。前後所捕誅倭及劇盜凡十大勝。不報捷。或謂胡不報。冀得一男爵以貽子孫。遷謝曰。上威德與諸將士力。我何功。且家世業儒。何可復侵介士路耶。會高拱爲首輔。壽六袞。諸侯之幣亡弗重者。遷獨以尺書挾兩吳縉進。乃寘之地。唾曰。豈酸至是。第用我賈名耳。以故於功多所裁削。是時清遠颯風作。地震。英德開建諸邑大水。急發庾賑貧者。因上疏引罪。且乞裁黃蠟芽茶鐵鍋魚芽柘茨銀硃烏梅。銅錫麻泉鐵線膠翎諸濫稅。不報。他疏若停逋稅以安反側。查濫俸以省虛冒。修水寨以資戰守。嚴門禁以固重地。稽商稅以慰民望。究武職以飭戎政。祠名賢以崇正學。得報可。兩廣賴之。凡三上疏乞休。不許。又陳情乞歸養。乃進南京刑部尙書。遷堅以骸骨請。允之。所積廩粟五千。悉歸之公帑。諸從官曰。例也。笑曰。我以不貪爲例。歸無復世念。顏其堂曰止足。間御筍輿。或跨款段。縱遊山水名勝。與田叟野父相問訊。或臺使而下。及故吏屏干旄過之。欣然具鷄黍。燒筍蕨。清言竟日不倦。不及仕宦語。張居正故人也有鄉人入都者。乞書先容。乃具草幾千言。曰。崇寬大以存正體。曰。慎用人以肅官常。曰。宥直臣以開言路。曰。修戰守以重邊防。其言剴至。非人所堪。其子請易之。遷不可。旣而曰。上春秋鼎盛。江陵猶稚視之。且汰極矣。

是安能久。既而果然。以微疾卒。所爲詩文。清暢古雅。有漢唐人風氣。尤工八法。所著有詩文集十一卷。遺集摘稿皇華錄。京畿奏議。兩廣奏議。濟南議稿。郢曲同聲。楚越吟稿。西輶集。祇役雜言。修邊雜考。國朝典故。皇華便省錄。清音競秀錄。星槎萬里錄。官中紀事。

史官曰。李遷清足以勵薄俗。辨足以恇強藩。勇足以盪劇寇。天下才也。而能知止不伐。以功名終。近代賢公卿。鮮有儷之者矣。爵旣不稱。諡亦不及。請問諸司勳者。

申時行傳

申時行字汝默。別號瑤泉。吳人。少卽能爲古文詞。明經。人稱爲經神。下帷攻苦。曰爲者常成。行者常至。作祛倦鬼文。自勵。其後傳播入禁中。御筆改鬼爲魔。命中書繕寫。揭御屏。外艱服闋。提學御史。吳遵遘遺才第一。時吳令某編卷於句容佛閣。至時行卷。忽有巨人從空冉冉下。左右吏皆相顧錯愕。識者曰。此大魁祥也。嘉靖四十年辛酉舉於鄉。以尙書魁其經。明年壬戌會試中式。廷對爲第一人。授翰林修撰。一日代大學士袁煒草進白兔表。及白兔瑞應詩。大見稱賞。於本朝典章多所熟悉。癸亥憂歸。服闋。丁卯復守故官。尋晉中允。充經筵日講。無何晉諭德。修世宗實錄。充副總裁。未幾。穆宗崩。凡詔誥勸進箋表。皆出其手。聞皇太后及神宗覽之。爲之色動。萬歷元年癸酉遷庶子。充講官。甲戌陞少詹事。兼侍讀學士。掌翰林院。丙子晉詹事。充會典副總裁。一切綱領義例。悉苦心創定。丁丑主會試。尋晉禮部侍郎。穆宗實錄成。加太子賓客。已改吏部侍郎。是年張居正奪情事起。一時廷杖五人。時行不勝義憤。詣政府方解。不可得。丙夜

密從緹帥楊俊卿謀調護之。五人拜杖出。時餽囊饘。及出都門。一一料理之。扶維調護。而自不任德。戊寅。以吏左侍郎兼東閣大學士入閣。參預機務。己卯春。進禮部尚書。是歲江南災。時行奏謂今日揀時急務。要在休養生息之意多。而鉤鋤搏擊之事少。庶可保固根本。振起凋疲。上然之。庚辰。主會試廷試。居正以其子鼎甲爲請。且示以上意。時行佯爲不省。列二甲。居正怒。密從闈保處易置。中外譁然。而知非時行意。八月。皇長子生。時行喜曰。時哉不可失。宜有大慶。施天下。張四維以爲然。乃盡出諸司所擬寬恤條損益上之人。謂此番詔書。名爲寒陽春光。先是加少保。疏辭不允。癸未。張四維以憂歸。時行爲首輔。疏請簡用閣臣。乃薦新安許國。上從之。已議起廢。吳中行。趙用賢。晉中允。一時大小臣工。以言得罪。以冤見抑者。次第登用。盡洗舊習。言路大開。已而止。太和內監于預都司之敕。減三吳織造之額。寢戚畹李偉國公之贈。請潞邸之國之疏。止遼府爵土之復。恤江陵老母之田。上皆從之。是歲。以雲南隴川平。晉少師中樞殿。力辭止。予文廕。明閣臣自張治前。凡有軍功。無不廕錦衣者。其有軍功無世廕。自時行始。嗣後遼左報捷。慈甯王竣。會典告成。上咸特敕褒獎。晉秩。累疏辭不拜。嘗語其子曰。吾叨冒極矣。深恩難報。厚福難消。人以爲名言。乙酉夏五月大旱。時行引咎乞罷。上慰留。時行遂力請敕錄言官。減上供袍服。停造磁器。蠲免天下災荒錢糧。俱次第允行。一品滿。加特進光祿大夫。支正一品俸。仍廕一子。中書舍人。一日。上幸兵仗局。觀兵器。或言先朝有內教場。蓋指正德年間事也。上欣然舉行。乃選內豎二千餘人。更班團練。每朝。砲聲相聞。外議洶洶。時行深以爲憂。乃偕同官具疏。略以爲宸御清嚴。宮庭邃密。詎宜有此。及今停止。一以

安人心。一以杜亂萌。一以養君德。一以省濫費。不爾。恐蹈正德年間覆轍。不報。時臺省及諸司官亦以爲言。如故。時行曰。此不可以口舌爭也。乃語諸大璫曰。此事屬在禁廷。諸人擐甲荷戈。未明入內。設奸徒竄入。爲害叵測。卽有緩急。外廷不得聞。宿衛不入。吾輩大臣束手無計。此皆公等剝膚之患也。諸大璫皆悚然變色。乃乘間以閣臣言力奏上。遂命罷其牖諫潛移類如此。丙戌春正月。皇長子五齡矣。時行念上亦以五齡出閣講讀。乃約同官於歲首題請册立東宮。以重國本。略曰。國本係於元良。主器莫若長子。故漢臣有云。早建太子。所以尊宗廟。重社稷也。皇上德澤浹於寰區。嘉祥鍾於允嗣。自萬歷十年。元子誕生。詔告天下。五年於茲矣。卽今麟趾螽斯。方興未艾。正名定分。宜在茲時。查得祖宗故事。宣宗以宣德三年立英宗爲皇太子。時年二歲。憲宗以成化十一年立孝宗爲皇太子。時年六歲。孝宗以弘治五年立武宗爲皇太子。尙未週歲。蓋冢嗣升儲。所以明震器之重。冲年貽哲。所以端蒙養之功。成憲具存。昭然可考。今元子聰明克類。岐嶷夙成。中外臣民。屬心已久。伏望皇上深惟大計。以今春吉旦。敕下禮部。早建儲以慰億兆人之望。以固千萬世之基。至於出閣講學。及朝賀等儀。不妨次第上請。旨需後。越一日復疏。極言宜册立。報聞。周府中尉勤倅越關懇寃。語侵撫按官。上意欲罪撫按。時行力救。且云。國家大紀綱有四。親王册宗儀。將軍轄軍士。有司轄百姓。提學轄生員。故大小相維。而天下治。若宗室事不問親王。不下撫按。此亂之道也。上是之。是歲荒。奏借發臨德二倉餘米。以充賑濟。借支太僕馬價四十萬。以資糴本。而又以四事責成撫按。令每月一奏報。曰。田禾有無播種。曰。雨雪有無沾足。曰。人民有無流亡。曰。盜賊有無甯戢。上稱

善卽行之。丁亥時册立久稽。異議漸起。乃以建儲封王並舉入奏。略謂本朝故事。成祖以永樂三年立仁宗爲皇太子。卽封趙王。英宗以天順元年立憲宗爲皇太子。卽封德崇等王。臣思列聖傳家世守之法。仰體皇上愛子均一之情。竊謂皇長子宜正東宮。皇第三子宜卽分封大國。一時並舉。尤爲盛事。疏入不報。庚寅元日。上御毓德宮。煖閣召四輔臣入。諭之曰。朕是心。先生是股肱。心非股肱。何以運動。又曰。朕旣委任。須代朕主張。任勞任怨。對曰。敢不服膺。因勸上誣養聖德。保養聖躬。清心寡欲。戒氣平情。已又勸上時御朝日講。以慰羣情。瞻仰已又以建儲豫教上請。上皆首肯之。方與同官叩謝出。上令內官援止之。云侯宜長哥與先生每一見少選。皇長子皇三子俱至。上於榻前手攜皇長子。向明正立。時行等注視。因奏曰。皇長子龍姿鳳目。岐嶷非凡。皇三子玉筍蘭芽。娟秀可愛。仰見皇上昌後之仁。濟天之福。昔商山四皓一出而羽翼遂成。臣等雖不及古人。而幸遇聖明。特鍾慈愛。造膝之一見。賢於苦口之萬言。因懇請册立封王。又屢疏請豫教。俱不報。兩京九卿科道咸合辭疏請。時行又特疏曰。當今第一大計。無如册立元子。而臣等第一職業。亦無如建儲一事。夫祖宗家法。傳昇萬世。列聖相承。儲位未有不歸元嗣者。皇上纂祖宗之緒。須守祖宗之法。皇長子當正儲屬。萬萬不可遲疑。一也。臣等先年奉旨云立儲以長幼爲序。今年又奉旨云父子至親。長幼有序。元旦之辰。皇上親掣元子。今臣等諦視。又親諭臣等長幼自有定序。今言猶在耳。皇上豈得失信於天下。失信於臣等。二也。向來道路訛傳。皆謂皇貴妃獨蒙眷注。屬意所生。京師百萬軍民。頗徇後議。獨臣等不信。以爲元日親奉玉旨。謂皇貴妃每勸册立。安得有此不根之言。乃今鄭國

泰之疏。既上而不報。已票而不行。則外間又生疑議。以爲皇貴妃姑令國泰塞責。皇上姑爲皇貴妃解紛。使疑在宮闈。憂在宗社。何以杜百萬軍民之口。副四海九州之心。三也。臣等竊謂祖宗一定之家法。決不可不遵。皇上已出之綸音。決不可不信。皇貴妃未白之心事。決不可不明。皇上何不早發德音。定以明春册立元子。敕禮部具儀擇日。立決大計。盡釋羣疑。使臣等得關其忠。無事曉曉強聒。自外於心膂股肱之託也。臣等之言。盡於今日。臣等去就。亦決於今日。不報。已而上特命中書傳諭之。詞意甚厲。時行知上督過之甚。不得已。復言此舉一日不定。則流言一日不息。皇上心事一日不明。如必欲暴自上意。解釋羣疑。莫若先令出閣讀書。再議册立大禮。上覽奏報可。嘗疏言祖宗立法。入皇城者不得持寸刃。經斷罪者不得充宿衛。向者內操人員。持杖出入山者。每有隱憂。今內操久停。而兵器猶藏。謂當通行簡查。申明禁制。此又防之於漸者。上覽奏曰。元輔真可謂忠愛憂慮之至矣。因屢請册立。上惡煩聒。適工部郎張有德請上大怒。時行等力救。上不釋然。因力辭乞骸骨。上許之。時行瀕出都。以三事上陳。一曰。早立儲宮。以安宗社。二曰。力持廟議。以奠邊疆。三曰。甄錄逸才。以充任使。而復勸上慎起居之度。平喜怒之情。節用愛人。財以不蓄爲富。親政典學。治以無逸爲勸。娓娓數言。及歸。三年。皇長子出閣。至辛丑。册立皇太子。敕時行知之。陳謝疏中。猶諄諄然。冀上返初心。修始政。勿令已渙之汗。反而復行。不調之絃。更而復鼓。上嘉納。嗣後以皇孫覃慶。又以年及大耋。屢存問。上遣官賚敕。方及門。而時行卒。贈少保。諡文定。時行嘗語人曰。天下事。平心而揣。則脈給明。平衡而治。則差數均。平氣而調。則節奏和。故其在事。一切以持平行之。不藏宿。

伎儻過即釋然。又曰：吾受上恩，寵無以報，惟是不居功，不弄權，不市恩，不微名，以誠心直道處己待人，可幸無罪。陸樹聲嘗曰：申瑤、泉正已以御物，侃直以持國，是苦心調劑於國體物情之間，而進退從容，沈幾不露。王錫爵曰：參合人情，權衡國論，聰明才辨者，猶能之。吾獨服公於中旨，迫側衆咻紛擾之時，不難不疎。翁如廓如，信口信筆之語，有更數千言而不能盡。數百歲而不易者，所著有繪屏奏草四卷、繪屏笥草四卷、繪屏簡牘十卷、賜閒堂集四十卷。子用懋，進士，爲太僕卿，用嘉舉人。

史官曰：申文定嘗江陵專擅之後，而能平心以御物，退讓以自持，盡反伎儻吐茹之習，爲師師吉吉之風。近世賢相，無能絜其度量者。武侯云：我心如秤，不能爲作輕重。文定亦云：平衡而揣，則差數均，平氣而調，則節奏和。斯言可謂端揆金鏡矣。

劉景韶傳

劉景韶，字子成，崇陽人。少家貧，無書可讀，往往從人所借鈔，又不給，則間行之市肆閱之，歸而闇誦，且釋其義。至終夜不寢，其所屬舉子文，亦以臆摹時式，然輒工，始試爲諸生，輒利，諸生諱謂其鮮所師授。崇陽令沈頌曰：是子天下才，非而曹所知也。無何，遂舉於鄉，時頌猶在，詫曰：是子真神授也。又三年成進士，授潮陽知縣。潮陽故遠而名爲饒，俗以鬪勝。景韶至，首寘其大猾於理，乃次第問俗所利苦而平之，除虛賦，搜伏稅，禁逸鹺，導河利，築海堤，釋滯獄，筴郵警，凡十餘事。次第就理，謳謠載道，逾四載，入爲刑部主事。曹務閒，偕其同舍郎李攀龍、高岱、魏裳輩，相切劘，爲詩有聲，而間益習絜法，所請讞以精明稱。攀龍戲曰：是

日囁囁者何安所得司空城旦言乎。久之敵入犯都城。景詔以選守安定門。時出密畫佐其長敵退。進署職方員外郎。會築外城。景詔得稍見長。睥睨間以功予實授。而忌者用喜事孽之。出爲貴州兵備僉事。屬峒苗之界。貴與蜀者。閔議殲與撫執便。景詔爲筴曰。撫未易也。殲吾所不忍。書不云乎。分背三苗。姑曉以禍福而分背之。使貴者貴。蜀者蜀。諸苗帖然。所全活無算。總督馮岳甚器重之。薦爲撫苗參議。苗之擁圍箐者三十六種。八十三寨。其魁跳梁錯發。景詔乃與岳合筴。捕誅其尤黠者。既奏功。景詔獨得大會王黻。任宸等。獲首寇二百餘。詔賜白金。加歲俸。會江南北屢中倭。羽檄不時。上進按察副使。治兵備江北。而李遂時爲都御史。撫其地。景詔念所治與遂皆創府。而民久不習兵。卽賊至而亡。所問弓矢。弓矢具矣。度不能出一鏃。乃請於遂。以間行視要害。外地自瓜儀內而如皋。北抵掘港。皆列水陸戍。其天長寶應則城之。繕衝選鋒。務爲不可勝以待。明年倭果大至。前鋒犯如皋。景詔單騎赴之。敕吏士開門以待。不敢逼。援兵亦至。乃呼諸將歆盟。書其名相服曰。是戰也不利。我必死之。諸將咸奮。會賊據白浦。意欲西。景詔計給之。東遣諸將據丁堰爲覆。自率兵擣之。景詔又築廟灣重地。請於遂。以大軍軍焉。而身尾賊。殲其殿於瀆莊。賊驟西。與遇於余莊。復敗之。又敗賊於馬遷。復尾賊於燕莊。賊犯泰興。追之。泰興民爭挽之。謂急入保赤。子景詔笑曰。城外非赤子耶。且吾在何虞。城。麾兵前擣賊張字莊。走之。乃會兵於廟灣。合戰凡四日。大敗賊。所擄獲無算。諸家欲置酒高會。景詔不可。曰。三沙之賊。勢且趣我。未幾。三沙倭果北渡。徑趨如皋。乃率諸將分道進。掩之於仲家園。燕其衆。賊走鍋圍。與參將邱陞追及之。陞突前。中伏死。景詔併將其兵。力戰。

敗之。已戰於小海灘。已戰於劉家橋。已戰於白駒海沙。各有斬獲。賊窘。悉衆趨劉莊。食其粟。當是時。三沙之裨將劉顯。以失律。罰自劾。景詔器其才。悉中權之勁畀之。曰。請以賊爲若功。顯奮而前。景詔鼓之。賊巢潰。追殲之於白駒場。殆盡。零賊遁去。景詔前後不解甲者三月餘。生獲數百。斬首三千餘。焚溺無算。寇遺器輕重以萬計。捷聞。上大悅。進俸級二。賜白金文綺。遷浙江按察使。治兵如故。再論功。進俸級一。賜白金綺帛如前。尋進右僉都御史。提督軍務。巡撫鳳陽諸郡。當景王之國。道淮揚。中官責供張驛騷甚。景詔力持之。民得無擾。郡邑頌功德者。牘至。至爲六祠祀之。尋內艱歸。爲御史。誣彈。予閒住。服除。杜口不言。寃與破倭時事。穆宗卽位。詔復其官。卒年六十二。所著有秋蛩燕臺戰餘漫稿。太白原稿若干卷。別號白川。世稱曰白川先生。

史官曰。闕

明書卷一百三十四

列傳四

名臣傳十九

孫鑑傳

孫鑑字文仲。燧之孫也。父陞禮部尙書。證文恪。嘉靖丙辰成進士。除兵部主事。迴翔兵部郎署數年。世宗齋居久錮。言事諸臣屢與大獄。舉朝廩廩。鑑上疏極諫。借奏宋爲喻。盡紕不法事。壅蔽者徐階。咤曰。懂也。郎奈何輕批逆鱗也哉。中官憚上英察。秘不以聞。遂移疾歸。穆宗初起南文選。歷尙寶。鴻臚卿。九年改太常少卿。右通政。進光祿卿。時張居正奪情。鑑乞休。家食十年。獨居一小樓。讀書嘯咏自如。萬曆十四年丙戌。以原官召進大理卿。時吳時來爲都御史。更律例。多紕鑿不可行。下法司議。鑑爭之強。兩請上。是其議。進刑部侍郎。改吏部。庚寅遷南吏部尙書。改吏部。是時事權初歸銓部。人情沆。一切遷除大政。不謁內閣。道遇閣臣亦不避。於是閣部水火。鑑感上知遇。汲汲以人才爲己任。時徵聘之典久廢。鑑獨於一二篤行士於科目外不次優擢。以維世風。於是江西舉人鄧玄錫推翰林待詔。劉元卿推國子博士。玄錫不赴。如貢士王敬臣。王升。馮行可相繼進。士論騰焉。癸巳春。大計京朝官。考功郎中趙南星慷慨曰。法之不行。

自親昵始。首摘其姻戚都給事王三餘。三餘少與南星爲齊名士。趙郡人語人曰。無書不讀。王三餘。天下奇才。趙南星。此察以示公。實忌之也。而鑼以廉其甥。文選員外郎呂胤昌。時胤昌爲時論所鄙。人譽鑼曰。以涇陽不庇其姊子。公固無成心哉。愀然曰。言此涇陽。此心苦矣。自是部院臺省。莫敢以意庇其私人者。亡何給事中劉道隆糾鑼權黨。無大臣度。上亦以專權切責之。已又以回奏不認罪。奪俸。鑄考功郎秩。諸朝官相繼申救。上不省。鑼去志決。獨以權黨二字不可爲名。上疏辯。報聞。乃堅臥乞骸。上遣中官賜養。羊上尊。辭疏累上。許之。歸。踰年卒。贈少保。諡清簡。鑼純誠質行。與人煦煦長者。意所不可。責育莫能奪。時三王並封議起。諸曹郎岳元聲等。皆引祖訓。上封事。久不決。鑼率九列廷爭之。諸論始是。史官曰。闕

陸樹聲陸樹德傳

陸樹聲字維吉。別號平泉。華亭人。登嘉靖十九年庚子應天鄉試。魁其經。明年會試第一。廷試御批第四。乃置二甲第四。選入翰林。爲庶吉士。疏歸省。又三年入京。故事無它授者。以見嚴嵩無加禮。見世蕃與講敵禮。遂欲議它授。張治故庚子南畿舉主。夙器樹聲。宣言曰。林生意與臺省則令之。意矣。拜部郎。無所容。意乃以公議不合。授編修。惟鍵關孤立。一意謝絕諸賓客。一日偕詞林八壽嵩。衆服吉。樹聲獨青。衆問故。曰。不知。嵩目屬之。又嵩宅九月盆菊繽紛。衆以事至。爭相呈身取色笑。樹聲從後。謂諸人曰。無壓倒陶彭澤。聞者解頤。館師初入館。闕大學士手卮酒。其人跪飲。樹聲怒。誦誦不休。高儀笑目之曰。乃公性發耶。肘

而立出。是時詞臣多攻青詞爲職業。獨謝不爲。嵩雖恚樹聲。每心折之。同館有爲冢宰不禮者。羣訐嵩所。嵩曰。公等如林子閉戶寡交。彼橫逆者何施。外艱歸。六年。起補南國子監。辛酉。晉左春坊諭德。署南翰林院篆。改侍讀。不赴。乙丑。起太常卿。掌祭酒事。貞教澍軌。略去繁瑣。所著汲右叢語。及諸訓條。先定志。歸於慎微。國學奉以爲功令。猶存獎惜愛人才。凡人厲夏楚。張劾頤。不能感人。十一。樹聲感人。人多於精神。盼睐中。戊午。晉吏部右侍郎。以病請不起。三年。起原職。教習庶吉士者再。又兩疏辭。時高拱挽機務。遇不如意事。輒三歎曰。平泉鴻飛。軒舉吾甚愧之。而趙貞吉猶心嚮之。以爲得此老成人。左足入朝。上亦爲感動。神宗卽位。晉禮部尙書。疏辭不允。姑免赴。計去國時二十年矣。陛見卑居正首謁。六卿於居正。多改容事之。樹聲亦以先輩自處。席必端。言必盡。居正滋不悅。而所署部務。絕諸請託。會和虜議增歲幣。樹聲曰。虜欲無窮。國財有限。以有限填無窮。涯壑恐不繼。識者偉之。禮闈屆期。訶知居正欲私其子。而以其能塞羣望。乃勃然欲歸。時有進語者曰。今非昔。相公幸稍逝。禮闈柄軸在曉夕間。且江陵意固屬與同事。樹聲心惡其入。而怒曰。迺翁二十年。出山爲門牆。鈞軸地耶。行矣。吾家輩尊無恙。遂五疏乞歸。許之。乃條列十事奏上。一。辨宮府。抑戚倖。斥貂璫。皆觸時忌。居正得之心動。曰。誰令乃公爲此者。擬報聞。歸臥雲間者三十餘年。弟都御史樹德請歸侍。旣而子行人彥章請終養。上嘉其孝。特與常俸。士人高而榮之。又從子考功郎請南侍。芳晨良夕。昇藍輿出遊。丰神矯矯。咸作天際真人想。奉特恩加少保。夫米。又賜存問者三。樹聲退然穆然。時寓招提。時棲名園。冥心木榻。類苦行陀頭。一號無諍居士。一號長水漁隱。一號適園主人。

一號九山人。一號大歇生。所著有汲古叢語、適園雜著、禪林餘藻、清暑筆譚、陸學士題跋、毫餘雜識、長水日鈔、病榻痛言、善裕吡議、公約、家訓、卒頭溫熱、徧體柔和、作黃金色、里人望巨星、從田間及屋角墜者。二贈太保、諡文定。

陸樹德字與成。少貧。費於辭。四十餘始成進士。授嚴州府推官。在事精明。雖耿介絕俗。而不喜爲煩刻。每勇往無所避。太守意忌之。弗善。守入覲。署郡事。而巡撫處有所妻非屬。詞守何狀。樹德力爲明。其無他。守得免。亦不使守知。奉檄按武義令。令夜行橐。樹德叱之出。盡法無貸。御史龐尙鵬於僚屬鮮當意者。至樹德獨無間言。曰廉士廉士。陞刑部主事。益治文法。亡何。改禮科給事中。穆宗每視朝及經筵。默不發一語。樹德謂易上下不交爲否。非與公卿輔弼相論難。何以劓君德而酬萬幾。上疏極言之。不報。又條議諸邊計甚明。哲歷其科右左。巡視內十庫。乃擇諸中官之謹愿者。好語之曰。輸戶以公等抑勒。屢破家。然非自公等始也。吾欲言則傷公等。不言則不忍於破家者。公等胡不自謀之。而令我曹得爲名。諸中官爽然相戒。弗留難矣。遷禮科都給事中。皇太子將出閣。樹德疏所以資睿學者。而未歸之身教。語凱切詳至。是時太學士高拱張居正讀其疏。歎曰。向永流也。穆宗頗倦政。而日月交蝕。旱魃爲災。樹德前後疏。皆危辭侃侃。會上不豫。乃疏請慎藥餌。內言伐陰之劑不可服。又言仲夏亢陽之月。所宜謹慎。其指益危。上意不懌。留中。獨下其所請召輔臣以資靜養疏。諸閣憤謂輔臣曉醫耶。必靜養而召輔臣。如我曹何。諸閣中復有請開戒壇爲上造福者。業得請矣。復抗疏言佛法故非聖世所有。特其空寂澹泊。稍有合於吾儒寡欲養

心之旨。故其說久而不廢。若乃戒壇度僧。男女叢雜。宜淫導修。固佛之所深惡者。奈何輕信左右之說。而遽復之。夫陛下不以聖躬爲虞。無所事佛。陛下而以聖躬爲虞。則大禹之惡旨。酒成湯之遠聲。色萬全道也。亦弗所契也。上爲止之。未幾穆宗崩。時闈馮保橫甚。高拱決筴去之。而樹德與言路各有疏。發其姦私。不勝保遂逐拱。併讎諸言者。獨不能有所加於樹德。會當議祧廟。樹德請毋祧宣宗。而祧睿宗。於嘉靖初所建世室奉之。議不行。天下譴之。神宗卽位。遷尙寶卿。擢應天丞。改太常寺少卿。故事。九列若四品。持資箒待選。亡滿考者。乃前後七年。以馮保在事。故抑之。以進南京太僕卿。入爲太僕卿。甫上。進右副都御史。出撫山東。會保敗。樹德益發舒。且感上知。思有以稱塞。入境。問民疾苦。罷供張。與使者約。脯修不相入。軍門絕私書。僚屬相戒。爲慎。絕優宴。齊魯之詰盜者。濫悉集成案覆之。而出其寃者。裁幕兵費。蘇里甲。戒苛罰。東人大悅。行部所給奉。不過蔬粥一算器而已。箠扑不妄施。獨於貪墨吏無所縱舍。時時一按核。皆以爲神明。德藩宮後有曰雲湖。故民田也。奪於王。業已歸民矣。而宦者與中官代保者。宏有連。必欲復之。執不聽。是以多齟齬之者。邑鬱不得志。上疏請告歸。歸闔門謝客。惟與兄少保尙書樹聲。日尋山問水。里中兒爭指曰。曰非兩疏也。耶。公踰階不敢當。曰吾何敢望少傅。爲人孝友忠信。而砥節秉行。有壁立萬仞之概。生平未嘗以私干人。亦不受人私。其於諫忤旨。及犯權要人者數矣。然而竟以其身免。卒年六十六。史官曰。蓋雲間故有二陸云。樹聲難遇。易退。振衣千仞。而能履虎不驚。觸舟無怒。所謂鳳凰芝草。庸愚皆識爲美瑞者也。樹德論難侃侃。犯顏劇上。一不得意。則奉身而退。爲時完人。二公皆晚而進。天壽平格。固

盛世之臣哉。

陳洪濛傳

陳洪濛字元卿杭州人成嘉靖二十年壬辰進士與其兄某對大廷俱誓而胡髯被膺班行中爭目屬之曰彼髯者伯仲也而偕國器授刑部主事歷郎中刑部號才藪其儁者往往習古文辭杯酒倡和洪濛長古文辭而不屑以是顯益精爲法比是時同舍郎吳維嶽杜拯盧夢陽王崇古翁大立王宗沐皆善刑名家顧獨推次其精六載擢知彰德府人意其自法曹出必斤斤三尺而殊不然務隱恤閭左疾苦小民戴哺衽而治所榦飭田野關橋梁固傳舍櫛刷彰德大治時郡所奉鄭王老儒慕危言以四箴上觸世宗怒時有廢侯詞伺指卽疏誣王罪惡至大辟以上上爲置獄使中官偕刑官緹帥往治之以屬洪濛力持之弗巧鍛亡所得中官怖曰如非上指何洪濛曰吾知法如是耳獄上王僅坐長繫國無奪其後復爵如故入覲能天下郡守第一遷江西按察副便飭九江兵備至則除戎器蒐卒補艘完城堞諸盜起必窮跡其窟而洗之長江偃然內艱歸服除仍得故治而益以楚之蘄黃其吏民鼓舞迎其入不待拮据而理進山西左參政時伊王治河南以驕恣不道聞上使刑侍郎趙大佑偕中官緹帥往按如鄭故事大佑左右顧無可任者既而曰吾得之矣故治鄭獄者陳守今在晉移以往可也上疏請之卽報許而其治伊獄捕逮其國臣翼虎者攷訊不小借王坐長繫加等國除伊故寵王非鄭比洪濛不以指故小屈法天下快之還晉獲北虜諜白蓮教大盜論功賜裕金又常設法輸庚數萬石救隣道饑擢湖廣按察使有二令坐法嘗

讞斥其墨者而寬其中微文者。人服其明。斷遷四川右布政使。甫離境。而見寬令籩金爲壽。乃大怒罵曰。吾嚮者誤寬之。何所自得金耶。令懼而去。尋轉左。時上方亟土木。取材於蜀。困且不支。洪濛從容調營費。公私俱賴以濟。上計復爲天下第一。拜都察院右副都御史。巡撫貴州。兼督川東辰沅諸軍。當是時。施州蠻黃中叛。跳川東。支羅牛欄坪。圍剽掠傍郡邑。詔洪濛偕楚蜀二鎮合兵討之。乃自川東率大軍入深箐。多張疑兵。誘其毒矢石殆盡。而間道募死士繞出其後。急擊大破。殺敵千五百餘級。焚洞砦百餘。而蜀兵亦從西北躡之。黃中迫。乃挺身走入楚。叩軍門請死。時貴與蜀兩鎮有戰功。而楚坐得酋首。蜀自以驅之。故與楚爭功不能決。洪濛第謂楚蜀勢異。不有勦者。誰與撫地。不有撫者。誰與勦寇。且皆天威也。三省安得徼之。疏上。兵部倚以決。更推其能讓。而洪濛又與都督石邦憲合策。破叛酋楊珂之六峒十二寨。悉俘其父子兄弟。餘黨歸農者以萬計。前自計返。聞其兄計。過哀屬疾。至是劇。遂上疏請骸骨。許之。候代。而鎮遠項水巴恨苗普面等叛。率兵與疾剗平之。歸而御史三上前。後戰功被賜白金文綺加等。性伉直。不能腹藏過。然亦不復留。尤不好侈靡。間挾二奚。輕刀信步。湖山間卒值之。不知爲貴人也。爲詩文。援筆立就。所著有五經輯略。性理纂要。諸子粹言。葩經講義。督撫奏疏。台鴈咏藁。歸時年方五十。至萬曆九年辛巳卒。年七十人稱爲抑庵先生。

王錫爵傳

王錫爵。字元馭。別號荊石。太倉州人。嘉靖三十七年戊午舉於鄉。魁其經。壬戌舉禮部第一。入對大廷。成

進士第二人授編修。穆宗卽位，御經筵，爲講官，立褒其講書明爽切直。己巳陞南國子司業。明年轉北。尋陞右春坊右中允。辛未陞右諭德，掌南翰林院。神宗卽位，充穆宗實錄副總裁。癸酉陞右庶子，實錄成，陞侍講學士，尋陞祭酒。條上監規，欲行國初積分法，重胄子之選，申令公侯伯并應襲詣監習禮。一時模範嚴重，中外改觀。丙子陞少詹事，改修世宗實錄，充副總裁，書成，進詹事，兼侍讀學士。丁丑陞禮部右侍郎。是歲張居正父死，奪情，編修趙用賢檢討吳中行疏劾之。錫爵憂禍叵測，約禮尙書而下數十人，詣居正求解，拒不見。乃獨造喪次，切責之。居正不知所對，泣且拜曰：「上強留我，而諸子力逐我，我何以處？」第有自到而已。竟入不顧，卒取中旨。廷杖此兩人，錫爵持之大痛，且首倡贖贖，皆人所縮朒不敢前者。旣而江陵予假歸三月，佞者輒疏請卽召使吏，邀錫爵署名，叱之曰：「此何事而以詭我爲，竟投筆起，乃上疏省親歸，居正敗，人爭搏擊爲名高。錫爵復持平其間，曰：『人人如此，如國體何？』後張氏得解免。壬午外艱歸，服除，進禮部尙書，召入內閣，預機務，疏辭，遣行人敦趨就道。乙酉入朝，上禁詔諛，抑奔競，戒虛浮，節侈靡，疏又疏關橫議，止新工，所裁省以百萬計。錫爵旣在政地，壹意佐上急民艱，進貞良，屏貪墨，丰采踔絕。丙戌充會試主考官。丁亥重修大明會典成，加太子少傅。先是入都，首以朝廷裁恩澤，士大夫重廉恥爲奏，故凡陵工、河工、邊工及玉牒加恩，皆辭允之。戊子江南歲大疫，力請破格蠲賑，貧民得以不流。時國本未定，巨閣張鯨潛蓄異意，挾東廠勢張甚，錫爵與同官決策除之。御史馬象乾疏論，且語侵輔臣，上怒，下詔獄，給事中李沂繼疏復觸怒，予廷杖。錫爵皆力爭之得釋。鯨亦敗，是年加太子太保。庚寅元日，召四輔臣入，上手

擁皇長子令就視。輔臣趨拜已。命皇三子繼出。輔臣擬拜如前。上搖手止曰。不可。旋出評事。雒於仁疏。欲實之法。而獨目屬錫爵。曰。卿意云何。對曰。于仁誠有罪。若予以重法。則于仁之罪人不知以爲誦上。而以爲納忠。皇上之法。人不知以爲治狂。而以爲拒諫。上意頓釋。因以升儲。視朝上首肯之。明日忽奉御札。册立豫教。分爲二事。一可一否。甚而疑羣臣之請爲離間。乃上奏曰。凡稱離間者。本貴而間使賤之。本親而間使疏之。皇上手擁皇長子。明示臣等以長幼之序。臣第因而早勸册立。以成皇上之所欲貴。因而進愛勞之說。豫教之方。以成皇上之所欲親。何名爲間也。且道册立與豫教。皆不可緩。旣而御札連下。册立元子。倫序已定。朕豈有溺愛偏執之意。待過十歲。大典一並舉行。錫爵因謂同官曰。聖意無他。止以册立大事。不宜自臣下發之。吾輩但當默俟。會礦議起。上遣問閣臣。錫爵陳其非便。一防礦徒。二費多得。不償失。三官隸釋騷。四示國匱形。令四疆得窺淺深。非算事。寢後去而採役興。辛卯以母病數請歸省。久之。濱行。疏乞上舉朝講召對之儀。躬祀天享廟之禮。除額進加進之例。錄建言廢棄之臣。皆一時至計。歸七辭。不允。上趣之。癸巳入朝。上悅。賜白金錦衣麒麟服。居數日。密以建儲請。上諭援祖訓。立嫡不立庶。欲暫將三子一併封王。若中宮無子。乃行册立禮。錫爵封還力請。上不聽。又疏請先行豫教。安人心。皆不報。復疏陳太交要務。期以定國論。一政體。反覆數千言。又請召對御門。發章奏。灑宸翰。免口傳。及擬定進講經書資。啟沃。而殷殷於爲君國者如此。八月彗星入紫微垣。錫爵奏言紫微垣王者之宮。太子之象。惟早行册立。可禳此變。上需後。又奏曰。皇長子年十三矣。復何需。民間子弟無十三歲不讀書者。況國元子乎。上曰。俟

之乃連六疏上略不爲迂。上又申三王並封之說。而錫爵極論當有差等。上乃報可。因請侍班講讀。遴詞林諸臣。并擬閣臣侍從。臣以上悉用東宮儀。天下始曉然知元良之位定矣。而中官開買出閣之費。至賂三十萬。復具請減十之三。甲午河南大饑。人相食。錫爵請與同官盡辭薪俸佐貧民。而亦望皇上暨兩宮各量發內帑什一以賑。上及中宮貴妃各有助發。全活者不可勝數。自念國本既定。可了出山之局。因密薦舊輔王家屏會病作。上爲之發帑建醮以祈安。病甚。辭疏允之。特加吏部尙書兼建極殿大學士。賜白金彩幣。行人護送馳驛歸。臨辭。勸上戒盛怒。親廟享。勤視朝。重詔令起廢臣。核議論。發章奏。惜老成。慎禮罰。節財用。飭邊備。稽吏治。抵家數月。母卒。上聞。遣官賜札及贖祭。又遣官視葬。是冬。皇上以册立禮成。上聖母徽號。推恩舊臣。遣官賚敕存問。曰。册立朕志已定。但因激沮。故從延緩。知卿忠言至計。尙鬱於懷。今元子已册立爲皇太子。冠婚並舉。念卿家居。係心良切。特諭知之。乙巳。皇太后六袞。皇孫誕生。加上徽號。推恩。再被存問。錫爵陳謝。附以規諫。丁未。上思之不置。復召入輔政。加少保兼太子太保。遣官敦趨。適病卒。家以遺表聞。上震悼爲輟朝。凡祭葬皆加等。贈太保。錄其孫爲尙寶司司丞。諡文肅。子衡舉順天鄉試。第一。成進士。有文名。

史官曰。錫爵先後入相。調護升儲之力爲多。然亦以此蒙詬。處人骨肉之間。宮府間絕。昌言則內激。入告則外疑。蓋其難哉。需遲歷年。更端納牖。注意漸移。元良斯建。而錫爵身已遠矣。神皇遣中使詔之於家。若家人父子之告成事者。自際之泰。史册青蒲之功。何可沒也。其語岳元聲曰。古人留侯鄴侯。皆以權勝。權

則未也。亦可謂迂其身以善其君者矣。

陳有年傳

陳有年，字登之，餘姚人。嘉靖四十一年壬戌進士。除刑部主事。丁卯調吏部驗封主事。歷考功文選員外郎。晉稽勳驗封郎中。會成國公希忠薨，其弟挾鬪馮保爲重。張居正陰主之，以張懋例請贈王。下部議，皆唯唯。有年按令甲持之堅，居正擬旨，竟王之。有年移病，或曰不已急乎？曰不然。郎官與宰相殊，宰相或忍小就，大有年職司封，封外無職矣，不得其職，吾直行吾硯，耳。竟歸。萬歷十二年甲申，起稽勳。歷考功文選郎。居正敗，有年芟其餘孽，彙征諸名流。海瑞家食十餘年，久不召，特起爲南吏侍郎。上亦嚮用，特改左都御史。乙酉擢太常少卿。丙戌以僉都御史巡撫江西。懲墨吏，絕餽遺，簡樸爲諸司倡。境內肅如。戊子薨。大稔，有年酌積儲盈，縮量出入而均劑之，心獨苦。會方萬山爲南御史，有賈人子流言，以遇糴糶有年遂罷。庚寅起原官，提督南京操江。辛卯晉副都御史，刑部侍郎，改兵部。壬辰改吏部，尋轉南京右都御史。癸巳轉南京吏部尙書，尋轉北。赴召日，以二敝籠隨，郵吏指而歎曰：此亦太宰邪？視事止息公署，於朝房見客，中官人自失，各肅門狀曰：公洵潔矣。吾儕許以情白否？謝曰：老諺非敢爲名高，第中外一心，令朝廷清如止水，不大善乎？皆伴應曰：諾。有年大要以核名實，崇退讓爲主，且汲汲引用禁錮諸臣，觸忌諱不顧。未幾，刑部以中官獄逆上意，盡譴一司官，而不與事，不列名者，閣臣以請，上特宥之。命如例，許所司復請，而故文選郎王教削籍時，亦未經列名，因援例請，上怒曰：此新令也，安得竄前事耶？姑不問，有年引罪乞

休不允。亡何。會推閣臣。忤旨。盡謫。選司諸郎。願憲成章。嘉禎等有差。有年上疏。請宥諸臣。不允。再疏乞骸。曰。臣不能多記。近年楊巍爲尙書。臣郎文選。會推閣臣六人。今元輔王錫爵是也。臣籍餘姚。前有兩閣臣。弘治時。謝遷。嘉靖時。呂本。皆由廷推。言止四品。而吏部尙書。聞淵。耿裕。皆推首推。今聖諭先名望。繼不拘資品。意甚盛矣。臣敢不仰承。臣擬王家屏等七人。皆時望所屬。又謬以孫繼孫。丕揚爲不拘資。馮琦爲不拘品。及奉後旨。通列名上。竊丕揚削去矣。李世達係二十年推推臣。安敢違詔。詔下再譙讓。臣深懼焉。臣愚劣病憤。以清朝爰立盛事。取自聖明。督過大譴。臣卽褫職。且有餘愧。皇上獨舍臣而罪司臣。臣能靦然已乎。疇咨之義。自堯舜迄昭代。不廢。卽先朝卜相。不盡由會推。未有不以會推詬者。至臣以爲詬。此不在法。在臣匪人耳。儻其說遂長。使相臣由他途進。臣罪大矣。上不允。有年哀懇。稱病篤。上眷留。遣中官賜養。羊上尊。乃請益力。疏十四上。允之。賜乘傳歸。歸至西湖。其夫人逐之。索油蓋數百。有年訝問。故對曰。杌隉數椽。何恃不爲。暑雨計。聞者相顧嗟歎。有年雅留意人材。委曲保護。不令人知。孤標峻節。岳峙淵渟。卒諡恭介。

史官曰。闕

張佳胤傳

張佳胤。字肖甫。別號蘆山。重慶人。少穎敏秀俊。七歲父舉古書傳語。卽能談質如素習者。稍長。知府劉某出行部。得其文大奇之。使其與子游。劉固以古文詞名。又好談兵。多奇文籍。盡以屬佳胤。每與其子談。莫

雄而歎曰。夫英雄者。其吾家子房乎。當其動以無之用。當其靜以有之用。卒遇之而若素。忽斂也而巨測。若趙文子之談笑于衷甲。周條侯之安臥于攻壘。斯其亞矣。又益習先秦西京言。下上於黃初。大歷間。多所厭阻。二十三舉於鄉。明年成進士。授知滑縣。時緹帥挾上寵張甚。其所遣詞事官校。與旨並重。佳胤一日宴坐。有弁而急裝者。一髻輔之。至邑門。門者戟之。叱曰。我官校也。遂入。佳胤下與語。徑前曰。縣官欲捕若。邑歌氏豪亦與若有連。胥吏以下皆辟易。遂挾佳胤入別室。出七首交置於項。佳胤心知所謂。曰。若何欲。曰。予我萬金。陽驚曰。我何所得萬金。髻者曰。某庫有萬金。復陽驚曰。庫金誠有之。第上皆邑賦長名氏。若出十里外必敗。且今日予公庫金。法必死。予亦死。死等耳。甯死國。引其項曰。七首胡不下。髻者曰。我何忍。第欲得金耳。佳胤徐謂曰。邑郭中多富人。我出一紙授之。即不得萬金。可半致也。呼一小吏前。命筆書紙。應賦金者二十。曹曰。緹帥責金甚急。何人賦致二百金來。予之時丞簿。踟躕儀門外。尚謂果官校捕官。既得其所賦金主名。乃皆賊曹游微驍武者也。始知爲劫賊。亟進此二十人者。人奉二十金。而袖鐵椎前謁之。曰。民貧。所賦金止此矣。陽怒曰。賦汝人二百金。胡二十。何以解二公橐。復令一人前。忽躍而就之。髻者出不意。即自剄死。羣縛弁者訊之。名任敬。髻者高章也。使游徼四跡郊外。有三四輕騎皆逸去。拷問皆得其人。磔於市。佳胤見劫時。從容若無事者。劫既解。馱臥達旦。人以是知其可大受。居邑多暇。乃益爲歌詩。時李攀龍守順德。爲比壤。謁攀龍。出其詩爲贊。攀龍大善之。與折節講鈞禮。時歲大饑。平價納諸倉。爲粥食饑者。所全活數萬計。事聞。特賜金幣。擢戶部主事。與徐中行。梁有譽。宗臣。吳國倫。相酬倡。出權閩。

廣金帛毫髮無所私。道改兵部職方主事。外艱歸。服闋。補禮部郎。故社中友皆徒譎無在者。第與南海黎民表汝南張九一濮陽李先芳廬陵胡直多所倡和。側目者讒之。嚴世蕃曰。故王李社中白眼而譏執政者。此子尙無他。於是假風靈變。察諸官僚。謫除州同知。遷知蒲州。遷河南按察司僉事。飭穎上兵。尋改雲南提學。以經術文雅振諸生。昆明點蒼之勝。皆以古文詞收之。自是望益重。遷廣西參議。陞大名兵備副使。累陞分守甘州右參政。山西按察使。所至有聲。未幾超拜右僉都御史。提督應天等處軍務。兼巡撫。至九江。而安慶以兵變聞。道路洶洶爲梗。乃夜趨潯山。屬九江兵備使郵報。安慶軍門旦夕至矣。會叛卒前已就擒。餘黨謀外應者。脅息不敢動。佳胤自桐城走金陵任。謂得其實。則安慶之衛體宿重。與郡守抗。而知府吳志隆以南兵部出。稍裁之。又嚴核其占役。指揮馬負圖等忿役其舍人。挑悍卒故常爲盜。江洋者吳錫等。張旗幟犯志隆。志隆跳。遂行剽居民財。志隆乃與守備設策平之。佳胤上其事。請正法。而留守中官意惑之。謂守實激變。詔逮指揮等論死。以錫付其行法焉。守卒得白。時出履行諸郡縣。務持大體。不屑屑期會。務以民瘼吏弊爲急。以母老。上疏乞休。而吏尙書楊博故蒲人。熟其賢。固留之。所以褒揚甚至。先是佳胤爲高拱取才。而張居正亦從臾之。佳胤無所報謝。皆疑其偏有所厚。拱去而居正怒之。欲甘心焉。輩語中。會前安慶指揮王應桂爲之於居正。遂調用。乃歸。諸謂其冤。而才可大用者比比。居正乃大悔曰。吾幾失此人。時居正雖伎。而尙能爲國家急才。尋補南京鴻臚寺卿。未幾。遷南光祿卿。擢右副都御史。巡撫真保諸郡。未任。內艱。服除。召撫陝西。未上。改宣府。未幾。而虜別部長滿五擁鐵騎。闖入獨石。時久已通。

互市乃伏兵邀之生獲其副八賴滿五使求之辭甚哀佳胤思縱之則見狎戮之則見仇乃以屬大帥麻錦俾建旗鼓縛八賴將斬而馳赦之八賴叩頭流血曰微太師死矣佳胤諭以威德八賴誓不敢復擾邊然八賴馴而滿五驕明年挾益賞佳胤下令有浮予一餅一肉者斬滿五乃媾段奈台吉銀定儻不浪數千騎闌入邊殺略佳胤移文順義王罰段奈吉馬駝牛羊以償然滿五銀定儻不浪強俺答不能制於是廷議有少益賞以羈縻者佳胤疏謂今日之勢與曩異曩者權在虜不得不中彼之欲以全吾之體今者權在我願乃屈吾之體以伸彼之欲哉即欲有伸漸不可長彼苟叛而更大入臣自悉一鎮之力制之不效則治臣之罪慎毋使虜輕我上曰善虜既聞其治兵互相恐乃更還所掠人畜獻馬百六十四牛羊橐駝稱之求無解互市上謂其處分能懼敵勞賜金帛過當是歲所減省緡錢以數萬計城七堡一城又城獨石半壁貓兒峪三城修南山邊牆萬六千九百四十尺功倍而費省復屢賜金帛入爲兵部右侍郎是時浙江有驕卒之警浙督撫吳善言常取中旨減卒月餉卒訴之不聽遂噪而縛善言車中冠履俱破至演武場羣詈欲殺之會工部郎謙與二御史往解譬然猶責狀復餉而以二千金謝過乃已善言遂出遜於湖州此時吳楚閩越卒皆驕而督撫多憚至有穴垣以防不測者事聞張居正曰此事非佳胤治之不可遂命兼右僉都御史出鎮浙許以便宣行事佳胤甫與善言代而市民之亂起始杭城中諸柵俱有役夫司千畝諸王著者募游手充之其後必取其役其人惰多借貴勢以免夫數益以狹役益迫而遊手無所得食僑客丁佐卿假利便言之監司弗聽意忿忿曰謂吾曹無爪距耶遂謀之市猾相構詛爲亂會佐

卿坐他法。郡囊三木以徇。市猾相與篡奪之。諸亡賴子益麀集。行焚貴勢家。謂此其應役者。遂破撫按署門。掠衣資。諸官皆匿跡佛廬以免。事聞。佳胤謂其人曰。營兵不與市民合耶。曰未也。喜曰。吾知所以靖此矣。從吏惴惴無人色。佳胤飲食談笑自若。旣抵鎮。民行剽愈甚。盡毀諸寨以快意。千餘人且抵臺門。佳胤以輕輿出諭之。祇從材官劍客數十人。皆彀弓挾烏鎗以從。直前臨橋而諭曰。汝曹毋反。反則以天下兵擊汝矣。且汝必有所苦。曰。苦夜役。爲強有力役。貴勢者以免。免而官若罔聞。曰。易耳。奈何以汝一憤易汝族。卽下令除役。衆姑叩首退。退行剽如故。火光亘天。佳胤夜草檄。質明使一校馳諭之。衆裂其檄。乃大怒曰。上命我誅亂卒。今乃見亂民而靡耶。召游擊將軍徐景星。使呼營長入。勉之曰。亂民如此。非爾曹比。易翦也。何不自以爲功。可贖罪乎。咸踴躍聽命。又呼黠卒之首倡亂者馬文英。劉廷用。曰。聞汝二人前自縛請死。汝死法。胡不死義。且必不死。二人亦踴躍聽命。佳胤乃率討之。四戰皆大敗之。生擒二百餘人。縛丁佐卿與其豪五十人。皆斬梟轅門。餘悉下獄。其從亂者咸惕伏。鳥獸散去。乃具疏以聞。且謂邇來有司奉行太過。裁削太甚。徒務虛名。不究實禍。以至遠近離心。乘機竊發。始而兵變。繼而民變。誠見人心不固。戎首易生。若非仰藉明威。申飭法度。其接踵挾持。不知所終。上優詔褒答。以其奮身犯難。定變俄頃。賜飛魚服白金文綺。是歲以追錄宣府功。又以考三載績。錄一子予胄監。乃私念事旣平。而倡亂者未伏法。乃召馬文英。劉廷振。曰。爾罪可贖矣。爲之冠帶。二人意自得。揚揚羣卒間。多所侵侮。羣卒大怨恨。謂倡亂者自爲功。得官。而使吾曹尙惴惴殊憤憤。佳胤度二人與衆心左。無能爲。乃與兵備顧養謙。俾發諸營卒哨。

海去。遂密兵二人軍門。數而斬之。餘皆赦弗治。衆歡呼曰。吾曹始能食寢矣。復具疏聞。上大悅。拜右僉都御史。兼兵部左侍郎。召入。理部事。劾子聞之曰。子房之籌。與趙文子條侯之膽。少年時所自許。何若左券也。道拜兵部尙書。協理戎政。尋又改兼右副都御史。總督薊遼三鎮。兼理糧餉。至則申約束。蒐卒乘。信賞必罰。大將偏裨以下。凜若負霜雪。又似得春陽而嚮之也。時遼左大虜數犯邊。遼左之大帥李成梁。素負勇略。麾下有強兵。佳狐虛心寄之。共率精騎。搗其營。斬酋四十五級。甲首一千五百六十三級。虜馬一千七十三匹。駝羊弓甲稱是。捷聞。告郊廟。獻俘稱賀。加太子少保。錄一子錦衣百戶。世襲。予誥命金幣。士糧三萬騎入寇。復拒之。大有斬獲。賜蟒錦衣白金文綺。陞百戶爲副千戶。虜又大入。復與成梁搗其營。獲酋長十三級。餘八百三十七級。優詔加太子太保。進千戶。得世襲。當是時。山海關外之屬夷曰董狐狸。部曲頗衆。而桀黠多詐。貪功者以遼兵方強。與蘇兵夾攻之。可得志。佳胤獨謂邊釁不可開。藩籬不可撤。得弗行。諸所陳。邊備委曲數十事。於當虜出入要害。督梁墩百七十七座。牆六萬五千七百尺。營舍千八百楹。屹然金湯矣。入爲兵部尙書。中官驕。故以兵部爲外府。佳胤多執不之應。以是多怨。臺諫乘訖之。佳胤乃曰。功成名遂身退。天之道也。吾家子房非師哉。三上書乞骸骨。得歸。卒。有嶠嶠先生集若干卷。

史官曰。佳胤度足以鎮猝。權足以制變。當生死呼吸之際。而能出奇無窮。機警權略。亦張乖崖之亞也。昔魏公謂成事在膽。未嘗以此許人。佳胤談笑匕首之間。與魏公引頸暮夜之刺客何異。英雄有人。不得不以此許之矣。

余懋學沈思孝羅萬化傳

余懋學字行之。婺源人。生卓穎。有奇氣。九歲讀書。邑中。邑有鐵神爲祟。育人形聲。伺其臥。將窘之。遂巡觀其神氣。恬如。輒自失。曰。此貴人不可動。吾謹避。旁臥者皆聞之。自是崇匿不出。人皆心儀。其有大臣器。隆慶二年戊辰。成進士。授撫州推官。撫訐訟。蝟起。至則按宿牘。讞決若神。時有所縱舍。以示寬貸。閩郡肅然。會勦巨寇有功。賜帑金。神宗卽位。拜南戶科給事中。時張居正獻白燕蓮花頌於上。懋學以上方憂旱。下詔罪己。與百官圖修禳。而以祥瑞進。非大臣誼。抗疏論之。又南京守備中官信橫甚。省臺交章劾之。不能動。懋學盡列其罪狀。得罷。所以相及閩。皆目攝之。時居正挾上沖。欲盡攬大柄。銳意振刷。而實行督責。陰排異己者。懋學奮曰。執政意所嚮。一切以操切苛辯承之。如國體何。遂以五事上一。存敦大。二親審諤。三慎名器。四戒紛更。五防諛佞。言甚凱切。居正銜之。次骨。其慎名器語。獨指中官。請乞無度。恩賚踰等。中官恚甚。合謀於居正。斥爲民。乃怡然卷衣出都。人士聚觀。嘖嘖歎息。居正思中之未已。因下傳御史疏置獄。訊冀其叛引。傳備五毒。竟不忍誣伏。復以徵郡民爭絲絹賦。而關以激變歸之。移書撫按坐之罪。撫按皆指天自誓。不肯從。有第各程任卿。汪時二人以解之。獲免。明年借京察。削諸言事者籍。而竄名其中。又明年居正死。姦狀露。其言大讎起。故官舉遺賢。校圖籍。釐贈典。書無虛幾上。尋晉南尚寶卿。是時人人自喜。爭言以爲快。而廟議稍厭薄之。懋學慮開之爲塞漸也。且羣臣相忌。交口諛語。傷國體。乃列爲十蠹上之。謂執事者得必居功。而失則歸挽回之難。曰。誣上之蠹。受官公家。而因以爲市。曰。招權之蠹。已不受言。而

苛求於上。曰諱疾之蠹。以窺闕爲常。而弁髦公論。曰承望之蠹。敢於拂天子。而難於忤要人。曰雷同之蠹。逆距言者。而銷其氣。曰阻塞之蠹。倒置是非。曰欺罔之蠹。好勝不已。而忿爭不已。而黨比。曰爭勝之蠹。結歡要津。媚悅近習。曰諛佞之蠹。自負時流。急於表異。不觸而撞擊。無疾而呻吟。曰乖戾之蠹。後一一如其所指切。留尙寶者二載。晉太僕少卿。司農請馬直支邊費。懋學曰。等無馬矣。而又去其直。一旦緩急。何以應之。持不與。尋遷南光祿卿。己丑。晉南通政使。尋轉北。明年抵京。會臨洮失事。當事主和戎。惡聞邊警。邊吏持千金。居間寄封事。酒家爲謀。懋學廉得狀。立召而廷扑之。亟以聞。朝士多其不愧納言。遷南刑侍郎。改南戶部。兼僉都御史。總糧儲。每取記籍。鈎考斟酌之。勒爲成書。彙以絲絹事。坐程汪大辟。每懷昭雪之。不果。至此歎曰。沈寃未灑。吾何以立於朝乎。乃上書白寃狀。請解官贖二人罪。上竟釋之。攝工尙書事。罷中貴無藝之供百千數。以老罷歸。卒贈工部尙書。予祭葬。錄其子昌祚於太學。懋學內行惇備。里居自爲約。非賓燕不四筮。他酬應一以儉樸。爲閭里先。每褻衣緩帶。延見儒生。談權古今。無尊貴氣。性嗜書。饒著述。明習國家典故。議論娓娓。而不詭於道。所著有尙書折衷。春秋蠡測。論讀勿藥。閱史隨筆。日札家譜。娶稗隨事排續。皇明大政類編。嘉隆大政輯要。疏草南垣論世考留儲志仁獄編。凡十四種。

沈思孝。字純父。號繼山。嘉興人。髫年英穎。卓有巨志。於隆慶元年丁卯舉於鄉。戊辰成進士。辛未授番禺知縣。番禺爲金玉窟。墨者相望。思孝處之泊如。時總制爲張居正私人。以賄聞。一日檄諸富人之外國權子母錢。爲幕府費。思孝曰。是寃富民。引賊入室也。不可。又聽豪家說令縣開海口山。可獲稅無算。思孝復

曰。是必掘諸朽骨。職死不爲。如是類者甚衆。會兵亂。立撫定之。總制不能難。秩滿以卓異召。同事有憾於思孝。進屬總制曰。一令倔強。乃爾。藉令高跨省臺。乃公得燕然乎。總制密奏中之。不得與省臺擢。刑部主事尙書以其有文名。欲屬起奏草。謝不往。萬歷五年丁丑。與員外艾穆疏劾居正奪情事。語極切直。奉旨廷杖八十。謫戍神電衛。抱瘡赴譴。十一年癸未賜還。而說者曰。茂苑夙契。大公在堂。稍委蛇。亦臣子天性。思孝憤而起曰。乃公以一死博富貴耶。入都會御史丁此呂發科場事。楊巍疏此呂妄言。思孝與之爭。而漸有波及者。思孝私忿曰。江陵雖往。遺氛猶燼耶。於是有擊之者。遂由順天丞從南太僕卿。疏劾御史房寰。不宜論海瑞及三進士罷官事。拂當事意。請歸。歸數年。起副都御史。巡撫陝西。調河南。不赴。晉大理卿。駁閣郝金獄事。金司禮。張誠嬖人。誠恫喝不爲動。晉兵部侍郎。陞右都御史。協理戎政。疏減羊羴。及止盃甲之請。省金錢。無算。又廷爭日本封貢。乃與當事者左。疏乞歸。歸十餘年。杜門不出。年七十卒。總概思孝仕。所至輒與人角。陸光祖曰。吾里操行清潔。沈純父朱汝夔兩人。獨純父疾惡過嚴。人以爲確評。詩文爲王元美吳明卿諸人所推重。有集若干卷。

羅萬化。字一甫。號康洲。會稽人。少凝重。六歲就塾舍。舍傍屋忽圯。衆孩奔散。萬化端坐自若。識者異之。嘉靖甲子。領鄉薦。隆慶二年戊辰。舉於禮部。廷對牘上。穆宗有所更易。禱而探牘得之。置第一。及臚唱。狀貌清整。進止中度。一廷皆爲色動。授翰林院修撰。與修世宗實錄。辛未。分校禮闈。神宗卽位。錄成。陞侍讀。筮理詰敕。與修大明會典。萬歷七年己卯。出典應天鄉試。明年復分校禮闈。張居正柄國。以嚴峻爲治。萬化

意內不然之。數形歎論。而居正亦以其伉厲自遠。欲羅之門下。其幸客周生者。生伺邑。私欲從中縫合之。每過邸舍。數微詞動之。萬化覺。輒亂其緒。或舉酒浮之。令不得竟。居正寵奴尤七。建三清殿於都市。周生私爲請記於萬化。恚曰。吾天子侍從臣。而當爲奴作記耶。是歲復爲其子先期請試題。萬化愈怒。起曰。吾晚裝兩篋書。且出宣武門。謂吾難去官乎。何薄我。以是愈失居正歡。每與銓曹言。令外補。萬化或難之。居正怒曰。楊惟雄非狀元。不嘗補外耶。不果。而終居正不遷官。居正死。始遷右春坊右諭德。充經筵講官。明年陞國子監祭酒。條教甚謹。會有欲代之者。陰言於執政云。羅君親老。念之欲南。萬化聞之曰。正吾懷也。詰朝鞭馬詣朝房。如其言。請出爲南京禮部右侍郎。外艱歸。居五歲不召。朝實或爲訟言。十八年庚寅。復起南吏部右侍郎。辛卯入爲吏部左侍郎。無何。奉命攝部事。肅銓體。不假借。或諸司有失關請。輒面詰責。甚至逮繫掾吏榜之。銓事肅然。壬辰陞禮部尙書。兼翰林院學士。教習庶吉士。充正史副總裁。是冬回理部事。先是儲位未定。廷臣交章請。上以二十一年行。至是期迫。首輔王錫爵適以召至。深慮上意未可必得。而元子漸長。講讀失時。欲姑援嘉靖時封王例。出閣讀書。而陰系以立長之說。欲以動上聽。取萬全。以語萬化。萬化持謂不可。明日三王並封之命下。萬化率其佐詣朝房。陳說時勢。言甚凱至。錫爵謂已苦心。瀝膽取一時宜適。而公不已亮。意頗拂。萬化抗辯不已。面頰俱赤。明日繳敕諭。上疏曰。祖訓立嫡不立庶。蓋以有嫡有庶。自不得舍嫡而立庶耳。非嫡未出而必待嫡之謂也。臣不暇遠引。歷考本朝故事。皆有嫡立嫡。無嫡立長。因時豫建。計不少待。無他。爲宗廟社稷立重也。今皇后祿兆未彰。皇長子睿齡日茂。節奉

明旨昭如日星。而復援立嫡之經。暫從封國之典。將使觀望靡定。疑慮叢生。臣等具員禮官。深惟大計。有死不敢奉命。會諸司疏日百數上。事遂寢。萬化復奏曰。皇上聖度如天。俯徇廷議。臣等可勝慶忭。惟於冊立大典。猶欲少俟歲時。臣等反覆思惟。此宗社大計。皇上豈不心明之。而未能斷行者。豈猶有望礙於中。不能自決者耶。夫上意之微妙。或不可喻之於下。下言之委曲。容有不敢畢之於上。此百言而百不中。情宜有之。竊念廷臣之最倚信於皇上者。莫如大學士錫爵。誠宜及此時。御便殿。召而問之。令之考證古今。詳計審處。一言而定大禮。決大計。在此舉矣。疏凡十奏。錫爵亦具揭爭之。於是國本乃定。朝鮮之役。當事者力主封倭。而難信者請勘使封使並出。萬化謂封議已堅。勘使祇假設耳。卽令勘使果不虛出。而以封命之重。出而復返。國體爲何。乃奏以爲今日封倭之議。督臣力任之於外。樞臣堅主之於內。則倭封已爲成事。更復何說。然舉朝爭之。不遺餘力者。何也。蓋以倭本逆而誤以爲順。本詐而誤以爲誠。懼於墮倭計。損國威。爲天下萬世笑也。而督臣不察。至欲以封命與勘使同出。夫我以封而賞寇。倭以兵而邀封。釜山非封命所出之途。阻兵釜山。亦非叩闕乞封之禮。此與城下之盟。何以異。豈可使四夷聞且見耶。後封使竟出。倭敗約。使辱命返。上震怒。大出師逐倭。倭乃遁。竟如其言。宗祿旣告匱。議者咸謂宜通祖制之變。令稍就四民業。疏支得開科應舉。而當事者懼。懼持後慮。積不敢決。萬化毅然請施行之。藩府諭制請封上。意向予之。堅不予。至有詔切責。執奏詞愈切直。時枚卜閣員。或言中人須少貸之。萬化歎曰。吾山谷寒士。被遇至此。於吾過矣。此何官而可貸得耶。會病作。思母。連疏固請歸。許之。賜驛寶金。所以寵行者甚渥。旣

行。病加遽。至寶應卒。賜祭葬。贈太子少保。謚文懿。
史官曰。懋學居官審諤。能持大體。思孝所至。杓鑿不爲禍傷。萬化特立。輕去就。終始不渝。皆傳所謂剛者
也。當江陵專國。呈身繞指者多矣。三君子乘鷹鷂之志。較然不惑。卒以功名終。孰云太剛則折乎。

明書卷一百三十五

列傳四

名臣傳二十

高拱傳

高拱字肅卿。新鄭人。嘉靖十九年庚子年十七。魁其鄉。明年成進士。改庶吉士。授編修。時嚴嵩徐階各以計相傾拱。無所見。厚薄。時穆宗爲裕王。出閣講學。居外府。遴爲講官。盡心開導。穆宗自屬而心儀之。時人情洵。穆宗日懷恐側。兩府錯雜。讒言肆出。拱竭力周旋其間。王深倚重之。陞侍讀。尋陞侍講學士。在府九年。陞太常寺卿。管祭酒事。穆宗賜金繒甚夥。哽咽不能別。時雖在國子府中事。必令中使往問。穆宗思之切。親書懷賢二字。又書忠貞二字。又書啓發弘多四字。皆遣中使賜至第。四十一年壬戌。陞禮部左侍郎兼學士。癸亥。改吏部左侍郎兼學士。掌詹事府事。乙丑。陞禮部尙書兼學士。丙寅。進兼文淵閣大學士。參預機務。未及召入直。賜直房。食用乘馬。時分御膳賜之。閣臣入直西苑。自世宗中年始。有事在閣。世宗諭閣臣曰。閣中政本。可輪一人往。徐階不往。曰不能離陛下也。袁煒亦不往。曰不能離陛下也。拱正色問階曰。公元老常直可矣。不才與李郭兩公。願日輪一人詣閣中。習故事。世宗崩。徐階袖出草詔。欲以遺命。

盡反先政。拱謂語太峻。與郭樸對案相向。曰先帝英主。四十五年。所行非盡不善。上親子。非他人也。三十登庸。非幼小也。乃明於上前。揚先帝之罪以示天下。如先帝何。吾不忍也。相視淚下。語稍聞外廷。而忌者側目。會穆宗即位。議賞賚。拱曰。神宗無此例。自英宗即位始。先帝以親藩入繼。時殷富。遂加倍。今第如正統時。則四百萬中。可省其半。會科臣論劾大臣某。其人實不當去。而諸輔重違言者。意議以揭請上裁。拱曰。此端不可開。先帝歷年多。通達國體。諸事宜請上裁。今上即位甫數日。安得徧知羣下賢否。而使自上裁。上或難於裁。有所旁寄。天下事去矣。會科臣胡應嘉上疏。申救諸大計被黜者。執政以應嘉亂政。黜爲民。外廷爭謂拱主之。於是言者至十三餘疏。因力請去。不允。故事拾遺不及閣臣。而南給事岑用資等銜之。遂以拱拾遺。上不聽。更力求去。上驚問左右曰。高先生病耶。左右對曰。病甚。上猶弗許。久之。賜馳驛歸。賜白金彩幣蟒衣。居一載。詔還內閣。兼理吏部事。拱至。慨然以天下爲己任。凡晨理閣事。午視部事。人謂公門無片楮。拱曰。是奚足哉。大臣以體國爲忠。以匡國事爲美。區區小廉。細節耳。甯足多乎。往黜陟取辨倉卒。不無紕繆。拱集諸司官。各授之策。曰。吏部職在知人。人不易知也。幸諸公早計之。某也德。德何如。某也才。才何如。書諸冊。某也不德。不德何如。某也不才。不才何如。書諸冊。某也所自見。某也得之何人。書諸冊。皆親封記之。月終以復於予。慎之哉。予且以此見諸君賢。每歲所得。凡八百十餘冊。以爲參驗。以故賢否不淆。黜陟允當。鹵頻入犯。中外以兵事爲憂。拱疏謂大司馬安危所係。至重也。不得其人。由儲之不豫。少司馬止二員。此無事時耳。閱邊事。未免假於他官。或遇總督乏人。未免移於他處。假他官則非本職。不

便行事移他處則補於東缺於西彼此候代動經歲時不得履任門庭誰禦請於兵部增侍郎二員一遇巡閱卽以一人往邊方員缺卽以一人往凡邊方險隘鹵情緩急將領賢否士馬強弱皆已曉暢方略素定遇大司馬員缺卽以補之如此而稱乏用必不然也兵乃專門之學儲養本兵大臣當自司屬始兵部司屬在軍旅而不擇其人泛然以用又往往遷爲他官今宜特高其選而以有智謀才力者充之使其專官於此不復他遷如他方兵備卽以司屬往邊方撫臣卽以兵備往邊方總督卽以撫臣往而總督與在部侍郎時出時入以候尙書之缺如此而稱乏用必不然也邊方之臣又宜特示優厚使其功名常在入先他官不得與之論年月脫或不稱則律以法使其功名常在入後如是而猶不盡力必不然也邊關總督之臣在邊日久著有成績當令回署以休暇之後不妨再出使其精神不疲而知慧不竭以勤王事爲濟必多上從之又上疏曰臣惟邊方有司有疆場之責才者猶懼不堪卽優禮而鼓舞之猶恐不振乃官其地者非雜流則遷謫待之旣薄志意墜沮又何望其展布蓋徒以地苦其人而曾不顧人之苦其地也徒以邊方爲遠而不知遠安然後邇安也請擇年力精強才氣超邁兼通武事者調用有能保惠困窮俾皆樂業者比內地超等陞遷有能捍禦敵者以軍功論不次擢用惟以治效不以資格儻功名之路一開或有藉口邊方以圖幸進者則爲一定之說以限之於是各邊各有分地而邊吏奮當霜降讞獄例吏尙書執筆乃秉燭視獄詞漏盡不休晝則集諸司議於朝房出冤獄一百三十九人時入覲乃集天下有司策之曰各地方有何賢才尙隱淪有何兇頑尙梗正有何利當興何所沮而弗興何害當革何所畏而

弗革。皆得盡言之。令封識以告。拱每取入奏。故天下事如在目中。時重制科。輕科貢。拱曰。天下制科處其
三。科貢處其七。是崇其三而棄其七也。乃疏請。惟賢是視。不計科貢。故事。推陞時。皆主事。揭授郎中。呈於
尚書。拱令吏抱牘至後堂。同堂屬揭之。商可否。而私不得行。鹽馬官暨遠方知府。率薄視之。以故乏善政。
奏請以賢者往。不得復有低昂。積數遇貧薄之區。錢糧當苦寒之地。皆特寬其額。則官不苦難往。司教驛
遞開壩諸官。皆處以他省。使有官者不能赴。而去官者不得歸。拱謂彼無民社責。請得選本省人。皆稱便。
它如開王親內轉之例。覆一甲讀書之規。正撫接舉劾之差。覈京宦考滿之實。分進士講律之會。定王官
陞授之條。議有司捕盜之格。皆拱經如故。黔公沐朝弼既謝事。請入南京赴葬。撫按奏曰。沐昌祚政事清
明。以致歲豐。朝弼逼走昌祚。不知所往。請將朝弼錮南京。毋令回鎮。兵部入閣問計。拱曰。謬矣。雲南守巡
故以挫沐爲丰采。今又其故智耳。黔鎮衆所寓目。奚謂不知所往。昌祚孺子耳。安能動天地。朝弼有罪。朝
廷以檻車逮之。胡賺錮耶。越數日。昌祚奏請還其父。且言撫按誣奏。廷臣始服其明見。其議處鹵僉俺答
孫把漢那吉來降事。詳四國韃靼傳中。至議封貢事。時鹵哀求日懇。而朝中多疑畏。羣議皆以宋人講和
爲辭。拱曰。天下之事。以己求人。機在人。以人求己。機在己。宋人求和於鹵。機在鹵。故曰講。今鹵求貢於我。
機在我。直許之而已。彼曉曉者。豈爲國籌利害哉。徒念重大。恐有不效。留爲後言耳。乃請封俺答爲順義
王。其餘都督指揮千百戶有差。套鹵吉能等亦以爲請。三邊總督難之。拱擬旨切責。復貽之書曰。三邊宣
大。似難異同。異同則宣大之方開開。而三邊之擾如故。豈無俺答之人。稱吉能而擾三邊者乎。亦豈無吉

能之人稱俺答而市宣大者乎。是宣大有市而又擾也。三邊苦擾而實市也。同則兩利。異則兩壞。總督者議始協。於是俺答進馬謝。吉能亦附焉。而邊境大甯。復上疏曰。嘉靖十九年遣使求貢。不過貪賞賚。與互市之利耳。邊使倉卒失策。當事憚於謀。乃卻其請。斬使絕之。以致黠鹵怨憤。擁衆大舉。此往歲失計之明驗也。今天佑國家。弭耳入貢。息境土之蹂躪。免生靈之荼毒。省內帑之供億。停士馬之調遣。乘此閒暇。修我邊備。若見甯息。遂爾偷安。若從此懈弛。卒然有變。將何以應。是臣等謀國之忠。反成誤國之罪矣。請每歲特遣才望大臣。四出閱視。以今視昔。錢穀贏幾何。兵馬增幾何。器械整幾何。其他屯田鹽法。以及諸事。拓廣幾何。果有成績。論武功爵。若襲故常。罪如失機。上嘉納之。隆慶六年壬申。上久不御殿。忽且視朝。鐘鼓嚴傳。宣閣下。急拱趨至。則上已立於墀中。執拱手北行。至乾清宮。拱不敢入。上顧曰。送我拱承旨。直至乾清宮。上御榻坐。手猶未釋。連云有人欺我。拱曰。有國法在。上色愠甚。拱慰解之。暫退。上傳高閣老。夜宿乾清宮門外。拱謂張居正曰。吾二人一去一留。是示人輕重也。吾爲公奏。得旨。二閣臣皆在乾清宮門外。薄暮又奏曰。禁地非人臣所宜宿。願宿闕門。陛下召。可頃刻至上。可之。報御體漸復。乃退。且疏請上懲忿寡欲。上覽甚喜。至四月二十四日。申刻。宣內閣受顧命。司禮監以二札。一授皇太子。一授拱。蓋遺詔也。拱泣奏曰。受陛下厚恩。誓以死報。奏畢大哭。兩宮亦哭。二內臣挾拱長號以出。神宗卽位。拱上言五事。一謂御門聽政。玉音親答。以見政令出自主上。二謂題奏繁多。難以徧閱。自有節要。請先籤出。以便省覽。三謂事必面奏。乃得盡情。四謂大小章奏。俱發內閣看詳。若或未經發擬。徑自內批者。容臣等執奏。五謂官

民章疏。當行常止。未有留中之理。得旨報可。是時居正與閣保比。取中宮旨。逐拱。拱即日乘騾車去。歸杜門謝客。口不言時事。後有王大臣之獄。屢借危之。卒獲免。萬歷六年卒。祭葬半給。又二十餘年。始贈太師諡文襄。錄一子尙寶司丞。

史官曰。高拱以藩邸腹心。得君行政。慨然以綜核名實爲己任。其所條奏。銓政邊才。鑿鑿可施之當今。練達曉暢。救時賢相也。然昧於幾事。輸誠同列。卒受傾危。抑所謂不學無術者歟。

郭正域傳

郭正域。字美命。江夏人。生而卓犖。籍甚膠庠。都御史王某延爲子師。陳其書策。庭檢之。正域一宿。輒稱病出。武昌守徵爲古文詞。遣吏督促。乃故不應。曰。此誠士法也。識者已知爲公輔器。萬歷十一年癸未。成進士。選庶吉士。自念北扉重地。而奈何諸君子逸於外。皆以作者自雄。妄謂登壇不由史館。吾當有以振之。博極羣書。尤究心朝典。文必西京。詩必鄴下。一洗臺閣體相沿之習。至於河漕鹽屯。兵食大計。四方風土人物。與利弊興革之宜。辯若懸河。胸有成算。丁憂服闋。補編修。大學士沈一貫初出山。嶽嶽自負。正域獨不降。一貫恚。正域侍東宮。讀講業四年。例不當出。出亦不常南。而一貫以南祭酒遠之。未幾還爲禮部侍郎。則大學士沈鯉爲次相。望實出首輔上。勢相逼。每引正域爲忘年交。遂有南北黨之目。而一貫更大恚。正域以諡法濫。其甚者議奪。次議改。而故大學士餘姚呂本在議中。沈一貫王家屏聞之。曰。吾二人在。誰敢改。正域聞之。曰。吾敢改。若以黃光昇當諡。是海瑞當殺也。若以許論當諡。則沈鍊當殺也。若以呂本當

諡則守禮諸人皆當鑄其秩沒其恤也。奪之嘗疏上竟留中。禮部所司藩封例。藩由中尉進封者。次子不得封郡王。而秦王請次子爲世子。堅執不與。秦王又奏既不得封世子。請封郡王。又爭不與。巨闕魯保既竊兩淮。離政。又兼南京浙江織造。請專敕與關防。內閣業與敕。正域獨不與。關防爭之。閣中不能得。退而奏南京浙江各有內臣。各有職司。魯保欲任二職。轄兩地。儻諸閣效尤以請。將誨爭無已時。非禮也。關防竟得無給。會有楚藩事。益與一貫忤。楚宗人華越奏。謂楚王爲某氏子。數郡滅郟。正域素聞諸宗口語。不爲王辯。而諸宗嘖嘖。謂郭侍郎爲王地。欲須其歸。以鐵錐錐其首。斃其廬。正域詣一貫請行勘。一貫以體訪拒之。正域以楚王所遺金上聞。有詔廷臣會議。於是人持一牘。正域恐太煩。爲節略以進。而言者謂其匿議單。不以實聞。遂疏辯語。侵執政。一貫亦自理會楚王。許正域歸聽勘。正域行次楊村。而妖書之事作。妖書者。爲東宮作危語。而波一貫。不知誰何筆也。上見之震怒。下詔大索。時朝官引繩批根。無所不至。意常在鯉與正域。至形之牘奏。而正域兄正方友如。刑部于玉立。禮部田大年。布衣沈令譽。僧達觀。繫榜且死。卒無狀。又數有人恐喝。勸其自裁。正域弗爲動。同官華亭唐順之。會稽陶望齡等。以名義動一貫。而一貫曰。此上意也。我何與。邈者謂爲京諸生。嫩生光素。險膚。所引語略相合。宜坐罪。主讞者恐生光自誣。無從牽正域。而御史牛應元。沈裕。刑部郎王術古。證成之。生光死。然亦不足爲生光筆也。當其爲南祭酒。有王生者。條上太學利弊。諸生聞而譏。將羣毆之。正域陽治輿臺。解譯者。而陰廉其魁率罪之。甯遠伯之孫。婚於魏國。騎而過文廟門。博士執而扶之。須臾。李家奴數百。踢邸門。思遠而魏公亦至。正域謂魏公曰。今

天子以皮弁拜孔廟。奈何人臣騎過廟門乎。已則廢禮。令兩及門相謝而罷。其在禮部。回夷以王市而不得直。長跪泣道傍。正域上其事。上遽命承運庫予之。常熟諸生試於府。羣以小忿辱常州知府。或謂人衆法所不及。正域曰。以衆廢法。孰不與衆有力者。藉衆犯法。而以寒峻抵罪。長此安窮。請勘停一縣諸生。不得試。使相詬悔。庶有懲艾。其倡亂者以三尺從事。報可。自是辭歸不出。卒。熹宗卽位。奉光宗遺詔。恩舊講。贈太子少保。廕一子中書舍人。諡文毅。

史官曰。郭正域與時相忤。幾不脫虎口。然所爭藩宗。在禮言禮。皆守官正論也。妖書事起。張網彌天。小人之傾險至是哉。

李化龍傳

李化龍。字子田。號霖寰。長垣人。母吳妊時。夢大雨中有玉柱自天而下。峙立庭中。化爲龍。所以命名。少聰穎。讀書五行俱下。爲文操觚立就。一時稱爲聖童。郡守王賜谷名士也。重之。招之書院中。每試輒冠軍。萬歷二年甲戌進士。授嵩縣知縣。纔二十歲。吏胥見其少而秀羸。署字故草草試之。化龍心度弘廓。不問也。其輩遂駸媮。化龍忽攝以威嚴。寘之法。豪猾皆斂。邑大治。遷南工部主事。權稅蕪湖。平稅無所染。尋調南吏部。曹務閒。時魏懋貞鄒爾瞻輩皆在南都。相與結期聯騎。游采石雨花燕磯之間。稱詩裁賦。人傳之。爲金陵勝事。久之擢僉事。督學河南。每試。隨收隨校。一目十行下。卽品題。其所指文中利病甚詳。核。有是學而久不遇者。往往駭拔之。人多鼓舞。一時稱神。已遷參議。復督學山東。當御試。例考遺才有司以請。化龍

曰。經我目無遺才也。既而曰。有病及丁艱服闋者乎。羣數百十人試之。校其文。曰。有舉子六人。幾失之。皆獲雋。已而攝河南參政。尋入爲太僕少卿。晉通政會遼東巡撫缺。遼東於諸邊稱廢壞。難其人。京朝官僉曰。李化龍督學時。兼攝數道。事至立部。如簪之汎。輕塵。此何所不可。遂陞右僉都御史。撫遼東。是冬虜東西合謀入犯。化龍策曰。西虜數萬。其鋒不可犯。東虜僅少易與耳。乃檄大帥董一元杖兵鎮武堡。空其營。賊入。率兵橫擊之。斬虜首四百餘級。鹵遁去。明日西虜至。攻右屯。乃檄將兵夜劫營。虜覺引去。上功。晉兵部右侍郎。磨一子錦衣衛。正千戶世襲。已而東虜以鎮武之忿。數入犯。化龍以精兵敗之於靖遠。又敗之高平。又率兵出塞搗巢。大敗之於什方寺堡。自是不敢內窺矣。捷上。賜金帛。升俸二級。因念兩親老。且數病。求歸。許之。時有播酋楊應龍之變。先是守土者控馭無術。或冒沒重賂。酋旣驕矣。而又治以漢法。激之成跋扈。乃請勦。上卽家拜兵部尙書都御史。總督川廣湖貴事。賜尙方劍。斬徧裨以下不用命者。比發家。則酋已破碁江。參將房嘉龍遊擊張良賢戰死。化龍往從容談笑。將吏恃以無恐。入碁江。卽爲文祭。二將軍曰。人誰無死。以法死。以賄死。以寒疾不漢五日死。以飲酒御婦人死。等死耳。曷若死國之不朽也。慷慨激烈。以是人人自奮。乃彈力經營。間畫方略。破其壘。詳具亂賊傳。酋投纆死。其妻妾子女皆就擒。凡斬首二萬二千六百八十七級。生擒一千二百二十四名。日獲五千五百三十九名。播地悉平。論功加少保兼太子太保勳柱國。又條上復郡縣等十二事。爲善後之計。皆報可。適外艱。疏求奔喪。八上而後得歸。服闋起故官。總督河道。先是治河者遷去。或里居。皆以所築隄次追罰爲畏途。化龍至。則徧行淮徐鳳泗間。歷

覽周咨得泲河遺跡憤然曰是所以避黃河呂梁之險而措之衽席者也柰何既脫而復入乎乃上疏言開泲河鳩工濬舊渠八十七里開新渠八十二里諸隄障閘悉備於是歲運千艘無所礙昔稱過洪今稱過淮卽爲已至漕運賴之又見秋水漲溢不無衝囓乃疏請爲分黃保泲一勞永逸計以內艱歸禪除起兵部尙書武弁之陞遷大都諧價於天市而取之於職方化龍揭其資薦之數於部堂有缺序轉而以功次參酌之倖濫頓息考察軍政諸特與援多羽翼者以爲萬不可動化龍稔其貪懦狀斥之時論壯之前後條議四十餘事皆精密可行卒年五十八贈少師子不矜爲錦衣指揮同知不盈爲錦衣指揮使其爲詩文隨手而成章卓然大雅少年通顯立致鼎足而親賢下士形骸都忘終日談笑情瀾靡竭而未嘗有漏言遇事敢爲計慮周密所著有奏議藁二十卷平計十卷

魏允貞趙南星傳

魏允貞字懋忠別號見泉南樂人父怡以明經爲通判行廉而德厚趙魏間稱爲大人年九十六卒母楊生三子長允中萬歷八年庚辰進士官吏部主事次允孚三年甲戌進士官刑部郎中文章氣節並爲時論所推允貞兒時內穎外方屹如成人比就外塾日惟讀書不知嬉戲四年丙子舉於鄉明年成進士授荊州府推官荆俗剽悍善訟多疑獄累年不決者允貞縛律誦情悉斷遣之時張居正擅權作威福官其地者率畏事之柔繞求容惟允貞庶正自植民賴以安張氏奴有不逞者衆咋舌莫敢問獨繩以三尺居正不恚更重之壬午徵爲監察御史會居正卒遺表薦其私人禮尙書潘晟當入閣爲身後之利允貞上

疏極言潘晟品下齒衰。衆必不服。不可相。若不知止。所謂苟患失之。無所不至。其爲聖治之累甚大。不報。旣而陳四事。曰公文武之用。嚴科舉之防。慎臺諫之選。務戰守之實。語多侵執政。而居正諸子聯翩高第。遂爲相庭故事。駸及諸有力者。肆無顧忌。所謂嚴科舉之防。尤執政所恨。謫判許州。戶部郎中李三才疏救之。謫東昌推官。尋陞南吏部主事。南吏部事簡。獨胥吏有貼班銀。以佐四司僕馬費。允貞請悉革之。南吏尙書邱樛。侍郎海瑞。皆倚重。許其有大臣器。是時鄒元標以言事調南刑部。李化龍爲南工部。相友善。講道論文。人目爲德星之聚云。如是者二年。念親老。疏請致仕。不允。遷光祿丞。奉命祭秦藩。秦藩饋遺甚厚。皆卻之。陞少卿。請告歸。三年。卽家拜順天府丞。陞右通政。亡何。陞右副都御史。巡撫山西。至則條上五事。曰。選授得宜。則吏治修。支放足數。則軍情悅。屯鹽不虛。則國計實。宗室不犯。則國體尊。禁林不伐。則邊防固。上皆報可。文武吏奉教令。競競飭篋。無貪暴者。平陽知府某歲所節數萬金以報。允貞極其稱讚。用充平陽稅租。於是有所條議裁革者衆。或過於刻削。還其牘曰。非人情也。以汾州有二郡王。宗人多。軍民雜處。知州官卑。不能制。奏改爲府。卜山西與虜鄰。自款市之後。邊備日弛。乃親歷其地。視要害。覈軍實。建議整飭。易忻州崞縣方山鎮城以甌石。而黃龍池草垛山河會水泉石茆等處。皆創爲堡。詔官養屯屯守之。發人徒修築。偏關老營等處。邊牆萬餘丈。督造鎧甲戎器。市買驛馬。又修文中子諸賢之祠。及書院。陶化人才。凡皆取諸其所節省。無他科索。值宮殿災。有密以礦說進者。武弁如仲春等。爭言礦處。允貞上疏言。人主玉食萬國。何以開礦爲。頻年調逐諸臣。其中豈無忠臣義士。有一人焉。可抵萬黃金。不此之寶。

而發天地之藏以求利。諸臣之爲計亦左矣。疏入不報。行抽稅法。自是山西中使張忠孫朝。及他省陳增高淮魯保馬堂等益橫。文武吏士人迂其意者。每繫繫於千萬里之外。候選臺省。久留京邸不下。允貞上疏言。陛下何重宦寺而輕言官也。疏入不報。而中使遂舉劾有司。如典史驛丞等官。往往斃於凌虐。允貞上疏自劾。不能爲吏民延旦夕之命。臣罪宜罷黜。疏入又不報。則遂挺身扞之力。摧其爪距。其輩皆讐。見允貞不能出一語。允貞不少假借。其輩大窘。遂奏允貞沮格礦稅。而誣以八年公費酒稅等金數十萬。皆入已。上下其議。部院諸大臣。於是九卿合詞上言。允貞操節清苦。天下莫不聞。彼既參內臣。內臣詆譎相報。天下共知其枉。疏上不報。山西吏民數千人叩闕籲留。事遂寢。中使之疏初上。允貞所興建。諸領其役者。及支給之數。翦記。至是出以相質。錙銖不爽。自酒稅贖。餒外。卽廩給。乃其餐錢。亦以爲公用。至家人往來。皆自備車馬。所過傳舍。食餘計所費。償之。傳吏以報。於是衆益驚服。咸知其清。謂非有中使疏。亦不知其至此。撫晉九年。求歸養者二十餘疏。不報。至是乃下。卽日命駕。軍民遮道號泣。皆爲祠祀之。允貞天性孝友。而父子兄弟皆賢達人。居則以道德相敬愛。出則以忠貞相勸勉。允貞爲國家生民計。不知有生死亡害。故能信心孤往。無旁顧。卻慮。萬歷二十四年丙午正月卒。子廣微。萬歷甲辰進士官翰林。仕至大學士。與閻忠賢聯宗比暱。人以其有愧於父云。

趙南星。字夢白。真定高邑人。少聰慧。倜儻譎浪。不可一世。萬歷甲戌二年成進士。授汝甯推官。稱廉平。陞戶部主事。張居正臥病。朝士徧走羣望。南星與顧憲成。姜士昌輩戒弗往。仍爲紀事詩曰。二豎能愛國。千

官爲祝年。傳播人口。居安歿。以與望入銓司。改吏部。吏尙書楊巍挾私意。欲糾御史丁此呂。南星洩其謀於給事中王士性。巍怒。南星畏禍。遂引疾歸。後起選司主事。吏尙書陳有年。一日問南星曰。不敏多過。何以教之。對曰。人惟清靜。安得有過。有年曰。是謂我不任事也。因起用幽廢。如海瑞。何以尙等。以內艱服除。補陞稽勳員外郎。調文選。有直陳時務疏。所抨擊多人。朝論閎然。復引疾歸。後吏尙書陸光祖將去國。特起南星田間。與執政議相。左二十一年癸巳。廷臣當大計。孫鑰爲吏尙書。南星司考功。先是政府三公。各有所庇。南星故入察典。皆不免。閔銓相水火。凡省臺之長應預事者。南星以非其同類。恐撓其事。不盡使之知。奏上。諸失職者又大闕。省臺臣皆恥不預聞。首糾稽勳虞淳熙。給事中劉道隆。疏劾其黨同伐異。剛愎自用。尙書鑰俛首聽從。鑰奪俸。南星外謫。南星當主計時。靜坐篝燈。精心參酌。有蟲巢於耳。繭成而不覺。援筆注考。於要津獨嚴。遇一權勢姓名。奮肘乙之。有疏救者。旨批削南星籍。二十八年。熹宗卽位。卽家擢太常少卿。左通政。尋晉太常卿。未赴。明年改工部侍郎。旋晉左都御史。掌都察院。天啓三年癸亥。主京察事。吏尙書多遲迴瞻顧。南星作四凶議。以堅其意。所鋤去略與癸巳爲考功時等。遇撫按報命。自屬吏及鄉人才。有濫薦庸者。立糾彈之。人多震悚。亡何。轉吏尙書。奮力仔肩。以澄敝爲己任。謂長安交際殷煩。士大夫朝氣皆疲於應酬。亭午入署。憊憊不支矣。請以全力盡職業。率諸曹郎昧爽入署。以爲常。又欲廉巡撫之賢者。與郡邑循吏皆久任。銓司如考功文選。亦不得皇皇弛担。官評報部。多循故事。以卑冗及椎魯寡援者。一二人塞白。使貪暴漏網。嘉興天下流濯。此皆往時八品官移封父母有例。請下逮九品。疏濬

選法幕官以下皆區畫鼓舞以盡其用。謂篋蓋濫則彈壓輕。戒上官毋入守令貢獻。又知從來典選者。竿牘盈箱。臺省至雄貴。遇銓郎多望塵。磬折刺刺耳語。嚴飭諸司。毋徇一切請託。有挾而來者。白其事。奏上罪之。人始脊脊稱厲。所以謗譎繁滋。南星不恤也。時鄒維漣由兵部郎調吏部。江右一銓部尙在事。一省兩銓。尤爲齟齬。又不與江右臺省謀。獨二三同志決之。又大闕。先是忠賢知南星爲人豪。傾意飯往。嘗於上前亟稱其任事。一日囑其甥傳應星事。介一中翰爲贊於南星。南星麾去。又嘗同坐弘政門。選通參。南星語忠賢曰。主上冲年。內外臣子各努力爲善。忠賢默然。怒形於色。南星遂杜門乞歸。而魏廣徵父允貞。曾與南星爲同好。南星素以通家子畜之。無少假。廣徵時在內閣。南星畜之愈峻。或卜肆闢說。執不可。積恨入骨。與閹比而謀嚙之。左都御史高攀龍發御史崔呈秀狼藉狀。南星議戍之。呈秀倉皇走閹。忠賢所請命。言不去某某。我兩人未知死所。適晉撫缺。南星推謝應祥。它垂涎者不與。而論者謂謝爲吏掌垣師。故南星奉之。選郎與吏垣皆謫。南星亦上疏乞骸骨。許之。閹忠賢首用某御史言。與詔獄。周內鉗綑。奏多賾證。南星行。撫按鞠訊。當事者方藉事效首功。辱之訟庭。子工部主事清衡。遭痛捶。楊於市。觀者多憤泣。坐贖萬五千金。追呼甚急。六世之業。一朝如洗。親友故人皆醜金爲助。讎上。南星謫戍代州。清衡謫莊浪。而其甥中書王鐘龐亦遣戍。南星坐短轡。攜殘書一篋。至代州。僦居一小樓。顏曰吉祥。又掃除土舍。顏曰味藥齋。日夕開卷。或弄筆爲適。卽有窳然之音。謹扉不敢應。晉藩遣使存問。未敢聞命。年餘。懷宗卽位。肆赦未及還。卒於戍所。其爲文抒寫磊塊。汪洋千頃。激爲怒濤。源本馬遷。而取裁於韓蘇。雄奇之中。刁斗

秩如詩則淋漓沈痛語。使人欲泣欲嘯。有易水擊筑之音。有不得意。及有所稱揚。輒發爲詩歌。以豁其幽憤。無所回護。往往以此招怨。尤所著有芳茹園文集數十卷。世稱儕鶴先生。魏忠賢敗。復其官。贈太子太保。諡忠毅。予祭葬如例。子清衡。甥鍾龐。復故官。

史官曰。允貞南星。生同地。允貞忤政府。忤中涓。特立行一意。而無能中之者。以其公廉盡節。官下鮮伐異之謀也。南星嶽嶽。人折其角。意少激矣。遂爲闖禍首。兩賢相得。而盧奕有子。實戕真卿。疇謂忠孝有世類乎。悲夫。

成基命傳

成基命。字靖之。別號慈予。避宣宗御諱。以字行。大名之元城人。少生有異質。就外傳。日誦數千言。屬文輒工。時鄉大夫皆以猶龍稱之。萬曆二十一年癸巳。以特選入太學。時葉向高爲祭酒。每語人曰。成子公輔器也。試輒高等。雍事竣。不受銓家囊。益肆力學問。至三十四年丙午。舉於鄉。明年丁未。成進士。改翰林院庶吉士。乃取累朝舊典。若方輿利病。皆條悉不遺餘力。而於詩文獨進。秦漢大歷以上。館閣師皆重器之。庚戌外艱歸。壬子服闋。守故官。丙辰分核禮闈。所得多知名士。皆蔚爲名臣。戊午典江右試。庚申遷右中允。尋改洗馬。管司業事。敦尙風節。爲太學先。諸生多所成就。熹宗卽位。疏請視學。不先關白內閣。閣臣悉以原官回局。於是請告歸。癸亥預備光宗實錄。錄成。遷右庶子。管誥敕。詞獨雅重。人爭求以爲榮。補日講官。每進講。敷祈詳明。寓以規諷。上肅容傾聽。其方音不合者。輒諭曰。盍取正成先生。陞少詹事。加太子

賓客進禮部右侍郎。時闕忠賢初竊政。附影觀風者。每驟躋巍秩。基命風聞澄峻。每正色講筵。獨弗推襟送抱。修欵謁。每自矢曰。無負細旃也。會楊漣左光斗諸獄興。搆者誣以爲漣等衿契。以激怒闈。闈果恚。及天啓四年甲子。以講筵敍遷。獨基命守故官。不晉秩。基命遂決意去。或謂之曰。執政有瓜葛。可解也。基命不答。從容謂之曰。講官。皇上規繩也。規繩自贖。安作皇上規繩。乙丑。注籍不獲歸。遂徇例以原官掌南翰林院篆。便道歸里。再疏乞骸。不允。亡何。以他人疏內批閱住。遂歸。集友人結春草社。翩翩高邁。快發高朗之音。不復念豐稔之矢。而顧尺口。若將終身焉。懷宗御極。卽家拜吏部右侍郎。充經筵講官。每進講。披瀝忠懇。如曩時。與修神宗實錄。基命每對上。鶴立至表。懷宗每目屬之。尋回部管左佐郎事。力任澄敘。疏壅剔滯。飭諸曹郎各舉其職。乃奏議劾單發訪。使京朝官各舉所知。彙進上覽。以敍推補。仍先起廢。懷宗皆允行。未幾。邊警亟。上御平臺。集廷臣講求方略。基命念綸樞爲戎行根本。無論籌略出自帷幄。卽文武大吏。在用得其人。而內爲應。非綸樞所願。多蝮阱焉。綸樞非人。安問大吏。樞貳佐樞。曾不關其說。而悠悠置之。不聞預儲。事急。則議多任少。或條議薦舉。非鑿鑿可行。當盡度勿問。至於大豪傑。抱兼資大略。急宜敕廷臣署舉。分曹謔試。不至要人搆所瞞。以要常事。違之。遂有煩言。從之。輒以應人。當非常之變。而驟乃應。對條四事。曰。置輔弼。簡樞貳。采讜議。廣招徠。懷宗嘉納之。崇禎二年。己巳。特旨陞禮部尙書。東閣大學士。預機務。一日。合同官入對平臺。懷宗方敕大學士孫承宗督師關門。乃一一詢方略。基命奏云。願以戰守機宜付承宗。俾盡其才。勿掣肘。承宗必有以仰副聖衷。而他所敷陳。於戎務獨才。一時皆心服焉。懷宗每

旃裨思得士一當敵。時庶吉士劉之綸薦蘇州僧申甫。申甫癡而黠。詭談兵事。之綸當陞泣陳。申甫有橫行之請。曰：「幕生兵。置衝車。懷宗壯之。命基命詳閱。極言此小技。敵張甚。非可嘗試。第以甫爲駿骨之招。可懷宗默然。遂越格授兩人官。而竟不效。人皆服其先見。會清兵逼都城。旋歸東。時紛召外兵。基命以爲外兵已來未定。方來當止。七萃乘城之士。宵旦不得下。宣雲之勁卒入衛。仍當額招。備諸衝要。調集費繁。額賦當急。凍糧當運。明年領兌贖運之法。當行。新餉當增。屯運當緊。豆料之孤。當均。行糧當覈。而司空之屬。收發辦造。仰廩震怒。給發收貯。當晰。內造外造。當促其期。目前見行當急。來歲當預。然笙簫之選。或當箭括。腫頭銷槩。黃口又沓拖。不可奈何。兼以環衛區土。不甘密蠶。而四方選卒。抵圻輒鳥獸散。至於六垣注銷不講。六曹奏報。省試不聞。亦微軍實。緩仍支應。卽錯立族談。未有犖肌分理。基命乃一一條畫。諸興革大計。仍痛言所以籌邊之策。謂不堪再。上語納。嘉命擬敕諭行。懷宗重漕。欲復勳臣董漕運。而諸勳攻詰四騰。基命極論勳臣削軍。盡漕諸弊。事得寢。册立東宮禮成。加太子少保。一日。懷宗御文華殿。謂輔臣曰：「近法紀廢弛。宜大振刷。基命對曰：「治道第宜去太甚。管理亂絲。宜覓頭緒。驟用紛更。恐益撓亂。懷宗曰：「慢則糾之以猛。何如。基命默然。每以懷宗震怒不測。時多所挽回。人莫知也。是時清兵尙據遵永。而兵尙書廷棟。恚總理總兵馬世龍。謀更置之。先是世龍同廷棟分總文武。世龍負氣。岸不相下。廷棟入本兵。曠邱禾嘉劾世龍。基令獨破羣忌力奏。上乃救世龍。進取。得弗更置。後世龍統五將軍。下西南兩壁於灤州。未幾世龍又於甯夏三戰。獲首虜七千有奇。非基命力護不及此。西虜乘機要挾。薊督請增兵。基命上言。西

虜忘我象恩。顯爲助逆。應如聖諭。逢賊卽殺。不問種類。其召募當令督撫挑練土著。補足舊額。不必屬鎮臣妨勤。懷宗深然之。宣督議圖插以伐合謀。基命謂東難方殷。插患再啓。力不堪兩應。但勿非其議。而力爲持重。從之。至議固根本。則請用道昌。涿三鎮重臣治兵。以壯聲援。又念兵尙書調發不得專兵。而四方倚兵爲驕。幾如藩鎮。因請一中樞大臣。親提勁旅。以彈壓驕悍。懷宗悉嘉納焉。上方銳意精嚴。一時臣下兢兢自護。不暇。基命每遇所譴誅。輒按法原情。反覆開陳。不爲矯法以救時急。多平氣而奏。如尙書張鳳翔。喬允升。胡應台。韓繼思。皆與申理得從寬典。如副都御史楊應昌。逮下詔獄。力奏改刑部。而御史李長春。給事中杜齊芳。以私書論斬。基命獨疏救。略云。恭誦嚴旨。仰見皇上明作求治。飭法整欺之意。然辟至決不待時。法重無以復加。二臣所犯。積習因仍。原非一日。有此一番天威。亦足使人警惕。濯魄洗心。祖宗法雖真正死罪。無可矜疑。猶必經幾番質再三才奏。總以事關重辟。不嫌過慎。因跪會極門。自辰至酉。上意解釋。遣戍。時御史劾州邑稽遲長吏。朝廷欲以軍機論罪。又以各鎮餉司收放任情。致軍丁譁讎。當遣官督察。乃詳奏長吏稽遲之苦。又奏餉司已飭撫按考核。而將怯兵驕。動以遲給爲譁罪。不在餉司也。懷宗俱從之。先是主事李逢申以擁戴爲驅除論。基命再疏請告。溫旨慰留。尋逢申以炸燬神器。同徐申懋擬遣。懷宗怒。欲殺之。基命奏謂大辟下卽遣。而永戍又遣之重者。兩人文墨書生。不諳練。致違誤。非有他也。戍之外更無可加。得戍人服其量。以克復功加太子太保。進文淵閣。廕一子中書舍人。尋奉旨參詳功罪。乃奏謂敍功不宜併摘其罪。似當於行賞後。明諭前過。庶人知功賞區分。懷宗允行。以偶病不入。

直。上遣中官賜上尊白粲，持機密卽榻前票擬。時軍興大匱，而戚畹乞填價數萬。基命曰：「此不足濟軍餉乎？」戚臣諛當體國事，平補給。甯晚也，會病劇，數上疏乞骸骨，允之。賜白金綵幣，遣官護乘傳歸。具疏謝，懇懇忠愛，進以保躬節用。鑒薊遼之前車，備宣雲之未雨，上優詔答之。旣歸，遂縶馬懸車，作者英會爲詩酒。然時惓惓以國事爲念，中外望其出以安天下。前後論薦無虛日。於崇禎八年乙亥八月卒，卒之夕，猶櫛沐草遺疏。所云振國紀，肅吏治，正士習，蕪民困，覈兵清餉，媿媿數千言。奏上，懷宗震悼，予祭葬如例。贈少保，諡文穆。基命長身玉立，端凝峻朗，居恆恂恂溫厚，及遇事毅然。識沈力定，確不可奪。當帝前，每發所欲言，折衷羣議，諸練故典，體合公心。人咸心折焉。曾不作藩籬，樹同異，而賢者自親，不肖者自遠。至於機政之否臧，刑爵之輕重，文武大吏之去留，每以一言用，不用爲效。天性孝友，周急恤孤，獎掖後進，汲汲不倦。門無私謁，罷相日，家無長物。人號爲清白相公。子克鞏，成崇禎癸未進士，官翰林。史官曰：基命當閣，魏薰灼日去之若澆。其時文人韻士，率蠅逐影，率以希盼睽。況生同梓里，獨弗窺鳩巢爲借枝。羅吉連辭橫構而不爲動，可謂骨鐵錚錚者矣。孫承宗謂其立朝忠厚正直，能見事於蚤，定謀於猝。衆默獨譎，衆智獨愚，衆佻獨沈，衆遲獨敏，知言哉。余謂非神識堅定不及此。

明書卷一百三十六

列傳五

孝義傳一

史官論曰。君子樂道人善。至於孝子悌弟。貞朋烈士之狀。往往播於街談巷說。耘夫牧豎。拱立而傾聽。婦人孺子。留連而隕涕。不必述者之爲悼史。與稱說者之爲君子也。嗟乎。天性之事。出於至誠。入於無間。理塞幽明。而精通玄感。豈不信哉。予考史傳。必列孝義。以其爲王事所浹。一代人心風俗所著。觀風者必採焉。然吾觀王者。有作禮備樂興。猶廩廩不敢言符命。而醴泉甘露。時流荆蓼之庭。擾鹿馴鳥。每聚墓廬之側。是匹士得天。盛於王公大人。而王公大人。或求一事之幾於匹士而不可得也。嗚呼。豈不偉哉。

廖欽字敬先。吉陽人。自少強學。明毛詩易書春秋。洪武三年設科取士。與弟敬存同薦上。有司不偶。輒歸。以事親講學爲務。明年例取至京試。才學優等。授河內縣丞。比至。一以忠信導民。未幾化其俗。河內西北要衝。往來絡繹。民疲供給。以祿入助民爲費。會稅務侵匿。課錢事覺。連及累年收稅之人。省臣督責甚急。民逃匿太行山。欽爲言曰。民竄矣。急之則不可得。盍少緩焉。與我以期。不效。併責我。省臣曰。諾。就以委欽。欽求侵匿人姓名及錢數。榜列於市。且潛使人告其速來。保無他。民素信欽。咸奔走而集。惟恐後。未及期。

錢足。公私不擾。欽言於省臣曰。錢既足。民得無罪乎。曰。然。曰。何不許其自首。省臣從之。民獲無事。他郡械繫者不絕於道。民曰。微我公。我其得免乎。八年秩滿。調吳江丞。素繁劇難治。抵任多惠政。民信服之。有隄護田數千頃。久爲水所齧。田萊淤叻。迷勢家相爭奪。事聞於朝。令官修築。期迫甚。同僚皆以他事避去。欽獨怡然任詣隄估工費。召民諭曰。隄成。爾享其利。不成。我受其禍。於是民私相戒曰。我曹當戮力成之。毋俾我公蒙害。至期隄成。秩滿既去。適河內舊虧課錢三千五百文。典守者指以誣欽。亦不辯。遂受謫。役作鳳陽。河內吳江之民來助役者千百。既而釋歸。杜門誦讀。鄉中無賴子。搆詞以誣欽。兄弟俱逮下獄。欽語弟曰。我與若萬一有不幸。其如老親何。莫若我受辜。爾得歸事親。俱溺無益也。弟曰。我當受之。留兄以事親。欽曰。兄可以蓋弟。弟不能掩兄。乃相讓於訟庭。主者惻然感動。由是弟獲免。欽竟謫戍富峪。數年以老病還。嘗經河內。休於途。民見之曰。是我廖父也。欽給曰。我商人非廖。於是聚老少爭識之。乃羅拜。欽不能隱。兢持酒穀相慰藉。留信宿。各持縑以遺之。須臾。哀數百匠。欽辭不受。民曰。父有德於我。欲報無所。今父幸涉我境。持此以報父。願卒受之。欽曰。我何德於汝。縱汝德我。何不愛我以德乎。苟以所贖爲可受。則昔之所爲。不過沽名。以覲今日之利。民益懇請。欽揣知民意。堅夕遁去。

林駟。字宗道。以字行。改字良御。先莆人。父寶。字惟賢。元末游漳。因家焉。讀書好古。家貧爲吏。不私人一錢。民有冤者。百計伸之。後生駟。少亦試爲吏。太守胡宗華奇之。勸令業儒。因究心得其旨要。奉父隱程溪。洪武五年。十年再徵至京。懇乞終養歸。徧訪賢哲。從趙彥進遊。趙蓋宗程朱之學者。依三年歸。以教授爲業。

立家法。別男女。黜不順之婦。修冠婚喪祭禮。非其義也。一介不取。父喜。且曰。吾爲吏三十年。閱居官者。始未嘗不皎皎著廉聲。久之窺其微。純白者鮮。將如是。真吾子。大吾名矣。十五年再徵。辭不獲。赴京。同召者八千餘人。對策第一。上命學士詹徽廉德行科。復居第一。賜宴內殿。與同時趙肅申甫。皆以布衣入侍。尋拜監察都御史。時有狂人入御座。詔求直言。陳格君心。澤民物。二十事。言甚切直。上嘉納之。每侍食。議大政。因論同列邵質參劾乖體。上兩釋不問。質黨給事中董希。摘疏中字激怒。上徙滇南。至蜀之瀘州。會大赦。當歸。郡縣以未得旨。留滯之。上忽思之。召入見。使者抵家不得。御史臺檄其父詣朝。令徧覓。至蜀。蘭陵病卒。上思益甚。乃審像。詔取鄉居者旁求之。給路廩。且面諭曰。得宗道人賞千緡。時門人陳拯在遣中。遇駟於播州。距父沒二年矣。至渝州。拯始以告。被髮號慟。行奔喪禮。至武昌。囑拯誌父墓。悲不自制。赴水死。時洪武二十一年也。學以禮爲宗。修於身。教於家。及於鄉。皆以禮。故鄉人號爲愛禮先生。其教人內謹心術。外謹威儀。言詞。日記功過。歷相考驗。反覆開諭。必使有所感悟而後已。最惡釋氏。欲驅之使不立於中國。陳北溪晦菴高第弟子也。產於漳。駟謂北溪之學。皆自庸行。庸言。樸實頭做去。故其學一本於躬行。趙彥進則謂駟少講明。而多篤信。輕體察。而重力行。林雍稱駟事親至孝。扶植綱常。陳真晟稱其執禮化俗。大有功於名教。文集十卷。行於世子嘉。趙府長史。

陳雅言。永豐人。父立本。與元路學正。雅言生年十三。祖可權。常閉戶校書。偶至其傍。祖探架上書。與讀。聲琅然。無一字齟齬。數過。卽能背誦。稍長。授詩於傅翠微。授書於徐江東。二人見其穎異。咸歎賞之。肆力古

學經史子籍。靡不蒐究。一夕夢人授以竹筒丸藥。啗之。由是文思大進。元末以茂材薦。弗就。乃著潛夫擬作。閱已寒松二賦見志。雖居亂離。不廢著述。已而喪父。搶攘中殮葬。必盡禮。明初平江西。郡縣設官。修舉廢墜。以雅言典教。永豐事屬創始。戶口土白失實。供需百出。縣官束手。求雅言爲規畫。公私稱便。建廟舉成祭器。招致賢俊。以就教育。後皆成材。收其族子之孤寒者。撫而訓之。有貧者衣食之。父母妻子。殉無以殮者。又具棺衾爲葬之。行之數年。無倦。民有負官租。至三年不能輸。督逋甚急。鬻其一女爲貸所逋。女得歸。改嫁士人。郡守屢薦。輒以母老辭。母年九十四。乃終。寢苦枕塊。三年哀毀。喪明。服闋日。草便宜十五事。欲上。未行。疾作。洪武乙丑卒。年六十八。

鄧學詩。字重雅。吉水人。有孝行。元季之亂。寇至。恣殺掠。母劉老病不能行。負之走。避隘巷空舍中。隰日。寇窮索獲之。解所懷金得免。繼復有獲者。求金盡矣。斫之已斃。繼又有寇至。見老母哭。傍甚哀。憫之。予善藥。傅創。又解衣覆之。久迺蘇起。負母走避他處。道遇渠寇。詢知其儒者。憫之。予酒肉。又自爲詩。令和嘉之。遣其下導出城。使遠去。少好學。負材具有。用世之志。明既定天下。御史劉昭先知縣事。以材舉江西行省。留爲宣使。慨然歎曰。士當局促。奔走人階庭下哉。謝病歸。尋復舉於朝。授固陵稅課使。乃曰。乘田委吏。可以行道。廉介寬平。商賈爭出其市。所入貨羨。舊額數倍。秩滿。徙平陽。持已愛民如固陵。甫再歲。目眚致仕。歸。自號疾退子。耿介修潔。氣岸軒豁。不屑意生事。爲文章。長於詩。蚤喪妻。無子。旣罷官歸。輒貧。無侍養者。是時里中故人親友。往往慕其人。與其學。爭延致之。則挾痴童日往來。時爲歌詩。以自適。官司皆知而禮。

之數出直言以裨其政之闕。人曰：廢於官，而其所適於中者，猶不廢也。歷三十餘年，向之故人親友，或死或遠，出里後生，雖以士名，有不能究知平生多悔之學。詩不屑較也。年八十餘，氣力益衰，貧益甚，冠帶垢弊，十數年不得易衣，薄歎歎，寒冬不得出門戶，然其所操執益堅不屈。人片語不合，拂袖去，不顧不肯一毫脂韋，洪恣徇人，以求所欲，建甯陳士希爲縣文學，獨愛重之。官滿將去，念將無以爲終也，爲備斂葬之具，迺去。自士希去，知者加鮮，未幾卒，有紫雲覆屍上，閱旬日，面如生，人咸奇而葬之。

唐豫，字用之，南海人。父奎，字景文，洪武初鄉貢，授增城教諭，博洽羣書，鄉人號爲唐書廩。湛策寇至，被執不屈死。有龜峰集傳於世。豫生而穎悟，少從翰林典籍孫蕢遊，作詩文有古風，性剛介，交友盡義，痛父死，非命，作蓼莪亭寓感，每日再至其中，東望灑泣久之，蓋其葬所也。學者卽其號稱爲樂澹先生。與東泉周祖生、南軒周祖念、節菴劉子羽、芸菴何淮、素菴劉子高、稱平步六逸，皆德行醇謹，衣冠嚴偉，爲人所欽，酌定鄉約，人皆信守行之。輸公賦，補尺籍，必遣少壯當行之人，禮遵文公，必敬必戒，子弟教以孝友，睦於親族，鄉黨讀書學文，毋令侈衣冠，博奕飲酒，鄉立爲甲，譏其出入，與所行事，卽有奇表，聞之有司，子壁，有文行，母替，不能自食，壁晨夕飲食之，徧求醫，母目復明，人謂孝感。一時公卿莫不敬重，參議陳贊待以賓禮，及改太常，執手別曰：卿吾三益友也。壁動循禮，大暑未嘗去衣冠，訓誘子弟，端立正坐，出入規矩，然後授以句讀，或見以爲迂闊，曰：文藝末事，不收放心，何以受教，其敦行如此。正統黃蕭養之亂，避寇佛山，畫策賊不能入，皆有集藏於家。

王順字性之義烏人幼嗜學嘗從許文懿受學讀書必見之躬行里有大鼓湖瀦水灌田五千餘畝歲久益圯天稍不雨田咸作龜拆民不得蒔順卽倡興築之約田爲輸作有差而自出布錢鑿石作水門視時蓄洩民賴其利朝廷營建宮室徵木石工於郡縣縣胥緣爲姦利卽老幼廢疾不任役者請悉籍甚者捕比鄰以代順白縣覆實而新其籍有徵發按籍輪役之村疇疾急不能致善藥順儲峙以待其需鄉間有單篋者出粟賑貸沒給櫓檣瘞之通錢久不能償焚其券又以爲移文易俗必本於學乃建書塾招良師會鄉族俊秀俾子孫與共學月且十五日具觴豆延父兄列坐左右立諸生堂下而自正衣冠於中以孝友睦嫻之道誘掖飭導之官知其賢凡婚媾貨產之訟往往下順所調護之片言取決不復重有辭縣初定田賦科由之籍請順鈎較諸宿弊盡削順欲進均賦役之策會病卒素服而臨葬者千餘人大雨中皆爲嚴立縣官嗟異之順樂易未嘗有憂色好賢樂善通周易每鄉人飲酒奉律令每爲人解釋之閑居無事焚香鼓琴以自樂云

潘樞字景嶽鄱陽人元末吉安爲劇盜李道明所劇安福州屠掠尤甚明兵下江西李道明遁去以薦擢爲安福通判署州事舊有俘略男女數千官軍將奴之衆無敢言樞聞曰此輩何罪王師如時雨將平天下而反累平民且及其孥乎白於主帥鄧衛公請一切釋放衆皆憤憤鄧獨欣然令騎兵大索曰敢匿者斬乃得出自設糜食之婦女稍豔者俾以塵土澆面衆卒議乘夜來劫樞知之授以計曰脫有宵傲當同聲大呼已而果然衛公驚起擒首惡者鞭之乃已因度道里遠近次第放歸無家者與居傍縣者召其戚

屬辨識而歸之。大軍遠戍安福者僅五百。而降卒居半。潛與李寇通。夜抄略爲姦利。民訴於庭。懼變作。如所失償之。日撫楮賑恤。漸以完實。而卒終不悛。引寨丁二萬。鼓噪南下。知不可守。開城門。縱百姓避寇。請府乞師。與賊大戰。敗之。州以復完。已而徐達以大兵至。走轅門。獻計見用。進攻永新。轉餉不乏。戊申。改州爲縣。以爲主簿。前後九年。治爲江西第一。癸丑。召赴闕。未及用。卒年五十一。父希古。有文學。推善易數。號東湖適士。一日病疫。將革。妻胡氏拔鬢祝天。期以身代。翼日愈。後五日。胡氏果終。東湖遭大亂。誓不受汙。後遇寇。將加害。樞及弟槐楫柄爭代死。賊憫而釋之。人作五義士傳云。

朱煦。仙居人。世儒家。母楊性嚴。諸子稍不如指。笞撻之。煦事之盡恭。不致母怒。父季用薦知福州府。洪武十八年。詔天下盡革今歲以上積歲官吏爲民害者。輸作城役。季用任僅五月。亦以例逮。日用錢僱役數十緡。季用又病。荆被楚不能上。謂煦曰。吾資力豈足任此。吾旦夕死已矣。無爲汝累。汝第負吾骸歸葬耳。煦惶懼。不敢頃刻離左右。復戒二弟熊羔共守視之。時在役告枉。令嚴甚。而戍極邊者三人。抵極刑者四人矣。煦奮曰。吾無術以脫吾父。訴不訴等死。萬有一父緣訴獲免。卽戮死無恨。父寮同役者交阻不聽。具告枉狀上。上悲傷其意。赦季用復官。例復官者十四人。皆拜季用。謝曰。微君有孝子。吾輩骨肉。皆爲城下土矣。已而煦感疾死。季用傷煦病亦死。或者以煦冒死得免爲幸。又以父子俱死。王叔英憐而傳之。其時有陳叔弘黃巖人。與鄉人讐。讐人以賊告弘。罪當死。其子圭。上狀通政司曰。圭爲子不能諫。父陷不義。圭罪當死。使父得自新。誠不勝至願。通政司以聞。上大喜曰。不意今日復有孝子。宜赦其死。俟天下百官朝。

覲將播告之爲天下勸。刑尙書開濟奏曰：罪有常刑，不宜屈法以開僥倖之路。遂聽圭代而誦其父隸兵雲南，聞者皆恨濟之酷。王中母沒廬墓所，哀毀致瑞泉之應。李英力貧養母，冬必溫衾席，母患疽吮而愈。母病帶下，取糞嘗驗，易劇。母卒，廬墓三年。周炳事母，焦至孝，母病篤，禱天求代而愈。後復病，思食獐肉，求不得，忽一獐入其家，得以供，復愈。趙讓母沒廬於墓，虎猝至，讓不怛，虎莫敢傷，弭尾環繞而去。盜六人夜入廬，見其哀苦，反遺之鈔，即埋於地不用。給事中魏敏以母病乞歸，未至而母卒，敏即走墓所，哀慟水漿不入口者五日。廬墓三年。國子生張翼，父母卒，皆廬墓三年。慈烏數百，旦暮悲焉。暮樹亦三年。鈞州人張宗魯，少失明，長遭元亂，負母路逃難，妻掖之以行，歲饑賣卜以養，妻采野蔬佐之。天下定，奉母還，竭力爲供。母卒，仍求其前母三人遺骸合葬之，父墓詔同表其門。

錢瑛，字可大，吉水人。祖本和，號梧岡，以篤行稱。瑛生八月而孤，稍長，穎敏，年十三，中省試。元亂，奉其祖及母崎嶇避難，最後自雷州奔廬陵之李坑，路極險，盜又追及之。梧岡被鎗不死，縛之。瑛聞卽昌兵刀奔訴，乞以身代，盜并繫之。瑛訴不已，梧岡亦哀告無子，惟此一孫，情極悲慘，賊憐其義，兩釋之。瑛方脫時，其母尋亦被執，而妻張鬻伏叢薄中，窺見賊已執其姑，卽自出迎，謂賊曰：姑老矣，請釋姑而縛我。賊熟視良久，旣解其姑，復縛張。旣就，擲所攜袖中雙鞋與其姑，訣曰：婦無用此矣。且行且睥睨其姑，稍遠卽罵賊不肯行。賊持之急，益大罵，攢刃解之。明兵定江西，有司知其賢，凡三薦以親老辭。親旣沒，終身悲痛，梧岡故所築樓，瑛每一登輒流涕，因名之曰思樓，爲人豪健，慨然以氣自負，有劇寇殺人，有司憚不敢捕，以屬瑛，立

擒殺之。一子曰遂志，中進士第，官山東僉憲。

孫維中，濰州人。世爲農，長身美髯，朝耕暮讀，善談古今事，賢靈也。愛古名臣言行錄，能背誦之。爲甯海州吏，尋貢益都府，會父琳卒，皇皇不欲生，既葬，結廬其側，苦塊曠野中，深夜月冷，哭聲依依，隨悲風遠聞，人多爲泣下。日啜菽糜二盂而止，晨起掬雪頰而已，輒詣墓前拜，久之，手足皸瘃，形容憔悴，或勸其還，哭不對，聞之，縣令戴友諒，勿之信，夜半攜二蒼頭往廉之，壓廬而聽，孝子蕭然塊處風雪中，聞足音，遙問曰：「暮夜欲何爲？」戴歎息，上於部使者，請旌。妻劉氏從，惟中之化，惟中居廬三年，劉亦居聖室，不近酒肉者三年。子尙志，業儒，爲禮部主事。

祝大昌，字公榮，麗水人。色養父母，意所欲候知之，不言而事集。一日不見，皇皇如失，得一味甘，雖百里外必歸薦之，乃敢食。母疾，晝夜煖藥餌，奉飲食，衣久不解，蟣蝨叢生其間，走禱羣祠，且泣且禱，語不成聲，見者爲墮涕。及母歿，號慟幾絕，諸復襲，縶綴殮殯，奠耐一衷於古禮，會煬人不戒，火起勢烈甚急，莫能救。大昌伏母棺號慟，誓與柩俱焚，火忽自滅，既葬，乃肖二親像於堂，祀之如生存。事兄公亮如父，家事大小必關白，而後行。公亮出，大昌不敢中席而坐，弟公直歿，號哭頓仆，久乃蘇。孳孳以同爨爲念，請於公亮，建家範數十則，令子姪分任其事。視勤惰而勸懲之，莫敢不率。每旦序食堂上，氣象雍睦，不聞人聲。三世一體怡怡也。或間之分財，大昌撫膺長慟，痛自責，以爲吾不睦不友之過，故處人稱大昌孝友無間言。大昌風儀岸持，善談史，上下數千年，治忽幾微，加指掌，尊賢重傅，平心率物，未嘗以好惡有偏徇，故舊貧窶者周

之死給之棺。歲儉輒出粟下糶。惠族嫻。下及閭井。鄉人咸德之。以薦徵辭。隱居而終。

瞿嗣興。字華卿。常熟人。父達。仕元爲蘇州提領。嗣興生而純慤。事親至孝。母患癰。瀝漬。當長夏。臭穢不可近。爲燻湯洗滌。執扇驅蚊蚋。晝夜不休。旣又罹積氣疾。百藥不治。乃剖股肉作羹以進。母不食。已五日。忽盡啖之。氣疾如失。一日母思芟食。時芟始花。求之不獲。凡川有菱者。解衣入水。歷覓之。腰脰赤腫。號呼籲神。俄得三菱。人以爲精誠所感。旣而貧益甚。歎曰。事急矣。株守不變。如父母何。移入蘇城。稱貸富貧。買遷分息。悉籌計。囊大裕。凡父母所欲。無不致也。宅心仁厚。單窶者必思賑給。而不欲其知。有王姓者。素賢貧。臥疾不能興。雞初鳴。嗣興往。以餞二十緡。投窗隙而去。民有告糶者。羈衣百結。知其貧而賢。嗣興受其直。五千。復佯問曰。吾性多忘。若欲糶千耶。遂如數與之。有負販者。至。價高下。嗣興一聽其言。不與較。家人怪之曰。彼竭漢血以逐什一之利。寧能足吾用乎。歲大儉。來依者甚衆。嗣興擇勞近舍舍之。會厲氣作。病者相枕籍。每晨躬搗粥藥。撫視。卒賴以全。方寒朝出。道中拾遺囊。悉歸求者。未幾又有忘契券白金者。見而蹙額曰。白金固易致。質劑乃資業所憑籍。其必起爭端。密偵而還之。其人勢家奴。因失主物。畏幾欲死。謝曰。三尺微命。皆公所賜也。嗣興雖不讀書。其篤行有士大夫所不及者。晚喜浮屠。讀其書。豁然有會。復閱北溪陳氏性理字義。旣解其要。曰。聖賢之學。蓋如是。因戒其二子懋。莊曰。我少不學。至老而始悔。若等勉之。乙卯病。恐馳慮。畫圓圈。揭屏間目之。卒年八十四。莊官至參政。

邱鐸。字文振。祥符人。通儒。兼習醫家言。聲動一時。至正末。父誠爲湖廣儒學提舉。鐸侍母。馬留吳越。欲御

車往從江右兵大起路梗避地四明及歸職方復奉母至建康每向西泣曰武昌有來者庶幾知吾父之所在乎已而其父至鐸賣藥市中給供養驢然忘其貧未幾弟鈞爲上虞巡檢鐸與父母皆赴上虞母疾鐸晝夜泣禱及沒哀慟幾絕葬鳳鳴山哭曰鐸生也咫尺不離吾母今逝矣可委吾母於無人之墟乎山常白馬上妃二湖間人跡罕到白晝虎狼旁午結廬墓側朝夕上食如生時寒夜月黑悲風蕭颯如臨鬼神恐母岑寂也輒巡墓號曰鐸在斯鐸在斯虎交跡廬外聞哭聲輒避去會稽人異之稱爲眞孝子云先是鐸在四明從祖父母居汚者八人貧不能自存咸迎養之死皆返葬先塋人以爲難其姑適河南匡氏者年十八夫亡誓不再適鐸養之終身凡二十年如一日其制行峻絕他皆類此

伍洪字伯宏安福人資稟清純爲人剛介幽居僧舍力學二十餘年慨然有志三代元屢聘不仕洪武三年庚戌定以經義試士慨然曰道可行矣以春秋舉省試明年登吳伯宗榜進士授臨清丞會有族叔任憲司改績溪簿有惠政奏最陞上元令上察其清將拔置要職適父性中總邑賦輸於應天病卒奉歸悉做禮制既久或趣之仕辭曰烏有母老而養不顧者況吾志亦小試矣家富丁繁每欲效張公藝以齊之諸弟或有異同曰是吾德薄強之終不安且生他隙於是隱居梅溪養母至於舊積憑弟自擇惟拾一二朽敝之具庶弟仲舒甚穉母子子無可依爲子視之及長割所有俸獲成立洪武丙寅異母弟伯讓得罪出亡上遣官校擒之弗得趨所居執其母復命公哭求代母曰汝往必死莫若老婦當也親故諷之亦然曰母離步子卽自死敢以弟累老母全己身也官校頗難之奮然曰罪固死矣以子代母以兄代弟

何不可之有。就繫而行。竟死。人皆悲之。詩文溫雅。見李忠文於童子時。奇之。動必教以正。逮別。送者數百。無不涕泣。神色怡然。進忠文等曰。吾爲家也。子異日爲國。勉之勿自怠。

曾鼎。字元友。太和人。祖懷可。教授。稱鷗江先生。父思立。篤學不仕。稱竹間先生。鼎性孝謹。元末紅巾亂。奉母走避。寇追及。執其母以去。跪陳母老無供養者。寇怒。揮刀將殺其母。號泣以身翼蔽。寇益怒。連砍其頂肩及足。流血被地。而控母不舍。寇帥至。憫之。送其母子入營。調而藥之。得愈。資遣送出。江西行省全普菴撒理。辟爲濂溪書院長。迎母就養。全死。奉母歸里。經兵焚室廬。皆燬。縣尉楊爲搆數椽居之。榜曰曾孝子廬。母歿。哀毀盡力。喪葬。江西平。辟典課稅。人稱廉平。洪武三年。改州爲縣。知縣劉昭以明經舉。辭。教授鄉里。鼎眉宇秀朗。潔白如玉。儀度偉然。博學彊記。專禮經。工詩。擅八分書。範銅爲小印章。渾然古雅。精康節數。占筮奇中。人皆稱之。二子迂頑。

陳思禮。字用和。鄞人。生七歲。父德祥歿。母石氏誓節自守。督思禮學甚嚴。雖大雪沒脛。必使挾冊往。或少懈。泣對之曰。爾父爲名儒。惟汝一子。吾所以忍死鞠育者。賴汝有知。取法成立也。柰何背之。思禮皇恐請罪。肆力於學。每夜分不休。母卒。思禮被髮狂號。曰。旣不侍養。又未見成立。顯吾親。何以生爲。於是求死。家人百方喻解者。久之乃釋。服闋入郡庠。母先爲擇婚石氏。至是年二十四不娶。曰。娶婦爲養姑也。失母又焉用婦。親友交責之急。乃得成禮。合卺後。號泣凡七晝夜不絕。婦亦化而隨之。益勉學不廢。洪武六年貢入太學。以如在扁其堂。劉基陶凱皆重之。贈以詩文。稱純孝焉。

毛聚字德玄掖縣人幼事繼母秦盡孝寇至衆驚走秦老不良於行聚獨侍左右弗去寇問曰爾寧不畏死耶聚泣曰母老安敢自求活寇不忍犯後避地崑崙山會父病疫夜渴求酒飲山深多狼虎弗可行聚徒跳出山乞酒還飲父愈與兄弟分財恣所取而受其棄遺者長兄葬方及壙訛言盜至人皆懼奔匿聚曰兄柩在忍棄之乎卒掩壙而還再從母殯城隅遭世亂人取其輒殆盡聚買地瘞之族女六人貧不能嫁皆出資爲妝族中不克葬者十餘喪皆爲葬之歲食有餘粟則推以濟鄰里貸不償者焚其券有過宿者且遺錢數百緡而去追還之鄰人耕侵其畔或以告聚曰安知非彼地耶其居家待人無長幼皆以誠久而人咸信之稱爲善士生二子蔚炳蔚生二孫紘縉皆以道學名紘由國子生爲禮儀司序班吳宗元字長卿諸暨人宗元孕十四月而生幼穎發屹如成人蚤失父事母甚恭母病夢白衣人謂曰汝壽止此今以汝子孝特延一紀疾果瘳以薦辟太息曰母耄年得力田爲養足矣何以仕爲固辭母卒號慟幾絕久之每語及輒嗚咽流涕如新喪已念父母沒惟教子孫毋析居乃可以繼先志詣浦陽鄭義門謁焉得其家範數千言以歸力遵行之庭無間言和氣所感家有犬病足子銜食哺之製家教書訓飭凱切洪纖無不及而惠利鄰族之事居多性恬沖於物無忤貌淵澄山簞出言不繁咸中肯綮其與人熙然如春頗嗜音樂自造短簫長可六七寸遇風日清美輒吹之聲振林木晚歲視聽行步如少壯歲時及卒期功總麻且千指就位而祭州里更相弔十數里哭聲不絕

朱環義烏人赤子時無兒啼聲仲父桂無子養爲子已桂生子璧及宗周頗疏外環環事之彌謹服勞事

不知有寒暑也。時境內多盜。白晝斂人財。桂有金數百兩。與璧謀瘞窖中。璧夜發之去。復誣環。桂怒。褫環襦袴。立之大雪中。一日夜。環涕泣謝過。終無一語辯其冤。桂虐使日甚。環五六年間。數瀕死。恆順受無怨言。桂見。遇璧益厚。璧子慶多暴。入獄。環竭力營救。卒免之。環有子曰元。女曰壽。元字子初。盜起。縉雲。置砦峽源山。將劫環及兄魁。奉之爲帥。環莫知之也。元聞。遽歸走白。二父當速避。環老憚奔走。又謂亡是事。不聽。涕泣請。又不聽。罵之。元度賊縛翁去。誰爲白翁非抗盜者。必殺盜。庶有名。伏垣下。賊偵騎至。斫殺。梟其首。以血手入示父。負之去。未幾。台賊旣獲。環亡。奴素有怨在焉。誣以通賊。遺之金。逮下獄。時所司方患盜。凡盜獄所連。多論死。會元病。不能出辯。籛已嫁。適歸甯。元視壽泣。壽曰。昔緹縈能救父命。我獨非人耶。乃走告法曹。椽馮聚賢曰。姜父無罪。亡奴欲誣以不道。儻事不得直。一家枉作泉下鬼。聞君素長者。獨不能相活乎。言訖。淚如雨。馮怒曰。此事豈汝女子所知。壽哀祈益切。馮爲惻然。良久。揮壽去。曰。爾但歸。吾知所處矣。明日。使吏椎碎奴口。不果誣。環喜。讀書。嘗舉元進士。入明。不受辟。年八十六卒於家。

危貞防。字孟陽。臨海人。父孝先。洪武辛亥進士。坐法謫役浦江。貞防時爲諸生。聞之。奔訴郡守。願代之。守以其名隸儒學。難之。貞防號泣曰。人孰無父。奈何獨沮於我也。得如請。卽日上道。詣闕。上疏曰。臣父陵川丞孝先。不幸誣吏議。輸作大江之濱。筋力向衰。不能執事。而大母范氏年九十。旦暮念之。恐染霜露之疾。終天憾。或及其身。臣犬馬齒方殷。願代父作勞。使其歸養。雖死無恨。聖天子以孝治天下。惟哀矜焉。上從之。貞防乃欣然改服就役。然體廼弱。不勝負任。苦。越七月卒。人皆憐之。貞防通周易。能詩。性剛直。讀古忠

孝事。斂衽久之。且曰。使吾生其時。亦當若是爾。遇交友惠難。蹈湯火不爲利害惑。卒年二十八。

姚玘。八歲好讀書。貧弗能自給。從里中大姓塾師就讀。業成。元季亂。奉母陳避於野。遇河不得渡。母泣曰。吾聞古貞烈以辱身爲死。兵至。吾誓不受辱。不如死也。遂自沈。玘急挽不及。與俱溺。頃之負母出。而母子復生。數遇盜。中流矢。伴死。伏屍間得脫去。奉母過湖。已爲淮兵所得。疑從苗中來。縛送柳上軍。辨得白。將署爲部史。朝夕思母不置。泣以告。許之。得上舟。載母遁。母病思魚食。暮夜無所得。有烏攫致白魚盈尺。以爲供。後兵息。臺臣聞而辟之。以親老辭不就。人益高其節云。

盧宗齊。字思訓。常熟人。元時祖安澤爲德清令。入明。以鄉兵統諸閭長。坐法當死。縣錄其父德良與兄某。宗齊私念。時法嚴。必死。父老。萬萬無就逮理。兄家嗣。且未有子。吾幸有子。得代父兄死。含笑入地矣。卽挺身詣吏曰。宗齊精力彊。久任官中事。父兄無所與。吏不疑。按訊一一引伏。獄具。洪武辛亥夏六月斬於市。顏色不少變。年二十二。知者無不哀之。爲具斂。以屍歸其家。

崔敏。字好學。襄陵人。生四十日。其父仕元爲縣竹尹。父子不相知識。踰三十年。獨依母氏。洎兄居。幼勤學。壯而彌篤。元末兵亂。與母及兄皆相失。子然獨居。思其父母。辭室家往。徧求之。入秦不遇。乃入蜀。抵縣竹。其城邑數經兵亂。奔爲荒落。詢遺民。求父邱壠。無一知者。乃獨徬徨叢棘間。仰天號慟。頓絕而蘇者數。既無所見。復歸秦。行次鳳翔野。遇其親戚處有知者。訪得其祖父葬處。卽啓殯。負其骸以歸葬。人皆稱曰。崔孝子。

劉謹字惟勤山陰人洪武中父譚戍雲南伯兄又以督運死京師謹六歲輒知痛其父一日問家人曰雲南在吾越何方家人以西南指之輒朝夕向之遙拜年十四矍然曰雲南雖號萬里天下豈有無父之子哉治裝爲尋父計時滇夷初服道路荆楚衆勸勿行卒不能已歷六月抵雲南艱辛萬狀遇父於逆旅相持號慟行道傷悲俄而父患瘋痺卽欲以身代戍冀得歸父而國制戍邊者惟十六以上嫡長男始得更替於是復歸年十六往不能代於是又歸悉鬻其家資以往會赦三往返卒歸其父父歸家貧甚謹力供菽水晨昏必極其歡督學廉使張倬聞於朝旌之後子孫相繼科第多貴顯者人稱天道云

楊敬歸德人父旻洪武間死於陣時敬十歲聞訃哭踊每思求父遺骸不果乃取衣冠葬於先塋事母艾溫清以時服食有節凡母意所向無敢少違暇則讀經史開家塾以授生徒每閱戰陣事輒流涕不已時人以王褒擬之後母卒敬哀毀踰禮方殯在堂而西鄰不戒於火將及柩敬仰天大哭俄風反火息鄉里異之事聞詔旌其門子愨舉人任知州

顏琇字季粟吳人洪武初父戍鳳翔以母韓行琇獨留久之聞母歿卽奔赴負母骨歸行數千里未嘗釋於地寢則皮置之宿其下涉則戴之泳焉父旣放免奉事尤謹旦夕自洗廁踰其父勞苦之云幸不乏食又何以爾爲令人趨代竟不肯父卒日夜號泣水漿不入口者五日不勝喪死子昌亦有孝行

胡剛字惟輔新昌人生有至性洪武初其父謫役泗上以逃役當死敕駙馬都尉梅殷監刑時剛往省代役立河上求渡聞之遂裸跳泗河而至奔走哀訴請以身代言與淚俱情甚懇迫梅憐而奏宥其父同坐

者八十二人俱免死。淮人至今傳誦云。

鄭氏金華浦江人。出唐宰相滎陽浦江白麟之後。於婺爲山邑。俗樸茂。力田作。梁貞明初縣人。何千齡四世同居。宋濬鄂間。鍾氏同居者三世。至乾道間。鄭氏有名淮者。自滎陽遷邑。之感德鄉居焉。去白麟十九世矣。淮生照。照生綺。綺字宗文。通春秋穀梁學。撰合經論數萬言。事父母孝。父非罪逮。當死。綺上書郡守。錢瑞禮請代。得白。母張氏病風。縶綺保護如嬰兒。每適廁。必抱負就之。三十年不懈。數薦辟不仕。卒。賜號冲素處士。當處士世。實始創家規。勸子孫無異舉。綺生聞。聞生運。運生政。政生龍游。丞德珪。青田尉德漳。敦睦彌固。爲仇家所傾。兄弟相爭死。德珪竟以計先死之。子文嗣。文泰。家益昌。蓋同居六世。歷二百四十餘年。元至大四年詔旌其門。順帝至元二年復其家。初文嗣旣卒。德璋子太和。主家政。方正端慤。嚴而有恩。家庭中懷如公府。子弟有過。雖斑白猶加鞭訶。遇歲時祭饗畢。太和坐堂上。羣從子姓皆盛衣冠。鴈行立左序下。以次進拜跪。奉觴上壽畢。皆肅容拱手。自右序趨出。足武相銜。無敢參差。見者嗟慕。以爲有三代風。吉凶之禮。一遵古人所定。有家範二卷。使者余闕行縣。書東浙第一家。褒嘉之。太子聞其事。歎之曰。此國家祥瑞也。復親御翰墨。畀以鳳麟二大字。翰林學士承旨歐陽玄爲之贊。勒石。子鉅。字彥宏。七世矣。方諸父主家時。日侍左右。操其權度。助大小之政。益能以義充其族。與羣從傾誠。有周旋。畢得其懽心。比主家確守成法。內外政益治。鉅沒。從兄銘。字景彝。次當主家。以母喪哀痛甚。衆弗忍請。至終喪。羣從固請。而銘先爲贅壻於蓮塘張氏。盡籍所得。張氏田廬歸之。乃復還。已自念居於外者久。不親家事。從子潛贊。

能負荷。且宗子也。遂告先祠讓之。謂亦固辭。因虛其席者久之。銘受春秋學於吳萊。大義畢通。吳萊愛之。與相親如父子。然而銘與同門胡翰宋濂晝夜相摩切。肆力古學。早失父。事母黃至孝。黃素嗜鰈魚。必徧求以悅其意。會有疾。倉卒不得魚。力致之。羹香糝以進。疾遂瘳。奉諸兄如父。進退坐起禮甚恭。面目嚴毅。不妄言笑。不與人交。終日默坐。或焚香以銷世慮。臨事重然諾不苟。其文辭峻潔莊凝。絕似其爲人。卒年六十二。從弟鉞字□貞。嗣主家政。方嚴有禮度。父病。適喪妻。不敢哭。強顏笑。進湯藥。後八日父卒。一慟幾絕。三日鬚髮皆白。或勸再娶。謝曰。鉞見後母戕骨肉者多矣。忍令兒陷之耶。年未四十。竟不娶。家範益增。演修明之。家人翕然遵化。一堂之上。逾千百指。愛無不均。不知孰親而孰疏也。有家務。羣趨竝赴。雖甚勞不懈。不知其事非己出也。義浹仁孚。和氣充溢。過其門者神暢心怡。而鄙吝之萌銷沮無餘也。凡食貨田賦。各有司者。出納雖絲毫。咸有文可覆。諸子弟晝趨功。夜聚坐棊華軒。講說古今論理道。至更餘始休。雖貴仕若無。雖章布色充然自得。子孫從化孜孜。執親喪輒不御酒肉三年。卽童幼。不識塵市嬉戲事。諸婦惟執女工守教。不使與家政。內外甚嚴。僕使通命。不敢越堂限。家畜兩馬。一馬出一爲之不食。僕有施慶者。父死行喪禮如其主。蓋所感如此。鉞持正。尙風義。善文辭。而於人有恩。出遊至燕。謁文安公侯斯。黃文獻公潛。方以文學重當世。皆折行輩與之交。論詩文或達旦不休。仲子泳。與從子深同。講授脫脫太師家。鉞上書陳時政。多採而行之。一時士大夫無不敬信。卽酣飲聞公履履。未嘗不敘容也。故人子失官。留武林。貧不能自存。延其家十口來浦江。衣食且三十年。里中災獨廢疾者。多養之終身。每夙興告饑者。

填門餉之不厭。元末兵亂，大將數統兵入境，皆戒士卒無犯。樞密判官阿魯灰乘五萬騾至劫掠，說以利。阿魯灰愕問計，對曰：浙東據山阻海，其民柔順，撫而有之，使盜兵不敢東，爲朝廷障蔽，功莫大焉。阿魯灰不覺屈膝，致束帛爲謝。天兵取婺州，攜家避入諸暨。李左丞統兵至，歎曰：此義門也。躬爲局輪，事平遣兵護歸浦江。甲辰年七十卒，葬於諸暨州，以泳封從侍郎。浙江行省左司都事，渭字伯陽，文嗣之孫也。父鑑，義門第八世主家政，均平齊肅，有盜入林，僮往禦，爲所擊，墜塹死，禁勿認。官自殮之，人皆感化。洪武十年卒，年七十二。繼者濂，字仲德，號采苓子，美髯長身，貌肅而氣和，田賦推擇爲長，入覲，太祖識之。旣與弟浦混爭死，得宥。上問濂治家所以長久之道，對曰：守祖宗家法，不聽婦人言而已。上大稱善，手梨果賜之。濂拜賜，以手擎至額，出殿門，終不食，懷之歸。畢剖分其家人，上遣人詗知之，歎曰：眞家法也。欲官之，辭老不任。上生辰，捧香詣闕拜賀，勞之時，浙江巨室多以罪傾宗，而鄭數千指獨完，且食祿被賞，人以爲忠信之報云。上患俗習澆僞，益尊顯鄭氏以風天下。會御史嚴震直有疏薦，詔拔其子弟年三十以上者，舉赴闕，召見擢用，其儀狀端正，識明敏可用者，官之。當選宮寮，濟爲春坊左庶子，同時有王氏亦善家法，上知之，選一人曰勳，爲春坊右庶子。久之擢濟弟沂爲禮部尙書，從子榦爲御史。濂自成童至耄，言信行謹，事長撫孤，待昆弟，接朋友，竭盡誠心。主家政十七年卒，年八十四。其王氏兄弟曰子覺、子麟、黃氏兄弟曰逢吾、逢昌，皆聞鄭氏之風而興起者。混，字仲持，奇警有長才，貌魁偉。洪武十四年二月，有訴其家交通胡氏者，吏捕之急，渭兄弟六人爭欲行滉曰：弟在其忍，使諸兄受刑，自詣吏請行。濂方以事至京，

迎謂曰。吾家長嘗認罪。滉曰。兄年老。吾自往辯。爭入獄。上聞召至。勉勞之曰。有人如此。而肯從人爲非耶。卽宥之。賜酒食。擢滉爲參議。上命舉有所知。以同郡王應等五人對。詔皆授參議。竝能其官。滉抵官。吏民熟家聲。相誡勿犯。豪將病民。與爭可否。帖帖長服。南靜縣民亂。誣誤者數千百人。部曲多掠其婦女爲奴。言於主將。縱去。兵不敢譁。商有二人遇盜。殺其一而取其財。其一人得脫。訴於官。捕盜在獄。驗屍無有。公夜取盜鞫訊。因縛置於庭。匿吏案下。俾聽其語。夜半盜顧庭空無人。果私語。始知沈屍井中。明日詰之。驚服。人以爲神。十五年入京。卒。年五十六。洪字仲容。明初曹國公辟爲參謀軍事。已而薦入朝。爲引禮郎。轉江西行省照磨。有能聲。秩滿。改藏庫提點。未幾。同官有坐法者。辭累洪。累死獄中。妻石氏悲慟不欲生。吏議當配。石氏仰天歎曰。生爲義門婦。死則爲其鬼耳。吾夫已亡。豈使汚其身以玷旌門乎。遂絕食而死。事聞。太祖悼之。謂侍臣曰。此真義門婦。竝歸其喪。洧字仲宗。好學篤義。卽爭死入獄。病卒。太祖憐之。歸其喪。鄉人私諡曰貞義。子柏淵。字仲涵。與滉皆師宋濂。習舉子業。讀古文詞。有志濂洛關閩之說。濂亟稱之。謂其有聞於道。文冰潔而木茂。進未有量也。母病逾年。抱持終日不離側。夜則泣禱於天。請以身代。忽臂患疽。不能坐。跪進藥。膝爲生胼。母病革。思食西瓜。旣食而卒。終身不忍食瓜。居父喪。絕而復蘇者數四。杖而後起。服雖闕。遇忌日哭奠如初。喪元季諸暨盜作。羣從子弟避東陽。遇盜。資盡沒。淵在金華聞之。泣盡持所服衣裝。往分之。身泣寒不恤也。從弟禮與妻早夭。遺三女。淵鞠育長教。選名胄資嫁之。家族屬衆。卽有疾。不擇疏戚。夜三四起視。有死喪。匍匐身任。斬春王烈家燬於紅巾。與有族五十八人。流寓浙右。館之數月。

而後去同縣詞人貧不能養母淵聞之慨然曰悲夫吾卽欲養其可得耶厚周之諸解衣推食建渡濟物甚衆淵爲人濯然不勝衣而矩度峻整神采卓然於倫品則驪然如春氣流浹不知泰和之襲人也元季薦不就明初聘以饋辭卒年四十八宋濂深痛曰其事我不以師而執子之禮先子而逝引徐仲車事諡曰貞孝所著有遂初藁十卷子楷鄭氏旣多賢子弟源字仲本剛介有志節好施與濤字仲舒溫恭學多深造元季以文學有時名入經筵爲檢討官危素稱南冠而北仕德行當推濤爲第一皆與宋濂爲金石交洪字仲徹主家建文四年詔旌其門漢入謝陛辭日上御奉天門親書孝義家三大字題其榜曰賜浦江鄭漢而識以精一執中之印燕兵旣入有告建文匿其家者遣人索之先是廳事列十櫃五貯經史訓子孫五貯兵器備不虞使者至所發皆史乃寘其半不啓而榜以鉤墜暫輟乃得無事浦江歎美以爲神實陰佑之也

顧氏先金華人後徙台相傳以爲梁顧歡之後南宋有知言者通黃帝內經治疾奇效歲大疫日夜囊善劑巡里而與之鄉人戴德焉生子曰商卿周卿商卿故篤行後以薦爲郡學官明經講授出其門者皆鞠躬君子也鄉閭質平周卿舉進士爲奉國軍僉判娶施氏女裝甚設周卿夜讀劄而假寐施戲泚筆塗其面覺而怒且卽出再娶楊無子會商卿卒子幼抱育之商卿孫曰玉文宋季亂父申爲盜得抱文頸求代被劄得免議婚應氏已納綵而女墮折其脛或曰盍已諸曰婚有盟何可背也彼體雖虧行自若竟娶之應盡婦道爲宗人女師玉文子鎔少穎稱神童吳丞相堅以女妻之大母葉與其母應皆春秋高鎔事甚

謹。兄鑄。早世。撫其孤。有恩。念族屬衆。益闢疏。正月吉。與日長至。大合族。行聚拜禮。以親之。近者旬月。輒爲會。飲酒。哦詩。情文藹如。疾必視。喪必弔。朝暮祇謁先祠。大寒暑不間。家畜二貓。偕孕。一旣產出。爲人所繫。未產者。往乳之。及歸。同棲而抱。子人以爲和氣。所鍾。鄉井孚化。有赴愬。不之公府。之其廬。里有陽歸堰。溉田萬頃。當農功作。必繕築。以利里民。造版籍。履畝而覈。具書之。鎔性端恪。子性有不善。面質責。不怒。而律身尤嚴。日暮。輒篝燈。晝日所爲於籍。不可書者。不爲也。年九十二而卒。蓋是時天台多賢儒。自鄭氏外。若陳茂卿。吳清之。吳直溫。與聞洛閩之學。故人修士君子之行如此。

何潤。字子潤。吳元年四月。上海民錢鶴皋乘時未定。率鄉民鼓譟入城。執華亭知縣馮榮。場官李蕭。袁浦等。將害之。潤挺身嬰其鋒。曉以大義。順舉家爲保。榮等得免。猶置獄中。知府苟玉珍逃之野。復還遇害。潤亟奔死所。收其遺骸。函藏哭奠。授其家還葬焉。府及屬司八印皆散失。不知所在。潤物色得之。出私財購而納諸官。方倉卒時。老穉有不能出城避難者。無問識不識。悉爲寘之縣後堂。供其宿食。得免者甚衆。及葛指揮率兵來誅兇。惇潤復具羊豕酒醴迎犒於郊。費皆自己出。旣又率父老詣徐達。拜其殲渠脅從。罔治之德。一方以寤。馮榮深德之。將聞其事於上。固辭乃止。時咸稱何義士。

王世名。婺武義人也。年十七時。父良爲族姪俊。以爭屋毆死。孝子恐殘父屍。不忍就理。乃伴聽其輸田議和。凡田所入。輒易價封識。俊有所餽。亦伴受之。雖錙銖罔有不計。值封識者。私繪父像。自像帶劍侍。懸密室。朝夕泣拜。購利刃。銘報讐二字。母妻不知也。服闋遊邑庠。不專事舉子業。惟手書忠孝格言一編佩之。

已而生子甫數月。撫之謂母妻曰。吾已有後。可以死矣。母妻亦不知所謂也。一日。俊飲於其鄰。醉歸。孝子乃迎而揮其所購刃。立碎其首以報讐。故號於衆。歸以白其母。遂出其所向封識。租償餽值。及宿購首狀。赴邑請死。邑令欲白於上。曲宥以全孝子。孝子曰。此非法也。非法無君。何以生爲。遂不食而死。死之日。雲霧昏慘。烈風迅雷。大雨如注。迎屍歸。始開霽焉。遠近奔哭者載道。

明書卷一百三十七

列傳五

孝義傳二

張翼字飛卿。無錫人。大父存仁。負氣不羈。至元中。江南皆亂。有賣降授官。出入震耀。夜遇之。張目叱曰。斫頭賊。斫頭賊。既賣爾主。尚敢作此態耶。反足蹴破紗籠。其人恚甚。執送縣令。欲斃於獄。縣令命吐詞款。驚曰。此奇男子也。釋之。翼長七尺。面如頰玉。盤雙瞳。炯炯照人。鬚髯奮張。見者爲之改容。然氣岸孤鶩。雖當時貴人。言不循理。必而折。不少貸。或譏疾惡太甚。則曰。天生吾口。所以出言也。當言而反訥。惡用尸爲。及張士誠據姑蘇。無錫爲莫天祐所據。與士誠相左右。號莫老虎。其所部髡黥盜販之徒。首纏絳帕。手執戈矛。巡門嘯呼。民情洶洶。恐且暮有屠戮之慘。或謂翼曰。避寇路絕。奈何。捉筆大書邵堯夫聽天吟於屏曰。上天生我。上天死我。一聽於天。有何不可。鄰曲來問計。不答。指以示之。君子以爲知命。吳元年。丁未。大將軍達破姑蘇。達遣別將圍無錫。天祐猶欲聚亡孽固守。魏公達兩命使者諭降。俱被殺。達怒。傳令曰。卽不下。可屠其城。翼知事急。率父老往見天祐。抗言曰。吾民不見天日十二年。張氏已就縛。縱負固自守。將欲何爲。況未必能守耶。金陵兵有節制。櫻之者無不齏粉。一城生死。定在今夕。願熟慮之。天祐良久。擲帽於

地曰誠如君言。翼乃絕南城而下。走謁軍中曰。無錫亦良民。安敢自外聲教。不幸居割據之中。咫尺雖近。奚翅千里。耳目塗塞。若罔聞知。明公奉揚天威。執敢不懼。今特爲生民請命。惟公加察。主將觀氣。貌非常。言復慷慨。喜曰。君誠福人哉。城不受兵。宜也。遂命還。翼叩城門呼曰。亟開。吾事濟矣。關吏啓關而入。天祐出降。所活數十萬人。主將去。民爭聯帛爲賦詩詞。餞之。翼作行草書。鳳舞鸞翔。人以爲不可及。素有志事。功當路。忌其峭直。不敢薦。洪武中卒。年六十九。嗜學不倦。酷愛孟子養氣之說。反覆爲諸子誦之。聲詩須臾成章。皆可觀。而未嘗存稿。子籌。字惟中。博學攻古文。元浙江鄉舉第一。未仕。洪武四年。詹同薦授禮部主事。與尙書陶凱等。撫藩王善惡。可法戒者爲昭鑒錄。五年。凱出湖廣。六年。籌亦出廣西。皆參政。九年。陞禮部尙書。定喪服制。十年。罰輸作。十二年。起員外郎。尋免歸。

楊煥文。鄱陽人。生而精悍奇偉。讀書尙氣義。元末四方兵起。蔓及於鄱。乃倡義旅。結寨。民賴以安。或勸乘時樹功業。則俛首不答。洪武初。鄉里有劇寇。匿山谷。剽劫爲民害。官捕之。久不獲。懸重賞。有能致者。給。煥文糾膽勇數輩。往覘其巢。寇覺。鼓其黨。舞戟出拒。煥文力戰卻之。寇蹶。生縛之。械送有司。上功幕府。以前賞給。卻而不受。議奏與爵酬其勞。辭曰。特爲民除蠹耳。豈希利祿耶。竟拂衣歸。同郡劉某父爲寇害。往拜之。曰。茲不共戴天之讎。微公不能殄。獻白金爲壽。煥文笑曰。官賞且不受。寧受私謝乎。爲士者固當除殘去暴。況交遊之讎。飲三日而別。時議多之。稱曰。關西義隱。先時嘗涉海適遼。覘邊域形勝。阨塞。及得敵人虛實之情。因慨然將圖上方略。或勸之曰。計若遂。恐公筋力非少壯時。幸審之。乃撫膺嘆曰。誠晚矣。葦

在桑榆矣。遂絕口不復言。每暇日登高。指顧山川。感劉豫州脾衷肉生之歎。因以杖擊石長嘯。歌老驥伏櫪詩。究五緯河洛之書。以耕釣終焉。

蕭紳。字鵬舉。西昌人。早孤。育於季父自成。受學於劉尚書松明。初廣京師城。賦郡縣民陶甄運。上遣御史廉治奸者。自成長千戶。紳往代役。爲奸者所發。被收。自成詣御史言。縣實命。非我姪也。紳亦曰。躬任役者我也。叔固無與。御史驗籍名。竟坐自成。謫滁州。紳號泣傾囊送之。自成後亦得還。四明烏斯道爲作駢儀傳。自成沒。紳與弟鵬翔。鵬鷺同居相親愛。諸弟亦皆敬事之。惟言是聽。劉松爲作五義傳美之。洪武辛酉。以賢良徵。應制賦。指佞草。稱旨。授蘇州府同知。盡力公務。而自守甚嚴。無敢干以私者。居七月。坐秦府買民物不舉。謫河南驛夫。居河南十八年。貧甚不自給。從者發地得金。匿不告。而去甚力。有以其故白紳。請詰問者。紳曰。彼所自得。與吾何預。聽之去。復起爲山東運副。儉素不變。至沒齒。禦寒一縑袍。猶河南時所製。誠心恤下。歲課皆先期而集。曰。不可以累我公。稍暇。閉戶讀書。賦咏而已。諸上官咸敬禮之。長於詩。有集若干卷。歸老於家。

杜元。字一元。吉水人。居金陵。苦學。有材氣。能爲詩。元張文穆公起巖爲江南行臺中丞。薦不起。以布衣終。少時父患疆疾。夜數驚冠帶伏榻旁。父驚起。輒抱持曰。兒在斯。侍疾數月不寢。至愈乃已。貴人賢士多樂與游。未嘗以事干之。及有失心者。則爲用力不怠。趙弘中爲御史掾。坐法罷徒。步與俱行百餘里。僦屋居之。教授張鉉被黜。金帛資其行。其子四歲失母。命婦鞠之。不異己子。兵部主事常允恭家夜失火。方醉臥。

衆怖散。無賴子利其資。將劫之。則猝集壯士。爲出篋筭於外。允恭泣謝曰。徵君。吾其死矣。鄰人陳鼎舉。軍死於兵。二兒匿舍側。怨家復害其小者。奮曰。脫并殺兒。陳氏絕矣。爲抱匿他所。所以免。吉之部運吏輸糧金陵。不足者三千。解吏受笞榜號泣。莫爲計。憫之。爲貸於大賈。以償吏。以物來謝。卻之。蔣山僧爲御史所誣。夜竄求救。藏之。故人家獲全。宋楊忠襄。邦父。廟在城南。公本吉人。歲時率本廟游寓。具牲酒以祭。攻醫良於家治證。疾病來造者。不問有無。必予藥。藥必擇精善者。服必瘳。歲大疫。和藥走給之。不得食者。以薪米餽。由是人多稱其賢。及兵亂。相戒不犯。洪武壬子卒。年七十。子二。曰瑛。曰環。環字叔循。博通經史。長於翰墨。其書法端妍。至於行草。亦各臻妙。太學初建。環以儒士。薦除學錄。以其書法示六館之士。皆倣而式之。尋入侍春坊。大爲皇太子所眷。時天下以工書名者。皆被徵至。流輩中罕見其比。故環之書名大盛。遷太常贊禮郎。終太常寺丞。爲人謹飭。重然諾。好周人急。父友常允恭死。九江。其母張氏。年六十餘。哭九江城下。無所歸。有識允恭者。憐其老。告之曰。安慶守談敬先。而子友也。盍往依之。母附舟詣談。談不納。母大困。念子嘗仕金陵。親友或有存者。庶萬一可冀。復哀泣。隨人至金陵。因訪至杜元家。母服破衣。雨行。其時元死。環故嘗識母。是時對奕。客滿座。乍忘之。已忽省。驚曰。母非常夫人乎。何爲至於此。母泣告以故。環亦泣。扶就坐。拜之。復呼妻子出拜。妻馬氏解衣。更母溼衣。奉糜食母。抱衾寢母。母問其平生所親厚故人。及幼子伯章。環知故無在者。又不知伯章存亡。姑慰之曰。天方雨。雨止爲母訪之。苟無人。事母。環雖貧。獨不能奉養乎。且環父與母之子善。今母困歸環家。此二父導之也。願母無他思。時兵後歲饑。民骨肉不相保。母

見環家貧，雨止，堅欲出問他故人。環令媵女從其行，無所遇而返。購布帛，令妻爲製衣衾。自環以下，皆以母事之。母性褊急，少不愜意，輒詬怒。私戒家人，順其所爲，勿以困故輕慢與較。母病，親爲烹藥，進匙筯，以母故，家不敢大聲疾語。越十年，環以贊禮郎奉詔祠會稽，還道嘉興，逢其子伯章，泣謂之曰：「太夫人在環家，日夜念少子成疾，不可不早往見。」伯章若無所聞，第曰：「吾亦知之，但道遠不能至，奈何？」環促之，終趨起未發。歸半歲，伯章來，是日環初度，母見少子，相持大哭。環家人以爲不祥，止之。環曰：「此人情也，何不祥之有？」既而伯章見母老，恐不能行，竟給以他事，辭去不復顧。環奉母彌謹，然母愈念伯章。又三年卒，將死，舉手向環曰：「吾累杜君，吾累杜君。」願杜君子孫世成如杜君，言終而絕。環殯而葬之，歲時常祭其墓。

李疑，字思問，金陵人。金陵俗以逆旅爲利，一室月責錢數千，或疾病輒遣出，病危氣息尙屬，目睛睛未瞑，卽與棄之，而敝其貨，婦孕將產者，以爲不祥，擯不舍，其少恩如此。屬邑尤甚，獨疑以尙義聞。訓閭巷子弟，得粟自給，不足則以六物推人，休咎固貧甚，然獨好周人急。金華范景滄爲人部掾，得疾，無他子弟，人危之，不肯舍，扶杖躡疑門告困，延座就掃舍，具牀褥，鑊竈，使寢息其中，徵醫，躬糜藥，旦莫執手問所苦，如事親戚。旣而疾滋甚，溲汙臭穢，不可近，疑日爲刮摩，澆滌，不少見顏面。景滄流涕曰：「我累君矣，恐不復生，無以報厚德。」囊有黃金四十餘兩，在故逆旅邸，願自取之，疑曰：「患難相恤，人理宜爾，何以報爲？」景滄曰：「君脫不取我死，恐爲他人得，何益？」疑遂求其里人偕往，攜以歸，而發囊，籍其數封識之，數日景滄死，出己財買棺殯於城南聚寶山，舉所封囊寄其里人家，往書召其二子，及至，同發棺取囊，按籍還之，二子以米饋。

卻弗受。反贖以貨。遣歸平陽。耿子廉械至京。其妻孕將育。衆拒門不納。妻臥草中以號。疑問故。歸謂婦曰。人孰無緩急。安能以室虛自隨。且人命至重。倘育而爲風露所感。則母子俱死。吾寧舍之而受禍。俾婦邀以歸。獲男。疑命婦善視之。踰月辭去。不取報。人用是多疑。名士大夫咸喜與交。見者皆曰。善士善士。疑讀書爲文亦可觀。嘗以儒舉。辭不就。

姚伯華。杭人。元末兵亂。盜旁午肆剽掠。至親避匿山澤。不相顧。時伯華二十未娶。事父母極孝。晨夕定省。未嘗去左右。父母年俱六十餘。家頗溫。度不能存。奉二親匿闔原山。挾貲行。爲羣盜所迫。投叢莽間。各散失。盜過。父不虞。後盜至。出呼其子。遂爲盜所得。母聞。齋所挾物往救。盜併驅以去。至一山路崎嶇甚。夫婦老不能步。盜怒。竝推崖下。墜石死。明日盜稍退。伯華徧野追求。不可得。哭聲徹天。忽有指示曰。爾親在崖下。趨視之。則皆死矣。伯華計盜來未已。用被二裹其父母。以肩擔之。乘夜由間道奔桐江。時江無舟。躊躇間。俄漁人棹小舟來。伯華出貲乞渡。復肩二骸至祖墳。採樹葉掩之。徐用木錐斲土。飢寒無力。又慮他盜至。晝伏夜作。二晝夜穴成。深丈餘。以二親殮於穴。仍負土築壘。高三尺。慟哭嘔血而出。明既定天下。民復業。於是伯華歸。卽舊居而屋之。子然一身。形影相弔。久之。聘錢塘楊氏爲婦。生三子。家漸饒。伯華恨二親死非其所。每一念至。悲不自勝。計其遇難時。在二月亡忌。故每臨二月。則終月絕酒食。不茹葷。不接賓客。獨擁爐自泣。手持杖畫灰。隱痛裂肺肝。淚傾注。灰盡溼。或問之。故不答。勸之益鳴咽。弗已。進飲食輒推去。奉祭祀執爵。哀哀呼父母。如在膝下時。聞者無不感動。伯華記逃難日。乏草履。幾不免。尋得之以著。始獲。

濟遂終身手織草屨。以施貧乏。弗取直。三子生八孫。襲吏部尚書。龍河南左參政。子孫男女幾七百指。伯華壽七十卒。贈通議大夫禮部右侍郎。伯華少忠厚。嘗寄人物甚夥。一夕火發。家貨燬盡。一不顧。急移所寄物。或謂掩之。可給以火。伯華皆按籍各還之。無一失者。客有過其肆。少憩。遣一巨囊。視之皆鈔。急追還之。弗及。逾年遇其人。延至家詢之。其人謂曾遺。不自記憶其地。出囊還之。封識宛然。客嘆謝而去。兄伯榮。洪武間任河南永城典史。以事坐臺獄死。其內弟火其骸。攜歸。匿之。給曰。得錢事可解。伯華罄其所有不足。復鬻田。付以去。既而歸語曰。幸弗累家矣。不意病卒。吾已收骨至黃山寺。盍往取之。衆知爲所給。欲暴其情。伯華曰。弟得兄骸歸葬足矣。置勿問。

麴祥字景德。永平人。永樂初侍父百戶亮任金山。年十四。爲島夷所獲。轉商日本。其王知其中國人。召見之。留侍左右。改名元貴。因得力學。遂爲士官。畜妻子。然心未嘗一日忘中國也。屢諷王入貢。宣德中與使臣抵京。上疏陳情。臣夙遭虜。抱鬻痛心。死生路梗。流離困頓。辛苦萬狀。生還中國。夫豈由人。伏乞歸省。侍上意在柔遠。不欲遲留之。遣令還國。許給驛暫詣金山。獨其母存。不識曰。吾兒耳。陰有赤痣。驗之信然。抱持慟哭。悲動鄰里。未幾重違上命。別去。祥至日本。啓以聖意。蕃玉允之。仍令入貢。申前請。詔許襲職。歸養祥母。母子相失二十載。又有華夷之限。得遂其養。難矣。祥事母備極甘旨。聞言及父事。輒哽咽不已。後母寢疾三載。朝夕不離左右。及卒。哀毀骨立。喪葬皆以禮。祥博覽經史。通左氏春秋。善吟咏。年八十餘。以壽終。

洪祥字士高黃梅人。德性渾成。無疾言遽色。事親孝養備至。服勞不怠。父友璋病癘延年餘。起臥粥餌。衣被垢穢。必躬治之。未嘗解帶。妻完氏貴家女。璋念兒卽孝。而婦或少嘔。心終不安。一日強坐謂祥曰。吾病將愈。汝姑去就室。留一僕扶我足矣。士高陽諾。而陰伏父寢傍。是夜父少起。呼僕不寤。力殆而仆。忽一人參脇。驚曰。爾爲誰。士高曰。兒也。知父晝所云。非實。特候於此。則相持泣曰。天乎。孝兒至矣。已而父疾良已。祥與妻益竭力承事。優游十餘年。及父卒。思慕無所不至。見父形於醮薦鏡中。人謂誠孝所感。士高喜讀書。明義理。死生利害。了無疑滯。嘗值暴雨。或勸其急行。笑曰。緩急等溼耳。壽九十七終。里閭評祥行。號曰隱德。洪先生子六人俱賢。曰亮者。金華武義丞。亦曲盡孝愛云。虞謹字靜之。明州人。謹匍匐時。卽依依戀父母。父母行輒抱持。不忍舍。總髮就外傳。讀書至明發。有懷蘇蘇隕涕。見者異之。旣長。承志唯謹。成化甲子。從兄謙以富民籍亡歸。有司逮捕甚亟。父憐其衰老。命謹代之行。謹曰。父命也。行無難色。入吳謁陸績墓。次彭城。訪劉士儁遺事。過沛拜王陵像。皆有紀著。抵安定。毅然就役。若忘其爲他人者。尙書楊守陳爲之請。得免歸。弘治辛亥。父遘痢。謹侍疾醫禱。備極懇惻。每夜稽顙北辰。祝曰。甯痲於余身。久之。類爲墳赤。血縷縷見。父卒。哭絕復甦。殮殯率中。度喪三日。水漿不入口。母勸之。陽爲一舉。母入復輒去。坐臥苦塊。袒髮。面黑如囚垢。嘗念其父好老氏。日誦道經一徧畢。乃哭。哭至淚下。浸輒輒爲毀裂。喪畢。懸像置器。如所生。備陳平生若所見。又作哀文五篇。以見志。母病劇。痛不欲生。及逝。哭殮哀奠。一如其父。至遠其內子。非祭不相接。非病不入問。如此者十五年。或勸之曰。人孰無室家之養。子何自苦。謹惟拊心嘆哭。謹體貌壯。

偉。至是骨立。不復舊容。守陳後見之。憐其志。爲詩歌。里人稱曰虞孝先。是月朔哭。有白鷓鴣來巢寢室。馴甚。每聞哭聲。鳴鳴若助之者。

楊旻。字克彰。淮安人。口鄉族長老。交游士夫。未嘗名字之。咸呼之曰楊孝子。故名最著。旻性端慤。自幼事父母孝。事兄恭。父蚤世。哀毀特甚。母陸。慰解之。卽強顏以悅母心。而哀不衰。事母備極孝養。家無厚資。而甘靡無不如志。母酷愛其孫。時牽率抱弄於前。枚指之曰。某可承家。某可事生業。某當作官。顯門閭。母聞之大悅。門戶有憂戚。不以告母。嘗愉色在左右。以安其心。暇則坐塾中。誨諸子。及鄉鄰之秀。必以躬行孝悌爲先。才質輕俊。善文章者。少忽於孝弟。則懇懇諭之。弗改。則厲聲斥絕之。母嘗病。醫禱備至。晝夜未嘗安寢。食母歿。哀號頓仆。水漿不入口者數日。及葬。廬於墓側。衰絰不解。晨奉櫛頰。夕奉浣濯。如生時。不廢哀號之聲。聞者感動。烏爲之翔。獸爲之伏。時蘭陽邱陵爲太守。王竑爲都憲。鎮淮聞其名。奏旌其門。後子理爲給事中。封如子官。東海張弼過淮。聞其事。爲之贊。嘗曰。予嘗過淮。問楊給事。則有知有不知者。曰。楊孝子。則皆能道其行事。指其里巷。噫。孝子之孝。誠可謂人不問於其父母昆弟之言者乎。然彝考其事。不過日用之常。委曲致力耳。蒙莊有言。事親而能適。不問所養矣。然則世之立異爲高。而未必能悅親者。非真孝也。

劉和。字元中。吉水人。喪母。廬墓玉華山。朝夕哭。朔望令節。有奠物。不給。則織履易之。明年夏。風雹伐屋。獨其廬不壞。山多虎。虎夜繞廬。不相驚。其始人以爲詐。已而鄉之士人聞其果然。多往慰問。然不肯者。惡所

行異俗。且不利已。謀陰沮其事。又明年。聞知且滿喪。乃結黨僞爲盜。夜火其廬。執而苦楚之。久乃得脫。抱木主徑山。就道院中避焉。時天苦寒。道人遺以衣。色不素者。卻不受。黎明乃歸。納主於廟。而終喪於外寢。先是年十三時。聞父理豫溺死池州。慟哭嘔血。以母周氏解誓得不死。自後往來其處。輒悲痛不食。設酒殺江滸。號者累日。聞者皆爲墮淚。每食甘美。必懷歸奉母。後客九江。聞母喪。棄貲而葬。家益貧。然遇忌日齋。必三日。而後祭。平居寡言笑。事必效古。遇人非笑。而自信益堅。不喜戲劇。或強之。卽擁戶不顧。有欺侮者。忍以待之。故嘗自號耐辱居士。既老而貧甚。行愈高人。皆以聖人目之。子天曙。生五六歲。值和卒。能茹素。盡哀。與之肉食。輒哭不食。雖百試不改。嗚呼。將氣類之感耶。亦天有以厚之也。

歸鉞。字汝威。早喪母。父繼娶某氏。繼有子。鉞由是失愛。父偶撻鉞。繼母輒索大杖與之。曰。徒手傷乃力也。家貧。食不足贍。每令爨倉。將熟輒逐去。於是父子飽食。鉞數困頓。匍匐道中。比歸。父母相與言曰。有子不居家。在外作賊耶。輒復杖之。屢瀕於死。鉞依依戶外不敢入。俯首竊淚下。鄰里莫不憐之。父卒。繼母與其子居。鉞擯不見收。因負販市中。時私其弟。問母飲食狀。致甘鮮焉。正德庚午。大饑。繼母不能自活。鉞往涕泣奉迎。母內自慚。無所資。從之。鉞得食。先母弟。而己有饑色。弟尋死。繼母終身怡然。諸與鉞游者。皆曰。未嘗見鉞言其母若何。鉞少饑餓。面黃而體瘠小。族人呼爲菜大人。族子有歸繡。字華伯。亦以負販養母。已乃至市舍中賣麻。與弟紋。緯友愛無間。緯以不法坐繫。繡力爲營救。緯又不自檢。犯者數四。繡所轉賣者。計常終歲無他故。才給蔬食。一經吏卒過門。輒耗其母錢。終始無愠容。繡妻朱。與製衣。必三襲。令兄弟均

平曰二叔無室豈可使郎君獨被完潔耶叔之亡有遺子撫愛之如己出里人稱爲歸氏二孝子何倫字宗道江山人天性至孝居父憂哀毀踰口久之尙日咨嗟涕泣如初喪時見母毛尤謹溫清定省必如禮家雖貧甘旨不缺衣服必備或營辦不足輒借貸於人曰不若是何以慰吾母心及母亡殯殮一遵古禮三年疏食如一日喪畢不釋服不入內鄉飲亦不赴曰親在淺土吾其忍乎守令皆高其行贈之對使者拜受終不造謝曰吾罪人不敢至公庭也倫貧失學年二十七始發憤讀書初從陽明先生講學復從王心齋王龍溪游充然有得其所論說嘗發聖賢之奧其邑令嘗欲見之倫不屈適族人有重役令曰孝子見我可免也族人向匪類倫薄其人竟不往族人詈之不顧也有醜酒者擠倫於溝同行者欲毆之倫曰此飄瓦觸舟耳奚毆爲又夜盜入其室竊器物而出倫覺識其入而不言將取釜始曰盍留此備吾母晨炊盜慚盡還其器物曰盜孝子者不祥自是不復爲盜

崔鑑燕人也年十三父佑賈於市性嗜酒有魏娼者善治淫聲佑聞而悅之與之私焉遂留與居鑑母王嫌其非類每諫止之佑不聽娼恨每構讒佑每窘辱王筆楚之娼由是益肆一日佑出倡以語侵王王復之娼怒擊王敗面王含忿入室撫牀泣鑑自學舍歸詢其母王曰吾爲娼所構被辱萬狀今且自引決爾善自愛鑑聞之泣怒曰母第安志勿他也語畢卽潛入學舍挾刃以歸躡娼所在娼適掃於廳傍口且詈王鑑從傍拔刃刺其左脇深八寸許娼隨斃鑑以刃匿牖下亡走數里餘忽自念曰吾殺娼而吾父不知必謂母矣吾走母無以自明必被逮吾殺人而令吾母抵罪哉因復歸未至佑果疑王已繫王將置諸理

矣。鑑至，請解王所縛，曰：殺人者我也，母何罪？衆不信，欲舍之。鑑曰：若輩不吾信，吾殺人之刃尚存臚下，第視果然。衆乃釋王，而獨以鑑馳報聞。上詔下法司議，於是刑尚書聞淵等僉議曰：可緩死，故事減死者悉發伍，淵輩以鑑幼，且情可原，議併釋之。乃公上奏曰：臣等竊見崔鑑所犯，母子之情，根於天性，雖冒重罪，志在全母，司寇議是。上曰：崔鑑既爲母冒辟，情可矜卹，其原之，鑑得釋。

劉閱，字子賢，莆田人。幼有至性，及長，動循古禮。造次不苟，家甚貧，極力養母，定省溫清，疾不解帶，母或怒，則衣冠跪牀下，竟夕不敢起，以父與祖母二喪不克葬，遂斷酒肉，遠房室，訓徒鄰邑，朔望則號哭於殯所。如是者三年，鄰於憐之，爲助其葬。母歿，哀毀骨立，廬墓側，衰絰蔬食，終其喪，祭祀必齋沐，率男婦奠獻，一如家禮。閨門嚴肅，妻失愛於母，出之，終身不復娶。少保林俊疏薦曰：劉閱學行高古，雖詞藻不逮，而德宇道風，人自難及。宜徵侍青宮講讀，不報。御史宗彝知府陳效又薦之，詔授本縣儒學訓導。前後按部使者及守令，率與鈞禮，時致餽以調其乏。所著有家禮考，註昭穆圖，宗子說，五倫啓蒙，孝經刊誤等書，藏於家。姪孫自省，鄉舉，歷長沙府同知，持身敦樸，臨事周慎，頗有閱風。

樂枏，定海人，性孝友，家以亭戶籍官。枏承其役，弗替。洪武十二年春，會稽錢清高氏許從兄弟歲輸鹽，痛自縮，迫小民，倍其輸，以掩己之數。事上聞，上以浙河以東，亭戶大家，皆罔上賊，下如一律，卽遣使編各倉覆鹽，有損常數者，悉起赴京鞠訊，咸承罪。坐輸作，枏亦在逮中。其弟稅願代往，枏曰：吾之往也，死生未可知，吾有三子，爾尙無後，豈其可？稅又詣縣庭請代，枏曰：枏之名固不可易，服力鹽事，皆枏也。稅罔知，使往。

而被鞫。必失對。縣因不敢遣。及桁行一舍許。稅追及之。桁叱之去。不聽。卽乘塊垣。以塊拋稅垣之塊去者。半。稅度伯氏心不可回。慟哭而返。十三年夏。桁果死。桁讀書窮理。凡醫卜地理書無不習。里之人聞其死。莫不哀之。稅走負其骸歸葬焉。

鄭士利。字好義。甯海人。嘗爲縣諸生。其兄士元以儒薦。爲河南淮慶府同知。遷湖廣按察司僉事。利因告於師去。待其兄遊學有名。洪武九年。天下考校錢穀策書。空印事起。凡主印吏及署字有名者。皆逮繫御史獄。獄凡數百人。士利兄亦以河南時空印繫獄中。天子方怒空印事。以爲欺罔。行省臣三十餘輩守令署印者。皆欲置之死。佐貳以下。杖一百。免死。爲軍遠方。丞相大夫皆知空印者無他罪。可恕。莫敢諫。士利獨歎曰。上不知以爲空印大罪。誠得入言之。上聖明。寧有不悟。懷欲言之。適星變求言。士利曰。可矣。旣而讀詔。有假公言私者罪之。久之。士利曰。吾所欲言者。爲天子殺無罪。爲可痛耳。吾兄非主印者。固當出。需吾兄杖出。乃言。吾死不恨。其兄免死出。士利乃爲書數千言。言數事。而於空印事最詳。其意以爲誠欲深罪空印者。恐奸吏得挾空印紙。爲文移以虐民耳。臣以爲移文必完印。乃可。今考校策書。合兩縫印。非一印一紙之比。縱得之。亦不足用。況不可得乎。且錢穀之數。府必合於省。省必合於戶部。其數誠不可懸斷預決。必至戶部而後定。省府遠者。去戶部六七千里。近者三四千里。待策書旣成。而後用印。則往來之難。非期年不可至。故必先用印。而後書。此權宜之務。所從來遠矣。何足深罪。且國家諸法。必明示之天下。而後罪犯法者。以其不可而故犯之也。自立國以至於今。未嘗有空印之律。有司丞相不知其罪。今一旦

捕而誅之。則何以使受誅者甘心而無詞乎。朝廷求賢士而置之庶位。得之甚難。位至於郡守者。皆數十年所成就。通達廉明之士。非如草菅然。可刈而復生也。陛下奈何以不足罪之罪。而壞足用之才乎。臣竊爲陛下痛惜之。其書既成。欲上者數矣。而未決。每歸逆旅。則閉門俯首而泣。泣數日。其兄子待行者。疑而問之曰。何所苦乎。士利曰。我疏上。觸天子怒。必受禍。然殺我活餘人。我更何恨。遂持詣丞相府。士利短小。容貌如常人。見丞相禮頗倨。丞相問何書。士利曰。吾將爲天子言之。丞相何問也。丞相因御史大夫入奏。上覽書大怒。詔丞相大夫雜問。誰教若爲。必有主謀者。士利笑曰。願吾書可用。與否何如耳。且吾業旣爲國家言事。自分受禍。人誰爲我謀乎。辭卒不屈。然猶輸作終身。而竟殺空印者。兄士享。弟士貞。皆有文名。高瑾。大梁人。爲人孝弟儉直。少事母。歲時上壽。自歌舞爲歡。事其二兄。且趨侍食而退。出則爲執鞭道傍。伺顏色。猶事父云。喜誦讀。每稱說先王。不飲酒。嘗歲暮。出取逋負。見多窘乏。輒割券。馳一空車歸。里人望見。盡笑之。瑾不較也。子珣。爲東明丞。強逆養瑾。官邸。輒蹙頰曰。吾往未嘗入公府。乃今公府居耶。遂歸。時舊令得代去。往問瑾曰。我孰與新令賢。瑾默然。熟視久之曰。君似弗如也。人服其直。於是鄉閭從化。家居子弟。見輒趨拜。卻立。里中人假僮僕使。不復關白其主人。雞豚放。猶一家。過者咸歎異之。斯益足爲淳風矣。妻侯。口孝讓。有幼子。爲嫂子捉殺之。侯泣謂瑾曰。吾幸尙有珣。奈何。伯氏無後。卒出之獄。嫂子以百金謝瑾。瑾不受。詣侯。侯不受。曰。吾利金而出汝耶。

汪灌。字慶衍。金華人。爲人廉直。能急人患難。人有故叩之。卽風雨寒暑不避也。鄉里大事。官皆倚之以辦。

一日念徭役不均。而訟訐滋起也。聚其鄉人謀之。曰。鄉之人非吾。吾則屬吾子弟也。願墮恩圯義。而闕於役者。獨憚追胥科由騷屑之擾焉耳。請率里正一歲所須錢。長短相覆。亡慮費三十萬。吾鄉戶各自實其費。爲三等定著之。差次於籍。而衆莫金以畀當役者。役之先後視戶籍。金之多寡視等則。異時戶有升降。則告於衆而進退之。如是則名雖值役者聽事。而實皆仰給於衆也。公無廢事。而私可無敗家。尙何憚乎。願與父兄慮之。衆翕然稱善。即日立約束。無違者。旣又以裏金之難也。衆割田百畝爲之。約成。登其書於縣。而各藏其副於家。竣於役而反。則會衆擊豕釀酒。舊里正以田授新里正。成禮而退。於是一鄉之役。認遂絕。行三十年。守令大善之。延灌等及他父老與爲禮。而志其鄉以風歲惡。饑民羣起爲攘寇以救死。守召灌爲畫。欲調兵。灌曰。無以爲也。此直旬升斗救死耳。下片符可致。何俟兵乎。脫兵出。則挺而搏矣。守乃悟。然猶遣巡檢與俱。灌止巡檢於家。飲食之。獨以數十輩持符逮至。莫不畢集。吏覲功。悉論以死。灌詣府伏庭下不起。曰。是曹束手隨檄來。未嘗扞法。今逆論。從復無凶歲乎。且灌實召之。灌不忍民聽灌就逮而死也。守感□□解散其獄。

王芳。字德遠。太倉人。幼業儒。所交多名士。家頗饒。秉禮好施。而自奉甚約。晚喜閱瞿曇書。故殺之物不食。卽遇一蠅。亦存悲濟。每每施棺掩骼。人呼爲佛子。有長洲簿告急。倒囊出百金畀之。請益。復以鄉人周氏所託金十錠貸焉。簿尋褫職。亡去。遂委居第。償周氏金。而草舍鸚鵡橋。晏如也。嘗訪舊小直沽。適慈谿生費廷槐病滯旅舍。與語。歎曰。奇士奇士。乃困頓塵土邪。移至寓所共寢處。時其饑飽寒煖。而將護之唯謹。

明年春感異夢。攜至同舟南旋。復夢墮橋下。拯之不得。謂其弗祥也。晨輿輒焚香誦經。爲之禳病。病良已。已而又病。使溺狼籍。市盜缶。躬爲滌除。旁睨者率不堪。無倦意。生數感泣曰。吾何以報先生哉。諸所需果餌藥物。無一不備。至潤州。昇舫。欲就姑蘇召醫調理。次呂城。生病革。索筆作家書。恨不及終。養二親。涕咽謂王君曰。生平心事。百不一伸。天乎已矣。儻埋道傍。乞書慈谿。費廷槐不瞑目之極。語脫口而逝。雙眸炯然。芳曰。古今且暮。孰爲彭殤。豈君達人。而但化耶。摩其眶。猶不瞑。乃舉其首枕之股。撫之曰。四海一家。誰非兄弟。骨肉弗面。命也何恫。況有四弟兩兒。親養有託。毋戚戚爾。生喉間春然有聲。目漸瞑。墮尸三日。舟人不知也。抵虎邱。稱貸營棺衾。手浴含殮。權厝半塘僧舍。訃其父。踰月而至。舉其柩弗前。遲明。芳絮酒來哭送。乃舉環寺門而觀者。嘖嘖歎曰。不意今人中得見古人。有隕涕者。

羅韓。字宗器。吉水人。其先日復仁。明初以弘文館學士。從太祖定天下。後辭封爵。太祖嘉之。賜歸田里。其孫汝敬。登永樂甲申進士。歷官工部侍郎。璋其孫也。幼能愛敬。長善屬文。以廩補太學生。授四川布政司經歷。屢遷常州府同知。所至清慎。有善政。嘗居母喪。廬墓螺子山下三年。嘗隨一白犬。主哀亦哀。主息亦息。山故無虎。至是一虎渡江。周旋瑩次。狎犬爲侶。瑞偶以疾臥。其杖竹倚壁。生枝葉。一白鴉爲鳩鳴。久而不去。當是時。墳生芝。荷華生於原。

史五常。內黃人。父萱。洪武中任廣東僉事。卒於官。五常始七歲。母以幼子。且無資。不能歸葬。遂卽和光寺僧地權厝之。攜五常北返。嘗語之曰。汝父棺中有大錢可驗。待汝長成時。尋骨歸葬。則汝可報父恩。而我

亦盡婦道矣。後母沒。五常年五十矣。乃入廣求之。既至不得。旦夕泣告於天。里人哀之。有爲進食者。數日。按察經歷張珪知之。爲多方物色士人。識其處。啓之。遺骸大錢猶在。五常以禮斂襯。官醴費。爲給舟車費。歸葬。五常仍應側居三年。事聞。詔旌其門。

何宇新。字子完。廣東博羅人。幼失父。事母至孝。鄉人稱之。及母歿。貧不能葬。聞者爭贖。比發引。奠者七十餘筵。遇積雨不止。及輻車。屈道。隨在輒晴。雨若爲之迂避者。既葬。縛草廬墓側。夜有虎蹲其門。宇新祝曰。罪惡之人。孤哀萬死。盍蚤食我。毋徒相怖。穴壁覘之。二虎左右馴如也。既旦散去。夜輒復至。每浹旬。則易二新者。猶瓜代然。宇新忽得危疾。鄉人舁歸治之。其家在市。虎亦尾之去。疾愈。還墓側。虎又來。遂狎焉。若素蒙者。先是家畜一黃犬。犬三五日輒候墓所。宇新欲有所需。卽書片紙繫其頸。家人見之。具備。繫使負還。人稱皆孝感云。事聞。詔旌其門。後宇新舉鄉貢。入南太學。人見其近體尙結衰綬。帶牢不可解。以示終身之喪云。有羅璫者。廬墓亦有馴虎之異。

楊成章。道州人。父泰。任浙江長亭巡檢。嫡母何氏無子。泰娶杭州丁氏。生成章。甫四歲。泰卒於官。丁氏留杭州。何氏攜成章扶櫬歸。成章長爲庠生。初丁與子別。剖銀錢爲記。及何氏臨歿。出銀錢付成章。且告之。故成章持服闋。出遊尋母。不獲而歸。意猶懇切。後因鄉人李紹義爲東陽典史。知丁氏所在。復往求之。遂得母。人以爲誠孝所感。吏部侍郎唐龍上其事。授國子學錄。以旌其孝。

劉廷梅。別號同野。吳人。少情學好遊。父封跡而撻之。長跪曰。兒以佚故傷大人。心罪甚大。請自此改趨。遂

折節強學於屬文漸工其父以格言督之學乃懸之楣讀小倦仰視楣間卽佔僂聲益厲父卒慟哭嘔血死復蘇水漿不入口時祖父母猶無恙其祖樗叟強謂之曰豎子爲而父死不念而父之父母旦夕人乎且而母寡而弟弱而何以死也母蕭謂之曰若婦胡昔已委禽可從俗娶也廷梅謝不敢母蕭曰吾病懨懨不能奉二尊人誰與代吾饋者卽吾饋亦誰治胡之父聞而憫之歸女焉廷梅弗成卷也旣免喪益貧其祖父母相繼卒廷梅哭請於母蕭曰天其遂死不肖耶將困之極而玉於成也計窮矣有饘粥之產敢廢以歸三喪於是殯葬皆不廢禮用過毀滋病病益貧於屬文若有神助下筆累數千言督學御史蘇祐復首以其經誼行術超卓檄主同仁書院弟子蓋三百人弟廷楫於束脩之饒上以奉母蕭甘羹而餘資揖學母蕭不甚愛廷梅獨愛楫當兄弟就試而楫病作偕行萬山中乃徒步募二夫俾輿楫俄一夫沽作踣廷梅匿跡從輿後肩之楫不覺也道遇識者咸目之而笑不顧及俱領鄉薦楫竟以疾不能赴公車廷梅登第後念楫病無起時而虞母蕭憂亟假歸楫死母蕭果痛不欲生廷梅百方解慰陰痛幾絕迄不令母知筮選得欵令奉母蕭往欵人盛供帳侈酒食以俟乃亟揮之出曰是嘗我也自今卽束菜盞米不得闌入偶與同年友汪伯玉戲邑無魚馮舍人可以彈缺矣伯玉頷之至明日得一大魚以饋欲辭不可割而五之以其一供母蕭餘四以付市司使鬻之稍取其畸至彌月不盡蓋自母蕭外居恆未嘗啜魚肉也嘗步行而一穗自鞞出以爲誤也引之愈長笑曰藁也吾以代縣廩伯玉見而笑之廷梅亦笑曰吾昔讀書時嘗坐一木罌而積糞其中自腰以下皆煖今僅藁吾足侈矣令欵多善政居四年以循吏徵乃贖車

載母，敝衣羸馬從之。士民奉壺漿，百里不絕。得南兵部主事，母蕭卒。廷梅躡踵如少壯時，強自力，居喪無違禮，除服仍補南部。累進郎中，出守漢陽。比至，漢屬大饑，以便宜發倉粟賑之，而收其暴骨歸之士，設方略，誘縛盜魁之漁於柳洲者，境內稱治。時楚國賜田在漢川者，與民田相錯，而欲併得之。楚人大譁，誓衆鬪。廷梅爲正經界，樹標識。楚王不能難之，擢廣東按察副使。攝提學事，兼管四道兵符，攝司事。時寇大發，修戰具，而徵卒捕船盜七十，且以其賊仗實之，覈按之，則皆賈人，悉與辯理得釋。其署鹽筴吏，歲羨千金，悉歸之庫，充軍餉。引年乞歸，許之。旣歸，筒其衣冠，杜門逍遙。偶出，則布帽練恰草屨，居然一田父也。問時政，則掩耳稱草莽臣，不敢語及普治狀。則曰：忘之矣。凡利益人者，無不勉爲。每望邱墓，旣白髮，頰頰哭。每如初喪，先是居母喪時，尙無嗣，不知人者五日。夜時，以無子故，羣睨而欲瓜分其囊，忽夢黃冠羽衣人，以帝命予之藥，遂寤而起。睨者立解。卒年八十一。有子曰仕敬，能文章。

李德智，號大癡，武昌人。生平有隱德，得黃老養生之術。母死，鄰家火起，撫棺慟哭，反風，火竟不燃。一日晨起，坐門前見匈者倚門而目之。德智曰：汝無乃匈而盜乎？匈者跪曰：某非匈，亦非盜也。某名殷真，銅鼓衛人。本衛以墳房料銀計千餘金，來納于都司。緣過黑舟渡，舟覆，文移溺水中，真以身免，欲歸而請之。某以孤身挾重貲，泛巨浸，恐不免，聞公好善君子，願以相累，俟請文而納焉。計四十日往返耳。德智慨然受之。至八月不得報，比其人歸，去家一日而病且死。遇所知陳大通大道來，哭謂曰：我且死，煩爲家人言之。來視喪，然竟不言官錢事。二人歸而告之，家人至則死矣。後衛逮其家人，比勘官錢，家人無以應，則意前

二人來告喪。或爲所匿。告之。竟文致之。罪當死。後德智意前旬者。以四十日爲期。而今三年矣。事且有變。遂封識前金。詣都司言。都司受之。爲文往勘會焉。而陳大通大道在獄中。衛官見之。大驚曰。楚有大賢若此乎。率大通等焚香籲天曰。我拜前爾拜後。其非常人也。出二人獄。聞者莫不義之。德智後持清齋。不茹葷。遇異人授五靈神符。治百病。輒效。壽八十三。無疾而終。

朱仲福。靈壽人。世業農。父生仲福早卒。仲福孩提時。卽能行喪禮。人咸異之。成童不爲嬉戲。出牧牛。每於鄉塾聽讀書。輒曉大義。從里人借書。卽其音尋之。乃識字。長力農。養母。每帶經鋤灌。誦晝夜不輟。貧不得書。每從里中士借得。一覽輒返。人問之曰。閱乎。曰。頗閱。人無知者。母卒。哀毀盡禮。三年不笑語。鄉鄰異之。邑人給事中傅鳴會知之。造廬與語。大奇之。遂與之遊。斐譽薦紳間。人皆以得見爲慶。仲福常戴圓絨帽。衣短布衣。諸士大夫贈以巾。仲福曰。仲福本小民。所戴此圓絨帽者。遵朝廷之制也。一加以巾。則諸公又何必與仲福遊。年四十。妻卒。便絕慾。獨處草堂誦讀。積歲而諸士大夫家藏書皆徧。深明律歷。每元旦。登其鄉之阜。曰。狗臺望氣。輒言一歲休咎。無不奇驗。人勸之著書。曰。天地間道理。聖賢已盡言之。著書非複則偏。何益。況人世書未見者儘多。一落筆焉。知非古人所已到者耶。人咸服其言。子二。力耕以養。仲福之母。庭前手植一柏。仲福終身不忍折一枝。每教其子孫。必以樹下。鄉里化之。無爭鬪者。曰。恐朱老知也。恭謹端方。雖疾風暴雨無改步。自鄉至邑八里。步履安詳。士大夫每使人尾之。未嘗有惰容。嘗與諸士大夫遊。許由山。其山觀唐宋碑甚多。衆誦碑文一過。數年後談及其碑佳。惜遺忘。仲福一一誦如流。人始驚。

以爲神。出言簡而理甚透。嘗有一倜儻士過其前。適一車至。仲福曰。君知車之所以載重而行遠乎。其人因放論數千百言。仲福曰。不然。彼體方而用圓。是以如此。其人嘆服。大略與人談多如此。一日。忽語羣公曰。明年某月某日。其長違諸公乎。衆驚曰。先生康彊何言此。有術乎。何決如斯。仲福曰。吾無術。第臥聽吾耳。至每一伏時若干則一斷。過一日則少若干。以歷法計之。明年某月某日數盡矣。至先三日。徧辭鄉里親故。坐一室。人皆環視之。談笑如常而逝。其子爲修墓。人皆見仲福立墓上。鄉人私稱碣曰。孝德先生。著

折衷歷法十三

卷惜未付梓

阿奇者。清安徐氏僕也。徐氏昆弟別產而居。伯得一馬。仲得一牛。季寡婦得阿奇。阿奇年五十餘矣。寡婦泣曰。馬則乘。牛則耕。踉蹌老僕。乃費我藜羹。阿奇嘆曰。噫。主謂我力不若牛馬耶。乃晝策營生。示可用狀。寡婦悉簪珥之屬。得銀十二兩。昇寄。則入山販漆。期年而三其息。謂寡婦曰。主無憂。富可立致矣。歷二十年。致產數萬金。爲寡婦嫁三女。婚兩子。齋聘皆千金。又延師教兩子。旣輸粟爲大學生。而寡婦則卓然財雄一邑矣。頃之阿奇病且死。謂寡婦曰。老奴馬牛之報盡矣。出枕中二楮。則家計鉅細悉均分之。以此遺兩郎君。可世守也。言訖而終。徐氏諸孫或疑寄私畜者。竊啓其篋。寸無絲粒粟之儲。一嫗一兒。僅敝縑掩體而已。

明書卷一百三十八

列傳六

循良傳一

史官論曰。夫循良者。抱道溫溫。與民宜之。一夫失情。則負結於意。千人緩帶。則適忘於體。誠因心賦政。惻隱之至也。然仁至則義盡。而利必害。必辭去。甚去泰而不居其名。里并用休傳。稱國僑爲政。老人作嬰兒啼。蕭曹清靜。民以甯。一循吏以斯爲最。潁川近名。朝歌近術。風乃亞之。夫褰帷行部。所至有赫赫聲。或飾廚傳。通環瑱。稱過使客。以賣高譽於天下。又其賢者。內飭蠶蠶。外長耳目。亭豬烏肉。察及細微。以爲守令聰明。周疾苦。治如是。是亦足矣。而長者爲治不尙焉。昔漢帝詔曰。庶民所以安其田里。而亡嘆息愁恨之聲者。政平訟理也。與我共此者。惟良二千石乎。又曰。惴惴之吏。日計不足。歲計有餘。聖主在上。良牧在下。上之考績。以實不以名。下之報政。以拙不以巧。其治之本。止於惴惴。其治之效。止於政平訟理。而無嘆息愁恨之聲而已。明太祖嘗諭廷臣曰。今布政司官。卽古方伯之職。知府卽古刺史之職。所以承流宣化。撫安斯民者也。然得人則治。否則病民多矣。所以重考課之法。嚴貪墨之刑。一有所犯。不爲少貸。而良吏乃輩出。厥後貪暴成風。是非顛倒。守令貪廉之目。專以苞苴之多寡。諂事之分數。執券而酬。不爽毫末。上

鄙下媮無所底止。以致民窮盜起。國運崩摧。守令之關。豈其渺哉。今取其體仁長人。化道蒸蒸者。爲循良傳。庸以風焉。

魏觀字杞山。蒲圻人。父雲瑞。有隱德。觀讀書蒲首山中。勤苦弗輟。喜吟咏。觸物感興。陶寫性靈。乃構亭曰梅初。以寄志焉。元末薦被徵。辭不就。明初。觀與劉基宋濂俱受聘。同謁太祖。與語大奇之。授平江州學正。遷國子監助教。陞浙江僉事。吳元年。改兩淮運使。入爲起居注。洪武初。建大本堂。命觀待皇太子。說書及授秦晉諸王經。二年十月甲戌。膏露降乾清宮。上問災祥。觀曰。帝王恩及於物。順於人。則甘露降。十一月冬。煖如春。上召偕危素詹同吳琳宋濂遊觀內苑。燕紫閣。御製賜之曰。卿等各賦一詩。以述今日之樂。觀奏詩。上覽大喜。三年。轉太常卿。七月。命改定太廟祝文。稱孝子皇帝某。凡遣太子行禮。稱長子某。著爲令。是月。陞侍講學士。十二月辛酉。編集大明志成。以觀爲國子祭酒。宋濂爲司業。四年。廷試進士。爲讀卷官。得吳伯宗。開科之始。得人最盛。九月。坐考祀孔子禮。不以時奏。謫知龍南縣。濂知安遠縣。未任。卽召還。爲禮部主事。賜燕奉天門。上曰。前日逐卿去。今日與卿飲。何其樂哉。仍命各賦一詩。五年。上召至內庭。諭曰。朕新得蘇州。恐餘孽包毒。朝夕在心。今思其人。惟卿公忠彊幹。可爲朕一守。觀頓首受命。蒞事懲陳甯苛政。鋤暴樹良。寬而且肅。敬老恤民。闢宣聖廟庭。舉鄉飲酒禮。聘郡賢士周南老。王行徐。用誠教授。貢穎之。定儀節。高啓。王彝。張羽。闡文學。郡多耆耄。崑山周壽誼。年百有十歲。吳縣楊茂年九十三。林文友年九十二。皆延至之。禮成。彬彬可觀。壽誼還。躬餞諸郊。再拜送之。觀者如堵。時戎事倥偬。百物彫耗。禮文衰落。乃

能力挽躬行風教勃興。課爲天下最。上嘉之。陞四川參政。蘇父老願留。仍命觀還郡。七年。觀以舊治爲士誠竊據。且郡多水患。乃修府浚河。以壯士觀。資民利。御史張度誣其與旣滅之甚。而高啓爲上梁文。俱獲罪見殺。旣而上悔之。命所在致祭。皇太子諸王哀賻有加。歸瘞於蒲圻燈窩山。觀高明端重。學博詞贍。與宋景濂蘇伯衡相上下。其所履任。率有成績。事至不擇利害爲之。所著蒲山枚唱集。人咸稱之。

王宗顯。烏江人。少業儒。博涉經史。元季避亂。僑居嚴州。戊戌。胡大海克嚴州。得宗顯禮遇。及大海克蘭谿。進攻婺州不克。回蘭谿築城守之。留幕下。是冬太祖親征婺。召見。上曰。爾與我同鄉。正濟所用。命潛至婺城。察聽事體。其語甚密。至婺。察得城虛實。歸以告。上甚喜。曰。我得婺州。令汝作知府。進攻首敗石抹宜孫。所遣援兵。次日城猶未下。樞密院同僉甯安與守將帖木烈思不和。果如宗顯所言。夜遣都事李相。絕城。詣上請降。開東門納兵。如約入城。遂克之。置分省等衙門。改婺州爲甯越府。以宗顯知府事。於是開郡學。延儒士葉儀。宋濂爲五經師。戴良爲學正。吳沈徐原等爲訓導。時喪亂之餘。學較久廢。至是始開。絃誦之聲。無不忻悅。未幾卒。上遣使祭之。

王興宗者。江浦隸也。拔知縣事。李善長李文忠皆諫。上曰。興宗從我有日。勤廉而斷。能儒法。吏莫或先也。秩滿。陞南昌府通判。嵩州知州。僉院任亮集民爲軍興。宗上奏曰。有元末世。聚則兵。散則民。明興。軍民兩分。若皆爲軍。何所徵賦。上曰。善。陞懷慶知府。朝京時。上問養蠶種糧官吏。至興宗。曰。府主公勤不貪。不須問。還郡中道。使知蘇州。三年。盛有政。民安誦之。陞河南左布政。詣闕辭。上曰。久不見爾。老矣。我鬚亦白。賜

寔鈔撫遺之。

方克勤字去矜甯海人。學宗考亭。研究至忘寢食。喟然曰。爲學必合天人而後可。舍是非學也。元季亂隱山谷中。辟穀採松柏以食。明初被徵。辭索之急。起家爲濟甯府知府。錫冠帶寵行。比至官。首爲書一通懸康衢。諭天子愛養元元之意。民卽有不平。聽詣府自言。禁隸卒呵問。引耆耄坐語。訊得失。郡學官缺。聘賢者爲師。廟社各立學。學凡數百區。有傾圮者。撤浮屠氏。或新或葺。所在煥然。學子繫籍者至千人。始有詔民開廢閑田者。聽闕三歲乃稅。吏徼近功。不俟期輒斂之。復以田定科。由民益惰且散。克勤奉詔益勸課田以增闢。與民約。定簡書。列丁產爲上中下三等。等析爲三。有徵發視差等書。吏不得並緣爲姦。歲暮轉戎衣於燕。時令役民舟者有誅。他郡以牛車從事。天雨雪。牛僵死於道。民破產十八九。民請以舟僦役。克勤曰。吾知從民便而已。抵法非所憚也。載以舟。行省義之不問。郡城壞。故事役兵築。指揮使橫甚。五六月間。輒聚民萬餘人治之。民不得田。哀號往卽工。克勤奮曰。民困不救。烏用二千石爲。密聞之中書。卽日詔罷役。先是不雨。袒跣徧禱羣祠。涕泣臥祠下。詰朝大雨。連二歲。凡三禱皆應。皆大熟。五年鄰境蝗。克勤聞卽省愆。輟食。稽首籲天。迨夜聞空中轟轟聲。燭之。乃飛蝗蔽天而過。郡獨有年。民有獄訟。大者答。治小事諭遣。不留案牘。庶獄鞫。日省。錄無久淹。文末具時。作糜徧食之。每秋成。卽與民期日。輸倉粟。聽民槩斛。不遣吏而稅常先登。江浙二行省。歲運糧百萬詣濟甯。水陸千里。撫如部民。不令有纖毫怨。言之朝。蠲其耗。每徵發。下信符致民。民得并力耕桑。糶負來歸者相望。初赴官。戶僅三萬。稅七萬石餘。三年後。戶增

至六萬。稅十四萬有奇。二州二十縣。家給人足。野無流殍。羊牛雞犬。散被郊坵。如承平之世。諸壇壝修舉。民不知勞。郡故以鞏困時糴。火屢爲災。教民爲陶瓦屋百餘間。申戒火令。編民居爲什伍。遞相救恤。遂不復火。會大師十萬往鎮燕。官吏索糧芻糞集於前。依序酬決。無不如意。一軍稱能。永嘉侯朱亮祖將舟師北征。水涸舟膠不可動。勸民夫五千疏河。以軍法申督。克勤夜泣禱於天。天忽大雨。水起數尺而去。其爲政以風俗爲急。德化爲本。郡最煩劇。民孚化久。益無事。終日衣冠坐堂上。召諸吏授詩書法律。性不喜近名。常自誦曰。近名必立威。威必害人。吾不忍爲也。府庭不陳杻械。懸韋鞭楹間。示無刑罰。六歲績最。錫燕賞還郡。上召見獎諭曰。政成當顯用卿。尋爲屬吏程貢所構誣。詔楊御史廉按。楊與程有舊。恐程坐誣得罪。以用倉中炭葦就逮。民號呼填道。隨行百餘里。數千人。子孝孺上書請以身贖父罪。不報。謫役江浦。會空印事起。又就逮而歿。年五十一。克勤孝友。與人交洞見肝膈。自奉簡素。一布袍數十年不易。日不再肉。每行縣。杯湯不肯受。兗州守因童子進二木瓜。笞而卻之。鄉人爲饒陽令者。以燻膺備書。力卻去。而待人最有恩。南寇過郡者。必米糶遺之。不能步者。僦舟車送之。同列以事奪祿。旦夕延共食。會飲醉投案大詬去。禮待之益恭。及酒解來謝。陽爲不知者。曰。昔之夜吾亦大醉。不識君何謝也。晚益畏慎。晝所爲。夜必白之。天俯仰無愧怍。人皆以爲古體道成德之君子焉。子孝孺。在忠節傳。

胡壽昌。字子祺。以字行。吉水人。幼而好學。同郡吳辛樂愛重之。妻以女。明兵初下吉安。新淦寇猝至。民陷於脅從者千餘人。寇去。總戎者悉將盡殺之。壽昌走謁。言從寇非民所欲。殺之且失人心。皆得免。洪武三

年應詔集京師。尙書考最上者十八人。壽昌與焉。是日太史奏文明之祥。上喜曰。唐太宗一世文學士十有八人。豈若朕得於一日哉。皆以爲御史。卽臺賜宴。數陳時事。嘗上言。今國家宜徙都關中。累數千言。未幾朝廷得廣西簡近臣往治。上曰。前上書胡御史。其人達大體。可遣授廣西僉事。問察民瘼。遇罹法者多爲哀矜。時尋適爲按察使。持法嚴急。壽昌獨曰。法貴持平。卒不爲變。每三四覆訊。曰。是欲其死無憾也。融州石刻。有元祐黨人碑。命碎之。三年改知彭州。益務修惠政利民。灌縣故有都江堰。秦李冰所鑿。兵興堰壞。議修者衆。謂伐石錮鐵。費多難成。壽昌曰。土木可固。豈必鐵石哉。請之不得。固請乃聞於朝。從之。卽以委焉。初議用萬人。曰。得二千人足矣。悉疏決淤塞。度所用。伐竹爲籠。實以沙土。又伐木貫籠。並緣壑堰岸。江水乃復。又修壩口諸堰。成都各郡田。悉資灌溉。民大利之。初堰廢。井泉隨竭。民出負級十數里。甚以爲苦。堰成。并飲亦復。教民務學。民益知其愛己也。莫不聽服。居三歲。流亡盡歸。視初至增數倍。收瘞白骨。是夕夢人羅列拜堂下者。不可勝算。庭有枯槐十株復榮。三年陞延平知府。廳事側有淫祠。數爲妖。前知府徒舍避焉。命毀祠。更作室其上居之。妖頓熄。益修飭學。較躬勵士子。築祠祀李先生侗。期年百廢具舉。民皆敬信。忽得疾。數日猶視事不輟。先日有大星墜舍。至是復然。其日沒於官。年四十五。郡人罷市。奔哭如所親。長子直。次子廣。大學士。

王觀。字尙賓。祥符人。性耿介。儀度英偉。善譚辯。長於應對。明初鄉試中式。入太學。洪武十九年授蘇州知府。爲政嚴整。多所興建。發奸摘伏。民憚之如神。有雕吏錢英。累搆陷長官。莫敢誰何。廉得實。以計縛至庭。

立捶殺之。由是境內奸豪屏迹。人皆稱快。事聞。上嘉歎。遣行人白思中齎敕。褒之。勞以酒。歲大祲。民逋無所出。部使者督之甚急。爲延諸富室。集郡衙飲食之。使各量出貲。代貧困者之逋。衆驩然如指。逋乃得完。朝廷嘉其能。榜諭天下。勵怠政者。姑蘇賢守。前有李亨。魏觀。後有姚善。況鍾。皆惠政及民。稱姑蘇五太守。迄今郡人思之。並祀學宮。

郎敏。濟源人。洪武七年。以國子監生。選入武英堂紀事。授御史。九年。陞饒州知府。爲治廉明。有惠愛。樂平縣民詣闕。訴邑大姓五十餘家謀逆。詔都指揮司潘率兵往捕。兵至饒。敏驚曰。民素淳朴。未必有此。吾爲郡守。不可使民死無辜。請先往察之。既至。見民皆耕牧如常。時廉得告者。乃無賴子。素以假貸不得怨諸大姓。故重誣。冀獲賞。敏還白。潘初不之信。自往察視。一如其言。於是各以家長至京。辯其誣。詔釋諸大家。誅妄言者。

蘇恭讓。玉田人。洪武十三年。舉聰明正直。任漢陽知府。恭讓弟慎密。爲治簡而明。嚴而不苛。刑而民不怨。密近省司。凡徭役科徵之事。獨倍他郡。故政繁而民困。前守多阿奉取容。無敢言者。恭讓每遇重役。必詣上官申理。事多減省。民賴以安。先是有趙庭蘭者。徐州人。知漢陽縣。愛民。凡有不便者。慨然以身自任。朝廷嘗遣使下縣。取陳氏散卒。他縣率多以民丁應數。規免己責。庭蘭獨爲民辯明。以故民得不擾。十餘年間。漢陽民言郡守。則稱蘇恭讓。言縣令。則稱趙庭蘭云。

羅性。字子理。泰和人。少孤貧。自奮於學。博記精思。元季兵亂。走避巖谷。崎嶇困窮。未嘗廢書。性耿介。一言

一行必端。不與俗人接。雖至戚。或涉邪行。輒絕之。然口未嘗言。陳海桑先生嘗稱性有冰玉之操。洪武初。詔郡縣立學。御史劉昭先聘性。及楊子淵鄧彥高三人爲之師。時號楊羅鄧。四年中鄉試。明年赦免會試。授德安同知。先有寇號精李萬戶者。以衆入府治。殺郡守。劫庫藏。官捕其衆悉就戮。獨精李逸去。久不獲。詔捕益急。蹤跡逮繫數百人。諸邑騷然。性初下車。民有負一囊詣府。言精李實死。此其遺骸也。問死幾何時。曰一歲。曰始死時曷爲不言。又驗其鬚髮皆在。而皓然白也。曰精李年未四十。此安得是也。笞而逐之。悉出所繫論之。與爲期十日。得精李。卽釋爲良民。衆叩頭願盡力。乃悉縱之。七日縛精李至庭下。前繫者皆勞而遣之。方賦民鐵造軍器。時兵亂初定。猝無所辦。居第後治蔬圃。鏗然有聲。得窖鐵萬餘斤。民爭趨求售。曰固天以濟民。豈爲我也。悉以代民充賦。餘者皆入官庫。爲政以寬恕爲本。惟賊吏無所假。吏劉仁盜官麥。逮治逃去。誣訴於僉事朱逢吉。將就鞠。參政陶凱吳雲曰。十七府之賢守。裁三人耳。岳州馬河陽彭安可枉其事得白。仁始正罪。在郡四年。闕知府。皆性總之。秩滿。詣京師。坐擅用棗木染軍衣。爲陳甯所劾。謫戍西安。旣至。達官貴人皆敬禮之。而安於處賤。未嘗一毫干人。諸生從之受經。後多大成者。是時四方老師碩儒。在西安者數十人。吳中鄒奕獨曰。合吾輩所讀書。庶幾羅先生之半。文章切實深厚。詩宗漢魏。近體宗盛唐。書法鍾元常。年七十餘卒。楊士奇少孤。依以居。受其教育焉。

楊卓。字自立。一字子淵。南昌人。父觀山。篤行碩儒。以書詩春秋教授學者。卓傳家學。博記精思。於書無所不通。洪武庚戌舉於鄉第七人。明年會試第三。廷對二甲第一。授吏部主事。踰年陞廣東行省員外郎。坐

累謫鳳陽屯種。復起禮部主事。數月改杭州府通判。援例去官。卓儀度魁偉整肅。家貧。清修苦志。確不可拔。而爲政行恕。有豈弟君子之風。在廣東時。有周參政者。苛刻之不可近。兵卒二十人入山伐木。兩卒山下邂逅婦人。獨行曳入道旁林中。欲亂之。婦人怒罵。卽共殺之。婦家蹤蹟得屍。盡疑二十人者所殺。訴諸行省。悉捕至。周親鞫之。竟夕拷掠。皆引服。屬卓署府閱案。曰。殺一婦人。安用二十卒。往白周。周輒然曰。眞外欲縱殺人賊乎。悉付鞫。列庭下。視其色。聽其言。指兩卒語曰。殺人者汝也。卽吐實伏罪。周始歎服。餘杭民兄弟爭田。各有私親持說主之。累歲不決。卓至。悉屏私親。獨召兄弟兩人。曉譬深切。皆感悟相讓。卒歸於弟。歷官皆繁劇。躬蒞勤敏。未嘗有滯事。寅出酉歸。輒閉戶秉燭讀書。率夜盡二鼓罷。官家居。號其室曰退庵。杜門。惟經籍研覃。足蹟動浹旬不出戶。嚴交友。不苟許可。獨與羅性鄧尙契合甚篤。世稱楊羅鄧。應進士舉。相與約曰。有如吾徒。繼今有一行非其學。將何顏復見。後羅爲德安府同知。鄧爲四川鹽運經歷。冰蘖之操。皆無敢犯者。海桑陳先生嘗稱卓冰清玉潔之行。卒年四十九。爲文章必欲繼古作者。書法鍾王。有集若干卷。

吳履。字德基。蘭谿人。父景奎。業儒。鄉人師尊之。酷好爲詩。游山澤間。方苦吟而雨至。濡其衣弗知也。履少從聞人夢吉學春秋。俊邁磊落。長通諸史。文有奇氣。最好書。尤工行草。元季教授鄉里。明兵取婺。李曹公爲浙東行省左丞。聘主郡學。數與語。知其才。辟爲掾。稱疾辭。有司舉於朝。爲南康丞。俗悍。其民以爲丞。僞者易之。履默默自如。數月皆周知其情僞。有所發擿。一縣驚伏。乃更以寬化之。視民如子。民有訴。召使前

與語弗加咄叱。民或援丞裾相爾汝。弗責也。有徵調。召其大姓坐廳下。好言誘之。聽人人自說便否。由是民愛丞如父。而吏卒不能爲奸。民王瓊輝仇里豪羅玉成。執其家人笞辱之。玉成兄子王汝怒。集少年千餘人。圍王氏。奪家人歸。且縛瓊輝連道箠。至家復解衣撻之。殆死乃釋去。瓊輝兄弟五人庭訴。辭指出血。誓與羅氏俱死。屢念成獄。當連千餘人。勢不便。乃召瓊輝語曰。獨羅氏圍爾家耶。對曰。千餘人。曰。千餘人皆辱爾耶。曰。數人爾。曰。汝憾數人。而累千餘人可乎。且衆怒不可犯。法固止於毆。不得過也。倘不願死。盡殺爾家而就逮。雖有司正法。汝悔何及。瓊輝久之曰。吾恨羅氏。欲快吾憤爾。惟明公所命。乃捕操箠者四人。於瓊輝前杖數十。血流至踵。命羅氏對瓊輝引罪拜之。事遂止。兩家叩頭曰。公弼我事。德甚弘。咸願有所上獻。皆卻去。縣令周以中。初至。召民轉輸至郡。不得躬至。鄉召之。一民逸去。追及。命卒笞不肯服。走入山。罵令曰。官當至縣。何至此爲。令怒。吏卒因以語勸令。欲誣一鄉民圖賄。獲六七人下獄。扁鑄甚嚴。卒再往捕未返。鄉民大駭。履計民無罪。自出巡獄。叱卒釋之。卒以他辭解。履搥碎獄門。遣之曰。若無罪。還告父兄無恐。乃往告令。令怒曰。民無道。衆辱我。君乃釋之。何輕我。至是。履曰。犯使君者一匹夫耳。其鄉人何罪。且法乃天子法。豈使君解怒具乎。令意慙。卽以獄付之。始得解。其俗好淫祀。有蛇出戶限。民怪之。以爲神。至奔走祠祀。履罪神巫。投其主江中。乃熄。爲丞六年。陞知長沙之安化。去三月。吏用法急。南康民作亂。命師討平之。死甚衆。其民泣曰。我吳君在。寧有此禍乎。安化鄰古三苗。其土豪多糾民爲兵。旣盡降。禹夫長易俊原獨恃驍勇。與麾下數十人遁入山谷。保險自固。郡邑患苦之。江陰侯吳良承詔求餘寇。移檄旁縣。

兵且集。召履計事。履曰：易氏未有反狀，奈何激使生變乎？不若先以計致之。果反，用兵未晚也。侯曰：令言是。吾且從之。履乃屏吏卒，步至山谷中，抵俊原家，家空。一老人出對客。履曰：易俊原出見江陰侯，則無事矣。今不出，大兵且至。一縣民皆爲齏粉，是殺一縣父兄弟者。易俊原，非縣令也。老人曰：俊原必出。惟明府哀憐，履得情故寬之。曰：俊原或未肯來，得其子及麾下三四人先往，可免矣。明日其子及麾下至。如履言，兵止不發。旣而盡致其麾下，惟俊原一人。度勢孤，乃招之曰：君侯願與俊原相見，俊原喜，詣軍門請見。遂縛送京師。事平，民安堵無擾。江陰侯檄取故兵之爲農者，民咸自疑，驚奔相告，勢甚危。乃屬耆老諭民曰：侯所取者兵，民無與也。籍其願爲兵者數人而止。長沙郡令造戎衣，力爭曰：吾邑民貧而俗暴，恩之且恐其叛去，安可責以事功？如他縣乎？令格不奉命。其罪小，奉命而致亂，其禍大。郡從之。凡有徵徭，皆不使與。越三歲，遷知濰州。民畜官驢，萊守核其孳息狀，與籍不合。曰：驢常歲產駒，今幾歲宜得幾駒，乃何少也？欲責欺罔罪而徵其償。諸縣皆已勒民買驢，履獨戒民勿償。守怒問狀。曰：民實不欺罔，烏可責償？國家富極海內，爲吏者宜宣布德澤，除民疾苦，寧少數匹驢耶？守語塞，井上不便者數事，守不敢復言。井諸縣已償者皆罷之。山東民願以羊牛代秋稅，官從其言。履與民計羊牛後有死瘠患，不如納粟便。獨收民粟。他縣牛羊送陝西，民驅走二千里，皆破家。濰獨得完。他日受命，役千人都送鄰縣牛，履列其不可。曰：有牛家送牛，雖勞不敢怨，使人代之。脫道中牛死，誰當代償耶？力爭不肯往。上官怒居之自如，久乃得解。先後爲吏十五年，不求威名，以愛民爲先，尤重獄事。凡有訟，面直之，解釋其怒乃已。不忍置民於獄，獄爲之空。

凡上官教下所需於民不務速辦稍緩其期約故物價不踴民視他所費恆減十二三民樂其簡易更感
激爭先居二年會改濰爲縣召還濰民遮門抱其足泣拜送之至京謝事歸

蘭芳夏縣人倜儻有節概讀書通古今重義氣洪武中舉孝廉授刑部員外郎陞郎中太宗卽位陞吉安
知府先是金華朱仲智知吉安寬厚廉潔剗革吏弊禮賢愛民民甚戴之已召改重慶民更思慕歎息曰
賢侯去誰能繼者已而芳至持重得大體明習吏事間有告訐者數語立決吏無所容其姦宋季有妄言
銀冶當開坐誣抵罪至是無賴子踵其說聞於朝遣官押其人覆視父老羣訴其罔芳惻然顧告者問之
噤不能對父老又言其人罪惡積累皆應坐死益惴惴懼芳曰毋恐罪皆赦前今獨問銀冶有無耳告者
卽吐實言素貧妄意禍鄉人爲此死罪死罪太守何以生之芳乃草奏大意謂告嘗聞故老言宋時說銀
冶事而未及詳輒率意上陳今詢邑人長老皆云素未嘗有卽不實甘受鐵鑕言人人同謹以實聞同官
或不肯署芳曰有罪請獨任卽自署奏同官不得已亦強署上得奏曰吾固意奸民之妄也遂罷其事然
以告者出於率意亦不罪芳自奉儉約日常蔬食被服無執綺事母極孝母亦善教凡芳日所行事夕則
命陳於前有未善必讓之芳謹受教不違後爲工部主事浚河南河渠凡所經郡縣民情吏治有未便者
輒疏以聞陞本部侍郎疾卒吉安自芳去其民稱賢守必曰朱蘭朱蘭云

顧光遠嘉定人元末辟爲京口掾太祖下江南京口首納款光遠預有力從入金陵監大軍倉支納三年
授江西行省理問從征陳友諒督饋運明年平陳氏擢知龍陽州招附懷來鎗革宿弊民賴以息越二年

故知泰和州。前守吳去疾有能名。以民好訟。告於光遠。憮然曰。民有冤抑。守弗爲之理。民將安訴。頃之訟者雨集。乃自爲書榜聯。紙長數丈。誨諭諄切。民爭來觀。觀已去者十二。又俾凡訟者居譙門。思三日。然後來訴。思不三日。去者過半。乃擇吏純謹者一人。實箒受詞。訟而旬稽其始末。民誠負冤也。輒爲疏理。願悔自止者聽。未兩月。民不復訟。吏亦畏其精敏。無敢舞文病民。時禁民私蓄兵器。虎患不能制。訴於光遠。爲草檄告之神。虎一夕遁去。州以大治。祖母憂。赴闕辭。命留翰林議編大明律。律成。復命監造天下均工圖籍。已而還服喪。未幾起授廣東行省郎中。二年。召拜吳王府副相。留京師。詿誤逮繫。疾卒。臨卒爲詩壁間。道其生平。有白髮歸朝之歎。聞者悲之。性澹泊。不尙奢靡。所居廨宇。室無長物。惟藝蔬數畦。衣食取具而已。至於治民。事無巨細。必盡其心。所至號令既明。而賞罰必信。遠爾翕然。賦詩氣豪才贍。而律調渾厚。尤工七言。晚自號蔗境翁。詩數卷。遂以題之。

歐陽銘。字日新。泰和人。家貧力學。嘗遊清節書院。與諸儒講論切磋。由是博通經史。元末兵亂。教授坐中。太祖徵賢才。薦赴京。丙午授江都縣丞。兵荒之餘。民死徙十七八。銘至。移文旁近。凡江都民轉徙者。皆還本土。勞來安集。出於至誠。流移四歸。邑漸完復。民有繼母告不孝者。察其民不能養。委曲開諭。母子泣謝而去。卒以慈孝稱。嘗治廨後隙地。得白金百兩。曰。此天欲以紓民力也。會部符徵漆。出以市之。政暇卽進諸生講先王之道。或行田間視耕穫。賞勤戒惰。一縣戴如父母。甫二歲。陞臨淄知縣。治一年。民稍給足。銘曰。兵荒所以相仍者。由民不知教。神無所託也。旣興學校。築山川社稷壇。與民從事於詩書俎豆之間。皆

欣然從之。初來臨淄時，常將軍過焉，兵十餘人，入民家取酒不得，相毆擊，謹動一市，銘呵止不罷，因笞而遣之。卽往見將軍，白其事，軍校有先告者，且曰：「縣令大罵將軍，旣至，詰曰：『汝何敢爾？』」銘曰：「軍固王師，民亦王民也，民被毆擊幾死，軍士顧不可笞耶？某雖不賢，亦知名分，其敢他有言，常意解責，軍士而謝銘，一境晏然，無敢譁者。」未幾，徐大將軍至，軍校有知銘者，曰：「是敢抗常公之健吏也。」因相戒勿犯，銘迎送有禮，自大將軍以下，皆賢銘所爲。臨淄古大縣，俗喜夸詐，輕亂益難治，銘廉靜平恕，上下化服，卽鄰縣亦聞以濯濯。東土之民，無不樂業。洪武四年，入覲卒，丰儀秀整，天性寬厚，樂易有仁人長者風，平生不妄交遊，非儒紳君子不接，其仕與處，言行多可紀者。

陳灌，字同叔，廬陵人。幼孤，事母孝，讀書穎悟絕人。元末棄書，學兵法，環所居皆良田，改築場圃，樹木，人莫測其意。數年，樹成列，盜大起，募義勇屯其中，部署精明，人人效用。一鄉賴以保障，陳友諒據江西，其將熊天瑞來招，俱至九江，知陳氏必敗，去之。太祖在武昌，因羅復仁謁見，陳定亂安民之策，悉見聽納。擢湖廣行省左右司員外郎，累遷大都督府經歷，贊軍事。從大將軍北征，旣克泰州，留督築城，旬日工成，賞勞，總制真州軍事。丙午，除甯國知府，灌疑峻清介，爲治務寬厚，興教化，是時習亂，人久不識俎豆，首修先聖廟，建學立師，推擇秀民教之，問民所疾苦，禁兼并，覈欺隱，所創戶帖，命布之天下。宣城田濱江者，歲患水，加築隄防，伐石作水門，以時蓄洩，諸邑率虛籍民租，官廩懸罄，人有發其事者，衆皆洶懼，念此特循舊習耳，非始作奸也，颺言當以某時行視邑廩，俾得豫爲計，及期，公帑皆盈，有劫麥舟坐死者四十八人，覆案曰：

此鄉民因舟漂抵岸，挺引取之，非有謀心，安得盡論死？乃坐先取一人，餘從減，得代去。代者山東鞠騰霄，素負才目，無前人及觀，灌設施，不覺歎曰：第謹守當勿失耳。其年奉命督軍餉，詣北平，撫恤有方，民皆趨事，還朝辭歸省。洪武四年，復召至京，未命卒。

錢本中，武進人，讀書習法律。洪武中，以人才舉，歷知故城、元城縣，有聲。改知吉水，豪民宿吏，素爲民患苦者，捕其魁，徙遠方。邑中肅然。新壇墮，學舍召諸生躬教之，旌別勸率，政務清簡，不任刑，嘗有盜聚山谷間，時出掠，郡守欲以兵殲之。本中單騎詣賊壘，諭禍福，咸相率縛首賊自歸，會赦免。本中勵清操，門無私謁，妻子布衣蔬食，纔足朝夕。以誑誤罷官，父老奔走號泣留，不獲。郡人學士胡廣力保之，得復官。民聞本中且復來，空閭井迎拜，如見父母。未幾以疾卒，民哀慕，留葬吉水，爭爲負土營墓云。

丁積，字彥誠，關西人。成化中，知廣東新會縣。新會廣巨邑，號難治。聞邑中有理學陳眞晟者，則大喜曰：吾得師矣。旣至，事以師禮。月分所得俸，爲脩給。陳謝不受，有所聞，行之惟恐後。其爲政以風化爲本，而主於愛利。始下車，大闢弟梁，長責民逋過倍，復訴之積，廉得其情，追其券焚之。由是權豪屏迹。申洪武禮制，參以文公四禮儀爲書，擇邑老成人主之。月朔進問於庭，優禮其能者，嚴賭博竊盜之禁，榜門示恥。良家子游惰不作業者，聚廡下，使日誦小學書，親爲講解，冀變化其惰習。春秋祠事，肅然將事，如神陟降。邑節義祠墓，各置田立守祠祀焉。異時戶賦均平，錢悉貯官，復令出私錢供用。名當月錢歲單丁小戶亦不下五六千，積苦意節省，諸上下往來非經之餽，一切杜絕。甲首納均平錢畢，自歸田，弛然無復事。陳眞晟爲

賦樂歲詩曰。長官願似丁明府。甲首終年不到衙。蓋其實也。歲大旱。春盡種未入土。積憂之曰。此令責也。於名山頂築壇以祈。晨夕齋沐。伏壇下禱。因得疾。疾既甚。猶日究心民事。遂卒。官民相與弔哭於途。歸德里有一嫗。夜哭而哀。或問之曰。來年當甲首。丁父死。吾何以聊生。其得民如此。

明書卷一百二十九

列傳六

循良傳二

徐咸字子正號東濱以尚書領濶薦正德辛未登進士俊才穎發與人交不詭於俗居官不事儼察務持大體人樂其寬初守沔陽沔屬兵燹後且值陵谷懷襄民嗷嗷待瘳咸務在撫輯惠養區畫中理民多全活初沔地宜黍鮮植嘉穀咸爲之陳厥疆畝引渠灌泉略倣吳地播種之法與民習之民享其利居三歲入覲屬吏託餽贖名盛貨帛以進率謝卻之廉譽益彰隨陟南兵部郎去民思之肖像爲生祠兵尙書喬宇雅知咸會武宗南巡咸凡事豫戒備無不周宇曰能助予者咸也銓曹聞其賢擢守襄陽爲政一以平易近民爲本民以是益親附之歲旱躬率父老恪修雲間盛暑不輟而甘澍應妖民惑衆禍叵測咸計磔渠魁脅從不問悉解散其牧囊一如牧沔故襄人戴之猶沔人也廖道南作楚紀列咸於登績傳其時以餘姚孫衍華亭張弘與咸先後同官均有懿政目爲三高嘉靖丙戌入覲忌者阻之罷歸日事編纂有國朝名臣錄澤山野錄詩有東濱三稿平生天性孝友宅心坦蕩事親孝田宅不侈常祿之羨悉畀仲兄節奉怡二親不制其出入無毫髮留爲筐篋計後家事日落寒暑製衣及衾溫涼適體有疾奉美飲食至老

不衰。以故稱孝友者無間言。嘗築園城闔曰餘春。每遇勝日。邀兄弟宗黨。攜鹵楮棋枰於禪扉竹徑。觴咏陶然也。卒年八十有八。

徐九經。貴溪人。舉進士。初爲句容令。歷九載。治行爲天下第一。其始至。羸服坐一笥輿。延見諸侯人。恂恂無所詰難。諸侯人出相語。輿中人誠長者。第吾邑得無其黠豪而治乎。居三日。一吏出空牒。而用印內袖中。九經搜得之。詰其狀。羣吏皆叩首曰。爲一某親故某事補牒耳。非有賄也。九經曰。吾不治賄。治竊印者。卒坐之法。已曉戒寮佐。毋得擅攬訟。及霽賦民錢。而捕按其用事胥吏。於是人人惴恐。於法不敢有所舞。每受訟謀。必命其人與親識偕往從和處。其不卽和處。面諭使之心服。間一杖之。數不過十。毋煩置獄。然至於武斷并奸輩。不盡法不止也。諸所催科受役。預爲期。過期不至者。俾里三老逮而笞責之。終不遣一隸卒下鄉落。隸卒列庭下如木偶。亡所資衣食。其黠者多自引去。久之。益習民貧富。與道里近遠。諸顧役之輕重。必以資其受顧而役者必以便。卽田叟村稚得用身應。毋使宿猾奪之。諸賦長收。賦於各區。故未有定額。司算者得上下其手。悉覈之。著畫一於冊。以示各賦區。邑故有賄賦米四百石。覈其欺隱者。應之賦得所歸。不爲累。他運解費有輕重。官故量資之。黠豪趨輕而資重。不相當久矣。九經已密得其概。要諸豪。詛之神而俾劑之。既定爲圖。使拈各以分去。毋恨色。居恆謂卽天子布大惠。安能人人賜租。獨役第在我曹。酌緩急而已。悉革一切浮浪費。里正挂籍邑耳。足跡不使至邑門。亦不使至民門戶。以爲恆邑。最衝輪蹄輻輳。取資於民不可計。九經減舊額。夫三之二。馬三之一。無弗給者。士大夫過從。所餽不過算器食。

不以貴重故加篋。有廢圃，廣輪數十畝，躬率吏卒治蕪穢，藝蔬果，鑿池種魚，間養牧雞豕，客過宴飲，取而用之，客更欣然爲醉飽去。邑東西車馬所踐，塵土盈積可三尺許，遇雨雪，泥濘至沒股，頗仆相尾，乃積願役之羨，甃石以道之，行旅無所苦。歲大禋，民至屑榆而食，而上方祠釐行宮，多遣中貴人方士醮神三茅山三茅。九經所治也，歎詫曰：吾民困至此，而忍更驅之役，或謂應天屬邑，八是不可分任乎哉？曰：救災恤鄰，古道也。鄰民卽吾民，吾何忍紓此而困彼？搜故牘商引之金，宿於府者，請之上司，以供費。躬爲經畫，諸使者懾其清嚴，竟竣事不復有所干。民忘其役，然歲禋益甚，穀價踊貴。丁都御史發庾米數百石，使平價而糶，取其直於官。九經曰：今流孳載道，數百石幾何，而徒以資糶者，彼糶者皆豪也。於是從時價糶其半，還直於官，而取餘米糶粥。召三老受而分食其餓者，餓者起，輒按倉穀餘尙多，使稱力分負以去。其山谷間稍遠者，則就傍富人穀，而取償於倉，居平持法寬，而至是獨改峻。有十七人禦貨而逞穀者，捕得立置之，法曰：是非饑民，乃夙盜，以饑文其惡者，咸惴惴相戒，道不拾遺。九經於單赤無所不極意，而馭豪乃特嚴，然不敢修怨，視諸博士弟子，猶子弟也。歲時課經術，論經文義，饘粥膏油之費不乏，而其鄙無恥者，懲之，又方於事上，幾用此得罪。時應天尹汰邑，庾故當有席，富人謀之，尹欲以席市，謝曰：賦長已儲之矣。尹有所任，直時胥下邑，索吏賄不得，酗而詬諸庭。九經縛而笞之，尹怒曰：是不有我，他日又以永康侯之幣，徵教讀呂某。九經報謂呂某者，蓋賈人子，不習書，不足以辱侯聘。尹逾怒，而會丁都御史，又他有所下，治荒者闕略不甚稱。九經以意格之，且不平價糶也，而諸生見懲者，中以蜚語，丁恚甚見辭色。三日，父老

數千人擁而廷見。稱九經賢。泣涕數行下。曰。微徐令。吾曹有溝壑而已。丁意稍動。下階。令不宜若等。故且爲移之。胡謬稱也。衆遂大哭曰。必移令。請死於此。因極敍九經救荒諸奇策。與居恆善狀。且詆無恥諸生。謂彼不自知罪。以小懲而中民父母。民誓不與俱生。丁意大解。入都。以語尹。尹曰。此強項吏。好以抗上自爲名。移之便。會丁入內臺。有所舉刺。而九經在刺中。警及操事。下吏部。尙書熊浹拂然曰。吾故聞句容令賢。不減古人。今不以舉而刺耶。考功郎邦彥具前後薦劄語報尙書。乃論譎丁於外。而特留九經。時謂都御史力不能勝一縣令也。九經旣以廉儉著聲。其下化之。民有華冠侈服者。出遇必責曰。何以見令君。爲其稍過侈。必相戒。令君知之得無不可乎。積九載。始遷工部主事。將治行而民強留之。彌月不得發。爭延請過舍。治觴炙。兒稚挽衣而泣曰。公毋去我。度不可留。其長者曰。公幸惠訓我。使我奉之。如奉公。九經亦揮淚曰。無以訓而曹。唯儉與勤及忍耳。儉則不費。勤則不墮。忍則不爭。保身與家之道也。生平不嗜肉食。唯噉菜佐脫粟。嘗圖一菜於堂曰。古不云乎。民不可有此色。士不可無此味。至是父老刻九經所畫菜。而書勤儉忍於上。曰。徐公三字經也。家肖像而尸祝之。已又立祠祀。祠四五所。而其最者在茅山。謂其息民於荒獨。茅山之役巨也。在繕部議當築外城。而城址有犯陸炳圃者。炳挾上寵橫甚。人謂避之便。對曰。強寇未滅。何以家爲。孰謂陸將軍不如霍將軍乎。陸噤不敢發。圃分爲三。遷員外郎。督清源軋廠。舟北者毋論勢人達官。必使附阿之。曰。此法也。遷都水郎中。治張秋諸漕河道。故通漕者與通鹽者。近而不相接。以故漕水溢。則汎濫爲田患。九經議築減水橋於沙灣。使相接。漕水溢則有所通而不侵田。少則有所限而

不至涸工成。田漕賴焉。時倖臣趙文華督大軍平東南倭。所過張甚。河渠郎迓送。恆出境外。幣餼充溢。猶不得一款色。而九經第遣一介齋牒謂之。云郎有事沙灣。不敢離也。文華媿罵。投牒於地。而九經以資重。得知高州府。或謂高雖遠。雄郡也。若公稱名令久。獨不能名二千石乎。答曰。吾老矣。安能自苦以徼身外物。陳牒於家宰。謝不之任。臥貴溪山中二十有二年。非禮會不入官府。守令以時問政。言之無所諱。於吏胥弊尤切。聽者爲縮舌。族貧立義。田周之立義學。教之自奉儉。不以老益簋。衣經帛。然用施予。故窘年八十五。微恙拱手曰。茅山來迎我家人。馳之茅山祠。告於山之神而已。瞑矣。守祠道士夜夢九經。朱衣從數騎。啓扉而入。天性孝友。重節義。不佞然諾。彊直自遂。家與少師夏言同里。未曾造其門。及夏言再相。被逮。九經獨使一老蒼頭。侍行唯謹。言從檻車中問而得之。爲感泣。故御史楊昌工部郎劉魁給事周怡沈東先後以直諫下緹騎獄。九經故不相往來。捐月俸囊餽而致之。其所爲往往如此。

程燿。字文純。建昌人。舉於鄉。授景州學正。褻身範士。務砥礪名節。次及文藝。當塗引重。命主瀛洲書院。遴十八庠弟子員。雋者從講習。聘充浙江考官。所錄稱得人。尙書鄭曉。其首選也。丁憂。補曹州。轉松江府教授。松俗習靡。燿力鎮浮誕。崇廉質。謹條約。上禮讓。斥奔競。蹈履繩墨。以身爲諸士先。直指使視學。一生於講。未致頌美。蒙賞倍。方罷。燿惡其諛佞。取賞散諸生。斥責之。士習丕變。擢知鹽城縣。鹽城海邑。民竈賦徭多奸避。覈正之。歲旱蝗民饑。燿亟行賑助。有冤獄。論死者十九人。力申雪活之。築隄捍決河。創水次倉。便轉運。凡與民興利去害。竭誠悉力。惟恐後。轉上元縣。在留輦下。俗雜政殷。勸閭閻。臺省牽制。燿一意利。

民弗趨避。心誠字感。輿誦翕然。內璫以事過金陵。所至饕虐。夫廩外無備也。璫怒。欲辱之。嬾抗陳民艱。璫爲改容。民居近孝陵者。以誤殺苑中獸入死獄。莫爲直。嬾白司寇。得末減。諸散荒錢。平市值。酌公費。後咸守以爲法。蓋宰二邑。三入覲。乘一馬。以一馬負冊。以一隸馭馬而已。時尙書霍韜在禮部。風稜矯矯。莫與匹。民爲之語曰。禮部霍韜天有日。上元程嬾月無雲。蓋以並也。歷南刑主事。郎中。出守鎮遠。鎮遠。夷方也。嬾勤恤其隱。無鄙薄心。屏私餽。去煩苛。寬權市。公聽斷。懲暴橫。清驛傳。時供億加意。節捐省浮費。十五六。屢決疑獄。毀淫祠。建社學。有黠卒妄奏。辯其誣。反坐之。豪民侵貧弱者。訟地四十年未決。斷還之。戊午。有三十年未支糧者。多方給與。叩苗叛。豪猾與私通者。痛鋤禁。擒其酋。蠻嚚不敢犯官。九年。轉陝西苑馬寺少卿。馬政弊已久。嬾竭力振盪。至不下堂五日。夜。稽侵地。復牧軍。簿覈丁馬。除補疾。作致仕去。嬾入官四十年。初終一德。廉勤端惠。所至樹風教。白建節婦孝子忠烈祠。毀妖廟。以其址葬野死者。其折獄不務苛訊。要以理屈其心。或書聯語韻語於牆。臆訟者自愧退。或相視泣解。所去必有頌聲。或勒思於碑。或尸祝於家。或祀名宦祠。歸家無餘貲。自奉儉節。既屬疾。獨倡建宗祠。定祭儀。增墓田。修譜乘。諸先產盡讓其伯氏。居室與昆季共。獨所宿樓。兄子又舉其半鬻之。作籬自障。爲詩有風雨半間樓。蓋紀實云。

唐侃。丹徒人。競競勵名檢。平生以忠孝氣節自許。爲諸生時。父被獄。上書請自代。弗得。乃藉草地寢。夏不帷。冬不被。夜不解衣。竟父獄乃止。及爲州縣。再轉官數千里。未嘗一日攜妻子。獨與一二老蒼頭相朝夕。飯羹豆藉茅以居。初令永豐。繼知山東武定州。皆悍訟。侃豈弟。務掩人疵瑕。以古教化先之。不忍以猷朴

苛細爲能。始若甚迂闊。久之真誠溢出。吏民至不忍欺給。念以爲永豐健訟。起於錐刀競利。與靡侈不節。相高於。是躬率以儉約。進父老爲陳務本。畜用周恤。相保之義。俗尙鬼。有嶽神祠。居人奔走雜男女。香火無空日。又喜爲俳優。使民淫於欲而匿於財。侃曰。此大蠹也。痛革之。立木牌二。立於庭。左曰從刑。右曰從化。令曰。從理者左。欲和者右。久之民多立於右以求解。言或當於理。雖賤吏必改容謝。爲立行之。無理。雖權貴人。百方請說。終無所假借。以是告訐之俗爲之一變。在武定以鎮靜撫綏愛人。時清軍伍。一州當解者三千餘人。并婦若解。長且萬二千人。侃曰。武定戶纔三萬人。是空州半矣。有議欲濬州境。徙駭河者。又力言不宜凌民脂膏。而填巨壑。皆得寢。章聖皇太后梓宮葬承天。道山東德州。上官莫民間財甚鉅。以給行。猶恐不給。侃曰。以半往足矣。至則舁一空棺。旁舍中。諸內閣牌校。奴叱諸大吏。鞭撻州縣官。宣言供張不辦者死。欲以恐嚇得賄。同事者並逃去。侃獨不去。急乃謂之曰。吾與若詣銀所納焉。乃引之旁舍中。指棺示之曰。吾已辦死來矣。賄不可得也。於是諸閣愕眙相視。莫能難。而事辦。諸逃者皆被罪。而侃乃受旌。所居官。率空囊以歸。及覲考。滿入京師。又率空囊行。以是著節。亦以是淹於官。稍遷刑部主事。以執法得情。著稱。病卒。貧不能殮。部尙書而下。及諸僚賻之錢。乃棺而歸其家。

龐嵩字振卿。嘉靖甲辰。由鄉舉授應天通判。晉治中。先後凡八年。府尹缺。屢攝府事。初至大旱。嵩督賑。委悉霑洽。公粟既竭。貸之鄉先生富民。誠意懇惻。人多應者。所全活六七萬人。已而蠲其積逋。於以勞來。拊循之所。由以復業者十萬餘人。所部民苦重役。乃取公費議寬之。令甲首輸糴。免其置辦。付之印簿。以防

侵漁。清寄居客戶以助夫役。移僻驛馬匹以避衝塗。覈冒濫優免。及詭稱官戶寄莊戶女戶神帛堂匠戶。以實丁口。八邑皆蒙惠焉。時江甯葛仙永豐二鄉。數有水患。居民止餘七戶。歲課不能辦。嵩爲築隄闢萊。得田三千六百畝。立惠民莊四。召貧民佃之。流移盡還。而全邑訖無代輸之苦。百姓賴之。折獄無細大。必得其情。有張元二者。以追逃婦不反。嵩躬至婦所。見室畔縣厓矗立。林木颯然。心動。行數十武而前。伴執村老訶問之。對曰。我但見尸。遂得元二。被殺狀又高。遣傭人亡其妻。妻家以爲死。執之。嵩偵知。鄰有畫工。以其妻歸。且慝也。計致畫工奪還之。聞者以爲神。咸晚王湧。舉人彭若龍。占良人妻殺人。并論死。居閭者萬方拒。不聽。嵩饒吏幹。在事拮据。百廢具舉。尤加意造士。暇則進諸生課之。自捐俸以資賞給。歷寒暑無倦。淹通五經。爲諸生發疑扶異。無不虛往實歸者。故一時文行之士。成就興起者爲多。天性嚴明。嶄嶄不可犯。以是施政持身。見義勇爲。獨信一力。雖賈勇不能奪也。單騎行縣。所至肅然。一蔬片楮。不以煩民。而惠愛百姓。委曲周詳。人目爲龐青天云。府在六年。京察例。而復與覲察。嵩謂非禮。上疏請止之。至今著爲功令。晉南刑部郎中曲靖。軍民府知府。所在士民銜德。旣去而追思之。爲祠祀。俎豆不絕。

周思兼。字叔夜。華亭人。生有異質。其祖禋尉興國。思兼方五歲。從尉所視獄。從旁輒能解曲直。歲時知故有問遺尉者。循故事或未卻。乃抗言曰。此不當受。祖奇之。孩提知學。葩藻流聞。時人以爲機雲復出。才氣橫溢。下筆每千言不休。爲古詩歌。詹事陸深見之。謂其子曰。吾年二十發解時。不辦作此語。爾善事之。嘉靖癸卯。舉於鄉。明年成進士。選知山東平度州。州故凋疲。歲屢侵。守皆以不善去。思兼至。亟下令曰。救荒

莫若省事。凡諸政令不便者悉蠲之。而身自巡行阡陌。不從輿隸。塵縛一籃。置飯一盂其上。令其鄉民以次舁。舉行。民皆歡呼。迎曰。吾父來。吾民更生矣。居一載。州大治。父雲鵠往廉思兼治狀。獨潛行宿東萊民舍。問守何狀。曰。往太守理一訟。輒經歲月。亡論枉直。卽理民亦坐困。今守神明。一食頃可立決。迺吾民感德。終不忍訟。吾知如是而已。晨起見其家一塑像。民率妻子環拜而視之。視則思兼像也。藩府閹縱莊奴奪民產。民訟之分巡僉事。僉事捶莊奴斃之。獄閹噤。王奏之下。所司鞠。選悞吏惕王威。久不決。竟擬當僉事大辟。撫按疑其事。檄思兼往。王召宴。衆虞有它。王自陪宴。竟席王不敢吐一辭。思兼出則闕成案。對衆歎曰。是胡難決。僉事亡意殺人。決杖不如法。當得杖耳。令爲宗藩故加罪一等。閹誣告。法當戍。以宗藩故未減足矣。卒據以請於朝。僉事竟得復故職。旁郡饑。民掠食。民間卒持之急。且作亂。幕府復檄思兼治之。將加勦焉。曰。此輩皆赤子。饑求食耳。奈何激之使爲變。亟作小木牌數千。爲招輯語。散置四郊。令饑民得執牌來就撫。民得牌雲集城下。吏恐不敢納。乃大開城門。召之入而諭之。給以銀穀。皆復業爲良民。兵罷不用。幕府奇之。所得月俸。每割以贍士之賢而貧者。往往不能具朝夕餐。忽有野鴿來巢。種類驟繁。因取贍親。州人以爲天所惠。廉吏也。庚戌入覲。時嚴嵩用事而墨。計吏多有餽遺。思兼僅持一銀環。詩而贊之。嵩亦知其廉。歸其環而報以詩。吏部考天下治行第一。當遷。州父老伏闕下。請復留。遂還任。辛亥擢工部員外郎。督厥臨清。州人遮道哭送。擁車不得行。臨清去平度不甚遠。其人思之。輒往訊候。至則嗚咽不能返。思兼人人慰勞。或曰。賴公恩。妻孥幸飽食。乃爲色喜。或曰。不幸受某虐。使公在。吾豈至此。因大泣。思

兼亦爲泣。同年生李姓者，貌相類，使經平度州，人爭傳呼周君至，皆踴躍來奔，比見各歎息去。李初不測所以已知之，嘗爲人道其事，窳廠故多義利，猾民蠶食其中，至則以常例獻，怒卻之，已摘其奸狀，尤著杖而戍之，盡敵盡剔，寂坐公堂，時呼吏卒以水濯階，曰：毋污我階。時河勢將決，思兼爲禱於神，募民糞土築隄，身立赤日中督之，隄成三日，而秋漲大發，民免於魚鼈。州人感之，居臨清雖不治民，其頌聲不減平度云。晉郎中出爲湖廣按察司僉事，旣夙著廉能聲，至則臺使僚屬所事受成，墨吏豪民，望風屏迹。武岡州有宗庶將軍五人，席藩封，恣爲奸利，糾集亡賴，白日探丸殺人，莫敢誰何。嘗持刃入王宮，王亟走匿，斫柱而出。州倅以下，悉奉其指使，監司爲不入境者垂二十年，民積怨氣，無所控訴。思兼聞而命駕之州，民遮道迎訴者千餘人，盡得諸奸狀，使民捕其黨惡，五將軍者盛氣入，爲搆不動，頃之羣嫗戟手鳴噪於門，又不爲動，已而民各縛其黨至，悉置之獄。五將軍無可奈何，則臂匕首入，思兼逆知之，佯爲揖而捫其臂曰：毋妄動，吾爲足下百口計。足下迺爲此曹死耶？五將軍計沮而退。迺密條其罪於院，馳奏聞，上詔卽訊逮，得旨，竟械置高牆，所奪田宅子女悉還之民。自是吏得爲治，民得爲生，皆焚香忭舞，爲塑像立碑。思兼拒不，可則使人毀像仆碑，民爭舁碑藏之，攝篆江防，有巨盜劉某者，其黨挾妖術，積不能擒，度無可自容於思兼，暮夜密投千金，思兼怒，廣設方略藏之，威惠旁流，聲稱籍甚。初二親就養，思兼雖在官舍，朝夕跪問起居，孝謹備至。二親欲歸，乃送之過九江，備兵使者駭謂胡以至此，思兼曰：吾以送親得罪，夫何憾？使者退而服其言，未幾以二親連喪，服除竟不復出，逾七年，足迹不入官府，屬歲饑，食指不給，闔門食貧，約不

爲人關說一事。時或操水艇。攜圖書數卷。游吳越佳山以閒。嘯咏自得。終不令人知。有故吏門生知迎候。卽趣棹歸。其猜介如此。居鄉和易慈愛。諒然多隱德。不可勝紀。卽家起爲浙西僉事。堅臥不起。未幾復起。爲廣西督學副使。會病卒。年四十有七。思兼少豪於文。駕軼蘇氏。詩歌類太白。已稍出入歐曾。博綜王孟。善行草。兼工小畫。評者謂得趙承旨米南宮之趣。晚年悉斂而焚化之。凡世俗所慕宮室輿服聲技珍玩之屬。都無染著。而一意靜修學道。常聚宋儒理學諸書。及當代名儒口義。辯析參互。手綴口占。略無停晷。間與同志往復質疑。然終不集徒。與標道學名。所著有西齋日錄。道學紀言若干卷。

樊玉衡。字玄之。黃岡人。玉衡清癯骨立。幼不好弄。事親極孝。恬淡寡欲。聞人說海忠介事。慨然曰。我後當師法此人。生何用多取。我意只結茅三間。築場數畝。擁數千卷。樂而忘死矣。自是口不言財利。而讀書。父母有所予。或妻家奩資。悉以市書。湖廣布政使劉某好獎拔士類。嘗曰。樊生如孤松。亭亭獨秀。蒲圻有貴人女新寡。媿而厚蓄。欲屬之。卽託疾曰。吾不堪也。萬厯甲午。舉於鄉。明年成進士。選知商城縣。還里。覓一竹兜。二奚奴從之。聲響寂然。里中豪貴惡其太朴。媿笑曰。是何卑污苟賤也。玉衡笑曰。卑則卑矣。不污也。賤則賤矣。不苟也。已之。商城初下車。文案山積。執筆不輕下。商人疑其少年不諳也。一月後。察知吏事。肯綮出視事。無巨細。斧斷翠然。中情未明。而輿日中而退。吏民大驚。以爲神明。一切文移。握算收貯出納。皆身自籌量。吏胥司文書。奉奔走而已。商每徵賦。遠民先集。諸保伍家。保伍與吏胥比而爲奸。所費幾半公費。玉衡召其民與約曰。今知諸保伍爲小民苦。欲盡罷之。而言不便者盈庭。是爲千金裘而與狐謀之也。

爾果能不保伍而辦乎。民懼應曰諾。已果先期辦。遂盡罷諸保伍。先是縣拘囚用馬兵。兵奉檄至人家。家立破。遂首罷馬兵。聽訟者自相拘。於是民裹一日糧。集公庭。訟卽畢。又爲息訟歌。悟囚歌。使木鐸巡於路。監門號於里。獄卒歌於獄。時自起。與訟者稱引孝弟忍讓和睦之說。獄囚夜半聞鐸聲。無不流涕。又簡其輕者遣之。暮年而獄幾空。有訟詞。輒付外議息。不罰一錢。有不肯息。愀然不悅曰。有何大事。而嘵嘵不休也。少爲彎曲直去。汝穎燕趙間。有豪黠民。持官府長短。及人家得失。玉衡案誅其魁。而豪猾股栗。奸黨散落。有園叟訴人盜園中茄。曰夜盜。余安得知。因私語之曰。汝密以竹絲貫茄腹。勿令人知。叟去。翌日縣市茄竹絲在焉。汝何爲盜某叟園茄。其人驚服。而邑之小盜屏迹。亡何開探內臣。至時內臣所驛騷。各縣哀金錢以結其驩。趨謁蒲伏庭下。惟謹。玉衡移文內臣。具言商邑無鑛狀。以止其來。不得。則鳴騶列仗。肩輿上堂。商民從觀者千餘人。中使氣奪。竟成賓主禮。明日治酒高會。中使執其手曰。好手。笑答曰。此手不污金錢耳。中使默不應。徐曰。人生幾何。自苦乃爾。答曰。我百姓苦耳。中使謝不敢。已令人開鑛。則導之險道。攀藤捫蘿。插柎而上。岩巖探者不堪勞。鑛竟無有。又趨而之金剛銀臺兩山。乃爲文率內臣祭山神。曰。敬問山靈。有鑛耶。無鑛耶。近民爲汝竄。遠民爲汝徒。巨家爲汝破。何不吐符陳貢。以抒明主憂。聖天子視民如傷。如令與內臣藉口括金。以負聖天子。願神奪其魄。殞其命。辭極酸楚。商民感泣。已而竟無所得。中使快快去。欲中傷之。乃先挾其所移檄文。有歸過主上語。曰。若謗訕朝廷。我不奏聞。而敢媒毒我乎。欲草疏上。中使懼而寢。遂亦毀前疏。以安其心事。定語人曰。人不可無友。吾於中使執前不撓。光州正薛君勸吾

一意行之。他人勸我如他邑下之。此事豈一下所可了。調崑山人咸謂商簡崑煩。不可以商治也。玉衡曰。惟煩也。故以簡。諸凡勸農息訟。一如商。崑俗好訟。縣署前牙僧借獄爲市。起高樓酒館。及爲治一年。幾於無訟。酒家徙去。是秋雨傷稼。率胥役駕小艇。勘視墟落。與饑民相對噉菜粥。時司農急積逋。停邑長俸。崑逋至二十萬。玉衡曰。小民逋賦時我甫十餘齡。今其人少者壯。壯者老。老者死。我奈何。惜已月俸。使萬口誚乎。止不徵。民亦輸負惟恐後。吳諸生好與公府事。督學爲設門禁簿籍記之。玉衡曰。吾方求士。願聞令過。何禁爲。第署簿上曰。求澹臺生。而挾私來干者皆反矣。崑當編審賦四十萬。隱覆萬狀。前令號開敏。鉤校月餘始完。玉衡獨以三日完。不爽毫髮。庚子大計。無一錢通長安貴人。卒舉卓異。擢兵部主事。旨不下。旋復之。崑時郡民以中使噪其門。郡縣欲相率往謝。玉衡曰。彼自擾民。賴郡邑戢之。彼不我謝。反謝之耶。吾卽往。不庭謁。恐反敗君事。郡縣以君不可。遂皆罷謝。在崑前後六年。嘗數擢吏部禮部戶部工部。旨皆不下。而父病乞歸。上官及邑人士競留之。度不可卒解。以印綬付學博士。五鼓馳歸。卒。兩縣皆祀之。學宮又特祀之。私諡曰孝介。

歐陽東鳳。號宜諸。潛江人。以進士歷郎署。當萬厯辛丑守常州。故事。新守至。屬邑設供帳。所值數千金。東鳳至。盡撤還之。自製布帷瓦器。澹如也。日費錢不滿百文。積公用千金。復龍城書院。故址爲先賢祠。祀一郡鄉賢。自延陵季子以下六十九人。考其行事。人著爲傳。頒布士庶。使知仰止。每以春秋集五邑紳矜於祠中。講學問政。凡農桑水利。人才賦役。無不咨究。而於激濁揚清。抑強扶弱。有惓惓焉。每受訟詞數百紙。

非係風俗利害者不行。其不行者，必破所以。如見肺腑，皆以崇朝布發。民無守候之苦，亦不敢易詞再訟。亦不敢至當道越訴。訟以大簡。地方大窩大猾，悉擒治之。積年大盜滅賊追罪，官府莫能詰，皆延訪得實。以他事致法。夙害悉祛。嘗以聽訟時，下縣解官銀至。吏秤座右，公據案批牘自若。秤畢，即曰：第幾包銀，何得獨重銖許驗之果然。立扶吏人，以爲神。朝廷忽下罷稅之旨，邸報以已刻到府。東鳳不白當路，即以已刻撤所部關稅。當路來詰，何以不俟明文。東鳳對曰：大哉王言，何明文如之。救民水火，寧緩須臾耶。後旨不果行，而常郡之稅，獨得浹月之惠。東鳳喜讀書，退食手不釋卷。夜多不寐，文移往來，日至夕發，不滯信宿。接摺紳士人，藹藹而正氣，懷然人無敢干以私者。擢監司去，民慕之爲祠祀。

馬思理，字達生，閩之長樂人。天啓壬戌進士，筮仕爲烏程令。思理冷面古顏，不苟訾笑，視之有不可犯之色，而居心甚慈，接物甚和，被服造次，一濯儒而已。喜誦讀，雖簿領雜選，公事如蝟，席端嘗安一卷書，小隙卽潛玩，如諸生。自謂心眼一日不接書本，則鄙吝叢生，應酬皆失。蓋天性然也。縣賦重，胥吏窟穴其中，不能理。思理剔立清單，里甲自註納數，次第押完，不施一鞭，課無負者。其法後人皆遵之。邑民雀鼠爭，往往以人命相訐，訟師傾人，一檢驗而其家立碎。思理約法不先檢，必待審實，誣者坐之。計風始衰，民多完家。思理愛民如子，持身如處女，出於至誠，人不忍欺。訟者至庭，望其愀然之容，卽相率罷去。黠吏窺伺左右，未嘗見喜愠，竟無以中之。終其任，無胥卒敢爲猾。他人雖要囚禁切之，蔑如也。喜與邑中士大夫游，一見落落難合，雖貴不加熱，雖卑不加倨。久而意傾，無不欽服。尤加意造士，出謁子衿，手藝文相質，則禮之客。

館賞奇析義。終日不厭。間有所干請。則正色謝曰。至公庭議之。士而發頰而退。且潛心道業。明鑒若神。其校士有季課有月課。皆手自點閱。激揚鈍慧。益人種智。使物物怒生。被其髓髓。無不成就。遠方之士日進。幾半魯國。其所拔士。如凌義渠。溫璜。皆以殉國大節表天下。至以登甲乙榜者。不可枚數。數十年菰中起家之賢。皆所拔識者也。思理每遇水旱。爲民禱。必芒鞋去蓋。躬踐塵泥。或盛夏暴烈日中。請折請賑。情見乎詞。上官亦鑒其誠。曰。馬君所請。何可同他令。故在邑。再罹儉歲。凶而不饑。緩徵蠲羨。輸額至七分以上。卽止不徵。窮簷無吏呼於門者。五年以考最內召。鄉民扶老攜稚擁車下。自郡治至吳江界。七八十里。間踵趾相接。頂香牽袂。環跪而泣。爭以卮酒爲壽。思理亦泣。勉爲舉觴。入京以上考擢給事中。湖民士思之不已。立社尸祝。比於畏壘。每邑人以運務上京。望其署如歸。走謁如家人。有所便宜祈請。應之如響。士以試事入都者。復如是。凡出入省掖十餘年。而烏程之利病凶穰無不聞。父老子弟之祈求無不得。再躋再起。而民之思慕如一日。其願復亦如一日也。思理在垣多建白。巡草場。以忤閣下詔獄。以救翰林黃道周。再下獄。垂老以國難蹈海死。

彭長宜。字德符。海鹽人。崇禎癸未進士。筮仕爲上海令。長宜家本華胄。而刻厲茹苦。有踰寒峻。置身高秋。與物春煦。至清而能容物。甲申夏聞變。以衰絰蒞任。哭於邑署。時人情倉皇。有倡亂海上者。往往嘯聚。而南臺新建。徵發騷。仰屋莫應。長宜榜諭遠近。開陳大義。內銷奸萌。外供征繕。人情帖然。長宜朴若無能。才周四應。邑故號劇。一切錢穀刑法書檄。酬應之繁。皆手自辦給。不召幕客一人。官署如僧寮。入其中蕩

蕩無有。寢戶皆塵封。案上惟圖書數卷。旁列竹筒。貯公服角帶。布衾在牀。奚奴一二頭在竈下。自到任至去官。不益一物。其甘節出於天性。上海去家近。凡銜舍魚米。皆取給家鄉。用不足。其妻至率婢指以紡績。續之。嘗言。值此季世。身家俱空。昔賢有毀家紓國者。我縱不能。豈可食官下一錢乎。邑民有擔水供官者。長宜問其故。曰。此總甲所派。長宜曰。汝能不飯而遠汲乎。奈何。以我渴。貽汝饑。遂計腳錢與之。故事。令坐公堂。或遠出。主藏吏必備穀核以從。長宜謝絕。日聽事。啜茗一盃。郊外迎送。日晏不歸。則市胡餅療饑而已。縣多逋負。萬方督之不能楚。長宜至。設期會。與民約束。不鞭一人。盡革火耗。免頭。若櫃役併封。有絲毫贏者。杖之。里民爭輸恐後。至自相戒曰。往時持鐵入官。一比限而輸。吏胥十二。輸免耗十三。公今蠲之。以抵官過半矣。有君如是。忍負之。非人也。里有頑甲。爭詬諍之。數月中。逋課盡完。民小鬪訟。第開諭散遣。亦不施箠索。琴堂闕寂。終日不聞竹肉聲。隸胥垂手無事事。歸戒其妻子曰。若曹必餓死。即餓死。不敢謂非好官也。邑民嘗以謔語作偶聯。粘縣署雙扉。殆徧。又爲太平謠。徧揭街衢。好事者錄之。成帙。皆耘夫野老所口占。無一文士語。元旦啓門。父老望而再拜。焚一瓣香。婦媪亦過而膜拜。如入廟禮佛者。行春之日。邑人執香而隨者。填馬首。家家榜其門曰。官清民樂。有大瑤以督餉行部。所在苛索。至上海。即促還轍。曰。此老不解事。可亟去。邑有重客。長宜以一縑饋之。曰。物雖微。非盜泉。可飲也。客笑謝曰。吾亦不敢食西山之薇。相傳爲雅談。長宜以至嚴律己。以至慈接物。與人言。惟恐傷之。意所不可。毅然難犯。乙酉夏。邑人攀衣留之。長宜曰。世蒙國恩。留此必死。遂聽之去。去一日竟死。可謂不食其言矣。長宜大節未傳。傳其循蹟。

明書卷一百四十

列傳七

武臣傳一

史官論曰。武臣者何。別於勳臣云爾。人臣以德立宗廟社稷曰勳。以言曰勞。用力曰功。勳之勞之功之者。是不可以已也。舍是三者而惟武是覲。是或可以已也。古者擐甲執兵。非尋仇讎也。則以征無道也。若墮人以自成。亂人之家國以自爲名。人之稱斯臣也。則謂之何。詩云。敦商之旅。克威厥功。美周公之有是功也。旣破我斧。又缺我斨。悲周公之有是武也。且明非周公而爲是武者。尤可以已也。斷自北平之師。訖後之開邊典兵者。爲武臣傳。

張溫傳

張溫以指揮守蘭州。洪武二年十二月。元將王保保覘大將軍南還。帥兵十萬。奄至城下。溫會諸將校曰。彼悉衆襲我。我兵寡難與爲敵。然彼遠來。未知我虛實。乘暮擊之。可挫其鋒。彼不退則固守以待援。於是整兵出戰。保保兵稍卻。遲明溫收兵入城。敵遂圍城數重。溫堅守不與戰。于光來援。被執至城下。大呼大將軍將至。城中守益堅。多方卻敵。保保引兵去。方急時。夜二鼓。圍兵登城。千戶郭佑被酒醉臥不覺。巡城

官軍擊卻之。圍既解，溫執佑將斬之。天策衛知事朱友聞爭曰：「當賊犯城時，將軍斬佑以令衆，所謂以軍法從事，人無得而議之。今賊既退，乃追罪之，非惟無及於事，且有擅殺之名，竊以爲不可。」溫悟，杖佑而釋之。上知之，謂輔臣曰：「友聞以幕僚能守朝廷法，直言開諭官長，此正人也，宜加賚賜。」綺帛各五疋。陞溫都督僉事，兼陝西行都督僉事，入謝。上諭之曰：「蘭州之捷，可謂奇功。夫將帥之道，有功不伐，則功益顯，恃功驕恣，則名益墜。是惟仁者不矜其功，而智者克成其名。仁智兼全，所向無敵，爾能守之，可以長保富貴矣。」仍賞守禦將士，詔曰：「蘭州乃西北重地，近因大將班師，元帥王保保乘隙攻城，指揮張溫獎勵將士，堅壁固守，屢出挑戰，大振軍威，元兵力屈。又聞大軍入關，彼遂斂兵遁去，以此保障關中一方以安，其功最大。指揮人賞文綺帛十四疋，千戶衛鎮撫十二疋，百戶所鎮撫十疋。圍城之日，在內守禦軍士，不論新舊，總旗人賞銀十兩，小旗九兩五錢，軍人九兩。其守鳳翔臨洮鞏昌綏德者皆賞。次蘭州。」

史官曰：蘭州關西塞重，輕蘭州破，則保保西連羌，北連寇，以數十萬窺關中，天下半搖矣。鳳翔臨洮之屏蔽壞，卽守亦艱難耳。溫以智勇撐半壁，厥功偉哉。事平不侯，亦可惜爾。于光列忠節，而溫之功又光成之乎。

朱能、徐忠、李彬、陳珪、李濬、孫巖、徐祥、陳志、張興、梁銘、趙彝、郭亮、高士文傳

朱能字士弘，懷遠人。父亮，開國功。世燕山護衛正千戶，能嗣官。辦事燕府，建文元年燕兵起，能及張玉首議縛三司，奪九門，卽引兵東攻薊州。敗都指揮馬宣兵，拔薊州度石門，又拔遵化，襲破大寧，還兵破雄縣。

鄭州。擒都督楊松。長驅至真定。敗長與侯耿炳文。再戰滹沱河。能躍馬大呼突陣。敗炳文兵。還鄆村壩。破九門兵。又敗平安兵。白溝河二年攻濟南。退戰敗鏘山下。戰東昌。盛庸鐵鉞力戰。圍燕王數匝。平安兵又至。圍益急。能率周長等兵。合口騎奮戰。燕王潰圍東北角出。還營。能在諸將中年最少。善戰。張玉善謀。戰沒。東昌軍事一諮能。是年歷陞都指揮同知。三年收合諸軍將薛祿等。進戰夾河。擒都指揮張安。夾河之戰。譚淵死。燕兵窘。得能至。再戰勝。軍聲復振。敗盛庸兵藁城。三戰三敗之。遂率王與陳亨諸將攻真定。能先鋒衝庸中壘。殺幾萬人。擒都督顧成。出奇兵截大兵哨騎。連戰順德。大名彰德。衛輝。皆有功。戰西嘉山。破定州。十月戰蠡南。兵大潰。是年陞都督僉事。四年克東阿。進攻東平。殺判官鄭華。盡破汶上諸寨。至小河。王真戰死。平安兵大捷。燕諸將議旋師。能獨按劍奮罵諸將曰。漢高祖十戰九敗。終有四海。今舉事連捷。小挫輒歸。更能北面事人耶。諸將皆大不口當斬。衆遂定。燕王引兵南下。大戰大店。又戰小河橋。又大戰齊眉山。連捷。盛庸平安等合兵六十萬。依潼山爲陣。能率李遠等設奇四面進攻。大敗平安等銀牌軍。都督陳暉來援安。又敗暉。擒平安等三十人。降十萬衆。六月渡江。進屯金川門。夜漏下五刻。門開。定京城。建文四年封成國公。食祿二千五百石。與世券。永樂四年充征夷將軍。率二十五將軍討安南。加祿千石。至龍州卒。能身長八尺。沈毅驍果。善拊士卒。被常服。依儒生。追封東平王。諡武烈。侑享太宗廟。庭子勇嗣。正統十四年扈駕北征。寇卒至。勇引兵五萬迎擊。冒入鷓兒嶺。中寇伏。戰歿。隻騎不返。子儀乞葬。祭不許。停奠。景泰二年詔己已諸將敗歿者。皆受朝廷成算陣亡。成國公修武伯。與子襲爵。贈勇平陰王。諡武愍。

儀始得嗣守備南京三十餘年卒贈太師諡莊簡弘治九年子輔嗣守備南京卒贈太傅諡榮僖子麟嘉靖四年嗣卒八年弟鳳嗣卒子希忠累加太傅兼太子太師入直西苑卒子純臣嗣國變死難

徐忠字仲達合肥人父用開國功陞副千戶忠嗣官征寇功陞濟陽衛指揮僉事鎮開平燕兵起歸附立功趙齊楚間白溝之戰敵揮刃斫忠兩指未殊忠自斷指擲地裂衣帛裹創發憤進戰大捷歷陞都指揮僉事太宗卽位封永康侯食祿千一百石與世券仁宗監國留忠南京掌兵政卒贈祭國公諡忠烈忠三庶子安敬曦爭襲永樂十六年上令長庶子安嗣卒子昌先卒昌子錡嗣卒子溥乞優給月給米十石卒庶長子源嗣與優給長嗣侯

李彬定遠人父信權指揮僉事彬善騎射嗣父官從傅將軍征朵顏經略宣府與和雲州築萬全懷來城從燕王率騎兵攻薊州轉戰雄鄭真定襲大寧慶鄭村白溝濟南滄州掠彰德皆有功歷陞督府僉事建文四年護仁孝皇后至京明年封豐城侯食祿千石與世券出鎮西陲六年以交趾功加祿五百石永樂二年卒贈茂國公諡剛毅明年子賢嗣侯鎮守大同守備南京景泰二年卒贈豐國公諡忠憲四年子勇嗣侯卒無子弟昇之子熙嗣無子姪儒嗣無子從姪環嗣卒子宏濟

陳珪泰州人開國功陞百戶調燕山護衛擒口乃兒不花陞副千戶從燕奪九門雄鄭功陞指揮又壩上立戰陞都指揮大戰楊村陞都督僉事建文四年陞太寧侯食祿一千二百石與世券卒贈靖國公諡忠襄子璽先以從燕功爲指揮使璽子鍾已嗣珪次子愉遂得嗣侯二十年北征失律下錦衣獄死鍾與愉

子鏞爭嗣。仁宗以鍾庶長孫二十二年嗣。卒。子灝嗣。卒。無子。弟瀛乞嗣。宣宗曰：陳愉失律，念灝有功，灝孫瀛與嗣侯給半祿。十年吏部言灝年十五與全祿，已已陣沒。是年弟涇嗣。成化元年失律坐斬，赦還。侯停祿。卒。子桓八年嗣。十年桓坐與僧娼飲酒淫酗，奪俸一年。子璇嗣。卒。子儒嗣。卒。子連嗣。卒。無子。弟孺嗣。卒。子良弼嗣。

李濬，和州人。父旺開國功，爲燕山護衛千戶。濬嗣官。燕兵起，從執謝貴、張昺，奪九門，克居庸，轉戰永平，真定。功陞指揮僉事。鄭村壩大捷，陞都指揮僉事。白溝濟南功，陞同知。建文四年封襄城伯，食祿一千石。與世券、永樂元年出鎮江西，召還。三年卒。子隆年十五嗣。伯八年從上北征有功，十四年留守南京。仁宗時出鎮山海，未幾復守南京。先後凡十八年。正統五年入總禁兵，十一年巡邊。明年卒。隆有才略，頗好文，恭慎不敢驕，守法度。明年子珍嗣。伯又明年沒於土木，無子。弟連病不能嗣，連弟瑾景泰元年嗣。伯成化三年總兵，與程信征川貴蠻，大戰渡船鋪，攀崖焚其巢，賊退保大壩，貴人犄之。川人角之，賊敗奔入洞，窒而圍之。逾月皆死。四年進流侯。宏治二年卒。贈芮國公。諡武莊。子黼嗣。卒。無子。連子鄜嗣。伯正德四年卒。子全禮嗣。伯嘉靖十八年卒。明年子應臣嗣。伯卒。子鈞嗣。卒。子國楨嗣。死闕難。

孫巖，鳳陽人。開國功爲流百戶，改護衛。十三年從藩王之燕山，久之致仕。子亨嗣。官陞正千戶。建文元年巖以致仕官從燕兵守通州，奪門力戰，追奔至張家灣，掠餉舟三百，復還守城。又敗遼東兵，歷陞都指揮。建文四年封應城伯，食祿千石。與世券、永樂十六年卒。贈翼城侯。諡威武。亨先以從燕兵立功薊州永平。

鄭村壩大同白溝河滄州彰德靈壁入金川歷陞河南都指揮嗣父伯卒子英嗣伯無子弟傑嗣伯正統元年坐不敬勒罷卒子繼先嗣伯卒子鉞嗣伯嘉靖十八年卒子爵嗣卒子文棟嗣

徐祥大治人漢萬戶歸附從軍陞燕山護衛千戶燕兵起攻奪九門轉戰漁陽真定永平彰德白溝河滄州保定小河齊眉山渡淮河入金川門有功建文四年九月封伯十三人祥第一爲與安伯食祿千石與世券祥在燕諸將中年稍長及封益勤慎不敢驕怠永樂二年卒子永未嗣卒永子亨嗣正統元年征湖功進流侯加祿百石卒諡武襄子賢嗣病跛與半祿免朝請卒子盛優給十六年嗣卒無子從子良正德三年嗣卒勳嗣卒子夢陽優給嘉靖二十年嗣卒子□□嗣

陳志巴人開國功累陞燕山中護衛指揮僉事從燕兵戰真定白溝河濟南再陞都指揮同知永樂元年封遂安伯食祿千石與世券卒志二子長良坐法謫戍死次春立功爲指揮使先志卒春子瑛嗣指揮僉事矣至是良子瑄與瑛爭嗣伯吏部上請太宗曰瑄父洪武中獲罪無勞於國然志適孫也春有功陞指揮瑛已嗣父官今與瑛伯奈適孫何瑛又不肯讓下廷臣議議上瑄適孫宜嗣上曰瑄與瑛合陞見朕二人者見上曰二人者皆可嗣朕與汝鬪鬪得伯者嗣瑛得鬪上笑曰乃汝瑛也竟得伯者瑛卒子墳幼與半祿優給尋嗣正統十四年隨上北征陣沒無子墳叔詔與瑄又爭嗣景帝曰先朝言二人者皆得嗣今天國家急人總兵石亨楊洪尙書于謙擇嗣一人必有功也與世嗣謙等上言瑄老詔壯景帝令詔嗣伯天順八年詔坐于撓軍政奪坐營成化三年又坐事謫立功遼東明年赦還七年乞恩與半祿朝請卒孫鐔

嗣伯。正德中爲薊州總兵。朵顏入塞召還。嘉靖中爲京營總兵。子先早卒。孫樹嗣。卒。子□□嗣。

張興。壽州人。開國功。歷陞燕山護衛指揮僉事。從燕奪九門。戰漁陽。永平。大甯。廣昌。白溝。河濟。南。夾。河西。水。塞。功。歷陞都指揮同知。從子勇。年壯有膂力。從興行間。先登。與營單騎追敵。被十餘創。病。勇領其兵。嗣護衛指揮使。戰淮。泗。渡江。入金川門。陞都指揮同知。太宗卽位。封安鄉伯。食祿千石。與世券。五年卒。贈侯。七年勇嗣伯。明年從征。失律。謫交趾。總旗立功。十年赦還。復伯。道病卒。十五年子安嗣伯。正統十三年出鎮廣東。十四年戰賊黃蕭養敗沒。子鑄優給。卒無子。安弟甯嗣伯。卒。子珣嗣伯。卒。子勳未嗣。卒。孫坤嗣伯。卒。子鏞嗣。

梁銘。汝陽人。洪武中嗣父燕山護衛百戶。從燕兵起時。南兵攻北平。又攻通州。銘守戰甚力。積功至督府僉事。侍太子監國。坐事下獄。永樂十九年赦。令捕倭廣東。仁宗卽位。進督府同知。充參將。鎮寧夏。上念銘舊有守城功。封保定伯。食祿一千石。與世券。宣德初。御史石璞劾銘守寧夏罪狀。上特原銘。遣銘副柳升征交趾。卒軍中。銘坦夷寬簡。敢勇當敵。能撫循士卒。銘不死。崔聚亦未至敗沒。子璠宣德十年嗣伯。正統十四年坐失律謫。從石亨立功。尋與半祿復其爵。斬敵首。復與全祿。景泰元年充平蠻將軍。代王驥征貴州。又征福建。皆有功。三年進流侯。加祿五百石。世伯。天順元年與世侯。卒。贈益國公諡襄靖。子傳嗣伯。坐不敬。逮獄。習禮國子監。卒。子宗幼。與祿歲百石。優給。卒。次子任嗣伯。卒。子永福嗣伯。嘉靖中爲京營總兵。卒。子繼璠嗣。

趙彜虹人。洪武初虎賁百戶。調燕山右衛。從穎國公友德征沙漠。城宣府。萬全。懷來。歷陞永平衛指揮僉事。燕兵至永平。彜以城降。從徐忠等轉戰有功。陞北平都指揮使。太宗卽位。封忻城伯。食祿一千石。與世券。永樂十三年鎮徐州。仁宗召還。卒。子榮嗣伯。卒。子溥嗣伯。卒。姪權嗣伯。卒。子武正德十三年嗣伯。卒。子祖徵嗣。卒。子龍嗣。

郭亮合肥人。父聚開國功。陞流百戶。亮嗣官征口功。歷陞永平指揮。從燕兵與都督耿獻戰。又與都督楊文戰。皆有功。當是時燕兵南下。亮獨守永平。與北平爲聲援。建文四年封成安流侯。世伯。食祿千二百石。出守開平。築烽墩。永樂二十一年卒。贈興國公。諡忠壯。庶長子晟嗣侯。宣德五年扈蹕。先入德勝門。歸私第。劾下錦衣獄。天順二年卒。無子。弟昂乞嗣。上曰。如誥券與伯爵。卒。子鏃嗣伯。卒。子甯嗣伯。卒。甯子璋早卒。璋從弟瓚嗣伯。卒。子寶嗣。

高士文陝西咸甯人。洪武中雲南塞北功。陞燕山護衛百戶。從燕兵戰大甯。廣昌。白溝。夾河。東平。汶上。每出入陷陣。先登。累陞都督僉事。永樂四年征交趾。五年交趾平。餘寇奔入七源。諸川山谷中。出沒寇掠。張將軍遣士文捕賊。晝夜急攻。賊突出走。士文又進追賊。中飛礮死。部兵復追賊。賊又竄入七源川。以士文力戰故。賊竟潰亂。張將軍繼遣都指揮程錫平賊。贈士文建平伯。令子福嗣伯。食祿千三百石。與世券。卒。子遠嗣伯。宣德五年與成安侯扈蹕。不敬。下獄得釋。卒。子震病不能嗣。遠弟遠嗣伯。卒。無子。弟達之子隴嗣伯。卒。子繼宗嗣伯。

史官曰：昭余之奮貔虎而瞰江皋也，策勳勘定稱奇傑，皆彬彬一時之盛，而獨彝之於武臣何哉？南風自不競耳。當時太宗以烏合之衆，數戰數敗，諸將固開國之遺也，喜功之習，決於胸臆，遂爾鞭斷江淮，戈殘宮闕，方之魏鄂，實媿鷹揚，享國久長，蓋有天幸焉。噫。

邱福、孟善、火真、李遠、王忠、王聰、張武、徐理傳

邱福，鳳陽人，以小校事燕王藩邸，積年勞，授護衛千戶。燕兵初起，與朱能、張玉首建議奪九門，轉戰真定、夾河、滄州、靈璧，先登有功。累陞中軍都督。建文四年，封淇國公，食祿二千五百石。與世券當是時，錄功詔福第一。福善高煦，數勸上立高煦爲太子，上不許。福質直無文，有勇力善戰，見敵輒深入。永樂七年，爲征虜大將軍，總兵李遠、侯王聰、同安侯火真、靖安侯王忠、安平侯李遠、五將軍竝出塞擊虜。上曰：本雅失里逆天道，羈信使，命爾徂征，自開平以北，卽不見敵。時時如對敵，日夜嚴斥望，遇敵設奇奮擊，否則審察事機，便宜進止。又密授方略，臨遣福出塞，率千餘人先至臚胸河南，遇敵遊兵，與戰敗，敵遂乘勝渡河，又獲敵間我者，尙書一人。福願飲，尙書酒問本雅失里，今安在？尙書言本雅失里聞兵來北遁，去此未遠，可三十里。福大喜曰：當疾馳擒此敵。時諸軍未集，皆曰：此敵誘我，不可信。俟諸軍畢集，遣精騎四偵，徐議進擊，否且墮敵計。福不從，又命尙書爲鄉導，率衆直薄敵營，與戰，相持二日，每戰敵輒佯敗，引我兵深入。福意銳欲乘敵，遠力言敵示弱給我，退則乘我，進則伏我，惟結營自固，晝揚旗鼓，出奇兵與挑戰，夜多燃炬鳴礮，以張軍聲，勞困敵，使敵莫測。不二日，我軍畢至，併力奮擊，必大捷，否亦可全師而還。將軍

奈何不慮此。聰亦力阻。福皆不從。欲遣火真使詐□求和。解□謀。率精騎劫□真。猶豫未決。福厲聲曰。違命者斬。卽上馬先馳。麾士卒。控馬者皆泣下。諸將見元帥去。不得已從行。不數里。敵伏四起。奄至合圍。遠聰率五百騎突出陣。斬敵數百人。聰戰死。遠馬蹶。與福真忠皆被執。沒敵中。太宗聞敗大怒。諭東宮。明春朕且親征雪恥。又遣使諭順甯王馬哈木。福敗績。或本雅失里得福軍旗幟衣甲。詐劫攻爾。慎防此敵。以故福後不得嗣。

孟善海豐人。立功洪武初。爲定遠百戶。十九年從征雲南。又後征金山。捕納哈出。歷陞燕山護衛正千戶。出塞敗□哈刺□。獲多。又以驍勇著名。時召宿衛藩邸。燕兵起。初攻九門。執薛參議。破松亭關。進指揮僉事。戰真定。破齊尙書兵。陞北平都指揮僉事。白溝濟南常山戰勝。進同知。夾河藁城敗盛庸兵。進使保定。收官軍萬三千人。陞督府僉事。進同知。建文四年封保定侯。食祿千二百石。與世券卒贈滕國公。諡忠勇。子瑛嗣侯。洪熙元年。瑛弟賢連坐。奪爵毀券。謫雲南安置。宣德十年赦。與京衛指揮使卒。子俊嗣官。天順元年。詔與嗣伯爵。卒。子昂乞嗣伯。吏部以詔無世襲文。執不許。內批昂嗣伯。卒。子達成。化八年乞伯優給。不允。十一年又乞嗣。仍與京衛指揮使。宏治元年又乞嗣伯。不許。

火真韃靼人。名火里火真。居開平紫乾嶺。洪武初歸附。爲燕山護衛千戶。從燕兵取大甯。克真定。戰白溝。河馳馬突陣。手斬數十人。長興侯兵敗走。真領騎兵。每出輒有斬獲。呼噪歸營。敵皆懼其悍勇。歷官督府僉事。建文四年封同安侯。食祿千五百石。與世券。永樂八年戰沒敵中。

李遠，懷遠人。父實，開國功。累陞蔚州衛指揮僉事。遠嗣官。燕兵起，率所部及萬全衛兵從攻大同，破滄州。徇東平汶上，沛沙河渡，斷南兵餉道。累功陞都指揮。建文四年封安平侯，食祿千石。流侯世伯。永樂七年出塞戰沒。追封莒國公。諡忠壯。遠沈毅有膽力，善騎射。在諸將中言論侃侃，自許忠義。子安嗣侯。洪熙元年爲交趾參將，失律。宣德二年下錦衣獄，奪券。十年赦，謫赤城備禦。尋陞督府僉事。征鎮番阿古脫兒只伯功，進同知。充總兵，征松潘及木麓川，又失律。正統七年下御史獄，謫獨石。立功贖罪。卒。子清十四年請嗣。吏部言安再失律立功病死，清不得嗣。天順元年詔與都指揮同知。

王忠，孝感人。建文時以指揮守蔚州，強勇自負。燕兵起，與李遠歸款北平。戰白溝濟南滄州藁城，率精騎爲奇兵，多斬獲。累功陞督府僉事。建文四年封靖安侯，食祿千石。與世券、永樂七年戰歿塞北。無子。弟禮斌，姪全累請嗣。吏部言券、文子孫世襲，無弟姪襲文，不允。宣德十年，忠妻援武城侯姪孫王玘例，授斌京衛指揮僉事，奉忠祀。

王聰，蘄水人。起燕山總旗。陞百戶。從燕兵取漁陽遵化，徇涿州，轉戰南皮平滑口，獲馬千五百。還守保定。復南宮冀南，徇淮泗，首獲舟渡江。累陞督府僉事，封武城侯，食祿千五百石。與世券、永樂七年戰歿敵中。追封漳國公。諡武毅。上以李遠及聰嘗諫福，故得襲卹。無子姪。孫玘請嗣。吏部言聰、券子孫襲姪孫不得嗣侯。宣德十年特與玘京衛指揮僉事，已而玘又累乞侯，不許。

張武，瀏陽人。豁達有勇力，稍涉書史。爲燕護衛百戶。從燕兵戰真定，破耿炳文兵於滹沱河，設伏戰勝夾

河要敵西水寨。累功陞都督同知。建文四年封成陽侯。食祿千五百石。與世券當時武功第三。前二人邱福朱能封國公。武侯第一卒。太宗出內廐馬賻武。贈潞國公。謚忠毅。無子。增臧子聚義兒張旺匿語券。天順二年奪入官。

徐理西平人。甲午從軍。累戰功。歷陞永清衛指揮僉事。從燕兵。敗都督劉貞兵於寬河。再陞北平都指揮僉事。又戰平安兵於白溝河。斬先鋒哨騎。追至雄。轉戰濟南滄德間。至夾河。戰敗盛庸兵。西援水西寨。陞督府僉事。小河敗何都督兵。克泗揚。入金川門。皆有功。建文四年封武康伯。食祿千石。與世券。永樂六年卒。子禎嗣。正統九年卒。子勇嗣。卒無子。成化九年勇義兄嫂趙言勇從姪文英家西平。吏部言勇歿且二十年。文英不得嗣伯。

史官曰。諸起於北平者。多簪纓奕奕。令終太平。而邱福等投隙龍驤。雄略懋著。然或以魴死。或至絕嗣。不得與張輔等聯步螭頭。永煌鐵券。考古者爲之慄然。又爲之快然。

李震王信牟斌劉鑑傳

李震南陽人。父謙。督府僉事。震嗣指揮使。正統中征兀良哈木麓川香爐山螭嶼寨功。歷陞督府僉事。天順四年充總兵官。征武岡黎平賊。五年進攻兩廣貴州蠻。陞同知。成化元年還兵湖廣。征荊襄賊功。歷陞左都督。十一年清水江斬捕功多。封興甯流伯。食祿千石。十四年革爵閑住。震鎮湖廣時。與參將吳經有隙。經弟綬從汪直刺事。欲甘心震。適有道人以黃白術得罪。卽附會震嘗匿道人。私習讖緯。且有謀反遣

人籍遼之途。遇直震呼冤。言一介武夫。蒙恩儋爵。父子富貴已極。更欲何爲。此離家經所爲。直不聽。下嚴錦衣獄。鞠問無驗。得不死。二十年復伯爵。乞誥券不許。子昂不得嗣。

王信字君實。南鄭人。正統中。世官寬河千戶。父忠。征迤北戰歿。母岳生信。方半歲。持節旌無忠臣節婦。既長。嗣官。已巳。敵犯京師。拒戰西直門。功陞指揮僉事。景泰六年。從征五開諸蠻。遷指揮同知。天順五年。破曹賊東市。遷指揮使。成化初。守通州。改守倒馬關。移守荆襄。二年。石和尚劉千斤反。荆襄信進據房陵。民兵不滿千人。賊四千餘衆突至。圍信。主帥逗留不援。信多張旗舉火。晝夜不息。累四旬餘。間以死士出城五六里。舉火礮。賊以爲援兵至。驚走。追斬有功。陞都指揮同知。鎮臨清。兼管倉糧。移鎮湖廣。條陳入事。又條上慎專任實倉儲。修兵衛。禁科罰四事。十七年。疏言湖廣蠻夷。雖腹中之蠱。實無能爲。但我軍奸黠之徒。利其竊發。可以邀功。今但選精銳。常加隄防。勿蹈前非。其患自息。荆襄流逋。本意逃避徭役。長子老孫。已成家業。濫加誅殺。恐傷和氣。南畝之農。無所蓄積。收穫未竟。餼糧已空。機杼纒停。布縷何在。乞選公正。仁惠守令。大加存恤。濫陞官員。無慮千百。無一矢之勞。冒崇階之賞。乞查勸削奪。三司方面。所以折衝禦侮。承宣激揚。當公以格物。廉以律己。所部指揮劉斌。張全。智勇過人。力薦於朝。且云。英俊之子。處心剛正。寧肯抑心低首。奔走媚求。若不曲加攬訪。則賢才多隱。志士沈匿。陞都督同知。總理漕運。卽日上道。常語人曰。荷國厚恩。未能報稱。此行當以江水洗滌肺腑。少盡區區。信沈毅簡重。被服儒素。出入省闕。從歷鎮大邦。不營私產。平居閉門。展玩經史。寬袍緩帶。綉飯蔬羹。故人婚喪。傾心賑恤。出鎮三十年。筭無華衣履。

無肥馬。鈴閣之下。寂無人聲。子繼善從善。皆舉進士有名。

牟斌字益之。趙人。正德初。掌錦衣鎮撫。闕瑾竊政。逐方正大臣。言官劉涇戴銑等凡數十人下詔獄。斌輕刑緩械。曲爲申救。任御史者自愬諸僚。上奏時置其名。彼實他出。斌曰。古人恥不與黨人。君得名乃悔耶。瑾令復獄詞。去銑疏首權閣字。斌不肯。謂其僚曰。存此則諸君子臣節白他日。昔宋鄒道卿以失原奏被害。吾儕毋自爲計。奏入。瑾大怒。又偵知斌庇言官。矯旨廷杖。垂死。瑾誅。斌復任鎮撫知府。劉祥與內臣相訐。下斌治。內臣賄張雄。令曲祥并賂斌。斌不從。雄陷斌。安置武昌。感疾而卒。斌再用時。長子死。工部官賻三百金。斌指其兩子曰。斌司刑不道。天禍一子。天若受金。行及此矣。斌庫屋敝衣。再遭禍。怡怡若分然。崔銑曰。正德中。前則劉瑾慘行其毒。中則張永巧蓋其惡。終則張忠張雄錢甯江彬肆其愚暴。士靡靡矣。全臣節者。大學士劉忠。尙書傅珪及斌三人而已。

劉璽字廷守。南京龍驤衛人。博雅閑將略。襲世職。以才能選。遷撥船廠把總。以清慎勤蒞之。無不肅然。南兵尙書喬宇薦陞南京旗手等衛把總運糧。值武宗時。江彬用事。以勢迫璽。索運船之利。瀕死。不從。臺諫薦守備浙江溫州等處地方。清宿弊。訪民瘼。郡人大悅。兩越月。總督漕運都御史陶琰特奏。溫處一隅。漕運重務。必得璽乃可。拯江西之弊。陞都指揮僉事。江西都司把總運糧。溫處之人乞留。不獲。乃勒石建亭。江西總運。自宸濠之亂。歲兌者越歲不克完。璽盡心區畫。本總自是獨盛。科道撫按交章薦列。推掌江西都指揮使司事。時巡撫都御史盛應期知璽公明。每屬以疑獄。多所平反。璽乃請依期給糧。以卹軍士。清

衙門宿弊。以杜奸宄。革吏民入司之公罰。除衛所冊文之扛解。請廢府之餘材。以立官衙。出城濠之租稅。以歸公府。善政美意。不一而足。時祿入薄。自處有寒士所不堪者。於是科道督撫。按薦疏交馳。士林有青
菜劉及劉窮之號。朝廷亦知之。王守仁以總制經江西。一見卽重之。奏爲副總兵。命未下。而守仁卒。尋充
參將。協同漕運。兼守淮安銓注錦衣衛。凡條議漕糧疏。皆允行。尋陞署都督僉事。掛印充總兵官。提督漕
運。鎮守淮安。奏增餘丁月糧。以均勞逸。定考課。裨軍政。明漕規。以一衆心。疏濬江南河道。以濟糧運。折兌
山縣糧米。以免稽遲。凡三十餘疏。後皆守爲漕政良規。復患淮揚河道淤淺。奏起四府丁夫開濬。功成。詔
賜白金綵幣。具疏乞休。合屬狀留。如去溫時。撫按以聞。不許。再疏乞休。改僉南京前府事。尋改僉後軍都
督府事。歲餘。又乞休。不許。尋充總兵官。提督漕運。鎮守淮安。再蒞淮安。於勢要愈不假借。又屢疏乞休。得
歸。行李蕭然。書數卷而已。丁未詔復起。已寢疾。未幾卒。璽平生志意恬退。漕例總兵三年當晉級。賜玉帶。
兵尙書張瓚。毛伯溫先後欲爲之請。皆力辭。少事父疾。極盡勞瘁。遭喪哀毀。至嘔血。弟早喪。撫其遺孤。愛
踰己子。官雖廉。歲時必捐俸。以周親黨。至於卻舊屬之金。於暮夜之間。還亡友之寄。於十年之後。可謂盛
德矣。且問學該洽。議論識見。出人意表。外嚴毅而內沈靜。人不敢干以私。平生無他嗜好。不置侍妾。雖燕
居衣冠端坐。無惰容。有奏議數十卷。

史官曰。夫人之可傳。不必聖哲。卽一節著稱。已有過人者。李震免註誣。出羅網。必其行軍之際。有五事之
仁。七德之安和也。王信獎拔異材。爲韜鈴之所難。牟斌典獄存大體。不爲婬媚。蓋君子之流歟。劉璽功在

明書 卷一百四十

漕儲。關國命脈。厚德公心。超絕流輩。洵可傳矣。君子是以取其節也。

二八〇二

明書卷一百四十一

列傳七

武臣傳二

楊銳、馬永、梁震傳

楊銳，字進之，徐之蕭縣人。曾祖某。正統間，以功進南京羽林前衛指揮使。父瓚嗣其官，掌小軍營。銳自兒時，有機警，弘治庚申代父官羽林總神機營。正德元年，掌龍江右衛事，衛久稱敝，至是一新。二年，督造漕艘於淮浦，力餘事集。御史中丞總戎每議大事，曰：「非銳不可。」四年，總江西十二衛所儲運，艘艘連屬，比之陣法加嚴，運無後期。凡八年，進署都指揮僉事，奉簡書守備九江安慶諸郡，駐軍皖城，求余闕城守事，曰：「今日當不足憂也。」九江盡獲江賊於蓮花洲，事上聞，銳曰：「江賊何足憂，所虞者豫章耳。」意指甯藩也。又謂九江爲鄱陽上流，不可恃，湖最要害，當以九江中左所一旅置戍於湖口之高嶺，可遠望，有警可即達也。乃繪長江圖，具事標識，凡數本，呈南京機務司馬重臣及臺院司江防者，又請造戰艦若干艘，習水戰於江上，尋與臺院密議兵食，繕皖城，周城中多浚井。十四年六月十四日，宸濠反，卽告變京師，先引軍設鉤距於江側，禁勿泄。二十七日寇至，船二百餘艘抵岸，爲鉤距所破，繼至者以千數，銳坐城上，與衆誓勦逆。

嘗得大功。告知府張文錦。俾發府庫金。懸以示賞。有寇衣緋者。稱凌十先。一登。銳引弓中其首。其子繼登。貫其吭而死。於是懦者皆起。城上建大旗。書勦逆賊以壯士氣。有安慶人僉事潘鵬。持黃紙衣緋。擁騎至城。稱後兵數十萬。能以城降。得不死。銳語鵬曰。汝死已後。尙覩顏爲悖言乎。吾刃至矣。捕鵬家一人。腰斬。棄城下。鵬遁去。寇爲敵樓數仞。向城。有甲冑者出闌楯外。持鉤距大呼。銳發矢中左腋。藥火齊發。頃之樓燬。死者不可計。八日。宸濠船泊南岸。聞不克。大怒。率衆分攻五城。各首舉木爲蔽。甚急。銳裂方布覆紙。裹藥火千數。散投所蔽木上。火發。盡棄走。火光周市不絕。寇無所遁。十二日。寇於北濠。結木爲棧。輿城接。挾兵而進。城中大驚。銳曰。事急矣。乃詭以大將軍火。銳實石被緋。金鼓置城上。向寇兵。望見大潰。潛使一卒從棧道出。燒棧絕。十六日。寇衆解體。且暑甚溽。力憊。夜。斫睡。銳幕善泗者數人。於船中。聞斫聲。卽斬首。絕其纜。放之江中。又遣強卒突入岸上。營典礮。城上應之。乘勝捕殺。聲震數里。是夜。宸濠浩歎出涕。舉帆順風而返。奏捷。武宗下璽書褒之。又賜忠勤報國戰守奇功二榜。以旌實授都指揮僉事。充參將。仍守安慶。兼湖廣地方。銳疏舉鄭岳。胡世甯。當大用。蓋鄭嘗爲布政。胡嘗爲副使。以拒濠譴者。濠旣平。十六年。兵部論功。進都督僉事。磨子平爲羽林千戶。疏辭。舉御史楊必進。嘗與謀於未變時者。廷臣多賢之。安慶立生祠以祀。嘉靖元年。僉書左府事。掌神威軍營。未幾。以三關弗靖。移守保定。諸郡。授驃騎將軍。四年。詔還。保定人亦立生祠。生祀之。至京。掌立威營。五年。以母老乞歸。改南京右府。八年。授總兵官。鎮守遼東。掛征虜前將軍印。至鎮。秋。毫無犯。士卒思奮。多著邊功。明年。改漕運總兵官。掛漕運印。兼鎮守淮安。明年。忌者有

言罷歸。又明年以疾卒。銳自立官。足不及權門請託。身歿囊無餘錢。諸子鬻衣爲葬。天下惜之。馬永遷安人。世金吾左衛指揮。好讀左氏春秋及兵法。機警善射。正德中江彬統宣府兵練西內。卽自稱疾篤。不隸彬後。以參將守太平。虜入塞。再創去。充總兵官。治三屯。盡簡諸軍。散遣其老弱。聽其農。市取其傭。倍給諸健武者。健武卒咸奮習武藝益精。當是時漁陽一軍稱獨雄。未幾武宗至喜峯口。馳馬欲出塞。永叩馬諫不可。上注視久之。顧內侍曰。此馬永也。笑而止。宋顏曾把兒孫。結諸虜要官賞。不得輒入塞。永迎擊。再敗之。自是效順保塞。嘉靖初大同軍亂。殺都御史張文錦等。朝議且撫。永力言不可。恐他日九邊效尤。將有河北藩鎮之禍。乃敕永出居庸討賊。以流言而止。永抗疏乞宥大禮言官。上怒奪總兵。寄祿南京。十六年大同軍再亂。召至業已撫。復還南。十七年遼東軍亂。召總兵遼東。十八年軍再亂。以家兵捕斬軍。遂定陞左都督。卒於遼。遼人爲罷市哭。喪過漁陽。漁陽人亦哭罷市。兩鎮皆祠祀。言馬永爲將。善調虜情。先知所從來及衆寡。因勢設伏。以故虜往往失利去。善養士卒。同甘苦。又善爲人。所獎拔列校。多至方鎮云。

梁震。新野人。世榆林衛指揮使。嘉靖七年陞署都指揮僉事。協守寧夏。敢戰先登。進遊擊將軍。益奮勵。士卒練訓。東西援應。有斬寇功。尋進副總兵。延綏以斬寇首功。陞都督。同知十四年總兵鎮守陝西。當是時關中少寇患。大同宣府寇數入塞。殺掠吏民。十五年陞右都督。改總兵。大同自五堡之役。殺巡撫張文錦。參將賈鑑。尋又殺總兵李瑾。鎮巡每甘言煦之。稍不如意。卽反脣瞪目。或飛章訛言。以沮搖撼。震聞命率

家丁五百人馳至雲中。申明約束曰：我毋爾凌，爾毋我叛。王法軍令俱在，我不敢破紀綱。謀國其家丁時，時向鎮兵語曰：爾敢蔑主將者，恃衆耳。兒郎輩無不一當百，五步內恐爾不得用其衆耳。自是鎮兵斂縮。十六年春，震率兵出玉林川，斬寇首一百四十，進左都督。又出黑山門，各斬首八十，敝一子百戶。十八年，震鳩卒，給餉修五堡。軍中不敢譁，每身先之。與同甘苦，五堡竟復。寇不敢近寨，未幾卒。以五堡功，贈太子太保。震沒，五堡亦旋廢。十九年，二十年，俺荅阿卜孩吉囊三入雲中，塞直逾太原，窺平陽。震不死，五堡不再廢。寇亦不敢輒經入，白是鴈門河東雲中上谷殘破。朝廷思震優與，卹典贈太保，諡武壯。震在邊專練家丁，時時出塞劫寇營，寇不敢輒近塞。得寇營馬及財物，盡與諸出塞劫者，以故人皆效死趨利。寇以故益畏之，或謂以出邊起釁者，起釁律有之，謂承平時寇牧獵爲生，不擾我邊，而我邊將撲殺邀功也。乃今寇數深入，駐帳塞上，官堡民堡十去七八，何名起釁？震卒，家丁無所歸，守臣以聞，令入伍。後邊將多得其力。

史官曰：古具將帥之才，而無先幾之見，乏禦猝之智，兵法云：致人而不致於人，果何指歟？明中葉承平久，人鮮壯武，一任韜鈴，輒縮臆，賴天子福，獲殄滅，幸爾楊銳預策甯藩，臨敵制變，卒老山澤，如素儒賢哉。馬永鑿武宗馬，以廷臣之力，爭不得，而永立得之武宗，其氣必有過人者。梁震定亂兵，提勁旅，獲宿寇，五堡之立，稽人成功者數年，是三人者，皆所謂仁智勇無慚者乎？以方之東平，何幸不幸之懸岐也。

沈希儀。其先臨淮人也。廣西馴象衛世指揮使。未弱冠。已能馳馬手搏賊。征永安盜。陷淖中。騰而及於陸。三會前趨之。希儀淚頸以過鏢。飛右足讓刀。顧射鏢者中決頃死。又掣刀。斫刃會於鏢間。斷其頰車。又射其弩酋。竟卻追兵而還。遷都指揮僉事。荔浦賊八千人行剽歸。倉卒部五百人往扼之。蛟龍滑石兩灘。相去數里。希儀曰。滑石灘狹難行。引繩乃濟。雖衆可薄也。蛟龍灘闊。衆成列難圖矣。吾欲奪其關而致之狹。伐岸竹揭岸上。編筏以爲繆。頃刻成。數百旗插之。蛟龍灘。令羸卒數十人守之。以疑賊。賊果趨滑石。且半渡。發伏擊敗之。遷都指揮同知。嘉靖六年。岑猛叛。都御史姚鏞奏行誅。召與計曰。歸順岑璋。猛婦翁也。當助猛。奈何。希儀能素得土官陰事。曰。璋女失寵。而璋心恨猛。貌合耳。是可使擒猛。何謂助乎。鏞復曰。猛乘上流勢。擁兵下。如建瓴。邕梧危矣。奈何。希儀曰。是不足憂。土官大率飽富貴。戀巢穴。所爲叛者懼誅耳。豈有遠志乎。鏞又慮猛且走交南。曰。猛走交。則閉不能歸。彼豈無慮哉。於是分五哨進師。希儀將中哨。當工堯。工堯隘而糧盡。乃潛渡江。詣左哨將乞糧。請并兵攻工堯。左哨以分地爲解。希儀笑曰。兵糧吾自足。試君心耳。還。夜分軍三百人。緣山上。繞出工堯背。而裹餘糧爲稀糜。食士合戰。戰疾力。而所遣軍則立幟。工堯山頂矣。賊大驚。遂入隘。得其積粟食軍。乘勝攻田州。初歸順岑璋。素信希儀。使圖猛。則遣兵二千人。陽助猛。精卒千人名護女。實爲間。官軍得工堯。則先驚工堯。破。猛出走。則擁入歸順。左哨將知之。壓歸順境。索猛。歸順斬他囚首以獻。而先一日。希儀已獻猛。賊臬軍門矣。鏞議設流官。希儀曰。思恩設流官。反側至今。兩賊行合從。且復起。不見聽。而田州果叛。後竟復土官。田州乃平。擢右江參將。右江故治柳州。柳在萬

山中城外五里卽賊巢。軍民至無地可田。而城中兵弱不足任。前守劉璉殪於賊。希儀至。鼓士氣。破賊。訶者耳目徧官府。卽聞闔中稍動色。賊在谿洞數百里外。輒知。希儀至。顧令熟貉恣出入嬉遊城中。而求得與貉通商販者數十人。撫厚之。使爲詞。於是賊動靜聲息。顧往往爲我所先得。所賜勦風雨來去。每出勦卽肘腋親近不得聞。至期鳴號。則諸軍立集聽令。曰。出某門。旗頭卽引諸軍買貨行。問旗頭。旗頭自不知。頃之。劉營賊衆至。戰方合。而伏又左右起。賊大敗去。已賊寇他所。官軍又已先在。雖絕遠村聚。賊度官軍所不至者。寇之軍又未嘗不在。賊驚以爲神。卽官軍亦不知希儀何自得之也。所賜勦必其劇巢。縛管繩爲記。無妄殺。於劇賊巢得婦女牛畜果。鄰巢者悉還之。惟陰助賊者。還軍立勦。曰。若奈何陰助賊戰。或刀弩而門矚者。曰。罰若牛五。若奈何刀弩矚我師。於是賊讐服。無敢陰助賊及門矚者。嘗欲勦一巢。乃佯臥病。所部入問病。謝不見。明日又問。希儀起曰。吾病思鳥獸肉。若輩能從我獵乎。卽起出獵。去賊一二里而止營。軍中乃知非獵也。最後計擒其尤黠猾善戰者。支解之。四懸城門。見者股慄。嘗以甚雨悽風。天冥冥夜。察諸賊所止宿。散遣人齎火若砲衣。毳帽與草同色。潛巢賊中。夜礮舉。賊大駭。曰。老沈來矣。挈妻子蒲伏山頂。兒啼女咷。往往寒凍死。或觸崖石死。妻子相怨。汝做賊何利至此。明詞之則寂無人。所散遣出他巢者亦然。他巢大驚。已相聞。愈益驚。陰詞之則老沈固在。參府不出也。自此賊膽落。或易面爲熟貉。而柳城旁一童子牽牛行深山。無敢訶者矣。後熟貉旣服其威信。調征他巢。雖懼讐不敢不往。甚而大雨。徭懼失期。汨溪水以應。要有溺死者。論者以爲自廣西爲將。韓觀山雲之倫。能使貉不爲賊。比希儀則能使貉

人攻賊。前此未有也。思恩奏設流官。而州數反側不靖。已聞濬有子曰金。在鎮安。益洵。會楊留者在賓州。乃辭去。曰。留小主人在。請往。希儀時方憂思恩。聞留言。則大駭。以金去賓州近。而留應之。且爲賓州憂。賓州危。則廣右之咽喉立梗矣。乃婉色好語。謂留曰。是岑濬第九子耶。我往往田時。固問之。因作自語狀。曰。岑氏其復乎。欲以深動留。已呼留入密室。要賂。即得賂。行爲金復官。留乃大信。且出。復呼入曰。韋貴徐五。今分將思恩。必讐金。善防之。於是金果將五千人。因留以見。門者懼。走報請無納。希儀罵曰。金本土官子。非賊。奈何不納。則引入厚結之。又引以詣兵備。隨盡散其五千人。卒復金。而思恩復甯。當是時。非深計。賓州幾失。希儀在柳度。十三年。移潯。後總兵貴州。會北虜入犯。詔屯宣大。未幾。署都督。總兵江淮。已復調廣西。貴州在江淮。饑販之警。幾絕。然天雨。輒苦創痛。數在告。已還廣西。瓊南五指山。熟黎。本馴順。畏知州。邵濬者。黷貨。虐使之。而黎叛。兵八年不休。希儀言於督府曰。法家斷獄。必分首從。今諸相煽。從逆者如虎。投奔。勢不得釋。他諸夷疑。而勦之。則傷亡。撫而勦之。則墮信。莫若獨搗其首惡。首惡平。諸異志者。褫魄矣。是公以生賜萬州也。都御史歐陽必進聽之。而黎平。進都督同知。賜金幣。改貴州。入銅平。巢甚奇。然秘不告人。人亦莫知也。希儀膽勇。機警。善撫諸人爲耳目。賞不失頃刻。嘗染危病。所部卒。至自戒於神前。以齋穿手刺股。痛毒諸體者。皆徧。最後者一人。至以箭穿喉。其得士如此。唐順之。言當世名將。識希儀及馬永。永魁瓌長偉。見人頰首下視。寡言笑。希儀短小精悍。目炯炯。燭人議論。磊落激發。皆所謂偉男子也。俞大猷。其先鳳陽人。世爲泉百戶。髫齡時。輒倜儻。以豪傑自命。家酷貧。日不能再爨。顧誦讀不輟。銳意文

事父卒。襲官學騎射。輒命中。從李良欽學擊劍。盡其術。益悟常山蛇勢。以爲兵法數起五。猶一身五體。雖將百萬之兵。固可使合爲一人也。嘉靖中。登會舉高第。以千戶守金門。上書部使者言兵部使者呵辱之。奪官。大猷笑曰。此豈吾自見地耶。遂盡鬻其家。遊京師。以書干尙書毛伯溫。侍郎翟鑾。鑾得書驚歎。禮之。驚一軍。然終不盡用。尋守汀漳。遷廣東都司。會安南叛。人入欽廉爲寇。諸司議募陸兵。大猷曰。賊由海來。獨當以海舟破之。若專備於陸。賊舍此擊彼。我不勝其備。賊不勝其擊。彼逸我勞。非計也。乃集海舟以擊之。連破之。永安萬甯。而安南函賊首以獻。倭難作。大猷以南直隸副總兵。戰賊平望。王江涇。六金壩。皆連捷。而提督尙書張經。以視師。趙文華言論死。大猷坐落職。奪祖官。於是東南之禍日亟。復浙直鎮守。而大猷言。防江必先防海。水兵急於陸兵。蓋倭奴長陸戰。令樓船高大。集萬銳其上。倭船遇之。輒摧壓焦爛。固我兵所長也。善戰者毋以短擊長。而以長制短。且海無他法。在知風候。齊號令。以大舟勝小。以多勝寡耳。於是用舟師戰。而舟山積歲不除之賊。皆勦盡。汪直者。徽人也。以亡命入海。據烈港。旬倭夷貿易。爲逋逃主。天子以連歲倭變劇。皆直。故必得之。至勤精禮。責總督胡宗憲。令必得自效。大猷言。直在海島。能以繕物誘倭來。在彼國。則一逋逃夫耳。倭之來不來。非關直。誅不誅也。苔誘之來而殺之。則失信。且何以示後。盡請諸宗憲不聽。誘以來。天子聞得直。則大喜。詔殺直。於是宗憲恚失信。怏怏曰。吾爲余帥笑矣。而羣聞殺直。焚舟殊死戰。大創。入掠閩。宗憲懼。乃奏言。大猷違節制。不窮追。以爲解。於是逮大猷。詔獄。謫戍邊。饒平民張璉。反號張流官。陷江閩諸州縣。詔諸道合師二十萬討之。而大猷遷南贛將。時胡宗憲已奉詔兼

督江廣矣。聞璉出行剽。下檄言棄巢出。此自投死。其速擊。大猷前以違節制見劾。幾得罪。欲言恐禍及。不言恐敗事。已乃曰。吾豈以一身之禍忘國事哉。乃具言璉雖離出劫。其妻子財寶乃在巢。若我以大軍迫其巢。彼必聚衆自救。譬之虎方逐鹿。能據穴而搏其子。虎安得不置鹿而還。還而蹙之。如拉朽矣。且三省會擊有期。又豈可以數萬之師。從一夫團走哉。於是引兵萬五千人。疾走柏嵩嶺。瞰璉巢。賊果歸保巢。而大猷出擊。俘斬者千餘。於是潛使說璉黨執璉。已爲兩廣帥所奪。或請訟之。大猷曰。賊惡其不滅。豈必在已。翌日班師。不殺一人。以示信。陞副總兵。賜璽書。加節鉞。命控制江湖閩廣四道兵。加祖官一級。會倭陷興化。大猷自贛晝夜馳赴之。駐秀山。都督劉顯駐明山。而都督戚繼光提浙江兵未至。上怒宗憲失泉。虛責戰急。而閩士夫又洶洶急功。大猷念賊且萬人。能戰入死地。官軍數僅相當。若迫城而攻之。彼實我虛。彼飽我饑。彼逸我勞。一挫而東南之事去矣。不若列營以困之。彼欲攻柵以遁。則彼虛我實。彼勞我逸。彼饑我飽。而我師犄角取之。可使子無遺。且速戰勝亦可遁。負亦可遁。此賊之利也。遲戰則我兵日多。守益固而賊日益困。敵以戰爲守。我以守爲攻。於是星布兵營。畫地鑿溝。令東西通而列柵其上。賊挑戰不動。閩士夫訟其詬病之。已竟殲賊。諸將各加秩。而大猷止賜金幣。蓋閩士夫業以爲流言。聞之朝矣。倭三萬寇潮洲。與盜吳平相犄角。爲廣患。詔移鎮湖廣。羣盜憚大猷名。競出降。吳平雖不能堅決。然亦詭殺倭自效。遂於倭人絕。於是大猷請於總督都御史吳桂芳曰。倭寇以出邊爲生路。山賊以歸巢爲生路。今潮兵驅賊入益深。益深則益以鬪耳。是死路也。當大集精兵十圍五攻。無使片甲得還。如兵力單。豈不勝又

散之令得遁去。則邊曠日久。爲勞費無已也。於是將漳兵二萬以來。果破平。而御史以招吳平爲大猷負。坐免官。吳桂芳爲抗言於朝。乃得留。二源山袤千里。賊據洞如蜂房。水窩介三郡六縣之間。而雲溪尤固。大猷曰。此當誘而聚之者也。遣王鸞者。盛驕從。充裨將爲死間。賊得鸞自安。而大猷日發兵擊。旁諸巢之。未下者以取之。諸巢果畢聚雲溪。以緩討。乃陽言誅李明。過雲溪。巢賊出牛酒犒兵。須臾兵悉集。擊破之。於是賞先登。酬死間。而東峒遂平。桂芳上其功。大猷爲將。事必先周慮萬全。旣事。往往爲善。後長久之畫。爲人易簡。無町畦。而有容善忍。以忠厚自任。重然諾。功則稱人。罪則稱己。參將楊克寬罪抵死。大猷力爲當道言。克寬忠勇慣戰。請保任。不效。甘同罪。詔獄時。妻子寄食甚窘。百戶鄧成亦就逮。適有遺數百金者。立與之。諸推轂。楊弘舉會清之倫。皆大聲疾呼。期必用。後皆爲名將。禮布衣士爲上賓。平生澁官誓衆。陳師鞠旅。一決於理。雖支干孤虛。雲物氛祲。堪輿奇遁。兵家以爲務者。未嘗一訊焉。侍郎譚綸與書。言綸近對人言。節制精明。公不如綸。信賞必罰。公不如戚。精悍馳騁。公不如劉。然此謂小知。誠如霍子孟。任如諸葛亮。大如郭子儀。忠如文文山。毅如于肅愷。可以託孤寄命。則公之大受然也。公精誠當不以老衰。不時變哉。蓋信重如此。而士大夫稱平閩浙功最者。往往但推戚繼光。

史官曰。唐順之之論沈希儀譚綸之遺命。大猷書。不沒其所長。不諱其所短。夫是二將者。平生功業烜赫。故宜侯。皆弗侯。其功卒不可沒。競功者多殺戮。傾人以爲勝。絕類以爲雄。而二將存心仁厚。於戰伐之際。率多生全。古善用兵者。往往凶終。而二人者。庶其爲君子歟。

萬表、戚景通、戚繼光傳

萬表字民望，別號鹿園居士，寧波人。表生有異相，玉色方頤，額有三文，丰神炯炯，慷慨多大節，相者奇之。曰：異日當名高天下。讀書一日數行，年十七襲衛指揮僉事，志在譎起，不事家人業，晝習騎射，夜燒燭讀書，揭孔明甯靜澹泊四言座右。曰：大丈夫經營天下，如武侯然，何能頰首作求田問舍計乎？嘉靖庚辰武舉中式，石瑄閱表卷以爲奇，置第一，衆以所對多忤時語，抑之，尋授都指揮，督全浙糧運，督視浙江閩篆，南都坐營錦衣，已爲漕運參將者二，漕鎮總兵掛印者二，及南京中軍都督府都督僉事，皆以宿望爲當軸所推轂。表歷漕既久，國計絀贏，河溝通塞，祖制及時弊，當復當釐，靡不明習。嘉靖庚子，二洪水涸，漕舟並阻，議者謂黃河改流，表著論折之，力言黃河惟用洸汶沂泗諸泉足以濟，正統十二年黃河決，滎陽入漕河，潰沙灣入海。景泰四年，都御史徐有貞塞之，乃分流自蘭陽東至徐入漕，必疏濬而黃河始來，稍與清合。至正德六年黃河盛來，衝決，方黃河來衝時，清河狹淺，水固易盈，沿河設淺鋪，每年轉運無滯也。今二洪舊隄，宛然可見，但向者黃河漫漫，一旦水落石出，清河淺涸，人心乍見，不能無異，然實其故河也。蓋自洪達濟，自會通至衛河，一路隄防，原備河衝入爲漕害，今二洪以下，反用黃河之水而忘其故，及水不來，至疏濬以引之，此所謂以病爲藥也。渦河在淮之南，商船皆自淮入渦，至祥符銅瓦箱，以達陽武，去衛河六七十里，議者欲鑿而通之，直至白河，則會通河可罷。公議會通河之塞，自甯濟至臨清，計三百八十里，尙書宋禮發山東丁夫十五萬，鑿河建閘，爲費不貲，以彼棄七十里之易，而事三百八十里之難。

此無異故。蓋鑿而通之。則黃衛二水合。二水合則衝決非常。孰能障之。此會通河之運。誠永利不可易也。若以衛輝置倉。歲以鳳陽諸衛之卒。部鳳陽諸郡之糧。令由渦河達陽武。歷七十里。輸於衛輝。其勢甚易。如昔山東流賊之變。運道中梗。又可爲備變一策。海運雖極險遠。第浙中海船。於遠番皆能通之。松江與太倉。通州有沙船。嘗由海至山東蓬萊貿易。云離天津不遠。若以松江太倉近海。歲糧至與雇直。量運三四萬石。使海道漸諳。爲事變之備。又一策也。太倉則例。每糧一石耗七升。至概運若輕齎之。羨以還軍卒。故卒有餘力。運無愆期。後官悉收之。腴削四出。民不聊生。表憤然曰。此其患不獨在窮軍。而且移之國計矣。大者疏。小者議。累累百千萬言。且極陳本折通融。爲國長利。而又欲開河北山東圻內一帶荒田。重農薄賦。爲漸減歲漕之地。識者趨之。歲甲寅海上倭亂起。表散家財。募死士。奮欲往擊。會以都督僉事南京中府道經姑蘇。與倭遇樓門楊涇橋。表率所募及少林僧。躬帽矢石。挫賊鋒。身中流矢。不爲止。遺書與子曰。我家世以戰功死王事。乃我獨持文墨議論。身不任兵。今晚年增一箭痕。不亦美乎。時賊據七團八團爲巢。我軍數戰不利。表謂巡撫都御史周疏曰。賊據內地久。近賊處民不得力田。逋負日多。催科敦迫。相率而去。爲賊。是驅之以助其勢也。宜亟請蠲積逋。懸賞格。使就中作計。以攜其黨。兼下募兵。則人人樂歸。如得士千。卽賊滅千也。以較用他兵。孰利。議行。歸者寢衆。賊寢衰。乃進兵。賊懼夜遁。殲之海上。焚餘糧若干。內地稍甦。因作海寇議。所爲籌畫甚具。賊方蜂屯諸島。而欽王直者。以驍勇魁其曹。表策其疏。敵可誘而縛也。薦鄞人蔣洲。張惟遠。使爲間。兩人雅善直。其家坐通逮。約獲直以贖。且以上賞許之。日強晤當。

路前未及行而表卒。後胡宗憲卒遣洲使豐後山口諸島渠魁立致東南晏然。一時謂爲奇功。不知皆表本謀也。表策夷情洞如指掌而論北狄尤人所未發。嘗曰古夷狄侵中國未有中國人不爲之用而能突入者。夫華夷異俗居處寢食絕不相同。豈甘心棄衣冠爲犬羊役哉。不得已也。比年虜入太原殺掠慘毒上廬九重之憂中外章疏類多擊截之計。所薦用者大都善戰善陣之人而於籌邊固本之道則置而勿論。夫善戰善陣之人急於截殺乃一時救變之事如醫家所謂急治其標者也。每督諸鎮之兵日幸一擊虜以爲功而他暇顧然卒不能禦如病者屢投逐邪發表之劑而邪卒不去元氣不爲其所傷乎。古方制參蘇飲發表逐邪必用人參固本者深有爲也。且諸邊自將權移而邊政日廢矣。自屯田鹽法壞而邊儲日不充矣。邊儲不充而士卒殍死者衆矣。殍死者衆而士心日益離矣。士心日離叛亡日衆。凡叛亡之卒徒皆厚遇之與婦生子給以牛馬孳息土俗漸宜心無變反而後用爲鄉導。故地里之迂近兵力之強弱貨財盈虛人心離固將帥勇懦事勢難易皆得預知之而諸邊饑餒劬瘁之卒聞先叛亡者幸少須臾無死也。輒相繼以亡而不亡者亦無固志是則深可憂耳。夫敵之來也不測而我之禦也無時。諸邊日夕營營以目前爲事何暇爲邦本計乎。此所謂決陂以取魚圖一朝之利者也。先是庚戌寇闖入塞內傳京都表聞之日夜束裝爲行計且曰吾世受國恩今憂及君父豈臣子安臥時耶。尋事定乃已。表少嗜玄學已而闕內典獨契於心關西釋自然者以苦竹鍊磨得悟絕學表與語大悅之自是參究不輟一日披衲入伏牛山曉行見日升忽然大悟嘗言學貴真悟語言真切不離見解又言世論克己淺之乎其論顏子也。

夫視聽言動而溺焉已也。視聽言動而止焉已也。視聽言動而不溺不止焉亦已也。禮者中也。即吾之性也。仁之體也。不可絲毫容易於其間也。是故無思無爲。感而遂通。不識不知。順帝之則。克之至也。一日與達夫論道於臨江。達夫躍然而歸。遺書云。自聞教後。舟中終日忻忻。若出樊籠。見大世界。若入大海。見龍宮藏。舉手動腳。無非道妙。其相契如此。表雖超詣。獨往而諄諄。導人以實行。謂夫子教人文行忠信。至命與仁則罕言。吾曹抗首談性命。而自愧於倫物。得無爲跖者嗤耶。爲文敏給疏暢。直寫胸臆。所著有學庸志略。論語心義。孟子摘義。道經贅言。九沙雜言。玩鹿亭藁。及纂經濟文錄。灼艾集。玩錄亭詩鈔。濟世良方。玄門入道。資糧山中集。諸書行於世。表薄田僅供餽粥。諸爲德於鄉。如建橋賑饑。不可指數。歷官四十年。家無餘財。瓶鉢蕭疏。與野衲偕遊。見者不知其爲名將也。嘉靖丙辰正月。無疾端坐而逝。是夕大星殞於庭。光射數十丈。

戚景通字世顯。定遠人。其先百戶祥。以略地戰死。世襲登州衛指揮僉事。景通長榦修髯。類關壯繆。旣世官。踐東京師。嘗席地讀書。當暑不輟。劉瑾結豪傑爲逆。陰遣人遺席帽。約曰。某日當發難。著此者爲劉景通。且日爲黃冠遁去。將率六郡良家子赴不測。瑾敗乃還。青州賊李琪反。據蒙陰山。副使王良臣分部擊之。弗克。景通微得琪與姦民出入狀。將數十騎往跡琪。夜至。伏姦民舍傍。遂擒琪。頃之。劉賊起河北。橫行山東。景通檄守鄒以七百人往。入告母而遂行。師出平度。道中忽遇賊人曰。賊衆我寡。且成師以出。義不避難。陳以待賊。擊卻。遂入鄒。登陴誓衆。嚴守備。一日率輕騎過孟子莊。賊大至。列陳如前。邀賊遊騎擊殺。

之賊復遁。先後累數十捷。卒保境。嘗六月過戰場。僵屍枕藉。衆皆掩鼻不欲近。景通曰。偉哉國士。名與骨俱香。吾誠得與同遊。九泉無憾矣。爾曹顧病之耶。騎過沮澤中。率先下。得休其餘力。遇賊輒有功。兵罷。以軍政掌印。部使者舉孝廉。陞江南運糧把總。至則祛積弊。卻羨餘。比輸太倉。故有鬻籌之弊。客以告。作色曰。景通自結髮事君。壹勿欺。吾寧受笞責。毋寧自欺。已輸倉不一計。對簿度支。當降級。所部張千戶者。懷贏金三百餽之。景通笑曰。吾以不欺受罪。顧納贏金爲欺耶。事白復官。咸勳以總督備倭。至欲引爲同宗。景通謝曰。先世故姓倪。載在勳府。卽自附。璽書之謂何。卒卻之。陞山東都司僉書。陞大甯都司掌印。河間治河久未底績。屬爲植。不躐月告成。大甯缺僉書一人。部署匈奴內附者。景通言安榮可。榮奉百金爲壽。目攝之曰。吾薦賢故薦君。以此相加。則吾薦非也。榮慚而退。奉詔坐神機營。母閻貞節年老矣。請終養。從之。仍支俸。山東使奉給。景通白首子舍。每上食。率諸子女弄雛前。卽不當母心。蒲伏請受杖。母有疾。夜叩北辰。請身代。居喪毀斑白。始有子曰繼光。繼光棊履過庭。景通大詬曰。童子何知棊履。必錦衣錦衣。必食肉。爾父清白。必不爾壓。爾他日將饜卒伍。以自封。旣知爲外氏所遺。卒列棊。廢弗著。居第垂二百年。始改作。命綺疏四戶。列兩楹。間工請益綺疏十二。景通曰。使吾無得罪於先世。猶聚族於斯。四戶足矣。不然。此且不保。季年畫策備湖。累數百牘。其後趣繼光受職京師。病革。猶問吾所上備湖封事。上納之乎。未耶。垂絕。舍人納齋幣。納中。瞪目曰。我平生不索人錢。冥司必不受我錢。悉出之。乃瞑。子繼光字元敬。幼而裨闔。多權奇。隆準方頤。鬣而鷹揚。英氣勃勃。旣舞象。折節爲儒。以經術著。旣冠。奉父命上勳府。襲世官。待次司。

馬門善相人者目逆之。將軍春秋三十六，秉鉞專征，不五等，則三孤矣。庚戌待試武闈，虜入犯，部列城守。簡材官戍九門，繼光條上便宜，部常其議。山東蒞遣治兵使者，部六郡良家子，春秋入戍，繼光任中軍從務，輯衆心。一軍皆服，使者推轂進，都司尋轉浙江都司僉書。會倭難甚，上練兵議，其略曰：無兵而議戰，亦猶無臂而格于將，乃今烏合者不張，徵調者不戢，吾不知其可也。聞義烏人其氣敵愾，其習懷而自輕，其俗力本無他，宜可鼓舞。及今簡練訓習，一旅可當三軍。督府乃檄繼光亟募三千人，假以節制，則以什伍起於邱，乘兵寓於農，第西北地夷，宜得地利，南而走險，不利竝驅，乃間長短兵，夾振而進。隊二人爲長，偏則伍之，兩則什之，犄角互張，攻距擊刺互用，名鴛鴦陣，居無何，卒服習矣。督府請補浙東參將，分部台州，辛酉島夷入台州，觀旌旗皆辟易，所嚮以全取勝。其年江西告急，督府檄西行，旣捷，露布以聞。軍益振，頃之閩寇張甚，分壘爲三窟，一據橫嶼，一據牛田，其酋長壁莆東南，出沒焚掠，因而塞路，沃野不耕，廣叛兵乘亂出入，眦若無人。繼光以督府命，部兵八千往，自橫嶼趨牛田，俘敵立盡，他夷部繼至，截先登者五之三。其二突圍南奔，窮追絕跡，勒功平遠臺，乃班師。兵尙書趙錦代督府發浙餉，屬繼光幕精兵萬人，閩望援兵如望時雨。兵至，寇相蹂踐而死，屍以澤量。當戰務釋俘囚，獨脅從，首功居多。隆慶初，寇陷石州，東薄昌黎，用廷臣議，召兵尙書譚綸及繼光入策備邊，乃上書備陳七原六失四弊，大較言兵制西北什倍東南，寇馮積威劫邊人，邊人望風而靡，戰前率糜軍費，象外舍兒視寇飽歸，尾而鵬勦，掩老羸爲功，級旣賈而賞有差，刳殯首以當雄飛，彼自以爲得計，借曰當戰，鮮不唾之，且不練何以議兵，無兵何以

議戰。練兵之效。臣嘗試之東南。請簡部將若而人。分出三輔州縣部幕三千丁壯。部將將之。合爲四營。營各五部。每營立一裨將。爲之連衡。總攬折衝。則主將專制。簡練訓習。一如東南。比及三年。堂堂乎可格敵矣。長驅出塞。務令咋指而避穹廬。迨其非時大舉。討賊之師。逐北而虛大漠。然後屯田足餉。罷戍銷兵。坐致富強。則百世之利也。部持可否未決。既譚綸出就督府。命繼光督練。四主將兵。節制視督府。同策者謂太阿之柄。不假武人。第易總理。於時諸主將不用命。視總理猶寓公。無廢宇。無人徒。無供億。督府言不便。狀。則又以總理專任薊門。卽不易銜。而練兵之議寢矣。又言薊富肩簪。幸而任臣。臣無多言。在薊言薊。塞上周垣二千里。一瑕則百豎瑕。比年遞圯遞修。滋費無益。請更版築。諸戍士畫地受。跨牆爲臺。睥睨四達。臺高五丈。虛中爲三層。臺宿百夫。械器餼糧具在。敵至則常陴以守。退則番休。第力絀未能舉。先築千二百座。薊人多木。疆律之軍。正將不堪。請募南中入穀者一軍。以倡勇敢。督府上其議。許之。始募南兵三千。如期至。陳而待命。郊外是日朝雨甚。至於日中。軍容益壯。總干山立。邊將大駭。將軍令固如是乎。卽相要害。程功能。部署臺垣之役。工力籍班軍。則以南兵爲渠長。薪木取諸塞外。其餘則以益樵蘇。繼光巡工。介弟爲植少舍。則課殿最。宴賞。決罰有差。黔皙益以壯麗。獻功。不旬月告成事。是役也。縣官僅發十萬緡經費。考工足當百二十萬。復增募南兵二萬。編伍戍之。議立車營。出戰則以代城郭。車四面結鞞爲方陣。步騎二旅中藏之。遇敵乘陣。火器先薄。五百步外。稍近則步兵出轅下。距敵馬排擊之。敵卻而奔。則縱騎兵乘勝逐北。累師不宿飽。復益輜重營以從。有發則南兵當選鋒入。衛兵筴應。主兵戍守。踐更者任轉輸。

首分數。次形名。次技擊。次步伐。次偵邏。次鄉導。次批擣。次遮擊。次追襲。次俘誠。次首功。軍政畢。張無不以律。比年東西寇謀入犯。西會得薊狀。恐誣。卜不祥。遂謝東湖。款關入貢。部言敵數苦薊。比修內備。不戰而伐。敵謀。卽軍政無所課功。其功上上。薊方不得入。梁益且將求多。總理故以參將入閩。進副將。再論功最。進中軍。署都督同知。充總兵。如薊。擁總理虛名。秩如故。及張居正當國。上遣兵侍郎出行邊。於是大闢薊門。十六萬之師畢至。營伍必整。旌旗火鼓必齊。約束必堅。號令賞罰必信。侍郎躬入諸營。驗諸器械。履諸關隘。登諸臺垣。歷諸亭障。周覽諸閭閻。比還報。悉以狀聞。既畢。使謁居正。上輔兵議。居正則以征伐自天子出。其如主幼。何。既而以修薊功。加少保兼太子太保。階特進。光祿大夫。及居正敗。人言波及。繼光。西裨將起。記室繼光卵翼而就之。乃陰布蜚語京師。頃之而自代。始移鎮南粵。敵入黑峪關。薊人願亟召還。不得請。則勒石頌功德。尸祝之。繼光度嶺南。任疆事。如二鎮。踰年疾作。得謝還登州。歲散千金。徇客急。歸而暴折。卽延醫治病。且無資。卒。先是任子恩皆停。僅襲祖職。得指揮僉事。所著有紀效新書。兵制錄。諸書。史官曰。晉卻縠善讀父書。不善將。君子譏之。余謂正不善讀書者耳。人謂不破萬卷。不足爲儒。余謂不破萬卷。不足爲將。夫爲將必通古今。知往蹟之臧否。究極性命。然後戰必勝。攻必克。卽畫方略。成籌策。皆彬彬可觀。而不知詩書。動中兵法。此又應運之天授。非其恆矣。萬表具玄悟。景通崇謙讓。而明季語將帥具文武資。多推南塘。嗚呼。可以爲儒將矣。



本國學基
叢書明

書

十一

[

MG
2121.6
6/11

書叢本基學國

書

明

(一十)

纂鱗維傳



3 1764 2008 5

行發館書印務商

明書卷一百四十二

列傳八

隱逸傳

史官論曰。夫君子之道。或出或處。或默或語。夫通塞殊方。要歸一致。亦云性分所樂而已。顏氏子操瓢與箪。曾參歌聲出金石。豈必借適魚鳥。放情林草哉。負道而處。充然有以自樂。不以萬物取舍動其心。故形槁而神無惡。終身安焉。而不知外之可慕也。若疵暴以激其餓。熬祿以焚其身。以隱成義。光範足垂。至後世散髮林間。箕踞轟飲。愆禮敗俗。或身江湖而心魏闕。指終南爲仕宦捷徑。此作者所嗤。豈哲人語默之道乎。故曰心隱爲上。身隱次之。茲獨取國初諸人。以其潔身自完。附於賞井丹之義。而所關者鉅矣。至太宗卽位後。忠義之士。多遜荒野。蹤跡詭秘。時露形塵市。間不可究。其人總謂之逸。亦法孔子以夷齊爲逸民意也。故並列是篇。若夫遭世承平。耕漁岸傲。此乃自棄明時者矣。奚足取哉。

嚴明德。吳人。洪武拜左僉都御史。掌院事。以疾求歸。上怒。謫戍南丹。刺字於面。後遇赦還。居於蘇州之樂橋。布衣徒步如齊民。人不知也。宣德末年猶存。有西軍以調征過吳。暴苦民家。亦入明德室中。明德奮手毆之。西軍訟於御史李穎立。逮至官。穎坐堂上。明德詭陳云。老子亦曾在臺。句當公事。夫豈不曉三尺。

而悍若此。是軍暴也。穎問何年在臺。明德曰：老子於洪武時曾爲臺長。今都察院堂榜所稱嚴德明是也。穎大驚。急持起。延入後堂。問舊事。歷歷道之。歎洽竟日。次日往訪。則已先期擔一囊走遠村。徒空居兩三間。無可覓矣。久之復歸樂橋。同鄉御史繆讓。延教授李綺。飲倩明德陪。明德時貧甚。頭戴小帽。已敝。用雜布補綴。綺易之。問曰：老人家犯何法。而面刺四字。明德因述前事。綺大驚。拜請罪。因避下坐。明德曰：先時國法嚴。仕者多不得保首領。余固不食之碩果也。此破帽豈易戴哉。因北面拱手。稱曰：聖恩聖恩。人漸知之。有所餽遺。皆不受。以疾卒。年九十餘。而視聽不衰。人皆服其隱德云。

唐桂芳。字仲實。歙人。少時博涉經史。穎悟絕人。益遊學。廣所聞見。客金陵。以聘主明道書院。再聘司訓于昇。一時名碩皆重之。商榷詩文。莫不心服。後至句容杜叔良家。以薦爲崇安教諭。再爲南雄路學正。未上。居艱。斬黃盜起。挈家避亂。陳友諒留眞軍中。一夕脫去。戊戌太祖下歙。訪問耆儒。僉院鄧愈以朱升姚璉及桂芳薦。召見。上問曰：喪亂以來。民心望治。吾深知對曰：自大軍去後。民獲所歸。又問曰：鄧愈築城怨乎。曰：頗怨。上曰：必愈所爲迫促。以失人心。卽命罷之。又問爾爾博通。必諳成敗。若漢高祖。唐太宗。宋太祖。元世祖。此數君者。一天下。其道何如。對曰：此數君者。皆以不嗜殺人。故能定天下於一。主公聖明神武。兼數君之長。驅除禍亂。未嘗妄殺。出民膏火。措於衽席之上。開創之功。超於前代。然以今日觀之。民雖得所歸。而未遂生息。上是之曰：我積少而費多。所給於民。甚非得已。然皆以爲軍需。無一毫奉已。民之勞苦。恆思所以休養之。曷敢忘。頓首曰：誠如是。民生息可立待矣。上曰：有不便者。盡盡言之。皆拜謝。賜布帛。鄧愈聘

掌儒學事。秋祀三獻未終。知府魏均祥飲福受胙。而悍卒遽攫其肉以出。桂芳惡其瀆法。藝禮立殿階上。朗讀糾劾之文。左右莫不震攝。爲桂芳危。而愈尤加敬焉。遂辭歸。授徒爲終老計。學者稱白雲先生。無何。駙馬都尉王克恭。太守魏均祥。俾攝紫陽書院山長。院有二穹碑。宋理宗賜紫陽書院四字。皆頽墮。桂芳爲堅護之。後疾革。自作贊曰。兩袖清風。千里白雲。蕭然而逝。年七十三。桂芳長身美髯。雙瞳如漆。面如紅玉。氣豪邁。老而彌壯。對客議論風生。莫不傾聽。澹於利欲。與人交洞見肺腑。孝友特至。若居他郡邑。遇父母生辰節令。必刻期而歸。文章以氣爲主。辭嚴理正。詩清新流麗。而聲調格律。鏗鏘瀏亮。有武彞藁白雲集四十卷。

梁寅。字孟敬。新喻人。家貧力學。徧通六經。累舉鄉不第。棄去。遊金陵錢塘間。一時名士多願與交。聘爲集慶路訓導。居二歲辭歸。會兵起。隱居教授。及太祖定天下。訪徵已六十餘矣。時以禮律制誥分三局。寅於禮局討論精審。諸儒皆推服。書成。賜金帛。授以官。以老病辭。許之。結居石門山。四方士多從學。稱爲梁五經。或問曰。吾輩免亂離之禍。享太平之福。何以祝吾君。公舉手加額曰。願吾君恭己九重。存心四海。擴天理而遏人欲。進君子而退小人。愈於華封三祝矣。新昌有士人。負氣自豪。筮仕得巖邑。比行。來謁請教。應曰。清慎勤。乃居官三字符也。子力行之得矣。復何言。士子意未滿。請天德王道之要。微笑曰。言忠信。行敬篤。天德也不傷財。不害民。王道也。其人退語人曰。孟敬議論平平耳。越三年。以不檢罷官歸。慚且歎曰。吾不敢見石門先生。卒年八十二。著有周易參義。詩書演義。周禮考注。春秋考義。及漢唐以來君臣事略。

宋元史節要及石門集於世。

吳海字朝宗號魯齋閩人元末以學行著稱會時大亂遂絕意仕進深自韜匿間與人說經廣詩一時名人如貢師泰輩皆雅重之明初邵使者薦於朝力辭不就關一室於家園隙地日酣經史自娛適因採樵古人孝順節烈及友愛之事附以感應禍福各爲一卷以傳布巷閭令人誦習之名曰本命錄謂克培其本則司命者皆無權也又著書論楊墨佛老爲六經之賊管商申韓爲治道之賊遺事外傳爲史氏之賊支詞蔓說爲文章之賊上之人亟宜取其書禁絕之使天下曉然知正道之當趨歧徑之當塞名曰書禍平居虛心樂讜言或有因事規正者欣然立改因扁其齋曰聞過常慕鄒魯士風淳厚欲徙居不果因以魯齋自號志所願學也爲文嚴整雅奧咸有矩程而一歸諸理有聞過齋集行於世

黎貞字彥晦新會人性坦蕩不羈以酒自放故號陶陶生晚更號秬坡少岐嶷異羣兒七八歲時與弟浴於塘弟溺塘井中雙足猶漾漾未沒貞亟投水以手捉其足登淺處鄉閭異之曰此可持輒破塾者五羊孫賈有美才爲文章立就不以死生榮辱得失介意貞從之遊故學所成就非一時流輩可及發爲詩文滔滔寫自胸中無斧鑿痕議論古今治亂興廢與世運汗隆人物賢否數出己意而多得之自然洪武初以學行聘署新會訓導辭去築釣魚臺於居室前自擬嚴子陵後以事受誣戍遼東者十八年艱危困厄中益肆力學問識趣愈高會赦歸聲聞益著從者甚衆諄諄善誘隨淺深有所造就嘗自贊其像曰江湖勝覽渤海浪游飄飄一葉浩蕩沈浮惟酒是務陶陶忘憂譬彼力穡乃亦有秋不知老之將至樂夫天命

死卽休。年五十九卒。所著穉坡集古今一覽家禮舉要。行於世。初貞在遼。孫賈以事見僂。貞抱持其尸。以衣裹之。殯殮如葬安山之陽。爲文祭之。讀者莫不比淚。自遼歸。適已薄暮。明月滿空。呼舟中餘酒。登所築釣臺吟嘯。人疑以爲僂。久之乃扣門還家。其胸次脫落皆類此。

李詞。字孟言。錢塘人。少受學於楊鐵崖。負氣尙節。善爲詩。賣藥金陵。名其室曰樗亭。而自號爲樗散生。市人病者。趨其門買藥。無不與。所與必善。人人談樗散生。美不置口。或問樗散生。今人莫不願爲材。有寸誇尺。有尺誇尋。惟恐人不知己。才不卽用。旣用又恐不得大任。以爲感。今生乃以樗散自名。樗。不才木也。生豈無才者耶。何其嗜好與人不同也。詞曰。吾計之熟矣。名之美者。吾豈不欲居。然苟無實以稱之。則名祇足爲禍。吾苟自以爲可用。彼將以有用者求我。我或不足如其所求。則爲妄人矣。吾今自以爲樗。彼亦從而樗我。不虞我足用。而我足用。固存損於我乎。世之受禍深者。求名太切也。夫名虛器。得之未必有益於身。而與我競者。齟齬然欲奪之。不亦危乎。吾是以安焉。而不敢務乎名也。且吾之食者醫。醫之書有至理。醫之技足公普。吾誠盡吾心焉。疑於心者不敢強施於人。薄於用者不敢厚責其報。雖有不中。庶可以無愧矣。我誠肯自負吾才。而享釜庾之祿。豈皆不若乎人。然吏胥操法而迫吾側。民庶持牒而詰吾前。吾心欲平之。而力不暇。欲施吾才。而勢有不能。則吾心之愧無時而釋矣。豈若守一技。居無用之名。以自適哉。於是問者謝之。咸稱樗散生爲知道者。

陶宗儀。字九成。黃巖人。宗儀冲襟粹質。洒然不凡。少舉進士不第。棄去。好古學。無所不窺。出遊浙東西。師

張薰、朱喜、李孝光、杜本間等，肆力文章，其結撰法度過人，尤刻志字學。工舅氏集賢學士趙雍家，家甚貧，抵華亭教授，遇人無夷險，佞直一接以誠，平居寡言笑，至論古今人物，上下數千年，竟日不倦。至正間，浙師秦不華南臺御史，一時文士依以周旋者甚盛，議暑謬獨不往。洪武辛亥詔取天下士，癸丑命守令舉人才，推上皆以病不就，或諂讓之，歎曰：親不逮養，捧檄祇令人悲。況今賢良輩出，草莽之臣，老死太平，幸矣。隙分之榮，其敢覲乎？藝圃一區，果蔬度足，給賓客祭享，餘悉種菊，栽接溉壅，皆身自爲之。間遇勝日，引觴獨酌，歌所自爲詩，撫掌大噱，人莫測也。崎嶇亂離幾二十年，喪葬祭禮，備盡其力，人以孝稱。晚益閉門著書，世所共傳說。鄒一百卷，輟耕錄三十卷，書史會要九卷，四書備遺二卷，弟宗傳，代縣令，宗儒，文選郎中。

王景，關中人，少時牧牛，每竊入學舍，聽諸生讀書，輒默記，漸學問充足，父母亦不知也。少多放言，嘗入終南山，數月不出，採薇蕨食，探古洞深巖，流連不歸，其家尋之，固求歸，乃出。後父卒，遂日侍其母，不出遊，朝夕盡心力，家貧，出教授以養母，每過市中，以白牛駕母車，自被古服冠御，鄉里小兒競遮道訕笑，景亦笑。有欲薦之爲府史者，罵曰：若我者，肯朝夕抱案立庭下，備奴使哉？每居小樓上，客至，僅入報命之登，乃登。部使者行郡，坐馬上求見，拒之去，去不百武，倚樓長嘯，使者聞之，慚，扁舟入吳楚，歷覽名山大川，或遇奇才俠客，談古豪傑事，卽呼酒共飲，慷慨悲吟，人皆異之。北遊燕都，去曰：此中狐兔遊矣，人以爲狂，旣歸家，居種桃數百株，桔苜其間，當天大雪，獨上華嶽最高處，四顧大呼，爲歌響振遠近，景貌豐偉，美鬚鬢，嘗戴

大帽穿良地衣。翩翩而行。兩袂軒翥。譁笑溢市中。著書立說。出人意外。每對人縱天下之務。旁若無人。人目之爲王景略復生也。間發爲繪事。有殊致。每當風月佳時。操觚賦詩千百言。多怪語。人不可解。皆鵬鷲海怒。讀旣毛髮爲聳。客至不爲賓主禮。高論竟日不倦。食至輒食。都不辭謝。洪武中徵聘不起。入山不知所終。

徐舫。字方舟。桐廬人。幼有俠氣。好馳馬試劍。兼攻毬鞠之戲。不屑視拘拘法度士。稍長。幡然悔曰。此豈君子道哉。卽從師受章句。爲進士業。爛然成章。已而又悔曰。是如蠶書蟬出入故紙中。何有終期。人生貴適意。習古歌詩吟咏性情。庶幾少遂其願耳。先是陸多詩人。唐有皇甫湜。方干。徐凝。李頰。施肩吾。宋有高師魯。滕元秀。世號爲睦州詩。舫悉取諷詠。期於超邁。出遊江漢淮浙間。與名士相摩切。詩道益昌。江浙行省參政蘇天爵聞其賢。欲薦之。避去。築室江皋。日苦吟。儵然若與世隔。因自號曰滄江散人。天大雪。乃泛舟釣江中。終日戀戀。見者疑其非世間人。元季兵亂。益韜閉不出。易隱者服。人莫知其蹤跡。庚子夏。太祖聘宋劉葉章諸人於金華。舟泝桐江而西。舫戴黃冠。服白鹿皮裘。青繩縮腰。立於江濱。貌偉神竦。揖劉而笑。且以語侵之。急入舟中。葉章競來謹誼。各取冠服服之。欲載解纜。舫不可。宋原不相識。問於劉得之。故聞其名。亦起鼓譟爲謹酌酒而別。劉妬舫以隱。故自高。數言於太祖。招致之。愈自匿。不可得。卒年六十八。有瑤林江二集。唐詩通考。舫平居喜怒不形於色。罔測涯際。性尙氣義。宛陵羅氏。率五百指來避兵。衣且食之。藥病痊死。居久之勿懈。事平。具巨舟載還家。卒後。宋爲立傳。而題曰詩人滄江徐方舟之墓。子膺亦有

文名。

倪瓚字元鎮。無錫人。父柄勤治生。雄於資。生瓚俊爽。稍長。強學好修。性雅潔。敦行孝弟。輕財。田廬生產。託子弟。各有程度。師事墓昌王仁輔。王老無子。養終其身。見義則爲。於宗族故舊。煦煦有恩。喜周人急。神情朗朗。如秋月之瑩。刮磨豪習。談辯絕人。好客之名。聞於四方。所居清閨閣。幽迥絕塵。藏書甚富。悉手所校定。率多成誦。鼎彝名琴。陳列左右。巧於位置。松桂竹梧之屬。敷紆繚繞。而其外則高木修篁。蔚然深秀。故自號曰雲林。每雨止風收。杖履自隨。逍遙容與。詠歌以娛。望之者。識其爲世外人。客至。輒笑語留連。竟夕平生無他好。惟嗜蓄古法書名畫。持以售者。歸其直。累百金無所靳。雅趣吟興。每發揮於縑素間。蒼勁妍潤。尤得清致。而絕不作人物。謂世可謂無人也。奉幣贊求之者無虛日。張士誠欲釣致之。逃漁舟。以免。避者遇之。微聞飄香。曰。此必倪處士也。跡得之。將縛以獻。以計給逸去。同時有張介福。亦力拒不應聘。人並高之。晚益務恬退。棄散無所積。屏慮釋累。黃冠野服。浮游湖山間。丰采愈高。足跡不涉貴人之門。與世浮沈。恥於銜暴。清而不汙。混迹編氓。沈晦免禍。介特之操。皦然不渝。年既老。益聰明。飲啖步履。不異壯時。氣貌充然。詩尚古雅。理致沖澹。所著有雲林集。洪武甲寅疾卒。年七十四。

王元吉字國祥。金陵人。幼奇偉。喜兵家書。年十四。桀然凌等輩。出其上。歲饑。與兄行糴旁縣。道遇盜。將劫之。兄懼走匿。獨不爲動。徐給罵曰。庸縣官使吾運粟。許遣夫防我。而不至。若豈防夫耶。後有粟車數十輛。可善防之。不使失事。盜以爲然。散去。福壽金陵盜陳也。先潘甲自稱元帥。聲言討賊。索軍食。城下大言。舉

火殺人。守將閉門伏不出。壽問計。對曰。此難與爭鋒。盜有兩元帥。公宜開城門。陳芻粟車。若將饋之者。而陽以好言給之。請一元帥以卒來取。兩人必相讓。則主者當自來。吾以計殺之。而制彼一人。易矣。從其言。潘甲果至。執殺也。先失勢。亦自敗去。絕不以語人。又去而之燕秦齊魯之間。陰察諸藩。知不足與言。復歸太祖。已都金陵。鄉閭子弟多致大官。因歎曰。主在吾鄉不之識。而棲棲求之天下。吾之命薄明矣。多談何爲。因噤不更及世事。隱醫肆中。自給務爲訥樸。事父孝謹。事兄友愛。卒以布衣終。爲人敦夙誼。知好尙當世名士。多喜與交。父喪致贖千餘人。

王顯。字微仲。號溪漁子。元吉從子也。少脫略。不與羣兒嬉遊。輒處其上。什伍部署之。無敢違者。父素長者。禁切使讀書。時時棄去。不肯帖帖諸生間。所業未久。卽過諸生數倍。其師奇之。謝曰。子非吾曹人也。顯亦自雄其才志。嘗往來江淮。結交大俠。論古人功業。遇當其意。徘徊數息。仰天撫體。若有意於從之遊也。與天台林右張穀最善。右亦豪士。善擊劍。多智。長於爲文。穀雄飲。自放於歌詩。二人自皆負高一世。顯在淮上。嘗釣海濱。望見二人。踞坐大笑。二人者知其非庸人也。卽與之語。大驚異。引歸逆旅。出酒相飲。攝衣跣行。起舞爲樂。驢聲撼動。辨難上下古今事。識者知非狂生。或不識。則共矚指笑之。爲真狂。或又疑其爲神仙。人云。遇適意時。鮮衣怒馬。行衆人中。見者爭觀之。否則被汚垢。短衣躡市人後。市人呼之。弗辭也。後盡悔。故所爲。買書鍵戶讀之。好深湛之思。爲文章奇偉伉健。然恥以自名。常曰。漢儒者惟賈生諸葛孔明耳。唐陸贄粗有識。然不足望王道。所貴乎學。將以輔天地所不及。不然。多讀書何爲。聞者以其論高。愈疑之。

終莫能測其爲何如士也。入明不應薦辟，終其身。

陳洞，烏傷人，號竹溪逸民。幼經長誦，百家言、文筆蔚茂，喜馳騁聲聞，意功名可唾手致。忽曰：人生百歲，能幾日暮，所難遂者適意耳。乃戴青霞冠，披白鹿裘，不復與塵事接。所居近大溪，篁竹脩翳然，當月高風靜時，洞輒攜短簫，乘小舫，蕩漾空明中，簫聲挾灑氣爲豪，直入無際，宛轉若龍鳴，鳴簫已，每叩舷而歌，人見之曰：是誠世外人也。欲見且不可得，況狎而近之乎？識者則曰：是有志當世，生非其時，有託而自放也。性喜菊，種之滿園，黃花一開，獨引觴對酌，日入不倦。人或譏其留物，怒曰：舉世無知我，知我惟此花耳。一息自怡，尙可謂滯於物耶？復愛梅，梅初萼，嘗赤腳踏深雪若溫，見輒凝視，或登白鶴山，往數日不出。洞年五十，益恬泊無所繫，間私謂其友曰：吾於世味益孤矣，其友疑其誕，人以其有類於古隱者，相與傳其事。林清，閩人，不仕，變姓名，匿居山寺，會府公檢册寺中，見清詰問，且曰：能詩乎？曰：頗能，卽以册號八音，命次之。清應聲曰：金紫何曾一掛懷，石田茆屋自天開。絲竿釣月江頭往，竹杖挑雲嶺上來。匏實曉收栽藥圃，土花春長讀書臺。革除一點浮雲慮，木筆題詩酒數杯。府公驚羨，遂與爲友。政暇輒攜酒過飲，倡和移日。一日，忽論江濱人物，因曰：如林清者，雄才碩德，惜未見其人。清不覺有感，府公曰：公殆是耶？清曰：若林君安得見之？此民所以有感也。相與盡醉罷。明日，府公物色，無清蹟矣。

陳亮，長樂人，字景明，學無所不窺。明興洪永間，累詔郡縣徵遺逸，或推轂亮，亮曰：昔唐堯在上下，有箕穎，吾投迹明時，遊戲泉石，於志慊矣，不願仕也。作讀陳搏傳詩見志山中爲小樓曰儲玉，購四方名書藏之。

又作草屋曰滄洲。因以自號。與名士王恭高棅爲文酒會。日相過從。暇則汎江。登江投上方蘭若。尋僧問。偈意豁如也。以此自終。詩冲澹。悠然有陶孟之風。

鮑興。鄒平人。故業儒。讀書問學。文名鵲起。元末隨父官浙中。值兵變。避地吳淞。貧困乃棄業。積居展貨。以爲資養。大裕。母王病。左右奉事不懈。母喪。廬墓三年。父亦不娶。其養父先意承志。無所不備。與乘舟遊江湖間。蕭然物外。洪永間。官蹤跡薦徵。遁去。取玄真子漁樵青以自號。曰漁樵王者。見者咸曰。此鮑公子也。其繼張騫而乘槎者耶。後不落人間蹤蹟。徵者無從物色之。乃已。

鄭天和。趙郡人。少磊落不羈。自負豪傑才。恥同於衆。居中。意氣灑然。周貧憐寡。一物價。平出納。欲銷世之貪鄙者。凡遇生物。無大小貴賤。卽鬻而放之。如是者十餘年。人不能測。咸呼曰顛公。天和嘗假人三世田。其價已盡。後其子置。乃召而告曰。而父所鬻田。若未盡而值也。給如之。至其孫置。復告曰。而值也。給如故。晚年每辟火食。日醉醇酒。數勺微醺。輒麻鞋散髮。走道上。暢歌屈原漁父篇。以自況。洪武中以地方薦遺逸。人勸之仕。乃喟然漫答曰。而不見飛廉氏馬乎。其一朱鬣白羸。龍瞳鳳臆。終日不釋轡。卒以熱死。其一垂頭昂尾。駝頸駱膝。踉蹌善蹶。棄諸野。終年而肥。古之達者。固不苟潔以罹患。不避穢以養精也。終身不仕。

楊恆。字本初。諸暨人。風神峻爽。稍事文墨。輒明潔如淵珠。衆諱曰。生賦資絕倫。非積功所可及。競邀爲師。多不應。居白鹿山。戴椹冠。被羊裘。帶經耕煙雨中。暇則傲睨吟弄。人莫能測也。高郵樂鳳來爲州牧。獨造

門拜請爲州學師。力辭。鳳不得已。令閭右子弟。卽其家問道。州政有闕失。必移辭。恆白以利病。裨助恆多。鳳爲謝。再與所殺。其妻以身翼蔽。亦死。爲殮而送之。後數年。侍御右唐鐸出守越。欲薦辟。子辭。性醇篤。無矯僞。事乖名義。峻言斥不少恕。家貧。臨財甚介。山氓誤坐法當死。憫其恫。諸鄉黨活之。氓輟耕牛爲謝。曰。東作方興。非此何以集。俟冬或可耳。至期。民復來請。反覆譬曉之。乃已。州人求連族。持其成。毀委禽。致餼。繼以金幣。笑曰。孰謂君子而可以貨誘耶。悉遣去。人復譁曰。是可以義取者。生尙堅執如此。況其他乎。鄉人因其所居。稱曰白鹿生。與宋濂游。濂復薦之。竟不就。

梁田玉。定海人。官郎中。燕兵入金陵。玉田髡髮爲僧。避去。不知所終。久之。松陽人王詔遊治平寺。觀轉藏。聞藏上嚙。有聲。異之。令人緣藏登絕頂。無所見。見書一卷。載建文時出亡臣僚二十餘人事。紙毀。滄字多斷爛。不可讀。數日稍稍可錄。其可識者。得田玉。郭良。梁中節。梁良用。宋和。郭節。何州。梁良玉。何申。凡九人。人僅數言。詔憐其忠。又得之異。各贊數語。題曰。忠賢奇祕錄。贊良玉曰。行儒名釋。知我者誰。至寶淪沒。久而同輝。

郭梁。不知何許人。與梁中節同行。棄官爲道士去。合贊曰。駕言導引。嘯傲林泉。用以自默。就此龍韜。戈我虞日。重明麗霽。頽波莫挽。仰天以號。白霓晝見。使我心勞。

梁中節。定海人。未詳仕何官。少好讀老子太玄。與郭良棄官。同走出京城。爲道士入山去。有道德經注釋行世。

梁良玉。定海人。仕中書舍人。父子兄弟八人同仕於朝。金川不守。變姓名避去。終不可蹤跡。其梁氏父子兄弟爲舟師。濟建文君逃。投水死者五人。

宋和。郭節。皆中書舍人。變名。挾卜筮書。走異域。賣卜給衣食。後有人識之。輒遁去。何州海州人。不知仕何官。與宋和友善。素以忠義相勗。約棄官去。竟莫識者。

雪菴和尚。不知其姓名。落髮爲僧。西南走重慶。重慶大竹善慶里。山水奇絕。可廬。和尚又走善慶里。里虛中有隱士杜景賢。叩之。未應。題絕句於圖。見志。杜異之。次日造訪。與往來。白龍諸山。山旁有松柏灘。灘水清駛。蘿篁森蔚。和尚欲寺。謀景賢。景賢豪有力。亟爲之。寺成。和尚入居之。听夕誦經。山中人不知書。謂且誦佛經。乃不知其誦易乾卦也。景賢曰。和尚相釋而誦儒。不可。請誦佛經。景賢意。和尚不宜誦儒書。恐有蹤蹟。然又不肯顯言。言則恐和尚走去。以故婉解之。和尚知景賢意。遂誦觀音經。寺因名觀音云。和尚好閱楚辭。時時袖楚辭登小舟。急棹灘中流。朗讀一葉。輒投一葉於水。投已。輒哭。哭已。讀終卷。又復買一部。如此。衆莫測其云何。和尚不戒酒。日注酒一壺。俟客。客至。輒飲。客不至。卽拉樵。枚豎入飲。飲半。醉呼兒童歌曰。我歌爾和。歌竟。瞑焉而寐。和尚頎形秀碩。指柔白。翦剪落筆成章。詞語不甚工密。然意氣渙發。星流電走。紺雲迭出。能感愴人。死之日。其徒問曰。師卽死。宜銘何許人。和尚張目曰。松陽。問其姓名。不答。時在成化初年。踰百歲矣。有雪菴詩集。

河西傭燕兵。破金川。傭被葛衣走。是冬至。金城。行乞市中。金城邊地極寒。傭止衣葛衣。明年過河西。依莊。

浪豪魯家爲備。備久取直。稍稍積買羊裘披之。雖寒必覆以故葛衣。葛亦破縷縷。竟不肯脫。夏或衣暑布。布卽新。故葛衣輒覆其上。人勸之棄去。不答。備錢稍之餘。走市中買牛肉酒。與諸乞兒食飲。備力作倦時。自吟吟或夜哭泣。永樂中有留都官從宋總兵至莊浪。識備。備走南山中。旬月。留都官去。乃還有問留都官備何人者。留都官亦不答。後數年病死。呼主人囑曰。我死。勿殮我棺。幸西北風大起。火我。颺我灰。勿埋我骨。魯家從其言。

補鍋匠。往來四川夔慶間。爲人補鍋。至州邑。不過三日卽去。去或復來。夔慶人有欲學補鍋者。卽教之。不索謝錢。直令負擔從。有後曹學者至。卽遣先學者去。如是數年。夔慶間人皆呼爲老鍋匠。補鍋或與錢布米。不擇。嘗食時與之食。卽不復錢。錢稍稍積。遇風雨寒暑不出。卽出錢買酒飯自飲食。寄宿蕭寺中。忽夔州市中逢馮翁者。二人相顧愕然。已而相持哭。哭已相牽入山巖中。坐語竟日。學補鍋者屏不得聞。二人語語已。又相持哭。且別去。言今永訣。不可復相見。作一詩別。隨裂碎且吞之。一日值三數詩老。酌酒聯句。立於側。怪其語澀而艱。驟然者再。諸老怒曰。汝能詩。卽續吾詩。指韻而應。諸老驚起。延之上坐。請賦詩。彊而後可。問以它事。不答。若病風然。卒晦以死。莫知所終。蜀中峨眉亭。嘗有建文遺臣題詩云。一箇忠臣九族殃。全身遠害亦天常。夷齊死後君臣薄。力爲君王固首陽。

馮翁在夔州。以章句教童子。給衣食。能爲對句及古詩。詩輒自題馬二子。或馬公。或塞馬先生。嘗作詩大書壁間。比見補鍋匠。歸卽剗去。時蓋永樂甲申乙酉間。未幾辭主人去。莫知所終。

東湖樵夫。樵浙東臨海東湖上。日負柴入市。口不二價。永樂改元。詔至臨海。鄉中人相率走縣庭聽詔。或歸語樵夫曰。新皇帝登極。樵夫愕曰。皇帝安在。或曰。燒宮自焚矣。樵夫慟哭。遂投湖水死。竟不知何人。樂清樵夫。每自山採柴歸。聞太宗卽位。殺方孝孺等。籲天號哭曰。國旣就篡。我不願爲其氓。遂棄柴投港。橋下水死。官聞之。爲之殮葬。題曰樵夫墓。

耶溪樵人。未詳所自。永樂時樵會稽之耶溪上。日鬻薪二束。足則食。已食。已晝。詩於溪沙。晝已輒亂其沙。人怪之。一日窺其晝。從後抱持。乃得詩云。夢入鸚班覲紫宸。覺來依舊泣孤臣。半生家國惟餘我。萬里江山已屬人。無地可容王蠋死。有薇堪濟伯夷貧。伶仃荷活緣何事。要了焚焚一點真。尋匿去。不知所終。雲門僧。會稽有雲門寺。最幽寂。有老僧。每從一童子。攜茗具筆墨。泛舟而遊。賦詩滿袖。歸則焚之。至死不言所以。

玉華山樵。自號大呆子。性天然。寓東陽縣東山。儀容俊偉。惟披麻戴笠。不服常服。盤桓於山南村落。與之遊飲者。每得其詩畫。詩畫雖未過人。亦不塵俗。將死。囑主人曰。斂吾屍。懸於林木足矣。主人卒葬之。嘗有歌云。七年艱難走閩越。日夜思親鬢成雪。回頭往事付空花。形影相隨衣百結。當時恨不蚤見幾扁舟。一棹江南歸。西風塵土障天起。秋水鱸魚空自肥。卽今寄食荒村裏。佳士出迎常倒屣。當歌對酒忍暫歡。握手論心愧知己。老懷豈能忘故山。神遊往往於其間。爲君寫此轉悽惻。片雲零落何時還。終不知爲何人。常有歌贈王姓者曰。宗兄。人始知其姓王云。

明書卷一百四十三

列傳九

雜傳一

史官論曰。嗚呼。主臣遇合之際。豈非天哉。方劉基釋元侍從。居西湖時。真主尙在埃中也。基指異雲爲金陵天子氣。十年後當輔之。此與留侯識天授。第五決聖主者。尤漠漠幾先矣。易曰。雲從龍。風從虎。聖人作而萬物覩。既曰覩之。豈不從之哉。故王者受命。干城腹心。颺發景集。或取之四塞。或資之敵國。韓鯨不產。豐沛馬耿不必甬陽也。況明太祖得國之正。度越前古。諸臣從之。順天應人。亦不失春秋之義。與夫裴矩忠唐。孟頫背宋者。不可同年而論。吾於諸人何嘗乎。雖然。昔平元捷至。詔羣臣嘗仕元者不許賀。且建余闕李黼祠。贈諡福壽。每歲遣官致祭。而壽子陳翼以州倅擢太僕卿。及坐胡黨特宥之。於履聲囊橐之老臣。則醜之以文天祥。而終竄以死。其風示固深遠矣。因仿歐陽修五代史立雜傳。而采曾仕元者。特紀於斯。以元官之小大爲序。卽無事跡可考。亦存其名。使覽者有以感焉。

陳遇秦從龍

附葉兒
周良卿傳

陳遇字中行。建康人。父辛之。元淮南鹽課提舉。遇資稟純粹。識度超遠。博通經史。尤精先天之學。元末爲

江東明道書院山長。溫州路學教授。兵亂歸建康。扁其室曰靜誠。人因號曰靜誠先生。每夙興焚香叩天。願蚤生聖人救世。太祖渡江。御史秦元之薦其品行才識。以書聘之。曰：予因胡元失馭。海宇瓜分。豪傑與兵共爭疆域。干戈四起。黎庶流亡。天命歸予。提兵東渡。遂取臺城。歷思自古英雄創業。誠難獨理。轅門雖有將士。帷幄惜無軍師。恆塵側度以求賢。庶定太平而開國。比聞先生世居江左。學貫三史。六經博覽。兵書百技。才兼文武。超越等倫。賢哲天生。實我良輔。崇儒重道。今古皆然。湯文會徵伊呂。先主猶聘孔明。予不敢以前代明王自期。先生當以伊呂孔明奮起。儻以生民爲念。須弘恤患之心。應天順人。敷陳遠略。非欲奮爪牙以驥武。其實資文德以安民。助成大業。列爵胙土。以報功德。子孫傳襲。與國終始。豈不偉與。與其發光斂迹以全己。何如濟時行道以成仁。拱俟車塵。起展素蘊。丙申四月八日書。馳入見。與語大悅。稱先生而不名。籌謀帷幄。益見親信。屢幸其第。甲辰。上卽吳王位。賜冠帶。授供奉司丞。不受。戊申。卽皇帝位。遇疏陳治道。以復中國先王禮教爲首務。授翰林學士。不受。賜肩輿。選衛士十人贊其出入。洪武庚戌春。承命往兩浙廉察民隱。還朝密有所陳。賜白金綵段。除中書左丞。復辭。辛亥。召對華蓋殿。賜坐。命草平西詔。賞賚有加。授禮部侍郎兼弘文館大學士。又辭。時西域進黑馬一甚奇。召入觀。引漢故事以諫。上大悅。賜大銀一錠。除太常少卿。又辭。上不許。沈吟良久從之。戊午。復除禮部尚書。固辭。上嘉歎。連稱君子。且曰：士之有志節者。功名不足以介意。其卿之謂乎。朕不強卿。以成卿之名也。自是每燕閒輒召問古今得失。嘗值暑賜歸。時功臣多有過譴。力爲救解。每從寬釋。上嘗諭曰：先生有子。著來帶刀隨侍。朕當重用。對曰：

臣三子皆幼。俟其讀書成立。以圖報效。上悅。賜對衣兼金。當是時。寵遇之隆。雖公侯卿大夫無與比者。甲子秋病作。太醫省視。尋卒。年七十二。上震悼不已。諭祭。賜葬鍾山祖塋之次。上所賜詩文翰墨甚多。所著述嘗燬於火。故所存無幾。子欽誠俱蚤卒。弟恭字中復。嘗隨遇侍太祖。由鄉貢士至工部尚書。秦從龍字元之。洛陽人。仕元累官和林行省左丞。改江南行臺侍御史。會兵亂。避居鎮江。丙申明兵下金陵。遣大將軍達下鎮江。太祖謂達曰。其地有秦元之者。才器老成。當詢訪致吾欲見之意。達物色得之。時從龍有從孫永爲達部軍。因遣還報。上喜甚。命朱文正。朱文忠以金綺聘之。遂與妻陳偕來。上親至龍江迎入。時上寓王綵帛家。因邀同處朝夕。訪以時政。從龍盡言無隱。既而上卽元故御史臺爲府。居從龍西門外。用爲南臺侍御史。不受。事無大小。悉與諮謀。密書漆板問答。左右皆不知。上稱先生而不名。每歲日上與太子皆有贈遺。或親至其家。與之燕飲。禮遇甚厚。乙巳從子澤死。告還鎮江。上出郊握手送之。是年十二月卒。年七十餘。上聞驚悼。未幾督兵至鎮江。親臨哭之。命有司厚恤其家。同時有葉兌字良仲。甯海人。以經濟自負。尤精天文地理卜筮之學。以布衣獻太平策。一綱三目。中時務。上奇其言。欲留用之。力辭。賜金幣還里。又建康周良卿。素有德行。上入城。以禮延請。詢政事。號曰三老。上咸敬重之。史官曰。傳曰。不在其位。不謀其政。若冥鴻遐舉。刷羽雲霄。弋人其何慕乎。而遇從龍。皆以終身不受官。得保首領於霆擊之下。吁異矣。論者謂其逃死非真。辭爵似過矣。夫以故元遺老。果能逃死。而不膺新組。廁諸公卿之列。此其矜然於志。審時之大者哉。然史稱每佐密議。不知北伐之謀。曾與聞否。此時爲遇與從

龍者亦回首燕雲遠灑金臺之淚否耶。

朱升傳

朱升字允升歙人幼師陳櫟剖擊問難多所發明櫟深器之至正癸未偕趙訪從黃楚望講道明年歸作經書旁注是秋登鄉試丁內艱後四年戊子省授池州學正田歲入富於他學官吏蠹食既至會計出入盡去宿弊以身立教士皆興起秩滿南歸斬黃之兵已至徽矣避兵奔竄往往閉戶著述不輟越五年丁酉大明兵下徽被旨召見上問之對曰高築牆廣積糧緩稱王上嘉其樸遂參密議尋辭歸吳元年丁未徵拜侍講學士知制誥同修國史上親製誥詞有曰眷我同宗之老實爲耆哲之英於開國諸公好得其實無何與學士張極爲直學士特免朝謁優禮之七月領樂舞生入見設雅樂閱視上親擊石磬命升識五音誤以宮音爲徵音上不懌賴能鼎解之得止洪武元年二月上御東閣顧謂升曰近觀周禮有所謂六夢者朕嘗感異夢厥兆維何對曰人之精魄上通於天此陛下受命之兆也軒轅夢游華胥天下大治帝王之興自有天命蓋振古如茲矣三月與修女誠面諭升修齊之本遂受命纂輯二年三月復命撰齋戒文是月請老歸石門居梅花初月樓上親灑宸翰以賜庚戌卒年七十二學者稱爲楓林先生著有易書詩周禮儀禮禮記孝經四書小學旁注及書傳補輯諸書傳解行於世子同爲禮部侍郎

史官曰朱升名審音而失於宮徵其解夢多諛辭所研討者何在第其於六經之旨多所發明誠一代儒宗也以曾仕元故抑之雖然一首宿青氈亦可以恕矣

劉三吾傳

劉三吾字如孫以字行初名崑茶陵人初避兵廣西授靖江教諭遷儒學副提舉明兵下廣西歸茶陵洪武十七年通政使茹瑺薦徵至老矣應對詳慎上喜除左贊善歷陞翰林學士三吾博學通經史文章典麗既入翰林備顧問每預密議懿文太子卒上意在燕王召問三吾對曰皇孫年富世適之子子沒孫承適統禮也卽立燕王置秦晉二王何地。上領之卽日立建文皇帝爲皇太孫十八年三月上命三吾與編古帝王祭祀災祥感應可爲鑒戒者爲存心錄既又命編漢以來災異之應臣下者爲書曰省躬錄云二十三年授晉世子經坐怠慢爲吏部侍郎侯庸劾降國子博士未幾復學士二十六年以壻趙勉爲戶部尙書坐罪乞免官未幾又復學士上厭表箋多諛詞纖巧命三吾及右贊善王俊華撰定頒天下丁丑主會試事被黜落者所訟命覆試三吾囑以卷之最陋者進呈上覽之他摻得其情大怒遂謫戍邊尋死於法三吾爲人慷慨坦蕩不設城府自號坦坦翁

宋訥傳

史官曰元良主器適嗣承祧誠千古不易之經非一時權宜之計愛憎不得而移庸哲不得而亂英雄之主每多惑焉而三吾神鑒炳煥風裁山立一言而太孫正位舊史稱其當大節而不奪有由然矣雖衡文不厭羣望何至竄戮此君臣相保之所以見美於宋祖也噫

宋訥字仲敏滑縣人父崇祿字壽卿元行臺侍御史追封魏郡公贈參知政事諡忠肅訥承家教矩矱自

檢性持重。齒胄館師友切磋。學問該博。元至正癸卯進士。令鹽山。兵亂歸家居。洪武二年。中書省徵儒士十八人。纂修禮樂。訥與焉。事竣不仕歸。五年過元故宮。作詩傷之。十三年授國子助教。橫經發難。擊蒞廓蒙。學者歸向。十五年應制。同諸儒撰敕文十六通。援筆立就。上大稱歎。拜學士。時建太學。上幸學。令爲太學碑文。賞賚。上每觀書。或論用人。必與擬議。皆稱旨。改文淵閣大學士。時年逾七十矣。上親製誥詞。引尙父與周八百爲比。蓋自宋濂詹同而後。惟訥時被召對。旣感知遇。日有補拾。甚見親信。嘗寒附火。燎脇至膚。乃覺。上製文警訥曰。脇者協也。豈爾居內不能協人主至然耶。訥皇恐謝。明年代吳暉爲祭酒。嚴繩準。推恩義。身言並教。寢食學廂。不家宿。一時士皆適用。上猶慮功臣子弟有不服者。以曹公兼領監事。由是貴胄肅然。一日訥病。遣中使諭。卿稟天命之性。發仲尼之誠。施己之幽德。修道教人。所以病不病而速差。以其有神也。又嘗言宋祭酒骨格必壽。命畫工圖像。上問昨公服坐堂上。何以有怒色。對一生獻茶。踣而碎其甌。念臣不才。失於敬。中心自訟。不意爲陛下所知。上喜慰。出畫像示之。以老召其子進士望江。主簿麟侍養。十八年久雨。求直言。獻安邊策曰。今海內旣康。蠻夷奉貢。惟沙漠遠人未遵聲教。若置之不治。則恐歲久必致爲患。邊圉若欲窮追遠擊。又恐六師往還萬里。餽運艱難。士馬疲勞。陛下欲爲萬世之計。要不過謹備禦之策耳。備邊固在乎兵食。足食又在乎屯田。屯田之制。必當法漢。本始年中。匈奴帥十餘萬騎南向。欲爲寇。漢將趙充國乃將四萬騎分屯緣邊九郡。單于聞之引去。夫以四萬騎分屯九郡。而充國統制其間。則當時籌畫區分。概可想見。我朝諸將中。勇知謀略。豈無如充國者。陛下宜選數人。隨其遠

近高下。立法分田。所領衛兵。以充國兵數。斟酌損益。率五百里屯一將。布列沿邊。遠近相望。首尾相應。耕作以時。訓練有法。遇敵則戰。寇去則耕。此長久安邊之策也。又何必勞師萬里。求僥倖之功。以取無用之地哉。上嘉納之。令邊軍皆屯田。著爲令。乙丑戊辰兩科。上親策士。魁選恆在太學。得士居天下三之二。及任亨泰廷對第一。召訥。擢賞。命譚進士題名記。立於監門。學錄金文徵畏其嚴。與同官田子貞等誣訥罪。嗾吏部尙書余燻移文令致仕。訥陸辭。上驚問。知故。皆坐誅。圖形暴罪。敕曰。學較。教育天下英材之所。師者。模範根本。官於學者。君命也。自祭酒而下。分所學之優劣。辨職級之等差。要當起居常道。語出入儀。文徵等不知育才之所。模範之源。君命之重。等差優劣之分。交通吏部。夤緣爲姦。誣祭酒訥受賊。餓死生員。剋落師生廩膳。夫其所教生徒。或大家公侯子弟。父母兄長。欲其成才。幣帛鞍馬。餽物酒葎。厚禮於師。此賢父兄也。彰師之教爲儒者榮。執云賊也。生員有疾。存問飲食。親教之師。當告知典簿。疾甚。告有司。藥餌之不存問。飲食藥餌。或有傷生。親教師當坐。祭酒提綱而已。今以卑誣尊。飾非惑聽。禍人不淺。仍慰訥。復任。二十二年。命譚帝王廟及廣惠祠碑文。明年正月有疾。尙醫來治。二月朔疾甚。其子及屬官懇請歸家。厲聲曰。是何風雲氣少。男女情多。沉在丁社。兩祭齋戒中耶。三日丁酉祭畢。昇歸抵暮。卒。不及家事。年八十八。上悼惜。自製文遣官致祭。又遣行人祭於家。爲治墳塋。故事。文臣四品無給喪費者。給自訥始。又官其次子鄉邑訓導。復祖爲司業。其後辛未。太學生有連舉大魁者。上曰。此宋祭酒訓迪之功也。諸生守官稱職者。多出其門。上每舉爲教國子者。法三十年。以張顯。韓克忠。署祭酒司業事。上因思訥。坐奉天門。諭

太學生曰。宋訥作祭酒。學規嚴肅。秀才循蹈規矩。向學適用。朝廷以故得人。訥善終。朕以禮葬祭。近年老秀才爲祭酒。懷異心。不肯教誨。廢訥學規。年少秀才。則違犯學規。投匿名文。謗師長。自後如是者。首賞銀百兩。犯者。凌遲沒產。正德中。謚文恪。訥家西南三里。卽瓠子堤。父崇祿。構亭曰西隱。訥更築白雲茅屋。所著詩文二十卷。號西隱集。

史官曰。嚴師道尊。古誌之矣。宋訥嚴氣正性。型範克端。以故敷教有方。曲成者衆。太祖崇文重道。經始太學。數臨視而規模闊壯。邁古辟雖。宋訥旣正臬比。有成效而安邊一策。尤徵實用。豈特腐頭巾。徒自白雲茅屋老者哉。及後屢有高等。輒歎曰。宋訥之功。以勵後祭酒。其不以故元鹽山令。視等老臣素。太祖可謂能用其所長哉。第不知於講席上。以節義訓諸生作何語。

劉基傳

劉基。字伯溫。浙青田人。曾祖濠。爲翰林掌書。每陰雨積雪。登高邱。望其聚突無煙者。賑之。宋亡。林融爲宋舉義。元使簿錄融。株連盡其理。濠盛治牛酒。延使者。其家醉之。肘篋私記渠率二百人。而自火其室。使者欲攜簿走。尋之不得。濠伴驚。第以所記二百人上。曰。此燼餘也。衆並得免。祖廷槐。父煊。有智計。通經術。爲遂昌教諭。基少穎脫。讀書七行俱下。年十四。通春秋。徧及五經。工文章。凡天官陰符家言。無不精析。其與講性理於鄭復初。聞濂洛心法。元末舉進士。揭曼碩深愛重之。曰。子魏玄成流也。而英特過之。濟時器也。在燕市。得天文書一冊。閱之。翌日。卽背誦如流。其人驚以歸之。笑曰。書在腹中矣。授高安丞。進賢有老人。

鄧祥甫者善天文。一見驚曰：公聰明絕世，器質宏深，當爲一代偉人。盡出秘書，相授在官，權抑豪貴，人多怨之。嘗反新昌故獄，檢官以罪去。陳謀中傷，行中書省移基入幕府避之。與其長抗議不合，投劾去。尋補浙江儒學副提舉。充考試官，上言御史失職數事，授臺掾。歸乃與魯道元、宇文公諒日縱酒游西湖。一日有異雲起西北，二人以爲慶雲，將賦詩。基大言曰：天子氣也。應在金陵。十年後英主出其下。我當輔之。衆駭散。獨門人沈與原其飲。沈醉乃別。西蜀趙天澤尤奇之，以爲諸葛孔明之流。天上方有事，幸自愛，勿落小盜手。方國珍反海上，省憲辟爲元帥府都事。築慶元諸城逼之。時左丞帖里帖木兒議撫基，持不可曰：國珍首亂，赦之無以懲後。左丞稱善，進行省都事聞之，朝而國珍使人浮海至京，賄用事者許國珍官。聽其降。坐基擅持威福，奪職。羈館紹興，并罷左丞。基欲自殺，門人持之而免。乃放浪紹興諸山水，游必有記。多爲詩歌自適。而國珍遂不可制。山盜蜂起，行省復以都事辟治兵，且撫且討。寇悉平。而是時石抹宜孫爲樞密院判，負義。榦基與之相犄角，軍聲甚振。自樞密經歷遷行省郎中，方上功，經略使李鳳谷、右方氏僅以故儒學資遷總管府判，奪其兵權。卽棄官歸。集鄉黨自保。衆避國珍者多，依以居。著郁離子十八篇。其醜物託類，皆悲生民之塗炭，歎國法之弁髦。庶幾藏器以遇真主，其辭甚多。其意一也。郁者，文也。離者，明也。客或說以句踐事業。基笑曰：生平惡國珍，士城輩所爲，今乃效尤可乎！天命行有屬，其姑待之時。太祖已下金華，定括蒼。基置酒延客，指乾象示曰：此豈人力也耶？會上使孫炎來聘，乃語其衆弟陞曰：善保境，勿爲方氏窺。遂與宋濂、章益、葉琛間道走金陵。旣見上，陳時務十八事。盛言明公因天下之亂，崛起草

昧間。尺土一民無所馮藉。名號甚光明。行事甚順應。此王師也。我有兩敵。陳友諒居西。張士誠居東。友諒包饒信。跨荆襄。幾天下半。而士誠僅有邊海地。南不過會稽。北不過淮陽。首鼠竄伏。陰欲背元。陽則附之。此守虜耳。無能爲也。友諒劫君而脅其下。下皆疲位乖。則不驩。民疲則不傳。故漢易取也。夫攬獸先猛。擒賊先強。今日之計。莫若先伐漢。漢地廣大。得漢。天下之形成矣。上大悅。稱先生而不名。陳友諒傾國入寇。陷太平。將犯龍江。上欲禦之。而衆怛擾甚。有請決一戰者。有以鍾山王氣請奔據者。至有勸納款者。基獨張目視不言。上召入問之。基曰。請賜臣劍。先斬議降及奔者。臣乃言。上曰。事急矣。言而後賜。基曰。友諒恃太平之勝。盛氣東下。我師縮臆。勢已不敵。然明公初有建康。圖國之始。勝則王。敗則賊。柰何使諸將人人持所見。夫驕易敗也。創易懲也。敗驕在我。臣聞天道後舉者勝。王師得人爲本。明公若傾府庫以興士怒。開至誠以固人心。與王大業。在此一舉。且臣聞者望氣。敵衰我旺。決可取也。上曰。善。於是賜基劍。令諸將盡拜基爲軍師。有不服者斬之。諸將悚然。誘與戰。覆其衆盡。時上雖定江東。稱吳國。公猶奉小明王座於中書省。基怒罵曰。彼牧豎耳。奉之何爲。不拜。大陳天命所在。乃止。議伐陳友諒。力贊曰。金星在前。火星在後。往必克。此天意也。遂進攻安慶。拔其水寨。請乘風直擣江州。從之。友諒倉卒戰敗遁去。馮勝攻南康。上使基授方略。書片紙付曰。夜半兵至某所。見某方青雲起。卽設伏。頃有黑雲起者。賊伏也。勿輕動。日中昃而黑雲漸薄。回與青雲接者。賊歸也。銜枚躡其後。擊之可盡擒。勝啓讀之初。亦莫信已。而具如所言。始以爲神。遂破賊。取其城。洪都守將胡廷瑞。使其子約降。要質。請無分軍。上有難色。公從後騎所坐。

胡牀。上悟許之。洪都遂爲明守。友諒不敢越江直下矣。前是基以母喪告歸。上固留。不得行。至是復伸前請。特許而以禮官館伴。轉祭踰等。歸至衢。苗軍叛。殺守將。衢人洵洵。其將夏毅。愛之。迎基入。衆卽帖伏。爲移書諸屬邑。俾固守。已邵平。章兵至。悉誅諸叛將。方治葬。國珍卑辭。以幣來唁。基白之。上使受而答之。因騰書宣上威德。方氏遂入貢獻。上於軍國有所誅。輒馳使以書來叩。署名稱老先生。基事事條答。皆懸中機宜。俄驛召還。道建德。張士誠來寇。李文忠時爲帥。奮欲出戰。止之曰。三日後必走。走而尾擊。可盡擒也。三日。基登城望曰。賊走矣。衆見壁壘旗幟如故。且聞嚴鼓聲。莫敢發。復趣之。至其所。則空壁。留者皆老弱。追薄之東陽。悉獲其衆。還京。會友諒復攻洪都。上率師逆擊。遇彭蠡湖。方大戰。基疾呼揮手曰。難星過。急更舟。遽易舟。返顧。前舟已礮碎矣。相持未決。請移軍湖口。以金木相犯。日剋勝。陳氏遂平。乙巳。置太史監。秩正三品。基領之。上戊辰。大統廡。日中有黑子。奏東南當失一大將。已而參軍胡深伐陳友定。敗沒。上方欲刑人。基入見。亟語之。夢以頭有血而土。傅故欲應之。基曰。頭上血。衆也。傅以土。得衆且得土也。應在三日。上爲停囚待之。果杭州及海甯降。上悅。悉付基縱歸。熒惑守心。羣下皆惴惴。以上且有誅僂。密言宜下書罪已。以回天意。明日上見羣臣自引咎。衆乃安。大旱。上特命基諗滯獄。甫決。而雨隨注。時基最爲上信嚮。言無不聽。中書參政張昺。故元臣。有二心。使人上書頌上功德。請及時娛樂。明得意。上出示基。基質責曰。是欲爲趙高也。昺色動懷忿。乃使其腹心齊翼。巖伺基陰事。未發。昺先坐事。誅。司天告災。翼巖遂飛章論基專擅。顧所行皆取密旨。或有請報可者。上怒詰問。知出張昺。斬之上。卽大位。擢御史中丞。仍領太史。

令諸大典制賞冊拜。皆基與左丞相李善長、學士宋濂計定。時處州七縣糧稅比宋制當加五升。上獨令青田止五合爲額。曰：令鄉里子孫世世頌劉伯溫也。或言有殺運三十年。基慨然曰：使我任其責。掃除弊俗。一二年後。寬政可復。時李丞相貴盛。基獨與抗。善長不能平。而適以事見譴。憲使凌說因彈之。基爲上言。李勛舊且能輯和諸將。上曰：是數欲害汝。汝乃爲之地耶。基頓首曰：計大體安得及私。上乃解。累欲加封。謝曰：陛下乃天授。臣何敢貪天。固辭。上每稱曰：伯溫吾子房也。嘗因卜相。問楊憲何如。公素與憲善。對曰：憲有相才。無相器。夫宰相者。任理爲衡。而不以己與。乃稱憲自用。且不學。未見其可。問汪廣洋曰：此褊淺殆甚於憲。問胡惟庸曰：此債轅破犁犢也。上曰：吾固難之。吾之相無逾先生。基曰：爲巨室者。棟必大。輕易棟而得小者。甯無爲室憂。臣非不自知。第臣疾惡大甚。又不耐繁劇。恐辜陛下恩。其後憲以怙寵。廣洋以輕。惟庸以不遜。皆坐罪。一如所言。上巡汴梁。基與善長居守。請於上。謂宋元以寬縱失國。且今刑亂用重。必使紀綱肅而後患政可施。許之。遂督管宮省。糾舉姦惡。小者捕治。大者啓皇太子施行。中書省都事李彬貪縱事廢。善長以彬省僚。且素暱。請於基。求緩不聽。獄具。馳奏。報可。卽斬之。善長大恨。俟上歸。訴基方盛夏。祈雨。僂人壇壝之下。非所以奉承天意。上持其章不下。而會基以妻喪告歸。得免。尋手書召還。曰：前太史令御史中丞基。世居括蒼。懷先聖道。天下初亂。聞朕親將金華。旋師建業。卽別里閭。捐邱壘。應聘而起。相從羣雄。未定之秋。居則匡輔治道。動則仰觀天象。發縱指示。無往不克。曩者攻皖城。拔九江。撫饒郡。降洪都。取武昌。定處城內變。爾多輔焉。彭蠡口戰。礮聲激裂。若雷臨首。軍士大呼。鬼神號怒。自旦至暮。

口是凡四。爾時在舟。同我患難。今秋告歸。久而未至。朕心缺然。今天下一家。爾當疾來。同盟勳冊。言非備造。實出朕誠。爾遂命駕。良慰朕心。既至。賚賜甚厚。是時上方幸鳳陽。建爲中都。銳出塞滅王保保。基謂中都曼衍。非天子居。王保保雄傑。不可輕忽。進兼弘文館學士。二年大封功臣。先已贈祖父皆永嘉郡公。至是封開國輔運守正文臣。賚善大夫。上護軍誠意伯祿二百四十石。四年正月告歸。八月手書開曰。近西蜀悉平。稱名者盡俘。我之疆宇。不少前王。且元以寬失天下。朕今收平。非猛不可。然小人但喜寬恣。謗罵國家。煽惑是非。卒莫能治。即今天象疊見。天鳴已八載。日中黑子。又見三年。今秋天鳴震動。日中黑子。或二或三。或一日。更有之。更不知災禍自何年月日至。卿深知厯數休咎。討論封來。卿年高靜處。萬山中。必有真樂。使者往回。勿賚以物。茶飯發回。基悉條對而焚其草。又奏謂霜雪之後。必有陽春。今國威已立。宜少濟以寬大。上是之。宣付史官。遣其子璉。上平蜀及甘露頌。上優詔以答。時胡惟庸以右丞相攝左事。憚基每思中傷。基亦自料。兩人不並立。深藏以待。凡天象及時務所宜。必馳書以聞。甌括之間。有隙地曰談洋。南抵閩界。曰三魁。爲鯨盜藪。元末應方兵爲亂。基奏以其地立巡檢司。控扼之。姦民謂地屬溫州。乃民業。非隙地。遂合逃軍廣三逆命。處州宿猾持郡邑事。不以時聞。基使璉上書奏之。不先白中書省。惟庸挾舊事。益怒基。及宿猾逮。至。使訴基欲購談洋地爲墓。不得。則創立司之說。以窘其人。致激變。當坐罪。上不問。復請逮其子璉。又不問。基懼。馳入朝請罪。留京師待。管上曰。基有功。不汝害也。六年。以文廟不陪祭。受胙。奪俸一月。惟庸既益橫。基私憂曰。吾安敢希言驗。即驗如國家何。邑邑得疾。惟庸陽爲修好。八年正月。

朔。挾醫來視疾。飲藥。覺有物積胸中如拳。久之浸劇。上遣使問之。知不能起。三月給驛舟護歸。御製文賜之。略曰。君子絕交。惡言不出。忠臣去國。不潔其名。爾基括蒼之士。少有英名。謁朕陳情。用征四方。天下一統。加以顯爵。垂名後世。敕賜歸老。以盡天年。何圖覺生。致使不安。國有八議。奪祿存名。卿趨朝不辨。釋疑親君。可謂不潔其名者。與惡言不出者。與卿今年邁。居京數載。老病日侵。朕甚念之。可還鄉終天年。稱朕優老之意。四月念六日卒。年六十五。先以生平所習天文秘書封授璉。曰。亟上之。毋令後人習也。又爲一書。勸上以修德省刑。祈天永命。且寬猛若循環然。毋持一端。諸要害地宜宿重兵。與京師形勢相聯絡。授其次子璟曰。惟庸方在事。上之何益。是不久必敗。敗則上思我。其時可密聞也。基剛毅有大節。慷慨敢言。遇天下事。果摯勇壯。不復返顧。受上特知。東西征討。掃平中原。一切皆參密謀。上或召入宮中。或親至基所。屏人語移時乃去。自徐達而外人莫得聞。上天威嚴重。羣臣進對。每戰懼失容。惟基抗言直議。不以利害禍福有所轉移。與人交。開心見誠。遇所不可。義形於色。家居日飲酒奕棋。未嘗自炫。尙儉。好讀書。多行陰德。所著自郁離子十卷外。有覆瓿集二十四卷。寫情集七卷。翠眉公集五卷。皆峻潔嚴勁。爲時宗工。初胡惟庸致毒。上聞而未嘗。嘗問汪廣洋。對以不知。上怒貶逐。十三年惟庸誅。於是深思基言。召見二子。慰諭之。璉既蚤卒。二十三年命子薦復故封誠意伯。誥詞謂其父子俱沒於姦邪。紊政之時。其節不移。故授前爵。加歲祿五百石。世襲。二十五年卒。子法幼。而璟奏基遺疏。拜閣門使。遷谷王右長史。燕兵起。谷王開金川門降。璟獨不屈。法亦停襲。永樂二年。法與璉子貂進。大祖書詔宣德。三年授貂刑部照磨。卒。法子柅。

梟子曇。曇子祿。景泰三年命錄基後。守臣言璉七世孫祿幼。不堪授官。環四世孫文謙可。詔用祿。七年授世襲翰林五經博士。天順二年。敕建祠於青田。成化十八年。敕取基像。祿子憲。末嗣官卒。弘治十三年。給事中吳士偉言。基子孫宜世爵。憲子璉得爲處州衛指揮使。正德九年。賜誥曰。劉基學爲帝師。才稱王佐。孔明之任。豈間人言。敬輿之謀。不負所學。占事考祥。明有徵驗。運籌畫計。動中機宜。渡江策士。無雙。開國文臣第一。受爵能讓。懷辭金蹈海之風。成功不居。從辟穀封留之請。可謂明哲。允矣清貞。贈爾爲太師。諡文成。嘉靖十八年。刑部郎中李瑜言。皇上明聖。斥姚廣孝太廟侑享。臣鄉人劉基。宜侑享高廟。世其封爵。如徐達。上是瑜言。下廷議。皆言太祖收攬賢豪。創造基業。一時佐命功臣。並軌宣翼。而帷幄奇謀。中原大計。每每屬基。故在軍有子房之稱。剖封發孔明之喻。基亡之後。孫薦實嗣。太祖嘗召諭再三。鐵券丹書。誓言世祿。廣嗣爵未幾。旋即隕世。禡圭裳於末裔。存礪帶於空言。或謂後胤孤貧。弗克荷負。或謂長陵紹統。遂至疏嫌。雖一辱塗泥。傳聞多謬。而載書盟府。績效具存。昔者武王興滅。天下歸心。成季無後。爲善何勸。基宜侑享太廟。其九世孫指揮使瑜。宜嗣伯爵。伏惟聖明裁定。制曰。可。乃入祀太廟。廡中列六王之下。尋以爵序瑜。嗣誠意伯。食祿七百石。與世券二十年。瑜卒。子世延嗣。年少氣銳。振武營之變。擁諸大臣至小教場。呼噪。衆皆悸無人色。不能出一語。世延反覆諭以國威。騎頽牆罵曰。汝等反。反即殺我。大軍至。盡殺汝等。衆稍稍懼。乃散而聽命。由是自負。藐諸公卿。喋喋上封事。見格忿而怒。橫革管事。益縱其下。侵奪民田。有詔勒回原籍。驚不肯行。曰。我有鐵券。捶死一人。納一可免。誰難我者。論者蜂起。僞驅自如。顧焰消家。

益貧不能支矣。萬歷丙午下南京刑部獄死。子孔昭嗣。

史官曰。世以劉基多帷幄契。又善天官家言。相率爲瑰怪之說。傳之往往過實。故不錄。其天官家言。誠巧合命中矣。卒上之中秘。世無知者。然必有神秘者焉。大約基之爲人。磊落慷慨。不愛其奇。畢忠竭智。謨謀軍國。誠英偉不羣者矣。古稱豪傑。勇智士。不相用。則角也。夫角何以全。基數仕元。不用罷歸。以歸太祖。是元遣太祖以基。不使角而使用也。嗚呼奇哉。或謂其類張良。其籌策縱橫。殊無遜美。至出處大節。明哲保身。方之遠矣。然百餘年而人主思之。三推德而復故封。隆佑享。抑何篤厚也。功足當之云爾。

明書卷一百四十四

列傳九

雜傳二

宋濂傳

宋濂字景濂號潛溪。先金華人。後遷浦江。父文昭。一名朝。字文憲。性樂易。好禮法。有隱德。子二。長淵。義烏教諭。次卽濂。母陳氏。妊七月而生。六歲授李瀚蒙求。一日而盡。九歲能詩歌。號神童。稍長。里人張繼之。抽架上雜書。以爪逐行。按而試之。按畢。輒誦。受業於聞人夢吉。得春秋三傳之旨。兼通五經。時吳淵穎萊。方內儒宗。金華胡翰出其門。致書招曰。舉子業不足溷濂。曷來同學古文詞乎。欣然從之。未幾。悉得其闡奧。吳辭去。輒代講席。鄉先生柳貫。黃潛深禮重之。歎曰。吾鄉得景濂。斯文不乏矣。莆田陳旅稱其文沈鬱簡嚴。能兼二公之所長。歐陽玄則曰。非才具衆美。識邁千古。安能與於斯。遂以文名擅天下。至正己丑。以布衣薦。爲元翰林國史編修。會世亂。自韜闕。遁入小龍門山。著書二十四篇。曰龍門子凝道記。又著孝經所說周禮集注諸書。劉基稱其主聖經。奴百姓。遊戲佛老。嘗猶飫梁肉而兼茹荼飲茗。彌稱其大。庚子太祖徵入見。問世亂奈何。對曰。願明公不嗜殺人。上悅。語必稱先生。除江南儒學提舉。授世子經。壬寅召講春

秋左氏傳。濂曰。春秋孔子褒善貶惡之書。遵而行之。賞罰適中。天下可定。歸省甲辰。改起居注。上諭黃石公三略。且口釋之。濂曰。尚書典謨。帝王大經大法。靡不畢具。願陛下留意。上曰。知之。但三略乃用兵攻取時務所先耳。又明年以疾還家。賜金帛。太子贈有加上箋謝。書奉太子勸以孝友恭敬。進修德業。上覽大喜。召太子令曰。誦其書。一過。賜書褒答。洪武二年。徵總修元史。除翰林學士。知制誥。兼修國史。時甘露屢降。召賜坐。上執金杓。煉湯於鼎。投露手。厄而賜曰。此和氣所凝。能愈疾。故與卿共之。因問災祥之故。對曰。受命不於其天。於其人。休符不於其祥。於其仁。時大都督文正得罪。濂婉言請全親親之誼。從之。上嘗言古帝王當宴安之餘。多好神仙。朕孜孜政理。國治民安。心神恬逸。卽神仙也。對曰。漢武好神仙而方士至。梁武好佛而異僧集。使移此心以求賢才。天下有不治乎。尋失朝參左官。三年。遷國子司樂。復坐議孔廟禮稽緩。謫安遠知縣。未幾。召爲禮部主事。陞太子贊善大夫。上問帝王宜讀何書。濂請讀真德秀大學衍義。上立取覽。悅之。令大書揭兩廡壁。已。上坐西廡。大臣侍坐。指衍義中司馬遷論黃老事。令講。講畢。復進曰。人主能義理養性。則邪說不能侵。興學教民。則禍亂不能作。刑罰非所先也。上曰。朕上畏天地。下畏兆民。兢兢業業。不敢自逸。濂頓首曰。皇上慎終如始。天下幸甚。陞侍講學士。兼資善大夫。令集歷代姦臣事爲辨姦錄。分賜太子。諸王侍上觀。樓上問三代以上所讀何書。對以載籍未立。不專誦讀。而尚躬行。又命序祖訓。纂大明日厯。七年日厯成。凡一百卷。序進。稱上度越前王者六。一曰。挺生南服。統一華彝。二曰。憫民塗炭。始取之羣雄之手。得國之正。三曰。治政詰戎。羣仰成算。四曰。敬天勤民。五曰。后妃不預政。外戚循

理闍寺給掃除。家法之嚴。六曰大帥佩印。率兵征伐。凱旋。上章歸士。單身還第。兵政有統。復與詹同等輯皇明寶訓上之。其他禮樂律厯之制。勳臣名卿。焯德耀功之文。上並使濂編摩潤色。既侍上久。有問陳說直諒。不務文飾。上喜欲相之。對曰。臣無他長。徒以文墨議論得罪禁林。一旦任事不效。將負陛下頓首力辭。上愈厚之。每燕見。坐賜茶。詢舊章。講治道。甚條析。問廷臣臧否。第言其善者。又問其否者。對曰。善者與臣友。故知之。否者卽有之。臣不知也。命爲詩文。必寓忠告。性深密。不洩禁中語。有奏輒焚藁。嘗大書溫樹二字室中。或問朝廷事。指二字不對。上嘗彊之飲。醉賦楚詞一章。命侍臣各賦醉學士歌。曰。後世知朕君臣同樂也。九年。除翰林學士承旨。知制誥。兼修國史。上曰。朕起布衣爲天子。卿自草萊列侍從。爲開國文臣之首。俾世世與國同休。不亦美乎。徵孫慎爲序班。仲子璫中書舍人。復以年老艱步行。令太子選賜良馬。又爲良馬歌。賜之。許致仕。贈父爲尙書。祖德政。太常少卿。誥詞上皆躬撰。復留之。時有上萬言疏者。上怒其迂衍。羣臣有阿意者。曰。此不敬。罪當誅。濂曰。彼應詔而來。本效忠無他。上復覽疏中。顧有足采者。召罵阿意者曰。若等激吾怒。何異以膏沃火。向非宋學士。幾不誤罪言者。因曰。古人太上爲聖。其次爲賢。若濂事朕十九年。口無毀言。身無飾行。寵辱不驚。始終無異。抑可謂賢矣。十年歸。賜緡綺。太子贈衣三襲。上曰。朕最慎賞。嘉卿忠誠。貫金石。故以賜卿。卿今年幾何。對曰。六十有八。上曰。藏此綺。三十二年作百歲衣。濂頓首謝。辭行。請歲一朝。上曰。江險宜循河行。敕慎侍至家。遣慎表謝曰。生世而逢真主。仕宦而歸故鄉。二者臣兼焉。上召問慎。而翁去。此而誰從。撫兒孫乎。闕生財也。涉田園乎。慎叩對。陛下所問。臣大父事皆

有之上曰雖然尙有他慎對無他第時時聽訪國政儻知一二雖在鄉尙翼實封補陛下萬一上悅賜公歸休之詩是年九月入朝上延問之屢矣至大喜賜敕褒諭命禮部致酒米穀果日進見從遊覽或便殿侍食至暮始退上歎曰純臣哉爾濂方今四夷皆知卿名卿自愛日本使奉敕求文獻百金卻之上問故對曰天朝近臣受小彝金非所崇國體上喜歲盡辭還既行數日上語濂曰朕疇昔之夜夢爾父談笑如曩時濂曰非陛下垂念臣父切至何以形諸夢寐明年再至賜賚慰勞彌厚歸居青蘿山閉門纂述人不見其面嘗曰古人爲學使心正身修措之行事俯仰無愧而已繁辭復說道之蔽也尤篤於倫品與人交和易任真內誠外恕一見信服汲引後學如恐不及平居布衣蔬食無異貧士或勸爲子孫計曰富貴豈一家物哉吾乃所以遺之也視近甚明夜然燈於几臥絺帷中閱蠅頭小書一黍上能作十餘字皆可辨性疏曠賓客不至累日不整冠幘悠然自樂十三年庚申冬孫慎坐法論死濂罪且不測高皇后及太子力救得釋安置茂州十四年辛酉五月行至夔宿野寺有老衲與語多解悟濂曰吾聞內典善惡必以類報吾平生所爲自以無愧何至於是衲曰先生於勝國嘗爲官乎曰編修衲默然是夜自經卒年七十三妻賈先一年卒門人方孝孺曰太史公論道上前授經太子未嘗不言仁義天下既定上方稽古制治凡郊廟山川祠祀律厯禮樂彝裔貢賚諸禮文大政皆太史公裁定太子寬大仁明天下歸心愛戴太史公之功居多海外諸國朝貢接國門至必問太史公安否其爲人取重如此濂墓初在夔永樂十一年孫恪以蜀獻王命遷葬華陽置祀田弘治中四川巡撫邢表賈俊屢以濂爲言令有司於葬所春秋致祭正德

八年謚文憲。二子長瓚先卒。瓚子三人。愼、愷、恂。皆無後。次璣。工書。稱爲國朝義獻。子三人。懌、恪、恪。居華陽。懌字子彝。奉母譎居。思紹父學。勤苦特甚。蜀獻王時。調粟帛。由是得專其學。建文皇帝召懌還。以爲翰林侍書。懌書與劉彥銘、朱思平皆名建文間。而濂門人有聲者。同郡樓璉、浦江鄭楷云。

史官曰。有謂明之學始於濂。蓋猶考亭之傳也。考亭一再傳爲何。王、金、許。濂因許氏門人而究其說。而別錄謂濂一生多流於禪。以其聰明博洽。能根極理性。其所成就。必有過人。舍周鼎而問康匏。大爲濂惜。然亦不必深辯。獨是文章議論。施於朝廷。達於夷夏。眞超拔羣倫者矣。聞老衲一言而悟。卒死於禪。卽不嗜殺人之語。王道也。而極乎禪哉。

何眞傳

何眞字邦佐。東人。少英偉。好讀書。筭擊劍。仕元。管句河源務副使。嶺表騷動。棄官歸。邑民王成、陳仲玉搆亂。舉義兵討之。擒仲玉。成築砦自守。進圍之。幕人能縛成者鈔十千。未幾成奴縛成以出。眞釋之。奴求賞如數與之。使人具湯鑊烹奴。駕轉輪車。數人推之。又使數人鳴鉦督奴噓火。奴一號。羣應之曰。四境有如奴縛主者視此。於是人服其賞罰有章。以爲光武待子密不過是也。行省上其功。元賞賚之。惠州人王仲剛與叛將黃常據惠州。貪暴。民不堪命。衆慕眞。議迎以守惠。又上其功。遷惠陽路同知。尋進廣東都元帥。癸卯。郡宗迂陷廣州。守將何深死之。眞聞。率衆復其城。擢廣東參政。進江西行省左丞。弟迪以功擢宣慰使。尋合江西、福建爲一省。改拜行省左丞。仍治廣州。乙巳。宗迂復來圍廣。眞力禦絕糧。出避。城陷。明年復

克之宗廷退走。又明年遷右丞。有陳符瑞。勸爲慰佗計者。逮而戮之。示於元無二心。洪武元年。廖永忠率師取廣東。先遣人以書諭降。真遣都事劉朝佐諭款降。救褒諭以資融。李勣爲比。入朝。授江西行省參政。蒞官有威德。尤好儒術。三年遷山東參政。四年命還廣東。收集舊將士。回京復任。九年致仕。十四年命真及子貴同往雲南。規畫糧餉。候大軍征進。及還。陞山西右布政。十六年致仕。是年復往廣東。收集土豪三萬餘人。明年再往收集。未至軍校。十八年遷浙江。十九年來朝。調湖廣左布政。二十年復致仕。八月。上念其功。曰。吾始有天下。命將四征。雖有降附。不見義旗。則尙負固來歸之誠。無過何真。封真東莞伯。祿一千五百石。二十一年卒。年六十七。真貌豐偉。美鬚髯。吐音如鐘。少時有相者謂曰。公才兼文武。霸王之器。惜生南方。微帶火色。位不過封侯。旣貴。其塚上時有紫氣。歸國夙夜寅畏。惟謹。太祖推心弗疑。故能以功名終。子榮。字輝先。讀書有文名。洪武二十一年襲封。後以藍黨褫爵。迪反南海。捕得伏誅。貴字奉先。常侍皇太子。爲兵馬指揮。有學行。士夫所推重。官至指揮僉事。宏字彥先。官至尙寶司丞。

史官曰。何真武略。不下陳友定。然其務威德。飾以儒術。友定不及也。而友定烈烈存元於海澨之邦。真初不從陳符瑞之言。似其烈烈。昆仲友定矣。至望風輸款。論者謂其識時知命。號稱俊傑。未免夢魂之間。慚愧友定耳。悲夫。

朱守仁傳

朱守仁。字元夫。徐州人。幼有大志。嗜古讀書。落落自豪。視輩行岸然。罕所推接。元末兵起。江淮鼎沸。應州

辟累獻奇謀。破羣盜。歷官至樞密院同知。守舒城。甲辰。明兵攻廬州。守仁舉城來降。徐達送至京師。陸見太祖嘉其樸茂。授中書斷事。乙巳。以袁州初附。命知郡事。值郡治新設。瘡痍未瘳。守仁褫身廉潔。撫循有方。又表裏恢廓。無畦畛。民多德之。洪武二年。徵拜工部侍郎。越二年。代安然爲本部尙書。尋改北平參政。以餽餉不繼。謫蒼梧知縣。九年。進知容州。改高唐州。頗有善政。十年。驟陞四川布政使。時全蜀甫定。姦伏徼欲易煽。守仁威令簡嚴。錮酷吏。懲頑民。郡邑從化。以惠利顯。疾致仕。十五年。雲南平。改威楚開南等路。宣撫司爲楚雄府。上念漢燹雜處。非得老成持重者。不足以鎮。特起知府事。至則招集流移。授以田土。量民貧富。均賦徭役。無偏累。又肇建學校。隨才曲成。有強梗不馴者。懲以漢法。歷九載。境內大治。計績來朝。閩郡保留不獲。垂涕而送之。二十三年。廷見會監牧日蕃。上留心馬政。特拜太僕寺卿。首奏准都督府等衙門各立草場。俱於江北湯泉滁州諸處牧馬。所轄十四監九十八羣。克舉職。尊息日盛。屢荷賞賚。有所獻納。無不俞受。上詔省天下寺觀。惟龍泉寺以守仁奏。准留二僧。主馬神廟。遵守至今。二十七年。致仕。永樂二年。朝京。疾卒。

史官曰。朱守仁。威惠兼著。循蹟頗多。老成練達。無堅不破。洵有用材也。以元樞密。明司空。屢躡再起。艱難荒徼。終回寺。雖數歷足嘉。而顛撲可恥。

安然李幹傳

安然。祥符人。徙居潁州。元季爲山東行省左丞。守萊州。明兵下山東。率衆歸。洪武元年。授起居注。轉給

事中尋擢山東參政。心行平口。撫綏勤勞。祿止養身。餘以給公用。二年召爲工部尙書。奉命於社稷壇北建祭殿。又建拜殿。以備風雨祭祀。八月建議。功臣守墓人戶。各以本官封爵品級爲差。官給費。上從其議。尋詔功臣歿者不建享堂。墳塋葬具皆自備。惟戰歿者官給。五年調河南參政。九月改行省爲布政使司。陞浙江布政使。十二年陞御史臺右大夫。十三年革左右御史大夫。改左中丞。五月坐事免。以雷震奉先殿。設四輔官。調和陰陽。位次公侯。都督府。召充其任。命刑官聽兩造之辭。正以五刑。奉得旨。送四輔官。及諫院給事中。覆核無疑。然後行之。著爲令。十四年卒。年五十八。上念來歸之誠。親製文遣官祭之。

李幹。絳州人。元翰林編修。退居於鄉。洪武九年授本州訓導。尋遣敕召之。曰。朕卽位十三年。夙夜孜孜。思得賢才。共安天下。何期大臣不職。朋比爲姦。雖四兇之罪已誅。而求賢之意未稱。今御史薦爾博學洽聞。特遣齋符臨召。有司禮送。至京。副朕虛懷。至授四輔官。尋調蘇州知府。改國子博士。兩聘爲試官。後以老致仕。

史官曰。安然李幹等。未有穆穆平格之素。爲元官。歷羣任。殊勳讜議。聞然未聞。而使之調和陰陽。備愛理之任。嗚呼。舛矣。大臣朋比不職。小臣卽有聖哲之懷。付之浩歎而已。而以安然輩反其行。不意太祖聰明絕人。乃出於此。

詹同傳

詹同。字同文。原名書。婺源人。穎靈抱奇氣。學士虞集弟槃見而奇之。妻以女。授易於甘楚材。學春秋於劉

彭壽至正中舉茂才異等。擢郴州學正。遇亂道梗。家黃州。仕陳友諒。爲學士承旨兼御史。甲辰明兵破武昌。來歸。太祖與講經史。占對不窮。授中書博士。時方集功臣子弟於內府。令教之。改國子博士。易今名。尋陞考功郎中。歷侍制起居注。奉命求遺書。致宗廟時享禮。奉命畫古孝行。及起自戰伐勤苦。爲圖以垂世訓。洪武二年。陞侍讀學士。時或屈辱大臣。不以禮。中丞劉基疏請存待大臣之體。同因取戴記及賈誼書以進。上納之。陞吏部尙書。改學士承旨。仍同呂本迭視吏部與樂韶鳳。上所製釋奠先師孔子樂章。上曰。祭貴乎誠。若省牲告充。告贖及禮之煩文者。並宜革之。九月。同等上言。自上起兵渡江以來。功業隆重。再闢乾坤。軼古帝王。雖有紀載。而未成書。乞編日厯傳後世。上從其請。命與侍講學士宋濂爲總裁官。濂薦義烏人黃昶。可贊編摩。上召昶西苑。慰問良久。復使見皇子。賜綺裘革履。它日上召同與劉基。宋濂。燕便閣。同被酒還史館。賦詩贈昶。少選。復宣赴右順門。上乘步輦。至曰。卿餘醒未解邪。同對臣雖醉。猶能賦詩贈黃秀才。上亟取觀之。笑點頭曰。朕卽和同詩。卿爲書之。書訖。賜昶。蓋一時翰林學士。同與宋濂。吳沈。樂韶鳳。並有時名。號詹。吳樂。宋一日偶言及竹。上曰。竹數亦多乎。對戴凱之所譜。至五十餘種。惟吳越山中。有方竹者。四枝直上。若有廉隅。士大夫往往以爲叵杖。上曰。有諸乎。對曰。有之。旣退。獲一枝。以獻。上摩娑悅之。御草方竹記一通。記末美同人偉氣豪。繕書賜之。七年五月。大明厯日成。共爲一百卷。又與宋訥言。旣日藏之天府。人欲見之不可得。臣請做唐太宗貞觀政要。分類更輯聖政。爲書以傳。上從之。分四十類。自敬天至制蠻夷。凡五卷。名皇明寶訓。自後凡有聖政。史命日記錄之。隨類增入。九月。詔罷科舉。令有司

察舉賢才。必以德行為本文。藝次之。仍令同選國子成材者。與所舉參用。授主事。給事中。御史等官。時用彭通等爲給事中。并國子生李擴等。入文華武華二堂。號小秀才。丙寅請老。賜敕遣歸。未幾起爲學士承旨。六月考宗廟時享禮。初獻將畢。令分獻官行禮。亞獻終獻皆如之。罷上香儀。上皆從之。復以老乞休。許之。官其二子魯徽。召入賜坐。從容慰勞。出御文賜之。卒於家。所著天衢吟嘯及海濱集。

史官曰。詹同風旨整峻。博辯有文。比之危素。相頽頽。而同獨寵遇無懈。同之才必有可稱者。英印以鍾山僧受知。出藩齊魯。材給莫及其家。橫孟中不問。太祖亦或爲才炫矣。人主知臣不以德器。悅聽俄頃。信爲良顯。嗚呼。每每壞天下事。可勝道哉。偶摛同傳語及之。

危素傳

危素。字太樸。金谿人。少能讀書。年十五卽通五經大旨。與邑人曾子白。朱夏並以文章名家。據座爲人師。徒步臨川。吳澄。清江范梈之門。質而正之。二人皆折行輩與之爲禮。澄至恨相見之晚。凡所著書。多與參訂。因受知於虞集。孫轍。間出遊金陵。或所其文示南臺中丞張起巖。起巖以狀元爲顯官。少所稱許。獨推服之。曰。危君爲狀元。庶幾相當。老夫有愧色矣。起巖入朝。遂挾以行。達官貴人。更相論薦。至正元年入經筵。爲檢討。年四十一矣。移書執政。請修宋遼金三史。行所在訪摭闕失。遺書書成。其力居多。元順帝知其學問。特命注爾雅。較君臣政要。改國子助教。以善筆劄。詔書釋氏書。辭曰。臣官冑。豈以教化民彝爲事。外教之典。不宜溷書。得止。尋應奉翰林文字。同知制誥。兼國史院編修官。嘗白事丞相前。極言無隱。丞相賀

惟一曰。君向寡言。今何多也。素曰。待危恩重。豈能默默。素不敢畏丞相。畏後世史官耳。歷禮部尚書。參知政事。先是江南經略使普顏不花。李國鳳。請封徽國。朱文公爲齊國公。以龜山楊公。豫章羅公。延平李公。西山真公。九峯蔡公。從祀於孔子廟廷。素爲御史時。亦請封諡劉蕡。皆寢不報。至是舉行。李羅帖木兒入相。出爲嶺北等處行中書省左丞。躡居房山者四年。順帝北奔。淮王帖木兒不花監國。承制起翰林學士。承旨入廟信宿。明兵入元都。素故與待制黃昇同邑。少同學。相約死難。昇將投居賢坊井中。從人午出之。曰。公小臣。死社稷邪。昇曰。齊太史兄弟皆死。彼不小臣哉。則給午還舍。取告身。若欲輸大將軍者。午喜還報。已浮屍井矣。素亦走所居報恩寺。脫帽井傍。兩手據井口。俯身爲就沈狀。寺僧大梓。與番陽徐彥禮大呼。公毋死。國史非公莫知。公死。是死國之史也。勸歸寓。已而兵入府藏。垂及史庫。言於鎮撫吳勉。鞏而出之。由是累朝實錄無所失。俘至京。拜侍講學士。太祖嘗訪以元興亡之故。對答詳慎。甚見禮重。日與劉基。羅復仁。胡鉉。雒稼同居館中。時資獻納。宋穆陵顛骨。爲楊鞏真珣所發。入宣政院。西番僧相傳授爲祭器。言於上。索取得瘞之聚寶山。頃之坐失朝免。居一歲復之。兼弘文館學士。賜小車。免朝謁。一日同諸學士。賜酒饌。屢命盡觴。內官承旨監勸甚力。酒終。上御製詩一章。繫序於首。命各以詩進。素成最後。上覽之曰。危素老成。其有先憂之意。他日上御東閣側室。素履聲窸窣行簾外。上曰。誰對曰。老臣危素。上笑曰。謂文天祥也。而乃爾。御史王著等劾素亡國之臣。不宜列侍從。謫含山守余闕廟。踰年。每不言笑。愧憤死。所著文集五十篇。奏議二卷。宋史藁五十卷。元史若干卷。

史官曰。危素學問淵邃。才識逾捷。固含英咀華者流也。初以經學。史學著聲。元時英澄等折節與友。白事丞相。極言無隱。何其壯乎。入明。瞻顧龜縮。祇以對答詳瞻見禮。亦可傷也。而述其生之死之之狀。殊可笑。

張以甯傳

張以甯。字志道。古田人。生質清粹。甫六歲。日記千言。八歲時。人認其伯父逮於獄。忿不能平。詣邑伸理。言有條序。令異之。命賦琴堂詩。立就。語甚新奇。伯父由是得釋。十五往甯德。受學於韓古遺。歷五年。方歸。學業大進。登元大定丁卯進士。初任黃巖州判官。以計擒捕海寇殆盡。陞六合令。有惠政。內艱。阻兵亂。教授淮南者十年。後徵爲國子助教。累官翰林學士。有俊才。博學善記。尤長春秋。盡授其學於趙光霽。元末以甯擅名於時。人呼爲小張學。洪武元年。明兵破元都。與危素。黃肅。夏以忠。王時皆送京師。太祖拜以甯侍讀學士。知制誥。兼修國史。時承顧問。後上每厭之。漸見疏遠。己酉。與典簿牛諒奉命齋詔。印使安南。封其國王陳日燿。未至而王卒。世子日燿遣其臣阮亮求詔。不許。曰。此吉禮。非凶事也。且旣易世矣。當以奏聞。因留居洱江。俾諒往輸世子。遂復遣其臣來告訃。上喜。以甯稱任使。親爲祭文。遣主事林唐。臣編修王廉往祭安南王。始入境。竣封事。又安南止以揖爲禮。喪事甚簡。以甯教其世子服三年喪。并令其國人效中國行頓首稽首禮。上聞嘉之。賜以敕書。比之陸賈。馬援。御製詩八篇。獎諭。庚戌五月。得疾卒於道。命有司還柩於家。以甯清潔自守。臨終時有詩云。覆身惟有黔婁被。垂囊都無陸賈金。詩文數十卷。號翠屏集。行世。劉三吾稱其節制似柳宏。放似韓蘇。宋濂稱其文豐腴雄峭。清圓委蛇。王時亦拜侍讀學士。前在元

以白金三千。令方國珍市馬。汎海而歸。老不可用。

史官曰。張以甯能訓夷以禮。而不能守己以禮。可謂見物而不見己矣。黔被覆身。陸金空橐。清名自表。亦人之將死。其言善歟。不然。迹其資秉靈絕。文腴流美。豈不爲世名家。

程徐傳

程徐。字仲能。鄞縣人。父端學。以明經進士官編修。與兄助教端禮。皆尙經學。修飾古行。時人稱爲小二程。徐遂於春秋。由元校書郎禮刑戶三部主事郎中。以才稱。王保保承辟爲兵部侍郎。不赴。後以國子司業。晉兵部尙書。致仕家居。太祖平浙東。召見。命爲吏部侍郎。洪武二年。上令孔子釋奠。止行曲阜。書奏。以爲古今之祀典多矣。而獨社稷三皇。與孔子通祀於天下者。豈無故哉。社稷者。生民之本。三皇者。開極之主。而孔子者。萬世之師也。曠古以來。帝王之治天下。教養二者而已。民非社稷三皇。則無以生。非孔子之道。則無以立。有國者敬而祀之。必崇本始。報功施之典耳。孔子以道設教。其心未嘗一日而忘天下。天下祀之。非祀其人。祀其教也。祀其道也。天下一日不可無孔子之道。則其教不可一日廢。天下一日不可無孔子之教。則其祀不可一日廢。今使天下之心。讀其書。由其教。行其道。而不得通祀焉。豈可以崇本始。報功施也哉。若曰。孔子非如佛氏之千百化身。不可一日間赴天下之祀。而遂廢其禮。則三皇后稷。亦皆生爲人而歿爲神。又安得享天下之祀於一日之內乎。蓋孔子以身載道也。孔子之道。卽綱常之道。斯道所在。如天之無不覆。地之無不載。卽家至而日見之也。非可方體而求之也。非可以一念之靈視之也。其道

通於天下。則其祀亦宜通於天下。臣愚謂陛下欲稍革前代之文以正祭祀。孔子之禮宜於春秋仲月上丁遣使致祭於曲阜林廟。仲丁致祭於京師廟學。令天下府州縣於季丁通祀焉。如是則既有等殺之節。無褻瀆之過。其於祀神之禮。根本之誠。開示正學之方。扶持世道之計。可謂曲當而無遺矣。上覽奏從其議。改刑部侍郎三年改本部尚書。未幾卒。精勤通敏。事無留滯。能文。尤工詩歌。有文集。

史官曰。程徐其爲人不足道。至通祀孔子之議。蓋聖人之徒歟。天下士大夫始終無類者幾何。第使一節著稱。亦可□□□□□□不朽。

吳雲傳

吳雲。字友雲。宜興人。世業儒。父仲傑。仕元湖南提舉。雲少有文行。爲國子生。仕元翰林侍制。洪武元年。魏公達定元都。俘至京。太祖釋之。除弘文館校書郎。二年。改渭南縣丞。有善政。四年。召還。擢刑部郎中。尋遷磨勘司令。五年。驟拜刑部尚書。六年。出爲湖廣參政。八年。坐事被逮。釋之。時元梁王據雲南。上諭曰。今天下混一。四夷賓服。獨雲南一隅未奉正朔。殺我使臣。朕欲以兵取之。恐勞師費財。且傷遠人。卿能爲朕作陸賈乎。對曰。天命所在。誰敢違之。第彼特遠。故阻聲教。臣奉陛下威德。往告以大義。諭以禍福。彼必附順。若冥頑不從。與師未晚。上然之。七年。遣行會梁王使鐵知院等二十餘人使漠北。爲大軍所獲。械送京師。上欲以恩懷之。令與雲偕往。至沙塘口。鐵知院等計曰。吾屬奉使不達。中道被執而還。罪必不免。於是說雲改易制書。其給梁王不從。欲殺之。適梁王亦遣人來劫降。逼令胡服。辮髮。往見雲。曰。朝廷念雲南一方

生靈不忍加兵。特遣使持敕招降汝輩。今反欲脅使臣以降邪。吾以死自誓。終不爲汝屈。遂被害。梁王壯其節。命收骸骨。送蜀給孤寺藏之。後雲南平。朝廷方知雲死。適其子黻亦以其事來白。乃命馳驛奉榘歸葬。黻爲國子生。貧不能還鄉。以其嘗仕湖廣。卽葬於江夏。弘治中。輔臣徐溥言於雲南巡撫王詔。爲請於朝。贈刑部尙書。諡忠節。與王禕並祀雲南。曰二忠祠。嘉靖中。復官其曾孫承宗。爲中書舍人。史官曰。梁王雄據一方。與故元消息不隔。而欲使雲一身以口舌收黔滇百粵之廣。而且使其人共轡往。是太祖死雲矣。焉知非太祖薄雲而故舍之耶。

秦裕伯傳

秦裕伯。字景容。從父仕元都。就學胄監。登第。累官至福建行省郎中。會世亂。棄官。寓揚州。復避地上海。養母。母卒。閉戶力學。時張士誠據蘇州。遣人招之。不納。吳元年。上命中書省檄起之。對使者曰。受元祿二十餘年。背之不忠也。居喪未終。忘哀而出。不孝也。乃上書固辭。洪武元年。復徵。稱疾不出。上手書諭曰。海濱之民。好鬪。裕伯智謀之士。而居此地。苟堅守不起。恐有後悔。裕伯拜書入朝。辯博善爲辭說。授侍讀學士。上登鍾山。命與學士朱升等。扈從擁翠亭。給筆劄。卽景賦詩。甚見寵異。一日侍上。言元時告反者皆不坐上。曰。此何等事。寬之至此。所害善良必多。命反坐懲後。由是刁風始息。二年。降侍制。時論學術政事。皆當上意。四年。蜀地平。上因與侍臣論用將。曰。秦裕伯嘗言古者帝王之用武臣。或使愚使貪。其說雖本於孫武。然其言非也。夫武臣量敵制勝。智勇兼盡。豈可謂愚。攻城戰野。捐軀殉國。豈可謂貪。果若貪愚之人。不

可使也。尋出知隴州。卒於官。

史官曰：秦裕伯居母喪上書有足采者。及侍太祖無善可稱。後以謫死。吁。枉卻此一出矣。其時有王時程、儒漢、李善、張昶、李質、曾堅、蕭蕭、答祿與權、王儼。皆以元官入明。至大僚。因並紀之。

明書卷一百四十五

列傳十

文學傳一

史官論曰。文章之制於人主。譬川瀆之制於海也。隨其材分取。及高。高下下。傾折而赴人主之好惡。故齊紫敗素也。而賈十倍。上好存焉耳。漢武志凌雲而枚馬作賦。唐玄尚經術而燕許應制。何則。利祿之途。人斯往焉。士無賢不肖也。明太祖諭侍臣曰。古人文章。明白易知。而誠意溢出。近世詞雖艱深。意實淺近。自今翰林爲文。但取通道術。達時務者。無事浮藻。故明初陶宋諸學士。文質直無枝葉。有漢始風氣。而諸才人懲元季之亂。又多隱居肆力。文章彬彬盛矣。自制科興。而束九牧才人之心力。以從事四子五經之文。銖心劇肝。揣合銖寸。醜好成敗。一決於遇不遇。一遇之後。棄如委屣。當其速化。朝種暮穫。及其乖蹇。則童而習之。皓首不能工。乃太息而委之命。併不從人主。然天下以爲利祿之途。釋此無由也。其父兄之所教。子弟之所肄。且夕從事於此。俟其一遇而休焉。雖有卿雲終賈之姿。不敢獵幅而爲詩古文詞。其爲詩古文詞者。非宦成游藝。則林叟遷客。不得志者之所爲耳。故藝苑寂寥。不能軋漢魏而接唐宋大家者。三百年才人之精神嚮慕。不在乎此也。然自北地歷下。瑯琊。毘陵諸家。競爲古文詞。嚙齏經術。包含百氏。庶幾

大歷貞元之盛。厥後才人繼踵。稍變而爲縱橫天矯之文。其間騷人逸子。唱和名家。或彼此互譏。人擅一隊。爲東野之鳴者。亦班班有文在人間。此皆溢出於制科之外者也。豈士能自治。不從聖人歟。爰采其人。之尤著者錄於篇。文則無暇錄矣。

楊維禎。字廉夫。會稽人。其地鐵崖山高百丈。上有萼綠梅數百株。築層樓俯花。積書數萬卷。號梅花道人。父宏。母李氏。生有祥徵。稍長授春秋。講析辨刺。凡百十家。人莫能難。父期以重器。不爲授室。俾遊學甬東。購黃氏日鈔諸書以歸。下帷周覽。泰定丁卯。用春秋擢進士。署天台尹。地有八鵬。廉其姦。治以法。民皆稱快。然其黨蟠結不可解。卒用是免官。久之改錢清場鹽司。屢白民病。頓首涕泣爭之。不終聽。至欲投印去。獲減引額三千。俄外內艱。環廬所植竹筍發。藥牙枝葉鬱如。遲赴調者十年。會修遼金。宋三史。獨作正統辨千言。大司徒歐陽玄讀之。歎曰。百年後公論定於此矣。將薦之。有沮者。尋用常額。提舉杭之四務。日夜爬梳。姦不得容。轉建德路總管府推官。悉心獄情。務使無冤。陞江西儒學提舉。未上。會兵亂。棄官。將妻子遊天目山。放於宛陵。毘陵。聞警。中山水最清遠。又自九龍山。涉太湖。大小雷澤。訪縹緲七十二峰。尋鴻漸遺蹟。自雲間東抵海。登小金山。脫烏巾。冠鐵葉冠。服褐毛寬博。手持笛一枝。自稱鐵笛道人。鐵笛者。洞庭湖中冶人緱氏子。嘗掘地得古莫耶。無所用。鎔爲鐵葉。筒之長二尺。有九寸。竅其九。進於道人。道人吹之。竅皆應律。奇聲絕人。江上老漁狎道人。不時唱歌款乃。道人爲作迴波引和之。仍自歌曰。小江秋。大江秋。美人不來生遠愁。吹笛海西流。又歌曰。東飛烏。西飛烏。美人手弄雙明珠。久見烏生雛。城中貴富人。聞道

人名多載。酒道人所。幸聞吹笛。道人爲一弄畢。便臥遣客。卽客不去。臥吹笛自如也。嘗對客云。笛有君山古弄。海可養蛟龍。可呼非鈞天。大人不發也。始張士誠據浙西。聞其名。累使求致。不能屈。撰五經反覆告。以成敗順逆之說。太祖聞而高其誼。天下大定。詔遣賢修纂禮樂書。召至京師。僅百日。疾作。老婦吟見志。上笑遣之。還雲間。九山行窩。病且革。移柱頰樓中。呼左右謂曰。吾欲觀化一巡。如何。乃自起捉筆。撰歸全堂記。頃刻而就。擲筆曰。九華伯潘君招我。我當往。車馬俟吾且久。遂泊然而逝。似聞數十人從。函道登樓。其步履之聲相接。年七十五。初聘錢氏。忽遭惡疾。錢父母請罷婚。不聽。卒聚之。疾尋愈。所著有四書一貫錄。五經鈐鍵。春秋透天關。禮經約。君子議。歷代史鈐補正。三史綱目。富春人物志。麗則遺音。古樂府。上皇帝書。勸忠辭。及平鳴。瑤臺。洞庭。雲間。祁上諸集。通數百卷。藏於家。初爲童子時。屬文輒有精魄。仕不得志。遂大肆其力於古辭賦。以先秦兩漢爲文準。評者謂如商敦周彝。雲雷成文。而寒芒橫逸。奪人目睛。於詩尤號名家。震蕩淩厲。駸駸將逼盛唐。求文者座無虛席。崖鑄野刻。布列東南間。然其風神蘊沖。無一芥縈懷。遇天爽氣清時。躡履登山。縱情遐視。或戴華陽巾。披羽衣。泛畫舫於龍潭鳳洲中。橫鐵笛吹之。其聲穿雲而上。望之者疑其爲仙。晚年益曠達。築玄圃蓬臺於松江之上。無日無賓。亦無日不沈醉。當酒酣耳熱。呼侍兒出。謔白雪之辭。自倚鳳琶和之。座客或踴躍起舞。顧盼生姿。起超直上。蓋數奇諧寡。特託此以依隱。玩世耳。性疏豁。與人交無疑二。新進小子。或文詩一句字之美。必爲批點。黏於屋壁。指以示客。尤不錄人小過。黠奴負金。度無以償。逼書收牒。笑與之家藏。古名畫。爲西鄰所竊。其僕人追執之。揮手曰。吾業

與之矣。無賴者僞爲維頑文。冒受金繒。或疑將發其姦。曰：此誠予所作。不論遠近。皆頌其寬厚長者云。生平無它嗜好。病棘危坐。不披衣則弄札翰。或理音樂。素不喜奕畫。爲奕損心。畫爲人役。見卽屏去。與永嘉李孝光、茅山張伯兩、錫山倪鏡、昆陽顧瑛爲詩文友。碧桃叟釋臻、知歸叟釋現、清容叟釋信爲方外友。臨歿。以志銘託宋潛溪。世稱鐵笛道人。

陶凱。字中立。臨晉人。生時有大星墜簷。光照臥室。比成童。讀書過目成誦。遲重。不妄言笑。卓然自立。嘗與人夜歸。限大溪不能度。忽有人撐小舟泊岸。卽登舟渡。回顧無所見。人皆奇之。里中大疫。探病入其家。見妖入甕。卽與封識棄水中。遂愈。又入城晚宿三江。病家夜禱。凱朗誦離騷。聲清越以長。病者驚汗而差。議容步履有嚴。有則從學者甚衆。父有孝行。家貧。凱以束修助治喪。如禮。祖母墓奪於勢家。咸贖而表之。無他兄弟。一妹適仙居顧氏。蚤卒。撫所遺子女甚篤。故里中稱德義者。必曰陶氏父子。積詩歌成帙。相者袁珙見而驚曰：後十年當爲異代名臣。至元中以明經除永豐教諭。不受。至杭州施克宏家。太祖起兵。訪凱。延至。置上座。與語。不敢居。因進取天下之策。且曰：羣雄地實兵強。未易圖。胡元政衰。民怨。是空地也。直取之。易耳。上大奇之。每用其策。後別去。戊申卽大位。以書徵之。凱矢心不仕。上求之切。諭使人曰：陶凱不應。可取一族人首來。族人四遠。求得凱。見上。授編修。與諸儒纂元史。又撰洪武廣韻。上稱善。命教大本堂。授楚王經。除翰林。應奉文字。三年。陞禮部尚書。請建奉先殿於乾清宮左。上日焚香。上食。朔望薦新。若節序生辰。祭用常饌。行家人禮。四年。試進士。凱爲提調。刻程文。凱序其首。五年。句容縣民獻瑞瓜。奏頌。上曰：

卿歸德於朕。朕不敢當。因言漢唐皆有會要。記載時政。及起居注。言記事。宜令臺省府各置銅匱。編錄聖旨及時政。依會要編類爲書。上從之。扈駕獻詩。又進方療孝慈皇后有效。賜免死牌。命與開濟作天下民籍。易見圖。凱資性過人。才高學博。識見卓遠。爲文千言汨汨。不見有艱難意。初游吳楚。文多激慨。中更亂離。去居深山中。授經養親。文多隱約。明興。應聘而起。凡稽古禮文。事多凱論定。又兼領翰林院事。詔令封册歌頌碑碣。時時命凱。文遂盛傳。出爲湖廣參政。致仕。八年召爲國子祭酒。自稱耐久道人。上聞怒曰。何自賤也。又上一夕夢龍繞公門。疑之。復以參政致仕。密謂弟中吉曰。汝可俟明春二三月。數將至矣。宿緣在此。昔避不能。今奚得免。會遣高麗。誤用符驗。坐與知罪死。凱曰。臣受知陛下。官三品。壽七十。死復何憾。雖有金牌免死。亦不自表也。上尋悔之。楚王求師不得。憤入金水橋。羣臣解衣履下救者。及法官不覆奏者。皆死。贈太子少保。葬長潭山下。

李習。字伯羽。太平人。通諸經。攻性理之學。以閎博爲學者所宗。才負經濟。元時以南人見擯斥。延祐初游京師。四年領京師鄉薦。試渾天儀賦。士皆閣筆。習能記其詳。鋪敘燦然。授書院山長。間僑居廣陵。與張仲舉、高季淵、李五峰。旦暮往來唱和。乙未。明兵克采石。習同陶安、梁貞等奉迎。駐蹕太平。遂擢爲本府知府。廉能公謹。精於治體。均平徭役。民受其惠。吏不敢欺。未幾。以疾卒。官年八十餘。習有鄉曲之譽。別號雲鵬。弟翼。字仲羽。中浙江鄉試。與習齊名。江左目爲二李。吳萊謂伯羽之文。簡密嚴奧。一辭弗苟。仲羽之文。豐腴縝麗。五采爛然。劉瑀謂伯羽之尊嚴。如雪峰千仞。嶄然特峙。人莫敢褻。仲羽之溫粹。如藍田美璞。光輝

外著天下共寶之。其學行爲時彥所賞如此。及門者百餘人。陶安篤誠。其尤著者也。漁於義溪。吟詠歌行。有義漁小藁。樵於湯沙。稽考制度。有沙樵雜抄。又有橄欖集五卷。行於世。詩冲澹典則。思致幽深。誦之使人有倉卒不能窮之趣。

劉崧字子高。秦和人。舊名楚。元季鄉舉。明初改今名。七歲能賦詩。嘗侍祖夜寢。聞雞聲。因命爲應聲成。未云喚醒。人間蝴蝶夢。起看天上火龍飛。祖驚歎。家貧力學。年十六授徒。十九遊南昌。時善賦者李叔正而下。稱十才子。見其製作。莫不推讓。復走楚浙。所至觀覽名勝。詩道益昌。薦授龍溪山長。辭。至正中。舉明經。進士。捷。至。適自田中摘粟歸。悵然泣下。曰。始二親篤於訓子。奈何今不及見。兵燹家蕩。覆避地。無以爲生。明初以薦召見。授兵部郎中。小心謹畏。歷署駕部。總部。奉命鎮江。徵糧。多公侯田土。往往掣肘。力持平。與小民一體輸納。歸奏稱旨。又往廣東買馬。得六百匹。又明年往山東點視驛遞。驗漂失海船。衝冒風雪。凡四閱月。訖事。在兵部幾三載。以振職稱。祭方邱。與吳琳。宋濂侍從。應制賦詩。甚見褒賞。六年陞北平副使。持憲綱。招掠逋逃。慰安反側。考覈屬官。以廉慎爲先。讞獄必以情。與學教士。刻石立規。考問風俗。創文天祥祠。度驛路。衝僻。爲之哀損。關防鹽引及私販者。甚有政績。坐事爲胡惟庸所中。輸作京師。尋放歸。十三年。惟庸誅。上手敕召拜禮部侍郎。稽古典禮。上嘉之。以文學雅正。屬以撰述。學士宋濂見而歎曰。此司馬遷之文。今未有過者。而於詩則尤所遜服。四月攝吏部尚書。侍郎陸讓以察爲明。一處以寬。銓次有方。藻鑑不爽。五月災異致仕。十四年起尚書。李敬爲祭酒。崧爲司業。令朝夕繼見。燕語移時。四月得疾。猶強。

坐訓諸生曰。天子遣崧教國子。將責以成功。而遽死乎。卒年六十一。上爲文命。御史唐壽諭祭。崧所居室。敵半覆以茅。家有田五十畝。皆館授時所置。後居官未嘗有所增益。在北平時。身所覆被。亦館授時物也。嘗爲鼠所傷。始命更置。其故鼠傷者。仍命補葺。以衣其子。歷官十一年。未嘗以家累自隨。嘗攜一童子。到官亦遣還。每夜孤燈一榻。讀書不輟。五更衣冠起坐待旦。當赴北平時。始盡支職方俸廩。易得白金九十兩。封託鄉人及歸。往取其人已用之。止餘封紙。亦不復問。爲人雖溫顏巽詞。而見者懷以敬。問學之功。老而彌篤。與人言未嘗及官政。歲儉。姻黨族人不能自養者。輒賙給之。手筆子史醫卜地理等書六十卷。北平八府志書三十卷。事平事蹟一卷。詩文三十餘卷。而職方集行世。內姪陳繼先。字仲述。泰和人。明初家毀於兵。存者惟母及弟。姑之夫劉尙書崧來撫諭使學。遂往受業焉。雖貧約僅自立。而氣崖高邁。肆力古學。靡不究覽。文筆沛然。渾厚浩博。洪武乙丑。進士授御史。按事山西閩海。時天下決獄。多籍於京師。又太祖矜慎。稱旨實難。獨繼先不用威而得情。憲臺章疏多出其手。暇輒爲文自娛。士大夫識與不識。皆稱爲陳古文而不名也。然多散失。存者五卷。洪武甲戌。歿於官。坦葬簡質。他人巧投曲中。又不能入。終始一節。未嘗少變。

蘇伯衛。字平仲。少警敏絕倫。誦說不勞而習。中歲大肆力於文詞。精博敷腴。人謂有祖風致。元末鄉貢。入明。選國子學錄。尋陞學正。屹然以師道自任。發策試士。皆天下國家大務。品第精覈。多士翕服。著空同子。警說四十首。學者皆傳誦之。教胄子者五年。以薦即日召見。親擢爲翰林編修。詣丞相府辭曰。禁林地望。

親切日侍天子左右備顧問。至華要也。某不幸幼有曠疾。雖粗通文史。然大懼奏對失措。將速刑僂。誠不足堪。敢辭。丞相以聞。上亦弗強。已而吏部將奏別官。以去親日久。願歸省親。復走白丞相。許之。於是司業宋濂率六館之士祖餞於龍江。謂曰。文定公古史一書。至今傳之。資治通鑑尙闕宋元。平仲歸矣。其尙續諸他日使人稱曰。蘇氏一門。世濟其美。將不在茲乎。伯衛謝曰。方抱疾未能也。歸治一室靜坐。或終月不出。與人少所接對。人亦罕得而識之。所與游者皆四方名士。非其人雖未嘗拒絕。然自不敢見也。洪武十年。宋濂歸老入謝。上問曰。今在外文學。復有如卿者。舉以自代。濂曰。蘇伯衛臣鄉人。博學飭行。爲文辭蔚瞻。有法。要不可以微疾廢。上因徵至。入見。欲用之。辭以舊疾。賜衣鈔遣歸。二十年。聘主會試。事竣。復辭歸。卒。伯衛恬靜寡欲。年四十始娶。容貌不逾中人。而學問超拔。平居正襟凝思。淵止山立。雖寒暑風雨。利欲紛華。皆不之知。嚙齶宋學。析義如蠶絲。攻是非如白黑。宋濂稱其文體裁嚴整。恣態橫逸。如春陽被物。根葉條卉。小大圓徧。各隨其物而暢之。視膠滯一體。守常而不知變者。萬萬也有文集六卷。

陳觀字廷賓。負雋才。通經史百家學。善屬文。元季亂不仕。自號苔峰耕隱子。與鄉人方時舉。郭惟真。族人本初等二十二人。作真率會。選勝賦詩。以道義相切磋。有壺山文會集行世。洪武初。應明經。辟本府訓導。抗顏師席。諸生翕然。多所成就。閏四歲被召。昂然獨異。太祖問曰。彼頤而哲者何人。觀出對。上試以王猛捫蝨論。稱旨。不數月。擢陝西參政。以廉謹稱。一日。上忽馳召。陛見。諭曰。爾可侍吾左右。於是日與宋濂等備顧問。上益察其恭誠。嘗面命撰鍾山賦立就。嘉之。祖母喪歸。賜之緡幣。服除。赴闕。未及改拜。以疾卒。年

四十九公持身守官。動皆不苟。而操尤清白。兒孫或從容間陝產金。其鑛何狀。公驚曰。吾待罪藩寮。幸不掛吏議足矣。何金之問耶。故其卒也。妻子困甚。子能。貢入國學。乙酉。應天鄉薦。

林弼。字元凱。初名唐臣。尤溪人。至正進士。授郡幕官。元亡。著述山中。洪武二年。郡以名儒聞。徵入。更名弼。與宋濂。王禕。曾魯等同修元史。書成。賜金帛。尋授考功主事。使安南。祭其國王。王前後持黃金二斤爲壽。悉謝卻。王遣使裝金請於朝。上曰。小國事大。使臣不辱。旣兩得之。可持金歸。安南自漢唐以來。稱臣奉貢。比內諸侯。元時徵其重資。責其躬朝。不肯從。乃有鑄金爲人。夜光爲目之徵。夷心益離。使者至多貪夫。悅金貝。坐致褻侮。至是與同使張以甯等皆固卻。始服中國有人。遷豐城令。吏有作奸者。度弼且置之。遂誣其受傭金一鎰。緩傭死。逮繫詔獄。上曰。此卻安南金者。謂受傭物耶。援筆草書休問二字。遂得免。改判饒州。尋改垣曲令。適安南國內亂。弼再以薦往。旣還。報召至奉天門。親加慰勞。擢禮部郎中。轉吏部。出知登州。有惠政。卒於官。弼博洽羣書。究心正學。著作跌宕雄偉。根極理道。雅精臨池。嘗與王偉談書法。謂用筆須偏正兼備。乃臻妙境。近世趙孟頫側峰太多。不能逃筆牀。月旦禕時。語人曰。林元凱在閩。毛中之麟。介中之龜也。禕來判漳。詠清漳十詩。有風流今孰繼。林子亦其徒。蓋指弼也。所著梅雪齋稿。及使安南集。始弼豐城被逮時。舟次湖口。夢一木人口眼俱動。覺曰。吾不免矣。旣得御筆休問二字。乃知休於字爲木人。而草書問字皆動象也。

盧熊。字公武。武甯人。元季爲吳縣教諭。洪武初。以故官赴京。母卒歸。起爲工部照磨。尋以善書擢中書舍

人遷兗州知州。政務愷悌，不求赫赫名。州初罹兵革，凋敝甚。適太師李善長營魯王府，浚兗州河，熊撫綏供億，事集而人不擾。俄以簿錄刑人家屬，事坐累死。先是熊嘗上疏言州印篆文譌謬，忤旨，竟因此得罪。少與弟熙皆從楊維禎遊，博學工文詞，尤精篆隸。所著有說文字原章句、鹿城隱書、逢蝸爰幽石門清溪等集。別有蘇州志、兗州志、孔顏世譜總若干卷。

王沂，字子與，號竹亭，泰和人。幼時聞張南軒論孟子義利之說，心慕之。既長，刻苦自勵，於性命之理，尤得其精微。元末行省照磨吉安路治中，皆不受。未幾江西陷沒，洪武三年庚戌聘爲廣東試官，以廷臣薦徵爲說書，留數月，授福建運副。以老懇辭，賜歸田里。屏居城西龍灣之上，有竹數百竿，日寄傲其中，益以成就後進爲務。從學者衆，接人色莊氣和，語簡理盡，人皆樂就。六經諸儒之書，靡不深究，旁通子史。於天之微，聖賢之蘊，古今治亂成敗之故，蓄之富，察之審，言之當，而履之確也。孝友篤至，終身不道人過失。古文宏偉浩博，至論辨古今成敗得失之際，馳騁貫穿，折之於理，沛如也。喜賦詩，所與遊皆當時名士，日賦咏往還。以商確雅道爲己事。弟御史佑，始以罪謫役和州，聞之，貨所有田業往給其費。旣而御史宥還，日怡怡起居，未嘗少離。沂儀觀偉然，氣崖高邁，和氣充溢，渾然不見鋒穎。御史狀貌魁梧，威嚴整肅，昆弟常從容入鄉閭，人望而敬之。所謂二妙集者，沂與佑所作也。著有竹亭退藁若干卷。洪武癸亥卒。年六十七。劉雲章贊略曰：淵乎元酒之在尊，懷乎大阿之未出匣，嚼乎其清而飲之不竭，薰乎其和而卽之弗可狎。又曰：使及門孔氏，則風零之詠歸，端章甫之禮樂，固將進退所安，而特視其所合，人以爲確論。弟佑子泰。

佑字子啓。十數歲卽知自重。力學不輟。兄弟自爲師友。稍出遊南昌。與名士爲詩友。江西內附。舉教官。吏部試中經義。偕十八人者入見。是日太史奏星有文明之祥。太祖喜。皆除御史。賜襲衣及宴。風裁勃勳。人廣西平。初置官府。簡御史往任風憲。以尋適爲按察使。佑及胡子祺爲僉事。子祺曰。古刑新國用輕典。佑曰。蠻夷之人。素昧君臣父子之分。瀆倫傷化。不及此時明禮法。以示勸懲。後將難制。適從之。所分部。郡縣吏民悚然。三年。偕子祺入覲。時蜀土初平。重郡守之寄。遂徙知崇慶州。子祺知彭州。崇慶承兵革凋敝之後。植仆煦稿。隨事盡心。民始稍蘇。坐累謫役。赦歸。從學者日衆。嚴師道。施教有方。晚學者望之。皆內自斂肅。不敢侈肆。江陰徐遜知泰和。勵精爲治。聘訓導縣學。日躬詣問政。佑曰。示民以好惡之正。而去其蠹。可矣。遜虛己傾聽。陳海桑嘗言。王子啓壁立千仞。不負所學。劉尙書子高言。子啓真風紀臣。包孝肅不足多也。郭守敬曰。子啓平居一言一語。皆可書簡冊。垂法戒。蕭子昕曰。王公秋霜烈日。固當憚之。佑擅文章。其得力處。養氣爲要。中歲以前。所著毀於兵。晚獨存長江萬里稿。年六十六卒。泰字伯貞。天資瓌偉。通經史。能文章。省季父佑於廣西。憩桂林。及佑改知崇慶。浮洞庭。至蜀。復東遊京師。足迹半天下。遍交一時賢士大夫。由是益恢宏練達。文思日進。性至孝。侍母疾。晝夜不解帶。佑罷歸。無子。泰躬養之終身。接人以誠信。自奉儉約。義當存恤者。不計有無。嘗曰。吾所守者三言。循天理而已。洪武壬戌。應詔。上問太極之說。發揮明晰。同時應者五百餘人。上試經學及時務。擢第一。卽命泰次第其餘。上以爲允。授廣東試僉事。分巡雷州。防海寇。復廢渠。清鹽法之弊。會革其官。召還。授工部主事。上語尙書趙俊曰。江西秀才王泰。汝宜從

之學問。父喪歸遲。上謫安慶者十年。戊寅薦授瓊州知府。一務寬大。崖州黎相仇殺。或以反聞。請用兵。已得朝命。獨察甯遠丞黃重廉平。令往復驗。執黎首事者偕來。聞於朝。兵止不出。是舉非秦。糜爛不可言矣。訟者牽連。每至數百人。急則逃入生黎。獨虛心聽之。數言而決。且加化道。亡而歸者萬三千餘人。在瓊甚禱。烈日中。明日大雨。而半舍外尙焦。再禱之。復大雨。歲以大熟。洪武丙子三考。清淨簡易。稱嶺南第一。內艱歸。建文三年入京。授肇慶知州。未任卒。年七十五。子信直。直官吏部尙書。有傳。

胡連。字商用。高安人。魁梧奇偉。身長七尺。虹髯奮張。論議英偉。見者竦動。性孤鶻傲岸。不曲合取容當世。然聞人善如己有。嘖嘖稱之。恐後。士大夫與遊者。或有過輒曰。胡公其知之否。連或聞之。曳杖來。痛詬弗已。俟其人引咎自責。復怡然笑曰。友道貴直。非訐也。平生不尙華麗。布衣脫粟。處之澹如。學精於易。元季兵起。杜門。惟事親爲務。母喪。終制弗御酒肉。父旅歿。括蒼。時道阻不通。蒙難走二千里。卒負以歸。癸丑。漢帥歐祥遣右丞劉敬襲高安。據之一時。名流皆爲所羅。否則遇害。連獨斂迹。匿去。甲寅。明兵至。敬大恐。謀掠士女金帛。火高安。退保新昌。連知事急。乃往見敬。麾下院判雷均正等曰。事已迫矣。不蚤爲之所。恐立受禍。高城旣不能保。況新昌乎。且天命人心。已歸眞主。觀大將軍用兵。可知戰勝攻克。迅若雷掃。勢必不敵。事貴幾先。失之悔無及也。均正等曰。君言是也。然右丞不我從。奈何。請自往說之。敬懼聽命。欲先詣督府投書。而難其人。復要連以行。連曰。吾行矣。恐汝等先諾後悔。城中禍福未可知也。均正等誓不敢。遂至臨江。白於大將軍。與譚深喜。欲卽官之。苦辭。賜衣一襲。俾還。於是敬等相繼出降。城中以戶計者十萬。以

口計者五倍。懽然以爲更生。洪武八年擢教句容。直諒忠信。士子化之。尋以疾歸。每撫膺歎曰。吾乃止於是命也。幸易詩書諸家說。析而係於各章之下。於易則又以程朱之論會通之。而芟其繁。著爲書數十卷。識者謂其得四聖人意。諸史百子手筆者二百餘卷。每呼其孫振指視之。曰。卽不諱。後遺汝以此矣。賦詩爲文有奇氣。有胡子存稿。將易簣。親友環視。強之曰。灼艾或可起。舉手加額曰。君子貴知命。遂逝。

唐之瀆。本名禹士。以字行。父肅。字敬處。號丹崖居士。山陰人。生而長身巨鼻。敏而勤學。通諸經。旁及子史。陰陽醫卜書數之學。無不研究。文簡潔而雅奧。律詩步驟盛唐。樂府古詩。上薄漢魏。尤工篆楷。深得筆意。至正壬寅。江浙中選道梗。不得上。省臣便宜授杭州路書院山長。轉嘉興學正。明兵取浙西。例起赴京。以父憂東還。洪武三年春。用薦召至京。纂修禮樂書。擢翰林侍讀。科舉法行。預告南京。扈東宮。拜英陵。以疾失朝。例免官。歸鄉後。復謫佃於濠。甲寅至瞿相山卒。所著有萍居稿。文斷諸事。

吳勤字孟勤。永新人。幼穎敏。方學語時。乳媪負之行廷外。以手指地。媪不願行而過。少焉仍經其處。復以手指地。乃視之。得一大錢。媪意其所欲。取以爲弄。指錢上字。推媪手置案間。人皆異之。十二三於五經羣書咸成誦。文章煥發。欲就試。其父止之曰。我在爾且止。應曰。兒欲遊戲耳。非謂有所進取也。弟仲謹。英邁俊秀。俱負才名。人謂之吳氏雙鳳。兵亂。謂弟曰。苟如此何以自立。乃以弭盜之策。獻元守臣納。速兒了。切中時弊。守不能用。戊戌避難於洪都。時漢兵至。被圍。一日。上滕王閣。觀其勢甚熾。乃言曰。使我得千人守此。賊安得至斯。聞者壯之。欲薦於司徒道童。曰。城破在朝夕。我豈能坐爲魚肉乎。明且道童遁。勤由間道。

歸。癸卯上遣將平吉安。紀律嚴肅。曰此真王師也。向者狐鼠寇竊。惡能有成。乃往見總帥。時淮南郭奎爲參謀。相見卽傾蓋劇談。達旦不寐。遂出所爲詩。命勤編正。言於總帥。署爲泰和令。以親老辭。洪武初。被徵至京。試經學第一。除武昌教授。日與學者講明學問。於聖賢經傳。剖析與義。反覆開導。諸生才質高下。咸底於成。後多歷顯官。莫不感德。曰此吳先生之教也。數載。以從弟平陽同知孔麟故。得解官歸。惟箸篋盛故衣而已。遠近學者接踵於門。洪武戊辰。楚王遣人致書。請爲諸王子師。至則待以殊禮。凡十載。小心慎密。教日有益。蜀王尤敬慕。有自鄂來者。必問曰吳先生安否。湘獻王亦致書問候。有詩曰。清才美德冠時儒。辭翰欣看逼褚虞。自愧譎才思見面。故憑海鶴寄音書。又曰。螺浦回舟喜遂歸。故園松菊想披離。醴筵薄設待君久。同賦淮南招隱詩。歲寶興。四方交聘。以司文衡。楚王念高年馳驅良苦。卻其聘幣。而自遣幣如其數。皆不受。太宗卽位。茶修太祖實錄。召入史館。旣畢。荷賞賚。除開封教授。周王召講。贈予甚厚。世子尤加崇重。每見不稱名。惟曰吳先生。永樂三年卒。年七十六。公學問博邃。於羣經子史。靡不究析。文章溫瀟平易。不爲險刻峭厲之言。作詩古體。追漢魏五七言。近體有盛唐音。字有晉人風格。不擇紙筆。俱得其妙。嘗燈下書小楷。盡一鼓可數千字。雖年少者自歎弗及。性至孝友。弟沒。撫諸姪。田產悉與之。謙己接物。雖小夫傭奴。皆知敬愛。喜飲酒。無賓客。終月不飲。若值親故。傾倒連日不醉。胸次軒豁。未嘗有分毫塵滓。每於廣席掀髯論辯。一坐盡傾。時誦佛經。學者疑而問之。泫然曰。先夫人遺命也。有匡山樵者集黃鶴山樵集。幽翁集。大義齋集若干卷。

胡翰字仲申金華人翰幼聰睿甫七歲卽錚錚自異一日於道中得遺金守不去坐候遺者至而還之歸告母何何奇之曰此子必以志節顯長侍父宦遊關洛從吳澄受學博覽經史又登許文懿之門學益淵邃時黃文獻公潛以文章名天下天下師尊之見翰文大驚稱贊之不容口而翰嘗然不爲之屈也遊京師羣公交譽之多所契合而於武威余闕宣城貢師泰尤號知己或勸之仕不應還過廣川弔董子謁曲阜拜孔子墓而歸已天下亂避地南華山中著書爲樂洪武初大臣交以才薦召見時方籍金華民爲兵翰從容進曰金華民多業儒不習兵籍爲兵徒糜廩粟耳上立爲罷之已上憫翰老儒不欲煩以事授衢州教授會修元史召入局纂修撰英宗睿宗本紀及拜住道童丞相等傳書成賜金綺而遣之愛北山泉石佳勝定居或乘輿入城訪故舊則留連數日高明卓絕所養甚深出言簡奧不煩而動中繩墨極乎博而守則約務乎大而不遺乎細於人鮮所推讓而所許者衆必以爲賢於言不輕發而所言者人必以爲當其所著衡運併收皇初正己諸篇皆覃精名理窮極造化爲天下之大綱正法焉祭酒吳沈以爲如五曜麗天芒寒五色朱絃在廟肅然其音云洪武十四年卒年七十五著有春秋集義文曰胡仲子集詩曰

長山集

李德字仲修番禺人夙負逸才博覽羣籍工文詞尤邃於經學明毛詩尙書洪武庚戌薦至京師上親策問賜徐大全等出身有差德預焉授洛陽典史遷濟南西安二郡幕非其好也政暇徧覽帝王遺墟登高作賦發其胸中磊落之氣人爭傳誦嘗著論謂西安南陽皆天下大形勝所在建不拔之基者當擇而都

之江東非其匹也。歷職郡邑十餘年。自陳衰暮。願就教官。得爲漢陽教諭。當兵革初息。爨舍翳蓬蒿中。徒僅十數輩。皆野獷。不可與語。盡心訓迪之。言諸有司。羅致民間子弟。俊穎者館穀焉。人始知向學。秩滿。改廣西義甯縣。其俗尤陋。德立法。凡遇家有吉凶事。當告假者。隨貧富以楮幣調之。孜孜勸諭。使約束鄉黨。不得爲惡。習俗日美。科貢漸盛。方有薦達。而德以倦遊南歸。卒於家。詩多效長吉。太白。孫蕢笑之曰。子眞混元皇帝遠孫也。乃力追古作。有易庵集。少嘗自號采真子。著論如子書。晚更潛心伊洛。嘗謂誠意爲古聖哲心要。所作詩有曰。意誠諸妄遣。可以通天地。又曰。鑿空非自然。立異豈眞實。堯舜與塗人。其初本同一。故世稱有理學者。必曰李仲修子孚。字底信。亦能詩。

蕭執。字子所。一名雅言。泰和人。祖夢得有文行。嘗廬墓三年。以毛詩訓其鄉人。執博學強識。結廬讀書於武山。尤長於詩。洪武辛亥鄉薦。選國子學錄。分教胄子。多所造就。明年夏至。上將有事於北郊。前朝丁巳大雨初止。駕詣齋宮。召兵部尚書吳琳。禮部主事宋濂。率文學能賦之士從焉。於是執偕禮部尚書陶凱。工部尚書黃肅。翰林應奉張籛等十二人入見。時上新服絳裳紗巾。神慮閑適。顧問曰。今茲祀事。是將天宇澄霽。克厭朕心。爾等以文職陪祀。宜卽時物題詠。因命賦殿下柳檜併荷露。退而詩成。以次呈獻。上親覽誦之。品第有差。旣而復命中官傳旨。往殿後觀梔子花。人給紙一。俾各賦詩。詩旣成。序進如初。執官最後。上閱其詩。喜動顏色。因命起居注劉季道出諸詩。令在侍者徧觀之。執班列遠。召使前。其爲上所寵異如此。贊教三年。念親老。力丐歸侍。凡三四上乃得請。旣歸。鄉之子弟以其教太學有成也。相率修贄。從之。

游者日衆。於是衆爲建塾。買田競助成之。蓋道義所風。不勸而自集也。性至孝。旦夕不離親側。沒廬墓三年。誘進後學。孜孜不倦。申國公鄧愈統兵。劉龍泉寇臺。連泰和詣軍門言禍亂之由。於是愈下令禁止。邑人德之。禮部侍郎劉崧序其詩集行於世。

秦約字文仲。淮安人。洪武初。應召。試慎獨箴。拜禮部侍郎。以母老辭歸。再徵入京。上疏乞復書院。書堂。義學。守令之選。另立一科。四十蒞職。百日舉代。郡邑三年造冊。與誌書同進。以備國史採擇。上悅。以約年老。難任繁劇。授溧陽教諭。御史練則成。待制吳沈薦約宿學。遺老。合在館閣。不報。在溧陽八年。請老歸卒。文章務求理勝。而詩尤工。所著詩文曰樵海集。別有師友話言。樵史補遺。孝節錄。詩話舊聞。崇明誌諸書行於世。

張羽字來儀。以字行。更字附鳳。溧陽人。領鄉薦。授安定書院山長。洪武四年。以儒士徵至京。應對不稱旨。放還。再徵爲太常寺丞。撰滌陽王碑。俄坐事謫居嶺南。未半道召還。自沈於龍江驛前。博學好古。行章精潔。有法。尤長於敘事。詩法清麗。作畫師小米。所著有靜居集。同時同縣一道士亦曰張羽。字仲翺。能詩。書法甚工。

徐賁字幼文。本蜀之郫人。後徙居蘇州。賁工爲詩。與高啓諸人齊名。尤善寫山水。秀潤可愛。張士誠居吳。辟爲屬。俄謝去。居湖州之屬山。洪武中。以薦至京。奉使晉冀。及還。檢其橐。惟紀行詩而已。他無所有。授給事中。進退有恆。不失尺寸。改御史。巡按廣東。又改刑部主事。陞廣西參政。以政績卓異。推河南左布政使。

方命大將靖洮岷。道出河南。以賁犒勞。不時下獄死。所著詩曰北郭集。

王佐。字彥舉。先河東人。元末。侍父宦南雄。經亂不能返。因奉母寓廣州。遂爲南海人。時孫贇與佐結詩社於南園。開抗風軒。延一時名士。佐才思雄渾。體裁甚工。贇深重之。構辭敏捷。王不如孫。句意沈著。孫不如王。會何真據廣東。開府求士。與贇首被禮聘。真敬重。使掌書記。軍旅事多見咨詢。李質者。德慶豪帥也。據肇慶。佐恐其有異志。與贇往說之。甚歡。質遂修好。然質尤好文義。衣冠之士。多往依之。歸言於真。遣使招致。由此士凡以一藝名者。真皆館穀之。廣中人文。號爲一時極盛。洪武六年。薦拜給事中。論思補闕。恆稱上意。學士宋濂嘗拜賜黃馬。上爲歌。命諸臣和之。佐斯須而就。清新富贍。上覽之喜。賜鈔。上遊幸。或遇會心處。多命之賦詩。三吾嘗同詠。署中桂。驚其才高語妙。以爲名世之作。性不樂樞要。嘗曰。蚤朝何如宴起。章服何如簪衣。卽欲告歸。或曰。少忍之。不虞性命付一擲耶。遲徊二載。乞骸。上憐其誠。允之。陛辭。賜鈔五千。爲道路費。時天威嚴重。臣僚自陳者多被譴斥。或有不測。佐以恭慎得歸。故當時以爲難。性孝弟。父沒時貧甚。有廖元正者。爲料理喪事。殯諸南雄之五里山。終身事元正如父。及仕於朝。元正子犯法。言於有司。以已資贖罪。元正旣死。哀慕終身。著述甚富。評者比之高適。岑參焉。

明書卷一百四十六

列傳十

文學傳二

孫賈，字仲衍，順德縣人。性敏警，儀表秀偉。於書無所不窺，詩文多不屬草，援筆立就。若不經思，而雄渾深致，可誦。少負節槩，不妄交。元季避亂山澤間，東筦何真保南海，甚禮重之。與王佐、黃哲、趙介等並稱五先生。洪武元年，征南將軍廖永忠至，賈爲真作書請降。永忠徵典郡庠，三年庚戌始詔天下設科取士，賈舉於鄉，授工部織染局使，陞虹縣主簿。時經兵燹，十室九空，勞來安輯，民多還業。一載召爲典籍，學士宋濂、樂詔、鳳承皆詹同，皆推遜。曰：嶺表奇士也。日侍上，奏對便給，容觀飄洒。一時見者屬目，上亦重之。八年，同修洪武正韻。九年，以奉常之節，監祀四川，居三載，力求補外，主簿平原，無何逮繫，輸左校築牆，望都門，謳吟爲粵聲。督工者以聞，召至陳詩，語極忠愛，釋之。十一年，罷歸里。十五年，召爲蘇州府經歷。二十二年，謫戍遼東，都督梅思祖素聞其名，迎居家塾。是年黨禍，時思祖已死，其家得免。賓佐皆原，忌者獨錄賈籍中，坐死。長歌就刑。天下冤之。門人黎貞時亦在戍，收其骸葬於安山。賈著有通鑑前編綱目、孝經集善、理學訓蒙、西菴集、和陶集、集古律詩。

楊基字孟載。先蜀人。祖宦游江左。基生吳中。遂家焉。穎敏絕人。九歲能背誦六經。著書千萬餘言。名曰論鑿。試儀曹不利。會天下亂。歸隱於吳之赤山。張士誠時辟爲丞相府記室。未幾辭去。又客饒介所。明兵下江南。籍錄諸臣。基以饒氏客安置臨濠。旋徙河南。洪武二年放歸。尋起爲榮陽知縣。謫居鍾離。久之被薦爲江西行省幕官。以省臣得罪落職。六年又起奉使湖廣。召還授兵部員外郎。出爲山西副使。進按察使。後被纒奪職供役。卒於京。基工詩。初會稽楊維禎客松江。往來吳中。以詩自豪。基嘗以座上賦鐵笛歌。維禎驚喜與俱。東語所從曰。吾在吳又得一鐵來矣。若曹就之學。優於老鐵學也。著有眉菴集。

高啓字季迪。吳人。少警穎。力學能詩文。尚氣。每論事輒傾其座人。張士誠據平江。文士響臻。啓獨居吳江之青邱。歌詠自適。時饒介之。丁仲容以詞學自雄。見啓詩大驚。禮爲上客。啓怡然不屑也。尤好權略。一時武勇士多下之。明興。以薦。借謝徵等應召。修元史。授翰林編修。命教諸王及諸王子弟。一日薄暮。上御闕樓。召見啓及徵。聞其對句大悅。擢戶部侍郎。徵吏部侍郎。未幾力辭罷去。仍賜金給牒放還。復居江上。始號槎軒。又號青邱子。銳志翮翮。先是啓以史事爲祭酒魏觀所知。及是觀爲吳守。延居城中。訪問得失。相接甚歡。會觀興繕郡治。讒者搆之。罹重辟。而上梁文適出啓手。遂同及於難。時年三十九。啓身長七尺。具文武才。於書無所不闕。爲文喜辯博。馳騁上下。精采煥發。而於詩尤工。與楊基張羽徐賞號吳中四傑。所著有鳴缶集。鳧藻集。

王行字止仲。號半軒。吳縣人。父市藥。挈爲助。尚髫年。藥贖千品。悉志其某某若多寡。酬應無或遺。主媪老

好聽稗官家說。卽默記數本。迨晚歌之爲娛。主異之。爲語若能讀書否。授魯論一帙。翌日已成誦。大奇之。罄以所度經史百子。恣其探閱。所得益深。未弱冠辭去。受徒於齊門舊居。時聲譽殷發。一時名士咸願與交。而議論踔厲。證據今古。常屈其座人。然家徒壁立。實無留策。詢所學。曰向得之藥主人耳。爲詞章。汪洋奧美。關節開解。千緒萬端。參錯桀出。一時老生咸畏之。臨川饒介之爲參政。分守浙右。以詞翰豪視東南。號醉樵。爲之詩歌者殆徧。惟難於一文耳。聞延與語。曰是非莊騷家言。莫殫其形容。卽席爲說。不加點竄。饒頓足曰。吾見中朝才雋亦夥。未有類子敏而奇者。真天才也。亟疏薦。時天下多事。未及用。長洲沈萬三秀者。資雄當世。爲禮聘於家。每成章。輒償白金以益。麾去曰。使金塢可守。則然躋之慘無及也。何濫取多田翁爲。又善談兵。三吳鼎沸。所據多壘。礮石自固。私語曰。兵法不云。柔可以制剛也。或詢何居。曰設植蕩篠。順而倬者。繫布於其端。如駢轡然。人出沒其下。雖礮至。布必隨之低昂。則人無害而不可盡矣。後常遇春提兵至。果用是計。敵兵計窮。城遂破。洪武初。郡庠延爲經師。時訓導無常祿。猶儒生衣巾。弟子員多出綺紈。皆易之。以五經雜進問難。悉爲辯講。極底蘊。泊刪潤課業。迎刃而解。節有評品。至是皆吐舌曰。王先生未可以詞章儒目之。故有行書廚皮漆籠之號。以其該博而無滲漏也。郡守江夏魏觀。河內王觀。以國子祭酒。刑部侍郎。前後遷於蘇。皆重之。思欲聞之。朝不果。年漸老。解去。避迹石湖。以經訓爲常。凡碑銘序記等文。求者悉歸焉。間寫圖其上。自適。旁通緇黃家學。與論苦空元寂。累日忘倦。晚更號楮園。有楮園集十五卷。半軒集六卷。學言稿十三卷。四六劄子二卷。通意宜資一卷。宋系統圖二卷。二子皆役於京。欲往

遊焉。或尼以法網密。非儒者泮渙之日。微哂曰。虎穴尙可嬉。吾爲布衣士。何望哉。抵京主一祝家。因之見重於涼公藍玉。延誨其子孫。每恨相知晚。數薦之。召對。勸上行王道。正禮樂。簡賢立根。爲首務。以其迂闊。弗之聽也。未久以藍連坐死。年六十五。

高棟。字彥恢。仕名廷禮。漫士其號也。宋尙書張慎之後。曾祖麟。以出繼高氏祀。遂從高姓。棟博學能文。尤雄於詩。謂詩始漢魏。至唐號爲極盛。宋失之理趣。元滯於學識。而不知由悟以入。自襄城楊士宏始。編唐音。正始遺響。然知之者尙鮮。閩三山林鴻。獨倡鳴唐詩。其徒黃元。周元繼之。棟與皆山王恭起。長樂。顏頊。齊名。故閩中推詩人五人。而殘膏賸馥。沾溉者多。黃終於校官。周刑曹員外郎。棟與恭並自布衣入翰林。恭除典籍。棟爲待詔。九年陞典籍。平生賦咏。流傳海內。有稿曰嘯臺集。曰木天清氣集。其選唐詩品彙。九十卷。拾遺十卷。議者服其精博。能書工畫。時稱三絕。書得漢隸筆法。畫原於米南宮父子。出入商高間。在翰苑二十年。四方求詩畫者爭至。金帛修餼。歲嘗優於祿入。善飲酒。喜談謔。與人無賢愚。待之如一。素彊無病。晚得風眩疾。歲輒發。無甚苦。一日與故人飲極驪。夜分乃寐。旦忽眩作。弗能言。

曾榮。字子敬。永樂二年進士第一人。授翰林院修撰。命解縉選取進士。進學文淵閣。名翰林庶吉士。榮學問日進。時召入試。迅筆千言立就。理詞皆到。上屢摘羣書隱僻事問之。榮悉能對。以故上甚喜。名聞天下。明年修永樂大典。爲副總裁。陞侍讀。數侍燕閒。應制賦詩。有薦文士者。必問得如曾榮否。考其文。竟不及榮遠甚。內艱。起復。扈從。邑人坐奸黨事。詞及榮。詔特原。曰朕惜爾才也。榮居長安右門外。火延禁。

垣亦不問陞侍讀學士。修天下郡縣志。爲副總裁。書成。陞左春坊大學士。仍兼侍講。從宣宗自南京還。陞少詹事。又預修三朝實錄。再扈北巡。三考會試。爲文章如源泉混混。沛然千里。又如園林得春。羣芳爛然。與致所到。筆不停揮。狀寫之工。極其天趣。他人不足。已嘗有餘。自解胡後。獨步當世。性孝友。喜獎拔。後進儀貌魁偉。襟度坦夷。而神情灑落。能飲酒。善談論。仕三十年。徒以文學自見。卒贈禮部左侍郎。袁昶曰。明興。劉宋以宗工司制代言。文體渾厚。繼以東里。溫醇雅則。有歐陽少師之風。子啓。天才雄麗。倚馬萬言。其文如蘇長公。浩若懸河。注之不竭。詩古體有魏晉風。律宗初盛唐。亦一代之鴻匠也。

李夢陽。字獻吉。慶陽人。母夢日墮懷中。寤而生焉。故名。年十八舉鄉試第一。明年弘治癸丑。登進士高第。丁內外艱。戊午授戶部主事。倡爲古文辭。以變衰陋。斷自秦漢而止。六代以下弗論也。乙丑進員外郎。時外戚壽甯侯張氏。怙寵驕縱。開張皇后奪民莊田。聲焰薰灼。莫敢問。夢陽上疏。以爲夫天下之勢。譬之身也。欲身之安。莫如去其病。欲其利。莫如祛其害。欲令終而全安。莫如使漸不可長。今天下之爲病者二。而不之去也。爲害者三。而不之祛也。爲漸者六。而不能使不可長也。乃顧汲汲曰。是奚不安也。奚不利也。奚不令終而全安也。是何異於不藥而求病愈也哉。臣謹以所見而陳之。一曰元氣之病。夫元氣之病。有其幾。無其形。譬患內耗。伏未及發。自謂之安。比及病在元氣。臣竊觀當今士氣。頗似之。孔子曰。邦有道危言危行。今人不喜人言。見人張拱深揖。口訥訥不吐詞。則目爲老成。又不喜人直。遇事圓巧而委曲。則以爲善處。是以轉相則倣。翕然風靡。不復知有言行之實矣。且大臣者。庶官之表。而民之望也。今大臣則先不

喜人言。又惡人直。夫諫官得以風聞言事者也。今大臣被彈劾。則率廷辯以求勝。語人曰。我非要作官。但要屈直明白耳。及直矣。又恬然作官。此何理也。往大臣有親之喪。服除。非詔不起。今大臣服除自起矣。如此尚得謂之有禮義廉恥耶。夫無禮義則佞人進。乏廉恥則國無防。佞人進則互相欺誑。國無防則紀綱不張。臣竊謂此等不治。必積漸不可救藥。故曰四夷未侵。百姓未離。刑政未墜。疆土未蹙。而國危主憂。此臣所謂元氣之病也。二曰腹心之病。夫腹心之病。攻之則難。不攻則亡。今內官者。腹心之病也。夫內官陰性而狼貪。其地逼近。又朋北難翦。今倉廠場庫錢穀之要也。皆內官主之。少者五陸輩。多者二三十輩。且夫一虎十羊。勢無全羊。況十虎而一羊哉。今某某有司摘發其奸。幸陛下洞見其實。外議僉曰。是必不赦。不然且竄斥。今數月矣。猶閣而不行。夫人情莫不遮於潛而玩於彰。彼未摘發。尚有嚴心。今其奸已摘發之矣。不置之法。又不竄斥。彼何所憚而不爲乎。昔人有言曰。宦官有罪不可赦。有缺不可補。言難除也。今皇城之內。通名籍幾萬人焉。亦多矣。陛下又敕禮部選年十五以下。淨身男子五百名。將安用耶。夫滅絕人類。必戕天地之和。戕天地之和。則災害必至。災害至則五穀不熟。人民離散。天道乖於上。人心怨於下。而陰性狼貪之圖。無忌妄行於中國。不危者鮮矣。臣故曰內官者。腹心之病也。今陛下誠於此時。拔廉直。獎忠鯁。斥無恥大臣。進盧扁之左。則必轉病而爲安。今議者必曰。彼曾不指實某某直。某某無恥。泛言難行。然不知上者風也。下者草也。拔一君子則君子進。即有小人相率而化於善矣。且人不幸而有病。擇醫而治之者。爲愛身也。今某某有司幸摘發其奸。是亦國之醫也。若一切閣而不行。是醫能治之。而上

弗肯使也。今誠欲腹心安。莫如剗內官之權。欲剗內官之權。莫如有罪不赦。有缺不補。傳曰。治未病。不治已病。今固已病也。而猶不治。是可惑也。已所謂三害者。一曰兵害。夫兵害者。冗食而無補。空名而鮮實也。夫強本者。所以弱枝也。今在京之兵。以衛計之。七十有餘。分爲三營。一曰神機。二曰三千。三曰五軍。蓋帶甲控絃者數十萬焉。意固欲以強本也。然至正統己巳。纔數十年耳。拔之乃僅得十二萬焉。亦寡矣。於是十圍營。至今又纔數十年耳。日者遣將北伐。拔之不滿三萬焉。然其腰韃弓刀不全也。騎士則牽露骨馬。又旋置鞍轡等。夫兵數不減於前。食之者增也。一旦而狼狽若此。何也。官不恤其軍。豪勢多占使。遠者逃。近者潛。職守不以報。糧籍不開除。又壯丁各營其家。老弱出而應點。宜其食之者增。而用之者寡也。夫騰驥四衛者。今非所謂內兵耶。外官既不與稽其數。征役又不選用其丁。故其人率富豪而氣驕。夫內官者。陰狡而狠貪者也。以富豪氣驕之人。而率之以陰狡狠貪之徒。茲有害可忍言哉。且夫錦衣衛。爪牙之司也。今內官之家人子弟。官之團營。兵之精也。內官參之。內兵又其專掌之。陛下乃何獨而不爲之寒心也。古人有言曰。官惟賢。賞惟功。今團營把總。號頭等。孰非內官之私人乎。彼其家人子弟。抑孰非詭託冒官也。乃遂令布列要地。爲爪牙。詩不有之曰。萌芽不折。伐將斧柯。燭火不撲。燎原奈何。言貴豫也。陛下誠以此時查往年李玉事例。仍置總兵官。使參掌內兵。又令團營把總。號頭等。自今不得置其私人。乃於是令諸左右曰。其詭託冒官自首者聽。但罷免不問。如此則威立而恩亦流。所謂銷患於未形。計之上也。二曰民害。夫民害。臣以爲斂重而民貧。又貪墨在位。恩不下流也。臣聞惟智者而後起家。夫人未有無所賴。

而生者也。今百姓賢者百無一二，愚蠢者十常七八。然貧苦無賴，而有司者不知恤也。斂之不問貧富也。役之不問勝否也。曰是爾職焉矣。是故富者剝削，貧者稱貸。稱貸之不足，則必鬻子；鬻子之不足，則必遺竄。一旦棄父母，捐親戚，背鄉離井，愁怨之聲，上干天和，則必有水旱風雹之災。逋者不還，居者縲絏而牽連，則必有無辜暴露之屍。臣故曰民害者，斂使之也。夫內府供用，有常數也。宜有常筭焉。今油蠟皮張諸料等，較弘治初年，費且十倍於前。此何也？蓋下者效上者也。取贏者未有不羨者也。今既十倍於前，則戶工二部科派，必有倍矣。下之州縣，必有倍矣。百姓輸納，又有秤頭等，必有倍矣。又經內官，必有賄賂，是益又倍矣。於乎！民日貧而斂日積，當道不苦言以聞，有司乘機而肥其家。如此而猶望其治，是真卻步以求前耳。陛下前固嘗降詔旨存問矣，然薄數不減，派科不省，稱頭如故，賄賂公行無憚。此所謂虛名而實禍也。臣故曰貪墨在位，恩不下流者，此也。三曰莊場。畿民之害，臣伏觀洪武某年，詔曰：直隸拋荒地，聽民開墾，永不起科。夫民既自開墾之矣，不可謂非其田矣。今皇親之家，聽無賴光棍投獻，主使謂非其田也。請之朝廷，朝廷亦謂非其田也。率給賜皇親家。皇親家既奉天子命爲己有，乃輒遂白奪其田土，夷其墳墓，毀其房屋，斬伐其樹木。於是百年土著之民，蕩產失業，拋其父母妻子，千里之內，舉家騷然不甯矣。夫皇親與國同休戚者也，而祿非不豐，貴非不極也。乃祇以區區之田，損害赤子，動搖基本。如此是不欲與國同休耶？嗚呼亦甚矣。昔者魯慶焚孔子見之，但曰傷人乎？蓋貴人賤馬也。今蘇州牧馬草場，與百姓爭阡而競畝者，尺分而寸剖之，臣竊悲也。是非賤人而貴馬也。夫草場數千頃地耳，今三遣官矣。百姓連年

坐句攝轉相牽聯。妨廢本業。耽閣其生理。男不秉耜。女不上機。賣男鬻女。弱者轉而死。泥塗者過半矣。嗚呼。是何賤人而貴馬也。臣雖未詳其始末。竊計今事勢。萬無百姓侵官之理。設有之。所辦亦官租耳。非若皇親之家。占之爲已有也。今據勘牒。四至與民之爭。止十之一二耳。臣謂宜置而不問。夫王畿天下之本也。今以數十百頃之地。失黔首之心。傷陰陽之和。臣故知陛下不忍矣。陛下幸哀憐聽臣愚計。敕戶部查景泰六年勘官馮譚奏內事理。以前項田土。給民徵租。但以空閑草地牧馬。六漸者。一曰匱之漸。夫匱之漸者何也。臣以爲兵連然耳。然又苦浪費。今各邊用兵。以將則庸。以卒則罷。糜財而無功。曠日而損威。而錢穀吏俛首供給。莫敢如何。稍有不繼。則軍吏諉以自解。是故倉廩不足。不曰兵者糜之也。是錢穀者誤之也。錢穀者不曰已誤之也。曰是無米而求粥也。於是始有和買之議矣。和買而不足。於是有空運之例。空運而又不足。於是乞內帑之銀。臣始至戶部。太倉庫銀尙百七十餘萬。今銷耗且過半矣。然而乞者未已也。由是積漸而不止。雖欲不匱。烏可得耶。夫竭天下之力以供邊。而日猶不足。其故何也。糜財而無功。曠日而損威者爲之也。夫錢者泉也。言流也。散於上而聚於下。公家削則私室盈。今京城內外。千觀萬寺。亦熾矣。顧又不止。彼左右侍臣。孰非造作者也。造作動。孰非以鉅萬計。諺曰十入一出。今彼鉅萬出。則其入不止於鉅萬明矣。夫上惟風。下民惟草。今方春氣和。耒耜在野。陛下乃不發倉廩。助不給賑。不足。顧徧察寺觀等。敕給費修葺之。是道民以奉佛也。彼以鉅萬入者。又何憚而不造寺。夫智者察微。今貸入而盈私室矣。又出而造寺觀矣。設卒有水旱之警。兵甲事興。內取則已匱。外斂則民窮。臣不知陛下計所出矣。

故曰又浪費者此也。二曰盜之漸。何也。臣以爲其機在民窮。夫盜者非不知法當死也。彼以爲往固無食矣。今盜而得食。卽死。不猶愈於餒乎。往固無衣矣。今盜而得衣。卽死。不猶愈於凍乎。往有租調官司之轄矣。今盜而得自由。不猶愈於追繫鞭笞乎。夫天下無智愚強弱。舉俛首捧心以事我者。以有法維之。且畏死也。今旣死而愈於凍餒追繫鞭笞之。則彼亦何所不至耶。計今事勢。非但憂盜將必有大患。大患者何。所謂有亂之機。無亂之形也。夫今天下無不臣之邦。四夷無不庭之國。百官奉職。筐篚歲至。太倉有紅腐之粟。武庫之兵朽而不用。又無方二千里水旱之災也。然而哨聚殺人。劫縣燒村。剽掠婦女者。日相聞也。假如不幸而有方二千里水旱之災。武庫乏兵。太倉竭粟。百官不奉職。夷翟外侵。海內有警。則勢事又如何矣。故曰有亂之機。無亂之形。嗚呼。此亦可以寒心矣。臣謂宜趁此急選良有司。恤饑賑寒。以安民心。又密令整飭城池軍馬。以伺緩急之變。夫安不忘危。霸者之略。有備無患。聖王之政。況今承平日久。民不知兵。萬一有慮外之警。有如平原睢陽之倫乎。臣故曰計今事勢。非但憂盜將有大患者此也。三曰壞名器之漸。夫壞名器之漸者。臣以爲黜陟失制也。夫明王懸爵賞以待天下之賢。將以奉天而理民也。故曰五服有章。自天命之。示非我也。又曰爵人於朝。與衆共之。明至公也。是以古之英君。甯捐百萬之費。而斬一郎之拜。其意亦謂此耳。而今乞官者官。乞廕者廕。黜其父者陟其子。黜其祖者陟其孫。臣不知陛下計所出矣。夫廕者。所以報功。又示勸也。今黜者旣陟其子孫。則有功者何勸焉。是以高其爵。不足以勵。糜乎賞。下足以風。蚤緣鉅刺之風旣行。而廉恥名節之士遂寡。且陛下何利於斯而爲之也。夫薰蕕同器。不

知有薰。廉污並賞。孰肯爲廉。陛下若謂天下之大。何怪此一官。則所謂弊袴之藏。繁纓之惜者。皆非邪。惟名與器。不可以假人。臣故曰壞名器之漸者。黜陟失制也。四曰弛法令之漸。夫弛法令之漸者。臣以爲舛與玩爲之也。夫舛莫大於縱罪。玩莫大於長奸。昔者舜爲天子。瞽叟殺人。士師執之。孟子以爲爲舜者。但宜竊負而逃。蓋法者。公之天下。受之祖宗者也。掌於士師。士師不得而專也。出於天子。天子不得而專也。是故士師可以執天子之父。爲舜者不可私其親。曩者犯人王禮。擅搶夷僧貨物。損辱國體。傳笑外邦。獄案已具。法所不赦也。陛下何從而赦之耶。以爲無罪。則固已追償其貨直矣。以爲有罪。未聞有罪而赦之者。也有罪而赦之。是縱罪也。縱罪則奸長。奸長則政舛。政舛則民玩。民玩則令慢。則法弛。此古之所大忌。而今之所甚忽也。夫忌莫大於刑忽。又莫大於私。何則。刑天討也。公天道也。王者不私其天。故罰一人而千萬人懼。諺曰。勿謂尺五。後且不補。臣固以王禮之赦。爲弛法令之漸。五曰方術眩惑之漸。夫方術眩惑之漸者。臣以爲去之不力。則誘之必入也。夫自古帝王享國長久者。畏天而憂民也。非以奉佛者。康強少疾者。清心而寡欲也。非以事仙也。且陛下獨不見梁武唐憲乎。梁武奉佛最難。然罹禍最慘。唐憲事仙又最謹。然年又最短。此其明效大驗。彰彰可考者。而今創寺觀。請額者。陛下弗止也。比又詔葺其圯廢。臣不知陛下乃何所取於彼。而爲之也。夫真人者。太虛無爲之名也。今酒肉粗俗道士。陛下敬重之如神。尊爲真人。又法王佛子等。並肩輿出入。珍衣錦綉。陛下踐祚。詔曰。僧道不得作醮事。攝惑人心。堂堂天言。四海誦焉。夫陛下神心睿姿。不減於前也。乃令復爾者。臣故知有誘者也。夫誘者必曰其道妙。其法靈。今天變

屢見於上。百姓嗷嗷於下。邊報未捷。倉庫匱乏。信如真國師。道足以庇足以祐。陛下何不遂一試之。使天變回而嗷嗷者安乎。此固必無之事。而陛下不察。反聽其誘。此臣之所日夜悲心者也。六曰貴戚驕恣之漸者。臣以爲其防決也。夫水防惟工。國防惟禮。水決則匱。禮決則陵。昔者高皇帝制親令曰。皇親之家。不得與政。臣嘗伏讀嘆息。以爲聖王不易之論。及退而考夫殞祿列爵。則又使大貴而極富。已又考其器度田奴之等。則又不使之踰也。臣於是又歎曰。是所謂禮之防也。夫皇親與國至戚也。不宜有間。今顧制禮以防之者。臣以爲此固保全而使之安也。今陛下至親莫如壽甯侯。所宜保全而使之安者。亦莫如壽甯侯。乃顧不嚴禮以爲之防。臣恐其潰且有日矣。夫下僭則上陵。今壽甯侯招納無賴。罔利而賊民。白奪人田土。擅拆人房屋。強擄人女子。開張店房。要截商貨。而又占種鹽課。橫行江河。打黃旗。勢如翼虎。此謂之不僭不可。夫僭則陵。陵則逼。大逼則法行。且今側目而視。切齒而談。孰非飲恨壽甯者也。夫川潰則傷必衆。萬一法行。陛下雖欲保全而使之安。得乎。臣竊以爲宜及今慎其禮防。其所以厚張氏者至矣。亦杜漸剪萌之道也。昭聖皇太后見疏大怒。孝宗不得已。下夢陽錦衣衛獄。拷掠詰責。辭氣無所撓。一日上坐文華殿。召見大學士劉健。李東陽。謝遷。問李夢陽宜何如。劉公叩頭對曰。夢陽狂直。不足深罪。上色變。李不敢對。叩頭而已。謝遷從容對曰。李夢陽雖狂。然其心無他。實欲效忠於陛下。上曰。渠無禮。何指宮中爲張氏。遷對曰。漢爲劉氏左祖。宋實所以安劉氏也。所爲氏者。猶云劉家也。上色懌。曰。謝先生言是。乃得復職。一日上獨召見兵部尙書劉大夏。問曰。日來外間事何如。劉公對曰。近釋李夢陽。中外歡呼。聖德如天地。

之大。上曰：初下夢陽獄，有勸朕杖之者，其意欲殺夢陽，以快中宮怒，使朕負殺直臣名，朕故釋之。大夏曰：陛下此事，卽堯舜之心也。正德改元，丙寅進郎中，太監馬永成、劉瑾等爲八黨，盡亂朝政，給事中劉蒞、陶諧相繼論奏，而大臣未有言者。戶部尙書韓文日流涕憂憤，夢陽進曰：大臣同國休戚，此而不言，焉用彼相？文慷慨曰：吾當言。言而獲罪，報先帝於地下矣。乃屬夢陽草奏，文多不載，疏入，詔廷議其事，而八人者環哭上前，乞命。事中變，瑾遂召入司禮監，而中官王岳、范榮皆竄死。明年丁卯，大臣多罷免，瑾知韓疏出，夢陽手蓄憾不已。矯旨奪劉健等四十八人官，放歸田里，榜爲黨人。夢陽與焉，瑾切齒欲殺之。又明年戊辰，矯旨羅織夢陽罪，械逮至京，再下錦衣獄。夢陽內弟左國玉者，間行徒步從入京，走康海所，語在海傳，賴力救得免，放歸。瑾敗，起爲江西提學副使，振起古學，力變宿習，褒獎義節，訓正禮俗，士翕然向風。時宸濠懷逆，招致文學，凡吏江西有材名者，卽嚼以厚利，否則威劫之。夢陽具大名，折節下之。夢陽旣材高負氣，不肯同流俗，是以人多忌之。而江御史某向與夢陽有嫌，遂奏許上命大理卿燕忠體勘下廣信獄，摧苦殊甚。夢陽不爲屈，竟文致閒住，而布政使鄭岳適爲濠所陷，夢陽素與岳不相能，岳旣得罪，謂夢陽傾之也。濠敗，辭連夢陽，賴刑部尙書林俊力救，得亡窮治。後大臣暨撫按數論薦，不用。卒。所著有空同集若干卷，子枝善文賦，有父風，舉進士，終海州判官。

何景明，字仲默，信陽人，號大復山人，年十五以尙書魁其省，十九弘治登壬戌進士，授中書舍人。是時北地李夢陽、武功康海、鄆杜王九思、歷下邊貢，皆好古文辭，景明與論文語合，乃一意誦法古文，而與夢陽

又駿發齊名。憂憤時事。尚節義而鄙榮利。並有國士之風焉。往學士爲文。自六朝以後。日益靡靡。敝矣。明初龔元習。宣正以來。駸駸如宋。而至弘正間。景明與諸君子。始一變趨古。其文類國策史記。詩類漢魏盛唐。於是明興詩文。足起千載之衰。而何李最爲大家。今學士家每稱曰何李。屹然爲一代山斗云。在中書時。自館閣諸縉紳。與四方學士。人人願見之。又願見其詩。車馬填門巷不絕。而景明德性醇明。言儀雍雅。杯酒談笑間。詩文立就。作字復秀拔奇勁。迥出常調。一時聲傾都下。然顧高潔。不妄交遊。錢甯欲交驩。景明間持古畫求景明題。景明曰。此名畫。無污吾題。留一年終不與題。是時甯賜國姓。最寵貴弄權。景明願奴視遠之。會乾清宮災。應詔言便事。乃極言邊言。邊軍番僧義子數事。義子者斥錢甯也。疏留中。師御史客死京師。權幸慶鵬者。賄之棺。謂可結縉紳。謹也。景明曰。御史生不苟受。奚爲受汚地下邪。乃約所知共賄金殮之。竟卻其棺。尋督學關中。會鵬弟鸞鎮守關中。恃勢益橫。諸參隨者。遇二司不下馬。景明執參隨者撻於市。責數之。乃諸參隨者。始人人斂避矣。先是逆瑾撓吏部權。則移書吏尙書。讚引正大義。夢陽與姜御史詰奏。又移書吏尙書楊溥。直夢陽獄。大學士少師李西涯。東陽疏上乞休。會有兵事。又援古大臣義。爲書讓之。三書皆非身事。而抗言尊顯。語涉時忌。議者謂憂國憐才。古人莫加也。顧獨以不能干謁。守中書十年不調官。然志在經術世務。終不言功名事。其督教關中士。亦以經術世務。如其所自志。關中士氣習文藝。蓋自是一大變。景明說五經義。與諸家訓詁多殊。人皆爲諸訓詁不及也。古天文地理陰陽律歷家。皆能究其指。常言彼有是。有不是。欲取經訓與諸家書。刪繁折衷。成一家言。未竟業而卒。年三十九。

景明使滇南，不持滇南一物，持父母喪，不終禫，則不酒不琴，性不喜華麗，不治產，祿入盡散親故，臨卒時，餘三十金篋中，始崛起汝南，人以爲班固、崔駰、陸雲、王勃復出，著雍大記三十卷，何子十二篇，詩歌千餘首，書疏騷賦序記銘贊雜文數百篇，曰大復山人集。

康海，字德遜，武功人，弘治初舉進士第一，議者謂其廷試策爲明朝第一，明朝文章，至成化末多庸靡，海既有俊才，遂與何、李、邊、王輩興起爲古文，扶衰拔溺有力焉，然性豪放，不閑小禮，恃才凌駕人，人多忌之，會李夢陽代韓文章疏，太監劉瑾已謫出，猶不快前忿，羅以他事械至京，遂下詔獄，將置之死，時海與夢陽齊名，各負才不相下，瑾慕海，嘗欲招致門下，而海不往，瑾恆先施，必欲其一至，海每矚亡答之，竟不一入其門，至是夢陽所親有左國玉者，詣獄，謂夢陽曰：子殆無生路矣，唯康子可以解之，夢陽曰：吾與康子素不相能，今臨死生之際，乃始託之，獨不愧於心乎？吾甯死矣，左曰：不謂李子而爲匹夫之諒也，強之再三，以片紙請書數字，夢陽乃援筆曰：對山，揀我，唯對山爲能揀我，餘無一言，對山者，海別號也，左持書詣海，海憤然曰：是誠在我，遂詣瑾，瑾焚香迎海，延至上座，海不少遜，瑾曰：今日有何好風，吹得先生來也，命左右設席，海曰：吾有言告公，公如聽吾言，當爲公留，不然吾且去矣，瑾曰：云何，海曰：昔唐明皇有高力士，寵冠羣臣，且爲李白脫靴，公能之乎？瑾曰：瑾請爲先生脫之，海曰：不然，今李夢陽高於李白數倍，而海固萬不及一者也，下獄而公不爲之援，奈何欲爲白脫靴哉，卽奮衣起，瑾固褰止之曰：此朝廷事，今聞命卽當斡旋之，海遂解帶，與之痛飲，天明始別，夢陽遂得釋歸，而海自是與瑾往復，遂罹清議矣，及瑾敗，人

遂措海爲瑾黨。罷去不復用。海益縱聲妓。恣遊山水。讀書爲文。立名於是。故海雖廢而名益著。彭時嘗欲薦之。海答書以見意。曰：數年不覩光範。偶辱過問。感灼累日。然竊有所未安者。因公知我厚。故不避訶責。輒布上左右。惟公察之。聽之。僕自庚午蒙詔之後。卽放蕩形志。雖飲酒不多。而日與銘酌爲伍。人間百事。一切置之。不信於鄉人。妻子奴僕也。蓋素性疎懶。偶因官秩。羈繫數年。若招豚驘鷹。而一旦得此中心之快。實有人所不知而已。獨知之者。自東方多事以來。聞其驕傲無狀如彼。卽或奮然有攘臂之意。隨復自笑。以爲狂奴猶爾。卽又飲酒散髮。箕踞林麓。此其性習之已成。雖三公之貴。刀鋸之辱。不可奪也。況數石之粟。半幅之紙乎。僕自幼支謾無狀。性好是古而非今。始仕時。望見先皇帝寬仁大度。卽自私擬。以爲皋夔稷契之業。可以復見於今。而狂放易言。略不修飾。至今上嗣位之後。又見其英毅果斷。益喜益負。以爲鄙志。當究於此。一時交與之士。反覆輕易不檢。惟僕言是。是故謾論謾說。略無忌畏。日就月將。幾踵奇禍。幸免殺身而歸。而二三耆又補砌所無。以爲真有使僕含垢於有罪者之籍。與不肖之人同被驅放。上辱兩朝作養之恩。下累先人狷介之業。生平微志。付之穢塗。情苦心局。不復自愛。暇日偶讀皇甫規避梁冀之事。與蔡雖卻九錫之書。喟然嘆曰：彼何獨不得含垢冒污。而成致美節如此也。又偶讀柳宗元傳曰：卽宗元有不同於叔文。然親與之交。而受其職任矣。夫身有規離之操。而迹廁宗元與禹錫之間。仁人志士。宜於此何如也。今僕所憂者。在忽有犬馬之疾。死邱壑之下。不得伸其夙心原。原耳。而區區官秩之事。非所念慮也。瑾之用事也。蓋嘗數以崇秩誘我矣。當是時。持數千金壽瑾者。不能得一級。而彼自區區於我。

我固能談笑而卻之。使龔毓、嶮嶮之人。卒不加於我。此其心與事。亦雉且甚矣。當朝大臣。蓋皆耳聞目見。而孰知其然。方臺諫論列之際。出於一時倉卒。未暇差別。而今則又數年矣。夫伊尹之輔商也。一夫之不獲。則曰時予之辜。僕卽非賢者。然豈少於商之一夫哉。大臣者。乃忍使之雜於孫聰。曹元輩間耶。故鄙人之心。至此益放。益已披髮嘯歌。至於終身而不敢悔。此非甘心爲長沮、桀溺之徒也。公之義曰。古人內舉不避親。時之可舉不可舉。非僕所知也。而僕之不才污穢。亦非公應舉之人。觀近臣者。以其所爲主。於此使識者苟爲之言。則所係於公者。豈細哉。今僕之不可於當世者有五。而甚不宜出就官秩者有二。性喜嫉惡。而不能加詳。聞人之惡。輒大罵不已。今諸公者。皆喜明遜而陰譏。此一不可。翰林雖皆北面事君。而勳渠閣老門下者。以爲賢能。僕懶放畏出。歲不能一造其戶。此二不可。人皆好修飾文詐。僞恭假直。而僕喜面訐人。未有不怒者。此三不可。士大夫不務修身法事之業。而俱呻吟詩文以爲高業。見其詩若文。不能不怒。故見輒有言。而彼方望我以爲美也。我以言加之。此四不可。與相好者接。必因其職事。加勉戒之詞。多忤其所好。彼或未從。卽拒而絕之。以此親疎多怨。苟復見其所愛者。又不忍不告。或又告之。彼卽又不從。而僕又絕之。此五不可。執德不宏。不能信之於人。雖頗自好。而當世談論之士。多加詆謗。自入有罪者之籍。污穢終身。莫能自潔。使平日所立之志。扃閉淪落。智高萬物之上。而名陷九淵之下。於中夜竊自歎悔。不當輕易效慕世俗科舉徇外。搆此兇溺。今又不傲而欲仕乎。此甚不宜出者。一時同出之人。固有不幸而被污者。然罪大惡極。羞談於婦人女子之口。尙十之九。彼莫不覲幸僕出。以爲先容之地。而當時

宰執。又率崇私愛而乏分別。苟欲引其私人。必援僕爲喻。是所以用僕者。非必實知其爲人。而眞明其有誣也。如此則是以賢者之身。而爲不肖者之資矣。語有曰。君子非其招不往。以不賢人之招。招賢人。如之何其可往哉。今衆人雖有不肖謂僕。而僕未嘗一日不以賢君子自謂。已如此自謂。而人以彼謂已。蓋所謂噓爾而與。乞人不屑者也。此甚不宜出者。二明公之意。特出於一時愛念之篤。偶未詳究及此。然言出乎口。通乎心。明有日月。幽有鬼神。區區平素之愜。可一鑒而盡者。公如覺之。則信其爲肝膈之實。慨然憐我體我矣。家居多蓄聲伎。每自彈琵琶。侑觴客過武功。未嘗不置酒高歌盡歡洽。有貴官過海。海具酌道及朝政。海輒舉大觥飲之。不使言酒酣。乃言欲薦海。海正腹琵琶。搗歌烏。遽舉擲之。貴官避去。自是無言及薦海者。海年八十餘。以壽終。所著有對山集百餘卷。汧東集諸書。子栗。字子寬。亦有異才能。詩詞不第。早卒。少子櫟。舉於鄉。爲靈壽知縣。有文名。曾孫萬民等。皆有文集行世。

明書卷一百四十七

列傳十

文學傳三

楊慎、字用修、號升菴、四川新都人。父廷和、歷官少師、大學士。慎生而岐嶷、穎達、四歲、母夫人教之、句讀、併授以唐絕句、輒成誦、稍長、奮志誦讀、不出外戶、罹母憂、極其悲號、廢食骨立未幾、祖母葉訃聞、隨父回蜀、守制、祖留耕、授以易、兩旬而洽、不遺一字、擬作古戰場文、有青樓斷紅粉之魂、白日照翠苔之骨、數語、人傳誦、祖極稱賞、復命擬過秦論、益大奇之、曰、吾家賈誼也、時年十二、辛酉、父朞闋、慎亦入京師、有過渭城、送別詩及霜葉賦、一日、偶作黃葉詩、李東陽見之、曰、此吾小友也、乃進之門下、命擬出師表及傅奕請汰僧尼表、東陽覽之、謂不減唐宋詞、弘治己丑、侍父入禮闈、時崔銑試卷、分考疑其刻深、弗錄、慎見之、愛其奇雋、以呈父、遂擢詩魁、崔知之、稱爲小座主、時年一十八、丁卯、歸應四川鄉試、擢易魁、戊辰春試、入國學、祭酒周玉類試之、曰、天下士也、己巳、歷事禮部尚書、劉宇見慎、問曰、子爲誰、對曰、楊慎、劉曰、本部天下人、豈必一大臣子弟耶、乃稱歎不置、辛未、會試第二人、殿試第一人、制策援史融經、敷陳宏剴、授翰林修撰、時年二十四、癸酉、丁繼母憂、明年、藍鄙諸寇作亂、慎在邑、城中日夕戒嚴、有賊數百詐稱官軍、以給門者、

慎率守雉堞者詰之散去。服闋入爲經筵展書官。及校文獻通考。時武宗遊幸宣大榆林諸邊。返而復往。慎疏切諫。不報。世宗卽位。開經筵。慎爲講官。進尙書金作贖刑之章。言聖人贖刑之制。用於小過者。冀民自新之意。若大姦元惡。無可贖之理。時大閣張銳於經等皆犯先朝事。罪當死。以進金銀得免。故及之。壬午。慎代祀江濱。及蜀藩諸陵寢。著江祀記。與給事熊浹。御史簡霄遊浣花溪。載酒賦詩。癸未。纂修武廟實錄。慎練習朝典。事必直書。總裁蔣冕。費宏曰。官階雖未及。實堪副總裁者。乃盡以藁草付之。刊定。甲申七月。兩上議大禮疏。嗣復跪門哭諫。下獄。廷杖。越十日。復杖之。慎斃。而復甦。謫戍雲南永昌衛。同事死者配者黜者左遷者二百八人。時年二十七。至雲南病。馳萬里。羸傭特甚。栖栖旅中。方就醫藥。而巡撫台州黃衷促且甚。慎力疾冒險抵永昌。幾不起。巡按郭椿清戎江良材極爲存護。卜館雲峰。居之。且上疏乞宥議禮諸臣。郭亦被詔下獄。斥爲民。丙戌。聞父疾。疋馬間道。十九日至家。父悅而疾愈。復就戍所。時土舍安銓。鳳朝變爲亂。攻掠城堡。慎歎曰。此吾效國之日也。乃戎服率旅僮及步騎百餘往援木密所守禦。入城固守。明日賊來攻城。先以甯州土舍陸紹先率兵戰城下。慎以城中兵鼓譟出。賊敗去。慎復歸會城。己丑八月。父廷和訃至。奔告巡撫歐陽子重。疏上。得歸襄事。復還滇。布政高韶聘修雲南通志。時鄉有欲冒嗣穎川侯友德以覲世爵者。慎不可。乃乘張羅峰復相。流言欲中之。慎遂去。庚子。巡撫劉大謨聘修蜀志。壬寅。還戍所。丙午冬。大理推官吳宗徽。署安甯州。奸規州利。欲權民鹽牛。慎言於當路。得免。丁未。居高峽水莊名十二景。日與交遊倡和。四月。屬簡紹芳劾漢王褒移金馬碧鷄文於羅漢寺之崖。凡招提佳勝會意。

處便操觚留題數與滇之鄉大夫遊昆明池有池賞集時在逸武弁得委祭龍海口騷肆狂惑請丁夫六千督往注濬剝衆利州人苦之慎致書巡按御史趙炳然罷之己未六月避疾卒年七十有二穆宗卽位追贈光祿寺少卿慎孝友性植穎敏過人家學相承益以該博凡宇宙名物經史百家下至稗官小說醫卜技能草木蟲魚靡不究心多識闡其理趣而訂其訛謬正德間武宗閱文獻通考天文星名有注張內閣取祕通書考又作注張中使下問欽天監及翰館中皆莫和爲何星也慎曰注張柳星也歷引周禮史記漢書以復又湖廣土官水盡源通塔平長官司進貢同官疑爲三地名於長官司上添一三字慎曰此六字地名也取大明官制證之嘉靖初給事中張紳上言時政論學術不正一條有喬宇嵬瑣之語上問之內閣慎適在館中卽取荀子非十二子篇以復大學士蔣冕喜曰用修之博何減古之蘇頌乎乃若論王導之賊晉室辨太王之非剪商魯之重祭不始於成王周公春秋五伯深斥乎楚宋秦繆引墨子及修文御覽以辨范蠡無載西施之事引黃東發蘇東坡之言及李漢韓文序以辨文公與太顛書之僞駁歐陽氏非非堂之說傳節婦唐貴梅之死此又證據古今闡揚幽隱皆其有功世教也至若陶情豔辭寄意聲伎落魄不羈又慎所以用晦行權匪恆情所測昔重慶守劉繪貽慎書曰夫人情有所寄則有所忘有所譏則有所棄寄之篤則人無所忌無所忌而後能安無所貪而後能適足下所爲蓋求其適與安也古人買田宅擁聲伎皆豪傑蓋世之才豈獨抱尺寸者之見也僕觀足下自蒙難以來嘔心苦志摹文讀經筵搜百氏窮探古蹟鑿石辨剝破塚出遺忘有僻儒苦士白首蓬蒿日自纂索所不能盡而謂竭精蕩

神於逸欲聲色者能之乎。人以爲知慎之深。慎嘗語人曰。妾性不足恃。日新得業。當自心力中來。故好學窮理。老而不倦。平生著述百餘種。幾三千卷。

瞿景淳字師道。華亭人。生十月。能誦詩。闕雖八歲。善屬文。爲經生業。其思川湧雲聚。頃刻得數百千言。時甫踰冠。而試輒屈其諸老先生。諸老先生人人自以爲弗如也。試不利。力學業。益精工。務究於所以作者之旨。而不爲蹈徇。所謂朱絃疏越。一唱三歎。有餘音者矣。天下稱王鑿經業爲明冠。獨景淳繼之。鑿會元及第。景淳久困諸生間。減文產。教授里中。自給意。豁如也。嘉靖癸卯。舉於鄉。明年甲辰。亦會元及第。授翰林院編修。滿九載。最遷侍讀。久之。進左諭德。侍讀如故。遷侍讀學士。視翰林篆。總校永樂大典。亡何以太常寺卿。領南京國子祭酒事。已卽南京爲吏部侍郎。三載。當入奏續。穆宗卽位。以禮部左侍郎召。旋用大典總校勞。兼翰林院學士。食二品祿。時大暑。就道而病。歸里。上疏請告。不許。強自力入朝。留侍經筵。修世宗實錄。上所以用之意益切。而病發益不支。疏復乞骸骨。予告歸。不及一歲而卒。贈禮部尙書。諡文恪。景淳爲人孝友。天性篤至。然不以峻行潔。寬然長者也。其爲諸生。貧甚。數棄不色。戚既第。日隆貴。不色喜。所接卽匹夫孺子。而不以情見。其最重者相臣。而無卑儀貌。不能中人。而毅然有三軍不可奪之氣。封懷慶諸王。爲副使。時鄭王以言事忤旨。徙鳳陽繫。而世子攝國事。懼。謬爲恭敬。餽迎用幣重。一切謝弗納。其正使吳恭順侯。以景淳故。亦弗納也。而世宗已密使詞之矣。侯乃感悟。語詞狀曰。微公吾幾中明法。景淳曰。吾不知也。第吾所持使當如是耳。景淳嘗請告還京師。從衆謁嚴嵩。嵩莊謂客曰。僕旦夕平云。何。胡總督

才足辨也。而南中人往往爲倭控胡君。何好亂也。胡宗憲者。嵩客也。景濬前立應曰。固也。相公雖明。遙度之。不如不佞目覩也。胡君擁十萬師。無尺寸效。而賊日夜躪赤子財賦地。不佞南中人。不得一單枕臥。何言好亂也。相公業不欲聞之。誰爲相公聞者。於是嵩改容而謝曰。善。夫生之箴我。然數已目攝之矣。景濬領治語敕。而陸炳爲緹騎帥。與嵩表裏爲奸。勢傾天下。後先有四妻。至欲封其最後者。獨難。景濬朦朧。挾兵部移以請。景濬執不可。嵩爲請之。又不可。則囊金而夜要焉。景濬笑不顧曰。公毋溷我。吾所守禮也。炳不自懌。去竟不敢言。封最後妻矣。學士地親而格重。不當祭酒。卽祭酒不當南。而景濬意殊安之。且曰。吾懼夫不稱乎抗顏者耳。居四載。無一書。政府人問其故。笑不答。四方造請碑誌序記。日踵門投璧而應之。有餘功。其揮灑若不經意。而規歐藻蘇。眷容乎言之也。人稱其爲德不近名。爲文不近好。爲吏不近俗。初道病欲歸。而貽書李春芳曰。諸公在廟廊。固重用賢矣。而易於退。不肖夫退則錮之。與其輕而退賢也。夫甯誤而容不肖也。且縣官方急材。以南北無足使者。不於此時博選而厚植之。一旦何以應詔。春芳矍然稱服。景濬少時嘗扁舟巢湖中。夜有炬火數百千逼舟。乃厲聲叱之曰。吾在。何爲者。卽應聲而滅。居昆湖。人稱爲昆湖先生。有文集行世。

王慎中。字道思。別號邊巖。本固始人。徙居晉江。行二。因稱爲王仲子。生有奇質。母李教以詩。輒記誦不忘。父教以對語。應答如響。年十三。四通舉子業。且多讀古人書。嘉靖乙酉。年十七。舉鄉試。明年。舉進士。授戶部主事。監兌通州。往監兌者。惟取完事。不復及國家大計。慎中獨急轉輸。革侵耗。宿弊爲之一清。暇則讀

五經暨百家言詩文具秦漢魏晉風骨。又做晉人作書。遂擅臨池。未幾改禮曹。更得一意於文事。交遊如八才子外。給諫會前川。提學江午坡。學士華鴻山。屠漸山。相與切劘。各成其學。世宗方重祀典。文制禮作樂。四郊改建。百役奔繁。慎中時典祠祭。督工考禮。克副尙書之託。辛卯。各省鄉試。以京朝官爲主考。慎中得廣東錄文甚佳。得林大欽爲首。明年殿試復第一。朝議破格用人。將取部屬充館職。識部屬無如慎中才者。權貴人欲其一見。而慎中固不肯往。曰。吾甯失館職。不敢失身。乃改吏部。慎中在吏部。以才高。事多得與謀。進驗封郎中。會忌之者。短於大學士張壁。因以覆方士張衍慶請封事。謫判常州。慎中在郡。能革吏弊。得民心。巡按御史郭宗皋夙重其才。譽揚之。而巡按候位。待之不少假。委署江陰。縣多大族爲不法。慎中不以遷客少偃蹇。至。則延見父老。舉廢事。除積害。怙勢不遷者。首置之法。一縣肅然。尋陞戶部主事。再陞禮部員外。俱留都冷曹。因得益肆力問學。嘗與龍溪王畿。討論古文。儒言精心。求之於聖賢之微。多所契合。慎中夙好古。漢以下著作無取焉。至是始讀宋儒之書而喜之。又喜曾王歐三氏文。卽眉山兄弟。猶以爲過於豪而失之放矣。以此自信。乃取舊所爲文悉焚之。製作一以曾王爲準。唐順之初見。不肯服。久之相解。亦變而從之。嘗語人曰。吾學問得之龍溪。文字得之邊巖。其推許如此。丙申。陞山東提學僉事。慨然以古風教爲己任。章程條約爲之一新。時下寮參謁。曲膝過恭。乃痛爲革禁。士以禮見。教官以教官禮見。踵舊習者。一體懲戒之。所試卷。品藻彈射。百無一失。其高等士。率以次得雋。去。尋進江西參議。慎中往來白鹿鷺湖間。與聶豹。羅倫。歐陽德等交遊。講習聖學。益進。俄遷河南參政。抵任。禁有司不許科擾。

章聖梓宮過河南。供億繁多。下吏有棄官遁者。慎中身任其役。寮吏咸仰賴之。歲饑。慎中親歷郡邑。開倉發粟。民獲更生。辛丑。考察。以不附夏言。報罷。慎中因至淇上。倘伴百泉蘇門之間。歸年三十有三。慎中少年英氣太露。如太阿出匣。知其難犯。久之。涵養深沈。而世竟莫能用矣。其爲文也。恆以構意爲難。每一篇必先反覆沈思。意定而辭立就。細觀之。鋪敘詳明。部伍整密。語華贍而意深長。接之不亂。而呼之應節。片紙隻字。得之者有如至寶。嘗言吾之爲文。不外古人。而有高出古人者。其自負如此。閩士日以所業請正。門牆幾不能容。凡監司部使者行縣。莫不造其廬。講道問政。居嘗念從仕之早。不獲盡力於父母之奉。故其罷也。葬父養母。極盡心力。又以爲國家承平日久。民不知兵。一旦變作東南。海上逋逃。是爲大患。泉固濱海。且與漳鄰。深爲可慮。建州爲八閩上遊。吾嘗有意於此。其子聞之。乃卜居焉。後倭患作。一如所料。戊午夏。賊自武榮入郡境。市鎮居民。扶老攜幼。驚逃山谷中。有倡爲清野之說者。督責入城。慎中撫髀嘆曰。是大失計。清野乃北邊寇至。急斂人畜。使彼無所掠。若內地。惟在郊關外村落生聚。然後能成治耳。今宜速令各鄉大姓。盡還故居。相度地利。自相團結。使盜至不得逞。而後城內可恃以爲安也。後數年卒。壽五十一。

趙時春。字景仁。別號浚谷。平涼人。爲人嚴毅介特。與士大夫處。意有所不可。議論有所不合。必引繩按矩。詰責之。不少貸。故賢者服其正。而在中人。咸疾其太剛。幼與羣兒戲。每列旗部署。自長御之。年十四。舉陝西鄉試。十八。試禮部。袁然爲舉首。當是時。海內伺其有所製作。爭傳誦之。而時春則習騎射。談甲兵。日以

邊備之不修爲大戚。或語及北口。方持杯酒相譔笑。輒裂臍攘臂。謂所知曰。使吾得備偏校。領精兵五千。操勁弓巨矢。間以長槍大斧。旣掩灘邱。福不足平也。故在賢者。率壯其志。及再失官。敵果入犯。遊騎薄都城。世宗用薦。召爲兵部職方主事。遷山東按察僉事。領民兵。轉副使。遷巡撫山西都御史。提督鷹門諸關。初嘉靖丙戌。時春舉南宮第一人。改庶吉士。授戶部主事。調兵部武庫主事。卽疏請禁諛佞。正士風。又疏錄用諫官。明善惡。關異端等七事。下詔獄爲民。尋改編修。兼司經局校書。疏請正東宮朝會禮儀。備文武官僚。以崇國本。又罷爲民。其爲政於晉。斥貪墨。省征徭。抑求請。絕餽遺。曰。吾不敢竊府庫以自潤。亦不能借府庫以市恩。宗藩貴宦。相戒莫敢犯法。一時文學氣節政事之聲。振動天下。乃皆曰。此儒者之末事。其志專在攘夷。翟復祖宗之疆宇。遺後世以長治永安。而卒不獲試。此世所爲深慨也。其在職方。坐議馬市非策。又以能兵爲逆鸞所忌。幾得謗死。在山西。檄將士禦敵代州。身甲冑。督兵繼進。斬寇若干級。而總兵李汝乘勝入敵伏中。敗沒。詔解官聽調。卒以不起。時春少讀書。日記萬餘言。凡史所載天文地理戶口錢穀多少之數。與寇戎蠻貊之詭姓。隱名歷歷誦之無爽。所爲文若詩。豪宕闕肆。伸紙行墨。滾滾而出。若不經意。而於古人之法度。靡所不合。說者以爲有司馬子長李太白之風。唐順之於文士。鮮所稱許。嘗曰。宋有歐蘇。明有王趙。其推重若此。王謂邊巖也。

李攀龍字于鱗。山東歷城人。其家近東海。因自號滄溟。當其業成時。海內學士大夫。無不知有滄溟先生者。父寶。以貲事德莊王爲郎。善酒。任俠。不問家人生產。繼娶於張。夢日入懷而生攀龍。生九歲而孤。其母

張影相弔也。且繙繡不足以資修脯。而自其挾冊請益。塾師爲之遜席者數矣。補博士弟子。與左長史許邦才少保殷士儋結鬢亂交。晉江王慎中來督山東學。奇攀龍文。擢諸生冠。然攀龍益厭時詩訓話學問。側弁而哦。若古文辭者。諸弟子不曉何語。咸相指攀龍狂生狂生。攀龍坦然不屑也。曰。吾而不狂。誰當狂者。亡何。舉其省試第二人。三年成進士。授刑部廣東司主事。攀龍旣以古文辭創起齊魯間。意不可一世。學而屬居曹無事。悉取諸名家言讀之。以爲紀述之文。厄於東京班氏。始其狡狴者耳。不以規矩。不能方圓。擬議成變。日新富有。今夫尙書莊左氏檀弓考工司馬。其成言班如也。法則森如也。吾撫其華而裁其衷。琢字成辭。屬辭成篇。以求當於古之作者而已。操觚之士。不盡見古作者語。謂攀龍師心而務求高。以陰操其勝於人耳目之外而駭之。其駭與尊賞者相半。而至於有韻之文。則心服靡間言。蓋攀龍以詩歌自西京逮唐大歷。代有降而體不沿。格有變而才各至。故於法不必有所增損。而能縱其夙授神解於法之表。卽所稱古作者。其已至之語。出入於筆端而不見迹。未發之語。爲天地所祕者。創出於胸臆而不爲異。亡論建安而後諸公。有不徧之調。攀龍以全收之。卽其偏至而相角者。不啻敵也。當攀龍之爲主事。遷員外郎。以至郎中曹。事寢以劇。守文法無害。而其業日益進。尙書凡有著作。輒以屬攀龍。藉藉公卿間。然攀龍竟無所造。請干費。不爲名計。出曹一羸馬。蹙蹙歸杜門。手一編矣。與同舍郎徐中行。梁有譽。王世貞。中書吳國倫。考功郎宗臣。相與切劘千古之事。攀龍成弟蓄之。爲社會。時有所賦咏。人人意自得。最後攀龍出片語。則人人自失也。攀龍雅不欲以刀筆見長。然其聽讞最號公平。柄臣子銜邊帥不通賄。中以法。

欲置之死。攀龍持不可。後其人卒自奮功名。致大將。出爲順德知府。問所以守順德者。攀龍曰。使吾僕僕途道。事嚴客。眷鞫鞠。臆。晚上官之色而進之。則俱有所不能。晨興坐公堂。揖屬吏。考計。延見鄉老。問疾苦。爲輿除。脫若承蠅矣。守順德可一載所不報。最。則曰。君子之至於斯也。吾或未之見也。奏記臺使者。手自削牘。牘多古文辭語。爲其名高已者而已之。然攀龍曷自濯洗。勤於大要。居久之。政聲流通。鄰郡嚴事攀龍者。大府以故得請。白媮志。嘗錫馬牧地。垂三千金。留永濟倉粟。毋灌輸京師。以餉戍卒。裁將作供。比眞定十之二。益永年傳於沙河。邯鄲界中。寬二邑力。移郡尉。置鉅鹿官亭。扼盜衝。又移巡司黃榆嶺。爲晉趙開。前後爭得之。臺使者毋以難也。攀龍又謂京師仰東南餉。不時至。而燕齊汴趙。邊河百里。而近者毋出賦錢。皆賦菽粟。游於河。達京師。緩急一策也。時頗隴之。尋擢陝西按察副使。視學政。攀龍謂陝古西京也。先朝士大夫北地外多陽浮慕古文詞。而時離之。思以實反其始。有機矣。督府以檄致攀龍。使屬文。攀龍不擇。曰。副使而屬視學政。非而屬也。且文可檄致耶。會其地多震動。念母老家居。遂上疏乞骸骨。拂衣東歸。吏部才攀龍而欲留之。度已發。無可奈何。爲特請予告。故事。外臣無予告者。僅攀龍與何景明二人耳。攀龍歸。則搆一樓。田居。東眺華不注。西揖鮑山。曰。他無所溷吾目也。繡衣直指。郡國二千石。干旄。屏息巷左。納履錯於戶。奈攀龍高枕何。去亦毋所報謝。以是得簡貴聲。而二三友人。獨殷許過從。靡間。時徐中行亦官罷家居。坐客恆滿。二人聞之。交相快也。攀龍乃差次古樂府擬之。又爲錄別諸篇及他文。益工。不經而走四裔。復用薦。起浙江按察副使。嘗視海道。蒙按覈軍實。一切治辨。俄遷布政司左參政。奉萬壽表。

入賀道拜河南按察使中州士大夫聞攀龍來，鼓舞相慶，而攀龍亦能權亢爲和，圓方互見，其客稍稍進，無何，以內艱還里，不勝毀病卒。年五十七，所著白雲樓集三十卷，子駒，博學能文章，有父風。

陸師道，字子傳，長洲人，生而穎雋，七歲能裁小語詩，稍長，詩文益進，秀眉美姿，玉立顧然，舉應天鄉試，再屈公車，而詞賦聲隆隆起，凡六載始成進士，所射策入夏言手，大奇之，爲言於李時曰：是子也，其文賈董，而書則鍾、王，以第一人聞，是時，上不盡寄相臣柄，移之二甲，得工部主事，任職潔廉無害，夏言內自恨，奏改禮部儀制司，供事制敕，師道雅不欲近權貴，而念越人勇之說，進所取應制酬代漸詭，因母陳病，請急歸，待久之，母病浸劇，師道謝客，隱湯藥間，蚤暮無間，時時搏頹籟天請代，又嘗刲股，羹而進之，病良已，又病目，先生甦之，亦已，會所予告過期，遂不肯出，益肆力於學，其學自九流七略，稗官黃衣之屬，亡所不窺，獨抄典籍，後先積數百千卷，丹鉛儼然，益工歌詩及古文辭，又益習書，小楷以至古隸，皆精絕，又傍曉繪事，簡淡咄咄，逼倪元鎮，時待詔文璧里居，亦善詩及書繪事，師道造門，用師禮禮之，人謂師道業已貴，胡折節乃爾，且不聞世以稅目璧耶，師道曰：子言之，誤，夫文先生，以稅藏道者也，自吾見文先生，無適而非詩也者，奉之益篤，璧亦篤好之，卽膠漆莫喻也，諸臺使慰薦先生者，無慮數十疏，自世宗朝，執政者好拔其黨，據津要，以明翼毗，而輕於棄名士大夫，而士大夫亦醜之，莫肯爲用，時有參議王庭，給事陸燾，袁襄，皆里居，與師道善，而其所取友，如王寵、彭年、張鳳翼兄弟，多往來文璧家，與璧之子博士彭司諱嘉，日相從，評覽文字，考校金石，三倉鴻都之學，與丹青，理茗盃，鑪香，儻然竟日，間從諸賢出游汎口湖，取越來道。

放舟胥口。尋覽虛邱上方支砌天池。玄墓靈巖。鄧尉萬笏大石之勝。吳中好事人操酒船。迹之於山水間。師道亦無所拒。取酣適而別。輿到弄筆。得薄暎阿錫一點染。若重寶。蓋是時海內懸格以購璧迹。次及師道。師道不爲意。尋其母卒。師道哭毀。幾滅性。而愛弟安道亦卒。以是邑鬱中風厥。憤憤嘔沫。久之漸愈。而性埋亦少錯矣。林下踰二十年。以屢薦。起補南畿部。召爲膳部郎中。擢尙寶少卿。尋奉使入秦。祭秦先王。殊自快。以生平所慕者。關中形勝。今幸一寓目。乃縱游二華。觀龍門砥柱。浴驪山溫泉。弔漢唐諸陵。所至皆有詩。而秦之嗣王。習聞其名。厚幣以饗。謝弗納。歸。穆宗卽位。疴復作。上疏乞歸。六年卒。師道初號元洲。尋更曰五湖。年六十四。所著文集。在史子漢鑄若干卷。二子士謙。士仁。皆有名士風。

王世貞。字元美。太倉人。六歲。出就外傅。輒嗜古文辭。十五。淹緯如宿學。有鬻寶刀者。師命咏之。應聲有少年醉舞洛陽街。將軍血戰黃河漠之句。師爲之避席。弱冠。舉嘉靖丁未進士。授刑部主事。曹務旣簡。益以辭賦自雄。與李攀龍。宗臣。吳國倫。徐中行稱同調。曰五子名藉公卿間。世貞每當剖決案牘。所讞獄。度得請。輒手錄付吏。趣書之。各以輕重決遣。人或稱平。自是銓部兩以督學擬世貞。皆爲權相嵩所沮。又半載。遷青州兵備。青多大俠巨盜。探丸殺人。有司不能制。世貞集強壯。教之射。申飭保甲。重捕盜之賞。又於州邑畫地爲界。以義官統之。盜當時捕獲者爲上。不出境獲者次之。拒不能勦者又次之。凡盜從其所起。而不覺察者。經其所過。而夜巡不傳捕者。罰釋盜而覺者。立杖死。以其法行之期年。盜盡解散。先是。楊繼盛下獄。世貞入獄。共飲泣。又爲盛妻草疏。嚴嵩恚甚。無何。父忬爲嵩搆。死於法。世貞解綬奔還。伏草土中。幾

十年嵩戮薦起之，堅不出，以八事應詔曰：此可藉手以謝朝命矣。固辭不報，乃起就官大名。大名爲州邑十有一，而真定三十餘。以軍輿論供輸，則大名與真定等。而是時大名闕飭兵使，其治真定者，復委十之六於大名。曰：大名饒而真定瘠也。世貞力爭，乃不果增。居一年，移浙江參政。下車，摘一二墨吏及巨室裁抑之。吳興久雨，郡富人故閉糴，粟踴貴。世貞首捐俸，郡縣長而下次之。又募民入粟，庫中給冠服，乃冬報粟得三十萬石。又疏乞改折得十五萬石。人賴以活者甚衆。未幾，進山西按察使，以內艱去。服除，補湖廣。旋遷廣西。轄未一月，入領閩鄉。又八月，以御史中丞出鎮鄖。世貞爲糾劾貪縱，咨訪將才，刷軍政，清屯田，鄖爲改觀。張居正弗謂善也。世貞意不自得，解官歸。久之，補南大理。又久之，補應天府尹，皆不赴。其後，兩京臺省交薦，起刑侍郎，尋轉兵侍郎。以考編進南刑部尙書。自尙書郎歷卿長，凡四十年。其間條論封事，皆天下大計，而所至吏事精絕，尤不可悉數。最奇者，莫如青州治盜。及楚中樂平王事，都下盜劫，緹帥陸炳索不得。後濟南獲盜房四者，妄承之。世貞曰：狡賊欲緩死耳。立訊曰：若盜陸公耶？曰：然。賊安在？曰：在請械某而取之。曰：若劫陸公何狀？曰：髻而肥。何衣？曰：衣朱而圍玉。世貞大笑曰：若未嘗識陸公。陸公非髻而肥者，盜搏額大服，部民雷齡，以捕盜橫萊蕪間。海道宋購之急而遁。宋以屬世貞。世貞欲掩取而微露其語於王尉。捕者還報，又遁矣。世貞陽曰：置之。又旬月，而王尉獲他盜。世貞知其爲齡力也，忽屏左右，召王尉詰之曰：若奈何？匿雷齡，往立階下，聞捕齡者汝耶？王驚謝，無所逃責，願以飛騎往。俄捧齡至。世貞曰：女當死，然女能執所善某盜偕來，女生矣。而令王尉與之日，果得盜。世貞遂以還宋，而請寬之。官校捕七盜。

逸其二。盜首妄報逸者姓名。俄縛一人至。稱冤。乃令置盜首庭下。差遠。而呼縛者踞塔上。其足躡絲履。盜首數從後窺之。世貞密呼一隸蒙縛者首。同出而易其履。以入。令盜者證之。盜首不知其易也。即指絲履者曰。此是也。世貞大笑曰。爾乃以吾隸爲盜。即釋縛者去。徐進道者。蓄養亡命。而以橫占伎女被訟。捕之。不獲。俄有令請問曰。進道勒兵反矣。世貞偵之。果然。而故緩其獄。令縛賊自效。會有李卿者。進道密友也。世貞召謂之。汝交關進道。罪應死。能以進道來。貸汝。卿應命去。俄報進道飯某所矣。即遣二十騎往取之。而以一騎入營。立散其黨。亡諱者。在郎時。驛報有樂平王次子。奉高皇帝御容金牒。祝髮爲沙門。行遊天下。敕郡縣供帳。世貞曰。藩王有宗正條。錮城中不得出。而譸張如此。遣輕騎孟光化偵之。則其人以御女術游藩邸間。崇王賜以櫻轎紅杖。所至懾守令。而姦人李汝貴等爲之翼。鞠之。則平涼民賀祿也。諸摘發隱伏。皆此類。能聲日馳都下。都下士聚而嘆曰。王弇州文而豪。乃任吏耶。方陸炳貴幸用事。受巨璫指。匿奸狡閭奇。欲貸其死。世貞搜炳家得之。炳宛轉請脫。旣復因執政以請。卒不許。又才高不能無所睥睨。當時無不側目世貞者。已高拱柄國。世貞引母疾乞休。拱曰。吾出而彼歸者。何也。已有伺拱昏中之者。居正欲引世貞自近。世貞謝唯唯。會荊州地震。世貞引李固京房占。臣道太盛。坤維不甯。又有譁辱邑令者。王生居正婦弟也。世貞論奏不少貸。居正積不能堪。雖稍遷。廷尉京兆。以貌示用。而竟以浮言曠之去。世貞生而美姿貌。風采玉立。與客談笑。溫秀之氣。溢於眉目間。語及古人忠孝節烈。則又慷慨淋漓。爲茲然罷酒。在浙中。修岳武穆於忠肅祠墓。爲文以奠。辭極悲壯。南陽祠張睢陽及鐵鉞。在南都。請崇文廟。釐配享。

世貞嘗言曰。吾讀書萬卷。而未嘗從六經入。每欲牽衣窺廊廡之末。則世人齷齪臬比招搖門戶而聚生徒者。吾方恥之。吾雖未聞道。然誦法一念。迄死未敢忘。故其居喪也。凡三年不茹葷御室。凡十年始具衣冠預燕會。家無姬侍。臧獲輩以百指。亦無一人曉聲律者。其父施義田千畝。倍拓之。生平於故舊兄弟。白首無間言。好推李攀龍。尤不惜以齒牙筆札緩急人。客或一歲數及門。或一人迫得數十函書。或進而附世貞以成名。名成而更立門戶。且忍於譽世貞以示角。世貞弗爲異也。客至而復請者。與如初。其門賢愚醜好。靡所不具。而中間交態離合向背之故。亦幾百變。世貞皆安之。彌成其大而已。祖倬。仕至南京兵部侍郎。倬生南都察院右都御史兼兵部侍郎贈尚書。世懋。仕至太常少卿。其詞學與世貞埒。所著曰。弇州四部稿。續稿。弇州別集。觚不觚錄若干卷。世貞天挺靈秀。博極羣書。古今宇宙之間。無所不知。氣雄偉。骨力蒼勁。下筆霆擊颺馳。嶽立海運。說者謂明之文章。自李何而古。至攀龍道昆而精。至世貞而大。誠至言也。

王世懋。字敬美。號麟洲。別號牆東生。登嘉靖十四年進士。未授官。會父忬被嚴嵩害。歸。嵩敗。與其兄世貞白父冤。除南京禮部主事。益肆力於古文章。而六季之綺麗名勝。觴酒詞筆。靡所不領。會居無何。遷北禮部郎。又遷尙寶丞。與故人黎惟敬等日相逐。詩酒之社。又善書。所揮染篇翰。流豔人目。忌者緣飾。有游聞公子之稱。出爲江西參議。精心訊諜。勤職業。屢遷福建督學。品藻甚常。進左參政。入爲南京太常少卿。縉紳先生欣得一遊。以爲祥麟威鳳。筆研之請無虛日。尙能應之。已而疾作。請告歸。遂不起。年五十三。公精

周易、傍通諸經、亦喜讀釋老氏言。恆謂二氏學。吾於兩廡饜亡所食。苟陰用其實而陽詆其名。或假竊其似而自文其陋者。俱恥之。所著撰望崖編等書。皆精至語。識者謂不下白香山晁文元。於詩雖自濟南始。其所誦咏。多漢魏晉宋以至盛唐諸大家。然不肯從門入。亦不規規名某氏業。而神詣之境。爲勝。七言律。尤其踔絕者。文出入西京韓歐諸大家間。采劉義慶世說。自以爲得彼三昧。而於游名山記。尤詳婉有力。善持論。往往以識勝。少卽工臨池。行草蕭散。小隸疏行。得晉人遺意。性嗜佳山水。其登秦岱。觀日出。憩靈岩。謁孔林。入關過華嶽。具行滕布履。自青柯坪而上。西北臨大漠。稍南眺岷峨積雪。東俯中原。行部江右。窮匡廬表裏之勝。按閩。縱浪九鯉湖諸山。爲幽絕觀。歸自關中。軍騎走龍門。砥柱嵩山。少林。神禹之所疏鑿。而苦提達磨之所紹統者。慨然若覩其人。至洞庭兩山。京口三島。固几案間物也。意與境會。輒爲文以紀之。詩亦稱是。獨其於華嶽。謂文不能勝攀龍。攀龍已悉之。我復何道。尤好栽花果。晚治一圃。悉搆奇卉。種之。作學圃雜疏。謂兒輩吾無他所溷汝。異日日致一花供我目足矣。所著奉常集若干卷。日損齋雜著數百卷。

明書卷一百四十八

列傳十

文學傳四

胡應麟字元瑞。自號少室山人。已而慕其鄉人皇初平叱石成羊事。更號曰石羊生。人亦曰元瑞。殆非人間人也。仙而謫者也。遂呼之石羊生。爲兒時。肌體玉雪。眉目朗秀。五歲。父按察副使儋。口授之書。輒成誦。見客。客使屬對。必工。九齡。從里社師。日佔學。習經生業。而心厭之。已。悉祛其父儋。儋得古人書讀之。父奇其意。弗禁也。稍長。遂能爲歌詩。籍籍傳里中。而於經生業亦不廢。會其父拜禮部郎。挾與俱。渡錢塘。過吳。聞汎楊子。歷齊。魯。趙。魏之墟。至燕市。所經由。弔古卽事。往往於詩歌發之。而是時。南海黎民表。歐大任。梁思泊。周公瑕。徐中行。戚希仲。沈純甫。康裕卿。先後抵燕。發應麟藏詩覽之。咸嘖嘖嘆賞。折行請交。至於琳宮梵宇。高會雅集。應麟以齒坐末坐。片語一出。無不悅然。披靡自失也。曰。使用昔賢隸事。奪席例。吾曹無坐所矣。臨淮小侯李惟寅慕其名。使客篋而致之。爲上賓。旬日不聽出。惟寅用是亦以詩名。而周宗正灌甫者。雅自負風雅。有人倫之鑒。貽應麟三十韻。首以北地信陽相屬。應麟益自信。尋以父儋外除。歸。從母里中。母患頭風甚劇。乃委身醫藥間。日夜扶持不休。母頭風良愈。而身過勞。得羸疾。因跳匿金華山中。而

會工尙書高安朱衡還過蘭谿。衡故從燕見應麟詩而驚賞者。至是從山中蹤迹得應麟。以書要之。泊舟待三日。應麟感其意。爲長歌七百言以贈。衡袖示督學使者滕伯輪曰。勿失天下之奇材也。舉於鄉書上公車。報罷。其意殊不在一第。其所游從。皆天下賢豪長者。然所當心。李攀龍。王世貞兄弟。汪道昆。吳國倫。會攀龍死。餘皆散處不相及。久意邑邑。不自得。會王世懋過蘭谿。卽應麟。劇語二日夕。臨別。握手不忍釋。曰。吾於詩。獨畏於麟耳。已矣。今得足下。又一畏也。應麟乃高臥山中。不復就公車。而蘭谿令喻邦相豪於詩。與之意合。忘形爾汝。臥山中凡六載。始就公車。至都下。遇張九一。九一奇應麟詩。擊節曰。二十年亡此調矣。應麟亦奇九一詩。晤賞亡間。且各自恨相遇晚。試復報罷。時兵尙書張佳允過其里。應麟避弗見。見其父僖曰。公郎君佳甚。故知之。今者難我。得非以使者惠文嶽嶽耶。爲我致之錢塘。請得具賓主禮。旣而強爲錢塘調。佳允果以上客客之。會汪道昆來湖上。大將軍戚繼光系至。道昆數與應麟相聞問。把臂劇驩。出繼光所贈七絕句。詫之曰。大將軍健兒也。乃能作文語。不下沈太尉曹竟陵。生亦能賦贈我乎。應麟援筆千餘言立就。奇思滾滾。旣大將軍集。相向嘆賞不置。應麟性孤介。時時苦吟沈思。不甚與客相當。而當其揮麈尾。品時藻。不能無置雌黃屑吻。有莫生者。躁而食。以品不登上中。恨應麟切骨。屬道昆繼光遊西湖。故遍置坐客。欲以爲開端。應麟坦然弗屑也。築室山中。後先購書四萬餘卷。分別部類。彷彿劉氏七略。而加詳密。曰二酉山房。旦夕坐臥其間。意愴如也。居恆笑蠹魚去人意不遠。又謂我固識古人。恨古人乃不識我。其託尙如此。好稱說前輩風節。嘗怪其郡若梁劉孝標之介。唐駱賓王之忠。而世僅僅以文士

目之。當由作史者盲於心故。且史第知有狄梁公、宋廣平賢，皆頽首而從周，裸將以視竇王，何徑庭也。上之巡按蘇禹，禹雅信敬之，亟下其事。竇王得祀祠鄉賢，而孝標亦暴顯。所著詩有寓燕、還越、計偕、巖棲、臥遊、長嘯、三洞、兩都、蘭陰、畸園等集二十餘卷。詩藪內篇外編雜編二十卷。胡氏筆叢四十卷。六經疑義諸子折衷、史叢、史評、皇明詩統、皇明律範、擬古樂府、古韻交遊紀略、兜玄國志、酉陽續俎、隆萬新聞、隆萬雜聞、補劉氏山樓志卷、蒐緝諸書有羣祖心印、方外遐音、澄懷錄、抱膝編、真賞編、會心語、數百卷。

宗臣，字子相，興化人。臣爲人秀髻眉豐下，目光奕奕，傍射負氣，豪儁自喜。當其踰阨時，習戴氏禮已竟。一日戲搆題而屬文，文成多奇語，父異之，爲益授臣業，俾卒焉。臣遂以時義名。十四試諸生第一，自是連試輒第一，而又十餘載始成鄉薦。明年成進士高第，授刑部主事。吏尙書李默見臣文而奇之，調爲其屬，得考功故事。吏部郎自相貴，絕不復通他曹郎，而臣日夜與其舊曹李攀龍、徐中行、梁有譽、王世貞游，益相切劘。爲古文詞，考功署中，自公令外，多不復酬往，而臣少年驟貴顯，諸曹偶不無目攝之矣。臣亦以湛思故略血，謝病歸。病良已，築室於百花洲，讀書其中，不復問世事。居二載，默復入政府，移文趣臣，乃強起。有遷人陳丞者，緣入重出百金裝，臣不悅曰：丞爲廉吏，惠吾邑，吾不啻百金者數也，而乃用邑金溷我者，何也。丞謝過罷去。自是贖贖俱絕。尋調文選，遷稽勳員外郎。臣強敏於職，不廢，亦時時佐其長，有所推進，而其好爲古文詞日益甚。會李默與嚴嵩交惡，中法，而臣又嘗博揚繼盛，嵩恨臣甚，凡欲用考功，斥之。有救者，獲免，竟出爲福建參議。臣遊燕子磯，爲文紀之。復游茅山，題詩刻石，愀然長嘯，有終焉之志。父趣之。

始行至而旋有倭難。當守西門。鄉氓極負求入者幾萬人。臣戒門者內之。或謂賊且近。奈何。臣曰。我在。不虞賊也。入甫畢。賊至。衆懼失色。且下。臣行求得善火具者百人。置要害間。手白金。人爲勞。且約曰。侯吾鼓而俱發。不然毋動也。賊輕城無人。凌脾睨上。魚貫其後。臣度賊已集。鼓之。累百發。洞中賊。死者無算。遂潰去。督府檄臣獲狼兵歸。兵出省。欲縱。臣令語之曰。吾日一酒肉犒若。若不歸伍宿。吾不止寢也。夫法不能貸若矣。狼兵懼。臣威名。竟度嶺。無敢譁者。臣兩佐文武試。其所著策論。若序傳。藝林中以爲式。久之。遷其省。按察副使。督學校。臣每出。按部校士。坐堂皇上。取試題爲經義。以夕及旦日閱卷。又以次日進退諸生。無不人人厭服。已。徐出所爲程義示之。又無不人人厭服也。諸生貧者。調學田租贍之。不給。則爲捐月俸。減供具。繼之以爲常。臣旣精強於其職。而兩臺使者。諸司道大夫。用名重。故造請文事。填委。臣又以其間。劇意騷雅。嘔吟。非丙夜不已。遂寢。瘵。日以亟。乃稍次其生平著述。凡十餘卷。梓之。疾革。衣冠坐廳事。手書三詩於帙。飄飄然有御風凌虛意。以擲筆而逝。臣於詩好建安李杜。於文好司馬遷李夢陽。人謂其詩文橫放雄厲。莫可得而羈笑。高者凌太虛。秀者奪萬色。務出意氣之表。以自快愉。得年僅三十六。梁有譽。字公質。南海人。爲諸生。卽名能歌詩。傾嶺南矣。已成進士。燕中。卽又傾燕中人。而居恆不自得。鬱鬱思歸。授刑部主事。與同舍郎李攀龍。王世貞游。乃稍自媮快。曰。世故有人哉。時郎宗臣已去。爲吏部。休瀚輒一來。俄。卽徐中行來。中行。故常與有譽遊。南太學。深相結也。以是日相與切劘古文詞。甚懽。而一旦念其母滿。請告歸。有譽時聲愈籍甚。當徙郎吏部。吏部亦推擇嶺南郎一人。以風有譽。且止者。有譽笑曰。吾戶欲歸。

豈以刑部郎少之故。而一吏部能廢我哉。竟去弗顧。至濟上。貽百韻詩。攀龍輩爲別。百韻。卽古自杜甫氏。而外不恆見也。而文甚工。旣歸。乃杜門度圖史。丹青彝鼎之類。一小閣。卉木竹石環之。身吟誦其間。囂囂然不屑也。郡國大吏雅慕其名。千旄門相踵。有譽則以一蒼頭徂。不任客。鄉里執袴子。迹絕不相聞。而潦倒書生。挾册剝琢。則尋聲出。延食之矣。然有譽所最善者。攀龍輩。武昌吳國倫。最後定交。而謝榛以布衣故。有譽亦間從遊。其於鄉。師事黃文莊佐友。黎戶部民表。嘗與民表約游羅浮山。觀滄海日出沒。探句漏。令丹鼎。庶幾其人一遇。而屬海颶作。不可以舟。乃止。宿田舍者三夕。颶益甚。山木盡拔。道爲徒。有譽亦意盡。乃賦詩而歸。是時屬疾寒。中湊矣。歸而疾大作。遂不起。年僅三十有六。有譽旣歸。養益謝棄。交游窮古作者之蘊。所爲集若干卷。取其上駟。而擬古作者無大媿。其下駟亦足以走夫後死者。官刑部日。其賓友過從。飯一肉。不能再饗。旣復過。具鮭菜。不能肉。以爲恆。青衫沓拖。其當繡處。時嚙殘。則縵以絲。極之。而問其家世。故嘗貴。爲諸生。日以意氣耗其數百金。不願詰之。則笑而指其腹曰。是豈任肉者。又性不好食酒。事其母篤至。夔夔齋慄。與諸舅季友愛甚昵。卽獨飯。飯弗甘也。又脊飭於言行。不侵然諾。取予一介不苟。然好言數。又能相管。一日。謂宗臣曰。子甚貴而無身。奈何。有譽歿之六年。而宗臣亦年三十六以歿。徐獻忠。字伯臣。華亭人。神識茂暢。性操并介。自其髫髻時。雅已蜚俊聲。擅著作。久之。舉於鄉。凡六上禮部。不利。君旣不獲逞於時義。乃益務爲搜獵神官盜者。外家之語。逸壁斷戟。摩削亡昏旦。農圃醫卜支離。逆音聲人伎。往往精探其所由造。雖專門名家。無以難之。而其爲詩。自建安以下。至大歷。鮮有不窺薄神。

情妙傳。獨在江左與貞徽之際而已。文主爾雅。不離象質。賦頌碑誌。取材東京。然至於論說與革利害。物情時趣。有味乎言之也。華亭故推陸文裕深博。精於古。視獻忠爲父行。其揚挖風雅。下上今昔。耳語膝坐。忘其爲吾汝也。獻忠隸選人。當得縣令。人或謂其少遲之。一令何足溷徐先生爲。獻忠曰。令易及民耳目也。一第亦何足溷某也。得浙之奉化。奉化夷峻而城蛇虺雜居。民俗陋而好訟。至不爲斤斤三尺溼束之節。用平稅。獨役防水。務有以衽席其長老。稍推羨田學官爲膏粥費。與禮揖遜。彬彬如也。所爲植培。務在單赤以下。其政術好近民而遠上。移牒條教。飭儒而不必緣吏。以故良士大夫草莽之臣。類能誦說之。他不盡爾也。甫二歲。入計道。彭城有監司者。以一籠箠授獻忠。致之京。獻忠佯爲不悟。抵京。以一籠箠報。亡何坐殿。罷會其父病。執其手曰。吾三世不益丁。得無於葬有所根哉。是而責也。獻忠拜受教。前爲諸生。固精堪輿家言。相地數百里。獲吳興之福山。葬其親。又愛其山水清遠。土風醇嘉。旣罷。則斥置墓田。旁構丙舍。爲終老計。不竟稱華亭人矣。五柳雙桐。偃蹇枝門。疎櫺淨几。奇書古文。間以金石三代之器。葛巾羽氈。徜徉其間。客至。則留小飲。聽去。春容寂寥。隨取而足。時命單舫。漁童樵青於苕霅蘆間。不復可蹤迹也。故工尙書。劉麟。蔣瑤。刑尙書。願應祥。諸大老。爲耆英會。迫欲得獻忠。獻忠一再往。後了不復戀。肆力九經。作春秋稽傳錄。洪範或問。大易心印。四書本義分節。受鑰伯陽。以破元扁。作參同契。亥步心測。璞算神啓。作大地圖。衍義山房九笈。三江水利攷。吳興掌故集。探始中聲。旁極正變。作樂府原。唐詩品。朱邑旣老。不忘桐鄉。作四明半政錄。其雜著詩文。又數十卷。行於世。

俞允文字仲蔚。崑山人。少從師受經生業。顧好爲古文詞。多讀六季以前書。年十五。爲馬鞍山賦。搜剔山事。靡挂漏。而詞雅馴。絕不作時人語。名譽藉藉起。是時邑之著俊若張寰。吳中英。咸以爲忘年友。而歸有光行稍近名。能經術。允文以古文辭與之角。頗目爲甲乙。社云。然允文用調古。試輒少利。家世窳薄。又性嗜書。不別治生。日以產挫。其配梁。至泔澆。而助之。猶不給也。允文獨夷然。問曰。不能三食乎。則姑二食。乃至不二食乎。則又姑一食。得麥飯。少藜菜羹佐之。若梁肉矣。乃益刻精於學。所造五言古。進薄建安。退亦不失陶謝。而其於歌行絕句。俱宏麗。有景龍開元風。騷賦誄頌。宛然昭明所選次。少工臨池。久而益擅之。其小隸。駿駁歐柳。而上登吳興堂。行筆出入禳河南。稍縱之。則米襄陽。八分。自謂得西岳碑體。以方韓蔡。蔑如矣。允文白皙。美風神。秀眉目。膩頰。飄鬚。時時稱病。病多頭風。暑月恆御氈衾。稍及冬。加以貂帽。客至。隱几而對之。焚香啜茗。竟日談笑。無凡語。所酬應亦札。頃刻數函。無凡筆。客去。亦無所報謁。其最後。裁益高。名益重。稱神交者徧天下。諸以文請者。不虛月。以詩請者。不虛日。以草隸請者。不虛刻。往往得竟去。而里中子狎習允文先生者。謂允文先生虛和寡他嗜。顧嗜奇。不食酒。頗耐食。甘間於島渚。間淘一拳石。市甘果。袖而薦之。亦輒獲數行。以相矜重。而是時諸行部使者若徐中行。首造廬定交。於是郡守王道行。中丞張佳允繼之。而學使者吳遵與佳允共旌其廬曰真逸。楚王以志楚聘。守李某以志吳聘。羔鴈踵相接。而皆力辭之。獨參政王叔果。以三吳水利造質。爲成一編書而已。崑令之賢者曰王用章程達。右文而高其行。每過。輒談笑移刻。然欲伺允文色以間不得也。達每嘆曰。古所謂徵君。真先生其人哉。卒所著集。

若干卷。

盧枏字少樵。一字子木。大名濬人也。其先世業農。穫則什一而息之。故以貴雄於鄉。枏少負才。敏甚。讀書一再過。終身不忘。父爲入貲太學。上舍數應鄉試。罷免歸。枏才高。好古文辭。不能類而就繩墨。爲博士諸生業。以故試輒不利。而聲稱奕奕。在薦紳間著也。枏爲人。斲弛。不問活生產。時時從倡家遊。大飲。飲醉。輒弄酒罵其坐客。毋敢以脣舌抗者。而又豪歌詩。當所得意。下筆數千言立就。客咸咋指遁去。竟用是敗。濬令某者。數刻深名法家言於文。非能好之。陽浮慕之。以張吏術耳。謂枏邑諸生才得相從事。幸甚。枏亦欲借令。謬恭敬爲相得極歡。令嘗從容語枏曰。吾且過若飲。枏歸。與翁媪益市牛酒。夜共張。至旦。室邑子相戒。慮生有重客。門之履相蹈也。而會令有他事。日昃不來。枏愧。且望之。斗酒自勞。醉則已臥。報令至。枏故徐徐出。坐久之。枏稱醉。不能具賓主。令恚去。曰。吾乃爲僮人子辱。媿見其邑長者。邑人素惡枏者。爲枏讒。曰。是嘗見令君文。笑而且唾。令益怒。亡何。枏于撤其役夫。得伏麥。以爲盜也。榜之。役夫被酒自理。而聲強。枏復加榜焉。旬日矣。役夫夜縶於牆。墮事聞。令色動。曰。嗜壘。是復能倨見我耶。匿役夫所由死狀。當枏抵坐。獄具上。報可。枏旣已坐。大辟繫獄。又令仇之。故毋敢爲稱冤者。而會枏鄉人間嘗侍枏不遜。枏目礙之。去。已來爲獄吏。夜縛枏格筆之數百。臀腫悉潰爛。且死矣。吏以他事能不死。乃感慨折節。益讀其所攜書。著幽鞠放招賦。以自廣。其幽鞠賦曰。盧枏旣用事。逮濬獄。與幽囚伍。替潰迷惑。目無日月。不知晦朔。仰天太息曰。嗟乎。聖人修身晉道。立命不貳。賢者推運循理。以定所天。顧枏微眇。離茲憲網。問諸造物而

已。因作賦以自廣。其辭曰。帝顓頊之嬋媛兮。皇波汪乎姬姜。僊海岱蜿蜒於北陬兮。靈宗嘉牒於范陽。逆雲雷之霽露兮。跋躒此改南服。淑凌土作甘美兮。躡康侯之芳躅。皇傑梧童道以迪惠兮。母氏靜約而告育。曰。余夢文杏糶飢於霄漢兮。芙蓉暉而尙粹。溢焱焰條而進兮。應龍鬻鬻而下駟。偵蚺虬以誦談兮。額挖攫而速喘。億錯指以羣號兮。朋駭駭而決背。條恍恍以隕虛兮。覺懷妊而因基。審余降於衛許兮。幼好娉而斐斐。岌青雲之偉冠兮。挾長劍之陸離。朝晡余髮於崑崙兮。暮濯足於咸池。擘招搖以爲袂兮。履懸星以爲綦。余長喟其歷之未瑰兮。勳脩余之芳菲。裁薜荔以爲衣兮。衷芙蓉之翠裳。集菌萑以爲藉兮。糝杜衡以爲棖。揭旌於蘭皋兮。稅駕乎芳之塘。余迅或鞞以高舉兮。泊鍛翻而顛隕。謂曾參之殺人兮。談市虎而成憤。蒼蠅習習其貝錦兮。魚目傲明月之璀璨。嫫母慙以娉媿兮。擯西施之顏婉而自賤。螻虺仇仇於几筵兮。戈鋌森森以割余目。既阨余之庠廡兮。又藹之以欽拳。低曼睪彼犴狴兮。桀血斷而封囿。管闐怒以蹕踞兮。視將蹙蹙而矯鶴。檻膠蠅以黜軋兮。棟樞鑿而鑿鑿。縲纒纒於伏棧以苦余兮。仍反接而窳臂。耳嘈嘈若有聞兮。何迤迤而拂帽。目炯炯以或見兮。佇鑑勿而復贖。神軼氛習習以潤濛兮。精憧憧而往來。覺塊然滯此一方兮。心懇懇而增哀。驟風淫淫以嚙余髮兮。魍魅含睇而稽颡。保照照相喃以對泣兮。御紳糾而呵護。般逮余兮紛陟。翳鵬鳥之巢蚊睫兮。焉能戢此軀也。枕雕虎以燕憩兮。又誰知不我虞也。悲時晷之遄邁兮。懼靈忽其西藏。微霜淪而下降兮。恐瑤草之不芳。高馳志乎雲中兮。桀精氣而相羊。王喬銜銜而弗顧兮。赤松告余曰。荒塘行。偶偶獨曰暮兮。安放乎不死之鄉。橫波而微舟楫兮。天吳搖

首而振怒。歷太山之坎珂兮。颯颯盼以當路。發狄蹇以在柙兮。雖輕捷其焉去。鳳凰之羅罽羅兮。縛芟
芟之華羽。抱鬱軫以顛處兮。呼蒼天以爲直。戒五嶽與嚮服兮。被河海使聽殛。咎由遠以不聞兮。玄武違
而莫測。何羣神之豐豐兮。靈炳耀而罔恤。夫余既不能蟬蛻於茲蕪穢兮。眇桀風而長驚。心結思於大荒
兮。魂煢煢而上度。微青雲之霏霏兮。飄風回而霧霧。載玉女於後乘兮。飭豐隆以先路。羲和僵以驂桀兮。
望舒翥而傲御。征輕輶之闐闐兮。八鸞鏘鏘以迥步。承雲霓之氛靄兮。靈旂繽紛纓虬乎翠羽。挹朝霞以
爲餐兮。吸沆瀣之精英。漱華池之飛泉兮。聆鈞天於帝庭。素女涕泣以淋浪兮。問緹瑟而啜嚶。慮妃歛歔
以結軫兮。潛咨語而沈情。余凌軒虛而佚蕩兮。將擊結乎三光。撰余轡而馳騁兮。問元化於句芒。採三秀
兮。眺瀛洲之微茫。弭余節兮。聊解珮乎扶桑。睇南州以凌厲兮。嘉桂樹之叢叢。召風伯以驅煥兮。謁炎帝
於清宮。何蒼梧之鱗鱗兮。重華穆以揚靈。湘密鱗而觀灑兮。二妃胡爲而弗從。決白門以西望兮。覲虜收
於金樞。氣滯滯以莽曠兮。薄晦晦而誰須。觴王母之仙姝兮。挾瑤池之芳都。指玉勝以爲約兮。歌白雲以
相愉。荃旣婦余以好艾兮。絕弱水而進輅。齊玉轂之澠澠兮。指寒門而並鶩。軼鍾山之幽馳兮。令照之以
燭龍。召玄武爲備禦兮。句辰翼乎紫宮。託鸞鳥爲之先後兮。問太乙之繚垣。靈剗剗以勵約兮。風凰承旂
而飛軒。雷師種穰轟礪以震盪兮。烈缺閃爍而施鞭。護鳳頂以摧兮。余闐咤噫而俾還。卒攬涕反此舊都
兮。潔筵篲從卜乎巫咸。曰天地無陰兮。物無終始。變化互渝兮。幹流遷徙。形氣轉薄兮。或浮而沈。造化勿
穆兮。禍福無門。聿性命之難言兮。誰知其極。萬物糾以霧蓋兮。又安所止息。惟大人齊物我兮。以天地爲

盧舍。總山川於毛髮兮，騎日月以爲馬。夫有虞之潛歷阪兮，當歷數之在躬。夏后胼胝而陟大寶兮，季有光於黃熊。震龍燄而夏積兮，顧駕禍於周庭。白魚躍以膺天命兮，劉氏顯而有功。奚伍羊以自鬻兮，由余振於西戎。尙鼓刀於海濱兮，仲父射鉤而桓榮。仲連談兵以卻嬴兮，胥重繭而存楚。條相后而饑死兮，贊搖筆以光輔。墨不黔以衛道兮，孔輶旋而微伍。光猶介以自湛兮，夷顛頽而振古。夫道固無涯涘兮，行焉知其所如。惟恬澹與冥漠兮，斯真人之攸居。從委命而桀流兮，遊寥廓之鄉。忽喪我而無是兮，觀秦初之茫茫。余託蜉蝣與遊兮，曾日月之徜徉。忽歸魄於元壤兮，又何足傷。勉修余之俶服兮，珮芳澤之幽蘭。紉揭車之落英兮，襲芷離與射干。飾翡翠而綴珠被兮，爛的皪而芋眠。組綺縞而飄颻兮，下結之以雙璫。余媿美而自鑑兮，何媒妁之可攀。夫君眩而弗御兮，亦余心之嬾嬾。詩曰：天地緼綸，何時明。我欲見之，心傍徨。輾轉懷憂，祇自傷。超軼絕世，窮大荒。帝極洪洞，不可量。緘悲歸來，卜巫陽。勵志肥遯，含大章。獲我所思，樂無疆。放招文多不盡錄。居頃之，盜行剽，迫柑父自剄死，燒其廬。子鏡家成，貸不償。柑固已壁立矣。令亦更悔，念魚肉盧生何酷耶。陰稍稍寬柑拳，有所讎詩辭，呼使從獄具草。草上予酒肉食飲，洗沐，尋令去。澹爲大官，事益解，而故人謝榛者，攜柑賦游京師，貴人間絮泣曰：天乎，冤哉。盧生也，及柑在，而諸君不以時白之。乃罔罔從千古哀湘而弔賈乎。時陸光祖有心計，俄謁選，得濟令。至則首爲更爰書上論，鬼神勦作三歲。盧柑旣出獄，家益貧，乃爲九騷謝陸令，而謝榛方留滯鄴。柑走謁之，因上賦。趙王趙王覽而奇其文，立召見，賜金百鎰。於是諸王人人更置邸，延柑，柑則稱客坐右坐，握麈尾辨說，揮霍數百千萬言。風雨集。

而江波流也。鳴毫颯颯，儵忽而爲辭。若賦各得意去，旣酒醉，故態畢發，罵其坐人，則人人掩耳走避。枴竟亦不自得罷還。顧囊中所餘金幾何，趣付酒家也。婦囁囁咎枴，不顧曰：天生盧枴，爲女曹地耶？王世貞治獄大名，飛書大任山中，勒邑吏具筆札授枴，所著集若干卷，枴故亦慕稱世貞，嘗爲文託謝榛致之，不達。至是見世貞郡臺，把臂爲布衣，飲三日，酒語慷慨，恨相見晚也。世貞序其賦，略曰：余迹盧枴，所遭逢及狀貌，殆中庸人耳。旣稍得其古詩歌行讀而小異之，至讀諸賦，則未嘗不爽然自失也。三閩家言，忠愛悱惻，怨而不怒，悠然詩之風哉。長卿務以靡麗宏博，旁引廣喻，其要歸卒澤於雅，子雲謂之從神化來耶。然自東京而下，蔑如也。諸儒先生號名能文章家，奈何取其所論者而姑韻之，以爲賦若茲乎哉。卽盧生所就，幽鞠放招，凡三十餘篇，其概不得離津筏而上之，然而大指可諷也。窮天地之紀，采人物之變，與天喬走飛之態，經緯臚列，假二三能言之士，如宋玉景差者，蟬緩於左從之門，豈其先枴而室哉。枴旣以別世貞去，南遊金陵，陸光祖爲祠部郎，留月餘，走越歷吳，毋所遇，還益落魄嗜酒，病三日卒。所著有集。

孫一元者，嘗放遊吳越間，莫知其所自來。人問其姓名，曰：我孫一元。問其字，曰：我字太初。問何以稱太白山人，曰：我秦人也，嘗棲太白之巔，於是稱云。人始知爲秦人，及問其家世，不答。善詩，有超逸才，嘗出秦四遊，浮湘漢，踞衡廬，踰河涉泗，謁闕里，登岱嶽之峰，憩日觀，觀日出焉。奇之，駭叫狂走，人頗異之，然弗識之也。於是南走吳會，吳會人見一元行事，又見其詩，於是爭相禮敬。一元固善說玄虛，又膚瑩渥，顏口鬚，望之如神仙中人，於是愈禮敬而好異之士，踵接於門矣。一元往來越湖間，多在支硎南屏山寺中，鉅家則

爭造寺餽美飲食鞋服。以是饒裕。冠珮之士。慕名來訪。輒供具。權洽竟日。酒酣暢歌。意態超脫。令人起塵外之思。於是人士轉相譽。稱爲孫山人。聞四方矣。一日病且革。倉皇屬其友曰。死葬我佳山。幸題我墓曰。明詩人孫一元之墓。已而甦。起而憤曰。幾負我志。而吳越人。以是覘知山人。初無羽化術。徒空談。放浪形骸。稍稍疑避。而山人則顧益說。世務恆七齒不平。其詩亦多爲忿激悲壯之音。於是用世之士。顧益喜之。樂與之交。義投情合。泛濤弄月。扣舷和歌。俛仰一笑。每自許與世無雙。而湖舉人施侃者。雅喜其人。而病其放。因說之居。於是買田苕溪之旁。又說之婚。則婚侃妻妹張氏。喜山人者聞之。率移書相慶曰。太初爲全人矣。是時。建業劉麟龍。寬成徙居湖。與吳充陸崑暨山人結社遊。號苕溪五隱。山人始講吾儒性命之學。無何病卒。年三十七。有太白山人集行世。

宋登春。字應元。趙郡新河人。生壯歲。鬚髮卽衰白。因自號海翁。人業以海翁稱之。晚居江陵之天鵝池。更號鵝池生。宋氏故新河農家。其先嘗累高貲。登春少失父母。以亡嘗省家益貧。然性嗜酒。家貧不能長得酒。時時發憤讀古人書。見前世結纓射書。繫印諸賢豪。急難奇節。未嘗不慷慨悲歌。泣數行下也。登春始慕俠。能挽強馳騎。間出其餘智爲小詩。輒自喜。不欲以示人。又稍稍通繪事。師江夏吳偉。鄰之父。有顧而鬻者。登春戲爲之貌。絕肖。父因勸登春益習此。可作生業。何乃日沈酣落魄里中也。登春不應。以是里中盡目爲狂生。亡所知名。年三十。會一歲間。妻子女五人俱相繼死。生仰天歎曰。咄嗟。天乎。將驅我於埃壙之外乎。遂屏家於其兄。而自囊書遠遊。遊至博陵。博陵有故所善客憐之。饋之藝。合二年。登春默默

不自得、竟謝去。去之京師。日跨一蹇驢、行長安道中、往來覓詩。方是時、臨淄布衣謝榛、以詩遊公卿間、聲籍甚。登春間得其詩、唾之曰：「作詩何爲者、而令七尺軀、津津諛貴人、丐活耶？」居京師月餘、亡所遇、又去之渤海。入兗州、登嶧山、觀秦皇帝遺碑、還居長白山一蕭寺。出囊中故所貯漢魏盛唐名家詩、閉關揣摩。如是者三年、頗窺作者之戶。遂大放厥詞、而於五言尤工。眼駸駸白、亡時人矣。又去而浮淮海、渡楊子江、登北固山、以望金陵。鍾山紫氣、過雲陽、匍伏延陵季子祠下。涉吳會、訪錢塘天竺靈隱諸峰。已復走徐青、歸新河。數日、又去。出居庸、循太行山、而西窮關陝、澤潞諸邊塞。其在井陘、嘗居龍窩寺、瓶粟罄矣。寺僧厭苦之。登春曰：「僧毋窘我、我試繪一小圖、持至市中、當得粟。」已而果鬻粟五升。伺粟不盡、不更繪。而市人爭欲得生之繪、則日擔粟詣寺門相聒。登春不能堪、乃避至城外一山樓。已由棧道入西川、遊峨眉、眉山、邛巫、巴、下荆鄂、將達於潯陽、返於黃迂雲夢、而北走大梁。偶憩鈞州酒肆、而鈞州有黨中丞者、得其所題酒肆中絕句詩、強致之家、留數月。復自宛涉襄、過京山。登春所跨驢、蹶於唐氏之淖、傾其囊中書、曝之衢。唐氏異登春所爲、要與之飲食、歡相得也。遂主唐氏一歲而行。唐氏爲刻其詩、傳荆郢間。更贈登春二童子、命名曰丹砂白石。登春挾二童子、轉江陵。登王桀樓、讀其賦、感昔賢流寓地、有終焉之志。始登春數年前、嘗至江陵、居城西開元觀。故遼王奇其詩、召謁便殿。登春久在遼王所、絕不與用事者比。遼王常召登春遊別宮、聲妓滿前。他客或故爲調笑、以悅遼王。登春第端坐、竟日夜。卽飲至大醉、目不流睨。遼王益敬憚之。每見登春、輒爲斂容。登春之不及於難、以此。自遼王廢、登春不樂居江陵、乃自攜少貲、逍遙七澤間。最後、又

還江陵，遍謝其故所往來人，而斥其二童子姑去之，乃自童髮爲頭陀，不知其所之云。

徐渭字文長，山陰人。幼孤，性絕警敏。九歲能文，年十餘，傲楊雄解嘲，作釋毀二十，爲邑諸生，試屢雋。胡宗憲總督浙江，或薦渭善古文詞者，招致幕府，筦書記。時方獲白鹿海上，表以獻，表成，召渭視之。渭覽罷，瞪視不答。宗憲曰：生有不足耶？試爲之。具稿進。宗憲故豪武，不甚能別識，乃寫爲兩函，戒使者以視所善諸學士董份等，謂孰優者。卽上之。至都，諸學士見之，果賞渭作，表進。世宗大嘉悅其文，旬月間，遍誦人口。宗憲以是始重渭，寵禮獨甚。時都御史武進唐順之，以古文負重名，宗憲嘗袖出渭所代謬之曰：公謂予文若何？順之驚曰：此文殆甚善。後又出他人文，順之曰：向固謂非公作，然其人誰耶？願一見之。宗憲乃呼渭偕飲，順之深獎嘆，與結懽而去。歸安茅坤時遊與軍府，素重順之，嘗大酒會，文士畢集。宗憲又隱渭文語，曰：能識是爲誰筆乎？坤讀未半，遽曰：此非吾荆川，必不能。宗憲笑謂渭曰：坤雅意師荆川，今北面於子矣。坤慙慍面赤，勉卒讀，謬曰：惜後不逮耳。其爲名輩所賞服如此。渭性通脫，多與羣少年昵，輒市肆，幕中有急需，召渭不得，夜深，開戟門以待之。偵者得狀，報曰：徐秀才方大醉，嚔蓋，不可致也。宗憲聞，反稱善。時督府勢嚴重，文武將吏庭見，懼誅責，無敢仰者。而渭戴敝烏巾，衣白布澣衣，直闖門入，示無忌諱。宗憲常優容之。而渭亦矯節自好，無所顧請。然性豪恣，間或藉其勢以酬所不快，人亦畏而怨焉。及宗憲被逮，渭慮禍遂及，發狂，引巨錐刺耳，深數寸，流血幾殆。又以椎擊腎囊，碎之，不死。渭爲人猜而妒妻死，後有所娶，輒以嫌棄。至是，又擊殺其後婦，遂坐法繫獄中，憤懣欲自決。爲文自銘其墓曰：山陰徐渭者，少慕古文詞，及

長益力。既而有墓於道。往從前長沙守季先生究王氏宗旨。謂道類禪。又去扣於禪。久之。人稍許之。然文與道終兩無得也。賤而惰且直。故憚貴交。似傲與衆處。不洗袒裸。似玩人或病之。然傲與玩亦終兩不得其情也。舉於鄉者八而不一售。儲數椽儲瓶粟者十年。一旦客於幕府。典文章數赴而數辭。投筆出門。人爭愚而危之。而已深以爲安。其後公愈折節。等布衣交。留者兩期。贈金以數百計。人爭榮而安之。而已深以爲危。至是忽自覓死。人曰。渭文士且操潔。可無死。不知古文士以入幕操潔而死者衆矣。乃渭則自死。孰與人死之。渭爲人度於義。無所關。時輒疎縱。不爲儒縛。一涉義所否。然斷頭不可奪。故其死也。親莫制。友莫解焉。平生有過不肯掩。有不知。恥以爲知。斯言蓋不妄者。其自名如此。然卒以援者力獲免。既出獄。縱遊金陵。北客於上谷。居京師者數年。獄事之解。詹事張元忭力爲多。渭心德之。館其舍旁甚驪好。然性縱誕。而所與處者。頗引禮法。久之。心不樂。時大言曰。吾殺人當死。頸一茹刃耳。今乃碎磔吾肉。遂病發棄歸。既歸。病時作時止。日閉門與狎者數人飲。曠而深惡諸富貴人。自郡守丞以下。求與見者。皆不得也。嘗有詣者。伺便排戶半入。渭遽手指扉。口應曰。某不在。人多以是怪恨之。晚。絕穀食者十餘歲。人問何居。曰。吾噉之久。偶厭不食耳。無他也。尤不事生業。客幕時。有餽之洮絨十許疋者。遂大製衣被。下放所嬖私。襲之服。靡不備者。一日都盡。及老。貧甚。鬻手自給。然人操金請詩文書繪者。值其稍裕。卽百方不得。遇窘時。乃肯爲之。所受物。人人題識。必償已。乃以給費。不卽餒餓。不妄用也。有書數千卷。後斥賣殆盡。罇筓破弊。不能再易。至藉稿寢。年七十三卒。渭爲諸生時。提學副使薛應旂閱所試論。異之。置第一。判牘尾曰。句句

鬼語李長吉之流也。及被遇宗憲。值比歲宗憲思爲渭地。諸籛官入謁。屬之曰。徐渭異才也。諸君校士而得渭者。吾爲報之。時宗憲權震天下。所出口無不欲爭得。以媚者。而偶一令晚謁。其人貢士也。公心輕之。忘不與語。及試渭牘。適屬令事將竣。諸人乃大索獲之。則彈擿遍紙矣。人以此歎渭無命。而服應旂知人焉。渭於行草書猶精奇偉傑。嘗言吾書第一。詩二。文三。畫四。識者許之。其論書。主於運筆。大槩昉諸宋氏云。所著文長集。闕篇櫻桃館集。各若干卷。註莊子內篇。參同契。黃帝素問。郭璞葬書。各若干卷。四書解。首楞嚴經解。各數篇。皆有新意。渭父總。以累戍龍里衛。始至龍里。士人譁之。總以教讀自晦。授童子孝經。故謬其讀。士人笑曰。是不足逐也。已而領貴州鄉薦第一。仕至夔州府同知。渭貌修偉。肥白。音朗然而啾鶴。常終夜呼嘯。有羣鶴應焉。二子曰。故俱渭負才性。不能謹飾節目。然迹其初終。蓋有處士之氣。其詩文豪宕。雖未免瓊類。自成一家言。中被詬辱。老而病發。其才力所詣。質諸古人。當不少媿。渭沒數年。楚人袁宏道。見所爲詩文。稱爲奇絕。謂有明一人。聞者駭之。渭題跋。多自稱田水月。

孫宜。字仲可。華客人。宜五歲。穎異。讀書數行俱下。稍長。工屬文。父榮。爲兵部郎。所師友何仲默。崔仲覺。鄭善夫。薛君來。楊用修。時相過從。奇宜而試之。下筆萬言立就。而當是時。宜慕諸名士。爲古文辭。私已有所撰著矣。年十九。舉於楚。是時宜業破萬卷。而氣象視第一無足芥拾。家世仕宦。又少從父遊燕中。所習聞國家掌故。將相文武之業。甚詳。抵掌而談。今古。毋能難者。宜旣久有名。公卿間時。霍公韜欲疏薦。宜不果。宜罷試歸。道聞其父訃。日夜奔馳哭踊。兩目爲損。凡四載。遇醫。得神方。砭之。復明。宜年三十有八。而歎曰。

丈夫安得老死醒齷齪下駒哉。且夫能衛命者我也。能衛命者我也。因故自號洞庭漁人。人以漁人呼之。則應。他呼則不應。宜既有家世。祿羨盡斥爲園圃臺館亭榭之屬。購異書名畫古器實其中。而奇卉怪木環之。素嗜酒。乃益釀酒。客來過從者。毋問貴賤。輒留飲。飲輒醉。醉亦不問客所嚮。宜間與友人遊石門元頂諸湖山勝地。遇羽人緇流能飲者。卽傾攜釀共之。宜旣自命爲漁人。又不爲衣冠時。時與樵青釣童狎。亡異也。興至。泚筆而書所爲詩。奇逸飛動。龍虬鬱盤。已。又自歌之。感激用壯。節奏頓挫。雲停石裂。宜所著詩文爲集前後六十九卷。兩都集十卷。遜言十七篇。洞玄誌三卷。宋元史論二卷。明初略二卷。岳州誌三十卷。所輯有孫氏日抄六十二卷。王氏易七卷。天文書八十二卷。國朝事蹟百二十卷。求言錄十五卷。宜固挫名。而不能盡闕其書。諸方岳部使慕而請見者。漁人弗見也。卽迫之。亦見。見亦無所報謝。素強。無疾。一夕卒。年五十。

明書卷一百四十九

列傳十一

權臣傳一

史官論曰。叢之神不可藉人。神龍失勢。與邱蟜同。積威約之漸也。古者天子以道德爲銜勒。以刑罰爲策。以萬民爲馬。六官在手以爲轡。御天下數百年而不失後代。所任者法也。德昏則法墮。所尊者勢分也。柄授則勢忘。非必季葉孱主而後然。多有盛強威察。席方中之運。雄武可以鞭撻六宇。而制於一。聰明足以口握萬幾。而昧於一指。如口皇之於李斯。玄宗之於李林。而身死國彝而不悟者。何也。主德旣髦。逸欲生於參勤。諫言不入。蠹竊成於壅蔽也。故曰偏聽生奸。獨任成亂。漢以章奏付尙書。唐以諫官隨宰相。防之密矣。明太祖鑒胡惟庸之亂。革中書省。不置丞相。分其職於六官。兵刑錢穀各有主者。絲分牙制。故外無安史。淮蔡之憂。內無博陸上官之禍。然自宸旒流拱。票擬漸專。外廷罕晝接。掖垣多仗馬。而嚴張之得政。儼然古丞相矣。賢不肖雖殊。然專則盈。盈則覆。其禍國與自禍一也。表而出之。爲來者鑑。

嚴嵩傳

嚴嵩。字惟中。江西之分宜人。父爲藩司吏。母方娠。而有光起解舍。已生嵩。藩使奇之。齋醮備錢布以贈。嵩

身長。疎瘦如削。疏眉目。大音聲。二十二。舉於鄉。二十六。進士高第。改翰林院庶吉士。授編修。數移疾告歸。讀書鈴山中。嵩好爲詩。清雅有態。然弱而不能爲沈雄之思。文亦類之。其治家。纖蓄近小慧。時人莫之重也。嘗奉使至廣西。道謁鄉人李遂。遂故御史司其省試。而得嵩者。常宴鹿鳴日。諸生前爲壽。時嵩頗羸。羈衣。遂不復盼接。至是。投刺見。而講鉤禮。遂出巨刺。漫應之。次日。始修門人禮。布幣再拜。而曰。某非敢薄公也。以公嚮厭之。恐終棄之耳。其猶隘急。睚眦如此。久之。進侍讀。領南京翰林院事。召爲國子監祭酒。嵩於資薄。當祭酒。輔臣費宏。其鄉人。私之。既去位。言官有及嵩者。疏辯。得留。進爲禮部右侍郎。給事中陸粲等論。糺輔臣桂萼所私。復及嵩。嵩奏辯。復得留。尋遷左侍郎。轉吏部左侍郎。久之。進南京禮部尙書。改南京吏部尙書。其在南京。踰五載。不召。以萬壽賀表至京。時議重修宋史。方開局經理。嵩謀於輔臣。時以少保夏言在禮部。日奉行諸祀典。而尙書願鼎臣教習庶吉士。皆不暇兼職。言亦從臾之。遂請留嵩。以禮部尙書兼翰林院學士。專司董理。逾歲。間言入內閣。鼎臣當次長禮部。而嵩復私於言。躡得之。自是始謬爲共謹。以迎合上意。而是時御史桑喬。以災異。列嵩等罪。嵩辯之強。給事中胡汝霖復糾之。有詔。大臣被劾。宜省已。勿得強辯。於是嵩懼。益爲共謹。而其子世蕃。由廕。授都督府幕。已恣行諸曹。居閒有所賄納矣。時世宗入諛。臣言欲祀獻皇帝。以明堂。以配上帝。嵩不敢違。已又欲獻皇帝稱宗。而太廟。嵩與羣臣廷議。皆難之。上不悅。著明堂或問。以見志。嵩皇恐。盡變前說。所以條畫禮儀良備。遂尊獻皇帝曰睿宗。祔武廟。上禮成。而賜嵩白金百兩。綵幣四。有副鈔四千貫。上皇上帝尊號冊寶。尋加上高皇帝尊諡聖號。以

配嵩奏慶雲見上悅受羣臣賀嵩爲慶雲賦及大禮告成頌上嘉之付史館明年加太子太保已從幸承天賞賜優渥與輔臣埒嵩歸益驕於藩國請卹乞封所挾受賄積資且巨萬而南北給事御史以大察交章論貪汚大臣皆首嵩而上皆勉留之嵩奏辯中謂人臣於人主將必使孤立自勞而身觀望禍福乃爲得計上摘其語稱之於是御史謝瑜復論嵩強辯請斥之不聽嵩恚甚乃因員外郎衛元確復命遲歸罪於吏科都給事中丁湛爲寬予之限以市恩參論之俱坐謫已復參其郎中熊過等謫之邊方欲以自張且快意而公論益鄙之言路顯與讐矣是時大學士夏言有所不悅於嵩語見言傳御史葉經疏稱交城王諸孫輔國將軍表柵謀襲爵永壽王庶子惟燧與嫡長孫懷燿爭國封嵩俱納其重賄爲之請勸乞斥嵩以戒貪墨言乃擬旨下臺勘而他多右經語嵩急歸誠於上上憫之弗罪也時邊警告迫上以嵩非所職而咨詢之旣條對平平耳上必爲之激賞欲以風止言者嵩旣已傾夏言而斥之愈益寵幸所供醜祀青祠額獨對嵩居最乃以聖誕恩進武英殿大學士入直文淵閣仍掌禮部事免其奏事承旨時嵩年已六十三而神采溢發如壯時於是吏科都給事中沈良才等首論嵩汙佞不當于大位不聽而南京給事中王暉御史陳經等復論嵩并及其子世蕃婪賄助焰實跡下所司嵩疏辯且乞休優詔慰留之嵩意不快復上疏謂古語云朝廷輕重係大臣臣今動遭詆目爲姦惡海內流傳損傷國體一宜去言官論事乃其職然或聽指使或代報復如昨歲羣奸搆謀呈藁首臣然後封進今不卽退轉相傷害益煩聖心二宜去上果爲溫諭百餘言答之且謂攻擊不休故違君命須罪以無君之律嵩乃出視事時宮婢搆逆旅伏

誅嵩請詔告天下。人謂宮闈而秘密。悉揚之。其國體傷於論大臣多矣。尋代嵩爲禮部者張璧。至自南京。嵩請解部事。許之。賜御饌金幣羊酒。且諭曰。比以異禮勞卿。卿以赤誠匡朕可也。前已賜嵩銀記曰忠勤。敏達。至是復賜其家藏璽書之樓曰瓊翰流輝。奉玄之閣曰延恩。堂曰忠弼。嵩以吏部尙書許讚等許其請托事。不勝益橫。先是。考察御史謝瑜不及。當調嵩特擬旨。用貪酷例黜之。而御史葉經監山東試。嵩乃摘其錄語。以爲狂悖不道。俾禮部參論。逮至京。杖死闕下。潘泉預試事者。皆爲邊邑尉。中外愈側目嵩矣。時尙書許讚以一品六年滿。加兼太子太傅。未幾。上特加嵩官視讚。時輔臣翟鑾。特以資序在嵩上。上待之不能如嵩。每有所咨問及齋予時。時首嵩。而不及鑾。其厭鑾久。特以其舊臣。不忍去之。而鑾不悟也。其二子俱進士高第。嵩乃授風旨於給事中王交。輩俾發其事。鑾與二子俱削職爲民。嵩得益發舒。上一意用之矣。時吏部尙書許讚兼文淵閣大學士。禮部尙書張璧兼文淵閣大學士。同嵩預機務。然不獲入直。應制。嵩事取獨斷。不復相關白。墨墨而已。讚至自歎曰。何必奪我吏部。使我傍睨人。尋進嵩兼吏部尙書。謹身殿大學士。亡何。復以六年滿。加少傅。兼食大學士俸。予一子中書舍人。給四代誥命。嵩乃上言。每獨蒙宣召於心未安。思往歲夏言惡與郭鄖同列。以致生隙。夫臣子比肩事主。當協恭同心。豈宜有此嫌疑。今臣希忠臣元臣讚臣璧。凡有宣召乞與臣同。如祖宗朝。蹇夏三楊故事。嵩蓋欲示厚希忠等。且見言妬也。報聞。時上方好言長生。而都御史盛端明。右參議顧可學家居久。各自詭。有死術。嵩爲進可學所治。餌而薦盛端明。上悉召用之。巡按福建御史何維柏條時事。而中論劾嵩甚切。上怒。逮治之。維柏在道久。

嵩不測上意。乃請寬維柏獄。上爲霽威。杖而奪其職。時諸曹皆受嵩及世蕃請屬。如外府。獨吏部尙書熊浹持不肯行。莫能難也。會浹以罪去。則無所不靡。俄而太廟工告成。加兼太子太師。賜金幣。渥時上微覺嵩橫。而許讚老罷。張璧死。乃思用夏言。時禮部尙書費棗。故善言。而不能得嵩意。探得之。因疏留郎中周疏高簡。而謂大理評事孫學思。假嵩名求出使。而臣執不與。學思嵩私人也。多機警。好以妻斐。中臣以孤危而失此二臣助。愈難自立矣。因乞休。其言頗散漫不根。上以其托指攻訐。切責之。然不浹日。而召言之命下。嵩以是恨費棗。言既至。盡復原官。遂復据嵩上。上爲加嵩少師以慰安之。言既以銜嵩。則頗斥逐其黨與。嵩唯唯而已。不敢救。時世蕃已用恩澤。累遷至太常寺少卿。掌尙寶司事。橫行中外。嵩乃上疏。遣世蕃歸省。墓以避言。上猶使之馳驛還。往嵩以萬壽加特進。又以考九年滿。加華蓋殿大學士。璽書褒諭。仍賜宴禮部。言尋用復河套。失上指。爲嵩及崔元。陸炳構。伏法。嵩遂獨相。上益安之。而費棗亦自以撰齋詞得上幸。嵩度無可報。乃坐其子以不當使事。譴之。而棗亦自恨病死。於是南京吏部尙書張治。國子祭酒李本。以疏遠擢共事。不敢與可否。久之。懇於嵩。始得入直。治不任煩。竟鬱鬱以卒。時宣大督臣翁萬達。大將周尙文。拒卻敵。而嵩復錄一子中書舍人。賜金幣。上以罪人王聯訐而信之。捕故都御史胡纘宗。及株林新舊朝士數十。皆欲寘之重典。嵩與方士陶仲文頗爲救解。得釋。上以嵩對制平獄。可嘉。令兼支學士俸。而仲文遂封伯。然意殊不樂。嵩乃與仲文疏辭。俱報許。而仍以萬壽節封仲文伯爵。加嵩上柱國。嵩乃力辭。謂人臣無上。引郭子儀不敢當尙書令爲比。且欲以示謙。而見夏言悖。上悅。進世蕃爲太常寺卿。

仍行尙寶司事。亡何敵大入犯，掠三輔，旋薄京師。右中允趙貞吉叩嵩直所問計，嵩以撰齋詞辭不見，而
義子右通政趙文華自其室脅肩出，貞吉見而詈斥之。俄而禮部尙書徐階以敵媢書請和，會廷臣議。吉
貞勵聲言：敵在城下，何可和？但請皇上御奉天門，敕沈束旌周尙文，士氣當百倍，而貞吉又自具疏請遣
羣臣有才識辯博者詣行營宣諭諸將，得一賊首，予百金。敢戰者，損卒亦賞。逗遛者，全軍亦罰。上雖壯之，
而內不悅也。嵩因請卽命貞吉往往而驟，至仇鸞軍卒不得要領還。嵩乃激上怒，杖貞吉而譎之，荒傲以
自快。兵部尙書丁汝夔雖以調度失宜，然爲人潔廉，巡撫都御史楊守謙守土臣也，倍道勤王，上怒其不
能破賊，殺之。嵩皆不救，而巡撫王汝孝、總兵羅希韓、邊稍緩，世蕃盡羅其賄，與嵩計，伺上喜而解之，卒以
免。仇鸞故以嵩去言而脫其罪，深德嵩，約結爲父子，復起爲大同帥，帥其衆入援，無功，而爲大言，聳上聽。
嵩從臾之，遂總京營兵，進太保，仍督諸路兵馬，入二萬金謝嵩，嵩受之。敵退，始上疏請發粟賑中虜者，并
掩鬻幣及它選將練兵，碌碌紙上語而已。於是中外怨嵩父子刺骨，而刑部郎中徐學詩歷指其誤國無
狀，凡數十事，且謂其威權足以假手下石，機械足以先發制人，財勢足以廣交自固，乘機構隙，足以示威
劫衆，文詞辨給，足以飾非強辯，精神警敏，揣摩精巧，足以趨避利害，而彌縫闕失，私交密惠，令色脂言，足
以結納權路而緘杜人口。故諸凡論嵩者，卽不能顯禍於正言，直指之頃，亦必托事假人，陰中之於遷除
考察之際，臣不能悉記。卽如先任給事中王隲、陳瓊、御史謝瑜、董漢臣等，於時幸蒙寬宥，而今安在哉！故
天下之人視嵩父子如鬼如域，不可測識，甯是痲心疾首，敢怒而不敢言，何者？誠畏其陰中之也。上乃捕

學詩。下詔獄。斥爲民。而溫旨慰留嵩。嵩不自安。請遣世蕃歸田里。不許。令給假隨任侍親而已。學詩疏雖不見用。然天下傳誦。以爲名言。仇鸞始雖由嵩入。旣挾敵得上重。而驕嵩猶欲以兒子畜之。不應。遂凌嵩。出其上。嵩恚。數以密疏言之。沮止萬狀。皆不聽。而諸部臣言。官有抗觸鸞者。立碎。鸞之捕敵。姦細以爲大功。要重爵賞。而嵩子世蕃。亦緣而進。工部右侍郎。予一子錦衣衛千戶。鸞以是益恨嵩。而侮之。其所詆譏。嵩上亦爲心動。至宣召亦稀矣。時陸炳掌錦衣緹騎。與鸞爭寵。妬嵩乃厚收炳以爲腹心。使詞伺鸞。鸞亦爲之備。然其所從。卒不能如緹騎猥狡。鸞自是墮炳彀中。然炳陽爲推重。鸞以爲中山定與之流亞。鸞不疑也。旣敵勢日迫。而鸞病甚。上聞。收其大將軍印。鸞暴死。炳乃謀於嵩。怵鸞之義子。逃之。而道執之。盡得其交通狀。誅其妻子。嵩以是益親信。父子貪亦益甚。南京廣東道御史王宗茂。復疏其貪黷數十事。事皆有實。上復爲之鑄宗茂二秩。補外以安嵩。而給事中袁洪。愈劾去其所善客翰林檢討梁紹儒。亦弗敢救也。前是。兵部員外郎楊繼盛。以嘗論與口市馬非策。忤仇鸞。下獄。謫邊邑。卒。鸞旣敗。繼盛得累遷復官。嵩欲以名收之。繼盛不應。復抗疏極論其十大罪五姦。中外傳誦。以爲破的中。可以必勝。而上獨怒之。摘其中有召問二王語。以詐傳親王令旨律。坐絞。而復杖之百。復以手札諭留嵩。嵩乞休。上報以羣邪黨比。謂逆賊句敵。其本在卿。蓋指摘贊直。玄修。不阻朕耳。朕非內色外禽者。崇事上。玄。又與宋徵。梁武不同。人臣邀譽賣直。卿以此乞休。墮邪孽計。宜安心供職。奉順天休。時嵩有義孫鵠。未十六。而冒兩廣功級。得錦衣千戶。繼盛及之下。兵部尚書。聶豹皆曲爲掩庇。而郎中周冕獨發之。亦坐奪職。當是時。雲貴清軍御

史趙錦亦有疏論嵩。謂嵩窺伺逢迎之巧。似於忠勤。諂媚之態。似於恭順。能引植私人。布列要地。以探諸臣之動靜。先發而制之。故不敗露。又善以厚賂結陛下左右之人。凡深宮起居意向。無不先得。故多稱旨。或候聖意所發。因而行之。以成其私。或因事機所會。從而執之。以肆其毒。使陛下思之。則其端本發於朝廷。使天下指之。則其事不由於內閣。幸而洞察於聖心。則諸司代嵩受其罰。不幸而遂傳於後世。則陛下代嵩任其咎。錦工於中。嵩惡。而它語尤凱。至上亦使緹騎捕之。兩月而至。怒少解。斥爲民。亡何嵩之義子趙文華重。文華者。故無賴小人也。數經吏部察。嵩強而用之。至通政使。乃自以百花酒進上。嵩亦跪而冒數之矣。會吏部尙書萬鏜者。嵩同年。相善。坐言事廢田間。賴嵩以起。至爲吏部。數與嵩崖異。不甚用其言。至是。復推文華督撫鄖陽。以遠嵩。而給事中朱伯辰上疏劾文華邪媚奔競。寵賂日章。不宜玷臺憲。有旨再推文華。迫則謀於世蕃。乃教之使劾鏜。前爲右都御史。中以侍郎起用。而併二品通考。以臣欲亂之。故出臣於外。不已。而嗾伯辰論臣。欲以鉗衆口。嵩爲內主。激上怒。悉奪鏜伯辰官。俱爲民。而文華愈橫矣。嵩以滿十五年考。賜金幣御饌肥羜上尊。錄一子中書舍人。仍賜敕褒諭。再以京師外城完。嵩與有闕視勞。遷世蕃爲工部左侍郎。仍侍親而不奪俸。尋以萬壽節。推恩令世蕃出理部事。嵩辭許之。再以御敵推恩。錄一子尙寶司丞。嵩辭。上諭以盡誠贊玄。實爲忠首。往往與陶仲文並論。嵩不恥也。江南連歲倭大作。南京兵部尙書張經爲總督討之。久未平。而趙文華乃疏陳用兵七事。首以祀海神爲言。人皆笑其誕。而上獨然之。爲切責兵部。覆議上。上以問嵩。嵩言江南奏報多失實。宜遣大臣往祭海。卽令察視賊情。求

可以區處長策。具實奏聞。所使卽文華亦可。上乃命文華。文華行而大覲威福。所挾持將吏。金寶無算。時總督張經。自恃其位高。而望隆。不肯折節文華。諸發兵守便宜。又不與計。會有流言聞於上。上怒。文華伺得其指。露章劾之。上發緹騎逮經。而經則已大破賊。俘斬千計。捷聞。上怒亦不釋。經迫。則行五千金賄世蕃。世蕃與嵩謀。欲爲上解。則姑爲溫言款經。至死方悟。因詈嵩父子於市。而李默者。骨鯁士也。少有文。數更顯宦。至浙江左布政使。嘗候嵩。嵩謂其貌類我。援之。入爲國子祭酒。累薦於上。得躡拜吏部尙書。乃稍稍自持。見不能讐其意。嵩更譖於上。嗾給事中梁夢龍劾之。得罪去。而陸炳由武科爲默門生。乘上之思默。使所厚中貴人稱之。遂得復官。尋以撰齋詞入直。幸矣。念不自嵩起。動與抗世蕃。威無所不加。獨不能得之吏部。而會文華歸復命。上以御饌勞之。問倭事。何時可息肩。文華對。殘寇行且滅。不足憂。上爲之悅。而文華行珍寶。值萬金於嵩夫婦。及世蕃。直入內室叩首嵩夫人。夫人勞苦文華。謂尙不能爲郎君。易腰帶。我相公責也。而兵部尙書楊博以憂去。文華幾得之。默所推。絕不及。其見默。欲有陳。默厲色待之。怏怏而退。乃刺得默試士策問。以爲誹謗。上爲漢武。唐憲。又所推東南督臣。不用胡宗憲。而用王誥。蓋欲敗東南事。爲鄉人張經報讐。上大怒。下默詔獄。論死。尋屬輔臣李本行部事。品第羣臣。九卿而下。及言官。悉以次去。嵩所惡。而薦其客吳鵬代默。而亟稱文華於上。遂進工部尙書。躡加太子太保。罷王誥。不用。胡宗憲。中外大權。一歸於嵩矣。文華又以都督陸炳嘗薦默。復刺得其陰事。將劾之。炳懼。重賄世蕃。挾以謁文華。始解。旣而知其謀。出自世蕃。遂併恨世蕃。而徐階以次輔日重。爲羣望所屬。炳乃委腹階。以自固。

嵩父子亦稍稍覺之。倭復大張詔遣兵部侍郎沈良才討之。嵩知上意以文華昔對殘寇且平爲不實懼而使文華自以督師請上悅許之。與宗憲合而誘降寇首徐海等。因掩擊平之。文華加少保。宗憲爲右都御史而嵩等皆賜金幣。嵩又以十八年滿官一子中書舍人。賜宴及璽書褒諭。自文華等之有功推遷及罷職尙寶卿史際通政呂布周等。而世蕃所納賄復以巨萬計。文華乃上疏歸功嵩以爲嵩實授之成算。而嵩亦薦文華有學行宜供撰齋詞。其後文華以驕蹇忤旨逐。嵩不之救。上亦不以咎嵩。而宗憲自是益傾江南庫藏爲世蕃餽。所需古法書名畫種種。宗憲皆爲索之富人世家。豪敎巧獵靡所不極。而它撫臣監司相習成風。不以爲諱。其所欲鼎彝尊壘之數。或發塚剽攻它寶玩。多起大獄而後得之。世蕃猶汲汲無已。尋以萬壽節加嵩兼食尙書俸。仍免廷謝。自是凡有旌錫皆免謝。至一切祭祀救護日月無嵩跡矣。前是敵入犯邊。錦衣衛經歷沈鍊抗疏論嵩父子姦惡。詔以鍊誣大臣。自爲名廷榜之。適貶嶺外之保安。鍊悻悻不得志。乃招四方遊士以講學名。多及時政得失。或馳馬至居庸關下。戟手詈嵩父子。或爲草人象而射之。事稍稍聞。嵩惡之。使世蕃授指宣大總督楊順圖鍊。順故嵩客。時邊事多損敗。方藉嵩父子屏蔽。卽嚮應。而與巡按御史路楷謀。世蕃復以入內五品啖楷。乃因妖人閻涪等通敵事發。捕鍊。竄名其中而張大之。兵部尙書許論不敢執。遂斬鍊。并戍其一子。瘐死者復二人。遷賞順楷以下如初約。天下聞而痛之。於是給事中吳時來極論楊順靡費邊餉。縱敵出入。而以重賄納路楷。相率爲蒙蔽。致右衛危困。尙書許論昏酣。不能有裨廟謨。上以問嵩。嵩曲爲順楷掩覆。且謂言官風聞論人。不可盡信。上不聽。捕順

楷下錦衣獄而奪尙書論職時來遂謂嵩可勝也。亟上疏極論嵩世蕃罪惡。而刑部主事張紳董傳策亦言之。前是輔臣徐階爲禮部時。敵入犯。數有所建白。觸嵩忌諱。以是百方阻其進。不得。而階潔廉。又時時爲人語時政。輒歎息流涕。稍稍聞於嵩。至是。以時來紳皆階所取士。而傳策又其鄉人。乃密奏三人同日而構臣。必有使之者。且時來已奉命使琉球。疑其悔行。欲藉口自脫。自封進時來紳試錄。上乃下之詔獄。令追究主使之人以聞。而時時自語曰。階固賢。雖然。嵩老矣。何不小需歲月。而忍若是。階危且甚。而時來等下獄。考掠窮五毒。竟不言主使者。第曰高廟神靈教臣耳。而亦會都督炳心向階。故坐紳傳策相主使時來避遠役。獄上。各發戍煙瘴衛所。而慰留嵩。嵩以是益恨階。并及炳。其後順楷就逮。至詔獄。嵩復爲之寬解。順僅坐戍。而楷謫外。當是時。上坐深宮中。欲以威福遠攝連率大臣。時時有所逮訊。若阮鶚。吳嘉會。章煥等。多從重典。雖甚親禮嵩。不盡信之。間一取獨斷。或故示異同。欲以殺離其勢。而嵩與世蕃。能得其竅。欲有救解。則必順上意極詈之。而微婉曲解釋。以中上所不忍。其欲有排陷。必先稱其嫚露。若與彼親者。而以冷語中之。或觸上所恥與諱。上更爲之怒。以是卒不能脫其籠絡。而威福益廣。時吏部兵部與文選職方郎。號爲文武庫吏。而尙書吳鵬歐陽必進。許論郎萬案方祥爲尤著。必進者嵩內親也。數以賄通嵩。得出入臥內。會大殿災。議興工。而必進自刑部調工部。上老之。以問嵩。嵩盛稱其精力才識。遂以工屢就。驟遷至少保。而倦於事。嵩復爲之改都察院。上勿悅也。於辭疏旨曰。必進已之任矣。何更辭。嵩謂必進毋再辭。但居任兩月。而吏部尙書缺。嵩復勒廷推必進。衆莫應。嵩怒。慢罵之。不得已。而以必進名上。上投

之地。嵩密疏曰。必進內親也。臣老矣。非必進無可以慰臣者。乃以必進爲吏部尚書。僅三月。而假他事去之。世蕃猶張於人。謂用必進。上無若我何。棄必進。我亦無若上何。前是上以嵩直舍隘。別撤小殿材。營室於側。多蒔花木。其隙以娛之。復發中金百爲製什器。朝夕割御膳法酒。使中貴人調而賜嵩。嵩老尙健。始聽腰輿出入禁苑矣。已而嘉其年滿八十。特賜肩輿。且令支伯爵俸。嵩復以京師居第之中堂請額。上名之曰忠正。又名其南昌居第之中堂曰蒼德。樓曰寶翰。嵩故有高第在宜春分宜。并京師南昌。而賜皆宏敞壯麗。分輦金寶以實之。猶不足。而縱子世蕃之羅取益甚。初。皇太子薨。裕王以序當立。禮部數請期。而上意嫌代已。屢報寢。嵩念上獨所信任。迫衆情。時時亦爲請。而與陶仲文比。而阿上意。上亦自知之。時裕景二王並居外邸。禮服無異。外論洵謂莫知適從。而故左中允郭希顏失職家居。欲以危釣奇。乃具疏謂自攻嵩者有問二王之說而得罪。恐不相安。幸各召而面諭之。使二王毋疑嵩。嵩毋自疑。且請出景王於外。以安裕王。疏既上。嵩雖恨希顏。而巨測上旨。請下禮部詳上。乃露怒希顏意。嵩始得發符。上命御史卽其家。僂希顏。傳首海內。世蕃念以多樹敵。恐嵩一旦老死。不易支。而謂上意搖。或可因而更樹。乃多行金左右。謀立景王。庶幾異日代嵩執政。而上一日忽諭禮部。令景王之國。世蕃猶令嵩與禮部尚書崐山言。上意未必爾。或欲因以試物情。山不可。乃具儀上。景王卒之國。而世蕃之謀解。俄以世蕃三品滿九載。加服俸視尙書。再以萬壽節。加嵩歲祿二百石。而世蕃亦兼支尙寶司卿俸。尋嵩夫人歐陽氏卒。時世蕃方戀權。不欲歸。而嵩無次子。可以扶柩者。嵩請於上。謂年已老耄。不可無世蕃侍。詔聽留共養。如故。嵩

故以警敏得上意，亦善自卑屈。至士大夫入謁，人人慰勞，務得其懽心。間標故所憶記以示聰明。晚節知天下之怨之，間捨舊郗而收錄知名士。若故編修唐順之，中允趙貞吉，皆以淪落爲憾，不自覺入其彀。至顯庸，因而有稱者，然其陰賊發於心而動於機械，不自覺也。世蕃尤險悍，每謂天下才，惟己與陸炳、楊博而三。然與炳晚節相妬，炳暴死，世蕃稱快。頗亦能習國家典故，曉暢時務。嵩旣老，上時有所問而不能答，謀之其客，皆不稱旨。屬世蕃草，輒報美。嵩以是心益仗世蕃而心愛之。諸曹白事者，輒問曾以質兒子否。至云東樓謂何，東樓者世蕃別號也。世蕃以是益驕橫。九卿臺諫至，浹日不得見，或停使至暮而遣之。或有嵩許而世蕃不許者，卒弗許也。嵩在直，或累月不出。世蕃日與所狎客縱倡樂豪飲，益拓居第，連三四坊。堰水以爲方塘，鑿數十畝，傍植奇樹異卉，乘輿張綺蓋，遊行其中。若輔臣階與李木，其父執也。成國公朱希忠，元勛也，虐之酒不潦，倒不已。性尤強記，於中外官職饒瘠險易，亡不闔熟。其責賄多寡，毫髮不能匿。上亦稍稍聞之，而世蕃以衰服不能入之。嵩直所，嵩所報札，漸不如上旨，而齋詞亦稍倦。時上所居萬壽宮火，而大朝殿工方急，嵩以煩費難之，欲請上還大內，則不敢，乃請暫徙南城之離宮。南城，英宗故稱太上皇時所居也。上適以問階，階爲規畫營萬壽宮甚詳，且費省而力易，上大悅。宮旣成，而所以褒擢階至厚，嵩僅加祿米百石，不能敵矣。自是，上有顧問，不及嵩，卽及嵩，不過齋詞事而已。嵩故與階、郗、懼而置酒要階入內，使子孫家人羅拜之。舉觴屬曰：嵩且夕死矣。此曹唯公哺乳，階謝不敢當，而是時方士藍道行以亂得幸。上上故有所問，密封使中官至，亂所焚之，不能答，則咎中官穢，不能格真仙。中官乃與

方士謀啓示而後焚之。則所答具如旨。道行狡。乃僞爲紙封。若中官所齎者。及焚而匿其真跡。以僞封應。上一日問今天下何以不治。對曰。賢不竟用。不肖不退耳。則問誰爲賢不肖。曰。賢者輔臣階。尙書博。不肖者嵩父子。上復問。吾亦知嵩父子貪。念其奉玄久。且彼誠不肖。上真胡以不震而殛之。答曰。上真殛之。則益用之者咎。故弗殛也。而以屬汝。既答報。袖以示御史鄒應龍。會嵩等請考庶吉士。而諸進士中有貸金於司禮監中貴錦者。錦密以聞。上卽日罷考。應龍乃抗疏論嵩父子貪姦誤國。詣大罪十餘條。上以名捕世蕃及舞法行賄者。皆下之詔獄。而猶謂嵩小心忠慎。壽君愛國。人所嫉惡。其致仕去。仍馳驛。歲給祿米百石。嵩獨爲世蕃求解。上謂念若忠勤。已加優處。又何以兇兒瀆救。嵩乃不敢復言。獄上。世蕃及其子鵠皆坐戍煙瘴衛所。家奴及隸人永年等坐統當世蕃之用事。吏部郎賄最重。御史次之。給事中又次之。所以先御史者。其巡按得盡收贖。醵鸞卿寺缺。而給事中獨不能。至吏部郎之始。以三千金而後遂至萬二千。若頃治元者。竟就逮。瘞死詔獄。其家亦破。天下笑之。世蕃迫。則行十餘萬金於諸幸姬家。猶能脅調。藍道行陰事。下刑部獄。侍郎葉鏗。鄒懋卿。誘使誣伏前僞狀。而引徐階道行。不聽。論死。而復得釋。應龍以敢諫。進通政司參議。上猶悔之。且追思嵩贊玄勤誠。欲退居西內。專祈長生。以示輔臣。階等極言不可。上乃勸階等必贊玄如嵩乃可。而謂嵩已退。其子已伏罪。敢有再言者。同應龍俱斬。中外洶洶。虞嵩且復用。而久之。階益見信。乃已。於是嵩之黨鏗懋卿萬榮。何遷。張雨。唐汝楫。王材及其壻袁應樞。先後以白簡革職。而胡宗憲自浙直總督被逮。尋釋之。宗憲旣得志。首以書畫賄嵩父子。金玉珍玩。相繼半入其囊。江南公

私爲之一空。奢淫縱恣，靡復風紀。而其穢徐海執直功，亦有足當者。上以其屢進白鹿白龜，不忍罪也。伊庶人之爲王也，以殘暴婁見紕。臺使者迫，則行十萬餘金於嵩，得小綬。至是，使其校卒十餘輩造嵩家，脅償金。嵩置酒款之，而好謂曰：「所言金十萬，則無之，僅得半耳。」而又半費，請以二萬金償。因盡以上所賜金，有印識者予之。旣去，而聞於郡，曰：「有江盜劫吾家二萬金去矣，速掩之，可獲也。」郡發卒追得金，悉捕校卒下獄。論死。而世蕃之自戍所私歸，益廣拓第舍，又用金多爲盜窺。乃召募伎勇材力之士，合數百人，日夜擊刁斗自衛。郡邑頗疑其跡，而嵩故所養舍家子，出外爲非者，推官郭鍊臣受民間訟牒，滿百紙，輒封以與嵩。嵩怒而卻之。它臺使監司，小有違言，嵩輒呼具舟，我且入京面奏。以時恟喝，而會前賀萬壽表得報，且當見憐。因懇疏請移世蕃便地供養。上不許，報曰：「嚴嵩有一子侍，已恩待矣。」諫臣乃疏以聞。巡江御史林潤，遂露章劾世蕃與歙人羅文龍表裏相約，多招納亡命，有叛心。文龍故世蕃客，爲通賄。與同戍者也。詔卽委潤捕世蕃。文龍旣至京，潤盡發其罪狀，下三法司比擬。俱依子罵父律，斬。上不憚，令更擬。乃擬謀叛律，而猶未及嵩。上令卽棄之市。而謂嵩畏子欺君，大負恩眷，并其諸孫見任文武職，俱奪爲編氓。拘役籍其家黃金可三萬餘兩，白金二萬餘兩。它寶玉重器服玩所直，又數百萬。而知者尙恨其以緩故，散匿不少。臺臣乃益論戍萬竊耶懋卿，追其受寄金錢垂二十年不盡。竊由選部郎至大理卿。懋卿至刑部右侍郎，皆世蕃腹心。竊貪而懋卿尤恣橫。其以都御史出覈鹺，所經行兩畿齊晉河洛吳楚，幾天下半，皆挾世蕃父子，叱咤風生。守令而下，膝行蒲伏。上食惟謹，至以文錦被廁牀。白金爲溺器，妻妾隨行者，錦幃綵

與以民婦十二昇之。卽趙文華胡宗憲不能過之也。嵩死時，寄食墓舍，不能具棺槨，亦無弔者。時年八十有六。子世蕃。

世蕃性巧便深險，能辦事。世宗信任之，以應官任工部侍郎，放恣蠹政，賣官鬻爵，門日如市。又善築禍，以故內外大小文武官員及各王府，往往以重遺。一時勳臣如成公希忠、龍倖如都督陸炳，及衍聖公，皆結爲姻親，以自植。各邊將鎮撫官及各省藩臬守令，凡遷轉必賂世蕃，始得不爾，必不遷官。且中以禍，主事楊繼盛以論嵩殺之，御史王宗茂爲民主事，張紳董傳策謫戍，皆因嵩得罪。世蕃益得志，慈谿人趙文華、新喻人張春，結爲乾子，拜世蕃爲兄弟。唐汝楫先爲世蕃門客，後得中及第，唐順之已罷官家居，有父喪，緣趙文華通世蕃奪情，起爲兵部郎中，尋陞鳳陽都御史，討倭不克，發憤死。一時豪士皆顛倒世蕃之手。先是羅文龍重賂結世蕃，得爲中書，遂奔走門下，乘勢橫恣，爲官所譴，戍廣西潯州衛。嘉靖壬戌夏，御史鄭應龍劾世蕃誤國罪狀，世宗怒，收世蕃下獄，謫戍廣東。嵩致仕，甲子冬十一月，御史林潤巡視上江，時賊警報，訪爲羅文龍主匿，潤因論奏文龍係世蕃之黨，今不赴戍，逃回原籍，稔惡不悛，句聚江洋劫盜，且所居去縣五十餘里，據山爲險，大噓勢焰，擅著蟒衣，妓女環列，又潛往世蕃家，劫爲怨望。今世蕃之暴橫，無異在朝，或肆爲訕謗，或縱爲淫樂，或奪人財產，家僕至數百人，日聚門候，至數千羣，機謀詭秘，人心動搖，履霜堅冰，誠社稷之憂也。乞正典刑，庶弭禍端。上覽奏曰：「嚙逆犯乃爾，命林潤逮之。」時文龍逃，潛住梧州，潤於彼處緝獲。明年乙丑春三月，逮羅文龍至京，斬之，仍籍其家，則二十萬沒入官，已而嚴嵩上疏辯。

子世蕃在戍未敢逃回不報是月逮世蕃至京亦斬之林潤復奏謂世蕃任彭孔爲主謀羅文龍爲羽翼男嚴鴻等家人嚴珍一等爲爪牙窮狠極恣無所不至占省城倉基而又并吞宗室之府第占袁州官地而又侵奪貧民之居房改祀聖寺以爲宗祠鑿穿城池以象西海袁州居第列爲五府南府居其子鵠北府居鴻東府居其孫紹慶西府居慶祥而嵩則與世蕃同居相府廊房迴繞店舍聯兼招集亡命聚斂貨寶且揚揚號於衆曰朝廷有我富乎粉黛列侍衣龍鳳而列珍珠牀象牙而帳金絲朝歌夜舞荒淫無度又揚揚號於衆曰朝廷有我樂乎其家人嚴珍一窩盜行劫嚴恩一等強奪易江等之妻嚴富等強占陳室等之產嚴保等強奪李元三之屋基又曰宸濠逆謀之初不過結納賊首誘致姦人受獻田土而已今世蕃之不法揆之於宸濠無異又曰近日伊王典樸妄懷異念然陰結於內者實世蕃也世蕃受典樸賄金十餘萬而主其謀故典樸逞其狂悖之志是世蕃之陰結典樸何異於錢甯臧賢輩之交通宸濠乎嵩位極人臣寵絕百僚忍心欺君縱子不戢奏至上震怒謂侍臣曰嚴嵩畏子欺君大負恩眷并伊孫見在文武職官皆爲民仍命御史成守節籍其家財淨金一萬三千七十一兩六錢零純金嵌珠玉珍玩壺林盤盞共三千八百事有奇重一萬三千二百兩有奇純金嵌珠玉苗睛寶石首飾六千五百五十事有奇白金二百二萬七千有奇銀合山屏人物等共重一萬三千六百兩零玉如漢始建國元年注水卮晉永和鎮宅世寶杯及玉人玉馬玉鑪玉斗玉壺等共八百五十七件又白玉碧玉黑玉與夫嵌金鍍金花草玉帶共二百二條金箱并花素犀角香等帶共一百二十四條金摺絲純金花草素金箱珠玉帶條環闌妝

頭籩三十三條。金箱壺玉壽鹿犀象瓊瑁法藍杯盤甌盆等。共二千六百八十件。雙龍卵五箇。金箱雙龍卵壺二把。金小酒甕二座。大珠九百六十顆。大寶石七顆。又次珠寶六百六十六兩零。珊瑚樹六十株。大學士牙牌二面。珊瑚玻璃瑪瑙象牙瑤瑁人物壺。孟杯盤等奇玩三千五百五十六件。副古瀾水四罇。蓄微露四錫盆。會空青四枝。熊膽四罐。廣砂三百八十五兩。珠砂六百五十斤。檀沈降等香五千五十八斤。沈香山四座。大紅織金蟒龍斗牛飛魚等緞絹綾羅紗絢緞機絨絳番揭鎮服并蟒葛西洋雲絲絨等。四萬一千六百一十九匹。成服大紅織金蟒龍等。緞絹綾羅等男女服及貂裘共一萬八千三百餘件。金銀鉸牙檀烏木沈金等扇二萬七千六百把。古銅龍耳等鼎大小蓮豆酒海蟻螞蟻。相金獅象龜鶴犀兔寶鴨等鑪。蒜頭玉簪等餅。溜金花餅獸鑪。水火鑪衣鏡共九千四百二十四件。倭金并大理石各色屏峯圍屏共一百八座。金徽玉軫等古今名琴五十四張。御製及晉唐宋元墨跡三百五十八冊。軸。宣宗御筆及清甯上河海天落等古今名畫冊葉共三千二百一軸。卷冊。雕嵌大理石瑤瑁螺鈿彩素金漆等牀共六百五十七張。各色帷帳香珠卓圍燧耳之類共二萬二千四百二十七件。雕漆方圓等盤。大面青缸雲南刀劍及茶鍾酒杯各色家伙等件共九萬四千九百二十六件。把雙大小兵器并倭刀共五百餘件。第宅田地山塘及各莊房牛馬等共估價二十九萬五千八百六十兩有奇。此在江西原籍者然耳。他在京及揚州第宅莊田財物猶不下數十萬。皆沒入官。又籍嵩之壻袁應樞受寄金銀諸物五萬餘兩。萬榮受寄金銀八萬二千餘兩。又親黨趙濂受寄金銀二萬九百餘兩。及漳澤熊襄張仁受與瑞昌王多燠等。又

借貸債約銀一十九萬兩有奇。
史官曰。宰相之賢。度爲上。才爲下。書云。以公滅私。公則視人才爲朝廷有。私則必欲爲己。有其度狹矣。嚴嵩。竊巧陰譎。挾沾沾之小技。以順爲悅。內固主寵。而外籠天下之利殺諫臣。遂異己。望風投拜者。獲榮顯。剛直自好者。嬰挫辱。藐法負恩。目無祖憲。雖無孽子。甯毋敗也。及至世蕃。隔外。所條對率不稱上旨。其才又可知矣。世蕃積惡取罪。而死以謀叛。雖非正律。尤當厥辜也。所籍沒資產。紀實瑣瑣。匪史體。以見元載之鍾乳三千。未爲侈耳。

明書卷一百五十

列傳十一

權臣傳二

張居正傳

張居正字時大湖廣之江陵人也少穎敏絕人爲諸生渺小而是時尙書顧璘撫楚行郡試其文奇之已行招與語復大奇之曰此兒國器也遺以金錢爲膏油費舉於鄉謁謝璘解所繫犀帶以贈曰爲君異時圍腰飾然當且玉不足久溷也又六年登進士高第改翰林院庶吉士是時爲嘉靖之丁未戊申間諸進士多談詩爲古文以西京開元相砥礪而居正獨犇然不屑也與人多墨墨潛求國家典故與政務之要切者衷之時時稱老易以爲得能其用諸大老如徐階輩皆器重之相推許得授編修居正爲人頗長眉目娟秀鬚幾至腹沈深有城府莫能測也時嚴嵩爲首輔忌徐階爲階者皆避匿而居正行意自如嘗同會考試而其門生自喜客於嵩能得嵩意居正衆斥之曰李樹不代桃僵耶亟去毋辱吾門衆稍莊憚之而有天幸毋爲嵩耳目者嵩顧亦稱居正久之遷右春坊右中允領國子司業事居正待諸生嚴無所寬假而獨與祭酒高拱善相期以相業尋還理坊事以選侍裕王講讀王頗賢之邸中閹亦無不賢居正者

而李芳數從問書義。頗及天下事。尋進右諭德。兼侍讀。預重修永樂大典。復預修興都志。始解裕邸講進。翰林院侍讀學士。領院事。時階代嚴嵩首輔。盡以志事委居正。而其所具藁草。輒爲輔臣袁煒所削。及煒卒。階乃復從居正草進於上。上意不懌。亡遷賞。然中外目屬居正。必爲大用矣。世宗崩。階草遺詔。頗引以共謀。尋遷禮部右侍郎兼翰林院學士。月餘。與裕邸故講臣陳以勤俱入閣。而居正爲吏部左侍郎兼東閣大學士。尋充世宗實錄總裁。穆宗開經筵。爲同知經筵事。至秋。進禮部尙書兼武英殿大學士。亡何。加少保。兼太子太保。去學士之五品。僅歲餘而至一品。其登進之速。雖張璪桂萼不能過也。時年僅四十三。當居正之入閣。閣臣凡七人。徐階最爲老宿。與李春芳皆好折節禮士。郭樸陳以勤皆忠厚長者。獨高拱躁率。不得志於言路。稍繼。尋引去。居正最後拜。獨謂輔相體當尊重於朝堂。倨見九卿。他亦無所延納。而間出一語。輒中的人。以是愈畏憚之。重於他相矣。徐階旣去位。而春芳代。居正意狎視之。以爲不足與有爲。而大學士趙貞吉入。其位居居正下。然自負長輩而材。間呼居正張子。有所語朝事。則曰。唉。非爾少年輩所解。居正內恨。不復答。而與闒李芳輩謀。召用高拱。俾領吏部。計以扼貞吉。而奪春芳政。拱至。益與居正善。當是時。天子頗好遊而重武。居正上疏言六事。其一曰。簡議論。謂朝廷之間。議論太多。或一事而甲可乙否。或一人而朝由暮跖。或前後背馳。或毀譽予盾。是非淆乎唇吻。用舍決於愛憎。政多紛更。事鮮統紀。大抵事無全利。亦無全害。有所長。亦有所短。要在權利害之多寡。酌長短之輕重。斷而行之。信而任之。二曰。振紀綱。謂近年以來。紀綱不肅。法度不行。上下務爲姑息。百事悉從委徇。以模稜兩可爲調停。以委

曲遷就爲善處。刑法之加。惟在微賤。庶人之議。反重朝廷。賈誼所謂蹶整者。欲上攬乾綱。張紀律。法所當加。雖貴近不宥。事有所枉。雖疏賤必伸。三曰重詔令。謂天子之號令。譬之風霆。若風不能動。而霆不能擊。則乾坤之用息。造化之機滯。欲部院覆奏者。數日即報。不得諉之撫按。行撫按議處者。嚴令期限。不得延緩停閣。四曰覈名實。謂今用人者。稱今用人才。不必試之。以事任之。以事不必更考其成。至於債事之時。人未必明正其罪。惟魯少文者。無用而見譏。大言無當者。虛聲而竊譽。倜儻抗直者。忤時而難合。脂韋逢迎者。巧宦而易容。或以卑微見忽。或以名高見崇。或因一善而借資終身。或因一疵而取病衆口。官不久任。事不責成。更調太繁。遷轉太驟。資格太拘。毀譽太易。欲以嚴考課。審名實。責之吏部。官各久任。毋遽遷轉。五曰固邦本。謂近以蠲賦至半。國用不足。邊費重大。內帑空乏。分道檢括。庫藏盡掃。以致水旱災傷。坐視而不能振。用兵餉百出而不能支。欲上停免一切不急工程。無徵辦。精釋守令。講求出納。其分道之使。一切取回。六曰飭武備。則欲上修祖宗大閱故事。張皇六師。躬賜校肄。旌別技勇。汰易老弱。疏上。褒諭。下部院議行。於是各推演疏指。事別爲演。多至十餘條。以媚居正。而所謂大閱者。上意果爲動。令所司擇日行矣。大閱費不貲。時方詘。而給事中略問禮。頗言其非急。居正亦覺之。乃復上疏請停止。上不允。居正以善筆札。諸公有密勿疏草多委之。如救給事石星。御史詹仰庇。停取戶部合三十萬。請皇太子出閣講書。其草皆自居正。而同列李春芳。陳以勸趙貞吉。殷士儻之見逐。雖發之自高拱。而其機皆出居正。故所獨厚者。司禮閹李芳。一日言官有忤旨而當懲者。春芳顧而言曰。當何處。居正遽曰。不過示責而貸之耳。春芳

具如居正語。而俄頃居正以片紙使小吏投芳曰。此人狂妄。卽上貸之。恐有繼言者。須謫譴而後可。芳請於上。改停三月俸。而春芳後得之。心恨居正而不敢發。尋李芳以強諫失上意。杖錮之獄。而居正小屈。後諸公去且盡。獨居正與高拱在。兩人相得益密。會北夷請入貢。通互市。亦惟居正贊之。初以滿三載。加柱國。進太子太傅。再以六年滿。加少傅。吏部尙書。建極殿大學士。兼支大學士俸。遼東戰功。加太子太師。和市成。加少師。餘如故。向者階居正故受業知己也。其去由張齊之爲拱而修忤。然居正實言之。李芳謂階久倦官。以是亟報許。旣許而心愧之。階旣去。然約束其三子。事居正謹。而拱銜階甚。必欲殺之。噉言路。追論階不已。而使其所讎誣飾其諸子罪。下撫按置獄。事益急。階求救於居正。居正從容爲拱言。階一旦巨測。公負薄舊僚名。拱稍心動。而居正頗復爲撫按居間。業稍緩。而拱之客乃搆於拱。謂居正納階子三萬金賄。不足信也。拱無子。而居正多子。一日戲謂居正曰。造物者胡不均。而公獨多子也。居正曰。多子多費。甚爲衣食憂。拱忽正色曰。有徐氏三萬金。何憂衣食也。居正色變。指天而誓。詞甚苦。拱徐曰。外人言之。我何知。以故兩自疑。而拱之客謂可乘也。日稍稍以居正過聞拱。而都給事中宋之韓。遂具疏。且論居正。草成而居正知之。走見拱。乘氣言曰。公不念香火盟。忍逐我耶。拱錯愕出不意。曰。誰敢論公者。居正曰。公之門人宋之韓。已具草矣。拱曰。果有此。亟呼止之。居正曰。公發之。安能止之。拱曰。請出之外。以明我心。晨入部。出爲參政。因是疑居正益甚。拱又前後薦其所善。閣陳洪。孟冲。柄司禮。而抑馮保。時尙寶卿劉奮庸。疏摘時政數事。語侵拱。給事中曹大莖。則極論拱諸大罪。居正爲擬旨。謫大莖於外。奮庸亦坐謫。或云。居

正實使之。或云獨大莖受之馮保。莫能明也。上日甫視朝。忽馳而下。且蹈於陛間。第云國有長君。社稷之福。語且不了。居正與拱趨而掖之起。還宮。卽不豫者月餘。羣臣詣闕問安。而上方臥。蹶然興。肩輿至內閣。居正與拱驚出俯伏。上掖之起。而掖拱臂。仰天氣逆結。久始云。祖宗法壞且盡。奈何。亦復不了了。而持拱袂步。且至乾清宮門。始復謂第還閣。別有諭。明日寂然。而居正察知上色若黃葉。而骨立神朽。慮有巨測。爲處分十餘條。札而封之。使小吏持以投馮保。卽有報拱者。急使吏跡之。則已久矣。拱亦不知爲何語。第恚甚。至閣而詰居正曰。昨密封之謂何。天下事不以屬我曹。而屬之內豎。何也。居正面發赤。不能答。強笑而已。徐曰。日與飲食通。公安能一切瞰我。拱淺謂實然。不復置臆。而上崩。拱與居正。懽然具遺詔草。拱復自具草以聞。凡數事。皆欲歛司禮權。歸內閣。馮保聞之。恚。神宗立方諒陰。拱有請。必報。可以爲能得上心。而喉所善言。官四五人列疏論保。疏必下拱。卽擬旨逐之。而使其所厚韓楫報居正。行且建不世功。與公共。居正陽笑曰。去此閣。若腐鼠耳。卽功。胡不世也。陰使人馳報保。得預爲備。乃逐拱。語見拱傳。居正旣代。拱首卽請還楊溥吏部。頃之。上御平臺。召居正。諭曰。父皇昔在御日。嘗一再聆德音。謂先生忠而高。拱。代先生幸自愛。悉心見輔。因賜居正金幣及繡蟒斗牛服。居正頓首泣謝。謂今國家要務。惟在遵守祖宗舊制。不必紛紛更改。至於講學親賢。愛民節用。又君道所先。乞聖明留意。上曰。善。亡何。復賜居正白玉帶。自是賜賚繁渥無虛日。時上幼冲。虛已委居正。居正旣得當國。慨然以天下爲己任。中外想望丰采。旣已大計廷臣。於拱所厚。多所屏斥。而他不附己者。亦稱是。復具詔草請於上。召羣臣廷飭之。謂近歲以來。士習

澆漓官箴刑缺。鑽窺竇隙。巧謀讎取。鼓煽朋黨。公事排擠。詆老成廉退爲無用。誇讒佞便捷爲有才。愛惡橫生。恩讎交錯。遂使朝廷威福之柄。徒爲人臣酬報之資。是用去其太甚。薄其懲戒。餘皆曲賜於原。與之更始。書不云乎。無偏無黨。王道蕩蕩。無黨無偏。王道平平。朕安嘉與臣民。會歸皇極。諸臣亦宜痛湔宿垢。共襄至道。自今以後。其尙精白乃心。恪恭乃職。毋懷私以罔上。毋持祿以養交。毋依阿澆惡以隨時。毋嗜沓瀆。誠以亂政。任輔弼者。毋昵淫朋。以塞公正之路。典銓衡者。毋作好惡。以開邪枉之門。有官守者。宜分猷念。以濟艱難。有言責者。宜竭讜直。以資聽納。大臣當崇養德望。有正色立朝之風。小臣當砥礪廉隅。有退食自公之節。若或沈溺故常。堅守途轍。以朝廷爲必可背。以法紀爲必可干。則宗祖憲典甚嚴。朕不敢赦。詔下。百司惕然。是時。上當尊崇兩宮故事。天子非嫡生。而尊皇后。稱皇太后。若生母。亦稱皇太后。則加徽號於皇后。以別之。馮保欲媚生母李貴妃。乃風居正以竝尊。居正不敢違。於是下議尊皇后曰。仁聖皇太后。皇貴妃曰。慈聖皇太后。而兩宮不復別矣。慈聖徙居乾清。撫視上。主持國秉柄。而倚馮保爲重。又與保俱德居正。中外大柄。悉以委之。而居正亦自淬勵。亡所受徇。然漸專擅矣。經筵開。爲知經筵事。修世廟實錄。爲總裁。尋加左柱國。進兼中極殿大學士。予一子尙寶司丞。辭不許。賜白金百兩。文幣四。有副繡蟒衣一襲。復力辭前命。乃許之。下璽書褒諭。以風示百僚。居正之爲政。大約以尊主權。課吏實。明賞罰。一號令。萬里之外。朝下而夕奉行。如疾雷迅風。無所不披靡。乃愉快於志。居恆謂高皇帝。真得聖之威者也。世宗能識其意。是以高臥法宮之中。朝委裘而天下不亂。以太阿不下授也。今上。世宗孫也。奈何不使之法。

祖黔國於朝弼數犯法當逮而朝議皆難之。以爲朝弼綱紀之卒且萬人不易逮。恐失諸夷心。居正擢用其子。而馳單使縛之。卒不敢動。既至。請於上。貸其死。而錮之南京。人以爲快。漕河通居正於歲賦。往往迂緩。逾春而後發。卽水橫溢。非決則涸。乃探漕臣議。督艘卒以孟冬月兌運。及歲初而畢發。少罹水患。其始農頗不便之。久而習以爲常。太倉粟至支十年。歲與敵互市。饒馬。則減太僕種而多令民以其價納。民既樂於不擾。價以時上。太僕金亦積至四百餘萬。又爲考成法。以責吏治。前是。六部都察院有覆奏而行。撫按勘者。度事之不易行。或有所按覈。或兩訐當質成者。其人各以私軋。則稽緩之。至數十年而不決。遂廢寢。居正下所司。以大小緩急爲限行之。誤者抵罪。自是一切不敢飾非。政體稍肅。而居正則多行其意之。所便者。尋以六載滿。加特進中極殿大學士。賜白金綵緞寶鈔羊酒加等。居正有子曰懋修。與孽弟居謙俱試於湖廣。得中式。懋修僅能成文。主司庇之。乃登賢書。至會試不第。居正恚甚。斷斷修怨。其主者人無不識其意。是時吏部尙書楊溥病免。當代廷議。以左都御史葛守禮。工部尙書朱衡。南京工部尙書張瀚推衡自謂官宮保。當前敍。而又素善事居正。頗以驕於公卿間。居正聞而厭之。然亦惡守禮。不能翫。如意。故特拔用瀚。瀚資望最凡薄。自是忽見拔。舉朝大駭。益相率趨事居正。無敢忤者。始輔臣高儀不久卒。居正以呂調陽弱。薦代之。調陽與居正行同而年差長。然秩尙卑。居正引之。數加恩至保傅。調陽雖不敢有所持諍。然內不甚附之。居正凡事傲然取獨斷。不復諮訪。嘗病假一日。而遽入取調陽所擬旨。皆更定。曰。如此。何以示遠近。部院大臣緣居正指。益易調陽。甚或故抑繼其鄉人及親厚者。以見公。調陽惟仰

屋歎諾而已。上以師臣待居正。凡所下御札。皆不名。稱先生。或稱元輔。有二白燕育於翰林院。白蓮雙蒂者。三。居正以爲瑞。進之。上不自有。歸德於居正。而居正父母皆老。壽無恙。上嘗出蟒繡金髻。裝重綵。以手書慰諭。賜焉。居正故篋。無居第。乃大買地於江陵城。使錦衣百戶龐興。假干陬顯陵之便。而爲督治。舍宇甫建。馮保言於上。名其堂曰純忠。左曰社稷之臣。右曰股肱之佐。名其樓曰捧日。又爲儷語。以正氣萬世休光百年美之。皆御筆大書。出內帑百千金爲資費。於是全楚之官。無不納重賄。四方督撫按都監司以下。亦無不賄助。凡三載而就鉅萬。窮極侈麗。自居正出者。不十之一。留都有小閹醉辱一給事中。其長已執而榜笞數十。且請旨繫治矣。而他給事中爭上疏請究閹。其語激居正。取首趙參魯謫之外。謂其欺幼主。不道。以悅馮保。保故以德居正。居正稍說以裁抑諸閹。諸閹非保黨。多怨居正。居正念御史在外驕傲。往往凌撫臣。出其上。痛欲折之。一事小不合。詰責隨下。敕令其長加考察。以故御史給事。雖畏居正。然中多不平。而抗勁喜事者出。南京戶科給事中余懋學。疏請行寬大之政。居正以爲風已奪其職爲庶人。御史傅應禎。繼言之。尤切。然不敢有所侵於居正也。居正以經筵進講。訴於上。謂此輩欲市國恩。收召朋黨。以便姦縱私。乃下詔獄。杖戍之賓海。給事中徐貞明等。坐就獄。視具囊饘。亦逮謫外。御史劉臺。居正所取士也。由刑部郎改。居正擬以爲德。而臺居頗近。數刺得其陰事。俄出按遼東。遼東捷。御史不常報。而臺誤報。居正以故事。裁斥臺。臺益惡居正。且分不得免。遂極論其黷橫十餘事。居正怒甚。見上。俯伏而泣。不肯起。上爲下御座。以手掖之。曰。先生起。吾爲逮臺。竟其獄。以慰先生。臺至下詔獄。上命內閣杖之百。而遠戍

之時物議頗鬻。居正不自安，乃陽具疏爲解，得不杖奪職還里。客有賀居正者，公眞宰相度哉。居正感額曰：不過宋宰相事耳。古人殆不然，蓋以輕處爲未慊也。亡何，吏部左侍郎張四維進禮部尙書文淵閣大學士，入內閣者曰同某人等辦事。至是直曰：隨著元輔居正等辦事，不欲彜之僚佐也。於是四維恟恟若屬吏矣。張四維字子維，山西平陽之蒲州人，少於居正一歲，舉進士，改翰林庶吉士，授編修，以久次爲右春坊右中允，經筵日講進右諭德，兼侍讀。四維北人，豪率，讀書能文章，頗有幹用才，累進吏部左侍郎，掌詹事府。其父鹽鹽長蘆，累資數千百萬，四維旣饒於財，歲時候居正不絕，而慈聖太后之父武清伯偉，故籍山西，得四維重賂爲之白太后，聲譽頗起。時呂調陽樸而老病，數求去，不能當居正意，而四維頗精悍，其督視修實錄，踰於昔，雖出不盡由居正，非其所惡也。旣入內閣，事推居正，雅亦相狎，尋實錄成，調陽加少傅兼太子太傅，而四維加太子太保，居正加左柱國，支尙書俸，願再疏辭，上謂實錄國家最大典，且一句一字，孰非出先生筆者，而何獨辭。居正復疏言：一句一字，果出臣筆，第此臣子常分，何足言。邇年以來，人臣苟效微勞，輒萌非分之想，小有不酬，則深獨賢之怨，臣實恥之，故不敢苟冀，冀以少勵此輩。上始允其辭，溫諭百餘言，頒示史館，諸拜恩者皆不樂，而是時少詹事王錫爵遷詹事，亦上疏辭不許。居正以錫爵官不及辭，而辭者常有激也，意銜之。錫爵侃侃自若，尋禮部舉會試，而次子嗣修與呂調陽之子皆中式，居正等以嫌請避，不允。於是假其柄於四維，而詹事申時行使所知以懋修卷上之四維，已次名二甲第一矣。旣進御，上啓姓名，拔懋修一甲第一名，而召居正謂曰：無以報先生功，貴先生之子孫，以少報

耳。居正叩首謝出。語於人。冀塞言者口。而劉臺言漸驗。敵款塞。久不爲中國害。獨小王子之部十餘萬衆。東北直遼左。以不獲通互市。數入寇。然其人少弱。非久卽退。而總兵李成梁勇悍善戰。數拒卻之。秦甯福餘女直諸屬國。彝好侵盜爲不利。成梁伺入。輒劫其後營。敵殺老弱。焚掠輻重。又以春中。率精騎掩之。斬首□□略歲以千計。居正張皇上捷。天子數褒美。加恩輔臣。居正多辭不受。僅受賞。而成梁媚居正。至封甯遠伯。位三公。而兩廣之破山賊。督撫殷正茂。凌雲翼所斬敵尤多。至數萬。其爵賞亞遼左。天子謂居正運籌功多。居正益重。戚繼光者。亦東南良將也。旣移鎮薊門。多挾南兵。而北人嫉之。繼光懼。而是時兵部尙書譚綸。與繼光以財通。綸善用女術。頗干居正。居正試之而驗。則益厚綸以示寵。繼光乃時時搆千金姬進之居正。且他所募畫。多得居正意。以是事與之商確。諸督撫大臣。雖繼光所擇欲爲。不利繼光者。卽爲之徙去。而成梁與二廣之賂。亦接踵至居正所。居正性整潔。好鮮麗。日必易一衣。冰純霞綺。尙方所不逮。時掌錦衣朱希孝。所蓄名書畫甚富。且死。褒其精絕者。以識別。居正旣露之。於是日有進以博一解。然尙不能當嚴氏之十二。而他珍奇瑰異。稍浮之矣。居正天資刻薄。好申韓法。以智術馭下。而士大夫之檢黠者。爭欲投中意。張瀚以久任之說進。然僅能行之。藩臬守令。而不能行之。給事御史。吏部屬譚綸。用給事中楊言。以蘇驛遞之說進。則兩都大臣。諸方面之任。咸僭民舟車。就旅店食。與商賈無別。而其屬以公使行。則馳驛呵殿。道路不勝其陵替。而遠宦者雖貴。不任行矣。省冗官。卽郎署多長僚。而待補者累累。無罪而褫祿矣。清庠序。則大邑之挾經就試者千餘人。而獲隸學官者。僅百之一。貧書生改業而賈矣。皆

觀以爲名美，而奉行之人卒不能堅久，以故見害而不見利。承平日久，姦盜蠹起，至深入城市，剽府庫以去。有司秘之，莫敢發。居正特嚴其禁，匿弗舉者，雖循吏亦必黜，得盜卽報斬決。以是有司莫敢飾情，以故有盜賊多，倉卒不審，輒報斬以迎居正意。例盜邊海，錢米盈數，皆斬首示衆，然往往取長繫，不能完。至殍死，居正獨亟斬之，而追捕其家屬，千百株連，怨讟叢起。居正知之不恤也。又以糧運阻，喜進者議通海運，然不能得。故時舟子長年，且謂山島多峇峇，能觸舟，於是膠州人某，謂有膠河故道，自海入青，穿而出，可以避之。其意欲通故河以利其鄉邑，而大僚之下，佐久滯淫，不獲登八座，和而請從事焉。居正大喜，命以侍郎兼憲職，發青登萊三郡夫數萬人鑿之。然河中道高下不能達，稍深，則岸立頽，遷道而其下多石，費十餘萬金，卒不可復。而東省人未見利，不勝調發，相與逐而噪之。乃中寢，然居正竟不罪此兩人而用之。其自用類如此。世宗朝，上大夫之言祥瑞者，居正輒額而醜之。其秉政，乃獨好飾祥瑞，以上下兩盡媚言及災異，則怒而見辭色。於是一切爲蒙蔽，滿九載，不上考，請罷。溫旨慰諭如例，賜白金麟繡御膳，肥豕上尊外，復加賜白金二百兩，坐蟒衣一襲，綵幣八，有副，坐蟒者，禁服也。居正凡三被錫，吏部具故事上，進左柱國太傅。予一子尙寶司丞，璽書褒美，給四代誥命，賜宴吏部。上將行大婚禮，斂髮用幘，欲加恩，居正疏辭，仍賜白金綵幣，調陽等賜各有差。慈聖皇太后去乾清宮，將返慈寧宮，敕諭居正，謂吾不視皇帝朝夕，恐不若前者之向學勤政，有累聖德。先生親受先帝付託，有師保之責，與諸臣異，其爲我朝夕納誨，以輔台德，用終先帝憑几之誼。社稷蒼生，永有賴焉。因賚坐蟒衣白金綵幣。居正侈之外，光勳朝野，尋保之。

寶與託孤約略埒是而亡何。其父文明卒。同列以聞。上遣大闈慰問居正。視粥藥。止哭。絡繹道路。三宮贈白金甚夥。鈔幣白粲麻布。至堆積寓所。上雖加恩居正。而心知其驕橫。未嘗有意留之。居正出。錯愕無專見。而其黨戶部侍郎李幼孜等倡諛辭。謂上冲年。不能親萬幾。不可一日無相公。何忍舍而遠去。遂以奪情之說進。而居正惑矣。故事。首輔去位之三日。則次輔遷坐左。翰林諸僚吏衣緋以謁。至是。諸僚吏皆衣緋入。調陽樞。不識物情。雖不遷坐左。而不先期止其僚入揖。有報居正者。謂翰林皆衣緋入閣矣。居正悲。謂我尚在。而不復少顧忌。即一旦出春明門。何望更入。乃陽上疏請乞守制。而露意馮保。使固留之。時有識者皆以爲非。然而不敢言之。朝時王錫爵張位趙志皋吳中行趙用賢習孔教沈懋學輩皆以爲不可。懋學移書李幼孜。責使諫止。且責給事御史不言。幼孜唯唯而已。乃泄之居正。居正怒甚。時上遣吏部尙書張翰慰留居正。宣旨畢。瀚在吏部。其事居正無不茅靡。且以汙濫數爲言。官所譎。藉居正以安。不敢以居正奪情爲是。而左都御史陳瓚倡六部請留居正。禮部馬自強頗持之。而未上。而居正恚。則請於上。謂瀚昏耄。敕令致仕矣。御史曾士楚等遂上章請留居正。吏科陳三謨。故居正客也。而迫於同事者。遲聞居正怒。因蒲伏謁居正。涕泣求解。俄而疏亦上。用賢不能平。約中行具疏勒居正歸。除服而後用之。刑部員外郎艾穆。主事沈思孝繼之。且榜刺譏居正他事。皆留中不報。馮保蓋欲取居正指。而居正怒。不知所爲。將擬居重辟。於是王錫爵要申時行謁居正。而請解。時行不可。錫爵乃獨身往質居正於喪所。辭甚竣。居正勃窣。且拜且言曰。上強留我。而諸曹子力逐我。我何以處。使有尺刃在我。且自刎矣。遂跪作劾狀曰。

爾殺我。爾殺我。錫爵辭不可已。而居正麾之出。則進士鄒元標者。復上章極言居正以元宰首數大倫。何以師表天下。且其人非能以仁義輔人主。不過智力把持耳。用之何所利。前是上已下旨。廷杖艾穆。思孝八十。謫遠戍。用賢中行六十。爲編氓。而元標袖疏草入左掖門。覩諸臣宛轉血肉。心不爲慚。疏上。而中外壯之。亦杖戍如穆。思孝。皆頻絕而蘇。時彗星從東南方起。長亘天。無所不掃。人情洶洶。諸言者皆得罪。以爲居正實應之。街議巷譎。至作謗書懸之。兩長安通衢。謂居正通內結黨。且反。居正不得已。迺草詔戒勵羣臣。諭所以留居正而罪言者意。再及之。必誅無赦。馮保爲請於上。宣之朝。言者稍息。於是使居正子編修嗣修。與司禮大璫魏朝。馳傳往代。司喪禮。主事曹誥治祭工。主事徐應聘爲治葬。居正請不造朝。而以青衣素服角帶入閣理政。及侍經筵講讀。日給酒饌二席。月給米粢十石。油燭茶鹽薪炭。稱是。始居正自矯飭。雖不能無任情。而英敏善斷。闊闊揮霍。其容面諛之。謂漢唐所未覩。至相率爲伊周。居正雅自負。不世出。爲劉臺等所譎。志意漸恍惚。而至是。始知天下之不見與。思以威權劫之。益無所顧忌。居平爲羅倫小豎子何所知。其書當投廁中。以昔年閣臣李賢奪情。修撰羅倫非之。上書數千言。其言雖不行。而嗣後人稍知自愛。非兵革。無有言奪者矣。居正之聞喪。薦紳先生傳錄倫疏。紙幾貴。居正知之。以故追恨倫。尋上舉大婚禮。故事。諸授冊遣聘。皆勳臣主之。而首輔爲副使。居正以有服不當與。慈聖亦疑之。而使閣間居正。恐難於易吉。居正豔其事。乃曰。爲天下母。國之大事。孰有重者。且居正受上恩厚。即使之赴湯火。不辭。而矧茲易吉。於是居正遂被紫橫玉以從事。凡十餘日夜。給事中李涑疏。謂使居正不服吉。不可以將

禮將禮而服吉恐非上所以處居正與居正所以自處夫吉禮非金革比也閣部大臣皆可使不止一居正也上苟惜居正幸更之居正報甚悲涼以其辭直姑切責付吏部處分乃出濼按察僉事王錫爵意益憤憤請以省覲告人謂相君不有父而君故省父以形若短且君何以責相君深乎錫爵曰吾自知父不知有相君且相君之自爲情而自奪之夫上奪之可也今乃徼太后中貴人以要上卽如所請不入朝不衣錦可也而今且衣錦而從吉卽從吉吾意其類之有泚而願揚揚自誇詡謂人何幸躬逢其盛於是竟請告以歸故事大婚禮成開臣第有賞而無遷拜居正知馮保諸中貴欲得之思以爲恩市而身力辭之以釣奇乃擬調陽進建極殿大學士兼支尙書俸張四維加少保兼武英殿大學士仍各錄一子中書舍人而馮保等皆加秩蔭敍上果謂居正讓而有禮錫書褒諭累百餘言命吏部候服除援旨以請已弊遼東捷賜居正白金綵幣先是上所賜札稱元輔或稱先生而不名稱先生者獨孝宗朝面諭則有之以施筆札至是始兼稱元輔張少師先生且特以師禮而居正有奏謝亦自負以爲帝者師且引贊拜不名之禮人謂居正傲於上而卑於馮保卽陳蹇所不論也居正見人情已定乃始乞歸葬疏再上始允使尙寶司少卿鄭欽等護歸以一月爲期葬畢卽北上道仍命撫按先期馳報璽書敦諭純白金爲印曰帝賚忠良以賜之如先朝楊士奇張孚敬例得密封言事仍戒內閣臣調陽等有大事毋得專決仍馳驛之江陵聽張先生處分人謂古稱伴食同事則有之未有伴食於三千里之外者以調陽四維當拂衣而調陽獨快快不樂然未能果也始居正念以閣臣里居者高拱在未嘗一日忘而殷士儋多左右與援或能

乘間以出。謂徐階老易待。擬薦之。自代遣人布腹心於階。階諸子且信之。而居正復自念。階出而居正被召。還任名位固相等。而階前輩受業師。不敢据其上。乃請廣內閣員。詔卽令居正推。乃疏推禮部尙書馬自強。吏部右侍郎申時行。自強文淵閣大學士。時行東閣大學士。士強伉直。數與居正左。自分不敢望之。人以居正是舉。稍不易云。時行以文字受知居正。又蘊藉不輕崖異。居正安之。且念權寵盛。多樹敵。欲拔一二後進爲之繼。而得時行。旣入閣。與四維皆自昵於居正。談笑無間。居正當行。上及兩宮賜道里費數千金。旣辭朝。復請見於平臺。上撫諭之曰。朕不能捨先生。恐重傷先生懷。是以忍而允所請。雖然。國家事重。朕將何所依。居正乃勸上以大婚之後。宜樽節愛養。留心萬機。因伏地哭。上亦爲之墮淚。爲居正奏辭慈甯宮。皇太后復以銀八寶六十兩賜之。所以慰諭有加。出國門。遣司禮太監張宏供帳郊外。以餞。百官皆班送。於是所經由有司飭廚傳治道路。然意居正奔喪。參用凶禮。則飭白羅傘幔。執事與臺胥吏之徒。皆具素服以俟。而居正以邊將所餽遺兵器羅列禁衛。千兵百騎前後部鼓吹。光彩耀日。於是復皇恐。相率易繪彩一新。費復不訾。前是居正父初死。巡撫都御史陳瑞馳至江陵。乘幔輿以謁入門。易白服。解紗帽。出麻冕於袖而戴之。加絰。伏哭盡哀。畢。則請見居正。母母不出。跪於庭良久。出。復伏哭前。謁致慰。乃坐其傍。有小閣侍。居正所私留以役者也。母睨而謂陳君。幸一眄。陳之。瑞拱立揖。閣曰。陳瑞安能爲公公重。如公公。乃能重陳瑞耳。公公者。中貴之尊稱。臧獲見而呼者也。母爲之啓顏。至是陳瑞已遷刑侍郎。復與鄖陽都御史徐學詩及司道守令會葬。所以賻遺不可勝計。光彩傾遠邇。時有御史于業者。罷久矣。與居

正故善會葬。自詭工堪輿言。密語居正。吾相地多。毋踰此者。是且有天子氣。居正懼。掩耳走。既畢葬。而諸兵備闔帥約。請居正閱操。用大帥禮。居正欣然許之。改服上所賜蟒以御。禮成。大出其金帛。勞賜加等。時遼東續奏大捷。上復歸功居正。使使馳諭。俾定爵賞。居正爲條列以聞。而大學士呂調陽內慚。臥乞休。居正疏以母老。不能冒炎暑。請俟秋。於是內閣部及兩京官俱上章請取居正亟還朝。上遣錦衣指揮翟汝敬等馳傳往迎。爲日以俟。汝敬陞辭錫之白金綵幣。而令大闕待其母。以秋日取江路上。汝敬至。居正就道。先具疏閣。而撫按諸臣各馳報。前是所經由藩臬而下。皆望塵跪迎。諸御史在差者。越界趨迎。身爲前驅。約束吏卒。干厥筋廚。傳居正所坐步輿。則真定守錢普所創以供奉者。前爲重軒。後爲寢室。以便偃息。榜翼兩廡。廡各一童子。立而左右侍。爲揮簋炷香。凡用卒三十二。昇之始。所過州邑。郵牙盤上食。水陸過百品。居正猶以爲無下箸處。而錢普無錫人。獨能爲吳饌。居正甘之。曰。吾行路至此。僅得一飽餐。此語聞於吳中之善爲庖者。召募殆盡。皆得善價以歸。道經襄陽。襄王出候。折東要居正宴。故事。人臣雖貴。極公侯。謁王。執臣禮。居正不欲執臣禮。辭不入。王強而後可。於是直入至便殿。具賓主而出。王者之有北。而自襄王始。過南陽。唐王亦如之。諸撫臣爭競以異禮待居正。而獨保定之孟重爲甚。雖同事者亦羞稱之。居正入。則遷孟重兵部侍郎。協理戎政。居正既過良鄉。抵郊外。詔遣司禮大闕宴勞於真空寺。口諭先生以午入。卽召見平臺。以未入。則質明見。兩宮亦各遣大璫宣諭。賜八寶金釘川扇御膳餅果醪醴。百僚復班迎。以次日質明入朝。上延之平臺。慰勞懇篤。且訊以途路所見。歲計物情。與此敵衰敗之狀。良久。予假

十日而後入閣。仍賜金幣鈔錠甚厚。雙羊上尊御膳。因引見兩宮。先是居正歸日。御史趙應元以候代襄陽不及會葬。卽得代而中悔。恐獲罪。上書移病歸。故事。御史在外不得輕移病。必撫臣爲代。請否者。都察院密察參以聞。此法久不舉。而居正之門客僉都御史王篆時佐院。要脅其長陳煥。使論應元。遂斥應元爲民。中外知其自感憤懣。而戶部員外郎王用汲遂劾煥以非法陷應元。阿附權臣。且謂托星變考察。所懲抑者。皆居正所不喜。宜斥煥而留應元。其詞甚峻。詔奪用汲官。居正初見用汲疏。怒甚。盡其事。謂臣賦性愚戇。不能委曲徇人。凡所指辯。注施一概之法。法所當加。親故不宥。才有可用。疏遠不遺。又務綜覈名實。搜剔隱姦。推抑浮競。以是大不便於小人。而傾危躁進之士。從而鼓煽其間。相與德憑攬。矇冒險釣。奇以覬幸於後日。爲擢取富貴之計。故向者劉臺爲專權之論。今日用汲造阿附之言。夫專權阿附者。人主之所深疑也。日浸月潤。鑠金銷骨。小則使臣冒大嫌而不自安。大則使臣中奇禍而不自保。明主左右。旣無親信重臣。孤立於上。然後呼朋引類。藉勢秉權。恣其所欲爲。紛更變亂。不至於傾覆國家不已。此孔子所以惡利口。大舜所以疾讒言也。臣是願命大臣。義以死報國。雖赴湯火。皆所不避。況於毀譽得喪之間。皇上不用臣。則已。必欲用臣。臣必不能枉己以徇人。必不能違道以干譽。臺省紀綱。必欲振肅。朝廷法令。必欲奉行。姦宄之人。必不姑息。以撓三尺之公。險造之徒。必不敢引進。以壞國家之事。如有捏造浮言。欲以熒惑上聽。紊亂朝政者。必舉祖宗之法。而明正其罪。此臣之所以報先帝而忠於皇上之職分也。優詔褒美居正。累百餘言。戒飭言者。居正本意欲速用汲置之死。而四維等爲乞哀。輕之。乃厲色而待。一語不

接握筆縱橫。了無顧盼。咸捧手受成而已。及秋。而魏朝奉其母。所經由游步。皆設席屋。張綵幔。徐州兵備副使林紹。至身雜撓船卒中。爲之導護。遠邇奔趨。將抵京。上遣司禮大閹郊迎。與魏相結。騎隊鳴鼓。角列旌纛。橫穿御道而過。觀者皆驚汗。上復賜金纊絲珍珠青紅寶石首飾。雜色繡蟒帛羅紈綺無算。兩宮之賜稱是。凡所待居。正母子。幾用家人禮。居正乃收綺繡奇器寶玩以進。上及皇太后李。所費鉅萬萬。而錦衣緹帥如劉守有。史繼書。皆受役如奴客。爲之收斂羅織作矣。不遺餘力。凡不附居正者。皆以緝訪計逐之。先是。居正與馮保逐高拱。拱內恨刺骨。而畏其權與文深。不敢出一語。居正始歸葬。道新鄭。拱已病若痲。故爲篤狀。與詣居正。乃哭謝。謂往者幾死。馮璫手。雖賴公活。而璫意尙未已。奈何。居正笑曰。有我在。無憂也。拱因是獲令終。時殷士儋歸歷城。其家親戚爲閹中掾。與故裕邸闈善。謀乘居正歸。而用士儋。居正知復切責掾。怖而不能答。數日死。馮保有私代筆札人徐爵者。居正爲擢用。至錦衣指揮同知。掌南鎮撫司。又使其蒼頭游七。與結爲兄弟。居正有所使。游七入以告徐爵。爵以達馮保。有所謀。亦如之。凡上之獎慰居正。詔旨皆出爵手。游七亦冒功得官。勳親文武大臣。至翰苑給事御史。多與還往。通姻好。游七具衣冠報謁。據上坐爲款。宵飲。譟呼無間。居正固與馮保通關。然意思。聞張四維之私結保。恫喝止之。四維以是恨居正。俺答入貢。久而以兵逼回夷。使使之烏思藏。迎所謂國師。鎮南堅者。創剗以居。鎮南堅投書上。居正乞賞。而賄以大士像。禮金剛諸佛。無算。結居正。上疏辭卻之。上褒稱居正。軒輊動。欲宣播遐邇。戎狄咸賓。朕得以垂拱受成。深用嘉悅。敕受之。而別爲答賜。時上病疹瘥。御朝羣臣皆廷賀。而居正以

持服不與上先爲之御平臺以見慰諭有加賜金帛御膳殺蒸上尊居正還閣乃鳴鐘鼓見羣臣先是嘉靖末李春芳在禮部患宗室日藩衍中外數萬人皆仰給縣官國士之入不足以供歲額相計議爲宗藩條例於封襲婚姻子女名數祿賜之屬皆爲之限至是居正條摘苛細請下禮部入會典而禮部尙書潘晟於居正爲前輩謬恭謹其在留都率九卿疏請亟迎居正入朝居正憐而用之而晟多爲藩王道地居正聞之怒噉言者論去之而擢用刑部侍郎徐學謨初守荊州居正爲編修使歸治妻葬學謨禮厚之甚以是心德之居正既貴用事學謨兩遇劾歸皆居正力持起之自是凡四起皆不離居正鄉土未久輒遷自成弘後百餘年來禮尙書必翰林擢惟嘉靖初以席書言大禮獨由他曹進言路攻之至數十疏不止學謨自刑部擢亡敢出一語者人謂居正威在世宗上矣居正所善者卽侍郎李幼孜嘗爲郡守見辱於儒生附居正居正爲左右之不十載至八座居正復與通姻驟遷至工部尙書幼孜無他長每見居正輒語移日多布腹心及廣樹朋黨援引所私而時一進逆耳語以示忠赤如所爲奪情擅權事未嘗不開端引之出則傾身以交伉直聲者謂吾力言之如相公不聽何殷正茂爲戶部尙書進大珠瑰寶鵝扇以媚居正而得用居正專以鬪奉進慈甯爲坐褥上見之知其自居正心悲之幼孜與正茂爭寵而妬數噉言路論之歸而王篆入吏部其見知愛甚於幼孜數爲居正書幼孜時時在外揚相公之懷諫而已力逢迎之冀爲他日地居正微伺得悉之乃投札幼孜曰吾憊矣寡助之至親戚叛之奈何幼孜懼遂乞歸而以曾省吾代之省吾居正所取士也爲人貪而巧媚小有才其撫四川借軍興乾沒萬計入佐兵部以右都

御史掌南院。至是代幼孜。吏部尚書王國光。山西人。與四維同鄉。有連。恐居正疑之。而篆從傍爲耳目。於是六曹咸傾心事居正。雖對妻子牀第。無不稱居正爲聖賢。其始士大夫之諛以伊周。漸爲常談。不能得居正色喜。則進爲五臣。又有以稷契皋陶不爲重。則直進之舜禹。而居正恬然不以爲駭怪。中允高啓愚主試事。遂以舜亦以命禹命題。天下紛紛目啓愚勸進矣。時上漸備六宮。太倉所儲金錢多所宣進。居正乃使戶部進御覽數目而陳之。爲歲每入數減而出數溢。恐其不可繼。而請上置之座隅。時賜省覽。量入爲出。罷節浮費。疏入留中。時言官請停蘇松織造。不聽。居正爲委曲以請。得損其半。復請停武英殿工。及裁省外戚遷官恩數。上多曲從之。一日。上御文華殿。居正侍講讀畢。而以給事中所上災傷疏問之。因言鳳陽及江南諸郡屢無歲。而徐宿之間。民至屑榆皮而食。不急賑之。則相聚爲盜。賑之切不可緩。上曰。惟先生處。居正復奏上至仁愛民如子。凡請蠲請賑。無不賜允。而在外諸司。往往營私背公。剝民罔上。非惟下體皇上子惠困窮之德意。且不知臣等所以贊皇上之愚忠。殊可恨也。今給事中傅作舟疏云。報災則曰。下敢報。請賑則曰。不敢請。有何不敢報與請。而推調支吾。歸怨君上。卽積穀一事。屢爲申飭。竟成虛文。彼處有自理贖贖。未嘗佐公家之急。將焉往。臣等不勝憤懣。竊以爲此輩若遇聖祖。不知當處以何法。上怒曰。審爾。何不重處之。居正拜領命。乃又曰。邇來正賦不虧。府庫克實。皆以考成法行。徵解不爽。令江南困窮甚矣。河南災畿輔亢旱。將來蠲賑。恐不容已。惟皇上加意撙節。於宮中一切用度及服御。可省者省之。賞賚可裁者裁之。至於布施一事。尤當禁止。與其惠緇黃之流。以求福利。孰若寬恤百姓。全活億兆之。

命有功德尤大。上曰：然於是有獨貸而督責奉行者之旨肅如矣。江南貴豪如華亭金壇上海各特勢若
姦滑巧避匿而不肯完賦者。與瀉鹵蠃螺之民錯。莫知所辨析。居正深恨之。以是選擇大吏精悍者。嚴行
督責。賦以時起。而民不勝楚樸。則相率而歸。怨居正。國家日益以富。閭閻日益以窮。然功與罪實相當。時
會居正斬服將除。而上宣召吏部問期日。於是手敕元輔張少師先生。忠孝兩全。今制服已滿。朕心嘉慰。
特賜玉帶大紅坐蟒。蟒各一襲。金盞金爵。用示眷念。俾朝見後。仍御平臺召對。以後朝參經筵。俱吉服
如舊。既對。慰諭久之。使大闕引見兩宮。仁聖皇太后賜白金文幣。慈聖皇太后慰獎尤至。賜御膳九品金
絲壺臺盞。金箸白金彩帛。暈素甜食酒器。使司禮太監張宏侍宴。甫就職。而吏部以大婚敕諭請。特詔元
輔社稷重臣。受先帝願託。翊載朕躬。以及大婚。彌成治理。勳績茂著。復加太傅。增歲祿百石。進錦衣千戶。
張問修爲指揮僉事。於南鎮撫理事。居正復辭太傅。而受其餘。尋吏部復舉居正守制歲月。爲之請十二
年滿加恩。復再辭。詔復加慰諭。凡百餘言。爲卿之所處。恩義兩盡。足以垂範萬世。特允所請。以全忠孝大
節。至於卿之勳勞。簡在朕心。當有酬答。時復當會試。大學士申時行許國爲主司。而居正二子懋修敬修
與四維之子甲徵。皆中式矣。居正屢上謁諸陵。歸卽具疏乞休。中云。拜手稽首歸政。則隱然復子明辟。凡
再上。而天子慰留懇切。最後。手書稱慈聖口諭。張先生親受先帝付託。豈忍言去。俟輔爾歲至三十。而後
商處。先生毋復與此念。居正乃出。而懋修卽狀元及第矣。敬修中進士高等。甲徵次之。皆得禮部主事。皆
邑邑不樂。人爲之語。首甲幸有三人。云胡靳此二子。而懋修嗣修。俱列史官。每出。則衆相指而詛。或作俚

諺書而黏之宮牆門下。客至引以相告。指得外補。王篆與會省吾益橫。南北給事御史。則傅作舟。王蔚。秦舜翰。李選。朱璉。錢岱。顧爾行。爲之牙爪。而作舟璉尤恣肆。巽鄙無恥。而南京兵部主事趙世卿。抗章言時政。皆陰譏居正之操切。居正怒。欲譴之。吏部尙書王國光爲畫策曰。譴之是成其名也。且或以動上聽。某謀爲公任其怨。不旬日出爲楚府左長史。蓋杜其遷轉地也。又半載當大察。屬南京吏部都察院去之時。尙書何寬與郎中李已比。而併譴司業張位。位先以居正聞喪有所刺譏。其望實甚著。以王篆屬不敢抗。李已素有直聲。人爲之恨且惜。居正聞位譴亦不悅曰。何至乃爾。而是時上章抗居正者。穆茂。孝鄒。元標。皆已遠戍。督撫大臣故折挫之使不堪。冀以聞於居正。取一快。而王篆旦夕待居正。知其不釋意於劉臺。臺之歸。頗不理於鄉人口。於是乘間使其鄉御史賀一桂。嗾怨家疏其盜邊銀不法數事。於是江西巡撫王宗載下有司。悉爲證實。而遼東撫按於景昌。傳會之坐遠戍。而繫追其贓金。又繫其父子。竭產以償。不得。則別以富人犯法者。寬其罪。使爲之償。而後遣戍。至嶺外。無何。飲於其戍主所。歸而暴死。蓋戍主有所受毒焉。人咸知之。爲作傳語傳京師。時趙用賢吳中行亦家居。王篆與省吾承居正旨。風陳劾。使用故嘗請奪情。御史會士楚按吳。使伺用賢中行短而甘心焉。士楚之吳。初爲御史。新脅於長。不得已具疏。而中悔之。既至。歎曰。吾嚮者猶象虎也。而今乃使我鷹犬耶。且吾已愧之人。復安敢愧之天。因移疾歸。而居正竟亦無他。有狂生吳士期者。甯國人也。與沈懋學善。懋學時移疾里居。而士期常欲走京師。上書有所規於居正。而懋學切止之。其語頗流聞。而吳中輕薄子。僞爲故都御史海瑞論劾居正罪惡。亦傳至甯國。

而有梓之者。操江都御史胡橫。屬同知龍宗武。使究其人。不得。則執士期以塞。而橫知其爲戀學友也。使宗武捕而引戀學。且報居正。欲自以爲功。而居正意不欲彰。使焚其書。王篆則貽書宗武。必令引戀學。而宗武不可。而士期乃餓死於獄。遂寢其事。王篆思所以媚居正。與尙書王國光謀曰。彼前後上疏戍斥者。皆王夫也。而意未嘗一日忘復用。欲杜之。則莫若中之考察之例。於是因大覲。疏請錄諸戍斥者姓名於察吏後。而榜之。示不收。居正悅。報可。上初卽位。馮保朝夕視起居。擁護提抱。差有力焉。小所扞格。卽以聞慈聖。而慈聖素誨上。嚴切責之。且曰。內庭可耳。使張先生聞之。奈何。於是上嚴重居正。而馮保意自得。所以事上不能一切順。多逆上旨。上漸長。而厭之。保內恃太后。外挾居正。待上左右。殊苛竣。每在上前。輒牽下加笞責。諸有財力可資藉。監局多持不與。而與所黨。闖張大受輩。使爲上耳目。頗倚保勢。藐上左右。諸閣如孫海。客用孫德秀。溫泰。周海輩。皆貴倖善媚。每不甘保之見凌。上頗好馳騎。挽強弩。擊劍。豪飲。至醉。海等因以言激之。上怒甚。睨視其側。有二監。皆保養子。手劍殺之。卽騎而馳之。保所呼保欲殺之。保覺。因擁大石支門。會上醉甚。扶歸。熟寐。至曉。保亟趨謁慈聖。爲膚受語。慈聖怒。且駭。召上。跪而責之。上哭謝罪。曰。此孫海客用誘我耳。慈聖乃使保捕海。用杖之。發孝陵種菜。而盡收乾清宮所蓄兵仗。庫鑰之。逼使上手書詔。自責諭內閣。而居正謂海用處之輕。復削爲淨軍。復請將德秀。泰及周海併逐之。其諸中貴內侍。皆勒令自陳。居正與保逼上爲去留之。居正因上疏。戒遊宴。以重起居。專精神。以廣胤嗣。節賞賚。以省浮費。卻珍玩。以端好尙。親萬幾。以明庶政。勤講學。以資治理。上迫於太后。不得已。皆報可。於是上左右親信。

不附保者殆盡。居正嘗纂古君人治亂之事。而條治者八十一。亂者三十六。以應陰陽之數。繪而爲圖。以俗語解之。進之上。至是。復屬儒臣紀高皇帝及列聖寶訓實錄。分類成書。凡四十。曰創業艱難。曰勵精圖治。曰勤學。曰敬天。曰法祖。曰保民。曰謹祭祀。曰崇孝敬。曰端好尙。曰慎起居。曰戒遊佚。曰正宮闈。曰教儲貳。曰睦宗藩。曰親賢臣。曰去邪姦。曰納諫。曰理財。曰守法。曰警戒。曰務實。曰正紀綱。曰審官。曰久任。曰重守令。曰馭近習。曰待外戚。曰重農。曰興教化。曰明賞罰。曰信詔令。曰謹名分。曰裁貢獻。曰慎賞賚。曰敦節儉。曰慎刑獄。曰寢功德。曰屏異端。曰飭武備。曰御夷狄。其辭多簡切。請以經筵之暇進講。又請立起居注。紀上言動。及朝內外事。爲修史張本。日翰林四員入直。應制詩文及備顧問。上皆優詔許之。旋以滿十二載。奏最上。爲召吏禮二部傳諭。元輔居正。受先帝顧命。夙夜在公。任事任怨。雖稱十二年滿。實在關十五年。忠勳異常。恩典宜厚。尋使司禮太監張成。賜白金三百兩。綵幣四十。有副。坐蟒蟠蟒各一襲。酒六十瓶。鈔十萬貫。饌脩五桌。羊豕鵝雞餽蜜油麵棗果薪燭之數。多以千百計。吏禮二部議上。加上柱國太傅。支伯爵俸。仍加歲米二百石。予一子尙寶司丞。給四代誥命。下璽書褒揚。錫宴禮部。止疏辭上。柱國及伯爵俸而已。明興。文臣無拜三公者。謂居正當力辭。至是。皆驚怪。以爲且必封公侯。加九錫。而居正亦益汰。毋論六卿。其視四維等。若不屑與稱僚采者。四維等事之益謹。而居正病。病由多御內。日不給。則時餌房中藥。發強陽而燥。則又飲寒劑。泄之大腸出。日以羸削。上時下諭問疾。大出金帛。以爲醫藥資。凡四閱月。竟不愈。而自六卿大臣翰林科道部曹。下至冗散。亡不設齋醮祠廟。爲居正祈禱者。皆舍職業。朝夕奔

走仲夏。曝身赤日中。延至南都山陝。楚汴淮漕。撫按藩臬。亡不皆然。居正深居不出。欲使知之。則厚賂其僕以達。上始令四維等理閣中細務。而大事猶卽家令居正平章。居正始自力。而其後儘甚。不能徧閱。混額之。尚不使四維等參預。遼東以捷聞。居正遂進太師。歲加祿二百石。子爲指揮僉事者。進同知。居正病益欲不可爲。乃乞歸。上復優詔慰留。稱之爲太師張太岳先生。居正度不起。會上使人問堪次入閣者。居正薦前禮尙書潘晟。兵部侍郎余有。丁許國陳經邦。又薦尙書徐學謨。曾省。吾張學顏。侍郎王篆等。皆可用。而指王錫爵等爲姦邪。上爲黏之御屏。晟雖居正故識。然不甚重之。而馮保則晟故所曾授書。所以居正爲首薦之。居正待其子弟嚴。每三五日入問安。不交一言而退。以貌羸甚。惡人見之。臥帷中。至明不聞聲。家人怪而發焉。則氣絕矣。訃聞。上愴悼。輟朝。上及兩宮皆賜齋。檀麻布各五百匹。米各二百石。潞王等合贖白金二千三百兩。香及油燭以數千計。薪以數萬計。祭十六壇。卽國公兼師傅。不若也。贈上柱國。諡文忠。遣營葬。仍命京堂之四品者。錦衣之在堂上者。護喪歸。其子編修嗣修等疏辭謝。上報諭。朕念先生受先帝顧命。鞠躬盡瘁。歿而後已。忠勞可憫。遣司禮中貴人陳政護喪歸。俱令馳驛。居正之喪。與輜重凡七十餘艘。用夫三千餘人。前後十餘里不絕。於是四維始爲政。而事漸變矣。馮保亟爲上言。起潘晟爲武英殿大學士。使行人趣召之。晟鄙而貪。士論所不齒。每追恨居正。四維度時行不欲爲晟下。於是風言官數上章攻之。御史薦吳中行等諸臣。當召用。馮保怒而黜之。而言官多有詆居正時政者。居正之客諸大臣猶持不肯行。於是徐學謨歸女於時行之少子。以自固。而馮保以病在告。給事御史復乘間論劾晟。

晟上疏辭四維擬旨放之歸時晟已至臨安道中委頓返駕馮保病起恚曰我小病也而遽無我居正之黨王篆曾省吾朱璉微知之且謂四維之且甘心於居正而逐我曹因委身自昵於時行還往無間皇太子生上喜甚因上兩宮徽號頒詔赦天下四維進少師中極殿大學士時行等進賚有差馮保至錄一姪都督僉事保始欲欲封伯爵而四維以無故事難之保詎曰爾由誰得今日耶而負我於是篆省吾行數萬金謁保與權倖得從容言四維短而極稱時行相約逐王國光則省吾代爲吏部逐陳炯則篆代爲都察院四維故炯所造士也而省吾以陵工驟進太子太保御史某者篆所厚也遂上書極論王國光而中謂國光媚四維拔其中表弟王謙爲吏部主事四維避嫌不出時行遂擬罷國光而於工部覆謙交代疏以御批責其鑽刺而譏之於是言者紛然起攻四維窘甚求徐爵張大受爲保道地皆有賄於是時行小罰言者以解而四維謂時行與謀遂水火矣國光既去而擬當代者馮保私其鄉人某王篆不敢違遂託省吾以篆之負約也怒而相詬至相擊朱璉復爲之交闕其間遂不可解而上故所幸閹張誠者見惡馮保上不得已斥之而使密調保所爲遂及居正至是誠復入悉以兩家交結恣橫狀聞上且謂其珍玩寶藏踰於天府上心動四維屬其門人御史李植使極論徐爵擅入宮禁爲保擬旨挾詐通姦諸違法事而他復論曾省吾貪邪縱欲欲以嘗上而御史江東之亦極論保罪狀尋逮徐爵下詔獄省吾勒致仕譴馮保爲奉御居南京籍其家金銀百餘萬兩珠寶瑰異以鉅萬計他宅舍田產器用稱是內藏爲充物而上益心豔居正疑其贏積或過當矣始居正卒而王篆猶挾馮保以恫疑恐喝士大夫尙畏之其銜恩者趣之

若流水有兩子。一試其鄉。一試於南都。試南都者。九卿御史出郊迎。巡按以下。爲之飭傳舍。其郵供提舉。至檄屬邑之雋。同經者與處。而監試御史嘗試時。委曲使之同號。竟日至暮。美酒梁肉水陸之珍。絡繹饋餉。御史至自具草。使同號者酌量之。且代爲書。惟坐飲噉耳。竟得中前列。而其鄉之試者。亦與選。人情益憤。而言官乃列上其事。并論劾居正三子。躡取上第。而四維之子甲徵。已爲山西之第二人。時行之子用嘉。順天第六人。而次子用懋。昌浙籍。與選如篆矣。四維雖恨居正。而畏其不利己。乃不復窮究。而第擿居正篆之亂政。悉削籍爲編氓。時給事御史新進者。益務攻居正爲奇。併及其黨。而御史楊四知語尤峻。於是居正始奪上柱國太師。再奪諡。而王篆會省吾。朱璉陳瑞輩。毋不斥削。吳中行趙用賢等。皆召用補官。有差。劉臺贈光祿少卿。還其產。御史魏允貞。見四維時行之子。先後預薦。而無有及之者。意不平。乃於建言疏。頗譏切時政。而謂二相不改居正之覆轍。而私其子。坐貶。二相皆有疏辯。而時行尤齟齬強飾。人莫不唾之。四維知海內之怨居正深。一切務爲寬大。以收人心。而法度斬廢弛。至大計貪酷不謹。罷削者。亦得復官及章服。而祖宗之法。圯且盡矣。時行旣已爲王篆輩所推。意不自安。會得寒疾。踰月不能起。四維語時行之客曰。夫首相者。若四時之有春行。必有夏。何俟煎迫耶。時行起。不敢謝過。唯默默而已。而甲徵用嘉復登第。四維嗾其門客之在言路者。俾具草。令先攻尙書徐學謨。以嘗上學謨斥。卽攻時行。草具將上。會四維以父喪歸。四維家素富。累積金至鉅萬。而尤納賂不已。度不可如居正例奪情。乃大行金於上左右。諸用事者。使爲間曰。時行故居正所私。今復得其家金寶萬計。爲覆露之矣。上又爲心動。而御史

羊可立者。四維客也。乃復追論居正罪惡。而謂居正以私憾搆遼庶人憲燾。遼庶人之妃。因而上疏辯冤。且曰。庶人之庫。金寶萬計。悉入居正家。上喜。以法籍居正。乃命司禮太監張程。刑部侍郎邱樛。偕錦衣指揮給事中往籍其家。併勸故搆王憲燾者。其父王薨。以幼未立。而居正之祖父爲護衛軍。太妃聞居正少警穎。且與王同歲。召而奇之。賜之食。而坐王憲燾其下。且謂而不才。終當爲張生穿鼻。王憲燾以是慚居正。而會居正登第。召其祖虐之酒至死。故居正心銜之。張程等行。居正諸子於夜焚毀其奇貨禁物。而荆州守令以御史意。先期錄其人口出。而子女遁避空室者。不及發。已錮其門。則餓死者十餘曹。皆爲犬所殘食。而盡發其諸子兄弟藏。得黃金將萬兩。白金十餘萬兩。長子懋修不勝刑。自誣服寄三十萬金於會省。吾王篆萬。而懋修自縊死。於是詔留田千畝以贍其母。而省吾等皆追究。時御史丁此呂復追論科場事。謂高啓愚之以舜禹命題爲媚居正策禪受。且旁及諸黨人。時行擬旨留啓愚。而報處其餘。於是吏部尙書楊巍等駁此呂爲曖昧。中人以大辟。若先朝之趙文華王聯等。旨下。雖出此呂外。而奪啓愚職。給事中王士性等。窺上旨所嚮。遂極論楊巍。且謂時行實黨居正而主之。於是內閣部院諸大臣復劾士性等。旃席之地。幾成訟庭。於是彼此相率而詣內臣求援。時行巍雖得留。而大權悉旁落矣。其後言者復攻居正不已。以媚上。於是復敕法司盡削居正官秩。奪其前所賜璽書四代誥命。以罪狀布天下。謂當剖棺僂屍。而姑免之。其弟都指揮居易。子指揮同知問修及編修嗣修等。俱發戍邊瘴地方。李植江東之等。以能發姦。遷京秩有差。

史官曰。託孤寄命。伊霍成其偉績。昵黨落憎。孺閔名曰盜儒。自非穆穆休休。奚以經國據鼎鉉也。居正祖申商之餘習。結曹王之奧援。能以法劫持天下。使天子幾有尙父之號。羣臣俱成結舌之風。呼朋引穢。終身不悛。器滿而驕。宵小羣激。虎負不下。魚爛不顧。寒暑移易。日月虧蔽。沒身之後。名臭家滅。宜矣。子曰。如有周公之才之美。使驕且吝。其餘不足觀也已。說者謂其功在社稷。過在身家。明當中葉。天下磐石社稷之功。何以云然。蓋其根本已撥。萬死莫贖者矣。悲夫。

明書卷一百五十一

列傳十二

藝術傳

史官論曰。夫通方利用。帝王以之右民。習器入神。聖賢以之寓道。託物喻志。達人以之藏身。藝之時用大矣。姬旦自負多材。齊桓不廢九九。君相之弘時務也。鈞可以悟弋。弋可以悟道。君子之遊於藝也。至如牙曠之調音。梓慎裨籥之占氣。史蘇季主之拂龜端策。倉公秦和之見垣一方。莫不窮極眇眇。驚猶鬼神。格之技流。豈猶形下者乎。世衰道降。藝亦因之。良由淺者習有粗。而深者又好爲迂怪。心無專志。而學有多歧也。故聖人賤其無恆。明君斥其玩物。若京郭之流。炫奇示異。致隕厥身。抑所謂見毫末而不見其睫者歟。茲采明興以來。藝精而不詭於道者。數人著於篇。以其爲藝也。故多疏失。聊備其選云爾。

宋克趙撝謙祝允明文璧傳

宋克。字仲溫。長洲人。別號南宮生。偉軀幹。博涉書傳。任俠。喜擊劍走馬。尤善彈指飛鳥。下之家。素藏用。周養賓客。及四方豪士。時與少年博飲。遊戲。盡喪其資。遂壯。見天下亂。思自樹功業。乃謝酒徒。去學兵。得風后握奇陳法。兼工騎射。將北走中原。從豪傑計事。會道梗。無所合。遂泝大江。遊金陵。入金華會稽諸山。蒐

覽瓌怪。渡浙江。汎具區而歸。家居。以氣節聞。衣冠慕之。爭往迎候。素善交。無貴賤。皆傾身與接。有二軍將。恃武橫甚。數毆辱士類。號虎冠。其一嘗召飲。或曰。彼醜。不可近。笑曰。使酒人。惡能勇。吾將柔之。卽往。往。上座。爲語古賢將事。慷慨風生。其人竦聽。拜起爲壽。至罷會。無失儀。其一嘗遇客次。顧克不下。以目攝之。他日。見克獨騎出。其人從健兒帶刀策馬踵後。若將肆暴者。克故緩轡垂鞭。當中道。徐進。不少避。知非懦。遂引去。曰。此老精神。望之尙可畏。況覲面耶。吾不可不一見。明且介。客詣謝。請結驪。性抗直多辨。好箴切人。過有忤己。則面數之。無留怨。與人議論。斷必勝。然援事析理。衆終不能折。時藩府欲致幕下。不能得。將中危法。以智免。家雖貧。然喜事。故人或饋酒肉。立召客。與飲啗相樂。四方遊士至吳者。必與周旋。款曲。延譽上下。所知有喪疾。不能葬療者。以告。輒令削牘。疏所乏。爲請諸公。間營具之。終飲其惠。不言。故人皆德之。謂婁君卿原臣先之流。久之。稍厭事。闔門寡將迎。關一室。皮法書彝鼎古琴自娛。工草隸。遂以書名。章草久不傳。至克始得其法。用筆精妙。直與古人並驅。日費千紙。厭之。遂自闕。希復執筆。歆慕靜退。時賦詩見志。怡然處約。若將終身。洪武初。同知鳳翔。輒棄官歸。卒。時宋廣字昌裔。亦善草書。人稱二宋。祝允明謂仲溫書如初筵。忽見三代鹵彝。蓋有天授。非人工。所傳七姬志等。大類鍾允常。

趙撝謙。字古則。餘姚人。洪武初。徵修正韻。衆以謙年少。黜爲中都國子監典簿。同官論事不直。罷歸。築考古臺。述六書之音注聲音文字通及易學提綱諸書。凡三百餘卷。大臣薦召爲瓊山教諭。進所著書。不報。還瓊山。初。謙來京。宋濂遣子璟受業。謙歸。璟校正韻。多用謙說。謙六書之學最精。旣沒。門人柴廣敬以聲

音文字通進學書者。心好之。莫得而見也。謙於世利聲華。澹然無望。礙直義所在。目無王公。以在厄窮無悔。卒於番禺。

祝允明。字希哲。吳人。生而右手指枝。因自號指枝生。爲人好酒色。陸博不修行檢。嘗傅粉黛。從優伶酒間度新聲。俠少年好慕之。多齋金游。允明甚洽。舉鄉從春官試。下第。是時海內漸熟。允明名。索其文及書者接踵。或輦金幣至門。允明輒以疾辭。不見。然允明多醉伎館中。掩之。雖累紙可得。而家故給。以不問。僅奴作業。又捐業蓄古法書名籍。售者或故昂直欺之。弗算。至或留客。計無所出。酒窘甚。以所蓄易置。得初值什一二耳。當其窘時。黠者持少錢米乞文及子書。輒與已。小饒。更自貴也。嘗遺黑貂裘甚美。欲市之。或曰霜落矣。何故市。允明曰。蒼頭言。始識不市。而忘蔽之篋。何益。後拜廣南令。未幾歸。囊裝可千金。日張酒呼。故狎游宴。歌呼爲壽。不兩年。輒盡。允明好負逋債。出則羣萃。而訶諍者。至接踵。竟弗顧去。所著祝子通祝子雜罪知蠶衣浮野記語怪蘇材小慕與甯志各詩文數百卷。卒年六十七。其草書爲明第一云。

文璧。字徵明。以字行。更字徵仲。吳人。生而外椎。八九歲。語猶不甚了了。或疑其不慧。其父懋則獨異之。曰。兒晚成。無害也。旣長。從父宦於潞。以文贊郎中。莊景。景奇之。及父以病報。徵明爲廢食。挾醫馳至。則歿三日矣。慟哭且絕。久之乃蘇。郡寮合數百金爲賻。固謝不受。曰。勞苦諸君。孤不欲以生汗遊者。其詩文書畫冠絕一時。日與吳士祝允明唐寅徐禎卿遊。都御史俞諫。念徵明貧而才。欲遺之金。謂曰。若不苦朝夕耶。對曰。朝夕具饘粥。詎指其藍衫曰。敝乃至此乎。乃佯爲不悟。曰。兩暫敝吾衣耳。諫竟不忍言遺金事。一日。

過其廬而門渠沮洳。願謂曰：「通此渠，若於堪輿言，當第。」謝曰：「公幸無念渠，渠邇當損傍民舍，甯庶人濠。慕其名，貽書及金幣聘，辭病臥不起。於金幣無所受，亦無所報。亡何濠竟以反敗，尙書李克嗣撫吳，薦於朝。超授翰林待詔，爲待詔可二年。修國史，侍經筵，歲時上尊餼幣，所以慰賜甚厚。然居恆邑，邑不自得上疏乞歸，寢不報。又一年，嘗滿考，再上疏乞歸，又不報。楊廷和以召入，徵明見獨後，廷和亟謂曰：「生不知而父之與我友耶？而後見我，乃毅然曰：『先君子棄不肖三十餘年，而以一字及者，不肖弗敢忘也。故不知相公之與先君子友也。』竟立弗肯謝。廷和悵然久之，曰：『老諄甚，媿見生，幸寬我，迫欲歸。』疏三上，得致仕歸。杜門不復與世事，以翰墨自娛。諸造請戶外屢常滿，前是周王以古鼎古鏡徵，王以金寶瓶他珍貨直數百鎰，贊使者曰：『王無所求於先生，慕先生耳。』盍爲一啓封遜謝曰：『王賜也，啓之而後辭，不恭，竟弗啓。』其書畫徧海內外，往往真不能當贗十二。好爲詩，傳情而發，娟秀妍雅，文取達意，書法清挺，而小楷尤精。亦時八分、丹青遊戲，得象外理。二子彭嘉亦多知名，能精其業。每焚香燕坐，蕭然若世外，而吳中好事家日相與載酒船候迎之湖山間，以得一幸爲快。至九十猶矍鑿不衰，方爲文章，擲筆而逝，愴然若蛻者。有詩文集若干卷，有甫田集行於世，久之獨以畫顯，得之者若拱璧焉。

戴元禮蔣用文許紳傳

戴元禮，名思恭，以字行。金華人，學於丹溪朱彥修。初任御醫，事太祖藥餌，輒效。每風雨，免元禮朝。洪武三十一年五月上病，少間，輦出，御右順門，召諸醫官治疾，無狀者，盡付獄。獨召元禮至榻前，曰：「汝仁義人也。」

事無預汝。無恐。建文皇帝卽位。誅諸侍醫者。獨拜元禮。太醫院使。遼簡王肅。莊王慶靖。王皆奔喪。至京。聞建文道。太祖語。哭問勞元禮。簡王題仁義字。大軸。莊王靖。王爲贊詠。賜元禮。初。洪武丙寅。太宗患瘕。韓公懋治。久不愈。元禮至。問所用藥。曰。是也。又問。太宗嗜何物。曰。生芹。元禮曰。得之矣。投一劑。夜暴下。視之。皆細蠱也。晉恭王病。亦以元禮藥。餌愈。未幾薨。太祖怒。遠治王國。諸臣。元禮侍曰。臣嘗奉命療王。王飲臣藥。數矣。臣對王病。毒在膏肓。卽復作。不可治。今果然。太祖遂釋晉諸臣。尙書嚴震直病。上令元禮好治之。否且償命。一劑而愈。有妃嗜燒酒。腹痛。治之。愈。曰。十年必復發。發不可治。後十年。竟病腹痛死。王賓者。吳中高士。願受元禮方書。元禮索賓拜。師事我。乃與書。賓不肯。一日。詣元禮。值他出。有書八册。案上。賓袖去。元禮歸。驚歎。自失。賓不娶。臨終。以其書授盛啓東。韓叔暘。

蔣用文。初名武生。以字行。儀真人。洪武中。爲御醫。永樂八年。陞院判。專侍文華殿。用文能視病制方。性謹。愿恭恪。有行義。達世務。事東宮。每效規益。卒之明年。仁宗贈太醫院使。謚恭靖。官其長子。主善爲院判。明朝稱醫方。以用文爲最。

許紳。應天人。質實謹厚。不喜交遊。以精醫術。仕至工部尙書。掌太醫院事。嘉靖中。西苑宮人之變。聖躬甚危。中官召紳用藥。上蘇。紳語人曰。此變禍不測。論官守。非紳輩事。切念受聖主深恩。當以死報。乃用桃仁。紅花。大黃。諸下血藥。藥進。自分不效。必自盡。賴天之靈。辰時進藥。未時。上忽作聲起。去紫血數升。申時。遂能言。又三四劑。平氣活血。聖躬遂安。天地廟社之靈也。上加紳宮保。後數月。紳病。曰。紳必不復起矣。曩西

苑用藥驚憂所致。至今神魂不甯。百藥不效。紳卽死。主上萬壽。死撫憾。竟以此病卒。上憐之。卹典甚厚。

劉日新全寅皇甫仲和萬祺傳

劉日新。當太祖克金華時。召令推命。答曰。將軍當極富極貴。又推諸將校。則言或爲公。或爲侯。上怒。其不言官職。劉請屏去左右。曰。極富者。富有四海。極貴者。貴爲天子。上大喜。洪武四年。召至。問欲貴乎。對曰。不願。又問欲富乎。對曰。不願。問所以欲。曰。臣所欲者。求一符。可以徧遊天下耳。上因以手所揮白扇。題曰。江南一老叟。腹內羅星斗。許朕作君王。果應神仙口。賜官官不要。賜金金不受。持此一握扇。橫行天下走。識以御璽。日新持此。徧遊天下。名山水十二年。回家。忽對妻子。言我當死於非命。故歸。欲作別去遊京師。妻留之曰。旣當死。死於家耳。答曰。當死於京都。遂至南京都市中。推算。但講命而已。蓋先被旨。不許與人算。故也。藍玉平雲南回。因詣日新。日新言。將軍將星見梁地。當封涼國公。然七日後。必有一險。我當與將軍同死。後果封涼國公。數日後。玉誅。臨刑時。歎曰。神乎。劉先生之言。問爲何人。曰。劉日新。上聞。因達日新至。問汝與藍玉算命乎。對曰。曾算。又問汝命盡幾時。曰。盡今日。因殺之。子孫猶存。賜扇焉。

全寅。安邑人。少警。學易卜筮。以京房斷占。輒奇中。正統中。隨父清大同。英宗北狩。令大同守閭。裴當問全筮。得乾之復。寅密附奏曰。大吉。夫四初應也。初潛。四躍。明年歲在午。其干庚午。躍候也。庚更新也。龍歲一躍。秋潛。浹歲也。明年秋。駕當復矣。由勿用應。或之。或之者。疑之也。還而復也。幽然象龍也。數九也。四近五。躍近飛。龍在丑。曰赤奮若。復在午。午色赤也。午奮於丑。若順也。天順之也。其於丁象大明也。位於南。火方

也。寅其生也。午其王也。壬其合也。其復辟也。其當六年之後歲丁丑月寅日午合於壬乎。英宗心識之。寅至京也。先犯京城。將官召寅筮曰。敵無能爲。彼驕我驍。戰必勝。敵果敗。庚午也。先行成。朝議未堅決。寅勸石亨協謀於謙迎駕。以太上皇居南城。已而錦衣使盧忠上變告密。筮寅所。寅佯不知者。驚曰。是何占也。而凶若是。不滅族且殺身禍已種矣。奈何。忠大懼。伴狂事不得竟。忠卒坐誅。丁丑正月壬午。駕出南城登極。召欲官寅。辭乃範金陰陽神靈四字爲筮錢十有八。貯之牙合。賜之。會清以指揮出蒞徐州。上留寅京師。授錦衣百戶。寅又辭不允。時石亨大貴。幸寅每筮戒持滿。石不悟。及禍。公卿大夫喜接寅。寅語不及私。大抵抑邪與正。拯人顛阨。年九十卒。

皇甫仲和有異術。居京師。負重名。正統十四年。有旨親征。大學士曹鼐急歸。召與議。曰。胡王兩尙書率百官諫。可止乎。仲和曰。不能止也。紫微垣諸星皆動矣。曰。事將若何。仲和曰。以老夫計之。當先治內而後行。曰。已有旨議。監國某。仲和曰。不如立儲君而後行。曰。東宮幼。且未易立也。仲和曰。恐終不免。方遭土木之難。敵騎逼城。城中皆哭。仲和登高望。謂家人曰。雲頭不向南乎。曰。然。大將氣至。敵將退矣。明日。楊洪至。自宣府。石亨至。自大同。入援。敵遂遁。仲和一日出朝。有衛士見之。曰。願爲我相之。仲和不肯。罔請之。仲和曰。若不能正內。何相爲。衛士怒曰。何以知我不能正內也。曰。汝不有妻妾乎。曰。然。曰。二人正相鬪。不解。衛士不信。至家。果然後。又問仲和何以知之。終不言。所以堂上官固問之。乃曰。彼問時。見堂上兩鵲正相鬪。是以知之。其術神妙如是。

萬祺南昌人。少遇異人相之曰：有仙骨，否則極貴。因留一書與之，乃祿命法也。於是研精，以下公卿貴人。多奇中。景泰間，以吏胥辦事吏部，衆奇其術，薦授鴻臚序班。既而景帝不豫，有議召襄藩者，石亨以問祺。祺曰：皇帝在南宮，奚事他求？刻期復辟，與全寅筮占及徐有禎迎駕觀象合。英宗既復位，召見文華殿，即日擢驗封主事。累進員外郎中。曹欽反，執玉勦李賢，時祺在旁，欽問對之曰：公勿負國，宜以死上謝，則自求多福。又徐謂曰：尊翁碑文，非李公筆耶？公當勿忘。欽俛首。其兄鐸曰：萬君言是也。王李二人獲免，事平。上聞而壯之，召祺賜宴勞陞太常寺卿。

袁琪附子
忠徹傳

琪字廷玉，鄞人。琪智悟迥絕，術相通神。在元時嘗遊東海，普怛洛伽山有僧曰古崖善相，見而悅之，謂其眼光如電，法當以術顯，因給令仰視赤日，待兩目盡眩，潛布黑豆於暗處，使辨之。又夜懸五綵絨線窗紙外，使映月光，別有色，所試皆中。然後授之術，且曰：子後當出我右，慎勿輕洩，遂以相著名。適元亂，琪亦不輕以試人。然遇者言吉凶屢中。洪武初，遊至嵩山寺，遇僧道衍，謂曰：甯馨胖和尚乃爾耶？目三角，影白，形如病虎，性必嗜殺。他日劉秉忠之流也。建文在東宮，召見，命相對言害氣在西北，當預備之。後道衍選入侍燕，王預密謀，言琪於王，王亦素聞其人，乃託以勾逃軍爲名，洪武丁丑，以幣徵之。琪至燕，未許見，乃先選衛士中長身多髯貌與王類者九人，王雜其中，俱微服適市，拉琪入酒肆飲。王位列第三，琪見王，卽引

前俯伏呼殿下。衆哂其妄。珙言愈切。王起還宮。召珙入見。珙曰。殿下召臣。而於肆酒相見乎。王詢其所由。識對曰。殿下入肆時。手操弓矢。臣望見知之。皮皺而瘦。龍掌無肉也。更使詳視。珙稽首言曰。太平天子也。龍形鳳姿。天廣地闊。額如圓璧。伏犀貫頂。日嚴中天。五岳附地。重瞳龍髯。五事分明。二肘若肉。印狀龍行。虎步聲如撞鐘。足底龜文。有雙黑痣。年交四十。髻過於臍。當登大寶。必爲二十年天子。王大悅。遂館於道衍僧舍。旣而語流聞京師。王懼有他虞。歲己卯。遣還鄉。無何。燕兵起。爲里人周繼祖訐告。械赴京。詔宥之。取其相書以進。壬午六月。太宗卽位。召至京。拜太常寺丞。賜賚甚厚。時建儲。上意有所屬。持議久之。命珙相仁宗。曰。後代人主。又相宣宗。曰。萬年天子。議遂決。太宗又出宋元諸帝容令相之。珙見宋太祖太宗。曰。英武之主。及真宗至度宗。曰。此皆秀才皇帝。元自世祖至文宗。曰。皆是喫縣羊肉郎主。見順帝。則曰。又是秀才皇帝也。太宗大笑。厚賜之。他日。見仁宗於東宮。問曰。吾壽得幾何。曰。過七七之年。天壽無疆。及己巳。竟如其數云。永樂庚寅卒。賜葬祭。人稱爲柳莊先生。子忠徹。有美質。世其術。亦緣父得侍太宗。先是。燕兵起。嘗一日。宴耿璣景清及三司官。密令忠徹行酒相之。宴徹告王曰。宋忠年五十四。面方五大。身短氣昏。張昇年三十六。面方五小。行步如蛇。謝貴年三十一。擁腫早肥。而氣短。俱主行禍。景清身矮聲雄。耿璣骨插鬢。色如飛火。皆凶相。不足憂也。後歷歷應。初。忠徹管入濠城。有徐氏生子。適三朝。方浴而啼。忠徹聞之。曰。是強盜也。徐怒。幾欲捶之。其子旣壯。以探丸論死。如此類甚多。官尙寶司少卿。時仁宗居東宮。惡其言常不遜。及卽位。欲誅之。夏元吉曰。忠徹固當罪。禮。父母所愛。待之終身不衰。今山陵未畢。刑近侍臣。不

可。乃罷其官。

王賢、廖均卿、金世忠傳

王賢，甯陽人。少時嘗夢人授之書，讀吾書，可衣緋，不讀吾書，止衣綠，覺而異之。數日，路得一書，視之，青鳥之說也。漢王有異志，遣人購之，不往。曰：欲得予，非詔旨不可。漢以名聞，時太宗有事於壽陵，乃遂取以往。與廖均卿同定長陵，對面有小阜，勸上去之。曰：恐有妨於皇嗣。上問無後乎？曰：非也。但自偏室出耳。上曰：偏室何妨？遂不去。後累皆驗。自卑秩歷遷順天府尹。輦轂之下，兵民雜處，賢不剛不柔，釐奸剔蠹，一處以公道，人見其嚴重，亦不敢以非禮干吏民。大化之嘗以柴炭爲民病，走語工部尚書石璞曰：京民勞疲極矣。今採運夫役與眞保諸郡等，無乃不可乎？璞默然，爲遞減之。又惜薪中貴縱其下非法凌府屬，叱跪於庭，熾火圍之，賢聞趨至，縛其人，欲以聞。主者溫言謝，乃釋去。一日坐公堂，有懸金牌直入，稱權勢，索板席若干。賢曰：明日來取，察知其詐。及至，執之，寘於法。其處事多類如此。景泰六年，考九年滿，乞致仕，不許。加正二品，仍尹順天府。又五年致仕。

廖均卿，江西人。精地理。太宗擇壽陵，久不得吉壤。永樂七年，仁孝皇后尙未葬，禮部尙書趙玘以均卿至，幾輔相地。人言房山有與龍地，均卿相之，曰：此公侯地耳，不用。又至昌平縣，徧閱諸山，得縣東黃土山，最吉。曰：勢如萬馬自天而下，此眞帝王陵也。太宗卽日臨視定議，封爲天壽山，命武義伯王通等董役，授均卿官。

金忠初名世忠。鄞縣人。精於卜居地。居韓嶺。洪武中。同邑袁廷玉以相名。一日過縣前。見一婦人乳女於榜廊下。哭聲慘甚。廷玉就詢之。婦人告曰。夫當戍趙州。今在酒肆。旗軍飲畢。卽行矣。言旣。復哭之悲。袁心憐之。往見其夫。夫曰。我韓嶺金世忠也。素以卜地度日。今缺戍爲族人賂旗軍。以我代行。袁相之曰。此尙書骨法也。他日當大貴。此行勿憂。因貸償其酒值。卽貸米二斗贈之。別告之曰。登州卽順境。他日富貴無相忘。旣而舟泊西渡。共濟者病腹疼。金與之卜。言用衣帶刮喉下卽愈。如其言。果瘥。驚爲神。因厚謝之。以故旅資不匱。至戍所。開卜肆。以奇驗聞於燕邸。召至問吉凶。卜云。吉。遂署爲紀善。侍帷幄。用其謀。有成。後官兵部尙書。永樂三年。冊立皇太子。兼詹事府詹事。尋卒。贈少師。諡忠襄。子達。年十七歲。授檢討。還鄉支俸。以幼童廕官自此始。

于梓人冷謙傳

于梓人者。武岡州人。其父嘗夜夢梓潼神。遂能雕塑神像。極其工緻。梓人生七八歲。眉目如畫。資性聰警。其州將愛之。因其父藝。以梓人名之。及長。有雋才。且多異術。舉洪武乙丑進士。歷知登州府。有訴其家人傷於虎者。梓人命卒持牒入山捕。卒泣不肯行。梓人答之。更命他兩卒曰。第焚此牒。山中虎自來。兩卒不得已。入山焚其牒。火方熄。而虎隨至。弭耳帖尾。隨行入城。觀者如堵。虎至庭下。伏不動。梓人厲聲叱杖之。百而舍之。虎復遁。故道去。尋爲部民告訐。以爲妖術惑衆。詔逮下刑部獄治之。數月。殫死獄中。棄其屍。家人發喪成服。一夜。忽聞扣門聲。問爲誰。答曰。是梓人。家人驚以爲鬼。曰。吾實以間逃去。云死者詐也。勿疑。

家人不信。謂鬼衣無縫。驗之乃不然。遂內之。梓人不自晦匿。日與故遊宴。或泛舟不用篙楫。逆水而上。以爲樂。里人劉氏。其怨家也。執而繫之。白知州伍芳。請奏聞。芳不許。劉遂詣闕告之。朝命法官來州推案。未至一日。忽失梓人所在。但存鐵索而已。劉無以自明。竟坐欺罔得重譴。而梓人自是不復見云。梓人自號七十一峰道人。詞翰適逸可觀。

冷謙字啓敬。武陵人。號龍陽子。元中統初。與劉秉忠從沙門海雲游。博學精於易。尤深邵學。及百家方術。靡不洞習。至元間。秉忠爲相。謙乃棄釋從儒。雪川交趙孟頫。嘗同於四明。故相史彌遠家。觀李思訓畫。因契之。遂以善繪名。後過淮陽。遇異人。授中黃大舟。傳張氏契真之旨。迨至正間。年百餘歲。如童顏。以避亂金陵。日市藥。多神效。入明。太祖徵拜太常博士。正樂律樂器。甚當。上意嘗館於京。因逆旅人貧。謙就數給之。未有處也。一日。卽館壁畫爲公門狀。語館人曰。吾與爾同入。慎無將帶片物遺落。館人如戒。謙引手推門。挽之入。見大帑金寶百貨充牣。謙令恣取之。同出。如是數數爲之。其後館人入。遺一路引。比出。驚視之。亡之矣。謙曰。爾遺物矣。爾則不終。吾亦從此逝矣。遂入壁。不復見。初。內帑屢失物。守吏數被誅。於是得引捕館人研實。乃正其辜。而謙竟莫得。

王冕周元素吳偉王紱唐寅沈周傳

王冕字元章。會稽人。貌魁偉。資敏志奇。其父不之識也。七八歲時。受父命。牧牛壠上。棄牛入學宮。聽諸生誦書。暮乃忘其牛而歸。父怒杖之。他日命往。復如是。父遂不理。冕往依寺僧以居。夜執筆坐佛堂。映長明

燈讀書，兼學數，遂成通儒。尤工於畫，其所爲梅花，斷縑尺楮，人爭寶之。每畫，多自書所題於上，屢應元進士，不第，竟棄去。買舟狂遊，北入燕都，館於祕書卿秦不花家。秦不花欲薦以館職，冕歎曰：「不滿十年，此中狐兔遊矣。」去之還鄉里。時海內無事，對人輒言天下將亂，乃攜其家往九里山隱焉。結茅廬三間，自題云「梅花屋」。耕田讀書，嘗傲周禮，著書一卷，祕不與人觀。每更深人寂時，輒執燈朗誦，既而撫卷歎曰：「吾未即死，持此一遇明主，伊周事業不難致也。未幾，汝穎兵起，一如所言。」元至正庚子，太祖兵定婺州，將入越，物色得冕，應制題梅詩有云：「獵獵北風吹，倒人乾坤無處不沙塵。吳兒凍死長城下，誰信江南別有春。」上覽之，大悅，授以資議參軍，甚見眷注。以病卒，人謂其磊落有大志，不得少試以死，又目之爲怪民云。

周元素，太倉人，善畫。太祖一日命畫天下江山圖於便殿壁。元素頓首曰：「臣精能繪事，天下江山非臣所諳。」陛下東征西伐，熟知險易，請陛下規模大勢，臣從中潤色之。」太祖卽援毫左右揮灑，顧元素成之。元素復從殿下頓首賀曰：「陛下江山已定，臣無所措矣。」太祖笑而頷之。

吳偉，江夏人，少爲農，忽遇一羽士，言爾有異骨，當享大名。旦日於豬市大石上相會，至則命坐石側，袖出一鐵錐，刺石傍，出泉一線，命偉掬飲之。乃曰：「任爾學藝，名聞天下，遂不見。」偉後學畫，專十二科，山水人物入神品，性巖直，交與甚寡。成公延見，以小仙呼之。後自識小仙，憲宗召至闕下，授錦衣鎮撫，待詔仁智殿。有時大醉，蓬首垢面，曳破阜履踉蹌行，中官扶掖以見。上大笑，命作松泉圖，偉跪翻墨汁，信手塗抹，而風雲慘澹，生屏障間。上歎曰：「真仙筆也。」偉出入傲慢，權貴求畫，又多不與。於是權貴人數短之，居無何，放歸。

南都日喜從諸豪客競集妓館劇飲。孝宗卽位，復召見命畫，稱旨，授錦衣百戶，賜章曰畫狀元，後稱疾歸。武宗復遣使召之，使至未就道，中火酒死，偉挾一技，辟召者三，獎借賜予，浮於大臣，人以爲榮遇焉。

王紱字孟端，常州人，性介，博學能詩，所交皆一時名士，遇流俗輒白眼視，尤工於畫，凡山水竹石稱絕。未仕時，士遇名畫人不易得，後被薦爲中書舍人，於京邸夜聞洞簫聲，遂乘輿寫竹石一幅，詰旦尋訪吹洞簫者，大商也，因以遺之，商人大喜，拜受。越數日，具駝謁段乞配幅，孟端厲言曰：「俗子何足當吾筆，亟索前幅而碎之。」一日退朝，黔公從後呼之，紱不爲應。時同行者告曰：「黔公呼君，紱云：『吾亦聞之，必其與吾索畫耳。』」黔公追及，果然，紱亦不答。黔公又造其第，乃數年後始作一幀，且曰：「吾不可直致，西省平仲徹者，吾故友也，吾且寫寄之，待後與求耳。」其介如此，其畫人多寶之。

唐寅字子畏，一字伯虎，吳人，以諸生舉鄉試第一，當赴會試，而有所同載者，以賄主司得題事，株累，罷爲吏，謝弗就。寅才高，少嗜聲色，旣坐廢，見以爲不復收，益放浪名教外，嘗一赴甯王宸濠聘，度有反形，乃陽爲清狂不慧，以免。卒年五十四，始爲詩，奇麗自喜，晚節稍放，格諧俚俗，冀託以風人之指，其合者猶能令人解頤，畫品高甚，在五代北宋間，人多寶之。

沈周字啓南，長洲人，自號石田，晚更號白石翁，以處士卒。年八十三，周博學，無所不通，喜爲詩，其源出白蘇，兼情事，雜雅俗，當所意到，營壘不得休，書法雙井，砭砭未化，至畫法蒼老，久而天下愈寶之，以爲北苑巨然徐熙父子復出，元諸賢勿論也，顧因名重，贖本四出，得其真者甚鮮。

明書卷一百五十二

列傳十三

列女傳

史官論曰。夫驚飈隕棄。則貞卉明心。枉渚奔流。斯井渫著潔。粵稽上世。周南無行露之女。衛國有靡他之婦。此則王道之行也。若乃教化微缺。風俗凌替。朝無貞臣。野鮮志士。而之子少長委巷。目不識彤史。耳不聞保訓。奮乎帷牆之中。立於刀鋸之側。成仁取義。蹈死如歸。此則丈夫之所難。而巾幗之女。無少自紆曲。夫食人之食。而躋嵬顯。視此何如也。嗚呼。可以爲豪傑矣。前史博采懿風。如樊姬孟母之良。歲少君德。隴之隱約。龐娥曹女之殉親。皆卓然裨益世教。操雖不同。其性一也。嗚呼。吾疑人性之有無久矣。至傳列女。而後知仁義之果出於性也。無他。未嘗學也。

郃氏花雲妻。時雲方戰急。有一子。僅三歲。郃祭家廟。會家人泣曰。今城且破。吾夫忠義人。必以身死之。吾夫死。吾必不獨生。然不可使花氏無後。嬰兒在。若等善撫育之。聞雲被執。郃赴水死。年三十五。侍兒孫瘞屍抱兒以行。僞漢軍擄之。至九江。軍中惡養小兒。逼投水中。伴諾。乘間授漁家。脫簪資令善視之。尋明兵破友諒。孫往漁家視兒。故在。闕漁人出。負以走。夜宿陶穴中。天曙。僦舟渡江。遇債軍奪舟。棄江中。孫抱兒。

遇斷木浮至。附入葦洲。探蓮實哺兒。七日不死。夜半聞人語聲。呼之。逢老父。號雷老。告之故。與俱行。明年二月。達太祖前。孫泣抱兒拜上。上亦泣。寘兒於膝。曰。此將種也。賜雷老衣帛。遣之。復其徭。忽不見。兒八歲。賜名煒。侍皇太子就學。年十三。授虎賁右衛副千戶。後七年。拜指揮僉事。偕孫氏至太平。奉郃骸骨。東草像雲葬之。世宗初立。其五世孫遼東復州衛指揮僉事。請於朝。郃氏贈貞烈夫人。孫氏安人。立祠致祭。二女者。方孝孺之女也。當孝孺死時。二女年俱未笄。被逮。過淮。相與投橋水死。王宗元曰。孝孺篤學守道。矢死君難。精誠熏浸家庭間。雖小女子。臨變赴義。視死如歸。不懼不回。與孝孺伯仲之死。同時爭光云。胡郡奴。大理寺少卿胡閏女也。胡閏在忠節傳。收閏時。郡奴方四歲。母任縛就刑。郡奴自懷中墮地。有一卒提入功臣家。付爨下婢收之。郡奴昏睡。夢與父母相持泣。覺則抱一貓臥也。稍長。識大意。髮至寸。卽自截去。日以爨墨汚面。禿垢不作人狀。苟活二十餘年。功臣家不以人類畜之。永樂二十二年。赦諸死事者。苗裔。郡奴得與同難女流乞丐歸鄱陽。依姻家老嫠王安人居。誓不有家。鄉人憐之。餽遺不絕。郡奴所受。免死而已。年五十六而終。尙處子也。鄉人謚曰忠允貞姑。萬歷中。饒州知府楊際會。祔祀於父祠。宗室知恚。娶賀氏。生三女。患病革。度不起。賀卽潛靜室自縊。家人驚救之。後吞水銀求死。又救之。遂閉口不食。亦不言。與恚同時卒。慶成王以聞。世宗嘉其節。詔旌之。

肅府沿山王繼妃楊氏。未配。王薨。楊願入府奉姑。守節終身。嘉靖二十八年九月。巡按御史題其貞烈。詔楊氏准封沿山王繼妃。入府守節。

梅氏東安人年十八適士人謝黑兒夫疾篤囑曰爾年少勿爲我慮梅泣下欲自盡以隨姑覺而止之曰吾夫婦無他兄弟備養況汝娘未媿倘得一子以續吾祀豈不美乎梅悟後果生一子夙夜紡績奉舅姑課幼子舅姑卒脫簪珥以襄事其子俊亦成立孀居四十餘年有司以聞宣德間旌表其門

房氏鉅鹿人爲魏溥妻溥病革顧房曰死不足惜但母老家貧赤子蒙眇房垂泣曰母慮母子在妾一身溥卒房操刀自割左耳置棺中曰鬼神有知相期泉壤終身不預燕席事姑敬養訓子成立後孫爲濟南太守

崔氏真定深州周傑妻洪武間傑任兵科給事中以疾沒崔氏奉骸骨歸奠祭畢告其親戚曰夫婦義當同穴今夫死我無生理遂經死合葬

高氏真定深州人適清河李茂茂充吉安衛總旗墮馬臥病高氏奉湯藥不離左右茂亡悲泣甚哀乃盡散家貲爲喪具復買一間棺置尸側至夜沐浴更衣自經死與茂合葬事聞詔旌表之

岳氏深州岳興女適傅嘉嘉病革呼岳曰爾年少善事後夫岳涕泣曰吾豈忍事他人甯俱死及嘉卒岳憑尸號哭遂經死合葬之事聞表其門曰貞烈

施氏定州衛百戶何毅妻年二十一生子甫二齡毅死哀痛漿水不入口欲自殺姑知有孕勸咀之後生子舅姑親戚憐其少欲嫁之施曰夫亡子幼況舅姑年老無依可適人乎遂奉舅姑以終撫二子至於成立年六十二歲事聞旌表

陳氏牛氏高邑人洪武初監察御史許顯之妾顯病卒二妾皆自經死事聞旌爲雙節。

吳復妻張氏金陵民家女復爵安陸侯守黔陽以疾亡張氏自縊以殉太祖親降手敕封爲貞夫人。

孫氏劉彥陽妻高瀛人彥陽授平江倉官卒於任值兵亂孫與一子二女守旅櫛城陷子死於兵孫不從。

遇害賊脇二女二女給賊爲埋父母至江濱皆赴水死詔旌表之。

陳忠妻王氏江東人忠爲都指揮守交趾王隨之會黎賊叛忠陣亡王與二女登竹筏出交趾東海城進

海門潛賂賊徒收忠尸殮之扶柩浮海南歸以葬後毀容紡績度朝夕卒與忠合葬鄉人譁夫妻忠節兩

不愧云。

鄭瑾妻袁氏六合人年十八受鄭聘而瑾得奇疾不得治袁告於父母歸鄭侍夫疾二年不懈及歿求自

盡家人救之不死曰我一寡婦耳留此何爲聞者感泣吏尙書蕭山魏驥作鄭節婦傳。

俞氏顧春妻春患病將革與俞訣勉其守節俞號泣不止因以指抉雙目不得出乃以翦先刺其左目又

欲刺其右姑奪其翦諭曰汝欲養舅姑育二子留一目可也俞乃止遂守節終焉。

鄒氏適葉芸成婚僅兩月芸卒鄒毀容誓死不出房限不見男子姑曰如火盜疾病何鄒曰火至委軀灰

燼盜至先自刎疾聽其死不得令醫診察如是終其身。

趙氏女北京人幼有令質刑部尙書張瑩爲次子昱聘之未婚而昱卒父母將嫁之女曰我聘於張又誰

適乎姑衛夫人迎歸華亭守制終身弘治中旌表。

何氏女華亭人。楊允修妻。未婚而夫卒。父母強令再適。不從。何自往夫家。守制終身。以盤車傳餐。家人亦莫覩其面。壽七十。事聞。旌表。

金氏。上海庠生金應登女。美姿容。隆慶中。嫁富人徐茅爲妻。茅性好賭。宦家悍奴因誘之。家遂傾。復誘其鬻妻。因獻於主。主遣數十人。要迫之。金氏義不受辱。自縊死。

吳氏。江陰人。華緯妻。正德壬申。避賊。賊追及。吳詐仆負塗。賊繫之。問曰。洗塗。曰。不洗。更衣。曰。不更。且詈曰。汝當速殺我。我江國公勳臣家女。奈何污耶。明日。又問。答如之。賊怒。爭刃之。沈於江。

萬敬妻史氏。金壇人。適敬未閱歲。敬得惡疾。終。家人依俗火葬。史躍入火。衆救獲免。瘞畢。自經。詔旌表。復其家。

高氏婦。高野人。攜其女從夫避亂。見道旁空舍。入其中。賊將迫。脫金纏臂與女。且語夫令疾行。夫挈女稍遠。乃解足纏自經。賊至。焚其舍。夫抵儀真。夜夢婦告曰。我已縊死。彼舍其精靈如此。

陶氏。四節婦。桐城人。陶鏞妻。鏞子繼妻方氏。繼子亮。領景泰癸酉鄉薦。妻王氏。妾吳氏。鏞繼俱早喪。鍾方各守節。亮亦早卒。妻妾共守一室。抗節終身。詔表門曰陶氏三世四節。

汪世衡妻戴氏。桐城人。正德間。遇流賊。欲驅掠之。戴抱樹不動。賊以刀厲頸。戴厲聲曰。何不速殺我。賊怒。遂殺之。

張友妻洪氏。歙人。友死。預治塋。誓必同穴。姑憐其早寡無子。欲嫁之。不聽。乃陰納富人聘。至期逼之。洪曰。

嫁不辭。常與夫別。乃造夫墓。慟哭而歸。拜姑告別。入室。閉門自縊。

李氏。桐鄉人。年十八。適高逾。生子熊。方期而逾亡。家貧。舅姑相繼亡。往依母居。母諭之改適。輒慟絕。母止。不復強。熊長。娶曹氏。無子。爲置妾陸氏。甫得子。熊又亡。曹與陸皆勵操事姑。以撫幼。兩世三節。

沙氏。主事郎理妻。吉安人。洪武初。從夫官京師。理死。沙哭曰。夫爲忠臣。妾獨不得爲烈婦乎。遂自經。賜祭。馳驛歸葬。

石門。烈婦。湖州人。莫知姓氏。正德初。湖饑。婦與其夫及姑走崇德石門市乞食。婦有殊色。市人欲挑之。與之食。不願與之財。亦不願寓東高橋上。伺夫與姑不至。及三日。聚觀者益衆。乃從橋躍入水中以死。

石氏。金華人。諱勝。浦江義門鄭洪妻。洪爲內藏庫提點。以他累死獄。石乃絕粒不食者八日。求死不可得。遂引繩自絕。太祖聞而歎曰。此真義門婦也。

陳氏。永康人。王和欽妻。年二十九。夫亡。遺孤歲餘。苦志守節。勤以自給。孤德中。性至孝。一日。東門失火。德中向火稽首。火遂西轉。人謂孝所感。詔旌其門。

蔡儼妻包氏。宣平人。正統中。鄉寇作亂。包從舅姑避難東巖。被執。給賊曰。我有金銀藏巖穴中。當往取之。賊以爲然。同至其所。遂自投崖以死。事聞。旌表。

葉孔賓妻鄭氏。青田人。孔賓以父卒於官。迎喪。覆舟死。鄭年二十有三。遺子十月。矢心自守。其妾何氏年猶少。鄭謂之曰。我守夫家。汝無子。宜自擇也。妾曰。主母旣以節守。妾當奉承以全其節。何以出爲。相與同。

處年各八十餘。時人謂之雙節。

潘氏妙圓。山陰人。徐允讓妻。元末兵變。允讓與潘奉父安避山谷。遇寇。斫傷安頸。允讓呼曰。汝寧殺我。勿殺吾父。寇捨安殺讓。將辱潘。給曰。吾從必矣。若能焚吾夫。吾則無憾焉。寇爲聚薪焚其夫。火方烈。潘赴火死。安始獲免。詔旌之。

竇氏。餘姚姜榮妻。京師人。榮判瑞縣。護郡符。時華林賊攻陷其城。突入郡堂。竇匿其符。而榮未之知也。賊竟擄竇以行。去之數里。賊中有一郡民求歸。賊許之。竇乃密語以符之所在。俾歸以告榮。再行。見道傍有井。給賊求飲。遂投井以死。

吳江妻李氏。餘姚人。舅與夫俱瘦死。姑幸存。有澄水黃姓者。謀娶之。李誓死不從。黃乃通其父。詐稱母暴病。迎李歸省。陰令肩輿者輿至黃氏。及出輿。則非母家。姑亦徐至。李度不可脫。乃從容請湯沐。湯具。求如廁。久之不出。闢廁戶視之。則已經矣。

馬德真。山陰朱偉妻。家病疫。舅與夫偕亡。姑張氏亦病篤。德真艱難萬狀。待姑疾少愈。而母家欲奪其志。德真斷指爲誓。屹不肯從。及姑歿。德真撫膺大慟。殮畢。明日死之。

陳氏名真。黃巖程友德妻。洪武間。以軍生至京。鎮撫陸林見陳美。欲污之。不從。百計脅之。陳愈嚴厲。遂被毆而死。夫訴於朝。林以罪誅。

林汝殷妻王氏。黃巖人。生二十。歸林。未幾。汝殷卒。里人欲娶之。王斷髮以死自誓。其父母防之。且勸之力。

王佯許既而防者少懈。乃陰囑侍婢分其嫁服。一歸其母。一予其妹。一以爲殯殮之具。遂自經死。

陳氏名小奴。臨海人。適王三狗。一日。其夫爲虎所攫。卽攘奮悲號而往。虎驚駭。舍之去。負夫以還。夫死未幾。有欲納爲妾者。陳不從。乃強致聘物。促迫以歸。陳度不免。亟走姜巖。自投而死。

熊氏名審奴。豐城人。余繼妻。年二十一。歸繼。繼疾。度不能起。語以備後事。熊出篋中衣對繼紉定。每襲爲二。泣且謂曰。卽有不幸。吾當服之以俱死。不能獨生。繼卒。熊視殮畢。聞家人議舉棺焚化。卽衣所紉衣期赴火。家人察其意。防之少懈。卽自經。與繼同日合葬。

陳氏豐城人。謹姪妻。姪爲江州巡司掾。流寇掠其境。姪被執。陳氏同女壽華。俱美色。賊欲污之。遂殺姪。陳指賊厲罵。賊怒。又殺之。壽華哭抱二屍。以血塗面。籲天而呼。復厲聲以罵。賊又殺之。有司奇其節。聞之。旌表。

徐氏豐城都御史吳祺繼室。又妾張氏李氏。俱芳齡。徐事姑以孝聞。嘗從祺北上。抵河西。忽祺墜舟。徐躍出。俱下水。頃抱以出。祺逝。奉榱泝長沙。風烈舟顛。危甚。徐哀哭。籲天。舟乃定。李無出。張嗣孩提。或有以他意諷之者。徐曰。婦人夫死。稱未亡人。無再醮禮。守適。各惟所志。張與李泣曰。烈女無二。肯憚一死。辱大人於地下。茹苦服縞。共撫其孤。事聞。旌表。

陳氏樂平人。徐德安妻。年二十。夫病革。曰。汝年少無子。我死。汝更善事他人。陳泣曰。旣爲君婦。尙忍事二姓乎。卽割耳翦髮爲誓。夫死。納之棺中。終身不改節。詔旌表。

吳氏，葉梁妻。正德間，盜起，梁被創垂死，屢目吳，意以吳年若貌，必有奪其志者。吳知之以爪碎其容，又斷二指納棺中。後母家欲他適，不食而死。

團氏，上饒鄭贊妻。桃源賊至，團度難免，使夫舁其姑先走，自負子從之，不及，被執，賊欲污之，給求緩，乃并其子俱赴水死。

祝氏，鉛山人。傅岡妻。岡歿，祝年少，姑議改嫁，祝泣辭甚確，姑竟欲奪之。聘至，祝佯爲閉門檢筋狀，竟赴河邊，抱石入水而死。是秋大旱，知縣張昺禱不應，乃集耆老問故，有以祝氏節義告者，昺卽具牲醴爲文親詣死所奠之。是夕大雨，祝之死節處水深莫測，後湧成洲，俗呼爲節婦洲。

劉氏，名玉蘭，彭澤人。年十八，適同邑民計偉，越五載，夫亡，哀痛殊切，圖與俱死。旣而翁舉夫喪，劉泣告，願少留，乃移別室，停之。劉苦塊以居，悲號傷心，嘔血數升。父母恐，遷柩藁葬。劉曰：「吾今得死期矣，遂不解衰經，七日不食而卒。」舉其屍，見袖中所遺巾帨，皆夫之遺物。

譚氏，南豐人。年十九，適傅志華。閱九月而夫卒，居喪守節，事舅姑益謹。父娶繼母，悍戾，譚逐諸子，譚規練憾之，謀奪其志。密聘鄉人戚姓者，而譚不覺。一日，誘之歸，見戚備妝具，請期。哭謂父曰：「夫死肉未寒，何忍爲禽獸之行，亟潛匿於樓之複壁，累日不進水漿而死。」

揭氏，廣昌人。高宏妻。宏以較藝卒，建昌家僮歸其喪，揭迎於邑之東門外，哭拜畢，遂自肩輿，襯如男子表。歷者然，旣殯，朝夕哀哭，屢絕而甦，越月餘，以鎖鑰納兒袖中，誘之出戶，遂自縊死。旌表之。

聶氏名妙真。樂安人。年十五。納同邑王所聘。未嫁而所亡。訃聞。涕泣欲往弔。父母不可。聶曰。兒雖未入王門。然既以身許之。不可再醮。遂闔戶自經死。以其喪歸王氏合葬焉。詔旌表。

陳氏。新淦人。幼納庠生黃體堅。堅謫吏金陵。賂書娶陳。父母欲易他女以往。陳曰。吾命也。遂遣歸。後體堅以誣誤棄市。累訴不得白。徒步收其屍。殮而瘞之。乃自經於柩側。學士曾榮贊曰。生以義歸。死以節殉。簡氏名祥貞。新喻簡啓女。適鄒濟泰。夫亡。父母欲改嫁。簡死誓不從。服闋。又私納采。簡持刀哭於濟泰靈右。斷二指。誓不再適。父母患之。乃止事聞。旌表。

易氏。清江縣諸生鄧介妻。正德乙亥。盜入介室。易奔出。遇賊。盡脫簪珥。祈免。賊執不舍。欲汙之。易結與偕行。賊不備。至江。赴水死。

羅氏三節。歐陽氏吉水人。諱壽娘。鵝田羅韞置妻。置卒。婦年少。長子篤溫。方三歲。次篤良。尚在妊。越四月而生。氏撫二孤。無他志。溫長。娶歐陽酉貞。生子甫。期而溫亡。良娶袁氏蘭秀。生子五。歲而良卒。酉貞蘭秀相告曰。姑爲節婦。我屬獨改節乎。協力共守。姑年六十卒。蘭年五十五卒。酉貞年幾九十卒。

王氏素英。吉水諸生周必登妻。年十九歸。必登必登。以疾卒。王氏誓與同死。不食數日。會母死。歸弔。一日。語弟曰。我死。屍還周氏。弟方出。忽以無疾終。弟如其言。還屍周氏。里人莫不慟之。

李氏臨汾張晟妻。晟爲乾州學正。卒。時關中兵起。道梗不能還。子文璠甫九歲。李紡績度日。兵稍息。遂與子徒步負骸骨歸葬。守志不易。詔旌表之。

孫氏，青城人，陳策妻。正德六年，流賊入境，策守東門拒敵，死之。孫守其屍，悲號不食，居數日，自縊死，合葬焉。事聞，旌之。

高氏，武城人，王俊妻。夫卒，與其妾蔣氏同縊死柩側。三人同穴而葬。旌曰：雙烈。

趙氏，汝上人，張鳳妻。夫疾，語趙曰：汝年少，雖有女，不可恃以終身。慎圖之。趙未答。夫方迷亂，將絕。趙卽縊死。頃之，夫復蘇，家人語故，夫遂瞑目合葬之。事聞，旌表。

李茂妻王氏，堂邑人。引治間，茂同吏焦讓輸稅京師，讓誘茂醉酣，夜分殺之，匿其屍。王聞，馳至京，擊登聞鼓，訴之，白其冤，負骸歸。事聞，旌表。

孫氏，陽武人，陳之英妻。英充飛虎衛小旗。弘治初，從北征，謂孫曰：吾生死未可知，幸有二弱息，汝肯撫育乎？孫曰：君能盡忠報國，吾母子弗煩憂也。英果死於戰，父母欲奪其志，孫泣曰：吾不忍背夫而生，卽欲自盡，父母懼，乃止。矢志終其身。

趙錢兒，膠州人，劉倫妻。正德六年，流賊入其家，值趙擣衣，奮椎擊殺二賊。會賊大至，遂遇害。旌表。

張二姐，陳留縣民，鄭瑁聘爲妻。未婚而瑁卒，竟以死殉，得合葬。事聞，旌表。

吳氏，封邱人，生員彭儀妻。儀卒，志不三載而姑亡，子死，其母欲改適。吳卽更衣沐體，潛行至夫墓，以手扒墓側土，崩尺餘，欲進不得，飲泣，淚竭血繼，衣有痕漬，自縊於棠樹。而時仲冬，棠復生花，盛寒不隕。人謂貞烈所致。事聞，旌表。

曹氏歸德人張琮妻琮卒曹給匠曰夫嘗囑我作棺必寬大匠如其言是夕竟自縊合棺而葬事聞旌表之

沈氏光州人郝昂妻夫亡沈年十九生男文宿甫一歲鄉人憐其年少子幼勸其改適沈焚香籲天斷左手一指誓不再醮始終一節旌表之

李氏寧夏人李承恩叛句寇著力免助惡括城中美婦獻之李罵賊不從子母五口悉死之

任氏吳景妻沔陽人景卒任誓以死守訓子欽十年不出戶姑病痿痺抱持左右寢處必借每夜焚香籲天願以身代姑歿竟絕葷蔬食比葬得二白兔人以爲孝感旌表之

程氏王谷樹妻澧人夫病篤刲股啖之夫遺命適人程翦髮誓無他終身足不踰闔旌表

靳水烈婦陳氏甫十四適鐵匠周世文姑寡贅夫蔡鳳鳴旁又通於僧嗔婦不肯已令鳳鳴及僧百計誘之而身作威力搖撼不已鳳鳴遂強持婦婦力拒堅不從歸以語其父東陽冀助已父反謂當從其家俗於是自誓必死謂太姑曰兒不能爲狗彘必死太姑慰諭給以不死是夜自縊死七日姑暴死鳳鳴避走英山中不踰月亦死始婦死鄰黨喧傳觀者如堵無不揮涕烈日中面色如生

賈氏潘耀卿妻沅陵人爲諸生正德中挈賈省父於南京至湖口卿卒賈卽赴水女奴持之旣見舅姑入室自縊以救免自是減食凡四十餘日絕食者累日竟自刎應天尹以事聞受旌

袁氏龍安人嚴庸妻事舅姑孝姑疾侍湯藥庸補諸生因歸省墜與文棧道溺死袁年十八亟趨大溺處

尋屍不見。大哭。亦投水死。兩月不得屍。後漁人於沙回頭河得二屍同處。人以爲節義所感。事聞。旌爲貞烈。

許氏。同安人。生員洪伯大妻。數年無子。勸伯大娶妾陳。生二子。伯大遘疾。許水漿不入口數日。泣誓曰。君不起。妾寧獨生。及卒。許爲殮畢。收遺書付陳。囑以善撫幼穉。陳初不覺。許遂潛入臥內。自縊而死。

應氏。建寧人。歸邱伯春。年二十。夫卒。號天願同死。自投池中。鄰婦援出之。氣息奄奄。忽斷左手指。置夫懷中。旣葬。旦夕慟哭。未幾。不食卒。合葬之。

雍氏。長泰人。黃伯英妻。夫亡。守節終身。嘗攜幼子負豆。至水濱置磨磨之。有廖姓者。奪其磨。雍氏號天。磨爲不轉。廖驚還之。人傳以爲異。

蔡氏。鄧華清妻。歸未一年。清故。剪髮斷衿。納柩中。遂絕粒七日而死。學道方應。選題旌。

萬氏。南海人。王受祖妻。洪武中。蘇友輕作亂。萬爲官軍所獲。獻於衛指揮盧諸。諸愛其才美。欲納之。萬號泣。投衣於火。諸怒。以刃試之。萬唾罵不輟。就死於南門外。聞者流涕。

黃氏女。名千金。潛山人。許嫁張大中。未嫁而大中卒。父欲改議。千金曰。天有二日乎。父卒。事母孝。邑中有求聘者。母許之。千金再拜而起。伏父木主前號泣。以簪刺目。逾三月而卒。時年方十九。旌之。

竇氏女。丹徒人。父母俱亡。許嫁之人。乃家舊僕也。成婚日。始識之。遂投井死。郡守義之。爲立石於釜鑿山前。以旌之。

黃善聰。成化中南京淮清橋女子。年十二。失母。有姊。已適人。其父販線香爲業。往來廬鳳間。憐其幼。且無母。不可寄食於姊。乃令爲男服。攜之旅遊者數年。後父死於客。女詭姓名爲張勝。有李英自故鄉來。亦販賣線者。勝遂與結爲夥伴。同寢食。踰年。恆稱病。不脫衣襪。溲溺必以夜。弘治辛亥正月。乃與英偕還南京。時年已二十。突然峩冠往見其姊。姊謂我本無弟。惟一女弟。隨父在外耳。胡爲來。乃笑曰。我卽善聰也。泣語之故。姊惡之。曰。男女同處。何以自明。汝辱我家矣。因拒不納。善聰不勝其憤。謂曰。妹此身要分明。苟有污。死未晚也。姊亟求懋。視之。果處子。始返初服。一日。英來候。善聰出見。英大驚愕。遂歸。快快如有所失。飲食頓減。姊曰。無憂也。以英猶未娶。且年相方。爲求婚。善聰不從。曰。此身若歸英。人其謂我何。鄰里強之。竟不肯。事聞。上下皆驚異。遂勸爲夫婦。人有歌之者。以爲木蘭復見於今。

陳淑貞。撫州陳璧之女。七歲。能誦詩鼓琴。陳友諒寇隆興。淑貞取琴鼓之。曲終。泣然流涕。曰。吾絕絃於斯乎。父母怪問之。曰。城陷必遭辱。不如早死。明日賊至。遂投東湖死之。時同郡李宗頤妻夏氏。亦以賊至投井死。

葉貞女。名兆娥。南昌人。聘新建李光庭。未娶。而光庭卒。女年十三。先期。夢光庭騎白馬衣素入其室。相攜補綴。覺以告媼母。越數日。赴聞。傷之。誓不改節。父母憐其幼。強爲轉聘。女聞之。卽於密室衣裝自縊而死。易妹貞。聘儀賓子楊鑲。未婚。鑲卒。妹貞聞訃。墜樓幾死。誓不再夫。奔弔楊氏。舟至河。索夫神主成親迎禮。用小竹簪抱主入柩。前行合卺禮。朝夕哭奠。及暮。夜焚香畢。自縊於夫柩前。事聞。旌表之。

張烈女名桂秀。浮梁小民。張啓明女。有殊色。聘凌氏子。凌日貧。落女。父母欲解盟。會郟門少年鄭天祐。以星術止其家。未有室。父母私許以女妻之。懼女素剛。不可動。乃俱伴出。屬天祐逼近女。覺。給天祐曰。俟沐浴以從。浴竟。執父所業。打縣槌。奮擊天祐。中其頤。昏眩仆地。女自縊死。

胡烈女名貴真。樂平人。父母生。欲不舉。鄰會母陳氏。鞠爲養子。天福配同乳之。甫長。天福父母與陳繼亡。家益窶落。女父欲奪爲富家配。女曰。我鞠於曾氏。婦於曾氏。分姑媳。恩母子。豈可以飢寒去。仍死。依從姑以居。雖華舍單淺。外未嘗識其面。女兄乘其未婚。撻曳以歸。出示求聘者。金銀并飾。卜日以行。女知不可免。潛浴更衣。入房縊死。時年十八。邑令張文應禮葬之。以事聞。旌。

張玘女名仙真。繁昌人。正德七年。流賊剽掠。仙真年十七。以護母疾不走。羣盜劫之去。至江潯。抱樹哭。義不受辱。罵不絕口。賊不能奪。乃衆磔之。

甘清秀。星子人。甘孟珊女。年十五。正德間。值逆濠變。賊入境。清秀隨母逃避。賊獲其母。清秀義不辱。即投玉京潭而死。賊退。屍浮水如生。里人收葬於山前。

雙貞女。不知其姓。盱眙何雄育爲己女。正德辛未。歲饑。雄欲鬻於娼。以賈厚利。二女知之。一夕。以巾聯兩臂。投淮河而死。嘉靖十年。詔立廟祀之。賜額雙貞。

姚貞女。孝感縣庠生姚貞之女。聘鄭一德。未笄。而一德卒。卽痛哭。欲躬視衾殮。其家不從。潛取鼠藥自噎。母覺。急灌水。得甦。屢自縊。皆以防護不遂。然兩目霍然。已血漬矣。竟往會葬。盤礴墓間。悲號不休。草土爲

溼。自是歸翁姑。稿容蓬首。足不出閫外。十有五載如一日。始鄰媪解之曰。汝未醮。何苦執婦義。女曰。義自盟始。卽未醮。將路人其夫耶。如媪言。何用盟爲。里以聞於當道。核得實。鍥其楣曰貞。

張氏女。舍山人。父誠。貧而無子。疾將革。張痛切。且恨以女子不能爲父後。遂籲天割股和藥以進。請以身代。父得愈。

劉氏女。名美玉。博平人。生員劉俊女。正德十六年。同父遇賊。殺俊女。以身翼之。賊脇女以行。女罵曰。恨不能殺汝。豈同汝行。奪賊刀。賊遂殺之。有司給葬祭。立石旌表之。

康孝女。濟源人。父友賢。年老無子。贅王珪爲壻。康勸母納妾。生子而乏乳。康亦生女。遂捨之。乳其弟。曰。父老矣。女可得。弟不可再得。母病。康嘗糞。夫早歿。誓不再適。時人稱之。

劉氏。新樂人。韓太初妻。太初仕元爲顯官。洪武七年。徙和州。劉奉姑甯氏以從。至南宮。姑仆地傷腰。劉刺血和湯以進。乃愈。至瓜州。姑疾再進。再愈。至和州。嚮蔬供養無違禮。姑患風疾。時盛暑。劉晝夜驅蚊蠅不怠。後姑病危。嚙劉小指。意與之永訣。劉不悟。斬指滴血。和粥以進。姑卒。殯之淺土。欲歸葬。五年。弗果。哀號常如袒括之日。事聞。召至京。厚賜之。官爲送甯氏喪歸葬。新樂旌表其閭。

甄氏。無極人。嫁欒城李大舅。早卒。事姑甚孝。大與其弟異居。一日。姑出。往次子家。甄隨侍。不忍去。姑命之還。甫三日。忽心動。舉身流汗。少頃。果有來告其姑病篤者。甄沿途拜禱。往至姑側。侍病數日而愈。後姑年九十一卒。合葬舅墓。甄廬墓側三年。旦夕悲慟不輟。里人稱爲孝婦。旌表。

何氏永嘉人。王木叔妻。王氏家淡泊。何佐夫起家。資用遂饒。一日語夫曰。子可出仕。奈子之弟妹貧寒。何囊中餘資。久藏奚益。夫曰。此吾素志。且日盡散簪珥。不遺木叔。既出仕。又曰。子之弟尙困。有田若干。何不畀之。夫曰。此尤吾志也。遂以田與弟。時稱賢婦。

周氏遂昌人。永樂間。許聘蘇仲善爲繼室。未行而仲善死。周遂號慟。至夫家。服衰麻。撫夫前室子。事姑以孝。年七十餘而卒。鄉里稱爲蘇老安人。

熊氏南昌劉天瑞妻。少寡。生子仲高。娶喻氏。亦少寡。生子觀。方四歲。熊自念嫠居艱難。諷喻曰。此熒熒四歲兒。安可冀望。喻泣曰。姑能不負所天。吾獨不能乎。前途明暗。一聽命。於是婦姑紡績自給。觀竟有成立。孫曹不下二十餘人。熊歿。年九十一。喻八十二。人以爲孝節之報。

李氏廣昌人。何永孚妻。嫁時年十四。越二年。孚卒。李弛容釋妝。每欲與俱。柩前設一木橙。坐而哭。橙爲之剝。姑病。朝夕祝告。請以身代。哭曰。吾所以不死者。姑在也。姑既逝。吾何生爲。哀慟嘔血。不一月而死。

甯氏安邱人。許嫁同里劉眞。眞死。甯年十六。聞訃甚哀。謂父母曰。烈女不更二夫。請往事舅姑。至眞家。爲服衰麻。晝夜勤女紅。以養舅姑。及歿。賣衾珥以葬。節行完美。旌表之。

張德瑜妻姚氏。華亭人。夫亡。屏食待斃。及葬。嚙棺號慟。聲震里巷。結廬墓側。抱痛終天。姑宋氏老病。不解襟帶。而侍奉湯藥者經年。子某亦以孝聞。每按部使者至。並以節孝旌異之。

陳氏安陽人。李諒妻。年十九。生一子旻。夫歿於役。聞訃。哀慟絕粒。三日不死。乃復食。織紉以養舅姑。姑患

疽。吮之愈。撫旻成立。孀居五十餘年。旌之。

吉慶奴。大學士胡廣女也。永樂初。解縉胡廣並爲學士。一日。侍譚文淵閣。太宗曰。縉廣少同業。仕同官。今縉已有子。廣宜妻之。以女。廣對曰。臣妻有娠。未卜男女。上曰。定生女。勿疑。已而果生女。因名吉慶奴。以上所料也。遂訂盟。縉子貞亮。無何。縉被誣。舉家謫戍遼東。廣欲悔議。其女竊入家。刀截耳。家人覺而救之。血被兩頰。且曰。薄妾之壻。皇上主之。父面承之一。與之盟。終身不改。況背主違父。何用生爲。越數年。洪熙改元。特宥解氏。貞亮得歸。完娶焉。既歸。解氏事二姑極孝。事夫惟謹。姑徐氏多病。不離牀席。十餘年。雖洗滌穢污。皆躬備之。且通書史。性柔慤。側室子女。視如己出。卒年八十有五。

金氏。溫州人。樂清章文寶聘之。未成婚。納妾包氏。有娠。而文寶得疾。且死。金氏聞。請往視。父母不許。卒往焉。金氏躬爲殮之。撫妾生子。綸。親課讀書。通經書大義。始遣就外傅。登正統元年進士。官禮部主事。先欲疏請復儲。恐貽母憂。未敢行。金氏聞之。謂曰。吾平日教爾何爲。汝能諫死職。我雖無子。實有子也。綸乃以疏入。忤旨。杖幾死。禁錮詔獄。金氏怡然。天順二年。綸復官。終養。金氏嘗自爲詩。見其志。詩曰。誰云妾無夫。妾猶及見夫方殂。誰云妾無子。側室生兒與夫似。兒讀書。妾辟繡。空房夜夜聞啼鳥。兒能成名妾不嫁。良人瞑目黃泉下。後綸官至禮侍郎。

劉氏。歸王錫第。甫十六。劉年十三。婉孌有志操。善女紅。錫第父爲滋陽令。以母李往。留錫第與劉家居。錫第少年。美姿貌。負才氣。芥視一第。而小不讐。卽發憤下帷。不勝飢。故得疾。寢甚。劉晨昏進湯藥。慘瘞廢貌。

夜輒跪而祝天呼願以身代錫第疾歲餘日進一粥則劉亦進一粥生不食亦不食錫第卒時家衆環哭願獨不見劉乃扃戶自縊救不死頃之則又縊復救不死願謂人曰吾死決矣慎毋令外人手吾屍也明日復縊偶係脫墜地蘇哭曰奈何東我而不使我與夫偕乎天哉家衆乃益晝夜嚴視之乃陽若爲不死者而密製殮服又翦皮金爲香字示侍女曰吾骨亦若是一日晨翼有異風起靈輻者再劉怵其侍女曰爲我而風乎毋忤我風立觸汝矣及夕願侍女且食於廚復扃戶自縊乃絕其母兄解之則異風復歔起者再踰三日而殮色如生

尤氏崑山人生而淑美善女紅通曉文義少字諸生趙一鳳一鳳貧不能授室脫身贅於尤時尤氏年十六日夜機杼閒佐一鳳讀有僞聲三試而三不利竟邑卒尤氏將殉之旣而強食曰棄君之二孺子而以從君君寧與我亡何二孺子傷尤氏益大悲痛曰可以從吾君矣旣而復曰君猶未葬也吾忍暴吾君骨則徙之墓所視治土方中日夜拊棺慟哭乃有利尤氏之嫁以其聘囊者謂人曰彼姝少且艾誰能容彼久也則又嘗其目曰彼盼美而流烏能久也尤氏聞之曰乃以色疑我耶夜就工所取石灰手接久之血出潰灰目枯利嫁者大愧悔尤氏目楚痛益劇度必死寘一棺自隨可歲許視一鳳葬畢卽自縊有抱而解之者復觸石額裂且死乃仰臥棺中啞喀喀死事聞詔旌其門曰烈婦

張甯有二妾一塞香姓高氏一晚窳姓李氏年皆十六七俱端潔慧悟甯老愛重之及病將革無子諸姬年長者悉命出之二氏獨不去因泣請曰妾二人有死無二幸及公目未瞑願賜一閣同處且封鑰之第

留一竇以湯粥。誓以死殉公也。遂引刀各截其髮。以示無他腸。甯命從之。乃甯居小閣。絕不與外間通聲。間及卒。乃設席閣中。旦夕哭臨。服三年喪。不闕戶者五十餘年。子嘉秀。字文英。舉嘉靖己丑進士。歸里門。二氏曰。妾等犬馬之齒。已踰七旬。幸不辱先公於地下。又況有佳後耶。令啓鑰出。則皤然雙媪矣。親戚莫不憐敬。奏聞。旌之曰雙節。

史官曰。性秉貞淑者。易鑿刃。情飭流俗者。輕脂韋。何也。心堅於金石。節躋於瞻顧也。若者竊窈令名。垂於琬琰。臨大節。輕死生。見定不移。而富貴威武。無所施其歆怵。以義士畸人。競譽表烈。可謂守禮不渝。誠足風矣。以視衣冠有中菁之行者。真霄壤哉。與言及此。撥管浩嘆而涕零。

明書卷一百五十三

列傳十四

外戚傳

史官論曰。昔人喻貴戚之家。福祿重疊。如再實之木。其根必傷。知言哉。夫福人不過其量。祿人不逾其序。此天與帝王之仁。受萬物也。祥彙暮拱朝枯。無故之利。聖人所畏。故五侯封而黃霧塞。禹山滅而家妖絕。寵祿既過。侵迫陰陽。良由志驕氣溢。窮富貴而不以功也。是以謹制之君。敬慎姻婭。明德之后。裁抑外家。而竇長君之退讓。陰衛尉之守約。非惟豫遠傾軼。亦以永全令祀。呂霍爲我戒。豈不厚乎。明初家法最嚴。高后戚里無尺組封。徒以廟號隆其本生。魏定二國。俱盟白馬。無與椒房。惟秦陵時二張張甚。致動徙薪之議。抑如田蚡所云。志不過富貴。好不過聲色。狗馬而已。無赫赫之施。亦無赫赫之禍。豈非蔭薄流卑。未於鬼神之闕歟。抑祖宗家法嚴。外戚不得預政。故龍蔡之孽不生。雉罌之亂永絕歟。考茲禍福。鑒戒備矣。揚王陳公。太祖於建國之初。念滄皇后母家。贈后父陳公爲楊王。母揚王夫人。立祠太廟東。歲遣大臣祀。洪武三年。中都守臣上言。伏惟皇上肇紀開天。功德殷茂。隆周恩於靈文。眷惟陳氏。本乏允宗。更迷元夢。軫心揮涕。日夕靡遑。臣等旁詢父老。徧歷村墟。得陳公葬地。在下縣盱眙。風氣包凝。天地

之藏如故。樵蘇絡繹，樊衛之禁甚疏。宜崇華表，兼建廟祠。臣又聞諸人言：公本維揚尺籍，當宋祚將傾，扈蹕南遷，師住海島，將殞君崩，士卒死溺，莫可數計。公舟破中濤，脫死登岸，招攜瘡殘，匍匐沙嶼，累石支釜，調糜苟活，已而食盡，自分天亡。旁有死馬，衆欲烹食，曰：「我等飢且死，食死馬肉亦死，死等食馬肉，得爲飽鬼。」公夢白衣人，謂公勿食馬肉，吾舟挈汝，恍惚未信。俄夢如初，是夜未央，櫓聲入耳，若寤若寐，復有紫衣人杖觸公，勝曰：「舟且至，奈何不起。」公驚立，熟視身在艤中，食頃，颶發，舟如輪轉，公夙諳巫呪，叩齒揮神，須臾風濤靖恬，檣柁甯捷，舉皆謝公，共進酒食。比至通州，復饋巨魚，歸於故里，厭棄弓矢，假藉符術，避地盱眙津里鎮。久之，始生二女，季卽瀆皇后也。作配仁祖，誕育聖躬。公卒，年九十有九。臣等無任嗟異，伏惟宋元之交，華網塗地，戎貫滔天，神霄攸鍾，乾靈未殞，瀆皇后之有父，乃皇上之有母也。豈偶然之故哉。臣等昧死奏上，曰：「朕固聞之，立命中書省爲朕外王父，揚王廟盱眙墓次，置灑掃戶三十家，設祠祭署，有司歲仲春秋祀，召儒臣宋濂爲文，鑄神道碑。」

徐王馬公高皇后父也。洪武四年六月丙申，上坐皇宮門，召禮部尙書陶凱諭曰：「皇后德懋塗辛，功高任姒，佐朕布衣，永清寰海，實惟慶宗，發此靈允。惟後父馬翁，世籍宿州，鄉聯閔子，少力耕農，邪勤魏儉，長負膂力，虎視鷹揚，疾惡如讐，拊順如狎，墟中敬憚，莫敢頽頽。元末，使氣殺人，藏命定遠，已而江淮釋騷，閭井飢困，避地轉徙，蓄器俟時，謀諸室人鄭媼，乃以愛女託諸好友郭子興，子興定遠豪俠，首難稱雄，衆推元帥，收召民兵，朕適歸塵部，積著勳庸，子興願朕喜曰：「行且爲汝擇配。」又曰：「莫如吾女。」乃館朕甥廬，薦成嘉

禮。又曰。吾女馬公季女也。惟吾夫婦愛如己女。音本嗣徽。祥由天定。朕時敬諾。周旋有年。既登大寶。遂正軒龍。褒贈翁爲徐王。媼徐王夫人。物色嗣昆。並遭闕天。朕悲悼益深。情文未備。立廟太廟之東。歲時奉祀。顧旋類有別典。禮無稽。始卽王塋。關地作廟。奉安神靈。歲仲春秋。俾有司祇供祀事。汝凱宗伯。典司人鬼。其次第朕言。刻石。凱再拜頓首受命。設宿州祠祭署。以王鄰家武氏。世爲奉祀。守王墳。灑掃戶九十家。呂本。鳳陽壽州人。仕元爲元帥府都事。其後來歸。歲丙午。爲中書掾史。吳元年。授湖廣行省照磨。洪武二年。陞中書右司郎中。四年。改左司郎中。五年。陞刑部侍郎。尋進吏部尙書。六年。改太常寺卿。七年。以事左遷北平僉書。尋召還。授禮部尙書。未幾。出爲兩浙運使。十二年。復授太常寺卿。疾卒。賜葬鍾山之陰。無子。其女爲皇太子妃。建文卽位。册封爲皇太后。本已卒。贈侯。

張昶。永城人。父麟。洪武二十年。以女爲燕世子妃。授兵馬副指揮。食俸京師。二十八年。老。昶從燕兵戰永平。大甯有功。至鄭村壩。遇齊泰兵。大戰。先登。陞義勇中衛指揮同知。建文四年。與內臣瑄東援薊州。又從梁銘戰沈都司兵白河上。陷陣斬首有功。陞都指揮。永樂中。調金吾。再調錦衣旗手。二十二年。妃正位中宮。陞昶左都督。洪熙元年。封彭城伯。食祿千五百石。與世券贈麟彭城侯。諡恭靖。宣宗奉母后謁二陵。昶兄弟從。太后特召見行宮。諭令謹飭保家祚。宣宗厚母家。禮昶兄弟。正統三年。卒。子輔病廢。孫瑾。嗣伯。成化十六年。卒。子信。嗣伯。正德三年。子欽。嗣伯。嘉靖八年。釐恩澤侯。惟彭城惠安以軍功半。得世嗣。如故。十六年。卒。明年。子勳。嗣伯。昶家本謹厚。又孝誠。昭皇后有功德。仁宗在東宮。非孝誠。禍且不測。宣德正統間。

天下治平皆昭皇后力也。以故其恩澤兩封傳世最久。

張昇昶弟燕兵起。以舍人守北平。有功。陞義勇中衛正千戶。永樂三年。陞指揮僉事。十二年。從上出塞。至忽剌忽失溫。遇敵。有戰功。稍進官。二十二年冬。陞都督同知。明年。陞左都督。正統五年秋。封惠安伯。食祿千一百石。與世券。六年卒。子軾爲典寶。先卒。孫宗嗣伯。成化三年卒。無子。弟瑛嗣伯。無子。庶兄瓚嗣伯。弘治六年卒。子偉嗣伯。正德中。爲總兵。征流賊。失律。下獄。論死。會赦。得釋。嘉靖初。復爲京營總兵。十四年卒。贈侯太傅。諡靖襄。子鏞嗣伯。二十二年。坐郭勛姻黨。下詔獄。未減。得出。卒。子慶臻嗣。國變。闔室自焚死。孫忠。字子敬。鄒平人。初名愚。貢入太學。歷介休永城主簿。率人供役天壽山。陞鴻臚序班。宣德初。以女配宣宗。賜名忠。陞督府僉事。又明年。封會昌伯。食祿千石。與世券。忠長厚好施。年八十五卒。贈侯。諡康靖。五子。長繼宗。次紹宗。顯宗。續宗。皆都指揮。純宗。錦衣指揮僉事。孫十八。皆錦衣千戶。顯宗稍驕橫。忠不喜。景泰三年。繼宗嗣伯。英宗復辟。進繼宗侯。加祿二百石。與世券。逾年。贈忠安國公。改諡恭憲。已而革奪門功。繼宗家子弟蒼頭冒功得官者二十餘人。疏謝罪。辭免。英宗念繼宗母家。革諸蒼頭官。官諸子弟如故。五年。總兵討曹賊。加太保。弟顯宗蒼頭坐法。繼宗爲請。上不悅。繼宗頓首。以母九十老。爲辭。上終不允。一日。諭輔臣曰。祖宗來外戚不得預政。今繼宗得典兵。太后顧不樂。初爲內庭寺人言。防閑須戚里。惑其言。至今猶悔。李賢對曰。孫侯醜謹無他腸。後更不可爲例耳。成化元年。又革奪官。傳旨繼宗出。特恩如故。卒。贈鄭國公。諡榮襄。子連錦衣衛指揮使。先卒。十六年。連子鎮嗣侯。避英宗諱。改名銘。正德十五年卒。明年子

吳嗣侯嘉靖初坐營八年以安昌伯故盡革外戚恩澤封十六年吳卒子應乾不得嗣。

吳安丹徒人父彥名有女入宮洪熙初召彥名子忠爲錦衣百戶宣德三年卒安以忠弟嗣官正統十四年十二月陞忠府軍前衛指揮使是月景帝尊生母爲皇太后詔天下太后卽彥名女也改安錦衣衛景泰四年陞左都督前府安弟信陞南京前軍都督七年太監王誠傳旨封安安平伯食祿千石天順元年太后復爲貴妃安削爵。

周壽昌平人父能孝肅太后父也太后初入宮侍英宗爲貴嬪冊爲貴妃生太子天順元年授錦衣正千戶卒子壽嗣官八年陞左府都督僉事憲宗卽位尊貴妃爲皇太后陞壽督府同知成化三年封慶雲伯食祿千石與世券贈能慶雲侯十七年進壽侯加祿二百石是年加贈能甯國公諡榮靖弘治元年加壽太保祿一百石正德二年卒贈宣國公諡恭和又明年子瑛嗣侯壽弟彧初以恩授錦衣正千戶成化三年陞指揮使十七年傳陞都督同知二十一年封長甯伯食祿千石與世券弘治元年加祿百石卒明年子瑋嗣卒子大經嗣嘉靖中革。

錢承宗海州人五世祖整從燕兵克懷來大甯鄭村壩功陞燕山右護衛副千戶老子通嗣官以白溝河滌州滌河功陞指揮使老子貴嗣官從太宗北征宣德十年陞都指揮僉事正統七年睿皇后恩陞中軍都督同知卒子欽嗣錦衣帶指揮使正統十四年欽與弟鍾北征沒於土木欽無子鍾子雄天順元年陞都指揮使成化二年累陞後府都督同知成化十五年卒承宗幼陞都指揮使錦衣帶俸優給弘治二年

比王源乞恩封安昌伯。食祿千石。與世券。嘉靖四年卒。諡榮僖。明年子維圻嗣伯。是年卒。弟維垣乞嗣伯。吏部請與維垣錦衣帶俸指揮使如欽官制。曰可。已而維垣又乞嗣伯制。曰外戚無功。坐享重職。非古帝王報功之典。朕甚不取。廷臣屢建議。愛國重名器也。下會九卿言官議。議上。詔曰。戚里濫膺重爵。名器既輕。人不知勸。維垣停伯。不得嗣。著爲令。

王源。上元人。父鎮。孝貞皇后父也。天順六年爲中府都督同知。成化二十年。源以嗣都督封瑞安伯。食祿千石。與世券。弘治元年增祿五年進侯。又增祿。與世券。加贈鎮阜國公。諡康穆。十年源弟濬以都督同知封崇善伯。食祿千石。與世券。十六年加源太保。又明年加太傅。又增祿。正德二年源弟濬以左都督封安仁伯。食祿如清。是年濬卒。子桓嗣伯。十三年又增源祿。嘉靖年卒。贈太師。諡榮靖。子橋嗣伯。後革。

張巒。興濟人。孝康皇后父也。成化中。皇后爲東宮妃。授巒鴻臚卿。弘治三年陞督府同知。是年冬封壽甯伯。食祿千石。與世券。五年立東宮。巒得進侯。加祿二百石。是秋卒。贈太保昌國公。諡莊肅。巒本儒家。從兄岐舉進士。亦有吏才。巒子鶴齡延齡。巒卒封鶴齡壽甯侯。延齡封建昌侯。武宗崩。鶴齡迎世宗於安陸。私語左右欲得召見。申皇太后本意。上不應而心惡之。道中數有怪夢。墜馬傷臂。鞭馭者至死。上聞大不釋。普令在道死者予棺。具所由以聞。鶴齡頗亦悔懼。每率諸大臣朝夕候拜。仰瞻威容。心悸歸。謂其弟曰。新天子矚我時有怒色。只爲一馬卒。何介介至此。延齡懼。初不爲意。八年盡革外戚世爵。二張在革中。以皇太后尙存得免。止襲一輩。方鶴齡封公。尙書胡世甯言名器當惜。保全外家。須限其制。陛下天授。戚臣奉

迎道路奔走。初非難事。加以金帛。亦足酬勞。若曰定策。有祖訓與先帝遺命在。誰人敢居。況公爵止以增。不以封。不宜使外戚封公自陞下始。上心是之。以有前詔。不欲改也。考明朝。孝慈馬皇后。兵亂。外家無存者。父馬公。追封徐王。歲祀。仁孝徐王后。中山王長女。本元功。無可加。仁聖張皇后。二弟。半以軍功封。此後孫周二戚。雖封伯加侯。贈公。斤斤守禮法。令終。昭聖。儷孝宗時。二張甚橫。數入禁中。內臣何文鼎。素忠直。二張窺御帷。文鼎持大爪筆之。幾死。孝宗無以罪也。多奪民田廬。請官寺舍。豪奴姻親。凌官府。篡獄囚。金玉積如山。厭市肆。壟斷在在皆是。揚州同知葉元。嘗辱張僕人。元至京。羣僕入吏部。撲元。尙書馬文升。護元得免。言官時論劾。不問。至正德時。待外家稍薄。十年。日者曹祖。有子鼎。爲延齡家奴。祖行其術。頗有驗。鼎嘗語同儕馬景等。謂其父通六甲六丁神術。能役使鬼丁。景等初信。言於延齡。出入關說。後祖父子不相能。景等亦厭祖。譖逐之。祖忿。奏延齡與其子鼎及景等陰謀不軌。詔逮祖下刑部獄。鼎等下錦衣衛獄。景等下東廠獄。有旨。將會多官廷鞫。祖仰藥死。上疑之。提獄巡風主事皆得罪。尙書張子麟奪俸。昭聖居閒往來。亦厚有所獻。乃得解。尙免朝參。延齡尋囑天文生董昶爲草奏。求進爵。不允。驕橫如故。嘉靖初。都督張銳。太監谷大用等。伏法沒產。延齡擇便美者。抑價買之。爲山池臺榭。僭侈踰制。而是時。上以外藩世子入承大統。母妃至通州。未正尊稱。閣臣固持之。大不喜。旣入宮。昭聖猶以故事倨見。益不堪。遂排羣議。尊爲聖母。母皇太后。而愠昭聖殊甚。怒無所發。盡鍾之二張矣。二年。延齡以強占人地。爲給事中張原所糾。自是稍稍斂戢。鶴齡雖以定策功進爵。然謙退自保。絕不敢與邵蔣並。亦無有疵摘之者。延齡

婢嘗竊金施僧事覺。執僧與婢杖之死。奴畜指揮司聰委之行錢。聰負延齡五百金。被索急。遂謀於昶子。至曹祖所奏事。將許延齡。至陰以草奏示延齡。邀其賄。延齡密遣人執聰。發篋得奏牘。榜聰死。令聰子昇焚其屍。乃折券優遇之。昇噤不敢言。然常忿。恨甚。遂拾聰前牘奏之。事下刑部。尚書聶賢。逮延齡並諸奴。勸結言其擅買田宅。及杖死司聰婢僧事。皆有證。其云陰謀不軌。無左驗。延齡係應議親臣。請上裁。上怒曰。夫謀逆者。只論謀與不謀。豈論成否。賢等黨比欺罔。令戴罪。其曹祖服毒死。想當時有主使。容縱之者。宜追論以聞。賢等懼。迺具獄。謂司聰以絞死。曹祖及鼎爲妖言。與景等私相傳語。謀不軌。延齡逆謀。雖無左證。而僭侈兇殘。罪應論死。其兄鶴齡居第相連。坐視不諫。責亦難辭。前任尚書張子麟。侍郎張論等。皆宜追問。奏上。上曰。延齡犯在十惡。宜從重典。第告變人亡。無從質證。今但以多殺無辜。僭恣不法之罪。誅之。鶴齡同惡相濟。姑革其爵。張子麟等逮赴京治罪。賢奪俸一年。延齡具疏自明。上責其獄中擅奏。通政司官皆奪俸已。子麟等逮至。俱革職。方獄急時。在十三年七月。將致族誅。昭聖計無所出。乘上生子。欲過宮稱賀。且求解。上辭者再。乃止。遂令內臣傳口語。張延齡事。姑從寬貸。上怒。錄其語示閣臣。張孚敬議處。孚敬力爲解。且云殺人罪誠難恕。然恐傷皇伯母心。參之議親之條。待以不死。削爵。覈其占據田宅。悉入之官。遠而編戍爲民。皆可。上曰。婦人以夫爲家。皇伯母上配孝廟。宜感恩發奸。曰傷心是導之啓私庇。必欲害國也。朕欲保神器。正法紀。如欲不問。亦自卿等行之。孚敬皇恐。依部議。票上。上卽欲論決。時馮恩以星變上疏。郭宗臬以奏疏忤旨。皆繫獄。將并決。孚敬又力救宗臬。杖四十。釋爲民。方獻夫亦力言不可。

且云何人導陛下爲此失德事。上屢詰問。孚敬對如初。上不悅。諭卿等愛重。因煩奏。自古強臣令君一失。又以大禮爲言。欲悔己以從廷和。與此本要除批。朕止知殺人。必以殺報。孚敬再引罪。上不得已。停刑。仍諭之。但當承君之意。勿曰某某之幸。實非爲亂賊而屈刑焉。又因孚敬乞休。上諭之曰。卿求去。或因大同事者。又或以今日之事爲難處。堅不欲法處。延齡者。曰爲昭聖太后。恐君上失德。此皆不足慮。孚敬遜詞以謝。時孚敬方堅欲討大同。無效。慚而引疾。故上云然。已而南兵部主事劉世龍。以南太廟災。上封事。一請杜諛諂。以正風俗。一請廣容納。以開言路。其一則言張延齡。憑寵爲非。罪固難貸。然一旦置之重辟。何以慰孝宗昔日寵待之意。安昭聖皇太后垂老之情。上責其訕上庇逆。械入京。黜爲民。始延齡之下獄也。提獄主事沈椿。以威曉故。不令入重獄。置之別所。後代者益寬假之。聽其家人出入。扶持。恩通親知。往來置酒譚諧爲樂。至是。主事羅虞臣。有鄉人陳邦憲者。亦坐死繫獄。虞臣置之延齡所。相得甚歡。常爲延齡草奏。而罪繫。遂將郤永宋賚王祿。亦與延齡燕飲。祿因稱貸延齡八百金。延齡嘗書聖學心法一幅。題君道不明。賞罰六字於其端。十五年。奸徒劉東山。以他罪坐繫。犢肆不受。囚束。虞臣笞之。恨甚。圖報。遂撫奏延齡前事。謂惡言譏謗。賄結邊臣。爲外援。招匿國勳。爲內黨。其妻崔氏。動以宮闈藉口。又自謂有先朝恩養。終不至死。且有賜田產業百餘所。令子侄奴屬多通賄賂。以希脫罪。奏入。下拷訊具狀。上謂延齡訕上。法司非人類。乃與死囚爲黨。備查。先令提獄官執送鎮撫司鞫之。責尙書唐龍等欺公鬻法。戴罪聽處分。先後提獄官主事沈椿等二十四人在京任者。俱逮下獄。其公差給假致仕丁憂諸在籍主事陳公陞等。

俱命各巡按執赴京師並訊。又有劉琦者，亦許奏延齡陰附權闖，傳遞宮禁金幣，暗結將官，賂遺真人邵元節等事，俱下詔獄。二疏所株累凡百餘人。錦衣衛訊上言：東山琦所奏多誣罔，下都察院擬罪。於是都御史王廷相等擬上延齡永贖等俱仍原擬繫獄。椿等贖杖還職。東山發配。琦發遣邊衛，得旨如擬。延齡雖在繫，其諸子宗儉宗說等，席故貲富厚，擅行都下，諸奸人及家奴利其所有，率危言恐嚇之，索賄不遂，則首諸官。十六年冬，有班明於雲鶴者，上章告變，搆及中官戚里。鶴齡自南京遠赴詔獄，瘐死。雲鶴以誣奏遣戍，而言者猶接踵。東山又自配所逃歸京師，復許奏延齡夫妻父子魘魅呪咀事，皆實。班明等奏不誣，併讓珊瑚搆致之，仍取張氏奴陳文紳奏詞一紙，連封以進。諸奸猾龐永洪等和之，詞連大學士張孚敬、遼安伯陳鏞、西甯侯宋良臣、京山侯崔元、太監麥福等，所蔓引凡數十人。章下錦衣衛訊鞫，獨令鏞良臣赴訊。奏請時孚敬已致仕，錦衣衛以爲言。上曰：延齡事與孚敬無與，勿問。於是錦衣衛指揮使王佐力爲推鞫，言東山等所奏皆無實，不足聽。法司唐龍王廷相屠僑等如佐言，讞上。因言延齡罪狀多端，久留禁獄，其子姪驕溢斂怨，致奸兇垂涎財物，紛紛告許，動輒指斥乘輿，干犯宮禁，於國體實多所損。乞將延齡早賜處決。時章聖方病，上徧禱祈福，命釋鏞等，予原職，讓珊瑚贖杖還職。東山枷戍，延齡仍禁錮。宗儉宗說等調發南京，盡沒所賜產。東山荷校死。二十年，昭聖皇太后崩，尋張延齡死西市。

邵喜，昌化人，寓杭州。父林，孝惠太后父也。太后初入宮爲貴妃，生與獻王及岐雍二王，喜歷陞錦衣指揮使。嘉靖初，尊貴妃爲皇太后，封喜昌化伯，食祿千石，與世券。明年卒，諡榮和。子蕙嗣。伯五年卒，無子，族人

爭嗣。上下吏部議。又令郭勳張璠方獻夫胡世甯李承勳議。世甯言。皇上必欲邵氏嗣封。益推皇考獻皇帝之所自出。於其父母邵林楊氏。而欲榮富其子孫也。不幸林子孫皆絕。今爭襲者乃其旁枝。非林子孫。其不當嗣明矣。臣恐賜彼一代之爵。而或亂彼百代之宗。誤我皇上明倫之智。達孝之仁。可不慎乎。臣觀江南蘇松諸郡浙江諸省。未見有侯伯世嗣者。喜封伯未逾年。遂卒。傳其子蕙。僅再世而遂絕。輔陞指揮弟綱。卽天圯三子。長次二人。皆以疾廢。其不幸門祚之薄如此。蓋亦地氣使然。故臣愚以爲與之嗣伯。則宜考覈倫序。若濫及旁枝。誤及異姓。彼弟曰弟。彼姪曰姪。太后兄弟。不得以之爲子。父母不得以之爲孫。他人富貴。而本親告絕。幽明之間。各生嫌隙。生者不得安其養。死者不得歆其祀。況門祚薄而福蔭隆。恐非邵氏之利。莫若停其封爵。量與恩澤。蔭卑流遠。乃久長之福。七年春。上特令杰嗣伯。八年革外戚封。停嗣。

夏儒。上元人。毅皇后父也。始以錦衣指揮使陞都督同知。正德二年。封慶陽伯。食祿千石。與世券。十年卒。子臣。十六年嗣伯。嘉靖二年。加太子太保。卒。八年停嗣。

蔣翰。徐州人。父敷。以獻皇后家。授兵馬指揮。從之安陸。老無子。以翰爲後。嘉靖元年。翰以錦衣指揮僉事。封玉田伯。食祿千石。與世券。鞏從弟山。錦衣指揮同知。壽僉事。太正千戶。四年。翰卒。贈太保。諡榮信。明年。子榮。初爲奉祀。顯陵嗣伯。榮弟華。爲奉祀。爲都督。守顯陵。

陳萬言。元城人。孝潔皇后父也。初爲諸生。頗解科舉文字。嘉靖元年。立中宮。以萬言爲鴻臚卿。陞都督同

知二年封太和伯。食祿千石。與世秀官。其子紹祖尙寶司丞。八年。盡革外戚封。十四年。萬言卒。太和伯不得嗣。萬言孫書乞恩。得錦衣都指揮同知。帶俸。

方銳。江甯人。孝烈皇后父也。嘉靖九年十一月。皇后選入掖廷。充九嬪。明年二月。陞銳錦衣署鎮撫。八月。上諭兵部。朕慎選淑女爲嬪御。用廣嗣續。九嬪之父。授署職。似於人情。有未盡。銳可與錦衣。正千戶。十三年正月。皇后正位中宮。陞銳衛都指揮使。十八年二月。隨幸承天。至衛輝。陞後府左都督。十九年正月。封安平伯。食祿一千石。二十一年二月。敕吏兵二部。朕恭奉皇妣。慈孝獻皇后。几筵痛憶遺音。周足三期。贊成朕孝。后妃列御。宜加恩遇。銳進封侯。二十五年二月卒。五月。子承裕嗣伯。三十三年十一月。加太子太保。

李偉。孝定皇太后父也。宛平人。起於泥工。孝定事穆宗。爲才人。生神宗。進都指揮使。神宗立。封武清伯。進侯。祿千五百石。予券。孝定極厚。外家。賚予無算。而偉父子好居室。無時不與土木。第宅園亭。奇麗徧京師。人稱爲李瓦刀家。卒。子誠銘嗣侯。諸子誠鏹。誠鉅。皆都督。

郭振明。灤縣人。孝元皇后兄也。初爲諸生。天啓元年。封博平伯。崇禎元年。進侯。振明文雅韶秀。專志文墨。日與知名士遊。不爲戚畹態。善鼓琴。行草書字亦秀雅。人皆以其戚也。而易之。其實諸文士名筆不及也。國變。死節。

王長錫。順天人。孝和皇太后兄。天啓元年。封永甯伯。食祿千石。後進侯。劉文炳。亦順天人。孝純皇太后兄。

崇禎元年封新樂侯。二人於國變日皆死節。張國紀祥符人。熹宗后父。以諸生進。封太康伯。懷宗卽位。進侯。國紀儒雅自好。每與博平侯郭振明遊。雖無所長。不爲戚畹。戚福安靜和恬。都人稱之。周奎順天人。懷宗皇后父。初起於卜。皇后少時。奎推其命。當大貴。旣而選爲信王妃。奎爲兵馬指揮。人賀曰。君言驗矣。奎笑曰。不止此也。旣而熹宗崩。無子。懷宗卽位。皇后正位中宮。封嘉定伯。國變死。而其子鑑爲都督。雄幹長鬚。行多暴橫。都人恨之。李賊入。桎而死。人以爲快。李堅武陟人。父英。開國有功。爲驍騎右衛指揮僉事。力戰死。烏撒贈指揮使。堅尙太祖第七女大公主。爲駙馬都尉。嘗與駙馬歐陽倫梅般陸賢賑北平。建文皇帝卽位。進公主大長公主。堅素負才勇。充左副將軍。佐耿炳文北進。遇燕兵。炳文謹備西北。燕兵突擊。出不意。破東南。炳文敗。邱福又攻子城。堅出接戰。互有勝負。封欒城侯。食祿千石。與券已。而兵駐滌沱河。薛祿引槊中堅。墮馬。祿揮刀斫堅。堅大呼。我李駙馬。勿殺。祿擒堅。見太宗。謂爾至親。今至此奈何。械送北平。道卒。子莊以公主故。特宥。當嗣侯。公主懼禍。繳誥券。莊流寓南京。詩酒自娛。後嗣侯諡威。莊弟成爲中都留守。改山東都指揮。成子陞世。南京衛指揮使。胡觀東川侯海之子。尙太祖第十女。爲駙馬都尉。建文三年。充副將軍。佐李景隆北征燕王。謂諸將曰。李景隆志大無謀。喜專違衆。郭英老邁。退縮平安。愼而自用。胡觀驕縱不治。英傑儒而無謀。數子皆匹夫。無能爲也。此景隆敗於白溝。觀爲燕兵所執。後歸京師。爲陳瑛譖。表勒自縊死。

袁容壽州人。父洪。開國入官。至都督。容初選燕府儀賓。配永安郡主。燕兵起。城守從征。皆有功。太宗卽位。進郡主爲公主。容駙馬都尉。食祿千石。永樂元年。再論功。封廣平侯。食祿一千五百石。與世券。凡大駕出入。皆命容居守。公主卒。仁宗停容侯祿。與駙馬祿一千石。宣宗卽位。與侯祿。容端謹謙和。通敏有才智。卒。贈沂國公。諡忠穆。子禎。宣德四年嗣侯。孝友廉慎。卒。無子。庶弟瑄。正統元年乞嗣。上曰。容封以公主恩。禎嗣以公主子。瑄庶子。可長陵衛指揮僉事。帝俸奉公主祀祠。後屢乞嗣侯。不許。

李讓舒城人。父申。留守左衛。指揮同知。讓初選燕邸儀賓。燕兵起。率府兵執謝貴等。取大甯。戰白溝河。有功。署掌北平布政司事。佐仁宗居守。防禦有功。建文皇帝聞之。大怒。欲讓。且宥申。讓不肯顧其家。力戰破。平安兵九門。建文皇帝遂殺申。沒其產。并殺諸男子。族居人沒其幼子。婦女異姓。姻屬盡謫戍邊。讓聞之。慟哭誓死。戰益力。永樂元年。進駙馬都尉。封富陽侯。食祿千石。掌北京刑部事。卒。贈景國公。諡恭敏。子茂芳。八歲嗣侯。二十二年。坐事。上曰。茂芳早失父。不知禮。停祿。革冠服。讀書國子監。十年。能改過。復爵祿。否則削奪。爲編氓。是年。奪芳。卒。子興。正統二年。授長陵衛指揮僉事。天順元年。詔與伯爵。卒。子欽。成化十五年。乞嗣伯。吏部言。興伯出言恩。詔無世伯文。欽嗣官長陵衛。

崔元。代州人。尙憲宗女永康公主。爲駙馬都尉。嘉靖初。以奉迎車駕。封京山侯。食祿千五百石。與世券。已而坐張皇親事。下詔獄。得釋。元好交文士。流聲譽。上喜。元寵信。得與內閣大臣及郭勳。朱希忠。並召見。燕語。元得乘間發動奸惡。勳坐死。元弟九嘉。靖二年。進士官。至按察副使。元卒。其子不肖。盡破其家。

明書卷一百五十四

列傳十五

佞幸傳一

史官曰。嗚呼。天不可不剛。主不可不陽。剛陽則苦勁正之。陰柔則甘悅媚之。孽狐晝伏而爲祥於夜。夜陰也。裴矩佞隋而忠於唐。唐之主當陽也。亦有明主當陽。知之不能遠之者。文帝之於鄧通。太宗之於宇文士及。豈不知之者乎。殿上之戲。嘉樹之舉。猶以弄臣畜之。曰是能適我。夫天子至尊貴也。列粉黛。吹笙竽。芝草珍禽。日進於前。太平封禪之書。不絕於御。亦曰爲適而已矣。匹士招朋。亦思悅媚。豈尊臨萬乘。而不庇一前魚乎。然二主猶未爲盛德累者。以有申屠嘉。魏徵在其側也。山有猛獸。則藜藿不採。正士立於朝。則僉王喪魂。故終文帝太宗之世。二小人偃伏翕息。而不敢動。若以成哀爲君。以孔光張禹爲相。則張放董賢。皆能以狎邪游戲導主而爲厲。然則國家欲遠佞人。有陽剛之君。尤賴有苦勁之臣哉。作佞幸傳。

紀綱傳

紀綱。山東臨邑人。以郡劣生。褊子衿。憤從燕兵爲參謀。太宗卽位。爲錦衣衛指揮使。陞都指揮僉事。日見信任。恃恩驕橫。朋比罔上。與指揮僉事莊敬等與販。居處服飾器皿。僭擬上用。蓄歌童舞女於家。出入迎

導詐傳詔旨。役臨邑之民。營創私第。擅作威福。以危法中人。受四方賂遺。及侵盜官物。不可勝紀。氣勢傾中外。事覺。時敬在海上。逮至上命。磔網敬於市。籍其家。無少長。咸戍邊。都察院上紀網罪狀。略曰。故都指揮紀綱。僂薄。亂僧陰斂。陽卻。搗搗蠶尾。包藏虺心。積稔惡極。未易指數。按綱前後。使腹心幹僞爲詔。下諸司鹽場。勒鹽四百餘萬。還復稱詔。奪官船二十艘。牛車四百輛。載入私第。弗予直。人牛立槁。又卽獄。喝持大賈數十百家。家索賂不等。得黃金三百五十兩。白金二千兩。鈔四十萬貫。帛千五百疋。又挾詐取交趾使黃金八十兩。金盆一。異寶二十枚。奪民人倪貴等房舍莊宅十七所。計值金三十餘萬。匿縣官予民地八所。直二十餘萬。從籍故晉王沒黃金五百兩。金盆一。寶劍二。白金鞍轡二。又從籍故吳王沒瑟瑟御龍服王冠。還輒衣故王冠服。高坐置酒。命優童眞保道眞吉祥等。效伎樂。奉觴上壽。呼萬歲。徐勞卿等無恙。敬舉卿之觴。綱諸所用金裝八寶環八寶帽飾玉盞玉水池硯珊瑚犀毗玉束帶紅鋪牀玉石馬几。咸飾交龍日月星斗。度如乘輿副。又上所怒內侍石班。當下綱論棄市者。輒將至家。具洗沐。好食食之。陽爲言見上赦若。誘取金帛且盡。更數日。將至市殺之。而先日以行刑報。嘗喜道姑陳氏姿色。欲買置媵。爲都督薛祿所先。怨之。遇於大內。持鐔鏹祿首。腦裂。幾死。祿噤不敢言。又道恚都指揮啞失帖木。不避誣。持其冒賞事。捶之死。綱家蓄養亡命。託山劉等多造鐵甲弓弩萬計。腐取良家子十八以下數百人。充左右役。詔選婕妤才人。旣試可。令暫出待歲。綱輒簿錄其尤者內之。別以次塞。莫敢問。吳人故大豪沈萬三子文度。萬三伏法。高皇籍沒其家。所漏貴尙富。而文度頗爲人把持。其短患之。因綱舍人蒲伏見。進黃金百兩。白

金千兩。龍文被一牀。龍角一株。奇寶十具。異繪綺四十疋。願得從贊御。列爲外府外廩。歲致粟六百石。鈔二十萬貫。醞百石。布帛以時進。食餌羞果以月進。綱許之。仍語文度。吾後庭未充。若爲我吳中徵好者。不爲數。文度因是挾綱什伍。而分民間室。亡誰何者。綱日惟其威日重且迫。上冀得所欲當。端午。上射柳。綱私司射。鎮撫龐英曰。我故射不中。而子折柳鼓噪以觀。兵部尙書御史既射。綱謬爲不中。英折柳鼓噪。竟射無紀者。綱乃喜咤曰。是無能難我矣。按綱爲天子腹心之臣。負委任。妄意不軌。擢綱髮不足數罪。其僚指揮莊敬。袁江。千戶王謙。李春。比周爲誣罔。當死。并諸應坐人。以輕重受條。詔曰。可。頒示天下。

史官曰。太宗英武聰察。綱非有腹心帷幄之寄。婉孌泣斷之姿。而能恣意竊柄。觀覺逞欲。挾姦回之性。爲蓄逆之思。揆時度勢。有難解者矣。至今循覽爰書。窮悉穢惡。藁街寸磔。奚云弗宜者乎。

石亨 附從
姪彪 傳

石亨。渭南人。方面豐臙。美髯及膝。從姪彪。體貌亦雄偉。髯亦過膝。亨嘗與彪貫酒。相工遇之。酒肆。大奇之。曰。今當平世。奈何二人有封侯之相。亨家本軍官。伯父巖。無子。亨嗣。寬河衛指揮僉事。亨不學。然識字。英果壯毅。善騎射。有膽略。提大刀。輪舞如飛。每從征。挺刃當先。輒立奇功。累陞都指揮使。彪亦驍勇。能挽強弓。善揮斧。始以官舍從亨有功。授大同衛鎮撫。正統十二年。亨遷都督僉事。爲大同左參將。守萬全路。彪亦陞至都指揮使。從亨參謀。十四年八月。王師敗績。亨與總兵官楊洪等。並械繫錦衣衛獄。十月。□□也。

先犯京城。有言亨勇者。景帝出亨獄。令立功贖罪。亨統兵出安定門。即與敵遇。挺刃單騎進。左右馳突。獨殺數十人。彪又持斧率親兵從之。諸軍懼呼。踴躍聲震天地。敵卻而西。亨等追戰城西。敵復卻而南。亨令彪率精兵千人。誘敵南至彰義門。敵見彪軍少。逼之。亨率衆乘之。蹂敵大潰。南奔。亨日夜追敵三日。至清風店。北去。將出紫荆倒馬關。懼我躡後。亨遣諜者給敵。亨且未至陣中。將者假亨名耳。敵信之。來攻。亨率彪與精銳數十騎奮擊。大呼。直貫敵陣。刀斧齊下。殺敵數百人。敵衆知亨在。鬪亂相蹂踐。亨悉衆乘之。大捷。敵所掠羊馬財物。盡棄餌我兵。敵得遁去。亨旣數敗敵。威名益震。敵自是不敢復踰塞深入。輒請和議。見邊人呼石亨爺爺。論功。亨第一。封武清伯。尋進封侯。兼太子太師。總京營。彪陞都督僉事。爲大同左參將。諸子姪澗溟濬仁。並陞千戶。鎮撫澗戰沒。彪爲參將。敵畏之。稱石王。於謙請赦亨巡邊。至大同召還。爲團營總兵。謙忠義清直。不避強禦。景帝倚任之。亨恃功驕橫。謙又時時裁抑亨。亨畏謙不敢動。然積恨之。天順元年正月。景帝不豫。亨與都督張軌。都御史徐有貞。太監曹吉祥。蔣冕等。定謀。奉上皇復辟。爲飛語。謂於謙及王文矯取金牌敕符。迎襄世子矣。又曰。上令內官張永等捕亨數人。掌兵者矣。庚辰。遂因吉祥矯稱得皇太后懿旨曰。天子疾大漸。殆弗興。天位久虛。上皇居南內。春秋鼎盛。於今八年。聖德無虧。天意有在。人心所屬。傾以奸臣擅謀。闕而不聞。欲迎立藩王。以承大統。將不利於國家。亨等其率兵以迎上皇。是月壬午。四更。亨與軌吉祥等。暨羣從子弟家兵。叩南內宮門。請上皇陞輿。從東華門入奉天殿。即位。侍衛都督范廣禦戰。死闕下。亨遂言於謙有反謀。不欲立皇上。請殺謙。上意未決。亨有貞力言。不殺謙。今日

事無名。上不得已。殺謙。及文。陳循商輅尙書江淵俞旨悅等。戍邊歸田。廢景皇帝爲郕王。亨以奪門功第一。進封忠國公。歲祿三千石。與世券。有貞封武功伯。入內閣。彪封定遠伯。爲大同副總兵。諸從弟子姪及諸義壻子孫。皆以奪門功。得官錦衣都指揮指揮者三十二人。千戶鎮撫者二十一人。其諸竄名奪門冒官者四千餘人。亨矜功恃寵。日與吉祥出入禁廷。在上左右弄權。進退文武大臣。盡革邊鎮撫。奪民間婦女田廬財物無算。彪亦益驕橫。凌鎮守文武大臣。御史楊瑄等聯章劾亨。亨疑有貞李賢等。嗾言官見上泣訴。強下賢有貞并都御史耿九疇御史瑄等於獄。會天大變異。得釋。賢留。有貞九疇竟逐去。諸御史譏戍調除有差。及賢再入閣。亨亦有力。賢竟不悅亨。亨益干朝政。乞請無忌。上亦厭亨。左右怒亨者。伺隙數言亨短。上漸疑亨。一日。上登翔鳳樓。見亨新第極偉麗。顧問恭順侯吳瑾撫甯伯朱永曰。此何人居。永謝不知。瑾曰。此必王府。上笑曰。非也。瑾頓首曰。非王府。誰敢僭如此。上不應。顧內臣裴當曰。汝聞若言乎。亨橫睚眦中傷人。莫敢告亨者。上又諭賢曰。總兵官豈可無故輒入內廷。令左順門關者。非宣召不得輒入。總兵又以軍官貪暴。復設巡撫。亨慚憤。必欲上復革巡撫。上不許。會兵部尙書陳汝言奸賊得罪。上嘆息。思好箇於謙。亨益不自安。又知衆不容己。乃薦處士吳與弼。上又諭賢。左右干預奈何。賢請上獨斷。上嘗與賢論及奪門功。賢曰。迎駕可。奪門不可。又曰。郕王不諱。天命人心。咸屬陛下。何必奪門。且內府門豈可奪。奪字尤非順。不可示後世。賴天靈佑助。事幸成。脫郕王左右先知。亨輩不足惜。不審置陛下何地。上愕然。又曰。臣彼時極知此舉之非。亦有邀臣與謀者。臣不從。臣愚謂郕王果不起。率文武羣臣請陛下復位。

安用如此勞攘。論功陞賞。誰復敢招權納賂者。上曰。善。由是益薄亨。亨生子男未彌月。上見亨喜。令亨負兒見朕。上見兒又喜。摩其頂曰。虎兒也。往喜撫之。朕行與卿結姻。上意寵欲亨子駙馬。且探亨意。亨不喻。輒對曰。不敢。臣兒無福。上笑而領之。命左右取金鎖繫兒項。賜封鎖定侯。亨頓首謝。召出。上益疑亨。彭在大同肆貪暴。誣劾都御史年富。逮至京。上疑問賢。賢乞遣官卽訊。果不實。彭又數言侮其總兵。總兵因彭管奏城威甯海子。遂爲流言。誣彭有異志。上固疑彭。欲召彭還。大同人又乞彭爲總兵。上遂大怒。或又曰。彭結死黨。必欲留據大同。爲亨外援。上亦疑出亨意。尋進彭侯。召還京侍衛。亨覺上疑。令人促彭疾馳入京。彭既至。會北使入貢。見彭於朝。羅拜。稱石王。上聞。益疑不可解。天順四年二月。上密詔御史按劾。卽日縛彭棄市。籍其家。亨逮繫錦衣獄死。亨旣死。法司請瘞其屍。上念亨功。欲從之。問賢。賢請盡法斬首。上不肯。竟瘞亨。都御史寇深等素惡亨。論彭大逆。收亨家。籍其財產。亨從孫進士石俊。亦被收死。獨從姪錦衣都指揮使溟。得戍彬州。少子潛。鎮定侯者。幼未收。溟在彬。累建功。陞指揮。潛至正德末。尚游食京師。亨縣人孫宏初。以舉人。歷肥鄉洛陽令。歷陞太僕寺丞。少卿。以迎駕功。陞工部右侍郎。亨再薦宏爲尙書。上陞吏部左侍郎。曰。再陞。當爲尙書。亨曰。卽尙書。何不可。何再陞。耐煩邪。亨粗豪直爽。軒豁無機巧。嘗薦馬昂爲兵部尙書。又力薦賢有貞入內閣。已。逐有貞。留賢。亨權日重。威名震主。不知謙損。竟及於難。五年七月朔。吉祥及其姪昭武伯欽反。皆伏誅。

史官曰。人恆言曹石。曹反闕下。兵火逼禁籞。姚令言朱泚其數也。亨父子。劣犢耳。恃功驕恣。失人臣禮。反

謀未著，卽獄詞亦曰：快快懷不軌，而別錄謂童警勸其反，進讖曰：惟有石人不動，而亨以布置未徧後之。童警睡，謂不足有爲，此亦渺茫之談，乃俱坐死。前當寇躡畿輔，享父子戰功，瓌偉一旦至此。上公擢於屠卒，干城等於孤豚，當時李賢主之，遂梟擒之。英宗恐恐焉，記過不賞其功，寇螫不留其種，卒激曹氏之變。夫石外疽也，曹內癰也，治外忘內，兇毒驟發，幾至攻心，梟死賢免，至今譚之心悸焉。至亨彪心無祖法，目無天子，其死也宜哉。

馬良馬昂傳

馬良，江南人，貌溫嚴，少以幼童侍英宗於青宮，有同榻之幸，旣卽位，襲父職，爲金吾指揮使，累戰功，爲都指揮，上復辟，召見之，進都督僉事，平曹欽，進都督同知，賜蟒衣玉帶，凡行幸，必從，賞賚不貲。一日，上早朝，罷出，獵南海子，羣臣候送，駕於午門外，見有乘馬從中門諸璫夾而出者，以爲上也，衆跪，乃知非上，良出矣。最後，上騎而出，衆驚詫，良喪婦，上賚贖甚厚，不數月而娶，鼓吹達禁中，上聞之，唾曰：奴薄行，乃爾耶！自是不復召。至成化初，坐與中官玉綸有私，出廣東，從大帥自效，後入協贊南京守備，出鎮貴州，卒。

馬昂，宣府人，世指揮，累戰功，至都督僉事，總宣府兵，有女弟，已適畢指揮，有娠矣，美嚴善騎射，曉番語，武宗聞而召嬖之甚，遂進昂右都督，一門大小，皆賜衣蟒，諸大璫畏之，呼爲馬舅，臺諫皆有言不聽。一日，上過昂，賜第，飲酣，欲召幸，其妾昂不可，上怒而起，昂懼，請解任，女弟亦疎，後以事累奪職死，其弟都督昇，都指揮景，長，皆得罪。

史官曰。二馬姓氏官爵。恩倖。見疏。俱絕相類。一以龍陽。一以女弟。皆得致魏顯膺殊眷。奇矣。而後一以娶妻。一以斬妾。皆致疎斥。又奇矣。嗚呼。人主愛憎之際。可不戒哉。

神英 附同時
封者 傳

神英。京師人。高祖保立功。洪武時。爲大同指揮僉事。父傑。雲南功。進指揮使。陞陝西都指揮。天順初。英嗣指揮使。延安衛。驍勇敢戰。先登。累有斬將功。成化弘治間。充總兵官。守甯夏。延綏。宣府。大同。歷四鎮。累官署都督。正德五年。給事中。歐豸劾英年老不任。金革致仕。是年。賂瑾金寶萬計。矯旨。英居官五十餘年。有戰功。欲封英爵。下兵部議。尙書曹元阿瑾。卽稱英功。傳會。盡錄上英前後首功。中律。瑾又欲箝衆口。下廷臣再議。莫敢異同。是年四月。封英涇陽伯。食祿八百石。與世券數月。瑾敗。言官交章劾英。奪爵。繳誥券。爲右都督。時有張富。保定新城人。少力耕自給。弟永。太監。正德時。與劉瑾導上非。幾得倖。用事。大臣請誅入黨者。有永名。永初與瑾好。相結左右。富得爲錦衣指揮使。已而瑾勢盛。益橫。永不能堪。正德五年。安化王寘鐸反。甯夏。永督軍與楊一清西討。兵未至。仇鉞等已擒諸反者。班師還京。入見。上發瑾罪狀。誅瑾。遂論功。封富泰安伯。永弟容。安定伯。並食祿千石。與世券。時容已爲錦衣都指揮僉事矣。嘉靖初。詔盡革正德間傳陞乞陞冒陞者官爵。永出奉康陵。富容並革爵奪券。與容都督富錦衣指揮使。已而霍韜又論容賄一青坐罪。減級安化之役。未嘗一接戰。倭幸封者六人。武德未詳。始所以進爲義兒。冒國姓。封永壽伯。太

監谷大用兄大寬高平伯馬永成兄山平涼伯魏彬弟英鎮安伯並食祿千石與世券大用弟大亮又以平流寇功冒封永清伯五人者皆已官錦衣指揮封一詔盡勒罷奪券英獨以彬在得爲都督同知又有江彬者自有傳時又有許泰者起指揮驍勇通文爲遊擊將軍征流賊有功陞都督冒國姓爲義兒從上巡邊矯斬寇功封安邊伯泰頗知法度不敢挾威福肆毒以故得不誅謫戍邊。

史官曰孔子惜繁縷以爲惟名與器不可以假人夫名器者朝廷之所以尊有德重有功也故位以配德爵以酬功故明太祖勅爲訓曰人臣非有汗馬功不得侯至武宗朝如神英輩或以賄進或以佞起得以列五等膺圭玉甚者亂國姓於市井敗紀躋法亦已極矣昔人謂爵位者出於口而無窮爵位豈可任口予哉斯言誠大罪者矣。

江彬傳

江彬蔚州衛指揮使祖父時嘗調閱宣府鎮城因家焉彬儀狀魁偉善射性權譎便辟人多悅之正德六年畿內苦流賊京軍不能制議調邊兵時彬隸總兵張俊部下戰淮上中三矢其一著面鏃出於耳拔之更戰事聞上固識之七年七月部議盜未平倣各邊事例於山東河南南北直隸各設鎮守武臣一人事甯裁革咸甯伯仇鉞言邊軍久勞風土不宜人馬俱病今賊漸平請留三之一討賊餘遣還邊俱下廷議乃以劉暉戍山東時源戍河南邵永北直隸李鉞南直隸所部各千人益以內地兵五千人分屬之暫留鎮守其副參許泰等軍俱遣還鎮從之延綏軍取道徑還遼東大同宣府軍仍過京犒勞後三鎮軍士至

京遂留不遣。未幾，延綏兵復召入，稱四鎮云。彬厚賂錢甯，引入豹房，得見上。上閱前痕，呼彬兒健能爾耶。應對稱旨，卽晉都指揮僉事，置左右，出入起臥與俱。每搏虎爲戲，江彬盛言宣府軍可用，遂有京邊軍互調操習之說。上喜，下部議。言祖宗成憲，京軍衛內，不以無故而出外，恐有四方窺伺之虞。邊兵捍外，不以無事而弛備，恐有一旦倉卒之患。今使外兵拱衛內，兵輕出，恐非居重馭輕安內攘外之要。上竟於宣府調三千人京營，赴宣府備禦者，亦如其數。大學士李東陽等條十不便之說，不納。許泰、張俊等因得復入。是後四鎮士馬團操大內，間以角觝之戲，號外四家。上戎服臨之，每出入，彬與上聯騎，鎧胄略同，幾不可辨。各軍馮恃威寵，出縱恣，市里畏而避之。八年正月，命許泰敢勇營，彬伸威營，俱管操。三月戊子，改太平倉爲鎮國府，毀廠口爲府廳。又岡上振耀國威。六月，於奮武營西造官廳，爲操練申令之所。名西官廳。以彬爲都督。彬前與都御史甯杲征流賊，彬次新河不進，及盜去，乃殺居民及耦耕者數十人，冒首功，累爲言官所劾，輒縱舍之。姑令行勘。至是，給事中潘相、等覈實以聞。上亦不罪。六月，賜彬冒國姓爲義兒。同時賜姓者，指揮楊瑄、焦睿、焦椿、焦桂、張天祐、張廷鸞等，且更其名，俱改錦衣衛帶俸。初，劉瑾盡政，用趙高之術，導上深居，不視朝。當奏事及陛見辭謝者，皆候左順門，瑾西面捧旨，代上酬應。恣行威福。是時，瑾誅，上復嬖錢甯，常侍左右。有言輒用。彬更內妒，導上巡遊，疎之上，始躍然。然憚太后，不敢輕出。九年二月，始徵行。至教坊司。七月，彬巧造神銳箭蓋甲倭刀鐵矢數萬，又於陝西造鋪花氈帳房一百六十二間，重門堂廡，庖廩涵福，乃戶牖樁檝影壁圍幕地氈之數皆具。且有壇內遊幸，出哨趕聲息諸名號。至是進之。凡郊

祀。皆陳設帳房。不復宿齋宮矣。十一月。令鎮國府各兵俱西官廳操練。而以彬及許泰提調之。於是兵權歸之矣。後與上遊幸益頻。十年六月。大學士梁儲等言。日者竊聞聖駕自西安門出。經宿而回。不知臨幸何處。臣等憂懼。謂至尊出入。必備法駕。必傳蹕。南郊大祀。不過一宿。直廬拱衛。將士數萬。今聖駕之出。環衛者何兵。扈從者何官。居守者何大臣。文武絕不與聞。若徒無故輕出。擾擾塵埃中。萬一車馬驚蹶之虞。姦盜竊發之變。出於意料之不及。未知何以備之。臣等聞之。寒心。倘以爲所聞不的。冒干天威。明示黜罰。安敢辭避。不報。十一年二月。設東西兩官廳於禁中。視團營。東以太監張忠領之。西以張泰領之。而神周者。常以罪坐謫。亦夤緣進用。管勇士營。未幾。益以劉暉。皆賜國姓。爲義子。四鎮兵。彬兼統之。上又自領閩人善騎射者爲一營。謂之中軍。辰夕馳逐呼噪。火礮之聲。達於九門。浴鐵文組。照耀宮苑。上親閱之。名曰過錦。言望之如錦也。諸軍悉衣黃罩甲。中外化之。雖金緋盛服者。亦必加此於上。下至市井細民。無不然。泰及周等。頂遮陽帽。上飄氍。染天鵝翎。爲貴飾。貴者飄三英。次二英。兵部尙書王瓊。得賜一英。冠之下。教場。自謂殊遇。其後巡狩所經。雖督餉侍郎。巡撫都御史。無不衣罩甲。見上者。十二年。上於郊後獵。南海子。夜半還。以所獲獐鹿賜文武大臣。曰。彬所贊也。三月。上與彬騎出北安門。軍校從者纔數人。四月。折西安門外。積慶鳴玉二坊民居。造皇店酒館。并營義子府第。開設教場。六月。上獵近郊。問彬邊計。指畫山川險易。道路直紆。狀甚明審。上曰。信若此。朕何難擒。擒寇耶。彬又言宜先駐宣府觀釁。且遠。廷臣可無煩聒。上深然之。密裝治行。欲自領西官廳兵馬巡邊。八月。上微服從德勝門出。幸昌平。外廷猶無知者。次日。大學

士梁儲蔣冕毛紀追至沙河懸留不聽將度居庸巡關御史張欽自言職掌陛下即欲出關萬死不敢奉詔上不問亦不果行乃自昌平還幸諸御馬房尋還豹房不十日復夜出德勝門趨居庸出關遂幸宣府令太監谷大用汧關無縱出者既至宣府營鎮國府第居之晏然忘歸時夜出見高大門戶即馳入或索其婦女於是富民厚賂彬求免久之軍士樵蘇不繼至毀民屋廬以供爨市肆蕭然白晝戶閉九月移蹕陽和自稱威武大將軍總兵官調發皆以大將軍鈞帖行之庚子獵城外大雨冰雹士卒有死者其夜星隕示異上驚怪天甫明移入大同鎮城以賞賜不足發戶部銀一百萬兩輸宣府備用壬寅諭百官朕以懷來等處切近敵境特因巡幸嚴督將領振揚威武凡官員朝見者令如常行禮章疏亦如常陳奏諜報敵五萬餘騎營玉林將入犯上令諸將分布要地既而敵分道南下大同總兵王勛等率所部禦之遇敵於繡女村督軍力戰口南遁應州而去明日復戰於五里寨又明日戰敵於潤子村上乃率彬等自陽和來援衆殊死戰敵卻諸軍令會暮即其地爲營乘輿止焉明日敵來攻禦之勛等自辰至酉戰百餘合敵乃退明日引而西上與諸將且戰且進追至平口朔州等邊上復欲進兵會大風黑霧晝晦軍亦疲困乃還遂令巡撫胡瓚以捷聞於朝是冬上駐大同左衛大學士楊廷和率諸大臣詣居庸請駕禁不得出而還閏十二月丁亥迎春於宣府備諸戲劇又飭大軍令僧與娼婦數百載娼婦各執圓毬車既馳交擊僧頭或大觸而墮上視之大笑以爲樂前後論諫者內閣事事有之至引土木爲言都給事中石天柱刺血上書御史葉忠等言尤深切彬皆計概擲之上不省亦無所發其喜怒也十三年正月駕將還諭文武

羣臣各服曳撒大帽鸞帶見各賜大紅紵絲羅紗一其綵繡一品斗牛二品飛魚三品鱗四品麒麟五六品虎彪翰林科道不限品級得服蟒繡部屬五品以下不與諸與賜者裁製一夕皆就明且奉迎德勝門外頒賜既衆內庫告竭迎時具綵帳數十綵聯千數皆金織字序詞惟稱威武大將軍不敢及尊號衆官列名於下亦不敢稱臣又具羊酒白金綵幣手一紅梵夾進御爲賀儀比夜深上戎服乘赤馬佩劍而來彬與邊騎簇擁見火毬閃戈矛間煙直上乃知駕至羣臣皆道左叩頭彬恬然隨上行至德勝門上下馬坐御幄大學士楊廷和奉觴梁儲注酒蔣冕奉果檮毛紀奉金花稱賀上飲畢云朕在榆河親斬敵首廷和等叩首曰皇上聖武臣民不勝慶幸上遂馳馬入宿豹房時大雨雪羣臣迎者狼狽夜半後僅得入城有病殆者尋賜文武羣臣銀牌於左順門一品二十兩二品三品十兩鑲其上曰慶功五采飾之貫以朱組四五品及都給事中五兩左右給事中四兩給事中及御史三兩鑲曰賞功貫以青組又各被以花紅而退先是羣臣具綵帳及賀儀出銀以品級爲差故所賜亦如之翰林以無賀儀獨不與賜已上復如宣府彬從二月己卯太皇太后王氏崩越三日上至自宣府發喪彬爲營卒報怨遣百戶朱英執人於平谷勢張甚御史董相杖而繫之欲奏聞彬遽譖於上謂相擅辱軍職降徐州判官太皇太后將祔葬上如昌平幸黃花鎮密雲等處時車駕所至彬等各先掠良家女子以充幸御至數十車在道日有死者左右不敢聞也猶載以隨且令有司饋廩之外別具女衣首飾爲賞賚費遠近騷動多驚疑避匿哭泣相聞永平知府毛思義下令以爲大喪未舉車駕必不遠遊此皆奸徒矯詐煽惑人心百姓其各安業敢稱駕至者

捕治之。彬等奏其言。上怒。逮下詔獄。五月。上駐大喜峰口。獵於古北。漁於灤河。將致宋顏三衛。夷人花當把兒孫等納質宴勞。御史劉士元陳四不可。轉幸河西務。太宗太后葬期迫。遠京指揮黃勳以供應爲名。因而科擾侵盜。事發。劉士元按之。勳逃至行在。因彬等譖士元。聞駕至。令民間盡嫁其女。藏匿婦人。遂命裸縛。而訊之。時野次無杖。取生柳幹杖四十。幾死。囚繫於車。馳入京。并執知縣曹俊等十餘人。下錦衣獄。皆降調。六月庚申。梓宮發引。上戎服馳馬。當神主耐太廟。上入廟。雷電風雨大作。燭盡滅。七月。傳旨。近年以來。敵屢犯順。兵政廢弛。特命總督軍務威武大將軍總兵官朱壽。統率六軍。或攻或守。即寫各地方制。敕與之。務期翦絕。朱壽者。上自稱也。又欲以彬爲威武副將軍。命內閣草制。楊廷和等上疏。反覆言其不可。上大怒。乃自稱之。是日。二閣臣入門。門卽闔。尙書毛澄等排闥不得入。皆感憤而泣。大理少卿吳堂被酒。厲聲呵止。欲以希寵。衆怒。羣擊之。走免。雖武夫亦有不平者。門內聞喧呼聲。不知堂欲止衆也。責堂不恭。無人臣禮。調外任。卽日逐出城。衆皆快之。錄應州功。陞賞內外各臣及旗舍九千五百五十人。有差。其餘冒濫者。凡五萬六千四百餘人。七月辛丑。諭兵部。特加威武大將軍公爵祿米。丙午。上復及威武副將軍祿米。度居庸關。歷懷來保安諸城。遂駐宣府。初。彬勸上於宣府治行宮。越歲。乃就驛費不可勝計。復羣豹房所貯諸珍玩及巡遊所收婦女實其中。上甚樂焉。每稱曰。家裏。還京後。數數念之不置。彬亦欲專寵。俾諸幸臣不得近。數導上遠出。及再度居庸。仍戒守者。毋令京朝人來往。蓋上厭大內。初以豹房爲家。至是。更以宣府爲家矣。八月。自萬全天城至大同。九月。上自稱鎮國公。并製牙牌誥券。封朱彬爲平口伯。朱

泰爲安邊伯。世襲。上欲自耀武功。假重兩人。親定爵名。十月上渡黃河。次榆林。十一月至綏德州。幸總兵戴欽第。納其女。十二月。自榆林。歷米脂。綏德。渡河。歷石州。文水。諸州縣。初在偏頭關。索女樂於太原。有劉良女者。晉府樂工楊騰妻也。以謳進。遂當上意。及自榆林還。至太原。復召之。載以歸。自是。大見寵幸。左右或觸上怒。陰求之。輒一笑而解。彬以母呼之。曰。劉娘云。十四年正月。發太原。王子還。至宣府。二月。命彬提督十二團營。王申。自宣府還京。是日。先駐外教場。親閱所獲首口器械。申刻乃入。文武羣臣具綵帳銀幣。羊酒奉迎。及頌。賜銀牌花紅。俱如前。上自加太師。敕諭南幸。廷臣伏闕極諫者百餘人。宣諭乃退。彬患之。激上怒。三月望日。託氣疾免朝。越四日。悉下庭臣於獄。考訊死杖者十二人。指揮張英。上言。車駕出。必不利。乃肉袒赴闕。剗刃於胸。以諫。法司阿彬意。擬斬。并杖死。於是京師連日陰霾晝晦。禁中水自溢。高於橋四尺許。橋下。七鐵柱。齊折如斬。南行之議始寢。顧怒不解。意勃勃未已。會宸濠反。報至。議親征。下令有諫者。必處以極刑。彬兼督東廠。是時。張銳居東廠。錢甯居錦衣。彬兼兩人之任。其權愈重。勢益熾。命楊廷和居守。毛紀贊之。梁儲蔣冕扈行。八月癸未。發京師。彬提督贊畫機密軍務。仍軍門提督。官校辦事。丁亥。至涿州。時都御史王守仁平濠之奏已至。上決意南幸。太監張忠勸彬泰等。各以兵從。欲掩爲己功。於是留守仁疏不下。戊子。上至保定府。九月。張宴堂上。巡撫五符。巡按管糧主事。皆侍宴行酒。上問符。知善飲。與爲藏闔之戲。符偶勝。上不悅。故投闔於地。令符拾之。罰飲數瓢。符頽然。上復大笑。戊戌。上至臨清。山東鎮巡官皆迎。越三日。傳令進宴。宴具草略。上視之。笑曰。慢我何甚。竟不怒。及宴。都御史王珣獻觴。步緩。上目

之。彬等怵瑀，謂上意不測。明日復宴。漕都御史龔宏趨進，自言姓名，蓋恐上誤以爲瑀也。彬從旁厲聲叱之。龔并罪兩人，上不爲動。上之南征，劉娘娘疾未卽從，與約召以玉簪爲信。過蘆溝橋，因馳馬失之。大索數日不可得。及至臨清，遣人召劉，劉以非信辭不至。癸丑，上獨乘舸晨夜疾歸。至張家灣，與劉氏俱載而南。其發臨清時，內外從官無知者。旣而始有數人追及之。道遇湖廣參議林文繼，入其舟，奪一妾而去。十一月辛丑，龍舟自徐州順流而下，至清江浦，所至捕得魚鳥，分賜左右，受一鱗一毛者，各獻金帛爲謝。至是，漁於浦者累日。南京及河南山東淮揚等處文武官，皆以迎送，彙集戎裝，徒行道路間，無復貴賤。彬不時傳旨號召，有所徵索，拷縛縣長吏，不異奴隸。通判胡琮懼而自縊。南京守備成國公朱輔，見彬卽長跪。總兵鎮遠侯顧仕隆，稍不爲屈。彬怒，數窘之。彬又遣官校四出，至民家，矯旨索鷹犬珍寶古器。民惴惴不敢詰，或稍拂之，輒捽以去。近淮四五百里間，無得免者。甲寅，至淮安，屏侍衛，徒步入城。幸總兵顧仕隆第，至寶應，漁於汜光湖。十二月，至揚州。先太監吳經至，揚選民居壯麗者，改提督府，將駐蹕焉。經矯旨，刷處女寡婦，民間洵洵有女者，一夕皆適人。乘夜靜，爭門逃，不可禁。知府蔣瑤詣經懇免，經大怒曰：汝小官，敢爾。汝頭願欲砍邪？瑤不爲動。徐曰：小官苟逆上意，自分必死，但百姓者，朝廷之百姓，倘激生他變，恐將來責有所歸。經愈怒，揮使去。經密覘寡婦及娼家，夜半，忽遣數人叩城門，呼駕至，令通衢燃炬，光照如白日。經逼入其家，捽諸婦出，有匿者，破垣毀屋，必得乃已。無一脫者。哭聲震遠近，尋以諸婦分住。尼寺有二人，憤悲不食死。瑤爲具棺殮之。自是諸婦家皆厚以金贖，方得歸。貧者悉收入總督府。壬戌，上以數騎獵於

城西遂幸上方寺。自是數出獵。以劉娘諫而止。幸未漁於儀真之新聞。因視大江。命彬攝祭。明日幸民黃昌本家。閱太監張雄及守備馬昇所選妓。以其半送舟中。丙戌。至南京。十五年正月丁丑。迎春。南京備諸戲劇。如宣府。復欲就南京郊祀。梁儲疏止之。彬率邊卒數萬。恃恩跋扈。無人臣禮。公卿而下。側足事之。魏公徐鵬舉。宅不啓中門。不坐中堂。因高皇帝數臨幸。避之一日。招彬宴。遵故事。大怒。告以故。嘿然而止。時喬宇爲參贊。尙書守正侃侃。府尹胡宗道。樸憤。數被辱。如傳吏。憂懼。臥病。五月。竟卒。府丞寇天敘。代署。與宇並。皙而長。挺身協力。每事裁抑。且募健兒。置左右。彬每矯旨有所索。必請面覆。其計稍沮。素輕南人。弱可欺。戲命從者手搏。不勝。驚懼。人皆倚以爲重。一日。彬遣使索諸城門鑰。城中大駭。督府使問宇。宇曰。守備者。所以謹非常。城門鑰。有祖宗法制。孰敢索。亦孰敢與。雖天子詔。奈何。督府以宇言拒。乃止。六月。幸牛首山。宿焉。諸軍夜驚。左右皆不知上所在。大擾。久之。乃定。傳者或謂江彬將爲逆。俄噤而止。理或然也。時有物狀如豬首。墮於上前。其色綠。又拘留婦人之所。滿壁皆有若人頭。懸掛於上者。而濠繫舟中。泊江干。日夕傳傲。上頗疑之。閏八月八日。詣孝陵。辭。癸巳。受江西俘。丁酉。自南京旋蹕。九月戊辰。至清江浦。上不豫。進及臨清。太醫吳傑。自京召至。上視之。而責曰。何不蚤看我。傑奏萬福無恙。諸內侍密問狀。曰。病亟矣。幸可及。還內耳。彬來問。故寬之。曰。何害。行即愈矣。十月庚戌。至通州。兵部尙書王瓊入見。彬尙欲導上幸宣府。恐一至京。有郊祀。廷試事。淹留。又恐廷臣習前事力爭。乃說上。召皇親勳戚內閣府部科道。官俱至。通州議宸濠獄。彬上言。奉鎮國公朱壽指示方略。將濠逆黨。申宗遠等十五人。并家屬擒獲。乞明正其罪。

批答褒賜。敕歲加祿百石。廕一子錦衣衛正千戶。戶部媚之。援慶雲侯例。先給千石。彬在上前。談笑任情。至是指斥朱壽名。若敵己云。上之北還也。每令濠舟近御舟。銜尾而行。意甚防之。旣用彬言。謂左右曰。吾必決此獄。乃入。楊廷和等已至通州。請如先年處置高煦。實鑕例。祭告天地宗廟。仍敕天下諸王。議罪。然後明正其法。乃爲合體。上使人諭意再三。竟莫能奪。己丑。賜宸濠死。焚其屍。然上體已憊。諸內侍更疊。德輿還京。彬計不得行。甲午。上至正陽門城外。文武百官迎於橋南。是日。大耀軍容。彬等皆戎衣侍上。俘諸逆者及家屬數千人。陳輦道東西。陸完錢甯等亦皆裸體反接。以白幟標姓名於首。死者懸於竿。亦標白幟。凡數里不絕。上戎服乘馬立門下。閱視良久。乃入。諸俘者自東安門踰大內而出。彌望皆白幟者。訝其非佳兆。丁酉。南郊初獻。上拜。嘔血於地。不能終禮。扶歸齋宮。躡宿。駕入。遂病不起。三月八日。庚申。改團營。西官廳爲威武團練營。以西官廳監督太監張忠。安邊伯朱泰。平□伯朱彬。都督朱洪。朱暉。朱周。朱琮。俱提督團營教場。與威武團練營操練人馬。令別開團營教場。十四日。丙寅。上崩於豹房。大學士楊廷和等舉哀畢。卽定策往奉迎。傳遺旨。令太監張永。武定侯郭勛。安邊伯許泰。尙書王憲。選各營馬步官軍防守皇城四門。京城九門。及草橋。蘆溝橋等處。九門防守之命及下。許泰意若不怡。邀兵部尙書王憲至東閣。欲有所言。問則徙倚不對。而私相諍語。廷和曰。危疑之際。所仗在提兵。諸公報國。正在今日。欲言則直言。何令我輩揣摩耶。憲曰。許總兵與江平敵同事。西官廳今用許防守。而遺平□。以此未安。蓋爲彬地。且以脇也。曰。團營根本。故留平□。主調發。泰不應。以舌澤吻。作怒色。且微語曰。這箇賊。問誰是賊。泰曰。李琮。又

曰。秦家止有三百人防護。蓋又以琮脇也。廷和曰。今日忠臣義士。無不奮力。琮欲何爲。自取滅族禍。秦曰。琮兇狠平口。腹心也。秦亦憂之。曰。有諸公在。琮不足憂。亦何能爲也。若必欲與平口同事。可一言決之。秦意不明。與江彬異。同欲持兩端。以窺趨避耳。頃之。提督張洪至。言彬可防。曰。君疑江反耶。江征流賊。回豹房。過隊。先帝親閱。見其驍勇。因置置左右。旣而獲從巡狩。一時內外文武。皆有之不獨江也。江何罪欲反。近年反者。內實饑宸濠。外劉七藍五鄒老人。俱隨起隨滅。江親臣家屬在人掌握。不比數賊耳。從兵雖多。皆朝廷爪牙。先帝遺愛在人。餘威可畏。假欲萌非望。卽顯盼齷粉矣。誰肯同之。自取滅亡哉。若江能與諸君協力共濟嗣君。至日閉門辭爵。不失富貴。何必自疑。人亦政不須疑之耳。諸公本兵。安所出策。我書生。握數寸管。其何能爲。洪唯唯而退。洪蓋爲彬遊說探意者。對語明快。彬聞之。稍安。是夕。京城市間人馬介然有聲。人心皇皇。以爲彬且反矣。又聞彬在家不成服齋宿。廷和聞笑曰。賢子何能爲。以一刺投彬曰。謝江公。大事多賴鎮定。彬喜。以爲楊公不我虞也。乃成服齋宿。十七日臨朝罷。密語同寅。皆曰。連日介介於懷者。正以此耳。曰。彬手握重兵。發之。須得機會。是日坤甯宮安獸吻。彬入。與工書李鑑。吉服行禮。廷和等赴文華殿右坊。寫上銘旌。大闢俱在。廷和屏左右。謂魏繆曰。大功已定。大患未除。未爲全美。魏問其故。以魏與江連姻。不可徑言。先慰之。曰。古人大義滅親。周公誅管蔡。王導滅王敦。至今流芳青史。公雖與江爲親。乃勉奉大行命。非本意也。今外議紛紛。若不早請太后。擒之。恐彼不自安。將貽嗣君憂。未免爲大功之累也。張銳疾言。言彬有何罪。廷和曰。如擅入邊軍。禁內擅立威武團練宮。擅改團營爲西官廳。擅立鎮

國府所犯不一。眞死有餘戮。魏曰實然。銳猶極力爲辯。曰不須回護。我輩言出禍隨。已委致身家。公雖無子孫。獨不念祖宗墳墓與兄弟耶。嗣君途中萬一聞變而驚。張公請任其責。辭色俱厲。陳嚴贊之曰。且收住。俟嗣君處分。廷和曰。亦擬旨監候耳。異日事在我等。自當斟酌從寬。卽擬旨奏太后。出閣中候命。久之未下。廷和曰。權璫對我輩言。尙百計攔截。在宮闈豈肯贊成乎。若不捷。禍必先我等數家。我輩豈可離此地。誠死此亦得死所。衆曰。天祚我明。必無此事。頃有報宣候右順門者。久之陳嚴來曰。江彬已擒矣。幾逸出。初彬行禮畢。張永知其謀。留彬饕於宮外飲。蓋欲以計擒之也。未發。張銳潛使人報之。遂奔西安門。以西官廳文書爲辭。中道折向北安門。當關者曰。有旨留提督。彬叱曰。皇帝何在。旨安從得。手批門者。守門人羣擁之。追者至。就縛。拔其鬚幾盡。頃之神周李琮亦自其家縛至。罵彬曰。汝蚤聽我言。豈至於此。彬曰。悔不自斷。其子杰。鰲。皆錦衣指揮。并其母亦然。收捕者云。彬已分布腹心於東西北三門。裹甲裹糧。立馬以伺動息矣。彬之未擒也。或有請於廷和者。曰。一力士之力。曰。安有許大力士。時久旱。遂雨中。慳聲雷動。周琮亦以邊將得幸。俱賜國姓。至都督與彬聲勢相倚。隨駕所至。彬索賂累數千萬。周琮亦十之二三。時各鎮奏報。有爲彬壅滯二三歲不得達者。彬旣執。一時赴鴻臚寺投進者。凡九十九封。赴通政司者。七封。藏於彬家及鎮國府者。三十封。千戶常洪以彬僞旨。採方物於湖廣。其中多奇怪難致者。巡撫官折價以進。爲銀萬五千有奇。北至張家灣。洪聞彬敗。潛遯去。又曹成王宣者。稱彬旗校。至杭州。設香案於鎮守府。召致仕尙書洪鍾至。謂之曰。有密旨。令汝傾貲產謝恩。因羈之別所。趣其家營辦。然實無所奉旨也。

又王銳者亦稱錦衣千戶。至杭以收誌書爲名。索賂數千。至是亦潛遯。所可以聞。太后命法司緝捕洪等。世宗立。六月戊子。礮彬於市。子及神周皆斬。殞其圖於天下。史官曰。書云三風十愆。有一者。家喪國亡。若武宗者。可謂兼之矣。江彬無它材能。特以便給取容悅。弄天子如傀儡。提之東則東。提之西則西。盜竊威福。惟賄是圖。毒流縱淫。騷半天下。及其握重兵。稱大帥。未嘗有所樹立。不知武宗何以信任不疑。若此。非廷和識力犀斷。定難俄傾。京師百萬流血。尙可言哉。

明書卷一百五十五

列傳十五

倭幸傳二

錢甯傳

錢甯不知所出。幼鬻於太監錢能家爲奴。能嘗鎮雲南。私通安南。爲巡撫王恕所發。後召歸。復守備南京。能死。甯冒其姓。正德初。逆瑾用事。甯結納之。因得見上。猥狡善伺察。迎合又善射。拓左右弓。大被寵幸。賜國姓。爲錦衣正千戶。累陞左都督。掌錦衣衛事。典詔獄。權日益重。引樂工臧賢及番僧等相比爲姦。又請於禁內建豹房新寺。誘上。畋遊爲娛樂。雜陳伎術以固寵。甯朝夕侍上。醉常枕之而臥。百官候朝。每至晡。莫得上起居。惟探伺甯甯來。則知駕將出矣。都察院經歷錢岌拜甯爲父。任以腹心。令潛察中外官有非議己者。輒計去之。諸司事必與甯關白。諸大臣造詣惟恐後。小疵其意。輒遭中害。或事危急。往往叩甯卽得解。內官武將欲轉爲鎮守總兵官。率持重資投其門。貨賄無算。大學士楊一清先爲吏尙書考察。甯有所請。不允。嗾其黨肆劾。遣人鬻鈔於浙。鈔敝價重。皆抑配於民。布政方良永疏其狀。請詰責令罷。若懷詐遂非。宜明正典刑。甯見大怒。欲中以危法。或說之曰。彼豈畏罪。害之適成其名。乃止。密召所遣人還。良永

以母老身病。乞致仕。不允。下巡按查勘。乃得請。初。良永之上疏也。常以書抵當路。爲甯所覺。其人大懼。請謝罪。爲十二拜禮。乃已。一時相埒者。東廠太監張銳。中外稱曰。廠衛衛校。誼爭三法司道。三司務林華。出不避。因杖之。校語不遜。評事沈光大復杖而囚之。甯遂奏校乃執駕人役。二官擅辱。違例。執光大華下錦衣拷訊。黜光大爲民。華降級調外。廠衛聲勢。赫奕。校卒每至各部白事。呼卿佐爲老尊長。卿佐亦降顏禮遇之。體貌陵彘。公事掣肘。論者每太息焉。甯富貴已極。於石經山造寺。窮極壯麗。邀上幸之。數日乃還。宸濠久蓄異志。甯得濠重賄。因與圖復護衛屯田。且令數進金玉玩好。每進必賄甯以達。甯又日伺朝廷動靜。泄之於濠。謀令世子赴闕爲立儲地。甯爲畫計。先以玉帶綵幣附典寶萬銳馳歸。詐稱上賜。以眩衆聽。江西副使胡世甯。典寶閻順。發其事。甯又爲之隱蔽。文致世甯及順罪。戍邊。時江彬得進。擅寵用事。甯思間之。一日搏虎。召甯使前。縮不敢往。上笑曰。誰謂汝勇者。彬見。亟趨進。上爲虎所迫。幾傷。彬力撲之。乃解。上喜。猶戲曰。吾自足辦。安用汝。甯信爲然。潛伺彬短言於上。不應而心訝。且厭之。彬亦知甯必不相容。乃探微旨。調邊兵與京營兵互出入操練。又言宣府近敵兵精。應合大同兵勦敵。可立大功。壯威武。如前朝喜峰口故事。且山川壯麗。民居豐密。多美婦人。可取。何如居大內。邑邑爲廷臣所制。日聒耳不得自由。空享華屋細廬。失馳逐瞬息千里之樂耶。上大以爲然。彬私計謂甯掌衛事。居中刺姦。勢不及從。上一出國門。獨侍側。惟所欲爲。盤桓不歸。可居外制中。蓋反其術用之。上亦適投所欲。自居庸至宣大以及陝西。幾忘歸。甯已失所。馮依。竟不悟。既度上必不宜子。密主宸濠。一日事成。已與王瓊爲功首。彬在掌握中。不足

憚瓊故有威名可仗。甯又遣妖人交關其間。謂帝星已明。王有異相。府中有異兆。事在必成。成則封公。如魏國故事。瓊比李韓公。其實先許李士實劉養正。以此啖之。令爲死間也。彬亦頗聞之。見上。未敢直言。惟言北巡勤武。則凡百竅宄盜賊。自當消鑠。且寬甯目前之礙。甯亦喜。自得自擅。省常待之勞。安享富貴之樂。恠睢暴戾。益無所忌。故御史李鳳鳴者。爲劉瑾所喜。與甯同捕賊。酷暴爲衆切齒。瑾誅得罪。削仕籍。家居無賴。益甚。出入諸貴幸門下。倚馮聲勢。甯通其愛妾。故庇之。嘗與從弟鳳翔有怨。嗾緝事者發其陰事。收詣刑部。當死。刑部疑有冤。併捕鳳鳴鞠之。鳳鳴使其妾懷狀赴闕。懇因自經死。門者以狀聞。乃仍坐鳳翔死。而釋鳳鳴。御史張仕隆許寬。以失入譴調。周鷓潘傲亦爲所構。鷓陰賂甯。得復職。傲逮問。尋免刑部獄卒。例有供食錢。復移爲公費。而以囚糧之贏者給之。積弊已久。會錦衣千戶王注與甯結好。挾甯勢。縱恣有警者善歌。出入注家。警者之兄與人鬪。不勝。注爲執鬪者榜掠死之。其家訟於刑部。攝注就理。甯庇之。不發。尙書張子麟郎中林文績。知其故。置不問。而員外郎劉秉鑑。攝注急。又不發。秉鑑卽據衆證成獄。甯聞怒曰。我親戚人誰不知。乃待我言。陰諷東廠發盜用囚糧事。主事鄭懋德等收繫獄。且言諸堂官皆利其贏。請窮治。於是三法司皆恐。詣甯謝過。甯佯不知。皆以秉鑑觸禍。尤之。甯必欲改獄。乃覆看。指爲病死。注得釋。而死者之家。以誣反坐。注始出。造法司。與揖拜。若賓客禮。甯意釋。乃寢囚糧事不治。懋德等降調。畿內盜賊縱橫。參將宋寶。桂勇。賈鑑等。獲劇賊申。稽頭。趙祥。何通。及其黨九十餘人於近郊。賜救獎。勵提督太監張忠。都督許泰而下。太加賞蔭。旣而窰頭等六人越獄。走匿。故賊郝聚家。兵部募擒賊者賞。

百金。陞二級。匿者同罪。聚乃首於官。擒祥等四人。審頭及通皆格鬪死。又以所捕他盜。皆指爲審頭黨。甯奏聞行在。兵部以爲甯功。亦賜敕獎勵。增俸加廩。初。賊之逸。上在宣府。聞之。謂甯居守。顧有此變。頗不悅。江彬因譖之。甯寵由是漸衰。而濠反謀已露。朝議遣官宣諭。甯從中勸沮。不可得。與臧賢密報濠。且謂議者欲離間宗室。將坐以罪。不知上已先疑甯黨附。蹤跡益顯。適值天亡之期矣。濠旣反。收臧賢杖議。謫戍。甯恐連及。遣人殺於塗。盡并其家。猶務爲掩飾。祈免罪。上親征。勒兵諸內侍及江彬以下皆從。初不及甯。留之居守。甯恐離上左右。爲人所發。乃私求扈從。及駕發出正陽門。始令甯俱南。江彬計已得行。至臨清。用間止甯董皇店役。遂白其通濠狀。上大怒。曰。我固疑之。黠奴乃敢爾。時將渡淮。遂令卽臨清拘繫之。又速遣人至京。錄妻子家屬。并收其黨。太監劉璟都指揮廖鵬齊佐王華都督同知王瓚於錦衣獄。璟初鎮浙江。貪利亡厭。賂改兩廣總鎮。及還。又賂甯。得再鎮河南。過江西時。受濠饋。遂與通。鵬福建人。投附太監廖堂。冒姓稱爲弟。與子鎧銳等皆冒功。得陞官。錦衣堂鎮河南時。鵬隨往。百計脍削。公私一空。及廖鑾鎮陝西。復令鎧隨。脍削亦如之。河陝之人。怨之入骨。鵬姦瑣。詭獵貌。寢如鬼。諂事甯。無所不至。後掌南鎮撫事。奢僭無度。公卿士夫。多與往還。及宴會其家。靡然不以爲非。瓚亦累冒功。起白身。至都督。依憑權倖。出入公卿家。有所求請。無不立應。拂其意。用計傾之。爲甯通賄。自入者亦數萬計。與鵬皆與濠通。佐準皆甯壻。驟貴者。明年。駕還。械甯以從。與諸從逆者俱俘。以入。藉其家。玉帶至二千五百束。金十餘萬兩。銀三千箱。胡椒千石。他珍玩財貨。不可勝計。會上崩。世宗卽位。命磔於市。仍揭其罪狀。并繪圖榜示天下。甯子永

安甫八歲已爲右都督。養子錢傑等十一人。姦惡相濟。俱官錦衣。併斬。王準已先死。鵬璉佐鑑。以交結朋黨。紊亂朝政。論斬。妻子沒爲奴。璉僅革職。旣而鵬等屢奏辯。延久未決。鵬璉死獄中。

史官曰。錢甯奮狙僧之習。當昏靡之主。駕其諂智。益以姦謀。遂使鵬張於法紀之場。競爭於肘腋之地。命儻傭侶。潛通逆藩。而陰發於江彬。至身死禍及而不覺。可謂惡人磨惡矣。劉璉廖鵬等。佐益兇逆。橫肆貪殘。招權市歎。誅戮隨至。實其自取。亦又何尤。夫太陽麗空。則羣陰消伏。昏靈晝晦。則狐嗇爲祥。君子未嘗不致憾於武宗之爲君也。悲夫。

張孚敬桂萼席書方獻夫霍韜黃綰熊浹黃宗明傳

張孚敬。初名璠。字秉用。永嘉人。父昇。凡三娶而生孚敬。孚敬生負異質。動止不凡。及長。貌秀偉。美鬚髯。有大人度。踰冠。舉鄉試。明年不第。孚敬產不能中人。而恢廓從性。動止若大豪。築羅山書院於姚溪。聚徒衆。其中與講治經術。傍析時務。孚敬精於五禮。旣七試春官。而七不利。將爲吏部選人。御史蕭鳴鳳善日者言。得孚敬干支而異之。曰。毋爲選人也。屈指曰。從此而三載。當成進士。成進士。卽與人主若一身。傾動海內。於世無比。孚敬乃強歸。及其成進士。則年已四十七矣。世宗自與邸來。卽帝位。議追尊其父與獻王。與母蔣妃。時少師楊廷和居首揆。要禮臣議。以上入繼武宗。武宗於上。兄也。不當後。卽後孝宗。而稱皇考。孝宗之後。皇太后張曰聖母。武宗曰皇兄。而稱與獻王曰皇叔父。與獻王王妃蔣曰皇叔母。與國王妃而曰封益王之次子崇仁王爲興王。以承獻王祀。頗引漢唐事爲據。上意不懌。孚敬乃奮上疏言。上旣以興世

子入繼武宗皇帝統。非繼孝宗嗣也。今以後武宗則弟。以後孝宗則自有子。奈何舍獻王弗考而考孝宗。使獻王有子而無子。上有父而無父哉。上心是之而不能決。姑報聞。於是連駁禮官疏。乃合議。議尊孝宗曰皇考。與王曰本生父。獻皇帝時。孚敬已去。爲南京刑部主事。復上疏爭之。曰。是二本也。孝宗法得稱皇伯考。不得稱考。獻帝得稱考。不得稱本生。因上所草大禮或問。自孚敬之疏上。舉朝擲。揄之。毋有與過往者。而上則益心動。士大夫如南京兵部侍郎席書。吏部員外郎方獻夫。兵部主事霍韜。給事中熊浹。都督府經歷黃綰。輩亦稍稍爲議。及疏如孚敬指矣。久之。尙未決。桂萼時方自邑令轉刑部主事。復具疏力伸其說。因悉錄孚敬前後疏上之。朝具奏而夕報可。且召孚敬。萼二臣入廷辯。道拜翰林院學士。時部院大臣給事御史俱言其不可用。不聽。翰林自學士以下。差與孚敬等爲僚。俱乞骸。亦不聽。孚敬。萼復上書論尊皇考。聖母諸禮。悉從之。明年。進廟街議。俱擢詹事府詹事兼學士。桂萼前孚敬登第者十年。三調邑令。好剛使氣。與上官忤。被笞。汗白簡者再三。而得解。萼素非與孚敬善。旣言禮合同貴幸。乃相睚。屢上疏論首輔費宏而推楊一清。一清亦虛懷待之。明年。孚敬乞歸省墓。且陛辭矣。上忽使中使止之。遷兵部右侍郎。轉左侍郎。時費宏欲有所屬於尙書李鉞。鉞弗能應而病甚。乞歸。孚敬卽上疏言宏劫制鉞。不得行志。邑邑且死。而萼所以醜詆宏。尤不可聞。宏旣去。萼遷爲禮部右侍郎。尋與孚敬俱兼學士。禮兵二部侍郎。之得兼學士。自孚敬尊始也。獻王旣已稱皇帝。復稱皇考。而諛者遂欲宗之。列祀太廟。孚敬。萼與禮部尙書席書力爭之而止。時故有妖人李福達者。正德間亡命遊江南。而武定侯郭勛所善客曰張寅。自云家

山西善丹竈之術。且能使鬼。與其子皆以輸粟得指揮使。及省曹掾。還山西。而遇其鄉人薛良。曰。此故李福達也。首之御史馬錄所獄具。而侯助爲之居間。錄併劾助。助奏辯。上疑之。下法司重讞。如錄擬。上益疑。其與錄比。而傾侯助。屬李敬署都察院。時桂萼已爲吏部左侍郎。俾署刑部。而少詹事方獻夫署大理寺。悉逮法司。尙書顏頤壽。左都御史聶賢。大理寺卿湯沐等廷鞫之。盡反其獄。坐錄等皆永戍。頤壽等皆罷職。有差。而張寅之爲福達與否。意莫能明也。皆召對內殿。賜璽書獎諭。予二品服金花帶。而以獄事出李敬手。益愛重之。且念御史縱。非李敬莫能制。旬日間。進李敬爲禮部尙書。文淵閣大學士。俾仍掌都察院。而萼爲禮部尙書。獻夫亦代萼爲吏部左侍郎。尋賜李敬。尊銀記各二。李敬曰。忠良貞一。曰。繩愆糾繆。萼曰。忠誠靜慎。曰。繩愆糾違。李敬念以書生片言當主意。非久取相位。思有所稱塞。大要以破人臣之弘交。而離其黨。一意奉公守法。不復卹譏怨。其駁御史一以威。時有所糾。按。然事頗毛鷲。而性稍廉介。萼外示緩而中實險急。嘗以考察。請令給事御史相論。糺。上從之。以是益失中外心。時首輔一清議散館。欲留陸燾等數人爲翰林。而上難之。李敬密疏言。此曹子皆費宏所植私土。而一清成之。勿留便。上於是出燾爲給事中。三四人得御史。餘皆用故資。選補。皆恨李敬切骨矣。明年。李敬與萼加太子太保。李敬獨辭。以上未有太子。官不當虛設。遂改爲少保。上享太廟。回。李敬候道左。上奇其貌。而目屬之。賦詩以賜。曰。予喜荷天眷。賚賢作邦。珍賜玉帶。蟒衣。上旣以追崇獻皇帝后得愉志。欲錄以成書。而李敬爲總裁。萼等副焉。旣成進之名。曰。明倫大典。李敬進少傅。加太子太傅。吏部尙書。謹身殿大學士。萼已爲吏部尙書。加少保。

太子太傅方獻夫亦加太子太保。霍韜進禮部尚書。獨固辭不就。而熊浹黃綰以下皆驟貴矣。孚敬乃下詔罪狀抗議者。楊廷和諸大臣皆削奪官職有差。桂萼之爲吏部尤私其所厚善。而修暉毗怨。其故笞萼者。都御史則逐之。知府則孽而戍。獨以名薦魏校爲國子祭酒。屬使代疏草。其條對及經學時政。往往精深。當上意。孚敬問者。覺不如知而意恨之。而校與新建伯王守仁爭名不相下。萼爲之搆守仁。奪世封。而校入侍。經筵忤旨。改補太常。萼不能救。當孚敬之入內閣。上愈傾向之。所密問還往。月以十數。問稱字及號而不名。楊一清雖居首揆。以老成爲上所禮重。然信之則不能如孚敬深。而桂萼自吏部入居孚敬下。孚敬氣益發舒。下視六卿莫敢與抗。乃至輕一清。亦不復修後進禮。萼有所逮白。往往爲孚敬所抑。屈孚敬亦以氣凌之。用是俱憾孚敬。而一清亦自與萼隙。三人鼎而相詆謀。上聞亦厭之。而孚敬又復上疏。謂三楊以後。姦人鄙夫。占據內閣。貪污無恥。習以爲常。復以閒廢有年。陰求起用。去而復來。略不懲悔。前軌來而復去。尤且陰爲後圖。其人日輕。其勢日重。且不知何緣。止推首者一人。餘皆唯唯。小有異同。旋加擠斥。乞聖明嚴諭。毋得懷姦設險。詭隨便己意。蓋指一清也。於是一清奏辯。爲孚敬惡。聶遷之攻之。欲臣擬重處。而臣不敢聽。以是恨。且傍及孚敬他語。乞骸骨。上兩爲溫旨以解之。而於一清尤厚。前是。陸粲爲給事中。有所建白。一清輒擊節稱歎。謂而家敬與不過。粲內感一清國士知。而禮部侍郎徐縉。次當柄用。素事一清。而爲粲座主。時時以上意語粲。謂且厭張桂。有武定侯郭勛帥營務。時大闕張永久廢。一清以其知兵。要孚敬共薦之。與侯勛同爲帥。遂許發勛貪汙跡。俄而永暴卒。中外頗疑中勛毒。言路遂擊勛助。

故以大獄事獨感孚敬而嚴事之。於尊不爾。尊亦數密攻劾。且謂孚敬實庇之。至是上下給事御史擊劾章於一清。言孚敬私助。必曲救勿聽也。一清泄之縉。縉以語粲。而是時桂萼尤爲公論所不齒。會給事孫應奎疏論一清雖練事。而尙通多私故舊。此可與諮謀。難獨任也。孚敬雖博學。而性偏。傷於自恃。猶筋厲功名。常抑其過而任之。桂萼則鷲鳩之資。桀驁之性。作威福。援黨與。政以賄成。事多沮撓。使天下之人敢怒而不敢言。不可留也。上頗是之。於是一清辭疏上。優詔勉慰而至。孚敬專疏各有策勵語。一清乃復上章辭。謂今之持論者多尙紛更。臣獨勸以安靜。多尙刻削。臣獨矯以寬平。欲變法。臣謂只宜守法。欲生事。臣謂不如省事。用人則謂才難當惜。斷獄則謂罪疑惟輕。以故齟齬參差。願賜骸骨。避賢者路。蓋指孚敬。萼冀以動搖也。而給事中粲。果有疏論孚敬罔上行私。專權納賄。擅用威福。廣報恩讐。因指摘其罪狀。而謂孚敬雖狼戾。自執拘多私。其術猶疏。爲害猶淺。桂萼外若寬迂。中實深刻。忮忍之毒發於心。如蝮蛇猛獸。犯者必死。上乃責孚敬。萼負君忘義。令孚敬以原職回家。創悔資後用。萼革保傅大學士銜。以尙書致仕。仍許孚敬馳驛。而罪陸粲。以不蚤聞奏。遠下詔獄。杖謫荒裔。居二日而榜示朝堂。明孚敬專功罪。且戒中外。毋得更加齟齬。孚敬既陞。而上密諭一清。謂孚敬可還之。閣否。一清言。上欲還孚敬。固當等渙汗大號。甫揚庭而遽改之。非所以取信天下。少遲孚敬至家而後召可也。上乃止。於是詹事霍韜上疏力攻一清。謂其納賄壞綱。專權誤主大罪。因自劾乞歸。上溫旨諭留。韜一清上疏辯。上亦溫旨諭留之。而意已移矣。孚敬行至天津。而上使人以璽書召還。復職。上疏辭。優詔不許。一清亦三乞休。亦不許。霍韜以省母

給假。因復爲桂萼辯冤而攻一清。時一清之所薦者闕張永。旣用以黃金器酬一清。永死且葬。其家復以黃金器乞一清爲志銘。至是事亦發。上乃報輅。謂一清居內閣輔臣首。乃大肆納賄。不畏人言。非大臣體。念係耆舊。法司會奏處置。旣法司議上。乃令一清自陳。而孚敬三上密疏。引一清贊禮功。乞賜寬假。上允之。許致仕。陛辭令馳驛。予金帛從優。一清歸。復有旨追所受張永金。而悉奪其官爵。一清大恨曰。老矣。乃爲孺子所賣。豈非天乎。邑邑疽發背卒。又四年。復其官。又十二年。贈太保。諡文襄。桂萼亦以是月復故官致仕。亡何召還職。然氣黯然。竟其身不復振。復請告歸。病羸卒。而孚敬益獨見任矣。乃上疏請求節行。道義足以服人者。寘之首。而臣居其下。上嘉其退讓。下其章於所司。時國家優外戚。至有一門三侯伯者。有一公一侯者。皆得世封。爵日以繁。祿費日以冗。而功臣爲之解體。安昌伯故外戚也。而家請封。孚敬謀之。方獻夫。俾引唐宋故事。如長孫無忌。郭子儀。曹彬。皆以大勳挾椒房。然封爵不及世。而安昌伯等乃世乎。孚敬白之。上悉議從革。其見封者。僅終身。人以爲快。上嘗諭孚敬。留都天下首地。而事皆中貴人專之。何謬也。擇一宗室近而賢者守之。留守便。孚敬言。高帝以親王領宗正。不久而罷之。宗室不預機政者久矣。臣不敢奉詔。然自是能得上意。數數言中官之使外者多貪橫。爲國蝨賊。上具悉其狀。悉裁革。鎮守監槍市船之數。後先殆盡。孚敬所疏。審幾微。專委任。借人才。求民隱。諸事上悉嘉納。是時上日事經筵。講求聖學。作敬一箴。及宋儒五箴。注皆發之。孚敬天下欣然望太平。而孚敬又自議禮起。上以明聖述作爲任事。取孚敬裁決。大者若分祭天地南北郊。又別爲朝日夕月壇於東南郭。費大司農金錢以鉅萬計。細至武

弁燕居冠服之制。毋不有所更定。獨於文廟易孔子像。去王號。識者猶以爲宜。而至減樂舞。裁籩豆。表天下惟人主尊。上意乃悅。而儒者不謂然。孚敬行之不顧也。又請倣古立九嬪以廣儲嗣。孚敬始名璵。至是以與上諱嫌。請改至再。上爲易名孚敬。字懋恭。手書賜之。西第成。以獻皇帝遺墨扁其堂。而侑以白金十鎰。綵幣肥羜。上以故所讀書。姚溪書院獻。特命有司新而廣之。賜名曰貞義。其堂曰抱忠。孚敬於居第。復爲崇闕。以奉誥敕御札名之曰寶繪。居第延袤可二里。其土木工石一資之官。凡孚敬所議。上無不合。而獨議郊祀配天禮稍愴悌。初。上不欲太祖太宗並配。而定以冬至圓邱。後竊以爲不可。凡三四往復。甚苦。而孚敬卒不可。乃下禮部徑行之。於是太宗始不得從配天矣。建南郊。孚敬以閣臣知建造。非故事也。而是時吏科都給事中夏言重言。故以議皇后親蠶禮得幸。上賜四品俸。言事見聽。乃論劾吏部尙書方獻夫。進用私暱。而其大者如浙江參政黃卿。以孚敬之不悅而調卿以平。以孚敬之悅而補彭澤。姦回無故而改右諭德。又無故而超太常卿。因劾孚敬喜怒任己。好惡嗜人。上雖留孚敬及獻夫而爲停卿以平它補。孚敬乃上書力辯言之。挾私。上溫旨褒諭而已。獻夫亦力辯之。且辭。上亦不允。乃復諭獻夫。令卿以平調補。如前。薄責言以解。夏言之議親蠶禮。實自孚敬。以是孚敬在彭澤皆恨言。莫能間也。而上尙猶優禮孚敬。嘗召與禮卿李時對西苑。故仁壽宮議皇后蠶地。賜名醞珍饌。出所草賦示之。俾和以進。次日復諭孚敬。謂君臣之際。在朝當慎。他則猶家人禮。然且漢文召見賈生。語久前席。至今稱美。朕沖昧。世事未經。卿之

於朕無異周公愛成王。首以孝訓。他特餘事耳。卿夙夜在公。敬君盡禮。昨退遜太過。恐非輔臣所宜。夫輔臣與他諸臣不同。故曰導之教訓。傳以德義。保其身體。此則不可以。在朝之制。相與明矣。今後卿有奏無拘時。而來面相與計處。侯性志有定。方可廣接他人。酌別賢否。朕又欲與今春時奉兩宮豫遊。後與卿輩一游。以仰遵我聖祖不訓。孚敬復請慎選歲薦諸生。與進士舉子三途並用。一切考覈課成。皆爲嚴切。亡所寬假。而監生詹榮有所恨於徐縉。時縉已爲吏部侍郎。榮乃摺撫縉。它事奏之。下都察院。當坐榮誣。孚敬忽上言。縉夜使人以黃白金。賂請解刺入而捕之。則已逃矣。上怒爲罷縉。而特伸榮。孚敬之妻死。以繼娶告。上賜白金二鎰。大紅蟒幣四襲。羊八角。酒四十瓶。手敕以資吉禮。久之。行人司正辨侃言。上春秋鼎盛。未有皇子。宜擇宗藩之親賢者一人。留之京邸。以俟皇子生而後就國。上怒甚。命法司會文武大臣臺諫廷鞠。前是。孚敬已心恨少詹事夏言。欲去之。未有間。而太常卿彭澤。孚敬客也。故與言爭爲都御史。有鄰。而皆侃同年。侃嘗出疏草示澤。澤懷以與孚敬。謂茲事上所諱。而侃與言故善。若疏上而侃得罪。使之引言。則併禍矣。孚敬以爲然。面澤。乃語侃。少傳甚善。君疏上。當爲從。使必行。既有日矣。澤復報孚敬。錄冀以聞。而且謂言實使之。侃疏上。既就鞠。備受五毒。不肯吐主者。累日。詞不具。彭澤從旁以微詞挑之。使引言。侃瞋目曰。疏吾自具。汝謂張少傳許而趣上之。於言何與。都御史汪鉉。乃攘臂稱言實使侃。言拍案。嘗鉉幾欲拳毆之時。孚敬猶在列。給事中孫應奎。曹汴。前揖孚敬。且迴避。孚敬恚。趣入閣。復具疏言狀。上乃悉下言。應奎汴於獄。而命司禮太監侯勛。輔臣鑾等鞠。具得其狀以聞。上乃出孚敬。二密疏示羣臣。而

斥其伎罔。於是給事御史合論孚敬。上責令致仕。乃遠戍彭澤。輕辭侃罪。令爲編氓。赦言還職。自是連擢至禮部尙書。益貴用事。孚敬猶得馳驛歸。既陛辭。賜公服牙笏以識意。御史張寅追論孚敬與汪鋌誣陷夏言罪狀。上爲譴寅以安之。孚敬歸。甫五月。而皇太后數問上。張少傅今安在。非少傅安得爲若母。於是上復遣行人齎璽書馳召。孚敬遂趣命。既至。追論四郊武功。加兼太子太師。華蓋殿大學士。無何。彗星凡三見。孚敬引咎避位。不允。時都給事中魏良弼觀上待孚敬意稍息。不若前。乃疏謂彗星見東方。君臣爭明。彗孛出井。姦臣在側。孚敬竊弄威福。驕恣專權。妖星示異。惟其所召。乞亟罷之。以應天變。報聞。孚敬疏辯。以良弼濫舉京營武職。臣見其揄揚過情。下兵部覈實。罰其俸兩月。以是挾私報復。坐臣專擅。夫臣爲皇上守法。願來專權之毀。而人之曲法媚人者。乃獲得衆之譽。臣恐自是效忠無地矣。上不悅。亦報聞。於是給事秦鰲復論孚敬強辯飾非。媚嫉愈甚。頃上諭以舉賢容衆。同寅協恭。今言官論列。輒文致其罪。而內閣同列亦欲以禍橫中之。曰曲法曰媚人。且票擬聖旨。引以自歸。明示中外。以天子之權在其掌握。上千天和。下拂人情。如此不去。不治。上乃喜鰲忠讜。而勒孚敬令自陳致仕。同列爲之請恩禮。皆不報。僅予馳驛。其明年復召用。亡何以一品六年考滿。再進少師。時昭聖皇太后於世宗有爰立恩。而上所生章聖皇后日益重。顧有所宴見。昭聖猶偃然以故事裁之。上忿忿。而昭聖之弟昌國公鶴齡建昌侯延齡者。早倖橫行燕中。所爲多不法。旣微知上旨。惶恐甚。而燕中少年亡賴蜂起。爭持脅其金帛。毋算。後稍稍不酬。乃上變言其詛。慝望大逆殺人。事頗有狀。昭聖恐。乃因上後宮有嗣息者。屈節爲延齡請。上益怒。遂欲

坐延齡反。族其家。孚敬固以爲延齡殺人抵償當而坐之。反族不可。夫延齡守財奴耳。何以能反。凡數詰問。對如初。論延齡殺人罪。屬秋盡。當論。孚敬復上疏。謂昭聖皇太后春秋高。卒聞延齡死。能不重傷痛乎。萬一不食。有它故。何以慰敬皇帝在天之靈。上責孚敬自古強臣。令君非一。若今愛死。囚令我矣。當悔不從廷和事敬皇帝耶。上故爲重語。欲以惕止孚敬。而孚敬意不已。與少保方獻夫復持之。獻夫至謂陛下居法官。誰導以悖倫忍心之事者。此者。上雖不悅。然難二大臣。詔以秋報。悉緩諸論死刑。而終太后及孚敬世。延齡得長繫矣。然孚敬意不能無修。忤於言者。吏尙書汪鉉迎其意。於魏良弼秦葵等皆坐考察斥譴相繼矣。孚敬爲相。務以明天子尊。信國威。重輔臣體。而其初潞州盜陳卿據青羊山殺官吏。中外頗務姑息。如楊一清桂萼皆爲撫安計。而孚敬獨持之。卒捕誅卿。大同叛兵殺其將。孚敬益自信。薦劉源清卻永爲大帥。以必得賊爲主。而所薦頗不任帥。賊挾口以重。僅購間其黨。自相殘。得一二主謀者。夏言乃以撫之說。拄孚敬口矣。孚敬有子中書舍人遜。志賢而天。哭之成疾。乞歸。上謂孚敬胡忍舍朕耶。得無以夏言故邑邑。幸寬之。勿與較。孚敬抗辯不置。且言向所與同志。尊獻夫皆弱。尊又前死。而獻夫復先去。僅霍韜。懷而好辯。誰爲臣共大計者。因以疾力辭。上使太醫令診視。孚敬脈已。而手調藥以賜。曰。古有翦鬚和藥者。吾茲之未能。茲手調。亦庶幾焉。其專精神加殮自愛。以輔朕爲忠之義。孚敬感泣。然疾益甚。以死誓歸。上不得已。乃許致仕。賜璽書褒諭。歲給八騶。月俸米八石。所以優崇禮加於它相。其初。孚敬以上未有子嗣。請廣選良淑。以備六宮。又逾年而册妃嬪。禮畢。孚敬表賀。且問起居。上乃遣錦衣衛千戶劉昂視

其疾疾愈。卽馳傳入輔。而別以手書諭之曰。卿比以疾乞還。久切朕思。昨賀表具悉。朕躬平吉。聖母康泰。及擇原選淑女內曰曹王二氏。朕御而各有喜期。且近矣。先册爲端昭二嬪。河南李氏京選馬氏。補敬靜二嬪。又朕於春三月躬行謁陵禮。奉慈車。率后妃以從。禮成。又於四月之吉。恭飾七陵。遂作朕幽宮於長陵左之陽翠嶺。更名平臺山。奉聖母舟還京。今遣使昂視卿。卿果疾未愈。不煩以見。如稍可。卽星夜以行。速見朕。副切恩情。毋使朕眷眷無已。是時。太廟宮殿及歷代訓錄成。孚敬皆以首功當遷賞。而孚敬行至處州疾歸。再起。至金華。疾復作。復歸。以皇第二子生。遣人表賀。上特賜金幣甚厚。諸在事者不得比。久之。以疾卒。上時幸承天。聞之。哀悼不已。贈太師。諡文忠。命有司治祭葬。仍護持其家。孚敬有子四人。皆有官。遜志遜臣。遜虜。皆天。遜業以尙寶司丞。數躡起。有才志。而亦不免夭。諸以大禮貴者七人。桂萼。字子實。鉛山人。由進士至少保太子太傅。吏部尙書。武英殿大學士。卒。贈太傅。諡文襄。萼爲人廉。有才識。而儉。多所行恩。怨士大夫惡之。

席書。字文同。遂甯人。弘治三年進士。初知劍城。興水利。開荒萊。興學禦盜。皆有條績。召工部主事。造舟淮浦。財貨清覈。作漕船志。紀因革。利病。傳以己意。改戶部。時雲南晝晦五日。敕大臣考雲貴諸吏。書疏言。致災之由。係朝廷。不係雲貴。在大臣不在庶僚。條上時事千言。陞河南按察僉事。勦賊。正經界。禁工役。驕豎宗藩。莫敢撓阻。兼理廬鳳。會歲饑。請漕臺京粟賤。宜截漕粟賑糶。積舟車費。又數萬。皆可易銀轉京庫。又便得截粟四十萬石。饑民大濟。正德四年。副使提學貴州。延王守仁省城講授。五年。入賀京。道逢楊一清。

曰。曩見之河南鄉試治河策善。貴州不足煩子。河事大治。河宜子。一清爲吏部尙書。遂薦書爲河南參政。領河事。會多艱。竟不及治河去。八年。進浙江按察使。擒治豪右。逐貪酷吏。釋冤獄。臬政一新。十二年。進雲南右布政使。勦霑益搆亂土舍。轉福建左布政使。聞宸濠反。衆觀望。書發庫金募兵二萬討賊。嘉靖元年。陞副都御史。巡撫湖廣。擒姦豪號三虎者。除民害。長沙守貪酷。巧附麗。書按坐摘戍。吏民畏戢。尋陞南京兵部侍郎。時江淮南北大饑。奏截漕粟五十萬石給軍餉。戶部方議發帑賑。會書奏至。請亟賑。又條上賑法。廷中方難得人往賑。見書疏。喜。請以賑事付書。書賑有法。全活數十萬。逾兩月。人稍蘇。當是時。大禮未定。桂萼上疏。并錄書及方獻夫疏。同封進。上得疏。喜。急徵入京。言官遂劾書賑事無法。書亦疏辭。召尋本生詔下。停召書。陞吏部尙書。內傳下。言官又交劾。并劾賑乾沒銀八萬餘兩。三法司戶部出案。上曰。衆且中傷書。再遣司禮監官事得白。益遣使促書。書至。改稱考獻帝伯考。孝宗將下詔。令書議詔條。書曰。卽開條濫恩赦。正德諸弊政不可遏。力言不可。召至左順門。傳問可否。又力言不可。遂止。書尋檢姚崇要說上圖新政十二事。御史藍田劾書自比姚崇。比上玄宗。大不道。遂乞罷。不許。削田籍。大同軍叛。書薦一清守仁討賊。時相方主撫。議不果。又議世廟街宜避太廟及禮樂宜遜減於太廟者四事。上大禮集議。纂要六卷。五年。獻帝實錄成。進少保。時書目失明。薦羅欽順自代。修明倫大典。爲總裁。六年。加武英殿大學士。賜第給俸。留京師。三日卒。贈太傅。諡文襄。弟春。官至吏部侍郎。

方獻夫。字叔賢。南海人。由進士至少保。太子太保。吏部尙書。武英殿大學士。致仕。贈太保。諡文襄。其在諸

公稍和平。然亦不肯爲骯骯。持易退之操。而居家不能持謹。數與郡國競。毀譽半焉。

霍韜字渭先。南海人。由進士至太子太保。禮部尙書。掌詹事府事。翰林院學士。卒。贈太子太保。諡文敏。韜有學識。才操難進易退。又數犯顏敢爭。天下稱之。然偏而好訐。無通人度。

黃綰字宗賢。黃巖人。以祖廕得官。至禮部尙書。翰林院學士。以侍郎致仕。卒。綰雖起執袴。而精儒士業。兼長吏事。喜功名。第險闕。擢閩君子所羞稱。

熊浹字悅之。南昌人。由進士至太子太保。吏部尙書。奪職。後贈少保。諡端肅。浹質直弘毅。有大臣度。晚節矯矯。此議禮中之嘉者。

黃宗明鄞縣人。由進士至禮部左侍郎。卒。贈尙書。宗明雖以議禮驟貴。而性恬雅。間以直著。

史官曰。夫君臣遇合之際。難言之矣。循序平流。吐棄矯節。雖有絕智。何以達九重乎。獨是因機遘會。及鋒而施。如孚敬等。當人主旁皇。四顧孤而無援之際。蓄懷不伸。含言復囁。而孚敬等一爲抗辯。遂與天子稱莫逆。驟膺巍顯。嗟乎。始進以正。卽沈湮縣邈數十年。晚進無害也。而乃出於此。狡哉。大禮是非自有定論。夷諸人於佞幸。可以觀其節矣。他錄錄。獨孚敬疆直自遂。人主爲屈。斯功罪不等哉。

仇鸞傳

仇鸞江都人。咸寧侯鉞之孫也。鉞以平賓鑾及流賊功。封侯。子恩篤疾未嗣。鸞嗣侯。性鸞悍。氣橫。遇事敢當。不下人。嘉靖初。同毛伯溫征安南。不果。尋出鎮兩廣。改鎮榆林。遂計奏都御史曾銑論死。鸞亦罷。嘉靖

庚戌夏六月。俺答入寇。詔起鸞。加宮保。總兵鎮大同。敵尋退。八月。敵復擁衆至。鸞私賄俺答。令東寇薊鎮。鎮不守。遂犯城下。朝廷下詔諸邊將勤王。鸞首以大同兵入朝。廷以爲忠。拜鸞大將軍。總督諸路勤王兵。分道禦敵。大同兵素驕縱。鸞部之無紀律。其兵多辮髮。作寇人狀。出殺擄居民。捕者不敢擒。時有擒。以鸞方被寵任。亦不敢輒置之法。後以其事聞。上曰。大同兵首先入援。縱有所犯。出於饑疲耳。付大將軍撫。○鸞殊不爲禁。大同兵以此益無忌。民受毒於大同也甚於寇。時敵以在城下。鸞不敢進兵。時稱元帥兵禦寇。實去寇遠。是月二十四日。敵退。欲奪白洋口。乃出。會諸將兵尾之。敵又擁衆東南。還至昌平。鸞猝遇之。軍不及陣。多被寇騎蹂躪死傷。鸞幾不免。寇出境。鸞罷兵歸鎮。上疏自劾無功。詔書慰答之。加太保。時欲大振京營。遂命鸞代朱希忠提督。設戎政府。居鸞。始置印章。以兵部尙書王邦瑞爲鸞副。上信鸞日深。鸞恃寵。歷歷陳奏。皆從之。始逐寇時。承命揚兵。稍不如意者。輒以稽緩軍務爲言。故賄之惟恐後。諸邊將及戶部。遣以萬計。至是邦瑞稍承制。清理京營弊政。多忤鸞。及制下。又多從鸞請。先是京營制。兵部尙書兼有御史給事中。等參糾。鸞皆奏罷之。未幾。鸞請召大同兵至京聽練。又建議於畿輔河南山東山西等處。遣官分詣募兵。歲集京營操防。秋畢散去。如古踐更卒例。皆從之。鸞請大舉北征。遂先遣人詣諸邊鎮。命各選兵出京營。將以領之。候師期。於是諸邊鎮皆隸京營。將忽邊地有警。諸邊將不得調遣。而京營將駐各邊者。多倚勢折辱人。且不任邊鎮之責。邊臣以爲言。不報。是年冬十一月。鸞統兵出宣大。搗敵巢。時集諸路兵往。歷數月。僅斬寇數級。皆老弱。鸞又自劾。詔不問。鸞乃議明年辛亥大舉。復請廣集兵糧。時戶部

遣使盡括南郡及各省貯積。仍督逋者甚急。亡何。鸞又請許邊入貢。朝廷命諸大臣議。鸞力主其事。乃以明年春開馬市於宣大。已而邊防大潰。鸞恐禍及密疏止馬市。上又許之。鸞漸跋扈。吞諸邊臣。重賂亡厭。時與邊私相結。鸞所任時義。與俺荅義子脫脫拜爲兄弟。其亂政如此。朝士無不知。亦無敢言者。是年夏六月。鸞假防秋名。欲行邊。時商大節已承命部所募兵。經略都城。鸞亦徵其兵充部下。大節上言。例九卿不當受鸞節制。且持所部兵不可。鸞上疏排之。大節論死。繫獄。自是諸司無復言鸞者。鸞亦大作威福。三十一年壬子。鸞又出防春。請於上。兵部主調遣。戶部主糧餉。工部主器械。請各以侍郎一員偕行。三侍郎又各簡其屬。皆隸鸞幕府。鸞奏所行科條煩密。號令僭擬。詔皆以爲然。時人心洶洶。恐鸞出不測。是年六月。報敵復侵薊鎮。鸞當出師。鸞病疽。七月。報益急。鸞病劇。上言乞與疾出師。免陸辭。上許之。時諸司不敢言大將者。兵部尙書趙錦曰。事迫矣。遂疏云。大將病不能行師。印在大將所。諸偏裨令不行。請暫借大將軍印。率師往禦之。制下。謂本兵不可出。令收大將軍印綬。別遣將將兵禦敵。於是錦卽夜至。鸞第收印綬。別舉總兵時陳爲大將軍。佩印行。鸞以收其印綬。大悲憤。疽益劇。遂死。時朝廷已知鸞姦逆。未發。會鸞所親信時義侯榮姚江皆冒功得錦衣衛指揮等官。恐鸞死事故露。遂以是月十一日出奔居庸關。鞏華城諸處欲叛入邊。爲關吏所執。赴陸炳告。炳以聞。下詔獄。命法司鞫之。乃盡發鸞前後通邊納賄諸亂政狀。世宗大怒。詔暴鸞罪。剖棺戮屍。梟其首。妻子及時義侯榮姚江等俱斬於市。籍其家。諸黨惡皆謫戍邊。趙錦以初附鸞。亦謫戍。

史官曰。彼有功者。驕其功可矣。而鸞無功。至使朝臣無敢劾鸞者。亦奇矣。獨考嘉靖壬子秋七月。廷宴諸進貢夷人。命鸞陪宴。鸞辭以病。南給事中祁清奏劾其方命託疾。擅陳改遣。原鸞之心。得無以勢自崇。不屑是宴。而託言有疾者乎。抑果艱於動履。不能預宴。而真爲有疾者乎。夫位隆者貴。防於漸。志溢者在。譬其初。天威在上。國典甚明。敢於恣肆。不恭孰甚。乞賜懲戒。以肅臣紀。敢言鸞者。止此耳。鸞何術而箝人之口。至於如此。亦可以想其暴橫矣。夫世宗何負於鸞。鸞忍負之。至於通邊之罪。可勝誅哉。易言小人勿用。聖人豈非有以先見其微哉。

明書卷一百五十六

列傳十六

殘酷傳

史官論曰。漢元狩間。黷武幕南。師殫財匱。窮民起而爲盜。於是直指使出。杜周義縱之徒。以鷹擊毛鷲爲治。而酷吏始興。至江充治巫蠱獄。殺戾太子。武帝悲悔。作思子宮。而酷吏姓廢。明太祖懲元季弛法。用剛克爲治。果於誅殺。藍胡之獄。株連無慮數萬。懿文太子與詹徽錄囚。太子寬仁。多有所平反。徽每譖太子。太子因感疾薨。乃曰詹徽殺我。嗟乎。酷吏之禍徧天下。其流毒之極。至於殺人主之子。使慈父與哀於望。思孝子痛憤於身後。國本旣傾。亂貽再世。雖萬被戮。豈有償哉。武帝族江充。建文誅詹徽。以此爲酷吏報。然楚靈王有言。予殺人子多矣。能無及此乎。天事好還。又未嘗不致憾於元狩。洪武之君也。至遜國之際。又甚焉。所參夷喋血。動殃九族。至墟其閭里。曰瓜蔓鈔。爲之推波揚沸者。都御史陳瑛也。嗟乎。漢之酷吏。捕斬盜賊。延及平人。卽唐之酷吏。戮及士大夫矣。猶不敢殺魏元忠。狄仁傑。而陳瑛所殺。皆千百忠臣義士也。比干。鄧甯。周來之屬。罪實萬倍。觀史至此。能不嘆息痛恨於其時乎。

陳瑛。河間人。建文初。爲北平按察使。受王府金錢。通密謀。爲僉事湯宗所告。逮瑛。謫廣西。太宗卽位。召爲

都御史。上欲爲建文皇帝輟朝五日。瑛請減之。又請追戮黃觀等。上曰。朕舉義師。所誅不過齊黃數輩耳。後來二十九人中。黃福尹昌隆張統王鈍鄭賜皆有而用之。況不與其數者乎。彼食其祿。自盡其心耳。方孝孺諸獄。宗戚受禍慘毒。皆瑛羅織。至胡閏一獄。鈔提數百家。男女至東市。冤號之聲徹天。兩列御史皆掩泣。瑛坦然謂人曰。不以叛逆誅此輩。則我等歸附無名。於是諸忠臣幾無唯類。永樂七年。給事中耿通劾其朋比蒙蔽。誣搆戶部主事李貞於死。八年中。允劉子春。劾其方命刻薄。九年。下獄誅之。族其家。開濟洛陽人。初爲國子助教。與丞相胡惟庸善。以疾罷歸。訓徒里中。十四年前。御史大夫安然薦其才。召拜刑部尙書。初至京。勤敏有爲。嘗奏令諸司各署老功圖日書官員所行事蹟。以積覈其勤怠。又言內外奏札宜減繁文。軍民細故犯罪者。宜卽決遣。無久拘禁。數月之間。獄無淹滯。上以濟有才。頗信用之。濟由是自負持法。漸肆巧詐。性殘酷。好以法中傷人。凡意所不悅。輒深文巧法以入之。無能脫者。濟與鄉人有舊怨。乃誣搆下獄。令郎中仇衍等鍛成之。嘗不奉旨。擅移文督責諸司。若中書省所屬者。又爲榜戒其僚屬曰。尙書到任日久。事之遲錯。皆寬大容忍。復然。則罪不爾貸。奏請揭於文華殿。以示衆。上曰。爾告戒僚屬之言。欲張之殿廷。豈人臣禮耶。濟慚謝。未幾。又立簿曰。寅戌之書。以限僚屬出入。上聞。切責之曰。古人以卯酉爲常道。今使趨事赴功者。朝自寅。晝盡戌。奉父母。會妻子。能幾何時耶。濟不聽。獄囚有禁死者。濟亦不問。嘗受一囚賂。以獄中死囚代而脫之。爲獄官所發。上召濟諭之。歸部。與侍郎王希哲主事王叔徽。執獄官於獄。扼其吭而殺之。其特權罔上。傷害良善。類如此。上屢訓迪不悛。會有告其在洛陽時盜賈人。

贖買人出重價。乃還之。強役其甥女閻氏爲奴。濟妹亦早寡。姑老獨存。濟利其家財。盡掠取之。攜其妹并一子歸。其姑欲訴。輒垂逐之。時監察御史陶壘仲等劾濟瀆亂人倫。有傷風教。不可爲大臣。又擅殺獄官。及言濟奏事時。置奏牘懷中。或隱不言。欲入啓皇太子。至則又不言。乃復入奏。觀伺上意。務爲兩圖。姦計莫測。上怒。乃下濟獄。并執王希哲等。詔廷臣訊之。濟具服。遂并希哲等誅之。初。濟父蒙來朝。上待之甚厚。濟亦常侍左右。見御製詩文。輒請歸。潛刻碑以誇大聲勢。又所爲不法。由是見疏。濟爲人以才辯。然陰毒狡險。外事諛說。當朝罷。上召與論政事。略無建明。但稱曰真聖人。真聖人。故上深惡其諂佞云。

詹徽。武昌人。性殘忍。用刑最刻。洪武中。以左都御史兼吏部尙書。洪武二十六年。受命鞫藍玉獄。玉不肯服。徽叱玉吐實。將加酷刑。玉大呼。徽卽吾黨。遂併殺徽。徽嘗陷李善長。又惡解縉爲虞部郎中。王朔用草疏申救善長。并欲中縉危法。初。懿文太子亦恨徽。徽嘗侍太子錄囚。太子屢欲有所出。徽輒文附重法。太子爲白上。先入徽言。謂太子曰。徽執者法也。太子因言立國以仁厚爲本。上曰。汝欲遂自爲皇帝耶。太子懼。因感疾薨。謂建文君曰。詹徽殺我。至是。建文君爲太孫。錄藍獄。先斷徽手足。戮於市。

袁泰。夷陵人。登洪武四年進士。累官至右都御史。泰有才辯。明法律著稱。然頗深刻。嘗鞫經歷王爵。鍛成其獄。屬吏薛希勝當連坐。詣大理白其枉。泰欲掩其失。嗾河南道御史寘之法。上召廷臣會審。得釋。於是御史夏長文等劾泰而欺。上責泰曰。國家爲治在法。而持法平者御史也。今若此。欲無冤得乎。乃誅泰。馬順。江南人。錦衣指揮也。以義子事王振。見必膝行。蓬蔭戚施。振甚暱愛之。國子祭酒李時勉有所忤振。

令順許其伐廟木事。囊三木廟門。久之始釋。雷震奉先殿。鳴吻。翰林侍讀劉球應詔上封事。語多侵振。振大怒。而會編修董璘言。太常用道流不稱。請自爲卿共祀。忤英宗。下獄。順榜答璘。使引球爲具藁草。卽朝班中。掉之出。球不知所坐款。第曰。若諛振死我。死卽訴上帝耳。竟與董璘益死獄。家人行求屍。順故磨之。勿得也。而順有子年二十餘。病孱久困矣。歛起持順髮。拳且蹴之曰。死老奴。令而異日禍喻我。我劉球也。順再拜謝。不可。俄而子死。王振以上北伐虜也。先陷土木。敗聞時。郕王監國。朝羣臣伏闕泣。請籍振家。併誅振弟。指揮山海。未報。衆忿。闕無所泄。而馬順前謂衆姑已。胥後命。給事中王竑直前提掉順曰。是非姦人黨耶。衆趣前擊殺順。須臾。血肉塗起。不可辨矣。王恐。乃下令誅山海籍王振家。因併籍順。蓄藏金寶。以鉅萬計。

陸炳。浙之平湖人。祖擗。隸籍錦衣衛。興王之國安陸。選充儀衛司總旗。子松。陞千戶。世宗生於潛邸。松妻得爲乳母。又三年。炳生。攜入共寢處。上稍長。日侍左右。旣入承大統。松用從龍功。累官都督僉事。炳以官舍知書。頗覽文籍。欲應有司試。父曰。吾家自有環衛可事天子。何必走寒士路。從考功門下。頰首聽黜陟爲。乃以世職千戶。應試武舉。會試高等。己亥。上幸承天。至衛輝。行宮夜火。侍衛倉卒無在者。獨炳身負上出於火。壬寅宮變之夕。炳心動。帶衛士急趨候門外。門開。皇后懿旨出。立應。縛逆人正法。上聽之。甚喜。炳黠多智數。善迎合上意。時敵微多。招勇士爲校尉。凡萬餘人。月支太倉米四萬石。鮮衣怒馬。出入市中。人皆目而畏之。庚戌。敵逼都城。諸大臣分守九門。炳勒所部門各三百人。譏察出入。其餘巡諸街巷。有

乘機搶掠者。縛其魁。治以法。中外賴之。仇鸞方入援。炳言大敵睥睨通州。未及渡河。所恃者。鸞兵抗其前耳。今相持已久。邊卒饑疲。餽餉不繼。可爲寒心。宜趣兵部發兵應援。戶部發銀充餉。薊鎮守臣伺敵歸路。遮擊。上深然之。切責戶部尙書李士翱等。不以國事爲重。俱令停俸待罪。卽日計處兵食。連各營。鸞旣被寵用。事來結歡。炳陽應。心勿善也。曰。是豺聲。能食人。必負國。見上倚信。未敢示異。同陰伺察之。銖兩之姦。無不知者。鸞前督師廣東。過杭。繼娶甚嬖。兩家互內飲。妻歸。罵鸞曰。汝自誇富貴。乃陸媼飾首奇麗。我勿逮遠。甚令我愧。見侍者。鸞慚。借其飾。令鍛工效爲之。威駭愕。謝不能。蓋得之西域鬼市。非世所有也。鸞乃令勇士二人劫取。炳嘗早起坐室中。士透簾而下。夾立。覺有異。謂曰。汝何警到此。任汝所需。勿害我。曰。無他。夫人飾若干件安在此。瑤池故物。奉令來取。幸勿靳。且勿疑也。出與之。躡簷去。寂無人聲。心知鸞所使。甚怖。亦甚恨。鸞本通虜。使家丁時義等往來密構。臨成馬市。專鈔宣大。勿犯薊鎮。炳久已刺得。未敢聞上。第厚爲備。時于射所。率親兵。肄習挽疆。命中聲徹禁中。蓋密請於上。因欲動聽。上在西苑聞之。問方士陶典真曰。此陸炳耶。陶知上意所嚮。謬曰。天生神將。來備陛下肘腋。上喜。因遣小豎來觀。鸞方自大同回。亦率其徒至與角。願勿如慍。見顏色。徐奉觴曰。大將軍能用衆。將三十萬騎空虜庭。書名雲臺。如某一校之任用。寡拳捷取快。漢有羽林期門。唐有飛騎驍騎。止衛宮庭。非大軍比也。鸞甚懼之。小豎歸報。上默然。由此益眷注。且悉鸞不足任疑之矣。虜勢愈熾。鸞支吾二年。技窮。當出師。疽發背。上命收其符印。代以他將。鸞立死。姦狀盡露。先一夕。密忱兒挾黨自居庸關走大同。遣人中道遮縛爲證。上大怒。收其孥。下獄拷。

訊陳刑具問反狀。妻故素相識。認中表者。呼曰。夫君有謀。惟公知之。何問我爲。衆皆失色。炳恚甚。加刑。獄成。鸞剖棺戮屍。傳九邊。梟首大同。妻子皆斬。炳獲褻諭。加祿。校尉徐永康等各進官。有差。倭患方熾。胡宗憲用兵。糜費被劾。委罪俞大猷。逮至。出二千金。及他珍寶。贈之。賄嚴氏。得不死。其與嚴氏相處坦然。雖互以權勢附麗。而善用不露跡。卽世蕃恣睢。亦入籠絡中。不敢肆。特厚徐階。密爲保護。甚受上知。雖處疑逼。終不能整。深有力焉。自以陸宣公之後。家世詩書。敬禮儒士。弟煒已爲中書舍人。實級舊例。惟試職者。得應舉。癸卯年。特疏代請。許之。遂得中式。歷太常少卿。子甚劣。不可教。延東陽人趙祖鵬爲之師。蓋文華之族。其所薦者。纔數日。趨庭拱揖如禮。大喜。厚贈。因納其女。稱肺腑親。力爲地。中癸丑進士。選庶吉士。授編修。隨指所使。無不如意。祿賜既厚。本衛牧租。芻糧。歲入數萬金。京中富厚者。多投門下求庇。所獻不資。其時白蓮教盛行。布滿畿甸。鹵謀謀至。入甲伏庫。皆經摘發。亦其耳目多。爪牙健。才足運用也。因而夷滅。無所顧惜。亦儘有救之極窮。活之垂斃。學士大夫下至走卒。片言卽解者。至今人能言之。王佐在事。炳爲之屬。年未二十。佐器其材貌。教以爰書。公移之類。曰。錦衣帥不可不精。刀筆炳甚德之。佐孽子不肖。陸博縱飲。有三別墅。炳已得其二。其一最雄麗。復欲得之。不可。乃指以狎邪。捕其黨與家奴。證成其罪。子寤甚。其母故妾也。名亦在捕中。旣入對。炳與僚列坐。將脅之。子始亦固抵。母膝行前。道其子罪甚詳。子恚。譴母曰。兒頃刻死耳。母忍助爲虐乎。母叱曰。死卽死。何說。指炳坐。顧曰。而父坐此。非一日。作此等事。亦非一生。汝不肖子。天道也。復奚爲。炳頰發赤。趨遣之出。事遂寢。累資巨萬。豪侈起祠堂。卽禾中建乳娘廟於西湖。立

宣公書院。塑遺像。營別宅十餘所。皆崇麗稱甲第。分置姬妾其中。執綺寶玩。所在充物。供帳不移。而具炳時游處其間。東西惟意。置良田宅於四方。若臨清揚州南昌承天等處。皆有莊店。聲勢震天下。惟內臣猶執故事不爲下。乃劾司禮太監李彬盜帝真殿工所物料及內府錢糧以數十萬計。私役軍丁。造墳於黑山會。起丁字大券。僭擬山陵。大逆不道。宜寘之法。上命錦衣衛拷訊。下刑部擬罪。比依盜大祀神御物律。與其黨杜泰等皆論斬。餘發遣如律。沒入資產銀四十八萬有奇。玉帶金寶纒環八箱。餘不司勝計。由是威行宮省。內外惕息。不稱官。不稱號。惟曰陸堂。至用以止小兒啼云。出司巡徼。入直內殿。凡郊廟以至諸禱祀。皆得與焉。親近尊信。卽勳貴大臣莫敢望一。惜暴卒。上深悼之。贈諡祭葬有加。仍官其子繹。指揮僉事。死未及旬。吏部出祖鵬爲湖廣僉事。尋考察閑住。居鄉縱誕不檢。與族弟馴有隙。馴因詣闕告祖鵬。怨望誹謗。并其他不法事。逮下詔獄。而行勘得實。言祖鵬兄熙子賢造賢選。皆怙勢作威。暴橫鄉曲。抑勒平民爲奴。箠之致死。祖鵬嘗得宋朝遺牒。謂宋魏悼王之裔。因修譜以續其系。私祭宋代陵寢。而名其莊曰護陵拱辰。復葬其妾於妃嬪之側。縱弟鶯冒報軍功。及事覺被逮。輒匿祖鵬所不出。又私創八角亭。蟒衣玉帶。抑奪官民地以拓第宅。皆僭侈不道。至於作書怨訕。尤非人臣禮。因論熙坐死。賢造賢選等各罪有差。祖鵬罪斬。穆宗卽位。祖鵬赦歸。御史張守約追論炳結納嚴世蕃。竊弄威權。播惡流毒。有大罪十。世蕃旣斬。炳宜追戮其屍。逮治其子繹。姪緒家人顯籍其家。於是炳免戮屍。削奪繹緒煒。俱革職爲民。餘黨誦戍荒徼。籍其家。

明書卷一百五十七

列傳十七

姦回傳

史官論曰。木實將撥。必蠹其中。日月外暈。或蝕其裏。昔子翬謀桓。魯隱弑。宰嚭佞越。吳國沼。張禹黨王。炎鼎移。林甫庇審。漁陽動。自古姦臣在人主之側。威惠內竊。國情外輸。以宗社爲市者多矣。天下之惡一也。買妾欲其鬻。我者擇臣取其貳。彼者崇搆保姦。與晉殺里克。漢斬丁公之義何居。然春秋書叛人名。名不可掩也。作姦回傳。而以柔媚取容悅。無剛直之概者類編焉。

胡惟庸

附陳寧

汪廣洋楊憲傳

胡惟庸江南人性儉惡小有才以曲意奉上當上心太祖擬相問劉基曰楊憲何如基與憲素厚以爲不可上怪之基曰憲有相才無相器夫宰相者持心如水以義理爲權衡而已無與焉者也今憲不然能無敗乎上曰汪廣洋何如對曰此褊淺觀其人可知上曰胡惟庸何如基曰此小犢將債轅而破犂矣洪武四年爲左丞相六年六月改右丞相十年九月制尊左復爲左丞相劉基嘗語人曰使吾言不驗蒼生之福也言而驗如蒼生何後自楊憲誅而惟庸總中書之政專肆威福生殺黜陟有不表而行者內外諸司

封事入奏。惟庸先取視之。有病已者。輒匿不聞。私擢奏差胡懋爲巡檢。營其家事。由是四方奔競之徒。趨其門下。諸臣諛佞者多附之。受金帛名馬玩好。不可勝數。魏國公達深嫉其姦邪。常從容言於上。惟庸忌之。遂有闖者福壽。惟庸陰誘致。爲己用。冀得其力以圖達。爲福壽所發。劉基亦嘗爲上言。惟庸姦恣不可用。惟庸知之。由是怨恨基。及基病。詔惟庸視之。往以毒中之。基竟死。上以基病久不疑。基死。惟庸益無所憚。與李善長等相結。以兄女妻善長從子祐。貪賄弄權。無所畏忌。一日。其定遠舊宅井中忽生竹笋。出水高數尺。諛者爭言爲丞相瑞應。又言其祖父三世塚上。皆夜有火光燭天。於是惟庸益自負。有邪謀矣。當是時。吉安侯陸仲亨自陝西歸。擅乘驛傳。上怒責之曰。中原兵燹之餘。民始復業。籍戶買馬。艱苦甚矣。使皆效爾所爲。民雖盡鬻子女買馬。走遞不能給也。責捕盜於代縣。平涼侯費聚常命往蘇州。撫綏軍民。聚不任事。惟嗜酒色。召遣責往西北招降敵。無功。上亦責之。二人懼。惟庸陰以權利脅誘之。二人素驍勇。又見惟庸當朝用事強盛。因與往來。久之益密。嘗過惟庸家飲酒。酒酣。屏去左右。因言吾等所爲多不法。一旦事覺。如何。二人惶懼。計無所出。惟庸乃告以己意。且令其在外收輯軍馬以俟。二人從之。與陳寧坐省中。閱天下軍馬籍。令都督毛驥取衛士劉遇寶及亡命魏文進等爲心膂。曰。吾有用爾也。太僕寺丞李存義。善長之弟。惟庸之婿父也。以親故。往來惟庸家。惟庸令存義陰說善長同起。善長驚悸曰。爾言何爲者。若爾九族皆滅。存義懼而去。往告惟庸。思以利動善長。後十日。又令存義以告善長。且言事成。當以淮西地封公爲王。善長雖有才能。然本文吏。計深巧。雖佯驚不許。不甚拂。迺歎息起曰。吾老矣。由爾等所爲。存

義還告。惟庸喜。因過善長。屏左右款語。良久。惟庸欣然。就辭出。使指揮林賢下海招倭軍。約期來會。又遣元臣封績。致書稱臣於元。請兵馬外應。事皆未發。會惟庸子乘馬馳驟於市。馬奔入輓轡。中傷死焉。惟庸卽殺是輓轡者。上怒。命償其死。惟庸乃請以金帛給其家。上不許。惟庸乃與善長及中丞涂節。御史大夫陳寧等謀起事。遣人陰告四方及武臣之從己者。時惟庸居第近西華門。先謠云。其所居井湧醴泉。以徹上聞。洪武庚申春正月。邀上幸其第觀之。先列勇士。衷甲數市。匿屏後俟變。時守西華門內使雲奇。知所爲倉卒告變。上悟。亟還宮。發兵圍緝。果然。遂罪人一一就縛。并黨御史大夫陳寧。都督李玉等皆伏誅。已而惟庸語連李善長。陸仲亨。上念初起時功臣。置不問。宋慎坐黨。亦誅。仍籍其家。濂謫四川。茂州。是獄也。前後戮黨凡數萬人。按是時御史涂節告變。謂寧附和丞相。坐省中閱天下軍馬圖籍。其在蘇州。催糴餉。燒鐵烙人。其子孟麟泣諫。杖之至死。上曰。寧於其子如此。奚有於君父耶。遂賜死。寧長沙茶陵人。初名亮元。爲鎮江小吏。從軍至金陵。代諸將言事。英辨疊出。太祖異之。賜名寧。授江南行省掾史。歷中書省參議。凡朝廷制度。咸預稽詳。吳元年。出知廣德。歲大旱。奏免租。弗允。寧躬赴闕。上言天災民饑。催稅太急。是爲張士誠驅民也。上曰。爾乃膽大敢爲此言耶。竟從之。遷浙江按察使。適皂隸小毛。訟其隱過。逮繫廳天獄。久之。乃釋。降太倉市舶提舉。洪武元年。召入。爲司農卿。還兵部尙書。二年。出知松江府。復拜中書右丞。三年。又出知蘇州府。遷浙江行省參知政事。復召爲御史中丞。至是。坐胡黨。誅。

汪廣洋。字朝宗。高郵人。廣洋寬和。通經能文。善篆隸大書。工詩歌。少從余關學。游太平。乙未。太祖渡江。召

廣洋入見與語大悅留幕下爲元帥府令史行樞密院掾史江南行省提控丁酉除照磨己亥立執法議理司大書四字牌上以廣洋李勝端爲執法官朝政有失執牌直諫又名爲都諫官辛丑遷江南行省都事陞郎中甲辰立中書省改右司郎中尋知驍騎衛事常遇春下贛州廣洋出參軍事遂守贛州尋陞江西行省參政洪武元年開省山東廣洋以廉明持正改山東安輯有勞是冬召入中書爲參政明年出參政陝西三年李善長病召入爲左丞時楊憲以山西參政先召入爲右丞惡廣洋軋己嗾侍御史劉炳劾廣洋不孝上切責斥還鄉憲意未已又嗾炳劾廣洋謫海南李善長奏憲誣大臣放肆爲姦上誅憲召廣洋還是年冬與劉基同日受封封廣洋護軍忠勤伯食祿三千六百石誥詞比之子房孔明四年善長致仕廣洋爲右丞相參知政事胡惟庸爲左丞六年進左丞相惟庸爲右丞相尋廣洋坐畏懼迂猾斥爲廣東參政逾年召爲左御史大夫十年復爲左丞相上益厚廣洋未幾上以惟庸暴橫廣洋荒於酒色而怠棄政機浮沈守位敕戒令洗心補過會占城貢使至不以時引見下敕切責執政廣洋惶懼十二年御史中丞涂節言劉基死毒廣洋知狀上問廣洋對無是事上怒廣洋朋黨又謫海南舟至太平上再遣敕責廣洋事除十餘年不聞一善言不薦一賢士在江西曲庇文正在中書不發楊憲姦惡惟務洗滌不事事廣洋得書益慚大懼自縊死

楊憲字希武陽曲人美姿儀博學多才少從父元末官寓江南丙申謁太祖於金陵上與語奇之令居幕府已而擢江南行省都事當江廣多故日裁決文書不滯時稱其能中性深險而忌有不滿於己者輒以

計中傷之。久之，出爲浙東行省郎中，又爲江西行省參政，召入爲司農卿，未幾，參政中書省，尋改河南行省參政。洪武二年，調山西三年，召爲中書省右丞，尋改左憲事。上旣久，熟典故，以是假寵市權，貌同列，亦莫敢爲抗。嘗上書頌上功德，因勸上行督責之政。上曰：「是欲使我失人心也。」拒之。憲與昶同在中書，以昶才出己右，欲構害之。時東南未定，元號令猶行於西北，昶嘗閒暇，與憲言：「吾故元臣也，勉強留於此，意不能忘。故君而吾妻子又皆在北方，存亡未可知。」憲因鈞摘其言，謂昶謀叛，且出手書許之。昶遂坐誅。憲自是益無所憚，初爲司農卿，屬浙江初平，憲以其民富實，因議增賦，倍征以資國，民以不堪，在中書盡變易省事。凡舊吏一切罷之，更任所親信。陰入持權，乃創爲一統山河花押示僚吏，以觀其從違。凡附己者，卽不次超擢，否者斥之，人莫解其意。一日，翰林編修陳樞入謁，憲以押字示之，樞卽賀曰：「押字大貴，所謂只有天在上，更無山與齊者。」憲大喜。後數日，奏除樞爲翰林侍書，已而又刺求丞相汪廣洋陰事，令御史劉炳劾奏之。廣洋坐免田里，憲又嗾炳劾廣洋，徙之廣南，上不聽。又教炳誣奏刑部侍郎任安擅入人罪，上始覺其誣，下炳獄。炳伏實，劉基併發其姦狀及諸陰事，上大怒，令羣臣按問，憲辭服，遂與炳等皆伏誅。史官曰：「姦臣之於人主，必以其所長短者巧中之。主上英明，則取聽察之事以快其私，而闇主無論已。明太祖神武剛毅，而胡惟庸恣生殺，擅黜陟，至壅蔽上聞，阻隔章奏，卒以反誅，宜矣。獨是株連無辜，戮至數萬，惟庸之惡，通於天矣。廣洋無所可否，持祿怙寵，將不謂之姦不可，意賣友虐民，變亂成法，恣行胸臆，中傷雅流，授首市曹，不爲枉矣。」書云：「旁作稷穆迓衡，又曰：斷斷猶無他技，使大臣能釋乎此，余未見其殄邪。」

而隕首也。

徐增壽李景隆王寧盛庸茹瑺王佐傳

徐增壽以父任。三遷至左軍左都督。侍宿衛。建文皇帝業以持燕王事。從容謂增壽。王得無反乎。增壽頓首曰。燕王先帝同氣。且富貴已極。何故反。燕兵起。則時時從增壽。詢虛實。增壽亦時時從王。所輸。建文皇帝漸覺之。未及問。而燕兵入金川門。召增壽詰之。不對。手劍斷增壽腰。燕王入。撫屍而哭。既即位。封增壽爲舞陽侯。再追封定國公。俾子景昌嗣。歲祿二千五百石。久之。領軍府。嗣凡三十五年而卒。子顯忠嗣。十二年卒。子永寧幼。又七年而嗣。疾失心。予半祿。罷朝請。病二十六年卒。子光祚嗣。久之。領軍府。以東宮舊恩。超進太傅。旋以監修武容二朝實錄成。累加太師。兼太子太師。凡四十五年卒。子延德嗣。領軍府。四十餘年卒。子文璧嗣。領軍府。加太保。太子太傅。嘉靖中。詔裁恩澤世封。而魏定二公。皆自以功。弗奪。有言定公功不稱者。卒弗奪也。天下僅五公。達子孫居二焉。文璧卒。子允禎嗣。國變時死節。

李景隆。長身偉姿。疏眉目。顧盼朗然。既少。奉文忠教。齒諸生間。與天台方孝孺善。多習典故。善談論。每朝會進止。雍容是都。太祖每目屬之。既襲爵。與魏國公輝祖等分鎮中原要害地。所使多稱。進掌左軍都督府。加太子太傅。太祖崩。皇太孫立。景隆益以肺腑。見親任。而弟增枝亦屢遷至左都督。進加景隆太子太師。時兵部尙書齊泰。太常卿黃子澄。得幸。上謀削弱諸王。至燕而露。燕兵起。長興侯耿炳文。武定侯郭英等征之。前後皆敗。於是齊泰黃子澄皆才。景隆而薦之。乃命景隆爲征虜大將軍。北伐。用裴度故事。賜通

天厚帶。建文皇帝爲推輪。親送之江滸。且令得以一切便宜誅賞。時諸宿將多物故。鮮存者。而存者亦以老。又皆景隆諸父行。快快不肯爲之下。而景隆暴得意。自尊大。每升帳。踞高坐。毋敢與抗禮者。皆唯唯不能吐片語而退。景隆會兵五十萬於德州。乘燕王之攻大寧。遂進薄北平。築壘九門。爲長圍以困之。王還師自救。景隆逆戰。大敗。死者十餘萬。明日。九門之師復潰。死者復數萬。乃退走。王復攻大同。景隆引兵出紫荊關。時寒甚。士卒墮指者什二三。乃移書燕王。請罷兵。辭驕蹇。王亦貽書來報。而心恨之甚。遂戰於白溝河北。凡三日。而景隆復大敗。殺溺及被俘者幾三十餘萬。景隆乃奔濟南。燕王來追。復大敗。死者二萬餘。濟南遂見圍。以參政鐵鉉堅守。不下。始。建文皇帝未得敗問。與秦子澄謀。以景隆權尙輕。特賜黃鉞。磨蓋彤弓矢。使者渡江而風失之。復製以賜。尋景隆敗問至京。召還。旣陛見。黃子澄慚憤極。執景隆於朝。班慟哭。請誅以謝天下。建文莫能問也。又二載。師屢覆。燕兵悉渡江。駐龍潭。建文懼。乃使景隆同尙書茹瑺。都督王佐來謁燕王。以割地講和。請王笑曰。事至此。何地可割。吾但欲得姦臣耳。於是景隆等蒲伏密輸款歸。佐谷王守金川門。燕王至。景隆等開門逆之。燕王卽位。以景隆等默相事機。封曹國公。改號曰奉天靖難。階曰光祿大夫。勳曰左柱國。增祿歲一千石。其太子太師如故。賞瑀淇成二公。改修高廟實錄。爲監修總裁。諸裁定功賞大興革。景隆猶以班首主議。天子雖外示崇重。而心恨之甚。諸功臣咸扼腕。謂彼白刃割我。而今以降奴而据我上。其又明年。三法司論劾景隆包藏禍心。蓄養亡命。與其弟左都督增枝。謀爲不軌已。文武大臣成國公能等。吏部尙書蹇義等復言之已。六科都給事中張信等復言之。乃下詔。盡

削景隆勳階官號。絕朝請。勒歸私第。猶以長公主故。不奪其爵。亡何。文武羣臣復言。誦事者至其家。景隆猶坐受閹人伏謁。如君臣禮。大不道。復株及左都督增枝。因詔併奪增枝荊州帥符。逮之。與景隆同繫私第。盡沒其莊田寶貨圖籍。滅獲入之官。而所繫者皆親屬矣。嘗絕其食。旬日不死。始稍稍給食。至永樂末。而景隆竟以凍餒卒。繫禁四十年。男女自相婚配。人以爲姦回之報云。

王寧。壽州人。尙懷慶公主。爲駙馬都尉。公主。太祖第六女。母成穆孫貴妃。建文中。寧通語言燕王。洩中禁事。籍其家。繫寧錦衣獄。建文四年。詔封功臣。稱寧孝於太祖。忠於國家。正直無私。不阿權勢。遂遭誣陷。幾致殞身。達孝推恩。允宜褒答。封永春侯。食祿一千石。與世券。永樂元年。又官其子貞亮羽林前衛指揮僉事。寧嘗侍上。言及太祖時事。上愴然。寧卽勸上誦經。飯僧。爲皇考福利。上不悅。五年。寧坐事。下詔獄死。貞亮先卒。宣德七年。貞亮子彝乞嗣衛僉事。不允。再乞。亦不允。十年。彝又援詔言。公主適孫。請嗣侯。英宗授彝衛僉事。帶俸奉公主祀。

盛庸。江南人。建文時。充參將。隨耿炳文軍失利。又隨李景隆戰燕齊間。互有勝負。已而與鐵鉉守濟南。燕兵圍甚急。庸夜出劫戰。盡憑城禦防。盡毀燕兵諸攻具。捷聞。陞鉉兵部尙書。封庸歷城侯。食祿千石。充平燕將軍總兵官。代景隆北進。與燕兵大戰東昌夾河。殺張玉譚淵。燕兵長驅至淮上。庸進戰靈璧。齊眉山皆敗。遁還。駐高資港。又敗。太宗卽位。庸歸命。敕曰。比以山東未定。命卿鎮守淮安。今鐵鉉就獲。諸郡悉平。朕念山東久困兵革。懣於轉輸。卿宜輯兵養民。以稱朕意。永樂元年。致仕。千戶王欽。發庸狀。陞欽指揮同

知賞銀百兩。未幾，都御史陳瑛劾庸口出怨言，懷異圖，請誅庸，遂削爵，賜死。

茹瑺，衡山人。洪武末，由監生官左通政，遷吏部尚書。改兵部。建文初，以兵部尚書掌河南布政司事。燕兵至江上，建文皇帝遣瑺詣軍中勞問。瑺私稱臣，獻密計。燕兵遂從金川門入。事既定，詔稱王寧及瑺孝於太祖，忠於國家，封寧順昌侯，瑺忠誠伯。寧蓋駙馬，都向與徐尉增壽爲燕內間者也。瑺尋加太子少保。永樂七年，除名回籍。家人興安告其隱事，復械至京。久之，得釋還家。道經長沙，坐不朝谷王，都御史陳瑛劾之。復逮下詔獄。瑺懼，命其子銓市砒霜藏飯中送食，遂死。法司以聞，銓坐殺父律，論死。婦人送浣衣局，幼男發鞍轡局，谷王亦於永樂十五年陰養死。土降庶人，錮南京，闔室自焚。

王佐，不知始所自起。歷官都督同知。燕兵至金川門，建文皇帝遣曹國公茹尚書及佐見燕王龍潭，議割地講和，不聽。三人者遂望風納款，且獻密謀。比至城，金川門遂開，卽位。封順昌伯，食祿千石。與世券，後以嫌死。

史官曰：增壽、景隆、王寧，並以勳貴，托倚肺腑，陰懷攜貳，外輸秘密，增壽誅戮，景隆禁錮，王甯下獄，天道不爽，信然。雖後食報不同，而及身伏辜矣。盛庸氣壯雷奮，屢建戰功，卒傾心仇讐，不免刑辟。茹瑺、王佐，以天子信使，辱命潛款，卽圖榮數年，如浮雲之過眉睫，或父子伏法，或終以嫌死，亦何益哉！亦何益哉！

金忠願成張信王通房寬傳

金忠，鄞人。少慷慨，負義氣。兄戍通州，忠省兄，會燕兵起，布衣甫冠，上謁典儀云：浙東奇士金忠，願見殿下。

說兵事及中朝動靜。得召見。忠言殿下太平皇帝。小人耕江海間。及往來齊魯道上。聞殿下賢譽。服人心久矣。茲舉大事。人材爲急。太宗說立授署紀善。日侍幃幄。贊理戎務。尋陞署長史。已爲眞。即位後。陞工部右侍郎。治事北京。永樂二年。召入兵部爲尙書。忠博覽史籍。議論河懸。儲位未定。上密問。忠歷數古昔適庶故事對。上喜。賜忠大錮。又曰。詹事宮端屬汝。以尙書兼詹事。幸善調護。佐太子。忠侍監國。時時勸起孝。敬篤友愛。小心敬慎。無失禮。毀譽禍福。聽諸天日而已。或譖誘廷臣及宮僚過者。上密令忠察審。忠退。每數日頓首再三。爲白無此事。願陛下寬霽。上或不喜。卽又頓首。言臣敢保其無他。他日有蹤跡。卽如人言。臣甘連坐。以故諸所全獲者多。忠謹厚不洩。佯爲不知也。公每導人寬愛。無爲苛刻。公事輒推同官。使展其才能。有闕誤。引爲己過。不遺片善。不念舊惡。俸賜有餘。周賑鄉族。仁宗卽位。念之。贈少師。諡忠襄。以其子達爲翰林檢討。達幼遭歸寧波學。支俸讀書。比長。宣宗召達還翰林。正統十二年。改禮科給事中。陞都給事中。景泰二年。出爲長蘆運使。

顧成。字景昭。江都人。容貌魁梧。壯勇質直。有膽略。喜習武事。自文其身。誇異人。或謂成黔徒者。非也。丙申。來歸。充帳前親兵。嘗警蓋侍上。出入忠謹。無過。初授百戶。從征。陞金吾副千戶。宿衛。陞指揮僉事。從平蜀。破貴州蠻。克普定。功陞指揮使。普定衛。進都指揮同知。已而征雲南。成扼普定。斷後。進督僉事。充征南將軍。鎮貴州。征五開六洞。破一百三十七寨。斬首三千。建文初。令錦衣指揮譚全諫成班師。二年。進同知。三年。進右都督。是年閏三月。從盛庸至眞定。戰敗。被執。燕王解其縛。曰。吾且用汝。遣至北平。侍世子居守。有

功。太宗卽位。以左都督封鎮遠侯。食祿一千五百石。與世券。又出鎮貴州。申嚴號令。威信並行。討撫諸蠻。搗臺羅寨。斬叛酋普亮。滅其家。羣蠻震攝。卒年八十五。贈夏國公。諡武毅。蠻中皆祠祀成。八子。長統爲普定指揮使。先卒。孫興祖。永樂十二年嗣侯。贈父統侯爲總兵。宣德中坐交趾事徵下獄。正統十四年。從征失律。降都督同知。景帝初。守備紫荆關。詔與伯爵。英宗復辟。詔復侯。出鎮貴州有功。加祿三百石。守南京。景泰中。鎮廣西。坐貪財好色失地喪師。逮下獄。死而釋之。子翰先卒。翰子淳。天順八年嗣侯。卒無子。淳從弟溥者。成諸元孫也。成化元年嗣侯。溥初學國學。解文墨。嘗總兵團營。爲平蠻將軍。鎮湖廣。擒貴苗僞王通滇蜀道。還流移五千家。復爛土長官司。設都勻府。增祿二百石。溥清慎。囊無餘資。英國公張懋爲率布帛供敘事。諡襄恪。子仕隆。弘治十七年嗣侯。仕隆好文諳武。爲京營總兵。寬弘簡實。得士心。充漕運總兵。鎮守淮安。廉幹不苛擾。卒贈太傅。諡榮靖。子寰。嘉靖七年嗣侯。出爲漕運總兵。二十三年。言官劾罷伏羌伯毛漢。代寰。旨下數日。又劾罷漢。用都督劉璽。璽致仕居南京。萬表代璽。寰端清廉明。溫榮孝友。時論韙之。言官竟被考察去。寰復爲漕運總兵。鎮守淮安。尋總督京營戎政。卒。子肇迹嗣侯。國變後。不知所終。張信。臨淮人。父興。開國功。爲永寧指揮僉事。信嗣官。以紫江草塘功。陞都指揮僉事。洪武三十一年。建文皇帝卽位。疑北平大臣薦信有謀。勇名。調北平都司。受密敕。令與謝貴。張昺。合力防燕藩人。信日夕憂懼。母怪而問之。信跪對曰。兒統兵邊陲。焉能無憂。母曰。汝非此憂。其語我故。信屏左右對曰。密旨欲得親王。奈何。母大驚曰。不可。汝父每言王氣在燕。無妄爲禍家族矣。信益憂懼。未幾。敕促信。信艱然起曰。何爲乃

爾。三遣燕邸。燕王辭不見。乃乘婦人輿求見。燕王令入。拜燕王牀下。時燕王稱風病不能言。久矣。信頓首曰。殿下無恙。卽有恙。當急諭臣。燕王曰。余誠病且困。待死爾。信復曰。殿下不以情語臣。朝廷密敕信執殿下。殿下意果無他。幸從臣歸命京師。卽有意。宜告臣。燕王見信稱臣。又意甚誠惻。泣下。告信密謀。立召姚廣孝。朱能。張玉定。計奪九門。信遂從燕兵戰。大寧。真定。鄭村。霸。還軍攻九門營。西克大同。轉戰夾河。藁城。渡淮。破盛庸兵。入金川門。陞都督僉事。太宗卽位。封隆平侯。食祿一千石。與世券伯。太宗時。時呼信爲恩張。凡召太子。北京。察藩王。動靜。諸密要事。皆命信。永樂二十年。征虜功。加少師。洪熙元年。與世侯。券。支。兩。俸。子。鏞。自立功。爲指揮僉事。先卒。鏞子。淳。嗣官。正統七年。信卒。贈鄖國公。謚襄僖。淳以指揮僉事。嗣侯。卒。子。福。嗣侯。無子。弟。祐。嗣侯。卒。無子。弟。祿。與。壻。爭。嗣。下。法。司。理。正。德。三。年。祿。嗣。侯。卒。子。偉。優。給。十。二。年。嗣。侯。王。通。陝。威。寧。人。父。真。開。國。功。爲。燕。山。護。衛。百。戶。從。燕。兵。攻。九。門。戰。永。平。真。定。功。陞。都。指。揮。使。建。文。四。年。肥。河。戰。沒。文。皇。卽。位。贈。金。鄉。侯。謚。忠。壯。進。贈。寧。國。公。通。亦。從。燕。兵。有。功。又。以。父。故。封。武。義。伯。食。祿。千。二。百。石。與。世。券。永。樂。七。年。作。天。壽。山。十。三。年。進。封。成。山。侯。二十三年。與世券。又以父故。加祿。歲一千石。仁宗時。以眞從祀。太宗。宣德元年。充征夷將軍。總兵鎮交趾。未幾。通言交趾反。敕通勦賊。都督方政坐罪。隸壓下立功。二年。斬僞司徒。利賊大懼。通怯不敢追。又爲奄山壽所窘。賊復聚寧橋戰。通敗績。柳升兵又未至。通輒與利賊書和。許畀清化等州地。按察使楊時習以爲不可。力爭。通勵聲叱時習。比升兵至。隘留關。又大敗。升死。通遂與利賊盟。班師。陸行出廣西山。壽。陳智由水道出欽州。凡文武吏士得還者八萬六千六百四

十人。利賊閉留不遣者尙數萬人。三年。廷臣劾通。論當死。繫獄。奪券。籍其家。會赦。宥死。爲民。正統元年。通子琮。乞得祖塋。葬通母。十四年。北狄南侵。廷薦通爲都督僉事。與楊善守京城。禦敵功。陞都督同知。尋守山陵。景泰三年卒。琮爲景陵指揮僉事。天順元年。詔恩琮。得嗣成山伯。卒。子牖。嗣伯。弘治十一年。乞券。孝宗念眞從燕兵有功。又侑食太廟。出原券賜牖。卒。子淇。嗣。吏部言通罪廢琮。嗣伯以詔恩。牖時未許世嗣。執不許。洪嗣伯。上以洪祖眞券故。在許。洪嗣伯。

房寬。未詳何許人。洪武四年。以濟南左衛指揮帥兵五千人。從魏國公達北平。練兵繕城。爲北平行都司。都指揮。燕兵至大寧。守將朱鑑力戰。寬忽降。寬既降。鑑力不支。死之。建文二年。寬戰白溝河。敗。再戰。有功。已而轉戰濟沛江淮。皆有功。歷陞督府僉事。太宗卽位。封思恩侯。食祿八百石。世指揮使。史官曰。金忠。布衣也。始燕終燕。而立朝建事。寬平有大臣之度。可爲名臣矣。獨是時上有共主。科目薦辟。並行不滯。亦可揚蠶天衢。播聲功業。乃走燕藩爲謀首。曾弗回首金陵。稍爲顧念。姦回之目。不能恕矣。顧成等。或作降鹵於戰。或驟倒戈於對壘。或獻密議於未形。或忘先志於開關。咸北平之嘉績。而春秋之罪人。知董狐復起。無以貸也。

徐正傳

徐正。吳江人。業微。父爲人治刀筆詞訟。不齒。而正少美貌能文。人見輒詫恨曰。無天耶。徐氏生此兒。正舉進士。授給事中。侍英宗左右。上愛之。嘗撫慰曰。勉哉。將大用爾。然正小人。黷。沾沾無所以當上者。英宗

北狩還。遂於南宮。正密疏曰。太上皇社稷罪人。今過奉非計。且下或借爲奇貨。宜有以處之。夫爲天下不顧家。陛下毋愛此名也。帝心難之。不用。又數載。正已遷大理少卿。英宗復辟。見正。勞曰。卿故侍吾給事耶。日召對。賜金帛酒食。而正亦且幸。疏毀不發矣。會英宗一日坐便殿。旋風吹文書墮地。取覽。乃正疏也。怒甚。連發使召之。至。則投疏令自拾。正魄奪。噤不能對。反接。凌遲於市。籍其家。

史官曰。徐正佐佐小人。見事透徹。其於景帝謀之。其臧乎。詩人之旨。不思勉哉。大用之恩耶。風落奏書。喪厥姿令。訟師之報。不亦宜乎。

劉吉萬安尹旻焦芳傳

劉吉。字祐之。博野人。性譎險。章佞。登正統戊辰進士。選庶吉士。授編修。景泰初。侍經筵。預修寰宇通志。進修撰。天順中。侍東宮。講讀。預輯一統志。進侍讀。成化改元。修英宗實錄。成。陞侍讀學士。尋陟禮部侍郎。己丑。簡入內閣。兼學士。丁酉。進禮部尚書。戊戌。加太子少保。文淵閣大學士。庚子。遭父喪。詔賚以羊酒寶鈔。令起服視事。吉三上疏辭。陰託貴戚萬喜爲援。得不允。編修陳音致書吉。勸其抗疏終制。不報。人遂無敢言者。吉每談笑對客。殊無戚容。尋修文華大訓成。加太子太保。武英殿大學士。給一品誥命。甲辰。改戶部尚書。護身殿大學士。丁未。秋。孝宗卽位。科道官交糾萬安尹直。以次罷去。吉獨不動。倚任尤專。慮科道有言者。乃傾身阿結。又建言欲超遷科道官。處以不次之位。會詔量才舉用。廢滯。吉特爲奏拔者。原任給事中賀欽。御史強珍輩十八人。部屬惟員外郎林俊一人。欽等皆名士。吏部已次第擬擢。而吉復爲此。欲以

媚衆。諸凡科道爲上所採納者。悉謂由己以市恩。自是人無復有言之者。弘治戊申。進少傅兼太子太師。吏部尙書。知經筵事。己酉二月春不雨。詔儒臣撰文請禱。吉率同官上言。邇者姦徒襲李孜省鄧常恩之故術。見月宿在畢。天將陰雨。遂奏請祈禱。幸而有中。以希進用。謹按詩云。月麗於畢。俾滂沱矣。書云。月之從星。則以風雨。今月宿在畢。雨降之徵也。臣恐侍門一開。爭言祈禱。啓釁召亂。實基於此。所以祝文臣等不敢奉命。庚戌星變。見吉又率同官上言。邇者妖星出天津。歷杵曰。近營寶。考之圖志。爲兵。爲饑。爲水旱。矧今南海修垣。汝河修橋。俱非急務。宜停止以答天戒。上嘉納之。未幾。風雹發自天壽山。毀瓦像物。震驚陵寢。有旨戒諭羣臣修省。遣官祭告。時翰林侍讀張昇上疏言。應天之實。當以輔導之臣爲先。請明正吉罪。昇得罪。謫南工部員外郎。由是人目之爲縣花。以其耐彈也。吉聞之。大怒。或告以出自監中一老舉人善恢。諧者。吉遂奏舉人監生三赴會試。不第者不許再試。辛亥秋九月。上欲封張皇后弟伯爵。命吉撰誥券。吉言必盡封周王二太后家子弟。乃可封。其意欲稽遲以俟賄。上廉知而惡之。遣中官至其家。勒令致仕。吉去位。猶詔有司月給米五石。歲撥人夫幾名。降敕護之還鄉。瀕行。京城人欄街指之曰。咲。縣花去矣。既歸。踰年卒。六十七。贈太師。諡文穆。官其子皋爲太常少卿。

萬安。字循吉。眉州人。貌魁碩。眉目如刻畫。外寬內險。媚邪蠱正。以干大位。登正統戊辰二甲第一名進士。選庶吉士。授編修。景泰壬申。以易儲。遷左春坊司直郎。尋轉右中允。改尙寶司丞。兼編修。天順戊寅。侍講兼學士。侍皇太孫講讀。成化改元。預修英宗實錄。陟少詹事兼學士。己丑春。遷禮部左侍郎。兼翰林院學士。

士入內閣預機務。先是有同年進士李泰，中官李永昌之猶子也。泰已累官少詹事兼侍講學士。安因深結泰。至是內閣員缺，議用泰。泰謂安曰：「子先爲之，我不患不至。」安遂被命在閣。惟以囑托貪賄爲事。聯萬貴妃爲同宗。時貴妃兄萬通亦授錦衣衛都指揮。通妻王氏出入掖庭。安陰陰家人給通妻往來布腹心。爲內援。壬辰春二月，以禮部左侍郎兼大學士掌會試事。未幾陟禮部尙書。加太子少保。改戶部尙書。兼文淵閣大學士。癸卯，皇太子出閣。時文華大訓成，命詹事彭華左中允、周經等以進講。東宮起立拱聽。安獻諛，以東宮不宜勞，謂講官宜立。疏請坐聽。華與經不從。竟得如禮。時妖僧繼曉幻吏李孜省皆以術得寵。孜省江西人，安緣其同鄉彭華浸密孜省，深相結納。黨援扶擠，遂百計引其附己者而退其不附者。一時詞臣若禮部侍郎邢讓、祭酒陳鑑、方正之士如王恕、馬文昇、耿裕、秦紘等相繼斥去。舉朝側目，無敢顯訟其過者。尋加少師兼太子太師、華蓋殿大學士。成化丁未，孝宗卽位。庶吉士鄒智與安同鄉，憤其所爲，率同館士吉人李文祥發其恃權怙寵之姦。御史湯鼎文、姜洪等交章糾劾。先是有倪進賢者，少無行而安與爲腹心，取爲庶吉士。擢御史，日與講房中之術。由是穢聲益彰。孝宗在東宮時，頗聞。至是於宮中檢獲疏一小篋，皆房中術。悉署曰「臣安進」。上遣懷恩攜至內閣，示之曰：「是豈大臣所爲乎？」安慚，不能出一語。亟欲斥去。上又命恩執諸臣奏章赴閣，示安。每展一卷，安卽跪泣乞哀，猶無去意。恩令摘其所懸牙牌，叱曰：「請出矣。」安始惶遽索馬歸第。初，安久戀內閣不退，人或微諷之，答曰：「惟一死報國耳。」及被出，在道猶看三台星，冀復用也。其無恥如此。尋卒。贈太師，諡文康。其子翼爲南京禮部侍郎，孫弘璧爲編修，俱淫。

恣不檢。卒無嗣。

尹旻字同仁。歷城人。小有識計。而心譎行詭。登正統戊辰進士。初選庶吉士。改刑科給事中。陞通政司參議。受命往陝西調度軍餉。天順壬午春三月。旻奏敵退河間。所調集軍馬衆盛。輸供已極。乞放還。從之。尋還京。明年癸未。進吏部右侍郎。成化己巳春。轉吏部左侍郎。九年癸巳春。陟吏部尙書。尋加太子太保。是時修山東志。囑載其居吏部有知人之鑒。所選吏皆稱職。因僞撰謠曰。公道不如王恕。選法不如尹旻。以自詡異實。當其掌天曹也。每各部司屬之賢能者。輒向人譽之。以表其知人。及至推舉。卻先科道官。而部屬中有出入中官之門者。亦先之。平日所稱揚者。又皆不與也。郎中陸容嘗論其事。若戶科給事中李孟陽。奉使山西。及其回過代州等處要地。皆武備不飭。陽至京。奏請設整理兵備副使一員。以專委任。兵部覆奏。制曰。可。及咨吏部。乃寢不行。後詰其故。以副使缺。例於刑部年深郎中內。以次陞補。時旻念一鄉人。覬覦京職。不欲外。又欲越他陞。恐機泄。遂已。未幾。其覬覦者果擢大理寺丞。丁酉。立西廠。太監汪直用事。恣暴。時尙書項忠。約諸堂上官疏汪過惡。旻不從。忠遂具草。詞意凱切。令郎中張瑛。姚璧。持詣各堂。上僉名。仍送藁於旻。俾收以自別。旻卽潛報汪。同朝薄之。旻子龍。登進士。初授翰林編修。未幾。轉侍講。驕嫚。喪檢。士行不齒。旻自天順癸未爲吏部左右侍郎。尋陞尙書。後累進太子太傅。二十有四年。素與萬安不協。安亟欲去之。每語所親厚者曰。言官有能劾同仁者。勿憂無大官做也。會內閣劉翊與旻俱山東人。最厚善。安欲陷旻。爲翊所梗。不得行。成化四年。翊去位。安遂結李孜省譖旻於上。因嗾言官劾旻。從其子龍招

權納賄。私其鄉人。朝廷逮龍下詔獄。命三法司錦衣衛廷鞫之。遂黜龍爲民。長落太子太傅。令致仕。及其鄉里故舊以資緣進者。皆降調外補云。後旻居家朝士猶有上章乞籍其家之半以賑山東饑者。其不協士大夫之心如此。弘治十六年卒。贈太保。諡恭簡。

焦芳字孟陽。泌陽人。性險愎。登天順甲申進士。選庶吉士。授編修。轉侍講。進侍講學士。嘗坐事。謫湖廣桂陽州同知。歷霍州知州。陞四川提學副使。調湖廣副使。因上疏自治。陞南京右通政。以憂去。起。仍爲通政。再以憂去。起。爲太常少卿。兼侍講學士。擢禮部侍郎。改吏部侍郎。正德改元。吏部尙書馬文升去位。時司禮監太監李榮與芳同鄉。因爲內援。遂以芳代尙書。是冬十一月。以尙書兼武英殿大學士。入閣辦事。甚妨部務。尋加太子太保。兼謹身殿大學士。專在內閣。是時正人斥逐。羣邪彙征。逆瑾專寵。芳結爲黨。遂援兵部尙書劉宇爲吏尙。而以曹元爲兵部尙書。從其類也。己巳。焦以老病致仕。以宇兼文淵閣大學士。入閣預機務。明年春。又以元兼文淵閣大學士。芳始比尹旻父子。尹坐敗謫。及爲吏部尙書時。值逆瑾亂政。號八黨。大學士劉健會同戶尙書韓文。率百僚伏闕固爭。將除之。芳潛於瑾預爲之所。由是劉健謝遷。韓文楊守隨等相繼斥罷。黨勢益熾。遂以芳入閣。表裏爲姦。凡變案成憲。桎梏臣工。杜塞言路。酷虐軍民。皆芳導之。姦邪如曹元劉宇。媚竈續貂。成溷政本。芳爲之援。暨充孝宗實錄總裁官。筆削任意。凡先正名卿。悉肆醜詆。授意檢討段昇。以快其忿。初在吏部時。郎中張綵與瑾同鄉。芳力薦之。驟至冢宰。賈官鬻爵。名器壞濫。其子黃中。尤狂誕恣睢。方廷試畢。芳欲取魁選。旣而衆論取呂柟爲第一。芳謂諸執事抑之。遂入

言於瑾。改編修願清等二十餘人爲部屬官。授子黃中爲檢討。劉宇之子仁等六人俱庶吉士。黃中尋陞編修。踰年轉侍講。時士官岑濬沒入家口。有妹。色殊甚。芳聞求瑾得之。後臥病。黃中聚麀。人咸鄙之。瑾伏誅。言官交劾其罪。父子皆褫職爲民。中原盜起。有趙鏗者。入泌陽。芳僅以身免。盡發其先世塚墓。無遺骸。取芳衣冠被庭樹。歷數其惡。命劍士斃之。曰。使吾手誅此賊。以謝天下。

史官曰。回獮乘權。則橫播吞噬。譬彼豺虎。性秉凶殘。不必撰牙羅踏行人。何虞每遭伏攫也。豺虎窟囿。旣蔽翁翳。伺釁而發。無所顧忌。所由然矣。姦臣淫猾狼戾。必且援引羣陰。擠排善類。輿結婦寺。外張餒毒。快心於正人之沈淪。借端於天子之威福。善則歸己。惡則歸君。及至身死名墮。遺臭漢青。悲夫。劉吉城府深密。左右多讒。斥害剛方。惡聞其過。而且奪服。忍於親。重賄忘其君。此網常之大蠹。而孔孟之必誅也。至晚年一疏。豈所謂分香賣履。而欲以掩其生平也。萬安僂薄陰賊。寡廉鮮恥。以進房中爲媒榮之階。用家人爲梯援之計。潛通宮掖。伏異黨同。跡其生平。無善可稱。尹長挑釁詭嗾。陰誘刻深。鄭曉謂其選法通敏。賢愚皆悅。豈惇史哉。焦芳肆姦實錄。又不止詆誣一時。欲以穢蠱千古文章。自矜驚其鴟叫。若趙鏗者。真可謂奇男子哉。蓋天之假手於鏗。而殲厥先骸耳。撫册及此。白日爲昏矣。

王瓊傳

王瓊。字德華。太原人。登成化甲辰進士。心雖不甚樞。而饒才智。初授工部主事。累官至戶部右侍郎。正德八年夏六月。代孫交爲尙書。先是正德六七年間。流賊猖獗。北畿輔山東之民苦焚掠。屬歲登。賴不告饑。

惟河間一府病水荒。交李東陽奏罷山東直隸等處京邊糧草數百餘萬。以故京師歲用不繼。轉借太倉。時遣戶部侍郎楊澤督發太倉庫銀二百萬兩往各州縣和買糧草。至是瓊代屬賦已平。因追駁其和買滋弊。如下令凡官軍捕賊經過州縣驗勘。合供給口糧草料。准其稅不足。官爲措處。事畢處補爲簡便。且謂交約愛民而不知所以處。東陽徒負文學之名。使當流賊內擾之時。設有邊方重警。東陽輩將束手無策。又曰。繼孫後。使無句考之法。完惟正之供。而申明鹽法以助之。則邊兵缺食。必生缺望矣。遂奏查餘剩料豆。令補給所坐軍糧。餘草數千萬束。多朽腐不堪用。令減價變賣。得銀二十六萬兩。以補宣府軍餉。人以是多瓊之智計。正德乙亥夏四月。調兵部尙書。代陸完。時朱甯有寵用事。瓊與甯善。會有旨召彭澤。還兵部。瓊仍本部。瓊因執初御史馮時雍之奏。乞留澤甘肅候寫亦虎仙等回處。置停留還京不聽。丙子。土魯番寇甘肅。瓊請敕切責都御史李昆等。已而差給事中黃成御史趙春往勘。回奏。昆等有功無過。瓊遂撫澤。昆前後欺罔事跡。奏劾其擅命遣使納幣土魯番。復許增添失信。致啓邊釁。下法司議。時各部大臣及言官皆以澤有平賊功。戶部尙書石玠禮部毛澄亦以爲大夫出使於外。苟有利於國家。專之可也。奏入。朱寧因有憾於澤。內批落澤職爲民。初澤忿朱寧專。常對人發憤。瓊以語寧。恐不信也。一日瓊伺澤過其家。先匿寧屏後。瓊以言激澤。澤果大怒。詈寧。自是深憾澤。欲斥之。先是大學士楊廷和毛澄蔣冕俱欲庇澤。令兵部再勘。瓊復曰。納幣邊庭。失信夷人。致貽後患。利乎不利乎。事須勘明。更勘何事。澤罷廷和亦憾之。正德辛巳。世宗卽位。廷和請捕殺寫亦虎仙。遂令法司欲坐瓊以勾引姦夷。瓊繫獄。已而勘無干。

涉釋之。尋轉兵部尙書。鎮守三邊。嘉靖己丑。南給事邱九仞劾其先朝遺姦。表裏閹宦。外交逆藩。計斥忠良。壞盡祖宗之制。難逃亂賊之刑。竊恐斯人難付重寄。已而吏科給事中夏言疏。亟除姦邪大臣。謂瓊賦性姦兇。宅心險賊。內給嬖倖。外附錢寧。勾引姦夷。擠排言路。請重加竄斥。以爲大臣阿附權姦者之戒。遂致仕。後哈密議起。侍郎桂萼疏請明功臣。發壅蔽。謂嘉靖三年五月。陝西以處決各夷。火者八月。遂有甘肅之變。當時哈密深入。以殺降爲詞。實爲訴冤之舉。故初不標掠。而誤事之人陳某等謬云志不在小。以欺皇上。皇上爲之震動。當時大臣反議大發師以驅之。令不得訟其冤。遂使西北一邊生靈塗炭。天下五尺童子所共知也。科道曾無一人爲皇上言者。歷訪乃知以楊廷和欲致王瓊之罪故耳。乞特起王瓊。以絕此弊。臣初上此奏。卽謀於大學士楊一清曰。一時六部及在外耆舊。無可比王瓊者。一清曰。論其才一時誠不能及。但其心術姦險。衆不肯信。臣曰。馭得其道。天下狙詐咸作役使。況今聖天子在上。用之於久廢之餘。必當深思所以報皇上者。一清曰。雖然。子姑存此議在天下可也。人言且誣瓊曰。宸濠之反。王瓊實受其賄。今考當時。舉朝大臣各懷二心。不肯動心。而倡言兵討者。獨一瓊耳。言官反誣爲受賄。不已冤乎。卽如大學士楊一清。方皇上起用之初。人言亦何所不至。今既立朝。當時言者。亦復紛紛否乎。此皇上所親見也。乞留神裁察。誠不特爲瓊一人承一時之乏而已。不起以卒。

史官曰。王瓊才具擅美。設施焜燿。往往謀事有條。而存心險僻。舉動乖張。夏言一疏。殆刺骨之談矣。人臣能秉志公忠。卽無才可稱。不失平流。若瓊者。所謂自敗其燬者也。

